


Ayao amisy urairi
wanyin



New Testament in Yawa (ID:yva:Yawa)

Ayao amisy urairi wanyin
New Testament in Yawa (ID:yva:Yawa)
Perjanjian Baru di Yawa

copyright © 2011 Wycliffe Bible Translators, Inc.

Language: Yawa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yawa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 11 Nov 2022 from source files dated 29 Jan 2022

f32aa90e-2509-5f04-a3ab-17abf547cfde

Contents

MATIUS	1
MARKUS	50
LUKAS	79
YOHANES	130
ARAKOVO MATUTIR	167
ROMA	217
1 KORINTUS	241
2 KORINTUS	264
GALATIA	279
EPESUS	287
PILIPI	295
KOLOSE	300
1 TESALONIKA	306
2 TESALONIKA	311
1 TIMOTIUS	314
2 TIMOTIUS	321
TITUS	326
PILEMON	329
IBRANI	331
YAKOBUS	349
1 PETRUS	355
2 PETRUS	362
1 YOHANES	366
2 YOHANES	372
3 YOHANES	373
YUDAS	374
MUNIJE AMA AKARI	376

Ayao Kovo Amisy MATIUS

*Yesus Kristus apa anene awa susye
(Lukas 3:23-38)*

¹ Yesus Kristus, opirati Daud muno Abraham aya ajavip, avaki no susye so rai:

² Abraham po Isak avaki,

Isak po Yakob avaki,

Yakob po Yehuda muno apa arakove mavaki,

³ Yehuda po Peres muno Zera yavaki
(aya akoya mi Tamar),

Peres po Hezron avaki,

Hezron po Ram avaki,

⁴ Ram po Aminadab avaki,

Aminadab po Nahason avaki,

Nahason po Salmun avaki,

⁵ Salmon po Boas avaki

(apa akoya mi Rahap),

Boas po Obed avaki

(apa akoya mi Rut),

Obed po Isai avaki,

⁶ Isai po Akarijo Titi Daud avaki.

Daud po Salomo avaki

(apa akoya mi Uria apa anamu),

⁷ Salomo po Rehabeam avaki,

Rehabeam po Abia avaki,

Abia po Asa avaki,

⁸ Asa po Yosafat avaki,

Yosafat po Yoram avaki,

Yoram po Uzia avaki,

⁹ Uzia po Yotam avaki,

Yotam po Ahas avaki,

Ahas po Hizkia avaki,

¹⁰ Hizkia po Manasye avaki,

Manasye po Amon avaki,

Amon po Yosia avaki,

¹¹ Yosia po Yekonya* muno apa arakove mavaki

arono naito Babel wo vatano Yahudi maugavo arove uta no Babel.

¹² Arono vatano Yahudi maugave uta no Babel rai to, umbawe:

Yekonya po Seatiel avaki,

Seatiel po Zerubabel avaki,

¹³ Zerubabel po Abihud avaki,

Abihud po Eliakim avaki,

Eliakim po Azor avaki,

¹⁴ Azor po Zadok avaki,

Zadok po Akim avaki,

Akim po Eliud avaki,

¹⁵ Eliud po Eleazar avaki,

Eleazar po Matan avaki,

Matan po Yakob avaki,

¹⁶ Yakob po Yusup avaki.

Yusup apa anamu mi Maria,

omi mo Yesus avaki opi awaino Mesias, Opamo Amisy po apatimu indamu Po vatano mine so mapaya ayao kakaije rai.

¹⁷ Weti ratode vintabo, no Abraham aija ndeo Daud ai, awa susye abusyinara eane mambisy. Muno Daud aija ndea arono vatano Yahudi ube arove no Babel rai, awa susye abusyinara eane mambisy. Muno arono vatano Yahudi ube arove no Babel raija ndeo Mesias ai, awa susye abusyinara eane mambisy.

Yesus Kristus ano

(Lukas 2:1-7)

¹⁸ Yesus Kristus ano raije maisyare so: Maria, omamo Yesus Kristus apa akoya mije, ama vainye raveo Yusup ai. Weramu yana ibanam dainy, Maria mbe ranakeave, weye Amisy po apa Anawayo Vambunine raugaje Maria rai indamu mbe ranakeave. ¹⁹ Yusup, ama anap, opamo tavondi Ananyao Musa rai mavabe, weti pare po rauguje aora. Weramu pare po rauguje maninimbe indamu vemo vatane wo raen ti Maria nsamane nora.

²⁰ Yusup po anakotare umaso ratantona no anuga, arono naije nikimarive, po naito Amisy inta aeno de aiji. Umba naito Amisy umaso po raura pare, “Yusup, Daud apa ajavijo winy, vemo njanivo nyo Maria raovani nora! Weye Amisy po Anawayo Vambunine raugaje rai indamu mbe ranakeave. ²¹ Indati mo arikainye inta avaki, umba nyo Apa tame veano awainamo Yesus, weye indati Po apa kawasae mapaya awa ayao kakaije rai.”

²² Anakotare umaso nande indamu maisyoy ayao Amisy po raura Apa anawae aijo wusyimbe rai no taiso:

²³ “Wanya kamurame inta mbe ranakeave, mo arikainyo anya inta avaki, umba wo Apa tame veano awainamo Imanuel.”*

Tamo Imanuel umaso ama ine mare “Amisy tuna wansautan.”

²⁴ Yusup nikija seo, umba beto naito Amisy apa ayao uma po raura we rai. Weti umba po Maria rauga ti po raovan, ²⁵ weramu nikijo rarijate ramu ava ntuna ama arikainyo anya autan. Umba Yusup po Apa tame veano awainamo Yesus.

2

Vatano Majus ude Yesus ai

¹ Yesus ano no munijo Betlehem no no Yudea, arono Herodes be akarijo titive. Arono naije vatano majus una no ranijo wanamuram ude no Yerusalem. Onawamo vatano wo anainame rakani no tumo

* 1:11 Yekonya awain taponamo Yoyakin (2 Raja-raja 24:14-15). * 1:23 Yesaya 7:14

naumo warae. ² Ude no Yerusalem umba wo ranajo ware, “Rui rati Akarijo Titi Yahudi wanyino umba ano kai? Reamo Apa tumo bare aen no ranijo muram ti reamare wande ra wamo ararimbe.”

³ Arono Akarijo Titi Herodes po ayao umaso ranaun, anuga nseo majeve, muno kawasaeyo Yerusalem mansautan tenambe. ⁴ Weti po syeno akokoe utantuna no Yavaro Amisy rai muno kuruno Yahudi manugande tenambe. Umba po manajo pare, “Rui rati Amisy po raurairive pare Mesias anori?”

⁵ Wo raura akanande ai ware, “Mesias ano no munijo Betlehem no no Yudea. Maisyare muno anawae Mika po raurairive omais, pare:

⁶ Winyirati munijo Betlehem no no Yudea, winyamo munijo mamaun, yara nya tame mammo makoeve no Yudea, weye winyirati indati nyo Akarijo Titi inta aroron

indamu be akarive Amisy apa kawasae Israel mansai. * ”

⁷ Herodes po ayao umaso ranaun, umba po vatano majus umawe mawainde maninimbe. Po manajo pare, “Nanduija pirati wapo tume umawe aen?” ⁸ Arono wo raura kakavimbe aija jewen, umba naije Herodes po matutir pare, “Wata no Betlehem, wapo arikainye umaso akani mavabe. Arono wananta Aija jewen, wapavave wapakare rinai, wapo Apa norije raura kakavimbe rinai indamu syoroto ribeaje Ai tavon.”

⁹ Herodes po raura mansaija jewen, umba vatano majus umaso wuje wuruta. Wuruta nava tumo uma wo aeno manasyimbe seo no wanamuramewe pui kobe to no no Arikainye umaso anorijoe ama von. ¹⁰ Arono wo tume umaso aen, manayanambe rave! ¹¹ Usisa no yavare ama uga, umba wo Arikainye umaso pe akoyo Maria me yaen. Naije ubeaje no Arikainye umaso amun indamu wo ararimbe. Umba wo awa romane rauguje indamu wo raunanto Ai, omamo emasije, kemenyane, muno muri. Ananuge umaso ama mangke nseo rave. ¹² Naije Amisy po rarorono mai no awa nikimarije rai indamu vemo wakare no Herodesa nui jinya, yara unajivo unanuijo kajinta rai jakato.

Yusupa pe Maria me yo Yesus auga wansanan ti uta no Mesir

¹³ Vatano majus wuruta kobe, umba naito Amisy de arorono Yusup ai no apa nikimarije rai, pare, “Winseo indamu nyo Arikainye so pe akoya me yaugav indamu wanaji da wata no Mesir. Herodes pare po Arikainye so akani indamu po aubaisy, ti

wata wano no ratuije yava syo raura wasai jakato rati.”

¹⁴ Weti Yusup nikija seo, po Arikainye umaso pe akoya me yaugav, pare, “Namane so wanaji da wanta no Mesir.” ¹⁵ Una no ratuije yava Akarijo Titi Herodes kakai. Ana nande umaso mammo mamaisyo ayao Amisy anawae Hosea po raura we rai pare, “Amisy po raura pare, ‘Syosya Arikainye awain puje no Mesir.’ ”*

Herodes po arikainyo una no Betlehem maubaisy

¹⁶ Umba Herodes po raenamo vatano majus umawe wo aponae to, ti pari rave. Weti po apa naite matutir indamu wo arikainyo anya awa tume rurumara makaje una no munijo Betlehem muno ama varodore mansaubaisy, weye aemen irati vatano majus awa ayao wo raura we rai, mare wo tume umawe aeno tumo rurumo nandijawe. ¹⁷ Herodes apa ana po rave no Betlehem umaso mammo mamaisyo ayao Amisy anawae Yeremia po raura rai pare:

¹⁸ “Danito no munijo Rama

Rahel moyo daveo ama arikainye mai.

Muno monayo vatan inta wo rayovei, weye ama arikainye ugwenen to.”*

Yusupa pe Maria me Yesusa pe una no Mesir wakare no Yudea

¹⁹ Arono Herodes kakai to, Yusup pamo ta no no Mesirija nene. Umba naito Amisy inta de arorono ai jakato no apa nikimarije rai. ²⁰ Naito Amisy umaso po raura pare, “Vatano ubeker ware wo Arikainye so aubaisy ugwenen to. Weti winseo, nyo Arikainye so pe akoya me yauga da wapakata no Israel.”

²¹ Weti Yusup nikija seo, umba po Arikainye umaso pe akoya me yaugav kobe wakare no Israel. ²² Weramu naije akato Yusup po ranaun Arkelaus, Herodes apa kavo, po aja anigwan be akarijo titive no Yudea. Weti Yusup janivo poroto no Yudea rajiji. Umba Amisy po rarorono ai no apa nikimarije rai jakato indamu wakata no Galilea. ²³ Weti wakata no Galilea rai, usisa no munije ama tame mirati Nasaret. Ana nande umaso mammo mamaisyo ayao Amisy anawae wo raura rai ware, “Indati vatane wo Mesias aura ware Opamo vatano Nasaret.”

3

Yohanes Pembaptis pananyaube (Markus 1:1-8; Lukas 3:3-9, 15-17; Yohanes 1:19-28)

¹ Noa nugoenta, umba Yohanes Pembaptis poroto no nugo vabukane vono maninimbe no Yudea. Naije po ayao Amisy

raura pare, ² “Wasakinav irati wapa ayao kakaije rai, weye masyoto Amisye de be akarive no mine vone so nandea mararai to.” ³ Yohanes umaso pamo anawae Yesaya po aurairive to pare,

“Vatane inta ugwaimbe no nugo vabukane vono maninimbe pare:

‘Wapo unanuije ratayao irati Amisye ai, wapo ratayao da nsarokir inda panya rai.’ ”[✠]

⁴ Yohanes umaso pamo po unta apa ananemane rave ansumbe, muno po sapije apa kea rave tarandimbe. Apa ana daisye mammo kao syankerem muno po anyauene ama mana ramanam tavon. ⁵ Vatane wanui rave ude no Yohanesa nui. Vatano una no Yerusalem muno vatano una no Yudea ama munije rai tenambe muno vatano una no varodoro mana Yordan, ude tenambe wo Yohanes anaun. ⁶ Wo awa ayao kakaije raura Amisye ai umba Yohanes po mau-gasyo kuvuni no mana Yordan rai.

⁷ Vatano Parisi muno Saduki wanui inta ude no Yohanesa nui tavon, ubeker indamu po maugasyo kuvuni mana rai. Weramu arono Yohanes po maeno udei, po raura pare, “Weapamo vatano mamun maisyare tawae mamunoe! Wabeanimaimbe wade no so? Wapo rakarae wapare syo wasaugasya kuvuni mana rai, wea indati wanajivo Amisye apa pari mangke makare akatoe rai. Weramu wapa ana wapo ratantona mamaisye ramu. ⁸ Syare wasakinavo wapa ayao kakaije rai rati, umba ana ngkove obo mi wapo rarijat, wea umba mamaisy. ⁹ Weramu vemo wasararin wapare, ‘Abraham opamo wama anena piye, ti munije ama akari indati Amisye po mangke raugaje wansai jewen,’ wemai nora! Syo raura wasai: Amisye pamo bambunin po orame wato ranigwan ube vatanbe ti Abraham apa ajavi waino mai. ¹⁰ Amisye apa mangke po ratayao vatane mai mammo mararai kobe to. Apa tama mawes, pare Po inyoe rate no ama ruke rai. Weti inyowo rui mirati mo mano kove rauguje ramu, weamo tama veano rate ti ramaugasyo taname rai.

¹¹ Syo wasaugasyo kuvuni mana rai indamu mbe rarorombe weapamo wasakinavo wapa ayao kakaije rai to. Yara indati Vatane inta de opamo panakoe irati inakivan, weti Apa ajo kokome mammo syo raugave kakai weye risyamo imamaisye ramu. Indati Opamo po wasaugasya kuvuni mana rai jewen, yara Po Anawayo Vambunine ratutir maje wasai muno taname ntavon.* ¹² Opamo aurata irati Vatano po bayaije

raijar no anem, Po veano gandume rarayan bintabo. Po ama ine ranugan siso tuna no Apa yavare rai, yara Po ama kea ramero tanamo nen tutire rai.”

Yohanes Pembaptis po Yesus augasyo kuvuni mana rai

(Markus 1:9-11; Lukas 3:21-22; Yohanes 1:32-34)

¹³ Arono naije Yesus no no Galilea de no mana Yordan indamu Yohanes po augasyo kuvuni mana rai. ¹⁴ Weramu Yohanes pare po ansopi, pare, “Risyamo vatano mamaun, yara Winyamo vatano akoe. Weti Nyo in-augasyo kuvuni mana rai, wea umba ma-maisy, yara syo naugasyo kuvuni, weamo mamaisye ramu.”

¹⁵ Umba Yesus po raura nakananto ai pare, “Nyo inaugasyo kuvuni kai, indamu rintavondi Amisye apa bekere rai vintabo.” Weti Yohanes po Yesus augasyo kuvuni mana rai.

¹⁶ Yesus no no mana uga tipuga akaeyo, umba kavuratawe naume nсанека, umba peraseo Po Anawayo Vambunine raeno maje tuna Aiji, maisyare insanijo punamoe. ¹⁷ Umba danito Po Amisye anamote ranaun ngkinde no no munijo ntititi mare, “Sopamo Sya Arikainyo inanuga no Ai. Inanayanambe Ai rave.”[✠]

4

Anakakai Akoe po Yesus aponae
(Markus 1:12-13; Lukas 4:1-13)

¹ Umba Anawayo Vambunine mo Yesus augav prototo no nugo vabukane vono maninimbe indamu Anakakai Akoe po aponae. ² Masyote tename jirum Yesus sambayambe muno atawandijo marore rai. Masyote umaso mewen, umba Yesus maror. ³ Weti Anakakai Akoe de po raura nanto Ai pare, “Ranivara Winyamo Arikainyo Amisye pi Winy, weamo Nyo orame wato raura aje indamu mbe anaibe Nyo raisy.”

⁴ Weramu Yesus po raura akananto ai pare, “Syonaе, weye Ayao Amisye mo ratoe mare,

‘Anaisye bo mi vatane wo rai da umano raije ramu.

Yara utavondijo Amisye apa ayao po raura rai tenambe, weamo vatane ujaisyo rai.’[✠] ”

⁵ Umba Anakakai Akoe po Yesus augav to seo te no Yavaro Amisye ama tati rai jakato no Yerusalem. ⁶ Naije Anakakai Akoe po raura nanto Yesus ai pare, “Ranivara Winyamo Arikainyo Amisye

[✠] 3:3 Yesaya 40:3 * 3:11 Ayao taname so ama tunato raije mbare ramu. Vatane inta ware wansaugasya taname rai omamo indamu mo wansanuga ratayao da ngkakavimbe (1 Petrus 1:7; Markus 9:49). Yara inta ware taname so raugaje vatano wanave jewene obo mansai (Matius 3:10; Muni Akari 20:15). ✠ 3:17 Yesaya 42:1 ✠ 4:4 Ulangan 8:3

pi Winy, weamo nsopa da ntemasyo no mine waraya. Indati nanasine mamō inta ranepate ramu, weye Ayao Amisyē mo ratōe mare,

‘Amisyē po apa naite matutir wo naman; wo naijaro maneme rai inda vemo najo rantukamo orame rai jinya.’[✱] ”

⁷ Yesus po raura akananto ai pare, “Syonaē, weye Ayao Amisyē mo ratōe tavon mare,

‘Vemo nyo Amisyē atopano apa vambunine rai jinya.’[✱] ”

⁸ Naije akato Anakakai Akoe po Yesus augave seo no pukamo titi rave inta rai, umba po munijo akokoe vatane ube akarive rai tenambe no mine tename so rarorono Ai, muno ama romane rautan. ⁹ Umba po raura nanto Yesus ai pare, “Wimbeaje rinai muno Nyo inararimbe, wea umba syo munije tename so raunande indamu winyaura rai tenambe.”

¹⁰ Umba Yesus po raura nakananto ai pare, “Anakakai Akoe, nyoronto! Syonayo nya ana ndaura wato rai, weye Ayao Amisyē mo ratōe taiso:

‘Nyo Amisyē obo ararimbe, nyanapatambe Obo ai.’[✱] ”

¹¹ Umba Anakakai Akoe po Yesus apaya nara naito Amisyē ude wo aeranande.

*Yesus pananyaube no Galilea
(Markus 1:14-15; Lukas 4:14-15)*

¹² Yesus po ranaun Yohanes Pembaptis aijar ausiso no tanoano makova rai to, umba poroto no Galilea, siso no Apa munijo Nasaret rai. ¹³ Weramu no no Nasaret nugoenta ramu, yara Po rapaya umba siso no munijo Kapernaum no no onae tuga Galilea. Galilea omamo wusyinoe aneno Naftali muno Zebulon aya susyē awa kopa mije. ¹⁴ Yesus no no naije omamo mamaisyō ayao Amisy anawae Yesaya po raura rai pare:

¹⁵ “Kopa Zebulon muno kopa Naftali no no mana Yordan ama tuga rai muno mararai no onae Galilea rai.

Kopa so rawainamo Galilea, nai rati vatano Yahudi jewene wanui una rai.

¹⁶ Vatano nanawije una no kaumure ama uga rai,*
ujanivo wene rai.

Weramu soamo Vare inta mbaro mai to, ti wo Varo mba dave so raen.”[✱]

¹⁷ Umba Yesus pananyaube vatane mai pare, “Wasakinav irati wapa ayao kakaije rai, weye masyoto Amisyē de be akarive Apa kawasae mai no mine vone so nandea mararai to.”

Yesus po apa arakovo utavondi ai mam-bisya mawain

(Markus 1:16-20; Markus 5:1-11)

¹⁸ Arono Yesus panya no onae tuga Galilea, Po vatano ibe arakobe inta yaen, aya tame mi Simon opi awain tavonamo Petrus, muno apa rijato Andreas. Yo pame raveano jiane rakani no onae. ¹⁹ Yesus po raura nande yai pare, “Ide, itavondi Rinai! Indati Syo risanyao indamu ipo vatane makani tavon.” ²⁰ Naije kobe yo pame rapaya ti ntuna umba javondijo Yesus ai.

²¹ Yesus panya kobe, umba Po vatano ibe arakobe kaijinta yaen akato, aya tame mi Yakobus muno Yohanes, wenyayamo Sebedeus apa arikainye naya. Onanaye aja pe utantuna no nyoman uga wo pame ranabe. Umba Yesus po yawain tavon. ²² Naije kobe yo aya aja pe awa nyomane rapaya ti ntami. Umba javondijo Yesus ai.

Yesus pananyaube muno Po saumane raunanto vatano ugwanene mansai

(Lukas 6:17-19)

²³ Yesus panya propinsijo Galilea raita. Pananyaube no Yahudi awa yavaro sambaya rai, Po Ayao Kovo Amisyē raura pare, “Masyoto Amisyē de be akarive Apa kawasae mai no mine vone so nandea mararai to.” Umba Po saumane raunanto vatano ugwaneno wanene kotaro rui vayave raije mai. ²⁴ Ayao Yesus apa ana daveye umaso maneka manakoe ti nsiso propinsijo Siria ama munije raita tenambe. Weti vatano wanui ude Ai, wo vatano ugwaneno wanene kotare raije maugavere no Yesusa nui—vatano awa jajorame manakoe nawe, vatano anawayo kakaije siso mai nawe, vatano ugwaneno amun ngkaumure nandeo mai nawe, vatano tunaive nao. Umba Yesus po saumane raunanto mansai tenambe. ²⁵ Weti Yesus panya to no rui vayave, weamo vatano wanui utavondi. Vatane inta una no Galilea umba ude, inta una no Dekapolis, inta una no Yerusalem, inta una no Yudea, muno inta una no ranijo muramo mana Yordan.

**Yesus pananyaube no pukam
(5:1-7:27)**

5

*Ananyao kove ngkove irati vatane mai
(Lukas 6:20-23)*

¹ Yesus po vatano wanuije umawe mansaen, ti seo no pukam umba paje tuna. Umba Apa arakovo utavondi aije ude Ai.

² Umbawe pananyaube kobe mai pare,

³ “Are nawirati ware, ‘Risyamo imamaisyē ramu, yara Amisyē obo pi mamaisyē,’

✱ 4:6 Mazmur 91:11-12 ✱ 4:7 Ulangan 6:16 ✱ 4:10 Ulangan 6:13 * 4:16 Kaumure raurata irati ayao kakaije rai. ✱ 4:16 Yesaya 9:1-2

- weamo kove ngkov irati mai,
weye indati usisa no munijo Amisyé be
akarive raije rai.
- ⁴ Are nawirati manimaumbe ti wo Amisyé
awain,
weamo kove ngkov irati mai,
weye indati Amisyé po mayove.
- ⁵ Are nawirati manuga mpaaje,
weamo kove ngkov irati mai,
weye munije ama akari indati awaura
mine tename so rai.*
- ⁶ Are nawirati ubeker utavondijo Amisyé
apa bekere rai,
weamo kove ngkov irati mai,
weye indati Amisyé po vambunine rau-
gaje mai indamu utavono Apa bekere
rai.
- ⁷ Are nawirati maemeno vatano kaijinta
mai,
weamo kove ngkov irati mai,
weye indati Amisyé aemen irati mai
tavon.
- ⁸ Are nawirati manuga ndandinit,
weamo kove ngkov irati mai,
weye indati wo Amisyé aen.*
- ⁹ Are nawirati wo kovo saumane raugav
ti vatane manuga nsaumano mansai
vambinibe,
weamo kove ngkov irati mai,
weye indati Amisyé apa arikainye
waino mai.
- ¹⁰ Are nawirati wo Amisyé apa bekere rar-
ijat weti vatano mamun wo mave
tatugadi,
weamo kove ngkov irati mai,
weye indati usisa munijo Amisyé be
akarive raije rai.*
- ¹¹ Weapamo ranivara vatane wo wasaura
tantunawi muno wo wasave tatugadi
muno wangkarive wo wasangkivan weye
watawondijo Rinai, weamo kove ngkov
irati wasai! ¹² Syare wasanayanambe
muno wasananibe, weye Amisyé po kove
ratayao ti ntuna mo wasanyut no munijo
ntiti. Muno wasaemen: vatane wo anawae
wusyine mave tatugadi tavon to.”

*Yesus pare Apa kawasae maurata irati
garame muno vare rai*

¹³ “Weapamo wasaurata irati garame rai.
Wapo garame ratapondijo anaisyé rai,
wea umba manavan. Maisyare wemaisy,
weapirati wapo kove raugavere vatano
mine so mansai. Weramu ranivara garame
umaso ngkurude to, weamo ngkov akatoe
ramu, yara vatane wo raepata vayave ti wo
ratakadi.

¹⁴ Weapamo wasaurata irati vare rai,
wabaro vatano mine so mansai. Munijo

no no pukame ama vone rai mamo wam-
erata wandaen kakavimbe muno ama vare
ngkokaiibe jewen. ¹⁵ Maisyare omaisy,
aronno vatane inta po yawainye raindi, po
rakepano kavine raije ramu, yara po rauseo
ntuna no pata vono kakavin indamu mbaro
vatano una no yavarugawe mai tenambe.
¹⁶ Maisyare omai ti, syare weapirati wabaro
vatane mansai indamu wo wapa ana wa-
dave ti ngkove raen, indati wo wapa Ajayo
no no munijo ntiti ararimbe.”

*Yesus pare po Ananyao Musa ran-
damisyé ramu*

¹⁷ “Vemo wapo ratantona wapare ride
indamu Syo Ananyao Musa muno Ayao
Anawae randamisy, omai nora. Ride
indamu Syo randamisyé ramu, yara ide
indamu Syo ravera mamaisy. ¹⁸ Syo raura
tugaive: arono naumo warae me mine
so me ta noa nene, indati Ananyao Musa
ama ayao inta raumandije ramu. Tugae,
ama ayao mona intabo dako, muno ama
urupijo mamaun dave inta raumandi
jewen, yara indati no tawan ava Amisyé
po ayao umaso ama bekere raveti mamai
tenambe. ¹⁹ Maisyare omai ti, are pirati
po Ananyao Musa ama ayao rui vayave
rakanyoandi, muno po vatano kaijinta
manyao indamu wo rakanyoandi tavon,
opamo indati Amisyé po augaje ti apa tame
makaje rave arono Amisyé de be akarive
no mine vone so rai. Yara are pirati tavondi
ananyao umaso rai mavabe muno po
vatano kaijinta manyao indamu utavondi
rai tavon, opamo indati Amisyé po aijaseo
titive no arono de be akarive no mine vone
so rai. ²⁰ Weramu Syo raura wasai: vatano
Parisije muno kuruno makari mbaro
Ananyao Musa raije utavondi Amisyé apa
bekere rai mamaumbe vayave. Weti kove
mamo weapamo watawondi rai tenambe
inda wapo mansakivan. Weye ranivara
wapa watawondi raije mamo mo ara
rakivane ramu, wea indati wasisa munijo
Amisyé be akarive rai raije ramu.”

*Yesus po ananyao pariye raura
(Lukas 12:57-59)*

²¹ “Wapo ranaun ananyao wusyino wama
anene wo raijare no taiso: ‘Vemo nyo
vatane maubaisy inya.’* Are pirati po
vatane aubaisy, wepamo mangke raugaje
ai. ²² Weramu Sya ananyao wanyine no
taiso: Are pirati pariyo vatane inta ai,
wepamo mangke raugaje ai. Are pirati
po vatane inta aura tatugadi, wepamo au-
gaveta no akarijo po mangke rapatimuge
amun. Are pirati po vatane inta aura
tantunawi pare, ‘Winyamo vatano nyan-
tatukambe rave pi winy,’ wepamo Amisyé

po amaugusyo tanamo mbadururo nuge nuganuije rai, wea umba mamaisy.

²³ Maisyare omai ti, arono nyare mbera nyo ana inta rameseo Amisy ai, naije naemen irati nya arakovo pariyo naije ai rati, ²⁴ syare nyo ana umawe rapaya ti ntuna no tewa orame ama ruk, umba nyakato indamu nyo nya arakovo pariyo naije pe isaneme raija dati, umba nyakare nyo ana umawe rameseo Amisy ai rijabe kai.

²⁵ Ranivara vatane inta pariyo nai rave, weti pare po nauga ra panaikebe nai no akariyo po mangke rapatimuge amun, kove mamu nyo aneme raijar wusymbe rati, arono ipanya no unanuije yasyine raide nene, wirati indamu isanuga nsauman akato. Weye ranivara nyo aneme raijare jeben, wea indati po naunanto akariyo po mangke rapatimuge ai, umba akarije umaso po naunanto apa naite mai jakato, umba naite wo nausiso no tanoano makova rai. ²⁶ Syo raura tugaive: indati wintuna no tanoano makova rai jao nyo nya mangke umaso ravaeya mewen bintabo.”

Yesu po ananyao anaerere raura

²⁷ “Wapo ranaun ananyao wusyine no taiso: ‘Vemo nyo anaerere rave inya.’”

²⁸ Weramu Sya ananyao wanyine no taiso: Are pirati po wanya inta raen ti anuga ntento rai, opamo niki rarijato no anuga rai. ²⁹ Ranivara namijo nanem ngkove omi ndaugabe indamu nyo ayao kakaije rave, weamo nyo rakewar uje. Nanasine nake inta rakanive nai omamo mangke mamaun. Weramu ranivara nyo ayao kakaije rave tutir, weaveti nanasine tenambe ramaugusyo tanamo mbadururo nuge nuganuije rai, omamo mangke manakoe rave. ³⁰ Muno ranivara nanem ngkove mo naugabe indamu nyo ayao kakaije rave, weamo nyo raotar da ramauto. Nanasine nake inta rakanive nai omamo mangke mamaun. Weramu ranivara nyo ayao kakaije rave tutir, weaveti nanasine tenambe nsiso no tanamo mbadururo nuge nuganuije rai, omamo mangke manakoe rave.”

Anya po apa wanya rauguje aora omamo ngkove ramu

³¹ “Ananyao wusyine inta no taiso: ‘Any inta pare po apa wanya rauguje aora, opamo po nyovara wao rauguje raunanto rai, weti mo raugav umba muje.’”

³² Weramu Sya ananyao wanyine no taiso: Vatano are pirati apa wanya nserere ramu, yara po rauguje aora vayave, opamo po ayao kakaije rave to ije. Weye ranivara wanya rauguje umaso mo anya kaijinta aovan akato, weamo nserer. Muno anya

kaijinta wepi po wanya rauguje umaso raovan akato, opamo vatano serer tavon.”

Urairive Amisy apa tame rai omamo ngkove ramu

³³ “Wapo ranaun ananyao wusyino wama anene wo raijare no taiso: ‘Vemo nyo urairijo angkarije raura nora, yara animaisy mirati nyo raurairive Amisy ai, mbeto rai inda mamaisy.’” ³⁴⁻³⁵ Weramu Sya ananyao wanyine no taiso: ‘Vemo nyo Amisy apa tame muno anakotaro Po ranari rui vayave ama tame veano nya urairi raokaisy inya! Wimbekero nya urairi mbambunin ti, wirati nyare ndave tai maisy, weramu kakai mi nyo raito to. Weti Syo raura syare vemo nyo urairije rapatimu ti nyo naumo warae me, mine so me, munijo Yerusalem me, awa tame veano raokaisy inya.’” ³⁶ Muno vemo nyo taune nakari ama tame veano nyo urairije raokaisy inya. Weye Amisy po nakari ranari to, muno nakarivui nyo ngkarisyana nene muno ntoa nsavu omamo Wepi po raija tenambe. ³⁷ Maisyare omai ti, nyare nyo urairije inta raokaisy, weamo syare ndaura vayave no taiso: ‘Tugae.’ Weramu ranivara nyonae nyo raokaisy, weamo nyare ‘Jewena.’ Obo ma. Vemo ayao kaijinta mi ndaura nora. Weye ranivara nyo ayao kaijinta raijanande nya ana ndaura wato rai weye nyo rakarae mo raveti mbambunin, omamo nori rati Anakakai Akoe ai, ti ngkove ramu.”

Ranivara vatane wo wansave tatugadi, wamo kove rasakinavo mai

³⁸ “Wapo ranaun ananyao wusyine no taiso: ‘Vatane inta po namije raveti ntuba, weamo nyo apa ravera ntuba tavon, muno ranivara vatane inta po natomokane raveti ndaut, weamo nyo apa ravera ndaut tavon.’” ³⁹ Weramu Sya ananyao wanyine no taiso: Vatano po nave tatugadije pamo vemo nyo kakai rasakinav akananto ai jinya. Ranivara vatane inta po nawamona ranijo nanem ngkove ranepat, weamo nsarirae da po ranijo nanem ngkakai ranepat tavon. ⁴⁰ Are pirati po nave tatugadi, syare nyo kove rarorono ai. Weti ranivara vatane inta pariyo nai, ti to panaikebe nai no akariyo po mangke rapatimuge ai indamu po nya ansuno no no nanakea raugavo naora,

✧ 5:27 Keluaran 20:14; Ulangan 5:18 ✧ 5:31 Ulangan 24:1-4 ✧ 5:33 Imamat 19:12; Bilangan 30:2; Ulangan 23:21

✧ 5:34-35 Yakobus 5:12; Matius 23:16-22; Yesaya 66:1 ✧ 5:38 Keluaran 21:24; Imamat 24:20; Ulangan 19:21

weamo po rauga kai, muno syare nyo ansuno kaijinta raunanto ai tavon. ⁴¹ Naite inta po nantitidi nyo apa ananugo mangke raugav ipanya unanuije ama waravainye kilometer intabo, weamo wimbekobeo ai nyiridije nto kilometer rurume rai jakato tavon. ⁴² Vatane inta pare po ana inta ranajo nai, weamo nyo raunanto ai kai. Vemo nyo vatano pare po nya ananuge inta raugavoe awatambe nora.”

Muiny irati nya marova mai
(Lukas 6:27, 32)

⁴³ “Wapo ranaun anyanyao wusyine no taiso: ‘Wimuiny irati nya arakove mai,* yara nanuga mamuno nya marova mai.’ ⁴⁴ Weramu Sya anyanyao wanyine no taiso: Syare wamuiny irati wapa marova mai muno wasambayambe vatano wo wasave tatugadije mansai. ⁴⁵ Wapa anabe maisyare so indamu mamaisyo wapa Ajayo no no munijo ntitiije amaisy. Weye Amisyey po uma aveti baro vatano kove muno vatano kakainoanive mansai tenambe, muno Po maruge raveti maje vatano awa ana udave ngkove mansai muno vatano awa ana udave ngkakai mansai tavon. ⁴⁶ Ranivara wapo muinye raroron irati vatano umuinyo wasaije obo mansai, omamo mamai dainya, weti vemo wapo ratantona wapare Amisyey po kove raugaje wasai, wemai nora. Weye vatano ukainoanive maisyare vatano wo pajak ranugande pemerinta aije wenawamo awa anaube maisyare wemai tavon. ⁴⁷ Muno ranivara wabekobeo wapa arakove obo mansai, omamo mamai dainy tavon, weti vemo wapare vatane wo wasaura titive, wenora. Weye vatano wantatukambe Amisyey aije nanawamo ubekobeo awa arakove mai tavon. ⁴⁸ Yara wapa Ajayo no no munijo ntiti muiny irati vatane mai tenambe, weti syare weamuiny tavonare wemai tavon.”

6

Wapa ana wadave ngkove rave maninimbe

¹ “Arono rui wapo ana ngkove rave Amisyey apa tame rai, syare wapo rave maninimbe vayave. Vemo wapo rave mo vatano kaijinta wo raen wo wasararimbe rai jinya. Weaveti wapa Ajayo no no munijo ntiti Po kove ratayao ti mo wasanyute ramu.

² Weti wapare wapo ana inta raunanto vatano awa ananuge meweno mansaije mai, vemo wapo wapa ana wadave rararimbe no vatane mansamune rai nora, weye vatano awa angkarije ntapekane wo raveare omaisy. Arono wo ana inta raunanto vatano awa ananuge meweno

mansaije mai, manayanambe wo ana umaso raroron no yavaro sambaya rai muno unanui akokoe ama yasyine rai, indamu vatano wanui wo maen, wo mararimbe. Syo raura tugaive: awa ana wo rave umaso ama ine mamoo wo rauga to, weti kovo kaijinta ratayao mo mansanyute ramu. ³ Weramu weapamo wapare wapo ana inta raunanto vatano awa ananuge meweno mansaije mai, syare wapo raunanto maninimbe, indamu vemo vatano kaijinta wo raen nora. ⁴ Wirati wapa ana wadaveowe mamoo vatane wantatukambe rai, yara wapa Ajayo no no munijo ntiti Obo pi po raen. Po raen umba Po kove ratayao ti ntuna mo wasanyut no munijo ntiti.”

Ananyao sambaya

⁵ “Arono wapo sambaya raura seo Amisyey ai, vemo wasambayambeare vatano awa angkari ntapekane mansamaisy inya. Weye onawamo manayanambe vatane wo mansararimbe, weti ube sambayambe wo awa sambaya raura seo Amisyey ai no taiso: manayanambe uta usayai no yavaro sambaya ama uga rai muno unanuije ama radiri rai, indamu vatano wanui wo maen wo mararimbe. Syo raura tugaive: awa ana wo rave umaso ama ine mamoo wo rauga to, weti kovo kaijinta ratayao mo mansanyute ramu. ⁶ Weramu wapare wapo sambaya raura seo Amisyey ai, weamo syare wasisa no tanoan, wapo unsanda rauguji umba wasambayambe seo no wapa Ajayo vatane wo aeno mansami rai jewene Ai. Umba wapa Ajayo wepi po wapa ana wadave maninimbe umaso raen, indati Po kove ratayao ti ntuna mo wasanyut no munijo ntiti.

⁷ Arono wasambayambe wapo raura seo Amisyey ai, syare vemo wapo ayao ama ine meweno raije raura kewabe tutir inya, maisyare vatano wantatukambe Amisyey tugaie ai wo rave ramaisy inya. Ubekera ware usambayambe tai mai da nggwara-vain dave wirati Amisyey po raraniv. ⁸ Vemo wapo mansamai nora, weye wapa Ajayo Amisyey po wapa ana wabekedaije raen to arono wapo anajo rainy!”

Wama sambaya wamo raura seo Injajo Amisyey ai

(Lukas 11:2-4)

⁹ “Weti syare wasambayambe taiso:

‘Reama Injajo Amisyey, Winyi ntuna no munijo ntiti.

Reamare vatan tenambe wo Nya tamo ndandinit rararimbe.

¹⁰ Reamare winde wimbe akarive mine so rai tenambe.

* 5:43 Imamat 19:18

Reamare vatane utavondi Nya bekere rai no mine so,
 maisyare muno Nya naite utavondi rai no munijo ntiti wemaisy.

¹¹ Reamare Nyo reama anaisyo unumeso raunande reansai.

¹² Reamare Nyo reama ayao kakai rapaya reansai,
 maisyare muno reamo vatano kai awa ana udave ti ngkakai reansai rapaya mai wemaisy.

¹³ Vemo Nyo reansaugavo ana mo re-ansatopane raron nora, yara Nyo reansapaya Anakakai Akoe apa mamune rai.

Weye Amisy wimbe akarive vintabo,
 Nya vambunine manya vintabo,
 muno Nya kovo ntiti ntoa nuge nunganui. Amin.*

¹⁴ Ranivara wapo vatane awa ayao kakai wo rave wasai rapaya, indati wapa Ajayo no no munijo ntiti Po wapa ayao kakaije rapaya wasai. ¹⁵ Weramu ranivara wapo vatane umaso awa ayao kakai rapaya jewen, indati wapa Ajayo Amisy po wapa ayao kakai rapaya wasai tavone jewen.”

Ananyao atawandijo marore rai indamu sambayambe

¹⁶ “Arono wasatawandijo marore rai indamu wabe sambayambe, vemo wapo vatano awa angkarije ntapekano maije mansamaisy inya. Weye arono vatane umaso matawandijo marore rai, mansamun mpaparasyi rai rave. Syo raura tugaive: awa ana wo rave umaso ama ine mamu wo rauga to, weti kovo kaijinta ratayao mo mansanyute ramu. ¹⁷ Weramu weapamo wapare wasatawandijo marore rai indamu wabe sambayambe, syare wapo wasamune rarandom muno wasakarivui nye rapirak, ¹⁸ indamu vemo vatane wo wapa wasatawandijo marore rai raen nora. Yara wapa Ajayo vatane wo aeno mansamije rai jewene Obo pi po wasaen. Umba wapa Ajae umaso pi po wapa ana wadave maninimbe umaso raen, indati Po kove ratayao ti ntuna mo wasanyut no munijo ntiti.”

Romano tugae no no munijo ntiti

¹⁹ “Vemo wapo romano mine vone so ranugande inya, weye romano mine vone so noa nugoenta ramu. Weye romano mine vone somamo katatindopane muno kararire mo raotadi, muno vatano wanaonoambe ude wo rangkaokaibe. ²⁰ Yara syare wapo romano munijo ntiti ranugande, omirati katatindopane muno kararire mo raotadije jewen muno vatano wanaonoambe wo rangkaokaibe wasaije

jewen. ²¹ Are pirati po romano mine vone so bo rakani, opamo anuga nento irati anakotaro mine vone so rai. Yara are pirati po Amisy apa kovo no no munijo ntiti je bo rakani, opamo anuga nseo irati Amisy ai.”

Wansamije raurata irati yawainye rai (Lukas 11:34-36)

²² “Wasamije raurata irati yawainyo mbaro wasanuga raije rai. Ranivara wasamije ngkov, indati wasanuga mbar. ²³ Yara wasamije ngkakai, indati wasanuga ngkaumudi. Wasamije makakave, weaveti wasanuga ngkaumudi rave.*

²⁴ Wapare wapo Amisy pe romano mine vone so me yakani kava, indati mamaisy ramu. Maisyare muno ananeneae so ramaisy: Vatane inta panapatambe vatane jirume yai, wea indati bekobe apa akarije inta ai rave, yara akari inta pamo indati panapatambe ai kobe jewen. Muno opamo tavondi akarije inta apa ananyaowe rai, yara ponayo kaijinta apa rai. Weti wapare wabekero Amisy ai muno romane rai kava omamo mamaisy ramu.”

Vemo wasanuga mamauno anakotaro mine vone so rai jinya (Lukas 12:22-31)

²⁵ “Maisyare omai ti, syare vemo wasanuga mamauno anakotaro mine vone so rai nora, maisyare wapa ana wadaisy, muno wapa ana wadamaname, muno wapa ansuno wapo rave rai jinya. Arono wangkova wano no mine so, ana mbe mobe mamu anaisy muno ansune ma jewen. ²⁶ Syare wapo insanijo wawake maen. Onawamo wo nyoamane rayanyume ramu, wo ama mane ranugane ramu, muno wo ama mane ranugande no awa yavare ramu. Weramu wapa Ajayo no no munijo ntiti Pi po maeranande! Amisy pare vatane wepirati wapanakoeveo insanije mansakivan, weti tugae Po wasaeranande! ²⁷ Wapare wabekero wapa matam akari ravera nggwaravainy, weapamo wamamaisy ramu, yara Amisy bo pi mamaisy. Weti vemo wasanuga mamauno wapa matam akarije rai nora.

²⁸ Wabeanimaibe wasanuga mamauno ansune rai? Syare wapo kavasasije ama uge ratantona rati. Kavasasije mo ansune rakasyuge ramu, weramu Amisy po ama uge raugaje rai indamu mbe ansumbe. ²⁹ Akarijo Titi Salomo apa ansune ngkov, weramu kavasasije ama ugem ngko dave raveo Salomo apa ansune rakivan. ³⁰ Maisyare omaisy, Amisy po ansuno ngko dave raunanto kavasasije rai, wemi ama ugem noa masyote inta yai vavai umba ngkanen kobe. Weramu Amisy

* 6:23 Vare mamu raurata irati kove rai, yara kaumure raurata irati ayao kakaije rai.

pare vatane weapirati wapanakoeveo kavasasije rakivan, weti tugae Po ansuno mamaisye inta raunande wasai tavon aje. Arakove, wabeanimaibe wapanave Sya ananyaowe so raije jewen?

³¹ Maisyare omai ti, vemo wasanuga mamaun inya, wapare, 'Animaisye mirati wandaisy? Animaisye mirati wandamanam? Ansuno rui mirati wandave?' ³² Vatano wantatukambe Amisye ai wo anakotare umaso rakani tutir. Weramu wapa Ajayo no no munijo ntiti Po wapa bekedaije raen tenambe, weti vemo wasanuga mamauno rai nora. ³³ Yara syare wabeker indamu Amisye be akarive wasai muno watawondi Apa bekere rai, wea indati Po anakotare umawe raunande wasai vintabo. ³⁴ Ti vemo wasanuga mamauno simane so rai jinya. Weye masyoto unumeso anakotaro wapo rantotobe manui, weti syare siman umba wapo ama ana nsosobe rantotobe."

7

Vemo wapo vatano kajinta maura nanto awa ayao kakaije rai jinya (Lukas 6:37-42)

¹ "Vemo wapo vatano kajinta maura nanto awa ayao kakai rai ra mangke rapatimugo mai jinya, inda vemo Amisye po mangke rapatimugo wasai tavon inya. ² Wapare wapo mangke raugaje vatano kajinta mai, weamo indati Amisye po mangke raugaje wasai tavon. Tauno wapo veano vatano kajinta mataun omamo Amisye po rasarirae akare, Po veano wasataun tavon.

³ Wabeanimaibe wapo vatano kajinta awa ayao kakaije bo raen, yara umba taune wapa ma wadaene ramu ge? Omamo maisyare wapo inyo kengkene raen no wapa arakove inta amije rai, weramu taune wapantukambe inyo vasye akoe ngkapi no taune wasamije raije rai. ⁴ Wabeanimaibe wapo raura wapa arakove mai wapare, 'Winde syo inyo kengkeno no namije raije wata raugaje namije raora,' yara umba wapantukambe inyo vasye no taune wasamije rai wato rai je? ⁵ Weapamo wapa angkarije ntapekan! Syare wapo inyo vasye raugaje taune wasamije raora rati, inda wapo ana raen kakavimbe, wea umba wapo wapa arakovo kajinta awa raugajeamo mamaisy.

⁶ Vemo wapo ayao Amisye raura tutir nanto vatano wonayo raije mai jinya. Wenawamo maurata makeowe; arono wo ayao Amisye ranaun usarirae akare, wo wasatao. Muno maurata ugeowe, wo ayao Amisye so ratakodoyadi."

Wapo Amisy anajo, indati po wapa ana wabekere raunande (Lukas 11:9-13)

⁷ "Syare wapo Amisye anajo, indati Po raunande wasai. Wapo rakani, indati wananta rai. Wapo unsanda rananepat, indati Amisye po unsanda rausiso wasai. ⁸ Weye are pirati po ranajo, opamo Amisye po raunande ai. Are pirati po rakani, opamo indati nanto rai. Are pirati po unsanda rananepat, opamo Amisye po unsanda rausiso ai.

⁹ Syo raura ajae wasai: Arono wapa arikainye woyovo anaisye rai, weamo wapo anaisyo kove raunanto mai, yara wapo orame raunanto maije ramu. ¹⁰ Arono woyovo jiane rai, weamo wapo jiane raunanto kobe mai, yara wapo tawae raunanto maije ramu. ¹¹ Weapamo ayao kakaije no wasai, weramu wapo anakotaro ngkove raunanto wapa arikainye mansai. Maisyare omai ti, wapa Ajayo no no munijo ntiti Opamo kakavimbeo wasakivan bintabo, weti tugae Po ana ngkove raugaje Apa arikainye wasai arono wapo anajo.

¹² Ananyao Musa muno Ayao Anawae ama ine mamo ranugan bintabo irati ananyao intabo so rai: Weabekero vatano kai awa ana udave ngkovo wasai rai, weamo weapa ana wadave ngkovo mansai tai wemai tavon."

Unsanda munijo ntiti nandi

¹³ "Syare wasisa unsanda nandi nto no kovo nuge nuganuije rai. Unsanda nto no tanamo mbadururo nuge nuganuije omamo manakoe muno nsaneka, weti mawe dave vatane mansai, wanui nawirati wo raita. ¹⁴ Yara unsanda muno unanuujio nto no kovo nuge nuganuije omamo nandi. Muno vatano usisa rai wanui jewen, yara kavinta vayave."

Anawae angkarije maurata irati inyo ama mane ngkakai rai (Lukas 6:43-44)

¹⁵ "Wasyisyaube irati anawae angkarije mansai. Weye ude wasai maninimbe, maurata irati domba kokobe wemaisy, weramu manuga nsansinao maisyare make sivuinyoe. ¹⁶ Awa ana wo rave mi wapo raen ti wapare, 'Sopamo anawae angkarije piye.' Weye inyo mane mamo mamaisyo ama mote rai. Inyo moto mamun omamo mo mano kovo manavane rauguje ramu. ¹⁷ Inyo moto kove mo mano kove rauguje, yara inyo moto kakaije mo mano kakaije rauguje. ¹⁸ Inyo moto kove mo mano kakaije rauguje ramu, muno inyo moto kakaije mo mano kove rauguje ramu. ¹⁹ Inyo moto ama mane ngkakai, omamo indati rate umba ramaugusya ramero taname rai. ²⁰ Maisyare omai ti,

wapo anawae angkarije awa ana udave ti ngkakainoanive raen, indati wapare, 'Sopamo anawae angkarije piye.' "

Vatano utavondi Yesus aijo mawa bo rai, umamaisye ramu

(Lukas 13:25-27)

²¹ "Vatan inta nanawirati wo inawain ware, 'Reama Akari, Akarijo Winy,' indati usisa munijo Amisye be akarive rai raije ramu. Yara vatano are nawirati utavondi Sya Injayo no no munijo ntiti Apa bekere rai obo nawirati usisa. ²² Arono munije ama akari vatane wanui wo raura nande ware, 'Reama Akari, Akarijo Winy! Nyo reansaen weye reamo ayao Amisye ravovo Nya tame rai to. Reamo anawayo kakaije mawatano Nya tame rai, muno reamo anapaporainyo manuije rave Nya tame rai to.' ²³ Arono naije umba Syo raura kakavimbe mai syare, 'Syantukambe wasai! Weti wanaji da wata no wato. Weapirati kakai ntipu wasai tutir!'"

Ananeneae yavaro rauseo nteto kopa matuge rai muno yavaro rauseo nteto nayavo ndurudi rai

(Lukas 6:47-49)

²⁴ "Are pirati po Sya ayaowe ranaun muno tavondi rai, opamo aurata irati vatano akarije mbar weti po yavare rauseo nteto kopa matuge rai. ²⁵ Arono maruge maje, manayame njam muno ovaro mbambunine nande mo yavare umaso ranepat, weramu yavare umaso nteto matuve, weye rauseo nteto kopa matuge rai. ²⁶ Yara are pirati po Sya ayaowe ranaun muno tavondi raije jeben, opamo aurata irati vatano pantatukambe ti po yavare rauseo nteto nayavo ndurudi rai. ²⁷ Arono maruge maje, manayame njam muno ovaro mbambunine nande mo yavare umaso ranepat, umba merer kobe, umba mandamisijije manakoe rave kobe."

²⁸ Yesus po ayao umaso raurana mwen, umba vatano wanuije umawe unantaive Apa ananyaowe rai, ²⁹ weye Po mansanyao vambunimbe. Muno Apa ananyaowe nsasyeo kuruno Yahudi awa rai, weye Yesus po vatane mansanyao maisyare akari apa vambunine no irati ai amaisy.

8

Yesus po saumane raunanto vatano ar-avure mo ave inta ai

(Markus 1:40-44; Lukas 5:12-16)

¹ Yesus no no pukam ti paje, umba vatano wanui utavondijo Ai. ² Muno vatano ar-avure mo ave inta de Ai, umba po vukane ranteter no Amun, po raura pare, "Injae,

winyare mayar, syare Nyo saumane raunande rinai."

³ Naije Yesus po vatane umaso aijar, umba Po raura nanto ai pare, "Rimayar, ti syare winsauman." Naije kobe apa wanene umaso raumandi ai. ⁴ Umba Yesus po raura ai pare, "Vemo ndaurao vatane mai jinya. Yara nyoronto no syeno tuna no Yavaro Amisye raije ai, nyo nanakea rarorono ai indamu po raen winyamo sauman to. Umba nyo anakotare raugare rameseo Amisye ai, inda mamaisyo Musa apa ananyaowe rai." ⁵ Indati vatan tenambe wo raen tugae Amisye po saumane raunande nai to."

Yesus po saumane raunanto arikainyo panapatambe nait akari Roma inta ai

(Lukas 7:1-10; Yohanes 4:46-53)

⁵ Arono Yesus siso no munijo Kapernaum, nait akari Roma inta de Ai muno po anajo, ⁶ pare, "Injae, sya arikainyo panapatambe rinaije pamo gwanen dave no yavar. Gwadena, tunaive ti niki tawan no apa niki ri, muno apa yorame mangke dave."

⁷ Umba Yesus po raura nanto ai pare, "Syare to Syo saumane raunanto ai."

⁸ Weramu nait akari umawe po raura pare, "Injae, vemo winsiso sya yavare rai jinya, yara jeben kai, weye risyamo imamaisye ramu. Weti syare Nyo raura vayave, indati arikainyo panapatambe rinaije umaso sauman. ⁹ Vatano apa vambunine manakoe po vatano kaijinta matutir indamu wo apa anakere raijar. Maisyare omaisy ri tavon: sya akari po inatutir, muno risyamo syo naito ibe akarive maije matutir. Syo naite inta atutir poroto, weamo poroto kobe, muno syo naite inta atutir de, weamo de kobe. Weti Winya vemo taune nyoronto inya, yara Nyo ayao bo raura vayave, indati mamaisy aje."

¹⁰ Arono Yesus po ayao umaso ranaun, nantoive rai, umba Po raura nanto vatano utavondi Aije mai pare, "Tugae, nait akari Roma umaso apa anave mammo mo vatano Yahudi awa anave rakivan bintabo! ¹¹ Syo raura wasai: munije ama akari indati vatano marano wanui ude no ranijo muram, inta ude no ranijo varet, utantuna wisyisyo Abraham muno Isak muno Yakob matavon no munijo Amisye be akarive raije rai. ¹² Weramu vatano Yahudi onawamo wanui rave indati Po mamaugusyo kaurmo marane rai. No ratuije woyov tawan muno usiuri tutir."

¹³ Umba Yesus po raura nait akari umawe ai pare, "Nin kai! Nya arikainye pamo sauman to, mamaisyo nya anave rai." Naije kobe arikainyo panapatambe umawe sauman.

Yesus po saumane raunande vatano ugwanene mansai no Kapernaum

(Markus 1:29-34; Lukas 4:38-41)

¹⁴ Umba Yesus siso no Petrus apa yavar, naije Po Petrus apa anuma raeno nggwaneni ranakea mamoan ti niki. ¹⁵ Yesus po raneme raijar, naije kobe ranakea nsauman, ti nikija nseo umba mo anaisye ratayao indamu wo raisy.

¹⁶ Arono mare ngkaumur kobe, vatane wo vatano wanui nanawirati anawayo kakaije siso mai maugavere no Yesusa nui. Yesus apa ayaowe mbambunin ti Po raura vayave awa bo rai, Po anawayo kakaije mawatano vatane umaso mansaora. Muno Po saumane raunanto irati vatano ugwaneno mansai tenambe. ¹⁷ Ana namije nande indamu mamaisyo Amisye apa ayao wemirati anawae Yesaya po raura rai pare:

“Wepi po wama siurije ranawan muno wanggwanen, Po saumane raunande wansai.”^{*}

Vatane rurum yare javondijo Yesus ai
(Lukas 9:57-62)

¹⁸ Arono naije Yesus po vatano wanuije maen wo awaridi kiani. Weti Po raura nanto Apa arakovo utavondi aije mai pare, “Wade ra wanta no onae tuga ranijo warani.” ¹⁹ Umba kuruno Yahudi inta de po raura Yesus ai pare, “Injayo Kurune, nyare to no rui vayave, syare itavondi Nai.”

²⁰ Umba Yesus po raura nanto ai pare, “Makeo sivuinye apa ateme no ti nikijo rai muno insanije pamo apa ene no ti nikijo rai. Yara Risyi Arikainyo Vatan sya niki raije meweno Rinai. Weti nyare wintavondi Rinai, indati mbeare muno Risyi wemaisy.”

²¹ Apa arakovo tavondi aije kaijinta po raura pare, “Injae, syare Nyo inapaya indamu syakato syo sya injaya antuna rati, umba syakarea itavondi Nai.”

²² Umba Yesus po raura nakananto ai pare, “Syare vatano ugwenen to nawamo wo vatano ugwenen to mantuna kai,* yara winyamo wintavondijo Rinai.”

Yesus po ovare muno rarene raura ti ntanamanin

(Markus 4:35-41; Lukas 8:22-25)

²³ Yesus seo no nyoman, umba Apa arakovo utavondi aije usea rai tavon, weti wuruta. ²⁴ Kavuratawe ovaro repe tende onae umaso rai kobe, ti ama rarene manakokoive mo nyomane ranepat, inta masyo no nyomane ama uga rai. Weramu Yesusa pamo niki. ²⁵ Umba Apa arakovo utavondi aije ude wo amin, ware, “Injae,

Nyo wansapaya kakaije so rai! Kavinta wamansyan!”

²⁶ Umba Yesus po raura nanto mai pare, “Wabeanimai be wajaniv? Wapa anave mauna!” Umba seo, Po ovare muno rarene ransopi ti ntanamanin dave.

²⁷ Apa arakove umaso unantaive rave, ware, “Sopamo are pi so, wirati Po ovare, rarene raura ti ntanamanin, ntavono Apa ayao rai so?”

Yesus po anawayo kakaije mawatano vatane rurumayai

(Markus 5:1-20; Lukas 8:26-39)

²⁸ Arono Yesus po onae raotar kobe, nanto no vatano Gadara awa munije rai. Nai ratuije vatane ruruma nyo no tinda aipapo rai. Onayamo anawayo kakaije siso yai, weti syivuun dave. Vatane ware uta no we wo yasyani ti wanyare ta kakai. Vatane rurum umaso je Yesus ai. ²⁹ Umba anawayo kakaijo una no yanuga ugwaino akoeve rave ware, “Arikainyo Amisy, Nyo reansave tai ruimaisye so? Vemo Nyo reansawabe inya! Yara ama masyote ndea mamai dainya!”

³⁰ No naije ugeye wanui rave wo anaisye rakanive no ratuije. ³¹ Umba anawayo kakaije umaso wo raura nanto Yesus ai ware, “Nyare Nyo reansawatan, weamo reamare Nyo reansatutir sisa wana no ugeo wanui rave wato mai.”

³² Umba Yesus po raura nanto mai pare, “Wata!” Weti anawayo kakaije wuje vatane so yaora kobe, umba uta sisa ugeye umawe mai. Uge umawe wansansanan udadoyaro pene rai ti utaoponasyo no onae waraya, ti usayadi kobe. ³³ Vatano wo ugeye umawe makum anajiv, umba ana nande uge mai muno vatane rurumo anawayo kakaije siso yai ma wo raura kakavimbe vatano munijo we mai. ³⁴ Umba vatan tenambe una no munije umaso ude unande Yesus ai. Umba wo anajo indamu puje irati awa munije raora.

9

Yesus bambunin po ayao kakaije rapaya
(Markus 2:1-12; Lukas 5:17-26)

¹ Yesus seo no nyoman, Po onae raotar, pakato no Apa munije rai.* ² Naije vatane inta wo vatano tunaive inta augaje nikijo pata rai, umba wo anawanere no Yesusa nui. Arono Yesus po awa anave raen manakoe, Po raura nanto vatano tunaive umawe ai pare, “Arikainyo winy, syare nanuga mbambunin! Syo nya ayao kakaije rapaya nai to.”

^{*} 8:17 Yesaya 53:4 ^{*} 8:22 Ayao so ama ine mare, “Syare vatano wantatukambe Amisye aije nawamo wo awa arakovo ugwenen to mantuna kai.” ^{*} 9:1 Munijo Kapernaum (raen no 4:13).

³ Umba kuruno Yahudi inta wo ratantona no manuga rai ware, “Ee! Veanimaibe Po rauranare wemaisye? Amisye bo pi maimaisyo Po ayao kakaije rapaya vatane mai, weti Yesus sopamo pangkarivea!”

⁴ Umba Yesus po awa ana wo ratantona raen no manuga rai, ti Po raura pare, “Wabeanimaibe wapo kakaije ratantona no wasanuga rai?” ⁵ Syare syo vatane so apa ayao kakaije rapaya ai, weamo wapo ratantona wapare rimamaisye ramu. Wapan-tukambe Sya vambunine rai, ti wapanave ramu. Weramu Syo anaporainye inta raroron, indati wapo Sya vambunine raen kakavimbe. ⁶ Weti syare Syo saumane raunanto vatane umaso ai indamu wapo raen wapare Risy, Arikainyo Vatan, ribambunin Syo ayao kakaije rapaya no mine vone so.” Umba Yesus po raura nanto vatano tunaive umawe ai pare, “Nseo! Nya tanije rauga da nin kai.”

⁷ Umba vatano tunaive umaso seo tet ara pakato no apa yavar. ⁸ Vatano wanuije umaso wo anaporainye so raen ti ujaniv, muno wo Amisye ararimbe weye Po vambunino manakoe umaso raunande vatane mai.

Yesus po Matius awain

(Markus 2:13-17; Lukas 5:27-32)

⁹ Yesus puje, umba panaya akato. Umba Po vatano po pajak ranugande pemerinta aije inta aen, apa tame mi Matius, tuna no apa tanoano pajak rai. Yesus po awain pare, “Winde tavono Rinai!” Umba Matius seo, puseyo ti tavondijo Yesus ai.

¹⁰ Arono Yesus pisyi no Matius apa yavar, vatano wo pajak ranugande akarijo pemerinta aije wanui ude. Muno vatano ayao kakaije no maije wanui ude tavon. Wisyisyo Yesusa pe, Apa arakovo utavondi aije nawe matavon. ¹¹ Weramu vatano Parisije inta wo Yesus aen pisyisyo vatane umaso matavon, weti wo raura nanto Apa arakovo utavondi aije mansai ware, “Veanimaibe wapa kurune pisyisyo vatano wo pajak ranugande akarijo pemerinta aije nawe, vatano ayao kakaije no maije nawe matavon?”

¹² Yesus danito po awa ana wo raura we ranaun, umba Po ananeneae inta raura pare, “Vatano saumane pamo bekero anawae aije ramu, yara vatano gwanene pirati bekero anawae ai. ¹³ Maisyare omaisy, are nawirati wo ratantona ware awa ayao kakaije meweno mai onawamo Syo mawaine ramu. Yara ride indamu Syo vatano awa ayao kakaije no maije mawain indamu awaura irati kove rai. Weti syare wananta irati Ayao Amisye so ama ine rai: ‘Ribekero wapa anakotaro wapo rameseo

Rinai raije ramu, yara ribeker syare wapo muinye rarorono vatano kaijinta mai.’”^{*}

Yesus apa ayao wanyine nsasyeo vatano Parisi awa ayao wusyine rai

(Markus 2:18-22; Lukas 5:33-39)

¹⁴ Masyote inta Yohanes Pembaptis apa arakovo utavondi aije inta ude Yesus ai, wo anajo ware, “Veanimaibe irati reame, vatano Parisije nawe, reansatawandijo marore rai indamu reansambayambe, yara vatano utavondi Injae naije nawamo jewena e?”

¹⁵ Yesus po ananeneae so raura mai pare, “Ono vauname inta, vatano utavondi rai manimaambe ramu, yara manayanambe weye anya bauname tuna matavon. Weramu masyoto makareye, anya bauname umaso pamo augavo maora, weti arono naije indati vatane umaso matawandijo marore rai.”[†]

¹⁶ Yesus po ananeneae kaijinta raura pare, “Ranivara vatane inta po ansune vasyeo wanyine rakasyugo ansuno wusyino mpatimuge rai, weamo mamaisye ramu, weye ansune vasyeo wanyine mo ansuno wusyine rapatimu ti nsaram akoeve rave kobe. ¹⁷ Muno vatane wo awijo wanyine rauvarasyo karoa ugami wusyine rai, weamo mamaisye ramu, weye awijo wanyine umaso ntipu akoeve ti mo karoa ugami umaso rapatimu ti ngkakai, muno awije mbuvar kobe. Yara awijo wanyine mamauvarasyo no karoa ugami wanyine obo rai, wea umba awije muno karoa ugami imamai kava.”

Yesus po saumane raunanto arikainyo wanya inta rai muno wanya rantukamo Apa ansune raije rai

(Markus 5:21-43; Lukas 8:40-56)

¹⁸ Arono Yesus po ana umaso raura mai, akarije inta de po vukane ranteter no Amun. Umba po Yesus anajo pare, “Sya kavo wanya kavoe ngkakai to. Weti syare winde indamu Nyo naneme raunanto ntamijo rai indamu ngkov akato.” ¹⁹ Weti Yesusa pe, Apa arakovo utavondi aije nawe, usea utavondijo akarije umawe ai.

²⁰⁻²¹ Wanyana unanuije ama yasyin, wanya nggwanen inta, omamo nanto waneno embae rai tutira tume abusyinaraneane rurun to, nde mararajo Yesus akirije rai. Mo ratantona mare, “Syantukamo Yesus apa ansune rai vayave, indati risauman aje.” Weti rantukamo Apa ansune ama marane bo rai.

²² Umba Yesusa sarirae, Po wanya umawe raerananto, Po raura rai pare, “Wanya arikainyo winy, syare nanuga mbambunin!

^{*} 9:13 Hosea 6:6 [†] 9:15 Yesus aurata irati anya bauname umaso ai.

Winyanave Rinai jivae, wirati winsaumanoe.” Umba kavuratawe wanya umaso ranakea nsauman kobe.

²³ Umba Yesus poroto siso no akarije umawe apa yavar. Po vatane maen woy-ovo arikainye umawe rai weye ngkakai to. Vatane wanui ti manamote ranamugare ngkin dave, muno inta wo suline ramawisy mamaisy Yahudi awa koane rai. ²⁴ Yesus po raura mai pare, “Wana-jiv! Arikainye somamo ngkakaije ramu, yara ta nikija.” Weramu vatane umaso wugoeno Ai. ²⁵ Arono Yesus po vatane umaso mawatan ti wujea jewen, umba siso tanoane ama uga, Po wanya arikainye umawe raneme rajjar umba ngkovakato, nseo kobe. ²⁶ Ayao umaso ravovo no munijo we ama varodore raito kobe.

Yesus po saumane raunanto vatane inta mai

²⁷ Umba Yesus panya akato, vatano yamije ntuba ruruma nyande Ai no unanuije ama yasin, umba javondijo Ai, yo Yesus awain yare, “Daud apa ajavijo Winy, naemeno ririnsai!”

²⁸ Arono Yesus siso no yavare inta ama uga, vatane rurumo yamije ntuba umawe je syisya Ai. Umba Yesus po yanajo pare, “Wiripamo ipare Syo saumane raunande risai. Weti ipanave Sya vambunine rajja rako jewena e?”

Umba yo raura nanto Ai yare, “Injae, rimanave Nai jivae.”

²⁹ Naije Yesus po aneme raugaje ntamijo yamije rai, muno Po raura nanto yai pare, “Weti soamo isamije nsauman, mamaisyo ipa anave Rinaije rarijati.” ³⁰ Naije kobe yamije mbar, weti yo ana raen akato. Umba Yesus po yaorai pare, “Ibemo ipo ana umaso raura vatane mai nora!” ³¹ Weramu yakata yo ravovo no Galilea raita tenambe.

³² Vatano yamije ntuba umawe yuje, umba vatano anawayo kakaije nsiso ai ti awa ngkao inta augare no Yesusa nui.

³³ Arono Yesus po anawayo kakaije umawe rawatano aora, naije kobe vatano awa ngkao umaso payao akato. Weti vatano wanuije wo raen unantaive, ware, “Wakoe! Anapaporainye somamo manakoe rave! Vatane wo ana inta raembe no munijo Israel tenambe so rajjamo maisyare somaisy ramu.”

³⁴ Weramu vatano Parisije wo raura ware, “Akarijo anawayo kakaije wepi po vambunine raunanto Yesus ai indamu Po anawayo kakaije mawatambe so.”

Yesus aemeno vatano wanuije mansai

³⁵ Yesus panya kiani, siso no munije inta rai nanto no munijo kajijinta rai. Pananyaube no yavaro sambaya rai tetebe. Po Ayao Kovo Amisy raura vatane mai

pare, “Indati Amisy de be akarive Apa kawasae mai no mine vone so.” Po saumane raunanto vatano ujajoram wanene kotaro rui vayave rajje mansai. ³⁶ Arono Po vatano wanuije umaso maen, aemeno mansai rave, weye mansanuga mamauno awa ana nsosobe rai muno awa vambunine meweno mai, weti onawamo maisyare muno domba awa vatano po maeranande meweno maijoe mansamaisy. ³⁷ Umba Yesus po ananeneae so raura nanto Apa arakovo utavondi aije mai pare, “Vatano wanuije umaso maurata irati anaisyo matugo manui rave no no nawaisy rai, weramu vatano wo ine ranugande mamaun. ³⁸ Vatano be akarive nawaisy umaso rajje opamo Amisy. Weti syare wapo anajo indamu Po vatane inta matutir indamu usisa Apa nawaisy rai wo ama ine ranugande.”

10

Yesus po apa arakovo abusynara eane rurum mawain

(Markus 3:13-19; Lukas 6:12-16)

¹ Yesus po apa arakovo utavondi aije abusynara eane rurum mawainde, umba Po vambunine raugaje mai indamu wo anawayo kakaije mawatano vatane maora, muno wo saumane raunanto vatano ujajoram wanene kotaro rui vayave rajje mansai.

² Yesus apa arakovo po matutire abusynara eane rurum awa tame mi som:

Manasyin, Simon (awain tavnamo Petrus),
apa rijato Andreas,
Yakobus,
apa rijato Yohanes
(wenayamo Sebedeus apa arikainye naya),

³ Pilipus,
Bartolomeus,
Tomas,
Matius (opi po pajak ranugande akarijo pemerinta aije),
Yakobus (Alpeus apa kavo),
Tadeus,
⁴ Simon (opi awainamo vatano Zelot),
Yudas Iskariot (opi po Yesus amavun).

Yesus po apa arakovo utavondi aije abusynara eane rurum matutir

(Markus 6:6b-13; Lukas 9:1-6)

⁵ Umba vatano abusyn eane rurume umaso nawamo Yesus po matutir pare, “Wata! Weramu vemo wata no vatano Yahudi jewene mansai nora, muno wasisa no munijo vatano Samaria una rajje rai nora. ⁶ Yara wata no vatano Israel obo mansai, weye onawamo maurata domba awa vatano wo maeranande meweno mai.

⁷ Wata wapo ayao Amisyé so raura mai wapore, 'Masyoto Amisyé de be akarive Apa kawasae mai no mine vone so ndea mararai to.' ⁸ Syare wapo saumane raunanto vatano ugwanene mansai, wapo kove raunanto vatano ugwenen mansai indamu ukovakato, wapo saumane raunanto irati vatano aravure mo maveye mansai, muno wapo anawayo kakaije mawatano vatane maora. Amisyé po vambunine umaso raunande wasai vayave, yara wapo ravae ramu. Weti syare wapo saumane umaso raunanto vatane mansai vayave, yara vemo wo wasavae nora.

⁹ Vemo wapo doiye ana rui vayave inta raugav inya. ¹⁰ Muno vemo wapo ingkujawane inta raugav inya, muno wapa wasajo kokome muno isyoe inta raugav inya. Vemo wapo ansune raugavo randurum inya, yara ansuno no no wasanakea bom. Weye vatano wapanapatambe maije onawirati indati wo wasaeranande, wo wapa bekedaije raunande wasai.⁹

¹¹ Arono wasisa no munije inta rai, syare wapo vatano anuga ngkove akani, umba wasisa wana no apa yavar tutir ava wapu je apa munije raora. ¹² Arono wasisa no apa yavare rai, syare wapo raura wapore, 'Amisyé po kove raugaje wasai.' ¹³ Yavaruga umaso wo wasaeranande, indati Amisyé po kove raugaje mai. Yara ranivara manuga ngkovo wasai jeben, wea indati Amisyé po kove umawe raugakanande taune weabo wasai. ¹⁴ Vatane inta wo wasave kobe jeben muno wo wapa ayao raranive jeben, weamo wapusya munijo namije raora. Umba wapo kapumo nowo wasajoe raije ranepataje no vatano munije umaso mansamun indamu wo raen indati taune wo ama mangke ranawan. ¹⁵ Syo raura tugaive: arono masyoto Amisyé pakare po mangke rapatimugo vatano mine so mansai, weamo munijo Sodom muno Gomora aya mangke ndaradam,¹⁰ yara munijo uma wonae manuga rausiso wasai jewenoe indati awa mangke raugaje mai ntiti mo we rakivan."

Masyoto makanande indati vatane wo wasave tatugadi weye wapanave Yesus ai (Markus 13:9-13; Lukas 21:12-19)

¹⁶ "Inya! Syo wasatutir wapusya, wasaurata irati domba wapasya wasayai no makeo sivuiny awa yasyine rai. Weti syare wasyisyaube muno wasanuga ndandinit. ¹⁷ Wasyisyaube, weye indati vatane inta wo wasajjar wo wasaunanta no akarijo akokoe mansamun, umba wo wasanepato kaijo waije rai no yavaro sambaya ama uga rai. ¹⁸ Wonayo wasai weye watavondi

Rinai, weti indati wo wasaugaveta no gubernur mansamun muno akarijo titi mansamun. Somamo varoro ngkovo wana raije mi som indamu wapo Sya tame raura kakavimbe akarijo nanawije mai muno vatano marano wantatukambe Amisyé aije mansai. ¹⁹ Muno arono ware wo wasaugaveta no akarije umawe mansamun indamu wo wasanajobe, vemo wasanuga mamauno wapa ayaowo wapore wapo rasakinavo maije rai nora. Weye animaisyé mirati wapore wapo raura mammo arono naije Amisyé po ayao raunande wasai inda wadaura. ²⁰ Weti wapa ayao wato mammo taune wapa ayao ma jewena, yara wapa Ajayo no no munijo ntiti Apa Anawayo Vambunine ama ayao omi wadaura.

²¹⁻²² Indati masyote nde nande arono vatan tenambe manuga mamuno wasai weye weatavondi Rinai. Vatane wo taune awa arakove mansamavun indamu maubaisy. Muno ajae wo taune awa arikainye mansamavun indamu maubaisy tavon. Arikainye wo awa akoye nawe, awa ajae nawe, mave tatugadi, muno wo maunanta inda maubaisy. Weramu are nawirati matawandi kobe muno wanave Rinai tutir ava nto ama marane rai, onawamo indati Amisyé po mapaya irati kakaije rai indamu ukova nuge nuganui. ²³ Ranivara vatane wo wasave tatugadi no munije inta rai, weamo wanajiv ara wapakata no munijo kaijinta rai. Syo raura tugaive: arono wasisa Israel ama munije ranteter dainyamo, Risy, Arikainyo Vatane, ride to.

²⁴ Arikainyo sekora onawamo wanakoe wo awa kurune akivane ramu. Muno vatano wanapatambe awa akarije ai onawamo wanakoe wo awa akarije akivane ramu. ²⁵ Arikainyo sekora awa ana udave mo kurune awa ramaisy, weamo mamai to. Muno vatano wanapatambe ware wo awa akarije amaisy, omamo mamai tavon. Ananeneae umaso ama ine no taiso: Sya arikainye weap, Risyamo wapa kurune pi Risy, weti ranivara vatane wo rinave tatugadi, weamo wo wasave tatugadi tavon. Muno Risyamo wapa akarijo yavaruga pi Risy, weti ranivara vatane wo rinaura tantunawi ware Risyamo maisyare Anakakai Akoe ai,¹¹ wea indati wo wasaura tantunawi tavon, weye weapamo wasisa Sya yavaruga rai."

Wabemo wapo vatane masyaniv inya, yara Amisyé bo pirati wapo asyaniv (Lukas 12:2-7)

²⁶ "Wabemo wapo vatane masyaniv inya. Animaisyé mi wo rangkokaibe, indati

⁹ 10:10 1 Korintus 9:14; 1 Timotius 5:18

¹⁰ 10:15 Kejadian 19:24-28

¹¹ 10:25 Ayao Yunani mo tamo Bersebur

ratoe, ama ine mare Anakakai Akoe pi je.

Amisye po raroron kakavimbe. Muno animaisye mi ngkokaibe no manuga rai, indati raen kakavimbe. ²⁷ Animaisye mi Syo raura maninimbe wasai no naman, syare siman wapo raura kakavimbe vatane mai tenambe. Muno animaisye mirati Syo ransamuabe Sya arakove wasai, syare wapo ravovo vatan tenambe mai no kakavin.

²⁸ Wabemo wapo vatano wo wasanasine raubaisye masyaniv inya. Onawamo ubambunino wo wasanasino kopa bo raubaisy, yara wo wasanawayoe raubaisye kakai. Yara Amisye bo pirati wapo asyaniv, weye Opi bambunin po wasanasino kopa muno wasanawayoe raubai kava no tanamo mbaduro nuge nuganuije rai. ²⁹ Insanijo mamaun ramavunamo awa mangke maje rave. Inta apa masyote mamai dainy, weamo Amisye po aeranande indamu vemo kakai jinya. ³⁰⁻³¹ Muno Amisye po wasaeranande tavon, weye vatane nanentabo wapa mangke ma ntiti jirati insani manui awa rakivan. Wasakarivui nye mamu Amisye po ratora mamai to! Weti vemo wajaniv inya!”

Vemo nsamane nyo Yesus aura kakavimbe no vatane mansamun inya (Lukas 12:8-9)

³² “Are pirati po rinaura kakavimbe no vatano mine so mansamun pare, ‘Risiamo itavondi Yesus ai,’ weamo indati Syo vatano napije aura no Sya Injaya no no munijo ntiti amun syare, ‘Sya arakovo tavondi Rinai pije.’ ³³ Yara are pirati po inamarave no vatano mine so mansamun, weamo indati Syo amamarave tavon no Sya Injaya no no munijo ntiti amun.✧

³⁴ Ride soamo Syo kovo saumane raugavo mine so raije ramu, weti vemo wapo ratantonanare wemai nora. Ride indamu Syo kovo saumane raugave ramu, yara indamu Syo yavaruga maosor ti usivuinyo vambinibe. ³⁵ Ride indamu arikainyo anya ponayo aja ai, muno arikainyo wanya monayo akoya rai. Ajamo ngkove monayo ajamo ngkakaije rai. ³⁶ Muno vatane taune apa yavaruga ube marovave mai.

³⁷ Vatano bekobe irati akoya me aja pe yaije manakoe yara bekobe irati Rinaije mamu mamaun, weaveti opamo mamaisyo tavondi Rinaije ramu. Vatano bekobe irati apa arikainyo anya muno wanya maije manakoe, yara bekobe irati Rinaije mamaun, weaveti mamaisyo tavondi Rinaije ramu. ³⁸ Are pirati po taune apa inyo kapite ranawan ara tavondi Rinaije ramu, weaveti opamo mamaisyo tavondi Rinaije ramu. ³⁹ Are pirati beker pare po apa kovo

mine so ramavug, opamo indati apave kovo nuge nuganuije raije ramu. Yara are pirati nanto wene rai weye tavondi Rinai, opamo indati apave kovo nuge nuganuije rai.

⁴⁰ Are pirati bekobe irati wasai, opamo maisyare bekobe tavon irati Rinai, muno are pirati bekobe irati Rinai, opamo maisyare bekobe irati Sya Injayo po inatutire Ai tavon. ⁴¹ Are pirati bekobe irati vatano po ayao Amisye ravov inta ai weye vatane umaso po ayao Amisye ravov, opamo indati Amisye po kove inta raude ai mamaisyo ana Po raude Apa vatano po Apa ayao ravov umaso ai ramaisy. Muno are pirati po vatano anuga ngko dave augave siso weye vatane umaso anuga ngkov, opamo indati Amisye po kove inta raude ai mamaisyo ana Po raude vatano anuga ngko umaso ai ramaisy. ⁴² Syo raura tugaive: are pirati po ana inta raunande† vatano apa tame maje rave ai weye vatane umaso tavondi Rinai, opamo indati po ama ine raen, weye Amisye po kove inta raude ai jaje.”

11

Yohanes Pembaptis muno Yesus (Lukas 7:18-35)

¹ Yesus po ara arakovo utavondi aije abusyinara eane rurum manyaowa jewen, umba poroto pananyaube muno Po ayao Amisye raura no munijo Galilea raita.

² Arono naije Yohanes Pembaptis tuna no tanoano makova rai, umba po Kristus apa ana dave ranaun. Weti Yohanes po taune apa arakovo utavondi aije inta matutir uta no Yesusa nui indamu wo anajo. ³ Ude Ai umba wo ranajo ware, “Injae, Winyamo Mesias Amisye po naurairive opi Win dako, reamo vatano kaijinta anyute?”

⁴ Yesus po raura akananto mai pare, “Syare wapo Sya ananyaowe ranaun muno wapo Sya anapaporainye raen, umba wapakata no Yohanesa nui umba wapo raura ai: ⁵ Soamo vatano mamije ntuba wo nuge raen, vatano tunaive wanya, vatano aravure mo mave manakea nsauman, vatano mamarikoame mpapaki soa mamarikoame mpomo ti wo ana ranaun, vatano ugwenen to soamo ukokovainy akato, muno Ayao Kovo Amisye idavovo vatano awa ananuge meweno maije mansai. Weti wapakata wapo ana umaso raura Yohanes ai. ⁶ Muno wapo ayao namiso raura ai tavon: Vatano are pirati mamaundive Rinai jewen, yara panave Rinai kobe tutir, opamo Amisye po kove raugaje ai.”

⁷ Arono Yohanes Pembaptis apa arakovo utavondi aije wuruta jewen, naije Yesus

✧ 10:33 2 Timotius 2:12; 1 Yohanes 2:22-23 † 10:42 Ayao Yunani mare: “po mana inta raunande po ramanam.”

po Yohanes aura vatano wanuije mai pare, “Nandijawe arono wata no nugo vabukane vono maninimbe indamu wapo Yohanes aen, animaisye mi wapo raen? Wapo aen opamo vatano apa ana po ratantona nanto nande maisyare ovare po insumaije ramawi wemai dako? Jewena! ⁸Weti arono wata wapo Yohanes aen, animaisye mi wapo raen? Indako opamo po ansuno ngko dave rave rako? Jewena! Yara vatano wo ansuno ngko dave rave onawirati utantuna awa ananugo manui rave ama vone rai no awa yavaro ngko dave rai. ⁹Weti Yohanes Pembaptis umasop are pijep? Opamo anawae pa. Syo raura wasai syare opamo po anawae kaijinta mansakivan. ¹⁰Yohanes umaso pamo Ayao Amisye mo aurairive no wusyinoe. Amisye po aura to pare:

“Sopamo vatano Syo atutire pi so.

Syo atutir puisy manasyimbe Sya Mesias winai

indamu po unanuije ratayao Nai.’

¹¹ Syo raura tugaiwe: No mine vone so wusyinoea ndea naiso vatane inta panakoeve po Yohanes Pembaptis akivane ramu. Yara vatano rui pirati apa tame maje rave no kawasae Amisye be akarive mai, opamo po Yohanes umaso akivan. ¹² Arono Yohanes Pembaptis po ayao Amisye raura we ndea unumeso, vatano mamune wo kawasae Amisye be akarive majje maorai mangkebe, ware wo maugaje. ¹³ Ananyao Musa muno Ayao Anawae wo Amisye apa be akarive raurairive tenambe, mansanan ava Yohanes ai. ¹⁴ Ranivara wapare wapanave Sya ayao so rai, Syo raura kakavimbe: Yohanes Pembaptis opamo Elia piye, napirati anawae inta po raurairiveowe pare indati pakare,^{*} weye Yohanes de po Elia apa anakere rajjar akato. ¹⁵ Maisyare omai ti, syare wadanide! Are pirati amarikoame rasakinavo Sya ayao rai, weamo po ranaun.

¹⁶ Vatano susyo naiso weap, Syo anane-neae inta raura wasai: Arikainye inta wanunugambe ti utantuna no pasari ama wanijate rai. Arikainye inta wo awa inta mawainde ware, ¹⁷ ‘Wade wangkin da wansarer.’ Weramu awa arakove umaso wonae. Weti ugwin akato mansai ware, ‘Ngko to, weamo wamo ana kaijinta bo rave. Wade ramu wangkino ransyerano weotore rai indamu wansan-imaumbe tenambe.’ Weramu wonae tutir. ¹⁸ Maisyare wemai ti, weapamo wasaurata irati arikainyo wonae umawe mansai, weye waponayo Yohanes Pembaptis ai muno waponayo Rinai tavon. Arono Yohanes de wasai, opamo po anaisyo kove inta raisye ramu muno po angguriye ramaname

ramu, weramu waponayo ai wapare, ‘Opamo anawayo kakaije siso aija.’ ¹⁹ Risy, Arikainyo Vatan, ride wasai, Syo anaisye raisy muno Syo angguriye ramanam, weramu weapamo waponayo Rinai tavon, wapo inaura wapare, ‘Opamo sasokabe anaisye rai muno maeno angguriye rai. Muno opamo be arakobe irati vatano wo pajak ranugande akarijo pemerinta aije mai muno vatano ayao kakaije no maije mai.’

Weramu Amisye apa ana datantona mamu ntiti rave, weti vatano utavondi Apa bekere rai onawamo awa ana wo raveye mo raroron kakavimbe Apa ana datantona mamu mamaisy.”

Kakaije nde vatane mai arono usakinavo awa ayao kakai rai jeben

(Lukas 10:13-15)

²⁰ Umba naije Yesu po vatano Yahudi maura tantunawi, nanawirati utantuna no munijo namirati Po anapaporainyo manuije raroron dai to rai, weye onawamo wo Apa anapaporainye umaso raen to weramu usakinavo awa ayao kakaije raije ramu. ²¹ Po raura pare, “Kakaije nde munijo Korazin nai, muno kakaije nde munijo Betsaida nai tavon! Syo anapaporainyo manuije rarorono wasai to, weramu wasakinavo wapa ayao kakaije raije ramu. Ranivara Syo anapaporainye umawe raroron no munijo Sidon muno Tirus yai ratire, indati vatano marane ratuije nao wanave muno manimaumbe awa ayao kakaije rai ti usakinavo rai. ²² Tugae, arono indati masyoto Amisye po mangkeo mine so rapatimu, munijo marano Tirus muno Sidon aya mangke mamaun, yara munijo Yahudi Korazin muno Betsaida ipa mangke manakoe rave.

²³ Munijo Kapernaum winy, nyo ratantona nyare indati Amisye po naijaseo no munijo ntiti. Weramu Syo raura nai syare indati Amisye po namaugusyo no tanamo mbadururo nuge nuganuuije rai! Syo anapaporainyo manuije rarorono wasai to, weramu wasakinavo wapa ayao kakaije raije ramu. Ranivara Syo anapaporainye umawe raroron no munijo Sodom rai ratire, indati vatane usakinavo awa ayao kakaije rai ti Amisye po awa munije randamisye ramu, yara noa masyoto unumeso. ²⁴ Tugae, arono indati masyoto Amisye po mangkeo mine so rapatimu, munijo Sodom ama mangke mamaun, yara munijo Kapernaum nya mangke manakoe rave.”

Yesu po vatane mawainde indamu Po kovo saumane raugaje manuga rai

(Lukas 10:21-22)

* 11:14 Maleaki 3:1

²⁵ Arono naije Yesus be sambayambe pare, “Injayo Amisyey wimbe akarive munijo ntiti muno mine so rai. Syo kove raura seo Nai, weye ana umaso mammo Nyo rangkokaiibe vatano makarije mbare mai, yara Nyo rarorono vatano wantatukambe mansai. ²⁶ Injae, wemirati mamaisyoy Nya mbekere rai.”

²⁷ Umba Yesus po raura vatano wanuije umaso mai pare, “Sya Injaya po anakotaro rui yayave raunande Rinai to. Sya Injaya obo pi po apa Kavoy rinaen kobe, yara vatan inta wo rinaene ramu. Muno vatan inta wo Sya Injaya aene ramu, yara Apa Kavoy ribui syirati Syo aen kobe; muno vatano ibeker syare Syo Injaya arorono maije obo nawirati wo aen tavon.

²⁸ Syare wadeo Rinai, vatano wepirati wamayondi muno wapa anakotaro wapo ranawan mangke dave.* Syare syo wapa mangke no wasaije umaso rapaya wasai. ²⁹⁻³⁰ Weye Risyamo inanuga nsaumano wasai muno inanuga mpaaje. Syare syo wasanyao, muno Sya anyayoy syo raugaje wasaije mangke jeben, yara mamaisyoy wasanuga rai. Weti wapo ranyayoy mavabe muno watawondi rai, wea indati mo kovo saumane raugavoy wasanuga rai.”

12

Parisi wo Yesus apa arakove maura tantunawi weye wo kasyambere rakasyin no masyoto sambaya rai

(Markus 2:23-28; Lukas 6:1-5)

¹ Arono masyoto sambaya inta rai, Yesus de siso panya no nawaisyoy kasyambere ama uga rai. Umba Apa arakovo utawondi aije umaror; weti wo kasyambere rakasyin umba wo raisy. ² Vatano Parisi wo ana umaso raen, umba wo raura nanto Yesus ai ware, “Winyerade! Veanimaibe Nya arakovo utawondi naije wo kasyambere rakasyin no masyoto unumeso? Weye Yahudi wama anyayoy mare vemo wamo anakere raijar no masyoto sambaya rai jinya!”

³ Yesus po raura akananto mansai pare, “Wabeanimaibe wananta Ayao Amisyey raije jeben? Syare wasaemen animaisyey mi mo ratoy mare aneno Daud po rave arono wepe, apa arakove nawe umaror. ⁴ Opamo siso no Yavaro Amisyey ama uga rai, umba po rotijo raunanto Amisyey aije raugav pi po raisy, umba po raunanto apa arakove mai tavon ti wo raisy. Weramu Musa apa anyayoy inta mare vemo vatan bayave wo raisy inya, yara syene bo nawirati wo raisy.

⁵ Wadaen tavon Anyayoy Musa mo raura mare syene wo anakere raijar no Yavaro Amisyey ama uga rai no masyoto sambaya rai kai. Wo anyayoy rakanyoandi, wemi mare vemo anakere raijar no masyoto sambaya rai jinya, weramu Amisyey pare awa ana wo rave mammo ayayoy kakaije ma jewena.

⁶ Syo raura wasai syare naisoamo Vatano panakoeve irati Yavaro Amisyey rakivan de wasai to. ⁷ Ayayoy Amisyey mo raura mare, ‘Ribekero wapa anakotaro wapo rameseo Rinai rai ramu, yara ribeker syare wapo muinyey rarorono vatano kaijinta mai.’⁸ Weramu, vatano Parisiye, wananta Ayayoy Amisyey umaso raije ramu. Wapo Sya arakove maura tantunawi, weramu wo ayayoy kakaije inta rave ramu. ⁸ Weye Risy, Arikainyoy Vatan, ribe akarive masyoto sambaya rai.”

Parisi wo Yesus aura tantunawi weye Po saumane raunanto vatane inta ai no masyoto sambaya rai

(Markus 3:1-6; Lukas 6:6-11)

⁹ Yesus pusyoy, umba to siso no yavaro sambaya inta ama uga. ¹⁰ Vatano aneme rani nsawa inta no no naije tavon. Umba vatano Parisiye inta wo Yesus anajoy ware, “Mamaisyoy wama anyayoy raijamo, vatane inta po saumane raunande vatano ujajorame mai no masyoto sambaya rai omamo mamai dako jewena e?” Wo anajoy tai maisy weye ware wo Yesus apa ayayoy kakaije rakani indamuy wo aura tantunawi.

¹¹ Umba Yesus po raura nakananto mai pare, “Weapamoy inta nya domba inta temasyoy no ateme raijoy masyoto sambaya rai, wea indati nyoy ausen kobeay. ¹² Wasaemeno wapa domba mai, yara wabeanimaibe wasaemeno vatano jorame aije jeben? Tugay, vatane pi panakoeve domba akivan. Maisyare omai ti, syare wamoy kove raunanto vatano kaijinta mai no masyoto sambaya rai kai.”

¹³ Umba Po raura nanto vatano aneme rani nsawa umawey ai pare, “Nanemey raojaito!” Weti vatane umawey po anemey raojaito, naije kobe anemey nsauman ti mo anemey rani ramai tavon. ¹⁴ Weramu vatano Parisi wujey yavaro sambaya raora umba wanyinyaubey indamuy wo Yesus aubaisy.

Yesus opamo Vatano panapatambe Amisyey ai, mamaisyoy anawayey Yesayoy apa urairiye rai

¹⁵ Yesus po vatano Parisiye maenoy awa bekeroy ngkakai umasoy rai to, ti puje munijoy we raora. Vatano wanuiy utavonoy AI,

* 11:28 Anakotaro mangkoy wo ranawan omamoy anyayoy namirati kurunoy Yahudi wo mantitidi indamuy ubetay rai, weyey anyayoy umasoy mamoy manuiy rave muno mangkoy dave. ✪ 12:7 Hosea 6:6

umba Po saumane raunanto vatano uganwane mai tenambe. ¹⁶ Weramu Po maorai indamu vemo wo aura kakavimbe inya. ¹⁷ Ana nande so mamaisyo Amisye apa ayao anawae Yesaya po raura rai pare:

¹⁸ “Sopamo Sya Vatano syo apatimu indamu panapatambe Rinai.

Inanuga no Ai, muno inanayanambe Ai rave.

Syo sya Anawayo Vambunine raugaje Ai, indamu poroto Po ayao mamaisye ravovo

vatane kotaro ntuna no mine so mansai.

¹⁹ Opamo gwaine po arare veano vatane mave ramu,

muno payao akoeve no munije ama yasyine rai ramu.

²⁰ Akirive vatano mayondi maije ramu, muno Po vatano awa anave mamaun

mapaya ti una jewen, yara aemeno mai muno Po maeranande.

Indati Po apa anakere ransui tutir ava Amisye be akarive mine tename so rai,

muno Apa ayao mamaisye mi mo mine vone so ratatu tenambe.

²¹ Vatane kotaro ntuna no mine so manaveano Amen.”*

Yesus apa vambunin muno Anakakai Akoe apa vambunin

(Markus 3:20-30; Lukas 11:14-23, 6:43-45)

²² Umba wo vatano gwanen inta augavere no Yesusa nui. Vatane umaso pamo amije ntuba muno awa ngkao weye anawayo kakaije nsiso aija. Umba Yesus po saumane raunanto ai indamu payao muno po ana raen. ²³ Vatano wanuije unaitave tenambe ti wo raura ware, “Wakoe! Sopamo Daud apa ajavi, Napi aurairive ti wamo anyube, Wepi so dako?”

²⁴ Weramu vatano Parisi wo ana umaso ranaun, umba wo raura ware, “Akarijo anawayo kakaije, apa tame mi Bersebur,* wepi po vambunine raunande Yesus ai indamu Po anawayo kakaije mawatambe.”

²⁵ Yesus po Parisi awa ana wo ratantona so raen to, ti Po raura mai pare, “Ranivara munije inta ama vatane maporabe jirum ti inta umarovave inta mai, wea umba munije umaso mandamisy. Muno ranivara yavaruga maporabe jirum ti inta umarovave inta mai, wea umba mandamisy tavon. ²⁶ Anakakai Akoe apa munijo be akarive rajie maisyare wemai tavon. Ranivara Anakakai Akoe pe apa anawayo kakaije nawe maporabe jirum

ti taune umarovave taune mansai, wea apa munijo be akarive rai noa nugoenta ramu, yara mandami kobe. ²⁷ Weramu taune wapa arakovo utavondi wasaije nawamo wo anawayo kakaije mawatan tavon, weti are pirati po vambunine umaso raunande mai? Wapa arakovo nanawije wo raenamo Amisye bo pirati bambunin Po anawayo kakaije mawatambe. Weti wapa ana wapo rinangkivane umawe wapare Risyamo syo anawayo kakaije mawatan irati Anakakai Akoe apa vambunine rai, omamo mamaisye ramu. ²⁸ Yara tugae mammo Syo anawayo kakaije mawatan irati Anawayo Amisye ama vambunine rai. Maisyare omaisy wapo raen soamo Amisye de be akarive Apa kawasae mai no wapa yasyine so rai to.

²⁹ Syo ananeneae inta raura: Ranivara vatano panaonoambe inta siso vatano bambunine apa yavare rai, weamo po vatane umaso aneme ajoe raokokai dati, umba po apa ananugo yavarugawe raugavo aora tenambe. Anakakai Akoe aurata irati vatano bambunine umaso ai, muno Risyamo syo apinde to, wemi mbewar Syo anawayo kakaije mawatan.

³⁰ Are pirati tavondijo Rinai ramu, opamo be marovave Rinai. Are pirati po anakere rajiaro inatavone jewen, opamo po Sya anakere ransosobe. ³¹ Syo raura wasai: vatane awa ayao kakai rui vayave muno awa ayao wo Amisye aura tantunawi, Amisye pare po rapaya mai arono usakinavo rai. Yara are pirati po Anawayo Vambunine raura tantunawi, opamo Amisye po apa ayao kakaije umaso rapaya aije ramu. ³² Are pirati po Risy, Arikainyo Vatane, inaura tantunawi, umba sakinavo apa ayao kakaije umaso rai, weamo indati Amisye po apa ayao kakaije umaso rapaya ai. Yara are pirati po Anawayo Vambunine raura tantunawi, weamo Amisye po apa ayao kakaije umaso rapaya aije ramu, yara Apa pariye no ai no mine so ao nuge nuganui.

³³⁻³⁵ Parisiji, weapamo vatano mamun maisyare tawae mamun ramaisy! Wapare wapo kove raura, wamamaisye ramu, weye wasanuga mamun. Wasanuga mammo raurata irati ananeneae inyo mote so rai. Inyo moto kove mo mano kove rauguje, yara inyo moto kakaije mo mano kakaije rauguje, weye inyo mane mammo mamaisyo ama mote rai. Maisyare omai ti, vatano kove wo ayao kove raura weye manuga ntairijo ana ngkove rai, yara vatano kakainoanive wapo ayao kakaije raura weye wasanuga ntairijo ana ngkakaije rai. Weye vatane apa ana no anuga rai

* 12:21 Yesaya 42:1-4

* 12:24 Tamo Bersebur ama ine mare Anakakai Akoe piye.

ntipu muje po raura no awa. ³⁶ Syo raura wasai: arono masyoto Amisyepo mangke rapatimu, indati vatane wo awa ana udaura ama ine meweno rajje ranawan tenambe no Amun. ³⁷ Are pirati apa ana daura ngkov, weamo Amisyepare opi mamaisy. Yara are pirati apa ana daura mamun, weamo Amisyepare po mangke raugaje ai.”

Parisije wo Yesus anajo indamu Po anapaporainye rarorono mai

(Markus 8:11-12; Lukas 11:19-32)

³⁸ Umba watano Parisijepo inta nawe, kuruno makari mbaro Ananyao Musa rai inta nawe, wo Yesus anajo ware, “Injayo Kurune, reambeker reamare Nyo anapaporainye inta raroron inda reandaen tugae rako jewena rako Winyamo no no Amisyepo nui ti nde rako?”

³⁹ Weramu Yesus po raura akananto mai pare, “Wadanide! Watano arono naiso weapamo wasakirive Amisyepo ai to muno wapa ayao kakai ntapekano wasai. Wapo anapaporainye inta ranajo Rinai indamu mbe rarorombe Risyamo Amisyepo inatutire pi Risy. Weramu Syo raura wasai syare Syo anapaporainyo manuije rarorono wasaije ramu, yara intabo mi Syo rarorono wasai, omamo anapaporainyo nande anawae Yunus ai obo ma. ⁴⁰ Yunus no no jiano saroe anuga rai masyote mandei namane mandei. Maisyare omaisy, Risy, Arikainyo Vatan, rino no kopa ama uga masyote mandei namane mandei. ⁴¹ Arono masyoto Amisyepo mangke rapatimugo watano mine so rai, watano munijo Niniwe indati usea wo Amisyepo anajo indamu Po mangke raugaje watano susyo naiso wasai. Weyepo watano Niniwe umaso usakinawo awa ayao kakaije rai arono anawae Yunus po ayao Amisyepo raura mai, yara soamo Watano panakoe po Yunus akivan Opamo napi te no wapa yasyine so, weramu wapanawe Aijepo ramu.

⁴² Muno wusyinoe wanya mbe akarive no munijo Syeba, no no nugo gwaravainy, omamo nde indamu mo Akarijepo Titi Salomopapa ananyao ntitijepo ranaun. Arono masyotomangke rapatimupnande, Akarijepo Ntiti Syebapomaso indati nseopmo Amisyepo anajo indamu Po mangke raugaje watano susyopnaiso wasai. Weyepo omamo no no mine tename so amamarane rai umba manya nde indamu mo Salomopanaun, yara soamo Watano papana ana datantona ntiti Po Salomopakivan Opamopnapi te no wapa yasyine so, weramupwapanawe Aijepo ramu.”

Ananeneae anawayo kakaije muje vatane inta aora umba nde makaiso akato
(Lukas 11:24-26)

⁴³ “Arono anawayo kakaijepo puje vatane inta aora, panya toe de no mino ngkanembe rai indamuppo apa no rajjepo rakanip, weramuppo rakanijepo marudi. ⁴⁴ Umba po raura pare, ‘Syare syakato no watano syujepo aora aijakato.’ Arono sakina pakare, de pakaiso vatane umawepo ai jakato, po raen vatane umawepo anugapomamo ana inta tuna rajjepo jewen, yara kakavimbe. ⁴⁵ Weti anawayo kakaijepo umawepo pakato po anawayo kakaijepo kaururum mamun dave inta maugapavon, wakare wakaisa tenambe vatane umawepo ai jakato, umba una kobepo no we. Umba naijepo vatane umawepo apa siurijepo manasyine mamaun, yara papasiurijepo rijat akato so manakoe rave. Siurijepo maisyare umasopindati nandepo watano susyopnaiso wasai, weyepo weapamopwakakainoanive.”

Yesus apa akoya me Apa rijate nawe ude Ai

(Markus 3:31-35; Lukas 8:19-21)

⁴⁶ Arono naijepo Yesus payaonantopirati watano wanupomaso mai, umba Apapokoya me Aparijate nawepo useipno yavare akirijepo umu, ware ubekerpindamupwayaonantopAi. ⁴⁷ Umba vatane inta po raura nantopYesus aijepo pare, “Injaep, Nangkoyame Nya rijate nawepo useipno akiripomuga ware ubekerpindamupwayaonandepNai.”

⁴⁸ Umba Yesus po raura nantopwatano umapopraura nandepaijepo aijepo pare, “Are nawirati Syapokoe, Syaparakowepwaino mansai?” ⁴⁹ Naijepo anemepo raroronantopApaparakowepotavondipaijepo mai, umba Popraura pare, “Syapingkoa me Syaparakowepwenawipotantuna so, ⁵⁰ weyepo watano anyapwanya utavondijepo SyapInjayopno no munijepo ntitipApapokoe rajjepo wenawirati Syapokowaino mai munopSyaparakowepwaino mai.”

13

Ananeneaeypowatano popiru kamijepo rangkikipo

(Markus 4:1-20; Lukas 8:4-15)

¹ Masyotopnaijepo Yesus pujepo yavare weraora, porotopnuna no onapetuga Galilea. ² Umba watano wanuijepo udepwo akiani. Weti Yesus seopnuna no nyomanopmampayano onapetunapintama von, munopwatano wanuijepo umasopuseipno nayave von. ³ Umba Popo ananeneae inta raurapmai pare, “Vatane inta popnawaisyepo ranari, umba popiru kamiprangkikipo rai. ⁴ Aronoppanya poprangkikipo, inta ntatayajepo no unanuijepo nawantave rai bo rai. Umba insanijepo wajepo raisy, tipmewen dave. ⁵ Kamijepo inta mamopntataepirati minopmbe orambe rai. Irukamijepo umasopama ntubai mamopmavave nseopweyepo kopa ntapekan kobeyepo ramu. ⁶ Weramuparono umaposeo, popkamijepo ntubaijepo umasopmayanopnti

ngkanen, weye wantainye musyo kopa rai kobe jeben yara nanto orame rai. ⁷ Kamije inta ntatae tavon no anansinaowe ama uga rai. Anansinaowe nseo tavon umba mo kamino wanyine umawe rakikipi ti ngkakai. ⁸ Umba kamije umasom inta ntatae no kopa kove rai, umba ntubai se-owa manakoe, muno ama mane nande rai kobe: inta ama mane no tenamara eane abusyin, kaijinta ma tename mandei, muno inta nseo no tename nadani.

⁹ Syare wadanide! Are pirati amarikoame rasakinavo Sya ayao rai, weamo po ranaun.”

Veanimaibe Yesus po ananeneae raura vatano wanuije mai

(Markus 4:10-12; Lukas 8:9-10)

¹⁰ Naije Yesus apa arakovo utavondi aije ude Ai, wo anajo ware, “Injae, mbeani-maibe irati Nyo ananeneae raura nanto vatane mai?”

¹¹ Umba Yesus po raura nande mai pare, “Amisye apa be akarive Apa kawasae mai no mine so omamo ayao ngkokaibe arono wusyinoe weti vatane unanta rai jeben, yara weapirati Amisye po rarorono wasai. Weti Syo raura kakavimbe wasai, weramu vatano kaijinta mansai jeben. ¹² Vatano ayao Amisye no anuga rai kobe, opamo Amisye po auga ti nanto rai ti apa ana po raene miridi nseo ti manakoe. Yara vatano ayao Amisye no ai kobe jeben, opamo apa ana po raene miridi makaje ti raumandi kobe. ¹³ Wemi mbewar Syo ananeneae raura vatane mai weye mamije mo Sya ana idave raen, weramu unanta raije ramu; muno wo Sya ana idaura raraniv, weramu unanta raije ramu. ¹⁴ Maisyare omaisy uradamu mamaisyo anawae Yesaya apa urair-ije rai, po Amisye apa ayaowe so ratoe:

‘Wapo Sya ana idaura raraniv, weramu wananta raije ramu,
muno wasami mo Sya ana idave raen,
weramu wananta raije ramu.

¹⁵ Weye vatane sonawamo manuga matu, muno mamarikoame mpapakiri, muno mamije ntatavi.

Wonayo wo raeno mamije raiji,
wonayo wo raranivo mamarikoame raiji,
muno wonayo manuga nanto raiji.

Wemi mbewar usakinav wakare Rinai jeben,
weti saumane mamo Syo raunande mansaije ramu.*

¹⁶ Weramu Sya arakovo watavondi rinai, weapirati Amisye po kovo manakoe raugaje wasai to, weye wasami mo Sya anakotaro syo rave raen kakavimbe, muno wasamarikoame mo Sya ayao syo

raura raraniv kobe. ¹⁷ Syo raura tugaive, wusyinoe anawae wanui muno vatano ubeta Amisye ai wanui ubeke dave taune mansami mo Mesias rinaeno Sya ana dave rai maisyare muno weapo rinaene somaisy, weramu wo rinaeno mansami rai jeben. Muno Mesias syayaowa ubeker wo rinaranivo taune mansamarikoame rai, maisyare muno soamo weapo rinaranive somaisy, weramu wo rinaranivo mamarikoame rai jeben. Yara weapirati anakotare so nde wasai to.”

Yesus po ananeneae yo vatano po iru kamije rangkikije raura kakavimbe

(Markus 4:13-20; Lukas 8:11-15)

¹⁸ “Wadanide! Ananeneae yo vatano po iru kamije rangkikije ama ine no taiso: ¹⁹ Kamije inta ntatayo unanuije nawan-tave rai bo rai, omamo raurata irati vatano wo ayao Amisye be akarive ranaun, weramu unanta raije ramu. Wo ranaun umba Anakakai Akoe de po ayao Amisy no no manuga raugavo maora.

²⁰ Kamije inta ntatae no mino mbe orambe rai omamo raurata vatano wo ayao Amisye ranaun, wavave wo rajade manayanambe rautan. ²¹ Weramu ayao umaso masyo ntonam matuve no manuga raije ramu, weti no tawane ramu. Arono siuri nande mai muno vatane wo mave tatugadi weye wanave to, weamo vatane umaso makirive ayao Amisye rai jakato.

²² Kamije inta ntatae no anansinao ama uga rai, omamo raurata irati vatano wo ayao Amisye ranaun, weramu wo anakotaro mine so bo rantotobe, muno ubekero wo romane bo ranugan. Wetivara anakotare umaso mo ayao Amisye rakikipi no manuga rai, weti ama ine raen no maije ramu.

²³ Kamije inta ntatae no kopa kove rai, omamo raurata irati vatano wo ayao Amisye ranaun muno wanave rai kobe, weti ama ine raen no mai. Vatano maisyare sonawamo awa mano wo rauguje mamo inta nseo no tenamara eane abusyin, inta ma tename mandei, muno inta nseo no tename nadani.”

Ananeneae yo kamijo kove muno ininai

²⁴ Yesus po ananeneae kaijinta raura nanto vatano wanuije mansai pare, “Arono Amisye be akarive Apa kawasae mansai no mine vone so, omamo raurata irati ananeneae so rai: Vatane inta po anare kamijo kove rangkiki no nawaisy. ²⁵ Namano vatane unaki umba vatano anuga mamuno vatano apa nawaisy aije inta de po ininaije kamije rangkiki no kamijo kove umawe ratavon umba poroto. ²⁶ Arono anare

* 13:15 Yesaya 6:9-10; Yohanes 12:40; Arakov 28:26-27

umawe ntubai mare mbera man kobe, ininaije umawe ntubai tavon.

²⁷ Naije vatano wanapatambe vatano apa nawaisye umawe aije ude ai, wo anajo ware, 'Injae, nyo anare kamijo kove rangkiki no irati nawaisye rai to, weti veanimaibe irati ininaije so ntubai tavon no nawaisye so rai?'

²⁸ Vatano apa nawaisye umawe po raura nanto mai pare, 'Vatano anuga mamuno rinaije pirati po ana umaso rave.'

Umba vatano wanapatambe aije wo raura nanto ai ware, 'Nyare mayar, reamo ininaije so rapatin.'

²⁹ Weramu po raura pare, 'Wenora. Wapo ininaije so rapatin, wea vemo wapo anareye inta rapatin tavon inta. ³⁰ Weti yava syayai tenambe kai jao ama ine mare matu. Umba syo raura vatano wo rakasyine mai syare: Wapo ininaije ranugande wusyine umba raokokae indamu ramero taname rai, yura anareye ranugan ti raugav siso ntuna no sya yavare rai.' "

Ananeneayo sesawije kamije muno ragi (Markus 4:30-32; Lukas 13:18-21)

³¹ Yesus po ananeneae kaijinta raura vatano wanuije mansai pare, "Arono Amisye be akarive Apa kawasae mai no mine vone so, Apa kawasae maurata irati sesawije kamije rai. ³² Sesawije kamije omamo momoyain dave,* weramu arono ntubai seo, ama mote manakoeve mo anareo kai rakivan, manakoe maisyare inyo mote ramaisy, weti insanije nande wo ene ranari ama ririje rai."

³³ Umba Yesus po ananeneae kaijinta raura mai jakato pare, "Arono Amisye be akarive Apa kawasae mai no mine vone so, Apa kawasae maurata irati ragi rai. Wanya inta mo ragi mamaun inta raija ti raugasyo mo veano tepuno manakoe raroya da ntipu tenambe inda manui."

³⁴ Yesus po anakotare umaso raura ananeneaebe vatano wanuije mansai. Po manyao ananeneae bo rai. ³⁵ Ana umaso mamamaisy ayao Amisy anawae wusyine inta po raura we rai pare:

"Indati Syo ananeneae rave vatane mansanyao;
anakotaro ngkokaiibe arono mine so ranari kobeyoe
omamo Syo raura kakavimbe mai."*

Yesus po ananeneayo ininaije raura kakavimbe

³⁶ Yesus po vatano wanuije umaso mapaya ti una no naije, poroto siso no yavar. Umba Apa arakovo utavondi aije ude Ai,

wo anajo ware, "Injae, reamare Nyo ananeneayo ndaurata ininaije umawe rai raura kakavimbe reansai."

³⁷ Yesus po raura nakananto mai pare, "Vatano po anare kamijo kove rangkiki opamo aurata irati Arikainyo Vatane rinai.

³⁸ Yara nawaisye omamo raurata irati mine tename so rai. Anare kamijo kove omamo raurata irati vatano Amisye be akarive maije mai. Ininaije omamo raurata irati vatano Anakakai Akoe be akarive maije mai. ³⁹ Vatano anuga mamuno vatano apave nawaisye ai ti po ininaije kamije rangkiki opamo aurata irati Anakakai Akoe ai. Nawaisye umaso ndea matu ti ama ine ranugan, omamo raurata irati munije ama akarije rai, muno vatano wo ranugan onawamo maurata irati naito Amisye mai.

⁴⁰ Maisyare ininaije rapatin ti ramero taname rai, maisyare omai tavon nande arono munije ama akari. ⁴¹ Weye Risy, Arikainyo Vatan, indati Syo sya naite matutir indamu wo vatano wo ayao kakai rave mauguje Sya kawasae maora no awa yasyin. Vatane umaso wo anakotaro kakainoave rave muno wo vatano kaijinta matopan ti wo ayao kakai rave tavon. ⁴² Indati Sya naite umawe wo mamaugusyo tanamo mbadururo nuge nunganuije rai. No ratuije woyov tawan muno usiuri tutir. ⁴³ Arono naije vatano ubeta Amisye apa bekere rai nao ubar no munijo awa Ajayo Amisye be akarive raije rai, maisyare uma apa vare ramaisy. Wadanide! Are pirati amarikoame rasakinavo Sya ayao rai, weamo po ranaun."

Ananeneayo doijo rambai no kopa ama ate

⁴⁴ "Amisye be akarive Apa kawasae mai no mine so omamo raurata irati doijo manui rambai no kopa ama ate rai. Arono vatane inta nanto rai, anayanambe rave. Weti po rangkokaiibe kopa ama ate rai jakato, umba poroto po apa ananugo kaijinta rambayan tenambe umbawe po ama doije veano kopa umawe ramavun.

⁴⁵ Maisyare omai tavon, Amisye be akarive Apa kawasae mai omamo raurata irati romano ama ngkove ngkena dave vatane inta po rakani rai. ⁴⁶ Arono vatane umaso nanto romano ngkena dave inta rai, pavave poroto po apa ananugo kaijinta rambayan tenambe umbawe po ama doije veano romano ama ngkove ngkena dave umawe ramavun."

Ananeneayo enam

⁴⁷ "Maisyare omai tavon, Amisye be akarive Apa kawasae mansai no mine vone

* 13:32 Sesawije kotaro ranyum no Indonesia omamo anareo mamaun, yara sesawijo kotaro ranyum no Israel ntubai ti manakoe rave, maisyare inyoe ramaisy. ✧ 13:35 Mazmur 78:2

so omamo raurata irati enamoe. Ti vatane inta wo rantet no onae, jiane kotare nsawa rai. ⁴⁸ Arono ename umaso ntairijo jiane kotare rai, naije vatano wo rantete umaso wo rakapan dautan no ruke warea umba utantuna wo jiane ratayao. Kove mamo wo ranugan asyo no bayaije rai, yara jiano kakaije mamo wo raepata. ⁴⁹ Maisyare omai ti, arono munije ama akari, Amisyere apa naite ude wo vatano kove muno vatano kakainoanive maosor. ⁵⁰ Umba wo vatano kakainoanive mamaugusyo tanamo mbadururo nuge nuganuije rai. No ratuije woyow tawan muno usiuri tutir.”

⁵¹ Naije Yesus po raura nanto Apa arakovo utavondi aije mai pare, “Wananta Sya ana syo raura umawe rai tenambea e?” Umba wo raura nakanande Ai ware, “Renanta rai to.”

⁵² Umba Yesus po raura nanto mai pare, “Kuruno akari mbaro Ananyao Musa raije rui pirati pare tavondijo Sya kawasaeyo Amisyere be akarive maije mai, opamo aurata irati vatano apave romano wusyine muno romano wanyine rai kava no apa yavar. Weye soamo po ananyao wusyine muno wanyine raen tenambe indamu po rave vatane mansanyao.”

*Yesus awatambe no munijo Nasaret
(Markus 6:1-6a; Lukas 4:16-30)*

⁵³ Yesus po ananeneae umaso raurana mewen, umba puje munijo we raora. ⁵⁴ Umba pakare no Apa munijo nori, umba Po vatane manyao no yavaro sambaya rai. Arono vatane wo Apa ananyao ranaun, unantaive rave. Wo raura ware, “Wakoe! Are pirati po ananyaowe so raunanto Yesus ai? Apa ana datantona ntiti somamo nori rui? Muno Po anapaporainye so raveare rui? ⁵⁵ Wamo vatane so aen, Opamo vatano po inyoe ranari apa kavo piye. Apa akoya mirati Maria. Apa rijate nawirati Yakobusa pe Yusupa pe Simona pe Yudasa pe nao. ⁵⁶ Apa aname nao una tenambe no naiso tavon. Weti vambunine wato mamo Po raugadi rui?” ⁵⁷ Weti wonayo wanave Aiji.

Umba Yesus po raura nanto mai pare, “Tugae, anawae Amisyere to no munijo maran, weamo vatane wanave ai. Yara pare pakare no taune apa munije rai, weamo vatane wanave aije ramu. Muno taune apa arakove nawe apa yavaruga nawe wanave aije jeben tenambe.”

⁵⁸ Weti Yesus po anapaporainyo manuije inta raroron no munije umaso raije ramu, weye wanave Aije ramu.

14

*Yohanes Pembaptis kakai
(Markus 6:14-29; Lukas 9:7-9)*

¹ Arono naije Akarijo Titi Herodes, wepirati be akarive no no propinsijo Galilea, po Yesus apa ana dave ranaun. ² Weti po raura vatano usarodoro aije mai pare, “Yesus opamo Yohanes Pembaptis wepirati kovakato ti pakare wep. Wemi mbewar Po anapaporainye raroron.”

³⁻⁴ Yohanes Pembaptis apa kakaije nande no taiso: Herodes po apa arakovo Pilipus apa anamugo Herodias raovan to, weti Yohanes pananyaube Herodes ai pare, “Winyamo vemo nyo nya arakova apa anamu raovan inya! Nyo ananyao Amisy rakanyoandil!” Wetiva Herodias umaso mpariyo Yohanes ai, ti ama anap Herodes po Yohanes aijar, po augave siso no tanoano makova rai. ⁵ Herodes beker pare po Yohanes aubaisy, weramu po vatano wanuije masyaniv weye wo raura ware, “Yohanes opamo anawae pa.”

⁶ Arono Herodes apa masyoto ano raije mamaisy, po one rave muno naije Herodias ama kavo wanya musyo nsarer. Herodes anayanambe ama sarere rai. ⁷ Weti po raurairive patimuve rai pare, “Animaisyere mi nyare mbekero rai, indati syo raunande nai.”

⁸ Umba wanya arikainye umawe mo raura mamaisyo ama akoya mo ratutiro raije rai mare, “Syare syo Yohanes Pembaptis akarije ranajo, indamu nyo raugaje ntamijo pauraije rai muno raunande rinai.”

⁹ Arono Herodes po ama ana mbekedaijewe ranaun, animaumbe rave, weramu apa arakove wo apa urairijo mpanyoane ranaun to. Weti po apa naite matutir indamu wo wanya arikainye umaso ama ana mbekedaije raunande rai. ¹⁰ Naije apa naite inta poroto po Yohanes akarije raotar no tanoano makova ama uga. ¹¹ Umba po akarije umawe raugaje ntamijo pauraije rai, po raugav po raunanto wanya arikainye umawe rai, umba mo raunanto akoya rai. ¹² Mewen, umba Yohanes apa arakovo utavondi aije ude wo anasino kopa raugaveta wo rantuna no aipapo. Umba wuruta wo ana umawe raura Yesus ai.

Yesus po anaisyere raunanto vatane ribuge radani wo raisy

(Markus 6:30-40; Lukas 9:10-17; Yohanes 6:1-13)

¹³ Arono Yesus po Yohanes Pembaptis apa aubaisyere umawe ranaun, naije seo nyomane rai mumuimbe, puje ti poroto no nugo maninimbe inta rai. Weramu vatano wanuije wo ranaun to, ti wanya yawa rai wo Yesus arijat. ¹⁴ Arono nyomane umawe nto nanto, Yesus paje kobe. Naije Po vatano wanuije maen, aemeno mansai rave, umba Po saumane raunanto vatano ugwanene mansai.

¹⁵ Namandive kobe, weti Apa arakovo utavondi aije ude wo raura nanto Ai ware, “Mare ngkaumu kobe, nuge so nggwara-vainy tavon. Injae, koveamo Nyo vatano wanuije so matutir inda wuruta wo anaisye inta ramavun no munije wato rai.”

¹⁶ Yesus po raura nanto mai pare, “Vemo wuruta inya, yara una kai. Weapirati wapo anaisye inta raunande indamu vatane so wo raisy.”

¹⁷ Umba wo raura akanande Yesus ai ware, “Anaisyo manuije meweno wansai, yara rotije vasyesye radani obo mirati ntuna, jiane ruruma yatavon.”

¹⁸ Naije Yesus pare, “Wapo raugavere no Rinui.” ¹⁹ Umba Po vatano wanuije umaso matutir waje utantuna no insumaije vone rai. Umba Po rotije vasyesye radani muno jiane rurum raugavere tenambe, umba peraseo no naume warae, Po kove raura seo Amisye ai. Umba Po rotije raporadijo aneme rai, Po rotije muno jiane umaso rauranto Apa arakovo utavondi aije mai, indamu wo ratodijo vatano wanuije umawe mai, inda wo raisy. ²⁰ Wo raisya uman dave. Umba Yesus apa arakove wo anaisye ateteo ntuna ranunugambe akare no bayaije rai. Bayaije umaso ama manuije nanto no abusynara eane rurum. ²¹ Anya uma wo anaisye umaso raisye awa wanuije nanto no ribuge radani. Awa wanya muno awa arikainyo wo anaisye umaso rai tenambe awa wanuije rator tavone ramu.

*Yesus panya onae vone rai
(Markus 6:45-52; Yohanes 6:16-21)*

²² Naije kobe Yesus po apa arakovo utavondi aije matutir pare, “Wasea nyomane rai wapui da wata no onae tuga ranijo warani.” Muno Po vatano wanuije umawe matutir indamu unajiv. ²³ Arono unaji to, Yesus poroto mumuimbe no pukame inta rai indamu be sambayambe. Masyote ndea mare ngkaumu kobe, Yesus obo no no naije. ²⁴ Werau Apa arakovo utavondi aije uborae unanta no onae ama yasyin. Ovaro po mansamune raide panyoan dave ti rarene mo awa nyomane ranepato rani rani.

²⁵ Arono mararaijo sansiman, uma amije mandei to, umba Yesus panya onae vone raide mai. ²⁶ Arono Apa arakove wo aeno panya onae vone raide, upaparo mai umba wo raura ware, “Pakinik akoe!” Ujani dave ti wunanta.

²⁷ Werau naije kobe Yesus po raura mai pare, “Wamanin! Risyi so. Vemo wajaniv inya!”

²⁸ Umba Petrus po raura nanto Ai pare, “Injae, Winyijeamo, syare Nyo rinawain da syanya onae vone raijo re no Winui.”

²⁹ Umba Yesus po raura pare, “Winde kai.”

Weti Petrus paje nyomane rai kobe umba panya onae vone rai to no Yesusa nui. ³⁰ Werau Petrus po ovare aen panakoeve no onae von, ti janiv. Pare bera sayadi kobe, ti gwain pare, “Injae, naemeno rinai! Nyo inaijaseo!”

³¹ Naije kobe Yesus pavave aneme rareanto Po Petrus aneme raijaseo. Umba Po raura ai pare, “Petrus, nya anave mamauna! Mbeanimaibe irati wimamaundive Rinai to?”

³² Arono Yesusa pe Petrusa pe syea no nyomane raija jewen, naije kobe ovare manin. ³³ Umba Yesus apa arakove umaso ubeaje Ai, wo ararimbe ware, “Tugae rave, Winyamo Arikainyo Amisye pi Winy!”

Yesus po saumane raunanto vatano ugwanene mai no Genesaret

³⁴ Arono naije usisa no onae tuga ranijo warani, no munijo Genesaret. ³⁵ Umba vatano una no naije wo aen ware, “Yesusa pi de,” weti wo avovo no varodoro munijo we raita tenambe. Umba vatane wo awa vatano ujaforame maugavere vintabo no Yesusa nui. ³⁶ Wo anajo indamu vatano ujaforame umaso wantukamo Apa ansune ama mamarane bo rai vayave. Muno vatano wantukamo Ai usauman tenambe.

15

*Ananyao aneno wusyyn Yahudi
(Markus 7:1-13)*

¹ Naije vatano Parisije inta nawe, kuruno makari mbaro Ananyao Musa raije inta nawe, una no Yerusalem ude Yesus ai, wo anajo ware, ² “Veanimaibe irati Nya arakovo utavondi naije wo aneno wusyine awa ananyao rakanyoandi? Arono wisyisy, wo mana veano maneme rarandom datije ramu, ti mamaisye ramu!”

³ Umba Yesus po raura nakananto mai pare, “Wabeanimaibe irati wapo Amisye apa ananyaowe rakanyoandi, yara watavondi wapa aneno wusyine awa ananyao bo rai? ⁴ Maisyare so: Amisye po raura pare, ‘Mbeaje irati inya pe nangkoya me yai,’ muno pare, ‘Are pirati po aja pe akoya me yaura tatugadi, opamo mangle raugaje ai indamu kakai.’” ⁵ Yara wapa ananyao nsasye, weye wapare, ‘Are pirati pare po apa ananuge raunanto Amisye bo ai,’ ⁶ vemo po ana inta raunanto aja pe akoya me yai jinya.’ Maisyare omaisy, wapare vatano napije po aja pe akoya me yaeranande aya bekedaije rai jewen kai. Maisyare omai ti, wapo wapa ananyao raijaseo nti rave mo ayao Amisye rakivan. ⁷ Weapamo wapa angkarije ntepekan!

Yesaya po raura tugae rave arono wusyinoe po wasaura taiso:

⁸ “Vatane so wo rinararimbe mawa bo rai, yara manuga mamu nggwaravainyo Rinai.

⁹ Usambayambe Rinai, weramu ama ine meweno rai, weye wo Risya ananyao ranigwano vatane awa bo rai.”⁹”

*Ana nggwamo vatane mansai
(Markus 7:14-23)*

¹⁰ Yesu po vatano wanuije mawainde umba Po raura nanto mai pare, “Wadanide! Syare wananta Sya ayaowe so rai.

¹¹ Anaisyo wadaisye mi mo wasaveti wagwambe Amisye amune rajja jeben. Yara wapa ana wadaura, muno wadajjar omi mo wasaveti wagwambe no Amun.”

¹² Umba Yesu apa arakovo utavondi aije ude wo raura Ai ware, “Injae, Nya ana nyo raura umaso mamu mo vatano Parisi manuga ratukam ti upari.”

¹³ Umba Yesu po ananeneae inta raura nakananto mai pare, “Vatano Parisi maurata irati anareo Sya Injayo no no munijo ntiti Po rayanyume ramu, weti pare Po rapatin po raepata. ¹⁴Weti vemo wapo vatano Parisi maraniv nora, yara wapo mapaya kai. Wenao maurata irati vatano amije ntuba inta be akarive vatano mamije ntuba kaijinta mai. Vatano amije ntuba inta po vatano amije ntuba kaijinta augav no aya unanui anya rai, weamo mamaisye ramu, weaveti itatayasyo ateme rai kava.”

¹⁵ Umba Petrus po raura pare, “Injae, syare Nyo ananeneae umawe raura kakavimbe reansai.”

¹⁶ Umba Yesu po raura nakananto mai pare, “Wabeanimai be wananta rajje jeben? ¹⁷Anaisyo wadai no wasawa omamo mo wanyatije rajjasyo ti wapo rangkarave ti mewen. ¹⁸Yara ana ntipu no wasanuga umba muje no wasawa omirati mo wasaveti wagwambe Amisye amune rai. ¹⁹Weye ana ntipu no vatane manuga umba muje omamo awa ana udatantona kotaro kakai, wo vatane maubaisy, unakijo awa arakove awa wanya marijat, anaerere ugavo mansai, wanaonoambe, wayarurijabe vatane mai, muno wo vatane maura tantunawi. ²⁰Ana umaso mirati mo vatane maveti ugwambe Amisye amune rai. Yara vatane wisyisye me maneme rarandom me omi vatane ubeta rai jeben ti ugwambe Amisye amune rajja jeben.”

*Wanya Kanaan inta manave Yesu ai
(Markus 7:24-30)*

²¹ Yesu puje munijo we raora umba poroto no munijo Tirus muno Sidon.

²² Umba wanya inta no no naije, omamo wanya Yahudi jeben, yara wanya Kanaan. Wanya Kanaan umaso nde irati Yesu ai, nggwain mare, “Injae, Daud apa ajavijo Winy, naemeno rinai! Sya wanya arikainye mamu anawayo kakaije nsiso rai ti njoram dave.”

²³ Weramu Yesu po ana inta raura nakananto rajje ramu. Weti Apa arakovo utavondi aije ude Ai, wo anajo ware, “Injae, Nyo wanya wato ratuti da nin, weye mo wansarijat muno nggwain tutir no wansakiri.”

²⁴ Umba Yesu po raura nanto mai pare, “Amisye po inatutir indamu ride vatano Israel obo mansai, weye onawamo maurata domba awa vatano po maeranande meweno mai.”

²⁵ Weramu wanya umawe nde mo vukane ranteter no Yesu amun, muno mo raura nanto Ai mare, “Injae, naemeno rinai!”

²⁶ Umba Yesu po ananeneae inta raura nakananto rai pare, “Wamare wamo anaisye inta rapatimu arikainye awaura rai, omamo arikainye awa nti vemo raeparaje vayave make mansai ramu.”*

²⁷ Wanya umawe mo raura nakananto Yesu ai mare, “Injae, tugae. Weramu anaisyo arikainye wo raisy ama kukupe inta ntatae no meja ama ate, weamo make wo rai kai.”

²⁸ Umba Yesu po raura nakananto rai pare, “Ingkoe, syo naen nya anave manakoe rave. Weti Syo nya mbekedaije raunande.” Naije kobe wanya arikainyo anawayo kakaije nsiso rajje umawe nsauman kobe.

Yesu po saumane raunanto vatano wanene kotare nande mai mansai

²⁹ Umba Yesu puje, pakato panya nayave vono onae Galilea rai. Umba seo tuna no pukam. ³⁰Vatano Yahudi jeben wanui rave ude wo awa vatano ugwano wanene kotare rajje maugavere no Yesu nui: vatano majoe nsurukije nawe, vatano mamije ntuba nawe, vatano tunaive nawe, vatano mawa ngkao nawe, vatano kaijinta wanui wo maugavere Yesu ai. Umba wo maveaje utantuna no Amun, muno Po saumane raunanto mai. ³¹Vatano wanuije umaso unantaive rave, weye wo vatano mawa ngkao maeno wayao akato, muno vatane tunaive seo tet akato, muno vatano majoe nsurukije wanya kobe akato, muno vatano mamije ntuba wo ana raen

* 15:9 Yesaya 29:13 * 15:26 Ananeneae somamo arikainye maurata irati vatano Yahudi mansai, muno make maurata irati vatano Yahudi jebene mansai.

akato. Weti wo vatano Israel awa Amisy e ararimbe.

Yesu po anaisy e raunanto vatane ribuge mambisya wo raisy

(Markus 8:1-10)

³² Umba Yesu po apa arakovo utavondi aije mawainde, umba Po raura pare, “Rinaemeno vatano wanuije so mansai rave. Soamo utavono Rinaija masyote mandei to, ti awa anaisy e meweno mai, umaror. Syona e syo matutir unaji bayavei, weye indati marore po mansaveti mamune ngkau-mudi no unanuije ama yasyin.”

³³ Yesu apa arakove umaso wo raura nanto Ai ware, “Nugo vabukane vono maninimbe so anaisy e mewen dai. Weti rui rati nyare wamo anaisy e rakani ti mamaisy o vatano wanui rave so mansai?”

³⁴ Umba Yesu po manajo pare, “Wapa rotije ruimaisy?”

Umba wo raura nakanande Ai ware, “Vasyesy e kaururuma mi ntuna, jiano tuvane inta matavon.”

³⁵ Umba Yesu po vatano wanuije umaso matutir utantuna no kopa vone rai. ³⁶ Umba Po rotije vasyesy e kaururum muno jiane umawe raugav, umba Po kove raura seo Amisy e ai. Umba Po raporadijo aneme rai, Po raunanto Apa arakovo utavondi aije mai, indamu wo ratodijo vatano wanuije umaso mai. ³⁷ Wo raisya uman dave tenambe. Umba Yesu apa arakove wo anaisy e ama ateteo ntuna ranugan akasyo bayaije kaururum ntatairi. ³⁸ Anya uma wo anaisy e umaso raisy e awa wanuije nanto no ribuge mambisy. Awa wanya muno awa arikainyo wo anaisy e umaso rai tavon, weramu awa wanuije ratore ramu.

³⁹ Yesu po vatano wanuije umaso matutir unajiv, umba seo nyomane rai, poroto no munijo Magadan.

16

Vatano Parisi wo Yesu anajo indamu Po anaporainye rarorono mai

(Markus 8:11-13; Lukas 12:54-56)

¹ Masyote inta vatano Parisi muno vatano Saduki inta ude Yesu ai, ware wo atopan. Weti wo anajo indamu Po anaporainye inta rarorono mai indamu wo raen tugae rako jewena rako Opamo no no Amisy e nui ti de rako?

² Umba Yesu po ananeneae inta raura mai pare, “Arono namandive wapo uma aen pasyo raije nijam, weamo wapare, ‘Samsimanamo nuge non dave.’ ³ Muno awatan ngkove, arono wapo uma aen seo raije nijam umba sandoram dave, weamo wapare, ‘Kavinta maruge maje.’ Wapo anakotare umaso raen dave. Weramu wabeanimaibe wananta anakotaro raroron arono naiso,

maisyare Sya anaporainyo syo rarorono raije jewen? ⁴ Vatano arono naiso weapamo wasakirive Amisy e ai to muno wapa ayao kakai ntapekano wasai! Wapo anaporainye inta ranajo Rinai indamu mbe rarorombe Risyo Amisy e po inatutire pi Risy. Weramu Syo raura wasai: syare Syo anaporainyo manuije rarorono wasaije ramu, yara intabo mi Syo raroron, omamo anaporainyo nande anawae Yunus ai obo ma.” Yesu daura tai maisy a jewen, umba Po mapaya ti una ara poroto kobe.

Wasyisyaube vatano Parisi muno Saduki awa ananyaowe rai

(Markus 8:14-21)

⁵ Yesu pe wo onae raotar unanta no tuga ranijo warani rai, weramu Apa arakovo utavondi aije manimarijo awa roti rai ti wo inta raugave ramu. ⁶ Naije Yesu po raura nande mai pare, “Wasyisyaube irati vatano Parisi muno vatano Saduki awa rai rai.”

⁷ Yesu apa arakovo utavondi aije unanta Apa ayao umaso raije ramu, weti wayao vambinibe ware, “Po raura taije weye wama rotije meweno wansai.”

⁸ Yesu nanto ana wo raura rai, weti Po manajo pare, “Wabeanimaibe wapayao wapare rotije mewen? Wapa anave mamauna nene! ⁹ Wabeanimaibe wananta Sya anaporainye raije jewen? Nandija arono Syo rotije vasyesy e radani raporadi indamu vatane ribuge radani wo raisy, weapamo wasaemeno we rai ramu ge? Omamo ama bayaije ruimaisy o wemi wapo anaisy e ateteo ntuna ranugan akare? ¹⁰ Muno arono Syo rotije vasyesy e kaururum raporadi indamu vatane ribuge mambisy wo raisy, anaisy e ateteo ntuna ama bayaije ruimaisy a wapo ranugan akare? ¹¹ Wabeanimaibe wananta Sya ana idaura umawe raije jewen? Ragi muno rotije omirati Syo raura wasaije ramu! Yara syare wasyisyaube vatano Parisi muno Saduki awa rai rai.”

¹² Naije umba Yesu apa arakovo utavondi aije unanta Apa ana daura umawe rai kobe: Po rai muno rotije raura jewen, yara Po ananeneae inta raura, ama ine mare usyisyaube irati vatano Parisi muno Saduki awa ananyaowe rai.

Petrus po Yesu aura kakavimbe Opamo Mesias wepije

(Markus 8:27-30; Lukas 9:18-21)

¹³ Naije Yesu de pararaijo munijo Kaisarea Pilipi rai. Umba Po apa arakovo utavondi aije manajo pare, “Vatano wanuije wo raura ware Arikainyo Vatan risyo are pi Risy?”

¹⁴ Umba Apa arakovo utavondi aije wo raura akanande Ai ware, “Vatane inta wo

naura ware Winyamo Yohanes Pembaptis pi Winy. Umba inta wo naura ware Winyamo anawae Elia pi Winy, umba inta wo naura ware Winyamo anawae Yeremia pi Win dako, anawae wusyino kaijinta pi Winy.”

¹⁵ Umba Yesus po manajo pare, “Yara weapamo wapare Risyamo are pi Risy?”

¹⁶ Umba Simon Petrus po raura akananto Ai pare, “Winyirati Mesias, Amisyo noa pitawabe Apa Arikainye pi Winy.”

¹⁷ Umba Yesus po raura akananto ai pare, “Simon, arikainyo Yunus, winyirati Amisye po kovo manakoe raugaje nai to, weye vatane inta pi po ana umaso rarorono naije ramu, yara Sya Injayo no no munijo ntiti Opi po rarorono nai to. ¹⁸ Syo raura nai, Syo nawainamo Petrus, ama ine mare oram, weye winyamo naurata irati oramo Syo ratayao indamu Syo sya anugane rausea nteto rai. Sya anugane mamu vatan tenambe nanawirati wanave Rinai syo manugande rai. Muno Sya anugane mamu wene ama vambunine mo rapinde jewen, yara noa nuge nuganui. ¹⁹ Indati Syo vambunine raugaje nai* indamu wimbe akarive Amisye apa kawasae mai. Ayao rui mirati nyo rapatimu no mine vone so omamo Amisye po rapatimu no munijo ntiti. Weti ana rui nyo raorai no mine so omamo Amisyo no no munijo ntiti Po raorai, muno ana rui nyo ramayar no mine so omamo Amisyo no no munijo ntiti Po ramayar.”

²⁰ Umba Yesus po apa arakove maorai pare, “Vemo wapo Sya tamo Mesias ravovo vatane mai nora!”

*Yesus po apa kakaije raura wusyimbe
(Markus 8:31-9:1; Lukas 9:22-27)*

²¹ Arono naije kobe Yesus po apa siurijo makanande raura kakavimbe Apa arakovo utavondijo aije mai. Pare, “Indati syoroto no Yerusalem, umba siurijo manakoe nande Rinai weye Akarijo Yahudi nawe, syeno akokoe utantuna no Yavaro Amisye raije nawe, kuruno makari mbaro Ananyao Musa raije nawe ware wo inave tatugadi. Indati vatane wo inaubaisy, weramu masyote mandei umba ikovakato no wene rai.”

²² Umba Petrus po Yesus aijade teto arijati indamu payao nanto Ai mumuimbe. Petrus pare, “Injae, jewena! Ana so ma vemo nande Nai nora!”

²³ Weramu Yesus sarirae akare, umba Po Petrus aura nanto soowabe pare, “Anakakai Akoe, nyusyo ra nto rinaora! Nyare nyo inaorai ritavondi Amisye apa bekere rai! Nya ana ndatantona wato

mamo Amisye apa ma jewena, yara vatane awa ma.”

²⁴ Umba Yesus po raura Apa arakovo utavondi aije mai pare, “Vatano rui pi beker pare tavondi Inaije pamo be taiso: opamo akirive taune apa bekere rai, umba po inyo kapite ranawan muno tavondi Rinai kobe. ²⁵ Are pirati beker pare po apa kovo mine so ramavug, opamo indati apave kovo nuge nuganuije rai ramu. Yara are pirati nanto wene rai weye tavondi Rinai, opamo indati apave kovo nuge nuganuije rai. ²⁶ Ranivara vatane inta apaura mine vone so rai vintabo weramu apa kovo nuge nuganuije mamu meweno ai, weamo apaura mine so raija marudi. Weye vatane apa kovo nuge nuganuije mamu anakotare inta veano ranigwane kakai. ²⁷ Indati Arikainyo Vatan risyakare no mine vone so irati Sya Injaya apa kovo ntiti rautan, ride Apa naito kove mautan. Arono naije umba Syo kove muno kakai rasakinavo vatan namentabo mansai mamaisyo awa ana udave rarijati. ²⁸ Syo raura tugaive wasai: Vatane inta una no wapa yasyine so wana unanta wene rai rainy, indati wo Arikainyo Vatane rinaeno ride indamu ibe akarive Sya kawasae mai no mine vone so.”

17

*Yesus apa kovo ntiti je raroron
(Markus 9:2-13; Lukas 9:28-36)*

¹ Masyote kaujentabo akato, Yesus po Petrusa pe Yakobusa pe apa rijato Yohanesa pe mauga ti obo nao usea no unato ntiti je inta rai. ² Naije wo Yesus aen anakea rawerave ti nsasye no mansamun. Amune mbar maisyare uma amaisy. Apa ansune mpope dave maisyare vare wemaisy. ³ Umba kavuratawe Yesus apa arakove umawe wo Musa muno Elia yaen yayao nanto Yesus ai.

⁴ Umba Petrus po raura nanto Yesus ai pare, “Injae, wana no soamo ko dave! Ti winyare mayar, syo randume mandeija yanari: inta ranari Injae namarom, inta ranari Musa amarom, inta ranari Elia amarom.”

⁵ Petrus payaowa nene, naije kamuro pope dave inta nde mo mansatatu, umba udanita anamote inta ngkin no kamure ama uga mare, “Sopamo Sya Arikainyo inanuga no Ai. Inanayanambe Ai rave. Wapo araniv kobe!”

⁶ Arono arakove mandei umawe wo anamote umaso ranaun, ujani dave ti wo awa vukane ranteter muno mansamune rangkukuv no mine von. ⁷ Umba Yesus de po majjar, Po raura nanto mai pare, “Wasea, vemo wajaniv inya.” ⁸ Weti wo

* 16:19 Ayao Yunani mo raura mare, “Syo kepe raunande nai.”

makarije rajisea, umba wo Yesus aen obo pi no no we.

⁹ Arono una no unat ti wakajeve, umba Yesus po apa ayao raura nanto mai inda mansaemen dai pare, “Vemo wapo ana wapo raen umawe raura vatano kaijinta mai jinya, yara no ava Risy, Arikainyo Vatan, rikovakato no wene rai rati.”

¹⁰ Umba Apa arakove umaso wo anajo ware, “Veanimaibe kuruno makari mbaro Ananyao Musa raije wo raura ware anawae Elia wepi de wusyimbe rati, umba Mesias dijat?”

¹¹ Yesus po raura akananto mai pare, “Tugae, Elia pamo de wusyin indamu po anakotare ratayao mamai tenambe.

¹² Weramu Syo raura wasai: Elia pamo de to, weye Yohanes Pembaptis opamo vatano po Elia apa anakere rajiare piye. Weramu vatane wantatukambe ai, muno wo ave tatugadi mamaisyo awa bekere rai. Maisyare omai tavon, indati wo Arikainyo Vatane rinave tatugadi tavon.” ¹³ Naije umba Yesus apa arakovo utavondi aije wo raen Yohanes Pembaptis opirati Yesus po aura umawe.

Yesus po saumane raunanto arikainyo anawayo kakaije nsiso aije ai
(Markus 9:14-29; Lukas 9:37-43a)

¹⁴ Arono Yesusa pe apa arakove mandeija nawe wakare no vatano wanuije unarijoe rai, umba vatane inta de po vukane ranteter no Yesus amun. ¹⁵ Umba po raura nanto Ai pare, “Injae, syare naemeno sya kavu ai! Weye opamo amune ngkaumudi muno anasine ntutar. Intanamo temasyo no taname rai, umba intanamo temasyo no mana rai, weti apa siurije manakoe. ¹⁶ Syo augavere arakovo utavondi Injae naije mai to, weramu wo saumane raunanto ai kakai.”

¹⁷ Umba Yesus po raura akananto mai pare, “Abo! Tugaeyamo weapamo vatano wasanuga matu muno wapanave kobe jewen! Risyamo inatawandi wasai nugoenta to! Rino no wapa yasyine rai, Syo wasanyao nugoenta to, weti nandui rati umba wapare wapanave Rinai? Syare nyo nya arikainye umawe augavere no Rinui.” ¹⁸ Umba Yesus po anawayo kakaijo no arikainye umaso aije rawatan ti musyo aora. Naije kobe arikainye umaso sauman kobe.

¹⁹ Umba Yesus apa arakovo utavondi aije ude Ai indamu wayao mumuimbe. Wo anajo ware, “Injae, veanimaibe irati reamo anawayo kakaije umaso rawatambe jewen? Veanimaibe reamamaisye jewen?”

²⁰ Umba Yesus po raura akananto mai pare, “Wapanave kobeye jewen ti wamamaisye ramu. Ranivara wapa

anave mamaun maisyare sesawi kamiyo momoyain dave ramaisy, weamo wapo unate inta raura nanto wapare, ‘Unato winy, mpatimu ra nde nyusyo,’ naije kobe unate umaso mpatimu ti nde musyo kobe. Weti ranivara wapanave kobe, weamo anakotare inta mangkeo wasai jewen bayave, yara wabambunin wapo anakotaro rui vayave rave. ²¹ Weramu anawayo kakaijo maisyare somaisye rawatan irati ana kaijinta raije jewen, yara wasambayambe wadoura seo muno wasatawandijo marore rai obom ndave, wea umba pusyo.”

Yesus po apa kakaije raura nakato
(Markus 9:30-32; Lukas 9:43b-45)

²² Umba Yesusa pe apa arakovo utavondi aije nawe usisa no munijo Kapernaum, naije vatano wo pajak ranugande indamu veano Yavaro Amisye raeranande ude wo Petrus anajo ware, “Nya Kurune po pajak inta raunande indamu veano Yavaro Amisye so raeranande rako jewena e?”

Yesus po pajak raunanto indamu veano Yavaro Amisye raeranande, indamu vemo vatane uparijo Ai jinya

²⁴ Arono Yesusa pe apa arakovo utavondi aije nawe usisa no munijo Kapernaum, naije vatano wo pajak ranugande indamu veano Yavaro Amisye raeranande ude wo Petrus anajo ware, “Nya Kurune po pajak inta raunande indamu veano Yavaro Amisye so raeranande rako jewena e?”

²⁵ Petrus po raura akananto mai pare, “Po raunande aje.”

Umba Petrus pakato siso no yavar, umba Yesus po raura manasyimbe pare, “Simon, syo ananeneae inta raura nai. Are nawirati wo pajak ravaeyo akarijo titi mine so ai? Apa arikainye nao rako, vatano marano po mapinde to nawe? Nya ana ndatantona maisyare rui?”

²⁶ Umba Petrus po raura nanto Yesus ai pare, “Vatano marane nawirati wo ravae.”

Umba Yesus po raura pare, “Tugae, weti indati apa arikainye onawamo wo ravae ramu. Maisyare omai tavon, Amisye apa arikainye wamamo wamo pajak veano Yavaro Amisye raeranande umawe ravae jewen kai. ²⁷ Weramu vemo vatane uparijo wansai nora. Weti, Petrus, syare nyoronto nyo marainye rajia no onae. Jiano manasyino nyo arabite pamo, nyo awa rajjato nyeravasyo doije mi no rai. Doijo namije mamaisyo rimo veano pajak ravae. Weti nyo raugavere ndaunanto vatano wo pajak ranugande Yavaro Amisye rai umawe mansai.”

18

Yesus beker pare wansanuga mpaaje, maisyare arikainyo tuvane mansamaisy (Markus 9:33-48; Lukas 9:46-48, 17:1-2)

¹ Arono naije Yesus apa arakovo utavondi aije ude wo anajo ware, “Are pirati no no reama yasyine so indati panakoeve no arono Amisy de be akarive Apa kawasae mansai no mine vone so?”

² Umba Yesus po arikainyo tuvane inta augavere te no mansamun, ³ umba Po raura nanto mai pare, “Syare wapo wapa ana wadatantona wato ranigwan indamu wapo arikainyo tuvane mansamaisy. Weramu Syo raura tugaive: ranivara wasakina wapa ayao kakaije rai jewen, weaveti wasato siso kawasaeyo Amisy de be akarive maije mai ramu. ⁴ Are pirati po taune anuga raveti mpaaje no mine vone so, maisyare arikainyo tuvane so amaisy, opamo Amisy po aijaseo ti panakoeve arono de be akarive Apa kawasae mansai no mine vone so.

⁵ Sya arakove, are nyirati mbekobe irati arikainyo tuvane maisyare somaisy ai weye nyanave Rinai, winyamo mbekobe Rinai to ije. ⁶ Weramu are pirati po arikainyo tuvane wanave Inaije so inta aponae ti po ayao kakaije rave, opamo indati Amisy po parijo mangke raugaje ai. Weti kove mamo orame rapuisyo vatane wato ai amaugusyo no mayane rai indamu mansyan, weye wemirati mangke mamaun, yara mangke Amisy pare po raugaje ai manakoeve mo mangke umaso rakivan.

⁷ Mine so ngkove ramu weye anakotaro mo vatane maponae ti mo maugavo ayao kakai raron omamo manui rave. Anakotare umaso mpaya ramu, yara no tutir. Weramu are pirati po vatano kaijinta maponae ti wo ayao kakai rave, opamo kakaije nde ai! ⁸ Ranivara naneme ndako najoe ndako mo naugavo ayao kakaije raron, weamo nyo raotar da ndamauta. Weaveti winsiso kovo nuge nunganuije rai naneme intabo rautan dako, najo raota ti wintunaive vayave rako, omamo ngkovo nai. Weramu ranivara winyo ayao kakai rave tutir, weaveti namaugusyo tanamo mbadururo nuge nunganuije rai naneme jirum muno najoe jirum rautan, omamo ngkove ramu. ⁹ Muno namije mamo mo naugavo ayao kakaije raron, weamo nyo rakewar uje indamu ndamauta. Weaveti winsiso munijo Amisy de be akarive raije rai namije intabo vayave rautan, omamo ngkovo nai. Weramu ranivara nyo ayao kakai rave tutir, weaveti

namaugusyo tanamo mbadururo nuge nunganuije rai namije jirum rautan, omamo ngkove ramu.”

Ananeneaeayo domba inta aumandi (Lukas 15:3-7)

¹⁰ “Inya! Wabemo wasanuga ngkakaijo arikainyo tuvane so inta ai jinya, weye Syo raura wasai: awa naito wo maeranande una tawan no Sya Injajo no no munijo ntiti Amun.

¹¹ Risy, Arikainyo Vatan, ride indamu Syo vatano nanawirati ugwaravainyo Amisy ai makani muno Syo mawainde indamu Syo mapaya kakaije rai.

¹² Syo ananeneae inta raura wasai: Vatane inta apave domba tename radani mansai, weramu inta aumandi. Weti wapo ratantona wapare animaisy mirati po rave? Indati po domba abusyine kaimambisy eane kaimambisy mapaya ti una no pukam, umba poroto po intabo aumandijoe akani jao nanto ai. ¹³ Tugae, arono nanto ai, weamo anayanambe rave. Muno apa anayanambe domba intabo umaso ai manakoeve rave irati apa anayanambe domba abusyine kaimambisy eane kaimambisy nanawirati maumandi jewene umawe mansakivan. ¹⁴ Maisyare omaisy, wapa Ajayo no no munijo ntiti ponayo arikainyo tuvane so inta aumandi Ai nora.”

Nya arakove inta pare po ayao kakaije rave, nyananyaube ai

¹⁵ “Nya arakove inta po ayao kakaije inta rave nai, weamo nyoronto maninimbe obo ai nyo raura nanto kakavimbe ai nyare, ‘Vemo mbeare omai nora.’ Ranivara po nya ananyao umaso raraniv ti beto rai, weamo wurisanuga nsaumano isai vambinibe akato. ¹⁶ Weramu ranivara ponayo po nya ananyaowe raranivi, weamo nyo vatane intabo dako jirum dako yauga tavon, umba wapakere wapo raura kakavimbe ai jakato, indamu mamaisy Ayao Amisy mo ratoe mare, ‘Ranivara ayao kakai rantutibe vatane inta ai, weamo vatane jirum muno mandei wo raura kakavimbe ware wo apa ayao kakai raen to, wea umba mamaisy.’^{*} ¹⁷ Weramu ponayo po wapa ananyaowe raranivi, weamo nyo raura kakavimbe no anugano Amisy mansamun. Umba ranivara vatano napije ponayo po anugano Amisy awa ananyaowe raranivi, weamo wapo apaya ti no marambe, maisyare muno vatano wanave Amisy aije jewen muno vatano ukakainoanive mansamaisy.*

^{*} 18:16 Ulangan 19:15 ^{*} 18:17 Ayao Yunani mo raura mare, “vatano wo pajak ranugande pemerinta ai,” weye vatano Yahudi wo ratantona ware vatane umaso onawamo vatano ukakainoanive tenambe.

¹⁸ Syo raura tugaive: Ayao rui mirati wapo rapatimu no mine vone so omamo Amisyé po rapatimu no munijo ntiti. Weti ana rui wapo raorai no mine so omamo Amisyó no no munijo ntiti Po raorai, muno ana rui wapo ramayar no mine so omamo Amisyó no no munijo ntiti Po ramayar.

¹⁹ Muno Syo raura wasai tavon syare: no mine vone so vatane jirum aya ayao intabo ana rui vayave rai, umba ibe sambayambe yo raura seo Sya Injayo no no munijo ntiti Ai, weamo Po aya raunande yai kobe. ²⁰ Weye arono rui vayave vatane jirum dako mandei dako wanugan weye wanave Rinai, weamo Risyamo rituna mansatavon no awa yasyin.”

Ananyao nyo vatane aneme rajjar indamu risauman

²¹ Naije Petrus de no Yesusa nui, umba po anajo pare, “Sya arakove inta po ayao kakaije rave rinai tutir. Susyie intabo syo aneme rajjar, susyie jirum syo aneme rajjar weti, Injae, syo nanajo: ranivara syo aneme rajjara nanto no susyie kaururum, wea indati mamai to rako?”

²² Umba Yesus po raura nanto ai pare, “Susyie kaururum mamai dainy, yara syare nyo aneme rajjara manui ravea ama manuije ratore kakai.”

²³ Muno Po ananeneae inta raura pare, “Arono Amisyé de be akarive Apa kawasae mai no mine vone so, Opamo aurata irati akarijo titi inta ai. Akarijo titi umaso apa vatano wanapatambe aije wo doije inta ranajo ai no wusyinoe, weramu wo ranigwan akare rainya nene, weti po mawainde indamu wo apa doije ranigwan akare. ²⁴ Manasyimbe apa

vatano panapatambe aije inta augare no amun, wepirati po doije nanto no juta manui rave rauga to. ²⁵ Weramu vatane umaso po doije umawe ranigwan akare kakai weye apa doije meweno ai. Weti akarijo titi umaso po raura apa naite mai pare, ‘Wapo vatane so pe apa wanya me apa arikainye nawe mansamavun, muno apa ananuge ramavun tenambe tavon indamu ama doije veano sya doijo uma po raugavoe ranigwan akare.’

²⁶ Weramu vatane umaso de po vukane ranteter no akarijo titi umaso amun, umba po anajo pare, ‘Injae, natawandi rati, indati syo nya doije ranigwan akare aje.’

²⁷ Akarijo titi umawe aemeno apa vatano panapatambe aije umaso ai, ti po raura pare, ‘Nyo doije umawe ranigwan akare jeben kai, yara syo nya rayaridi vayave, ti mewen.’

²⁸ Umba vatane umaso puje kobe, poroto nanto irati vatano panapatambe kaijinta ai.

Apa arakove umaso pamo po doi ribuge inta raugav no ai no wusyinoe. Umba vatano panapatambe manasyin po apa arakove umaso apa isyisyie rajjananto, po raura pare, ‘Nyo sya doijo ndaugave ranigwan!’

²⁹ Umba vatano panapatambe rijate umaso po vukane ranteter no vatano panapatambe manasyine amun, po raura nanto ai pare, ‘Arakove, natawandi rati, indati syo nya doije umawe ravea tenambe.’

³⁰ Weramu vatano panapatambe manasyine umaso ponae, yara po vatano rijate umaso augaveta ausiso no tanoano makova bo rai jao po doije umawe ranigwan akare.

³¹ Arono vatano wanapatambe kaijinta wo ana umaso raen, manimaumbe rave, weti wuruta wo raura nanto akarijo titi umawe ai.

³² Umba akarijo titi umaso po apa vatano panapatambe manasyine umawe awainde, umba po raura ai pare, ‘Winyamo vatano mamun dave! Umawe syo doijo uma nyo raugavoe raupai vayave ti mewen, weye nyo inanajo memembe rai. ³³ Umawe inaemeno nai, weti mbeanimaiibe winaemeno nya arakova umawe aije jewen?’

³⁴ Akarijo titi umaso pari rave, weti po apa vatano panapatambe aije umaso ausiso no tanoano makova rai jao po doijo manuije umawe ranigwan akare tenambe.”

³⁵ Umba Yesus po ananeneae umaso ama ine raura kakavimbe pare, ‘Maisyare omai tavon, ranivara weapamo wasaemeno wapa arakove mai tugaive jeben ti wapo maneme rajjar inda wasanuga nsauman akato jeben, wea indati Sya Injayo no no munijo ntiti po mangke raugaje wasai.”

19

Ananyao anya po apa wanya rauguje aora

(Markus 10:1-12)

¹ Yesus po ayao umawe raurana mewen, umba puje Galilea raora, poroto Po mana Yordan rootar, ti siso no Yudea. ² Vatano wanuije utavondi Ai, umba Yesus po saumane raunanto vatano ujajorame mansai.

³ Vatano Parisije inta ude tavon, ware wo Yesus atopano Apa ana daura rai. Weti wo anajo ware, “Vatan inta po apa wanya rauguje aora, weamo mamai dako jewena e?”

⁴ Umba Yesus po raura akananto mai pare, “Syare wasaemen irati Ayao Amisyé mo ratoo so rai: ‘Arono munije ama manasyinoe Amisyé po vatane yanarjamo anya pe wanya me naye.’” ⁵ Muno Amisyé po

raura pare, ‘Anya po akoya me aja pe yapa ti inya, yara to apa wanya rai, yansine mbe intabove.’*⁶ Weti wenayamo ibe rurumbe akatoe ramu, yara ibe intabove. Maisyare omai ti, Amisyepo anya, wanya umaso yanugande ibe intabove, weti vemo vatane wo yaporabe jirum akato inya.”

⁷ Umba vatano Parisi wo raura Ai ware, “Weramu Musa po ananyao so raugaje pare anya po apa wanya rauguje kai, po ama nyovara wao rauguje ratoe rati indamu mo raugav umba muje kobe.”

⁸ Umba Yesu po raura nakananto mai pare, “Wapo wapa wanya rauguje omamo Musa po wasamayar bayave weye weapamo wasanuga matu ti. Weramu manasyinamo Amisyepa bekere maisyare wemaisyepo ramu. ⁹ Syo raura wasai: are pirati apa wanya nserere ramu yara po rauguje aora vayave muno po wanya kajijinta raovan akato, vatano napije serer.”

¹⁰ Umba Yesu apa arakovo utavondi aije wo raura nanto Ai ware, “Wakoe! Somamo ananyao ntitiije mije. Ranivara vatano ubaunam maisyare omaisy, reamamo reamamaisyepo ramu, weti kove mamowambau-nam jewen kai.”

¹¹ Yesu po raura akananto mai pare, “Are nawirati Amisyepo vambunine raugaje mai inda matawandi, onawamo ubaunam jewen kai. Weramu vatano kaije nawamo ubambunin tai maisyepo jewen, weti ubaunam kai. ¹² Vatano ubaunam ramu onawamo awa kotare mandei, no taiso: Vatan inta nawamo awa samane mamaisyepo ramu no arono mano aje kaijoe, weti ubaunam ramu. Vatano kajijinta nawamo awa samane mamaisyepo ubaunam ramu weye vatano kajijinta wo mavere wemaisy. Umba vatan inta nawamo wo rapatimu ware ubaunam ramu weye ubeker wanapatambe Amisyepo obo ai. Are pirati Amisyepo vambunine raugaje ai, syare opamo tavondijio ayao umaso rai.”

*Yesu po kove raugaje arikainyepo mai
(Markus 10:13-16; Lukas 18:15-17)*

¹³ Vatane inta wo awa arikainyepo maugavere no Yesusa nui indamu Po aneme raugaje ntamijio mai muno sambayambe mai. Weramu Apa arakovo utavondi aije uparijio vatano wo arikainyepo maugave umaso mansai, weti ware wo mansaorai.

¹⁴ Yesu po raura pare, “Vemo wapo arikainyepo umaso mansaorai nora, yara mapaya vayave ra ude Inai kai! Weye vatano maisyare arikainyepo so mansamaisy onawirati mato sisa kawasaeyo Amisyepo be akarive mansaije we mai.” ¹⁵ Naije Po aneme raugaje ntamijio arikainyepo umaso mai muno Po kove raugaje mai, umba puje norijoe raora.

Vatano kamuram apa ananuge manui rave aije inta de Yesu ai

(Markus 10:17-31; Lukas 18:18-30)

¹⁶ Arono naije vatane inta de Yesu ai, umba po anajo pare, “Injavo Kurune, ana kovo rui mirati syo rave indamu syaveo kovo nuge nuganuije rai?”

¹⁷ Umba Yesu po raura akananto ai pare, “Mbeanimaibe nyo inanajo ana kove rai? Amisyepo pi kov. Kaije nawa jewen. Nyare nyaveo kovo nuge nuganuije rai, weamo ntavondijio Amisyepo apa ananyaowe rai.”

¹⁸ Umba vatane umawe po Yesu anajo akato pare, “Ananyao rui mirati itavondi rai?”

Umba Yesu po raura akananto ai pare, “Amisyepo apa ananyaowe no taiso: ‘Vemo nyo vatane maubaisy inya, vemo nyo anaerere rave inya, vemo nyanaoambe inya, vemo nyayarurijabe vatane mai jinya. ¹⁹ Muno mbeaje irati inya pe nangkoya me yai, muno muiny irati nya arakove mansai maisyare muno taune wimuinyo taune nai wemaisy.’”

²⁰ Umba vatano kamurame umawe po raura pare, “Ananyaowe umaso mamowavitavono rai to. Weti animaisyepo mirati mamowadainy?”

²¹ Umba Yesu po raura akananto ai pare, “Nyare mbekero wimamaisy, weamo nyoronto nyo nya ananuge ramavun tenambe umba nyo ama doije raunanto irati vatano awa ananuge meweno mansaije mai, wea umba Amisyepo kove ratayao ti ntuna mo nanyut no munijio ntiti. Naije umba nde ra ntavono Rinai.”

²² Arono vatano kamurame umawe po Yesu apa ayao umaso ranaun, animaunbe rave. Umba puje, yara animaunbe rave weye apa ananuge manui rave.

²³ Umba Yesu po raura Apa arakovo utavondi aije mai pare, “Syo raura tugaive: Vatano apa ananuge manui rave opamo sosobe aijo tavondijio kawasaeyo Amisyepo be akarive maije mai. ²⁴ Tugae, vatano apa ananuge manui pare siso kawasaeyo Amisyepo be akarive maije mai omamo nsosobe rave, maisyare unta siso kuwayaisyijie apa uga ai, weamo mamaisyepo ramu.”

²⁵ Yesu apa arakovo utavondi aije upaparo mai, weti wo raura wasai vambinibe ware, “Wakoe! Maisyare omaisyepo are pirati indati kovo nuge nuganuije raunande ai? Vatane inta mamaisyepo rai ramu!”

²⁶ Yesu po maen umba pare, “Vatane nawamo umamaisyepo ramu. Yara Amisyepo bambunin po anakotaro rui vayave rave.”

²⁷ Umba Petrus po raura Ai pare, “Injae, Nyo reansaenamo reamo anakotare rapaya vintabo to indamu reantavono Injae nai.

Weti kovo rui mirati indati raugakanande reansai?"

²⁸ Umba Yesu po raura akananto mai pare, "Syu raura tugaive, arono indati anakotere nggwanyin tenambe no munije ama akari, naije Arikainyo Vatan rituna no Sya kursijo titi rai indamu ibe akarive, muno Sya arakovo watavondi rinai indati watantuna tavon no kursijo ntiti abusyinarana eane jirume rai indamu wabe akarive susyo Israel abusyinarana eane jirume mansai tenambe. ²⁹ Are pirati po apa arakovo anya, wanya nao rako, aja pe akoya me nai rako, apa arikainye nawe mapaya ti una, muno apa yavare ndako apa nawaisye rako rapaya ti ntuna indamu tavondi Rinai, indati vatano napije Amisye po kovo manakoe raugakanande ai muno Po kovo nuge nuganuije raunanto ai.

³⁰ Weramu vatano wanui nanawirati wuibe no mine so indati wakare udijat arono munije ama akari. Yara vatano wanui nanawirati udijabe no mine so nawamo indati wakare wuisy akato."*

20

Ananeneaeyo vatane wo nawaisyo anggurije rajjar

¹ Umba Yesu po ananeneae inta raura pare, "Amisye be akarive Apa kawasae mai no mine vone so omamo raurata irati vatano be akarive nawaisyo manakoe inta rai. Awatan ngko dave puje po vatane makani indamu wo apa nawaisyo anggurije rajjar. ² Umba po raura mai pare, 'Vatane nanentabo po sya nawaisye rajjar, indati syo avae masyote intabo, doije vasye intabo.' Vatane umaso ware yombe, umba akarije umaso po matutir uta wo apa nawaisye rajjar.

³ Uma amije kaimambisy, umba akarije umawe pakare no pasari, umba po vatano kajijinta usayai no ratuije maen. ⁴ Weti po raura mai pare, 'Wata wasisa wapo sya nawaisyo anggurije rajjar tavon, indati syo doije veano wasavae inda mamaisy.' Naije wuruta kobe.

⁵ Masyote yasyin ama uma amije abusyinarana eane jirum, muno namandi uma amije mandei po raveare umawe bo omaisy akato. ⁶ Namandive uma amije radani, puje akato nande vatano kajijinta mai usaibe no pasari, umba po manajo pare, 'Wabeani-maibe wasaibe vayave no naiso awatanoe yava namandi, yara wapo anakere inta rajjare jewen?'

⁷ Umba wo raura nanto ai ware, 'Vatane inta po reansawain indamu reamanapatambe arijate jewen.'

Umba po raura akananto mai pare, 'Wade wapo sya nawaisyo anggurije rajjar.'

⁸ Mare ngkaumu kobe, umba akarije umaso po apa vatano po apatimu be akarive anakero nawaisye umaso rajje atutir pare, 'Syare nyo vatano wo sya nawaisye rajjar umawe mawainde indamu nyo mavae tenambe. Ti vatano usisa rijabe namandije rajje nao nyo mavae manasyimbe, umba nyo vatano kajijinta mavae tutir ava vatano usisa awatan ngkove rajje nao.'

⁹ Umbawe vatano usisa no nawaisy namandijo uma amije radani po mavaeyo wusyin. Vatane nanentabo apa doije nanto no vasye intabo. ¹⁰ Weti vatano usisa no nawaisye rajjo awatan ngkove rai wo ratantona ware, 'Reamamo po doije veano reansavaeyamo indati nseo ajel' Weramu po mavaeyamo, vatane nanentabo apa doije nanto no vasye intabo tavon. ¹¹ Arono vatane umaso mansavaeyamo uparijo akarije umawe ai, wo doije rapanano ai ware, 'Nyo reansavae kobeye ramu! ¹² Vatano usisa rijabe onawamo wo anakere rajjar uma amije intabo vayave, yara reamamo reamo rajjaro masyote tename inta ai ravea, uma po reansanen dave. Weramu nyo reansavae maito maide ti ngkove ramu.'

¹³ Weramu akarije umawe po raura nanto vatane inta ai no awa yasyin pare, 'Arakove, syo navae tatugadi jewen. Awatane umawe syare syo navae masyote intabo, doije vasye intabo ai. ¹⁴ Nya doije pi so, ti nyo auga da nyoronto. Syare syo doije raunanto vatano udija dave mai tavon, mamaisy irati syo raunande wasaije so ramai tavon. ¹⁵ Syare syo sya doije raunanto vatane inta mai, weamo syo raunanto kai. Wimparijo rinai inanuga ngkove so rajja rako?'

¹⁶ Maisyare omai ti, vatano ude rijabe indati wakare wuisy, yara vatano wuisy indati wakare udijat."

Yesu po apa kakaije raura nakato (Markus 10:32-34; Lukas 18:31-34)

¹⁷ Yesusa pe apa arakovo abusyinarana eane rurum utavondi aije nawe wanya ti uta no Yerusalem. Umba wanyano unanuije ama yasyin, Yesu po mawainde mumuimbe umba Po raura mai pare, ¹⁸ "Wadanide! Soamo wamare wanta no Yerusalem. Wansisa rai, umba Risy, Arikainyo Vatan, indati inamavun nanto irati syeno akokoe muno kuruno makari mbaro Ananyao Musa rajje

* **19:30** Ayao so ama ine mare vatano wanui nanawirati awa tame ntiti no mine so indati wakare awa tame maje arono munije ama akari. Yara vatano wanui nanawirati awa tame maje no mine so indati wakata awa tame ntiti jakato arono munije ama akari.

mai, umba wo mangke rapatimugo Rinai inda ikakai. ¹⁹ Indati wo inaananto no vatano Yahudi jewene mansai indamu wanaikebe Rinai muno wo inanepato kaijo waije rai, umba wo inauseo sawa inyo kapite rai. Weramu masyote mandei umba ikovakato no wene rai.”

Yakobusa pe Yohanesa pe aya akoya mo Yesus anajo indamu ama kavo ibe akarive (Markus 10:35-45)

²⁰ Naije Sebedeus apa anamu nde Yesus ai, muno ama arikainye javondi, onayamo Yakobus muno Yohanes. Umba akoe umaso mo vukane ranteter no Yesus amun, mare mo ana inta ranajo Ai. ²¹ Umba Yesus po raura nanto rai pare, “Animaisye mi mbeke dai?”

Umba mo raura akanande Ai mare, “Syare sya arikainye jirume so inta tuna no Injae nanem ngkove rai, inta tuna no Injae nanem ngkakai rai arono wimbe akarive Nya munijo kove rai. Syare Nyo ana umaso raunande rinai.”

²² Yesus po raura nanto Apa arakovo jirume umawe yai pare, “Wuripamo ipantukambe ipa ana idanajo wato rai! Indako ipare itavono Inai ti siurijo manakoe syare Syo ranawan omamo ipo ranawan tavon dako?”

Yo raura nanto Ai yare, “Ririmamaisy aje.”

²³ Umba Yesus po raura nakananto yai pare, “Tugae, indati wuripamo itavono Inai ipo siurijo manakoe ranawan. Weramu are pirati tuna no inanem ngkove muno tuna no inanem ngkakai wemamo Risya syo rapatimuge ramu, yara Sya Injaya opi po rapatimugo are nairati jantuna rai.”

²⁴ Arono Yesus apa arakovo kaijo abusyin wo ana umawe ranaun, uparijo Yakobusa pe Yohanesa pe yai. ²⁵ Yesus po mawainde vintabo, umba Po raura nanto mai pare, “Wapo raen akarijo mine so manayanambe wo awa vambunine rarorono vatane mai. Muno vatano wanakoe manayanambe wo vatane matutir. ²⁶ Weramu weapamo wabemo wabe tajje maisy inya. Yara are pirati beker pare panakoeve no wapa yasyin, syare opamo panapatambe wasai. ²⁷ Are pirati pare seo tame rai, syare opamo panapatambe vatane mansai tenambe. ²⁸ Syare wapanapatambe maisyare naije weye Risy, Arikainyo Vatan, ride indamu vatane wapanapatambe Rinai omamo jewen, yara ride indamu syanapatambe vatane mai muno Syo inanasine raunande kakai, indamu Syo vatane wanui mapaya awa ayao kakaije rai.”

Yesus po saumane raunanto vatano yamije ntubayai

(Markus 10:46-52; Lukas 18:35-43)

²⁹ Yesusa pe apa arakovo utavondi aije nawe wuje munijo Yeriko raora, umba vatano wanuije wuje vintabo utavondijo Ai. ³⁰ Naije vatano yamije ntuba ruruma jantuna no unanuije ama tuga. Yo Yesus anauno detowi weti igwain yare, “Injae, Daud apa ajavijo Winy, naemeno ririnsai!”

³¹ Vatano wanui uparijo yai, ware, “Wirimanin!” Weramu igwain akoeve akato yare, “Injae, Daud apa ajavijo Winy, naemeno ririnsai!”

³² Umba Yesus te kobe, Po yawain ije Ai umba Po yanajo pare, “Animaisye mi ipare Syo raunande risai?”

³³ Umba yo raura akananto Ai yare, “Injae, ririmare rimbekero rimo nuge raeni.”

³⁴ Yesus aemeno yai, umba Po aneme raugaje ntamijo yamije rai. Umba kavuratawe yamije mbar yo ana raen. Umba javondijo Ai.

21

Yesus aovambe no Yerusalem

(Markus 11:1-10; Lukas 19:28-38; Yohanes 12:12-15)

¹ Arono Yesus pararai no Yerusalem, nanto no munijo Betpage no no Pukamo Saitun ama awananem. Umba Yesus po apa arakove rurumo javondijo aije yatutir yuisy. ² Pare, “Wurita sisa no munijo mararai no usye wato rai. Naije kobe ripo keledaijo raokae ti ntoto ama tuvane ratavone ratuije yaen. Ti ripo waije raneka yai indamu ripo yauga da ride no Rinui. ³ Ranivara vatane inta po risanajo pare, ‘Ibeanimaibe ripo keledaije wato yaneka ti ripo yaugav?’ wea umba ripo raura ripare, ‘Injaya Yesus pare bekero yai.’ Umba naije kobe po risamayaro ripo yaugavere.”

⁴ Ana namije nande indamu mamaisyo anawae wusyine apa urairije rai pare:

⁵ “Wapo raura nanto vatano Yerusalem mansai wapare:*

‘Waperata! Wapa Akarijo Titi de irati wasai! Opamo anuga mpaaje, seo tuna no keledaije inta rai,

tuna no keledai kamurame inta rai.’”*

⁶ Naije arakove umaso yurija yo rave mamaisyo Yesus apa ana daura umawe rai. ⁷ Yo keledaije umaso raugavo ama tuvane ratavon ije, umba yo aya ansuno veano makepane rayanondijo keledaije aya akiri mona rai, umba Yesus seo tuna rai.

⁸ Vatano wanuije wo awa ansuno veano makepane rayanondijo unanuije yasyine rarijat, muno inta wo kaipe waowe raotar

* 21:5 “Vatano Yerusalem” muno “vatano Sion” aya ine mamai kava, weye munijo Yerusalem ntami no Unato Sion rai.

☆ 21:5 Zakaria 9:9

rayanondijo unanuije rarijat tavon. Umba Yesus panya rai ti to kobe. ⁹ Vatano wanuije wanya ti wuisye nawe, muno nanawi udi-jate nawe, manayanambe ugwain ware, “Daud apa ajavije so ararimbe! Kove ngkov irati Napi de tamo Amisye rautane Ai!

Amisyo no no munijo ntiti ararimbe!”

¹⁰ Arono Yesus siso no Yerusalem, vatano una no nanawije upaparo mai tenambe, ware, “Are pi so?”

¹¹ Vatano wanuije wo raura akananto mai ware, “Sopamo Yesus, anawae no no munijo Nasaret no Galilea rai.”

*Yesus siso no Yavaro Amisy
(Markus 11:15-19; Lukas 19:45-46;
Yohanes 2:13-16)*

¹² Naije Yesus siso no Yavaro Amisy, umba Po vatano wanamavumbe no naije mawatan. Muno Po vatano wo doi amijo kaijinta raugare raveano doi ami Yahudi ranigwane awa meja rangkukuv, umba Po vatano wo insanijo puname mamavune awa bangkoe rangkukuv tavon. ¹³ Po raura nanto mai pare, “Ayao Amisye mo ratoe mare, ‘Sya yavare omamo rawainamo yavaro sambaya.’ Weramu wapo ranigwano vatano mamun wanaonoambe awa una rai bo inta ramai dave.”^{*}

¹⁴ Naije vatano mamije ntuba muno vatano tunaive ude Yesus ai no Yavaro Amisy, umba Po saumane raunanto mai. ¹⁵ Weramu syeno akokoe utantuna no Yavaro Amisy muno kuruno makari mbaro Ananyao Musa rai wo anapaporainyo Yesus po rarorone raen, naije upari. Muno upari tavon weye wo arikainye manauno ukangkamambe Yesus ai, ugwaimbe no Yavaro Amisye ama uga ware, “Daud apa ajavije so ararimbe!”

¹⁶ Weti syene muno kurune umawe wo raura nanto Yesus ai ware, “Nyo ana arikainye wo rawainoe ranaun to e? Awa ana wo rawaine ngkove ramu!”

Umba Yesus po raura pare, “Syo ranaun ivae. Ana wo raura so mamaisy irati Ayao Amisye rai, wemi mo ratoe mare, ‘Amisyo winy, Nyo arikainye manyao indamu wo nararimbe kobe.’^{*}”

¹⁷ Naije Yesus po mapaya ti una, umba puje Yerusalem raora, poroto no munijo Betania indamu niki no we.

*Yesus panaamatambe inyo ara rai
(Markus 11:12-14, 20-26)*

¹⁸ Sansimambe awatan ngko dave, umba Yesusa pe apa arakovo utavondi aije nawe wakare ta no Yerusalem, naije Yesus maror. ¹⁹ Po inyo ara inta raen nte no unanuije tuga. Ti poroto no ama ruk indamu Po

ama mane raen. Weramu nanto ama ruke rai, Po raen ama mane mewen dai yara ama waowe bom. Umba panaamatambe inyo ara umaso rai pare, “No naiso kobe winyaveti man akatoe ramu gao nuge ngganui.” Naije kobe inyo ara umaso ngkanen kobe ti ngkakai.

²⁰ Yesus apa arakovo utavondi aije wo ana umaso raen, unantaive rai, ti wo raura ware, “Wakoe! Animaisye mi Nyo rave irati inyo ara so rai ti ngkanen kobe so?”

²¹ Yesus po raura akananto mai pare, “Syo raura tugaive: ranivara wapanave Amisye ai, weamo ana Syo rave irati inyo ara umaso rai omamo wapo rave tavon. Muno obo ma jewen, yara ranivara wapanave kobe muno wamamaundive ramu, weamo wapo unate wato raura nanto tavon wapare, ‘Nyan-sop usya ntento no mayan!’ indati ana namije Amisye po raunande wasai koba. ²² Ranivara wapanave kobe, weamo animaisye mirati wabe sambayambe wapo ranajo Amisye ai, indati Po ana namije raunande wasai.”

*Akarije inta wo Yesus apa vambunine ranajo
(Markus 11:27-33; Lukas 20:1-8)*

²³ Yesus poroto siso no Yavaro Amisy umba pananyaube. Arono naije syeno akokoe utantuna no Yavaro Amisye raije nawe, akarijo Yahudi nawe, ude Ai wo anajo ware, “Vambunino rui mirati Nyo raveare somaisy? Are pirati po vambunine so raugaje Nai?”

²⁴ Yesus po raura akananto mai pare, “Syare syo wasanajo tavon. Wapo raura nande Rinai rati, umba Syo raura nande wasai arepa vambunine mi Syo raveare somaisy. ²⁵ Arono Yohanes Pembaptis po vatane maugasya kuvuni mana rai, apa vambunine mamono nori rui? Amisye pi po vambunine raugaje ai rako, vatane inta pi po raugaje ai rako?”

Umba syeno akokoe nawe, akarijo Yahudi nawe, wanugan wayao mumuimbe. “Ranivara wamo ayaowe rasakinav wamare Amisye pi po vambunine raugaje Yohanes ai, wea indati Yesus po wansanajo veanimaiibe wamanave Yohanes ai jewen? ²⁶ Weramu ranivara wamare vatane inta pi po vambunine raugaje Yohanes ai, indati vatane uparijo wansai weye wo ratantona ware Yohanes opamo anawae Amisye inta pije. Weti wamo vatano wanuije masyanivo wo arare veano reansave.”

²⁷ Weti wo raura nakananto Yesus ai ware, “Reamamo reamantukambe.”

Umba Yesus po raura nanto mai pare, “Maisyare omai ti, Risyamo syonaie Syo ana

^{*} 21:13 Yesaya 56:7; Yeremia 7:11 ^{*} 21:16 Mazmur 8:2

wapo inanajo Sya vambunine raije umawe raura wasaijija.”

Ananeneae arikainye jirum

²⁸ Naije Yesus po ananeneae inta raura syeno akokoe utantuna no Yavaro Amisyey raije nawe, akarijo Yahudi nawe mai pare, “Animaisyey mi wapo ratantona Sya ananeneae so rai? Vatane inta apa arikainyo anya jirum. Masyote inta poroto po raura apa arikainyo anuijey ai pare, ‘Arikainyo winy, masyoto unimeso syare nyoronto nyo nawaisyoy anggurijey raijar.’

²⁹ Apa arikainyey so po raura nandey ai pare, ‘Syonaya.’ Weramu kavinta apa ana po ratantona ngkov akato, ti poroto po nawaisyoy anggurijey umawey raijar.

³⁰ Naijey akato ajay pakato apa arikainyo jirumey ai, po anajoy akatoare umay po apa arikainyoy manasyinye anajoy wemaisyoy. Umba apa arikainyey umasoy po raura akanandey ajay umasoy ai pare, ‘Injajey, syoroto ajey,’ weramuy porotoey ramuy.

³¹ Weti arikainyoy jirumey sonayamoy rui piratibeto ajay apa ana dauray so rai?”

Umba syenoy akokoe utantunay no Yavaro Amisyey raijey nawey, akarijey Yahudib nawey, woy rauray nantoy Yesus aiy ware, “Anuijey.”

Umba Yesus woy rauray nantoy may pare, “Syoy rauray tugaivay: Vatano away ayay kakaijey no may, maisyare wanyay anaerere munoy vatano woy pajak ranugandey akarijey pemerintay aijey mansamaisyoy, onawiratib wakatab wuisy akato. Weyey Amisyey po mau-gavay usisay Apa kawasayey bwe akarib mayjey may, yaray weapamoy so wasaugavay wasisay jewen.” ³² Weyey Yohaney Pembaptisib de indamoy po Amisyey apay ananuijey mamaisyey raroronoy wasay, weramuy waponayoy apay ananyoyawey rai munoy wapanawey aiy jewen. Yaray vatano away ayay kakaijey no may, maisyare wanyay anaerere munoy vatano woy pajak ranugandey akarijey pemerintay aijey mansamaisyoy, onawamoy wanawey Yohaney aiy kobey. Weramuy weapamoy aronoy wapo vatane umasoy away anawey raen to, wapanawey jewenay nene munoy wasakinawoy wapay ayay kakaijey raijey ramuy.”

Ananeneae nawaisyoy angguriy
(Markus 12:1-12; Lukas 20:9-19)

³³ Umba Yesus woy rauray akanantoy akarijey umawey may pare, “Wadanide, Syoy ananeneae kaijintay rauray so: Akarijey apawey kopay rai intay po nawaisyey rayaray, umba po anggurijey ranyum no rai. Umba po yaney rayanoy rakianib, munoy po atemey raway indamuy po rave anggurijey maney rakugan asyoy amay ugay rai. Munoy po randumey ranarib no nawaisyey amay ugay indamuy vatano po nawaisyey ramaney no rai. Umba po vatane intay mawainde indamuy woy apay nawaisyey

raeranandey, pare po maney ratodijoy may — woy intay raugav, wepoy intay raugav. Umba pusyoy poroto no munijoy maran.” ³⁴ No away anggurijey umawey mawit kobey, umba vatano apawey nawaisyey umasoy rai po apay vatano wanapatambey aijey intay matutirib indamuy ude no vatano woy apay nawaisyey raeranandey mansaib indamuy woy apay maney intay raugav.

³⁵ Weramuy vatano woy nawaisyey raeranandey umasoy woy vatano wanapatambey umawey intay aijar woy anepatib, munoy woy kaijintay aubaisyoy, munoy woy oramey rave kaijintay aepar.” ³⁶ Umba akarijey apawey nawaisyey rai umawey po vatano wanapatambey aiy kaijintay matutirib akato, wanuijey umawey makivan. Weramuy vatano woy nawaisyey umawey raeranandey woy vatano wanapatambey umasoy mavearay munoy manasyinye umawey mansamaisyoy akato. ³⁷ Rijay dave, po tauney apay kavoy atutirib akato vatano woy apay nawaisyey raeranandey mansaib. Po ratantony pare, ‘Indatib wanawey syay arikainyey aiy jajey.’

³⁸ Weramuy aronoy vatano woy nawaisyey raeranandey umawey woy arikainyey umasoy aen, naijey wayay vambinibey ware, ‘Sopamoy akarijey nawaisyey apay arikainyey pi so! Wadew wamoy aubaisyoy, indamuy aronoy apay ajay kakai, wamauray nawaisyey so rai.’ ³⁹ Umba woy arikainyey umawey aijar, woy awatanib ti pusyoy no nawaisyey amay akirib, umba woy aubaisyoy.”

⁴⁰ Umba Yesus woy manajoy pare, “Aronoy indatib akarijey nawaisyey umawey dey, animaisyey miratib po rave vatano woy apay nawaisyey raeranandey umasoy mansaib?”

⁴¹ Umba akarijey Yahudib umawey woy rauray nantoy Yesus aiy ware, “Indatib po vatano mamun umawey mansaubaisyoy, umba po apay nawaisyey umawey raunantoy vatano kaijintay may jakatoy inday woy raeranandey masyotoy amay maney mawit rai, umba woy apay nake raunantoy aiy.”

⁴² Umba Yesus woy rauray akanantoy may pare, “Wabeanimaybey wanantay Ayay Amisyey so raijey jewen? Moy ratoy mare:

‘Oramey somamoy vatano woy yavare ranarib wonayoy rai

ti woy ramautay vayave.

Weramuy omiratib oramoy manasyinib dave Amisyey po ratayay

indamuy yavare rauseay ntetoy rai moy rajar matuve.

Somamoy Amisyey apay anay daveyey may.

Wamoy raen, wanantaivay rai!”

⁴³ Umba Yesus woy rauray iridib pare, “Akarijey Yahudib weap, Syoy rauray wasaib: indatib Amisyey po apay kovoy pare Po raugajey Apay kawasayey mansaibey raugavoy wasaora,

umba Po raugaje irati vatano utavondi Apa bekere rai obo mansai jakato. ⁴⁴ Are pirati pantukamo orame umaso rai ti tende ama vone rai, opamo pandamisy. Muno are pirati orame so ntemaje ai ti mo akep, opamo pandamisy ti be kapumbe.”†

⁴⁵ Arono syeno akokoe utantuna no Yavaro Amisy raije nawe, vatano Parisi nawe, wo Yesus apa ananeneae umawe ranaun, uparijo Ai, weye wo raen Yesus po ratantona pare onawamo maurata irati vatano mamuno wo nawaisye raeranande umawe mansai. ⁴⁶ Weti ware ubeker indamu wo Yesus aijar, weramu wo vatano wanuije masyaniv, weye vatano wanuije wo ratantona ware Yesus opamo anawae Amisy inta piye.

22

*Ananeneae yo ono vaunam
(Lukas 14:15-24)*

¹ Naije akato Yesus po ananeneae inta raura syeno akokoe muno akarijo Yahudi umawe mai jakato, ² pare, “Arono Amisy be akarive Apa kawasae mansai no mine vone so, Opamo aurata irati akarijo titi po ono vauname rave irati apa arikainye aije wemaisy. ³ Akarijo titi umaso po vatano wanapatambe aije matutir indamu wo vatane mawainde one umaso rai, weramu vatano mawainde umaso wonayo udei.

⁴ Wetiva akarijo titi umawe po vatano wanapatambe aije kaijinta matutir akato pare, “Wapo raura nanto vatano syo mawainoe mai jakato wapare: Anaisyo one ratayaowa ntuna to. Syo maero sapijo mani rave inta maubai to indamu wandaisy. Ti wade ono vauname so rai!”

⁵ Weramu vatano mawaine umawe wonae wo raranivi, ti ude ramu, yara inta poroto no nawaisy, inta poroto no pasari indamu panamavumbe. ⁶ Muno kaijinta nawamo wo vatano wanapatambe akarijo titi umawe aije maijar, wo mave tatugadi, umba wo maubaisy. ⁷ Arono akarijo titi umawe po ayao umaso ranaun, pari rave. Weti po apa naite matutir indamu wo vatano mamuno wo apa vatane maowe maubaisy muno wo awa munije ramero taname rai.

⁸ Naije umba po raura nanto vatano wanapatambe aije mai jakato pare, “Ono vauname ratayaowa ntuna to weramu vatano syo mawainde umawe umamaisy rai ramu. ⁹ Weti wata no unanuijo kota ama radirije raito, are nawirati wapo maen, wapo mawain indamu ude ono vauname so rai.” ¹⁰ Weti vatano wanapatambe umawe wuruta kobe no unanuijo kota ama radirije

raito, umba wo vatano uma unanta maijoe manunugambe vintabo —vatano manuga ngkove nawe, vatano ukakainoanive nawe, manugan mbintabo. Naije yavaro ono vauname ntairijo vatano wanuije umawe mansai.

¹¹ Uмба akarijo titi umaso siso po vatano utavondijo ono vauname umaso raije maen tenambe. Muno po vatane inta aen no awa yasyin, wepamo po ansuno ono vauname inta rave ramu. ¹² Weti po anajo pare, “Arakove, mbeanimaibe irati winde no so nyo ansuno ono vauname inta rave jewen?” Weramu vatane umaso manin bayave, po ayaowe rasakinave kakai. ¹³ Uмба akarijo titi umaso po raura vatano wanapatambe aije mai pare, “Wapo ajoe aneme raokokaisy, umba wapo amaugusyo kumuro marane rai. No ratuije poyov tawan muno siuri tutir.”

¹⁴ Uмба Yesus po ananeneae umaso ama ine raura kakavimbe pare, “Amisy po vatane wanuije mansawain, weramu wanui jewen yara kavinta vayave nanawirati Po mapatimu indamu utavondi Apa kawasae yo be akarive maije mai.”

*Ananyao pajak raunanto pemerinta ai
(Markus 12:13-17; Lukas 20:20-26)*

¹⁵ Naije vatano Parisi wanugan wayao ware wo Yesus atopano Apa ana daura rai. ¹⁶ Weti Parisi wo awa arakovo utavondi maije inta matutir ude Yesus ai, muno vatano usisa varoro Akarijo Titi Herodes aije inta utavondijo mai tavon. Ude wo raura Yesus ai ware, “Injayo Kurune, reamo naenamo Nyo ayao tugae obo raura muno Nyo Amisy apa bekere raura tugaive vatane mai. Nyo vatane masyanive ramu muno Nyo vatane inta mansamaribe ramu. ¹⁷ Weti reamere Nyo raura reansai animaisy mi Nyo ratantona ana so rai: Mamaisyo wama ananyao rajamo wamo pajak ravae dako jewena e? Wamo doije raunanto Akarijo Titi Roma Kaisar ai rako jewen kaije?”

¹⁸ Yesus po awa bekero mamune raen to, ti Po raura nanto mai pare, “Wapa angkarije ntapekan! Wabeanimaibe wapare wapo inatopan? ¹⁹ Syare wapo doije vasye inta rarorono Rinai, wemirati veano pajak ravae.” Weti wo doije vasye inta raunanto Ai. ²⁰ Uмба Po manajo pare, “Arepa amune mi no no doije raije so? Arepa tame mi so?”

²¹ Uмба wo raura nanto Ai ware, “Akarijo Titi Roma amune ma muno apa tame mije.”

Uмба Yesus po raura nanto mai pare, “Akarijo Titi Roma apa ma, weti animaisy mirati po ranajo wasai, wapo raunanto ai.

† **21:44** Orame umaso raurata irati Yesus ai, weti are pirati panave Ai jewen yara po awatambe, opamo indati mangke nande ai.

Muno animaisye mirati Amisye po ranajo wasai, wapo raunanto Amisye ai tavon.”

²² Arono wo ayao umaso ranaunoe, unantaive rai. Umba wuje wuruta Yesus aora.

Yesus po ayao wene muno kovakatoe raura

(Markus 12:18-27; Lukas 20:27-40)

²³ Masyoto naije vatano Saduki inta ude no Yesusa nui. Wenawamo wo ratantona ware arono munije ama akari, vatano ugwenen to nawamo ukovakatoe ramu. Umba ubeker wo Yesus atopano Apa ana daura rai, weti wo raura Ai ware, ²⁴ “Injayo Kurune, Musa po ananyao raugaje wansai pare, ‘Ranivara anya inta kakai yara apa arikainye meweno ai, weamo apa rijate inta noamo po apa anamugo kaviniye umawe raovan akato indamu ama arikainye inta aenamo nanto teto ajayo anui uma kakaijoe apa tanoane rai jakato.’ Musa apa ananyao no tai maisy. ²⁵ Weti vatano una no reama yasyin mano kaururum ube arakobe. Awa anuije baunam, umba kakai, apa arikainye meweno ai. Weti apa anamugo kaviniye mamu apa rijato no akaje aije po raovan akato. ²⁶ Weramu rijate umaso kakai tavon, apa arikainye meweno ai. Ana maisyare omaisye bo mirati no aya rijato mandeije ai muno miridije nde irati rija dave kaururume ai. ²⁷ Umba wanya umawe taune ngkakai tavon. ²⁸ Maisyare omaisyamo, arono munije ama akari vatano ugwenen to maijasea ukovakato, wanya umawe mamu are pi apaura rai? Weye vatano kaururum umawe wo raovan to!”

²⁹ Umba Yesus po raura akananto mai pare, “Weapamo wapo Ayao Amisye raen kobe jeben muno wapo Amisye apa vambunine raene ramu, ti wapan-tatukambea. ³⁰ Arono vatano ugwenen to maijasea ukovakato no wene rai, indati ubaunam akatoe ramu, yara unoare maisyare muno naito Amisy uno no munijo ntitije mansamaisy. ³¹ Muno ananyao vatano ugwenen yara ukovakato somamo, wasaemen dako Ayao Amisye mo ratoe rai, arono wusyinoe Amisye po raura pare, ³² ‘Risyamo nya aneno Abraham, muno Isak, muno Yakob, awa Amisye pi Risy’?” Ayao umaso ama tunato rajje mare anene umaso ugwenen to weramu manawayoe tuna tawan. Maisyare omaisy, Amisye pamo vatano ugwenene awa Amisye pa jewena, yara vatano ujaisye awa Amisye pije.”

³³ Arono vatano wanuije umaso wo Yesus apa ananyao ranaun, unantaive rave rai.

Ananyao mbe mobe

(Markus 12:28-34; Lukas 10:25-28)

³⁴ Vatano Parisi wo ranaun Yesus apa ayao mbambunin ti vatano Saduki wo ayaowe rasakinavo Ai kakai. Weti Parisi wanugan akato, umba ude Ai jakato. ³⁵ Umba kuruno akari mbaro Ananyao Musa rai inta no no awa yasyin po Yesus anajo indamu po atopano Apa ana daura rai. ³⁶ Pare, “Injayo Kurune, ananyao rui mirati manakoe no Ananyao Musa rai ti mbe mobe ananyao kotare rakivan tenambe?”

³⁷ Yesus po raura akananto pare, “‘Muiny irati nya Amisye ai rave. Nanuga ntenami muiny irati Ai muno nya ana ndatantona ntenami rai muno nya vambunine rai tenambe.’” ³⁸ Ananyao umaso mamu ananyao manakoe muno mbe mobe. ³⁹ Muno ananyao jirum mo ramai tavon no taiso: ‘Muiny irati nya arakove mansai maisyare muno taune wimuinyo taune nai wemaisy.’” ⁴⁰ Ananyao jirume umaso onayamo Ananyao Musa muno Ayao Anawae ama ananyao tenambe ama nori rati yai.”

Mesias opamo Daud apa ajavi muno apa akarije pije

(Markus 12:35-37; Lukas 20:41-44)

⁴¹ Umba Yesus po vatano Parisi wanugan no naije manajo pare, ⁴² “Animaisye mirati wapo ratantona Mesias ai? Arepa ajavi pije?”

Umba wo raura nanto Yesus ai ware, “Opamo Daud apa ajavi pije.”

⁴³ Umba Yesus po raura akananto mai pare, “Weramu Daud taune po Mesias aura pare Opamo apa Akarijo Titi pije! Weye Anawayo Vambunine mo Daud augav indamu po Mesias aura no taiso:

⁴⁴ ‘Amisye po raura nanto sya Akarijo Titi ai pare,

“Nyaje ntuna no inanem ngkove rai java

Syo Nya marova maveaje utantuna no najo ate rai

indamu wimbe akarive mai.””

⁴⁵ Daud po Mesias aura pare, ‘sya Akarijo Titi pije,’ yara Mesias opamo apa ajavi pije!”

⁴⁶ Vatane inta po ayaowe rasakinav akananto Yesus ai kakai. Masyoto naije kobe vatane wo asyani tenambe ti inta po anajo akatoe ramu.

23

Wasyisyaube kuruno Yahudi muno vatano Parisi mansai

(Markus 12:38-40; Lukas 11:37-54, 20:45-47)

¹ Naije Yesus po raura nanto vatano wanuije mai muno Apa arakovo utavondi aije mai pare, ² “Kuruno makari mbaro Ananyao Musa rai muno vatano Parisi wenawirati Amisye po mapatimu indamu wo Ananyao Musa raura kakavimbe wasai. ³ Weti syare wapo maraniv muno watavondi awa ana wo raura wasai rai, weramu vemo watavondi awa ana wo rave rai nora. Weye awa ana udave mamu ntavondi awa ananyaowe raije ramu. ⁴ Awa koane muno awa ananyao wo raugaje vatane mai omamo manui rave ti mangkeo vatane mai utavondi rai. Weramu Parisi muno kurune umawe wo vatane maeranande indamu ubeta ananyao manui umaso rai tenambe oma jeben muno wo ana mangkeo mai raijasea jeben tavon.

⁵ Awa anakere kotaro ubeker ti udaijare mamu indamu vatano kaijinta wo raen ti wo mararimbe. Wo awa ansuno sambaya raveti ngko dave indamu vatane wo mararimbe ware onawamo utavondi Ananyao Musa rai rave.* ⁶ Manayanambe utantuna no kursijo ngko dave rai no yavaro sambaya rai, muno manayanambe utantuna vatano awa tame ntiti matavon arono one rave. ⁷ Manayanambe vatane ubeaje mai no pasari, muno manayanambe vatane wo awa tamo ‘Injayo Kurune’ rawain.

⁸ Weramu weapamo wabemo wabekero vatane inta wo wasawaina ware ‘Injayo Kurune’ wenora, weye weapamo wabe arakobe vintabo muno wapa Kurune pamo Ribuisya. ⁹ Muno vemo vatane inta wo wasawaina ‘Injae’ wenora, weye wapa Ajaya pamo intabo obo pa, Opirati no no munijo ntiti. ¹⁰ Muno vemo vatane inta wo wasawaina ware ‘Sya Akarije pi winy’ wenora, weye wapa Akarije pamo intabo obo pa, opirati Mesiasye Risy. ¹¹ Vatano rui pirati panakoeve no wapa yasyin, syare opamo panapatambe wasai. ¹² Are pirati po taune aijaseo tive no mine vone so, opamo indati Amisye po apaaje, yara are pirati po taune anuga raveti mpaaje no mine vone so, indati Amisye po aijaseo tive.”

Yesus po vatano Parisi muno kuruno Yahudi awa ayao kakaije rantutibe (Lukas 11:37-54)

¹³ Umba Yesus po raura pare, “Vatano Parisi muno kuruno wasakari mbaro Ananyao Musa raije weap, kakaije nde wasai! Weapamo wapa angkarije ntapekan, weye wapo vatane maorai indamu vemo utavondi kawasaeyo Amisye be akarive

maiye mai jinya. Taune weapamo wapon-ayo watavondi Apa kawasaie maiji, muno vatano ubekero utavondijo maiye nao wapo mansopi.

¹⁴ Vatano Parisi muno kuruno wasakari mbaro Ananyao Musa rai, kakaije nde wasai! Weapamo wapa angkarije ntapekan, weye wapo wanya kaviniye maponae indamu wapo awa ananuge muno awa yavare raugavo maora. Muno wapa sambaya nggwaravainy indamu vatane wo wasararimbe rai. Indati wapa mangke manakoe weye wapa angkarije ntapekan!

¹⁵ Vatano Parisi muno kuruno wasakari mbaro Ananyao Musa rai, kakaije nde wasai! Weapamo wapa angkarije ntapekan! Wabeke dave indamu vatane utavondijo wasai, weti wata nggwaravain no mayan muno no yawa rai indamu wapo makani. Umba arono wapo vatan intabo anuga raugabe indamu tavondi wasai, weamo wapo anyao wapa ananyao angkari rai, weti umba apa ana dave ngkakai rave mo taune wapa rakivan. Wetiva mangkeo tanam mbadururo nuge nuganuije omamo vatano napije mamaisyo rai, mo wamamaisyo rai rakivan.

¹⁶ Akarijo wasamije ntuba weap, kakaije nde wasai! Weapamo wasaurata irati vatano amije ntuba inta po vatano amije ntuba kaijinta augav no aya unanui anya rai wemaisy. Weye wapo vatane maponae wapare, ‘Are pirati po urairije inta rapatimu, ranivara po Yavaro Amisye ama tame veano raokaisy, weamo ama ine meweno rai ti po apa urairije umaso rakanyoandi kai. Yara ranivara po emasijo no Yavaro Amisye ama uga rai ama tame veano apa urairije raokaisy, weamo apa ana po raurairive umaso mamu mbambunin dave weti vemo po rakanyoandi jinya.’ ¹⁷ Weapamo wasamije ntuba muno wapantukambe rave! Yavaro Amisye wemirati ntiti je emasijo ntuna no ama uga rai rakivan, weye Yavaro Amisye wemi mbewar emasijo ntuna ama uga rai ndandinit.

¹⁸ Maisyare wemai tavon, wapare, ‘Are pirati po urairije inta rapatimu, ranivara po Yavaro Amisye ama tewa orame ama tame veano raokaisy, weamo ama ine meweno rai ti po apa urairije umaso rakanyoandi kai. Yara ranivara po anakotaro rameseo no tewa orame umawe rai ama tame veano raokaisy, weamo apa ana po raurairive umaso mamu mbambunin dave weti vemo po rakanyoandi jinya.’ ¹⁹ Weapamo wasamije ntuba muno wapantukambe

* **23:5** Awa ansuno sambaya umaso mamu ayao Yunani mo raura no taiso: “Wo awa waijo sambaya raveti manakoe, wemirati wo raokae no maneme ruke rai muno mande rai, muno wo waijo nggwaravainye raokae no awa ansuno manawadi rai, indamu vatane wo mararimbe” (Bilangan 15:37-40; Ulangan 6:8).

rave! Yavaro Amisyé ama tewa orame mamó ntítí rave mó anakotaro rameseo nó ama vone rai rakivan, weye tewa orame wemi mbewar anakotare umaso ndandinit. ²⁰ Wabeanimaibe wapo wapa urairije raokae tai maisy? Wapantukambe rave, weye ranivara wapo tewa orame ama tame veano wapa urairije inta raokaisy, weamo tugae rave tewa orame me, ama anakotaro rameseo nó ama vone rai me, ranugan bintabo tí omamo maisyare wapo tame rurume umaso veano wapa urairije umaso raokae wemaisy. ²¹ Muno ranivara wapo Yavaro Amisyé ama tame veano wapa urairije inta raokaisy, omamo mare wapo Amisyé wépi tuna nó Yavaro Amisyé ama uga rai taune Apa tame veano raokae to ije. ²² Maisyare omai tavon, ranivara wapo munijo ntítí ama tame veano wapa urairije inta raokaisy, omamo mare wapo Amisyé apa kursijo títi ama tame veano raokae tavon to, muno obo ma jewen, yara Amisyé wépi tuna nó kursijo títi umaso rai Apa tame veano raokae tavon to ije. Abo! Vemo wapo támo Amisyé pé, Apa anakotaro rui vayave me, veano wapa urairije raokaisy inya!

²³ Vatano Parisi muno kuruno wasakari mbaró Ananyáo Musa raije weap, kakaije nde wasai! Weapamo wapa angkarije ntapekan, weye watawondi Amisyé apa ananyao we rai tenambe ramu. Tugae, wapa anare wadayanyum maisyare bawane, kaumamawane, muno marinsane mamó wapo raporadive abusyín umba wapo vasye intabo raunanto anakero Amisyé rai. Yara ananyáo manakoe mbe mobe, maisyare ayáo mamaisyá rapatimu muno muínyo vatano kaijinta maí muno beto urairije rai, omamo wabeta rai ramu. Weramu urare wemirati wabeta rai! Weti kove mamó watawondi ananyáo mbe mobe rai mavabe, muno ananyáo mamaune mamó vemo wasanimari rai tavon nora. ²⁴ Weapamo akarijo wasamije ntuba! Wasaurata irati vatano pare po mana ramanam, umba po nyimanyime raen nó mokije ama uga rai tí po raepata, yara po maero unta raunto vayave kobe!

²⁵ Vatano Parisi muno kuruno wasakari mbaró Ananyáo Musa raije weap, kakaije nde wasai! Weapamo wapa angkarije ntapekan! Wasaurata irati pauraíjo nggwame rai. Wapo pauraíje ama akiríje bo rarondom tí mpopér, yara ama uga mamó ta nó irati wame rautan. Wasanuga ntan-tunaube muno wapo vatane maponae indamu wapo awa ananuge raugavo maora. ²⁶ Vatano Parisíje, wasamije ntuba! Syare wapo pauraíje ama uga rarondoma mpopé to, weamo ama akiri ma mpopé tavon to.

²⁷ Vatano Parisi muno kuruno wasakari mbaró Ananyáo Musa raije weap, kakaije nde wasai! Weapamo wapa angkarije ntapekan! Wasaurata irati aipapo ama vone raiman tí ngkov, yara ama uga mamó ntairi jirati vatano ugwenene awa pae rai muno ranavano kakai ntapekan. ²⁸ Weapamo maisyare wemaisy, weye arono vatane wo wasaen, wo ratantona weapamo vatano kove, weramu wantukambe wasanuga mamó ntairi jirati angkarijo ntapekane muno ayáo ngkakainoanive rai.

²⁹ Vatano Parisi muno kuruno wasakari mbaró Ananyáo Musa raije weap, kakaije nde wasai! Weapamo wapa angkarije ntapekan! Syo wasaen wapo anawae wusyine nawe, vatano utawondi Amisyé apa bekere raije nawe, awa aipapo ama vone raiman tí ngkov. ³⁰ Muno wapo raura wapare, 'Reama aneno wusyine wo anawae mansao to. Weramu ranivara reamamo reano nó arono wusyinoe ratire, reantawondi wamo maubaisye ramu.' ³¹ Maisyare wemaisy wapo wasaura kakavimbe weapamo vatano wo anawae maubaisyoe awa ajavi nawirati weap! ³² Weti wapakata, wapo wapa aneno wusyine awa ayáo kakai raijar akare!

³³ Weapamo vatano mamun maisyare tawae mamun ramaisy. Weti wanajivo mangke tanam mbadururo nuge nuganuije raora kakai. ³⁴ Indati Syo anawae muno vatano makarikuga mbar muno kuruno wo wasanyaowe matutir ude wasai. Weramu indati wapo inta maubaisy, wapo inta mausea usawa inyo kapite rai, wapo inta manepati kaijo waije rai nó yavaro sambaya ama uga, muno arono unajiv uta nó munijo kaijinta rai, wapo mawatambe tutir. ³⁵ Maisyare omai tí, ayáo só nde wasai: vatano utawondi Amisyé apa bekere rai nanawirati maubai tenambe nó mino tename só rai, weapamo wapo mangke umaso ranawan. Weye onawamo vatano Yahudi wapo maubaisy, manasyin dave Habel, opamo ayáo kakaije meweno ai, miridíje nde ava nande Zakaria ai, Berekia apa kavo, opamo wapa anene wo aubai nó Yavaro Amisyé me ama tewa orame me aya yasyin. ³⁶ Weti Syo raura tugaive wasai: Amisyé po ama mangke umaso ranugan bintabo, indati Po raugakaje vatano susyo naiso wasai."

*Yesus aemeno Yerusalem rai
(Lukas 13:34-35)*

³⁷ "Aro...! Yerusalem, weapirati wapo anawae maubaisy muno wapo orame rave vatano Amisyé po matutir ude wasaije maepara ugwenen to. Susye manui rave to syare Syo wasanugan nande Syo wasakuka

maisyare mangkuero mo ama tuvane rakuka wemaisy, weramu waponae. ³⁸Weti indati Amisy e aneme mpaya wasai indamu wapa marova wo wapa munije muno Yavaro Amisy e randamisy. ³⁹Syo raura wasai: arono naiso kobe wapo inaen akatoe ramu gava masyoto wapo inaura wapare, 'Kove ngkov irati Napi de tamo Amisy e rautane Ai!' "

24

Yesus po Yavaro Amisy e ama mandamisyije raura

(Markus 13:1-2; Lukas 21:5-6)

¹Yesus puje Yavaro Amisy e raora, naije Apa arakovo utavondi aije ude Ai, wo raura nanto Ai ware, "Winyerade! Yavaro Amisy e so ngko dave!"

²Umba Yesus po raura nanto mai pare, "Syo raura tugaive wasai: Indati masyoto makareye Yavaro Amisy e wapo raene so ama oramo ngko dave somamo mandamisyi vintabo ti ntuna no min, muno inta ntuna matuve akato jewen."

Anakotaro nande arono munije ama akari mararai

(Markus 13:3-13; Lukas 21:7-19)

³Yesus poroto paje tuna no Pukamo Saitun. Naije Apa arakovo utavondi aije ude Ai indamu wayao mumuimbe. Ware, "Injae, reamare Nyo raura reansai kakavimbe: Nandui rati umba ana Nyo raura umawe mamaisy? Nya masyoto nyakar-eye muno munije ama akari mare nande, weamo animaisy e mirati indati rarorono wusyimbe?"

⁴Yesus po raura nanto mai pare, "Wasyisyaube! Vemo vatane inta wo wasaponae inya. ⁵Weye indati vatane wanui ude wo Sya tame veano mawain ware, 'Risyrirati Mesias!' Umba wo vatano wanuije maponae. ⁶Arono rui rati wadaniv vatane wo marova rave no munijo mararai, muno ayao ovare nde wasai mare vatane wo marova rave no munijo marane rai tavon, weamo vemo wajaniv inya. Weye ana namije mamo indati nande, weramu munije ama akarije omamo mamai dainya nene. ⁷Munije inta marovave irati munijo kajinta mai, muno akarijo titi inta marovave akarijo titi kajinta ai. Nugo marore ntami muno mungkije nande no rui rui vayave. ⁸Weramu omai mbintaboamo manasyin bayave na, maisyare muno wanya mare ntuna arikainye autan ti njajoramije wemaisy.

⁹Indati vatano mine so vintabo manuga mamuno wasai weye watawondi Rinai. Muno wo wasaijar wo wasaunanto indamu naite wo wasansewabe muno wo

wasaubaisy. ¹⁰Arono naije vatane wanui makirive Rinai muno wo awa anave rapaya ti ntami. Wo awa arakove mansamavun nanto awa marova mai, muno manuga mamuno mansai vambinibe. ¹¹Anawae angkari wanui ude wo vatane wanui maponae. ¹²Muno ayao kakaije miridi nseo, weti vatane ubekobeo awa arakove mai miridi makaje. ¹³Weramu are pirati atawandi kobe muno panave Rinai tutir avanto ama marane rai, opamo indati Amisy e po apaya irati kakaije rai indamu kova nuge nuganui. ¹⁴Muno Ayao Kovo mo Amisy e apa be akirive raura indati ravovo mine vone so rai tenambe indamu vatane kotarontuna no mine so wo ranaun. Mewen, umba munije ama akari nande."

Siurijo manakoe nande no masyoto rijat
(Markus 13:14-23; Lukas 21:20-24)

¹⁵"Indati wapo Vatano Mamun Akoe aeno te no Yavaro Amisy e rai, mamaisyo anawae Daniel apa ayao purairive wusyimbe rai.* (Vatano weapirati wabacave ayao umaso rai, syare wananta ama ine rai.) ¹⁶Arono naije syare vatano una no Yudea unajiv usea no unat. ¹⁷Vatano utantuna no yavare von, vemo wakaje wo ananuge inta rauga no yavar uga inya! ¹⁸Maisyare omai tavon, vatano una no nawaisy uga, vemo wakare wo ansune rauga no yavar inya! Yara unaji bayave. ¹⁹Abo! Arono siurijo namije nde, wanya vavinsana nawe, wanya wo ukame raunanto awa arikainye maije nawe awa siurije manakoe rave, weye wansanan unajive kakai. ²⁰Wasambayambe indamu vemo siurije umaso nande no embayo nanayao rai jinya muno masyoto sambaya rai jinya. ²¹Arono wusyin mine so ranarijoe ndea naiso vatane awa siurije mamaun, yara awa siurijo rijate so manakoe rave. Arono indati siurijo rijate so mewen to, weamo siurijo maisyare umasom inta makanande akatoe ramu. ²²Ranivara siurije umaso noa nuguenta, weaveti vatano mine so ukakai tenambe vintabo. Weramu indati Amisy e po siurije umaso ransop akaje ti ntumainy, weye aemeno Apa kawasae po mansatayaowe mai.

²³Arono naije, ranivara vatane inta po raura wasai pare, 'Waperade! Mesias opi noe so!' dako, 'Napi ratuije!' dako, vemo wapanave ai jinya! ²⁴Weye indati mesias angkarije muno anawae angkarije ude. Wo anapaporainyo manakoe raroron indamu wo vatano wanuije maponae, muno ubeker ware wo kawasae yo Amisy e po mansatayaowe maponae tavon, weramu umamaisy e ramu. ²⁵Wadanide! Syo ana nande

* 24:15 Daniel 9:27, 11:31, 12:11

no masyoto rijate raura wasai wusyimbe to inda wasyisyaube.

²⁶ Ranivara vatane inta po raura wasai pare, ‘Waperato! Mesias napi no no nugo vabukane vono maninimbe ratuije,’ wabemo wata no ratuije inya. Ranivara pare, ‘Waperade! Mesias napi kokaike no tanoane so rai,’ wabemo wapanave ai nora. ²⁷ Weye arono indati Risy, Arikainyo Vatane, syakare no mine vone so rai kobe, omamo maisyare muno ivake ratukande no ranijo wanamuram ndento no varet wemaisy. Weti vatan tenambe wo raen kobe. ²⁸ Arono wapo insanijo koroe maeno wanugani, wapare, ‘Somaida maere ine inta ntuna no naije.’ Maisyare omai tavon, arono anakotaro Syo ratodi umawe nande tenambe, wapare, ‘Arikainyo Vatane pakare.’ ”

Arono Arikainyo Vatane pakare no mine vone so

(Markus 13:24-27; Lukas 21:25-28)

²⁹ “Arono siurije umawe mewen, kavuratawe umba uma amije ngkaumudi muno ombae mbar akatote ramu. Tumo no no naume warae utataopon muno naume mansumugo anakotaro no raije rautan.* ³⁰ Arono naije ana inta raroron no naumo warae indamu mbe rarorombe Arikainyo Vatane risyakare, weti vatano kotare ntuna no mine vone so woyov. Indati wo Arikainyo Vatane inaeen rino kamure rai no naumo warae ti syaje, ride irati Sya vambunine muno Sya kovo ntiti rautan. ³¹ Tavuna Amisy ngkin umba Syo naito Amisy matutir indamu wo vatano Syo matayaowe manunugambe vintabo, nanawirati una no ovare ami mambisyo mine so muno una no rui rui vayave no mine so ntoa ama marane rai muno naumo warae ama marane rai.”

Ananeneae tume

(Markus 13:28-31; Lukas 21:29-33)

³² “Syare wapo ananeneae Tumbina ranyao: Arono wapo Tumbina raeno seowi, wapare, ‘Indati anamuke man akato.’ ³³ Maisyare omai tavon, arono wapo anakotaro nande umawe raen, indati wapo raen wapare munije ama akari mararai rave to.

³⁴ Syo raura tugaive: arono anakotare umawe nde nande tenambe, indati vatano susyo naiso inta nawirati wene nande mai rainy ti una ti no raen. ³⁵ Naume warae me mine so me indati yaumandi, yara Sya ayaowe mamo ntamija nuge nuganui.”

* 24:29 Yesaya 13:10, 13:4; Yoel 2:10; Muni Akari 6:12-14

Wapo Yesus apa pakare raije ranyut, weti wasyisyaube muno wapanatatayaube (Markus 13:32-37; Lukas 17:26-30, 34-36)

³⁶ “Weramu nandui rati anakotare so mare nande, vatane wantatukambe ama masyote muno ama uma amije rai. Naito Amisy una no munijo ntiti wantatukambe rai muno Risy, Arikainyo Amisy, syantatukambe rai tavon. Yara Injayo Amisy obo pi po raen.

³⁷ Arono Risy, Arikainyo Vatan, syakare rai, weamo mamaisyo wusyino arono Noakija no no mine vone so we ramaisy. ³⁸ Arono naije vatane wo masyoto makanande ratantona ramu, yara manayanambe anaisye, ana ramaname bo rai tutir. Anya wo wanya maovan muno ajae wo awa arikainyo wanya awa vainye raokaisy. Maisyare omaisye miridije ntoa masyoto Noakija siso apa nyomane rai. ³⁹ Vatane umaso wantatukambe animaisye mi mare nande yava masyoto manayame njam mo mapupuji, ti ukakai vintabo. Maisyare omai tavon arono indati Risy, Arikainyo Vatan, ride pabe. ⁴⁰ Arono naije, vatane jiruma yo nawaisye raijar, Amisy po inta augav, yara inta pamo no kobe. ⁴¹ Wanya jiruma yo kasyambere ranumu, Amisy po inta raugav, yara inta mamo no.

⁴² Weti wasyisyaube weye wapantukambe masyoto wapa Akari risyakare raije rai. ⁴³ Weti wadanide: Arono vatano panaonoambe pare siso yavare inta rai, vatano apave yavare umawe raije pantukambe apa masyoto de raije rai, ti syisyaube ramu. Weti vatano panaonoambe siso kobe, po apa ananuge inta raugavo aora. ⁴⁴ Weti wabemo wapo vatano apave yavare umawe raije amaisy inya, yara syare weapamo wapanatatayaube. Weye Risy, Arikainyo Vatan, sya masyoto de raije mamo wapantukambe rai, weti wapanatatayaube indamu wapo inanyut.”

Ananeneae vatano jirum yanapatambe (Lukas 12:41-48)

⁴⁵ Umba Yesus po ananeneae inta raura nakato pare, “Vatano panapatambe inta opamo akarikuga mbar muno beto akarijo yavaruga apa bekere rai mavabe. Weti apa akarije umaso panave ai ti po atutir indamu be akarive apa vatano wanapatambe kaijinta mai indamu masyote anteter po awa anaisye raunanto mai. Umba akarijo yavaruga puje munijo we raora. ⁴⁶ Ranivara vatano panapatambe umawe po apa anakere raija kobe yava akarijo yavaruga pakare, wea indati apa akarije

anayanambe ai ti po kove raunanto ai.
⁴⁷ Tugae, akarije umaso po vatano panapatambe umaso aijaseo titive indamu po ananugo ntuna no yavaruga umaso raeranande tenambe.

⁴⁸ Weramu ranivara vatano panapatambe umaso pamo anuga mamun ti po ratantona pare, ⁴⁹ ‘Sya akarije pamo to noa gwaravain dave weramu pana de rainy,’ weti po vatano wanapatambe umawe manepati tenambe, muno pisyisy muno po awije ramanama maen, weamo mamaisye ramu. ⁵⁰ Weye naije akato apa akarije umawe pakare ama masyote muno uma amije mamu pantatukambe rai. ⁵¹ Umba akarije wato po mangke raugaje vatano mamuno uma panapatambe aijoe ai, po anepati mangkebe umba po augaveto po amaugusyo no vatano awa angkarije ntapekane matavon. No ratuije poyov tawan muno siuri tutir.”

25

Ananeneae wanya mansae abusyin wo anya bauname anyuto dei

¹ Umba Yesus po raura pare, “Masyote Amisye de be akarive Apa kawasae mai no mine vone so omamo raurata irati ananeneae so rai: Namane inta wanya mansae mano abusyin wo yawainye raugav wuruta wo anya bauname anyuto dei. ² Wanya radanija makarikuga mbar, yara wanya radanija makarikuga mbare ramu. ³ Wanya makarikuga mbare ramu wo awa yawainye raugav, weramu awa manine meweno mai. ⁴ Yara wanya makarikuga mbare wo awa yawainye raugav muno wo manine rauga tavon ti mamaisy. ⁵ Anya bauname umawe de avave jeben ti wo anyuta marudi, weti mamije maomon ti unaki.

⁶ Namane yasyin umba udani vatane inta gwain pare, ‘Anya bauname de to! Ti wade indamu wapo aovambe!’

⁷ Wanya abusyin umaso unakija usea, wo awa yawainye raindi tetebe. ⁸ Wanya makarikuga mbare jewene wo raura nanto wanya makarikuga mbare mansai ware, ‘Reama yawainye mpamo ti wapo manine inta raunande reansai.’

⁹ Weramu wanya makarikuga mbare umaso wo raura akananto mai ware, ‘Mamaisye ramu, weye manine manakoe ra mo wansamai tenambe ramu. Weti wata no vatano po manine ramavumbe ratuije nai. Umba wapo inta ramavuno arijat.’

¹⁰ Umbawe wanya awa manine mewene umaso wuruta wo manine ramavun. Arono wuruta, anya bauname umawe de kobe, umba wanya awa manine mamai to umaso utavondijo ai usisa ono vauname rai kobe, umba wo unsanda rauguji.

¹¹ Umba wanya makarikuga mbare jewene umawe ude ugwain ware, ‘Injae, Injae, unsanda rausiso reansai!’

¹² Weramu po raura uje mai pare, ‘Syantukambe wasai!’ ”

¹³ Umba Yesus po ananeneae umaso ama ine raura kakavimbe pare, “Maisyare omai ti, syare wasyisyaube muno wapanatatayaube! Weye syakare ama masyote muno ama uma amije mamu wapantukambe rai.”

Ananeneae vatane mandeija wo doije raeranande awa akarije ai
(Lukas 19:11-27)

¹⁴ “Arono Amisye de be akarive Apa kawasae mai no mine vone so omamo raurata ananeneae so rai: Akarije inta pare pusyo ti to no munijo maran, weti po apa vatano wanapatambe aije mawainde, umba po apa ananuge raunanto mai indamu wo raeranande. ¹⁵ Po doije ratodijo mai tetebe, mamaisyo awa vambunine rarijati. Weti apa vatano panapatambe inta pamo po doije vasye ribuge radani raunanto ai inda po raeranande. Muno inta pamo po doije vasye ribuge rurun raunanto ai, muno inta pa ribuge intabo ai.

¹⁶ Umba akarije umaso puje kobe. Vatano po doije vasye ribuge radani rajiare umawe pavave poroto po apa doije umawe rasariraeya miridije nseo no ribuge abusyin. ¹⁷ Maisyare omai tavon, vatano po doije vasye ribuge rurun rajiare umawe po apa doije umawe rasariraeya miridije nseo no ribuge mambisy. ¹⁸ Yara vatano po doije vasye ribuge intabo rajiare umawe poroto po ateme rawae po doije umawe rangkokaibe rai.

¹⁹ Nugoenta rave umba awa akarije umawe pakare. Po apa vatano wanapatambe aije manunugambe akato, pare, ‘Unumeso syare wapo sya doije ranunugambe akare inda syo rator akato.’

²⁰ Umba vatano po doije vasye ribuge radani rajiare umawe de, po doije vasye ribuge abusyin raunande apa akarije ai. Umba po raura pare, ‘Injae, doije vasye ribuge radanijo nyo raunande rinaije omamo syo rasarirae akatoa ribuge radani tavon ti ama manuije mi ribuge abusyin.’

²¹ Umba akarije umawe po raura nanto ai pare, ‘Koe dave! Winyamo sya vatano nyanapatambe rinai ngko dave. Winyi no tawan no nya anakere rai mavabe. Ana mamaun inta syo raunande nai nyo raeranande kobe, weti soamo syo ana manakoe inta raunande nai indamu nyo raeranande tavon. Winda, syare wintavondijo sya one rai indamu wansanayanambe tenambe!’

²² Umba vatano po doije vasye ribuge ruruma rajiare umawe de po raura nanto

akarije umawe ai pare, 'Injae, doije vasye ribuge rurumo nyo raunande rinaije ma syo rasarirae akatoa ribuge rurum ti ama manuije ribuge mambisy.'

²³ Umba akarije umawe po raura nanto ai pare, 'Ko dave! Winyamo sya vatano nyanapatambe rinai ngko dave. Winyi no tawan no nya anakere rai mavabe. Ana mamaun inta syo raunande nai nyo raeranande kobe, weti soamo syo ana manakoe inta raunande nai indamu nyo raeranande tavon. Winde, syare wintavondijo sya one rai indamu wansanayanambe tenambe!'

²⁴ Umba vatano po doije vasye ribuge intabo rajiare umawe de po raura nanto akarije umawe ai pare, 'Injae, syo naen winyamo naemeno vatane maije jeben. Vatano kajijinta wo anakere rajiar, weramu winyamo nyo awa doije rajia tenambe. ²⁵ Weti ijaniv, ti syoroto syo doije vasye ribuge intabo nyo raunande umawe rangkokaibe no kopa ate. Ti Injae, nya doije mi so.'

²⁶ Umba akarije umawe po raura nanto ai pare, 'Winyamo vatano mamun muno nyononae ntapekan! Nyanapatambe rinai kobe jeben! Nyo inatantona nyare vatano kajijinta wo anakere rajiar, weramu risyamo syo awa doije rajia tenambe. ²⁷ Maisyare omai ti, arono syo doije raunande nai, weamo syare nyo raugato ntami no yavaro doije ntuna rajie rai, wirati indamu ama manuije miridije nseo. Inda arono syakare, syo doije umaso raugav muno ama seano miridije nseo ratavon.'

²⁸ Weti akarije umawe po raura apa naite mai pare, 'Wapo doije umawe raugavo vatane wato aora, yara wapo raunanto vatano apa doije vasye ribuge abusyine umawe amarom tavon. ²⁹ Weye are pirati po sya ananuge raeranande kobe, opamo syo kove raunande ai ti manui. Yara are pirati po sya ananuge raeranande kobe jeben, opamo syo apa ananuge raugavo aora. ³⁰ Muno syare vatano panapatambe kobe jeben wato pamo wapo amaugusyo kaumuro marane rai. No ratuije poyov tawan muno siuri tutir.' "

Arono munije ama akari Kristus po vatano ukakainoanive muno vatano kove maosor

³¹ "Arono Risy, Arikainyo Vatan, syakare no mine vono so, weamo ride Sya kovo ntiti rautan, muno naito Amisyete utavondi Rinai tenambe. Arono naije rituna no Sya kursijo titi rai indamu ibe akarive.

³² Umba Syo vatano mine tename so manugan bintabo no Rinamun. Umba Syo maosor maisyare vatane inta po domba nawe kambine nawe maosore wemaisy. ³³ Syo domba mansaveto no inanem ngkov,

yara Syo kambine maveto no inanem ngkakai. Domba maurata irati watano utavondi Injajo Amisyete apa bekere rai, yara kambine maurata irati vatano wonayo Ai.

³⁴ Umba Risy, Akarijo Titi, syo raura nanto vatano una no inanem ngkove mai syare, 'Wade, weapirati Sya Injajo po kove raugaje wasai. Wade wasisa irati Sya munijo ibe akarive rajie rai, wemirati Syo ratayao ntuna mo wasanyut no arono mine so ama manasyin. ³⁵ Weye arono rimaror, wapo anaisyete raunande Syo raisy. Arono inawa ngkangkamandi, wapo mana raunande Syo ramanam. Arono ino no maran ti ide, wapo inaugave siso no wapa yavar. ³⁶ Arono Sya ansune meweno Rinai, wapo ansune inta raunande Syo rave. Arono rigwanen, wade wapo inaeranande. Arono rimakova no tanoano makova ama uga rai, wade wapo inapan.'

³⁷ Umba vatano utavondi Amisyete apa bekere rajie umawe wo raura nande Rinai ware, 'Amisyete winy, nanduija pi wimaror ti reamo anaisyete raunande Nyo raisy muno nawa ngkangkamandi ti reamo mana raunande Nyo ramanam? ³⁸ Nanduija pi reamo naen maisyare vatano no no maran ti de, weti reamo nauga siso no reama yavar? Nanduija pi Nya ansune meweno Nai weti reamo inta raunande Nyo rave? ³⁹ Nanduija pi reamo naen winggwanen ndako, wimakova no tanoano makova ama uga rai rako, weti reamore wamo napan?'

⁴⁰ Umba Syo raura akananto mai syare, 'Tugae, arono wapo ana umaso raunanto Sya arakovo awa tame maje rave mai, omamo maisyare wapo raunande Rinaije wemaisy.'

⁴¹ Umba Risy, Akarijo Titi umaso, syo raura nanto vatano una no inanem ngkakaije mai syare, 'Wapuje inaora! Amisyete apa mangke maje wasai! Wata wasisa no tanamo mbaduro nuge nuanuije rai, namirati ratayao Anakakai Akoe pe apa naite nawe mansai. ⁴² Weye arono rimaror, wapo anaisyete inta raunande ti Syo raisyete ramu. Arono inawa ngkangkamandi, wapo mana inta raunande Syo ramaname ramu.

⁴³ Arono ino no maran ti ide, wapo inauga siso no wapa yavare ramu. Arono Sya ansune meweno Rinai, wapo ansune inta raunande Syo rave ramu. Arono rigwanen dako, rimakova no tanoano makova ama uga rai rako, weamo wapo inaeranande ramu.'

⁴⁴ Umba wo raura nanto Rinai ware, 'Amisyete winy, nanduija pirati reamo naeno maror muno nawa ngkangkamandi muno wino no maran ti nde muno Nya ansune meweno Nai muno winggwanen muno

wimakova no tanoano makova rai, ti reamanapatambe Naije jewen?

⁴⁵ Umba Syo raura akananto mai syare, 'Syo raura tugaive: arono waponayo wapo ana umaso raunanto Sya arakovo awa tame maje rave mai, omamo maisyare waponayo wapo raunande Rinaije wemaisy.'

⁴⁶ Maisyare omai ti, indati vatano ukakainoanive umaso onawamo mangke nuge nuganuije raunanto mai, yara vatano utavondi Amisyere apa bekere rai awave irati kovo nuge nuganuije rai."

26

Akarijo Yahudi wanyinyaube indamu wo Yesu aubaisy

(Markus 14:1-2; Lukas 22:1-2; Yohanes 11:45-53)

¹ Arono Yesu po ayao umawe raurana mewen, umba Po raura nanto Apa arakovo utavondi aije mansai pare, ² "Wadaen masyote rorum akato, umba wansisa Ono Paska rai. Arono naije vatane wo Arikainyo Vatane inaunanto indamu inauseo sawa inyo kapite rai."

³ Umba syeno akokoe utantuna no Yavaro Amisyere rai muno akarijo Yahudi wanugambe no Syeno Titi Kayapas apa yavare ama uga. ⁴ Wanyinyaube indamu wo Yesu aijar muno wo aubaisy. Wo raura ware, "Wade wamo aijar maninimbe. ⁵ Weramu vemo wamo aijar no one ama uga so rai nora, weye vatano wanui indati upari ti usivuiy."

Wanya mo manino mbovove rauvaru Yesu akarije rai

(Markus 14:3-9; Yohanes 12:1-8)

⁶ Arono naije Yesu no no munijo Betania, tuna no Simon apa yavar, wepirati aravure mo ave no wusyinoe. ⁷ Umba wanya inta nde mo hoto no nsasabe inta raugav ntairi jirati manino mbovove rai, ama mangke nseo rave. Arono Yesu pisyisy, wanya umawe mo manine umaso rauvaru akarije vone rai.

⁸ Arono Apa arakovo utavondi aije wo ana namije raen, upari. Weti wo raura ware, "Veanimaibe wanya so mbaono manino mbovove so rai ti mewen? ⁹ Manine so ama mangke nseo rave, weti kove mamo ramavun bayave umba ama doi je raunanto vatano awa ananuge meweno maije mai."

¹⁰ Weramu Yesu po raura mai pare, "Wabeanimaibe wapo wanya so raura ti ranimaumbe? Ama ana mo rajjaro Rinai mamo ngko dave. ¹¹ Vatano awa ananuge meweno maije onawamo una no wapa yasyine rai tutir, weti arono rui wapare wapo maeranande, weamo wapo maeranande kai. Weramu Risyamo rino no wapa yasyin tutire ramu. ¹² Wanya so mo

manine rauvaru Rinai indamu mo inasine ratayao Sya masyote inantuna raije rai. ¹³ Syo raura tugaive: mine vone so rui rui yayave vatane wo Ayao Kovo Amisyere ravov, weamo wo wanya so ama ana ndave raura tavon indamu maemeno rai."

Yudas pare po Yesu amavun
(Markus 14:10-11; Lukas 22:3-6)

¹⁴ Naije Yudas Iskariot, opamo Yesu apa arakovo abusynara eane rorum utavondi aije inta pi je, poroto no syeno akokoe mansai. ¹⁵ Umba po mansanajo pare, "Ani-maisyere mi wapare wapo raunande rinai indamu syo Yesu augore no wasaneme uga rai?" Weti wo doi je ratora nanto no vasye tenamara eane abusyn, umba wo raunanto ai. ¹⁶ Naije kobe Yudas po varore rakani indamu po Yesu amavun.

Yesu apa arakove wo anaisyu Paska ratayao

(Markus 14:12-16; Lukas 22:7-13)

¹⁷ Naije Ono Paska ndea mamaisy, arono vatano Yahudi wo rotijo ragije mewen daije raisy. Arono ama masyote manasyin, Yesu apa arakovo utavondi aije ude Ai wo anajo ware, "Injae, rui rati nyare mbekere reamo anaisyu Paska ratayao Nai?"

¹⁸ Umba Po raura akananto mai pare, "Wasisa no Yerusalem, wapare wananta vatane inta ai, umba wapo raura ai wapare, 'Injajo Kurune pare: Sya masyote ndea mamaisy, weti Risyere Sya arakovo utavondi rinaije nawe reamere wamo Ono Paska rai no nya yavar.' " ¹⁹ Umba Yesu apa arakovo utavondi aije wuruta wo rave mamaisyu Apa ana daura rai, umba wo anaisyu Paska ratayao ti ntuna.

Yesu pe apa arakovo utavondi aije nawe wo anaisyu Ono Paska raisy

(Markus 14:17-26; Lukas 22:14-23; Yohanes 13:18-30; 1 Korintus 11:23-25)

²⁰ Naman kobe, umba Yesu tuna apa arakovo abusynara eane jirume matavon indamu wo anaisyu Paska raisy. ²¹ Arono wisyisy, naije Yesu po raura nanto mai pare, "Syo raura tugaive, weapamo indati inta nyo inamavun nanto Sya marova mansai."

²² Apa arakovo utavondi aije wo ayao umaso ranaun ti manimaumbe rave. Umba nanantabo wo Yesu anajo rai, inta pare, "Injae, risya jewena rako?"

²³ Umba Yesu po raura akananto mai pare, "Are pirati wepe ririmo rotije rayansundijo pauraie intabo rai, opirati po inamavun. ²⁴ Tugae, Risy, Arikainyo Vatan, indati ikakai maisyere muno ratoo no Ayao Amisyere rai. Weramu kakaije nde vatano po Arikainyo Vatane inamavune ai! Weti syere ngko dave mamo vatane wato ano jewen

kai no mine vone so, weamo ngkovo ai weye indati mangke umaso nande aije ramu.”

²⁵ Umba Yudas, napi po Yesus amavun, po anajo pare, “Injayo Kurune, risya jewena rako?”

Umba Yesus po raura pare, “Winy, maisyare muno nyo raura omaisy ivae.”

²⁶ Arono wo anaisye raisy, Yesus po rotije rajjade umba Po kove raura seo Amisy ai. Umba Po raporadi muno Po ratodijo Apa arakovo utavondi aije mai, umba Po raura pare, “Wadaugav wadaisy, somamo inanasine mi som.”

²⁷ Umba Yesus po mokijo angguriye rajjade, umba Po kove raura seo Amisy ai. Umbawe Po raunanto mai, Po raura pare, “Watenambe wadamanam. ²⁸ Somamo Sya mavugo nsororopo vatano wanuije mansai indamu awa ayao kakaije rapaya mai. Sya mavu mo Amisy apa urairijo wanyine raokaisy. ²⁹ Syo raura wasai: indati Syo angguriye inta ramanam akatoe ramu gao Syo angguriyo wanyine ramanamo wasatavon arono Sya Injaya de be akarive Apa kawasae mai no mine vone so.”

³⁰ Umba ukinyo ansyerano ngkangkamane inta rai, umbawe wuruta kobe no Pukamo Saitun.

Yesus daura to pare Petrus indati po amamarave

(Markus 14:27-31; Lukas 22:31-34; Yohanes 13:36-38)

³¹ Umba naije Yesus po raura nanto Apa arakovo utavondi aije mai pare, “Namane so wapo inapaya ti ino ara wanajiv bintabo inaora. Maisyare Ayao Amisy mo ratoe mare, ‘Syo vatano po domba maeranandeye aubaisy, umba apa domba mandamisy ti unanajibe.’” ³² Weramu arono indati ikovakato to, syakare syuisy ti Syo wasanyut no Galilea.”

³³ Umba Petrus po raura nanto Ai pare, “Jewena! Arakovo kaijinta unanajibe kai, yara risyamo syo napaya ramu!”

³⁴ Yesus po raura akananto ai pare, “Syo raura tugaive, namane so mangkuere pana kokebeve rainy, winyamo indati nyo inamamarave susye mandei.”

³⁵ Umba Petrus po raura pare, “Ikakaijo Injae natavon kai, yara syo namamarave ramu!” Umba arakovo kaijinta wo raura tavonare wemaisy.

Yesus sambayambe no Nawaisyo Getsemani

(Markus 14:32-42; Lukas 22:39-46)

³⁶ Naije Yesus pe apa arakovo utavondi aije nawe wanya unanta no nawaisyo wo rawaina ware Nawaisyo Getsemani. Umba Yesus po raura nanto Apa arakove mai pare, “Watantuna no naiso wapo inanyut,

weye syare syoroto no ratuije ra ibe sambayambe rati.” ³⁷ Umba Po Petrus awainde indamu tavondijo Ai, muno Po Yohanesa pe Yakobusa pe, onayamo Sebedeus apa arikainye naya, yawainde tavon. Naije Yesus animaambe muno anuga nseo maje. ³⁸ Po raura mai pare, “Inanuga mpatimu rave maisyare muno syare ikakai kobe vayave wemaisy. Wano no so muno wagwaran inatavon.”

³⁹ Yesus poroto gwaravaindi, umba Po apa vukane ranteter no kopa umba be sambayambe pare, “Sya Injae, wimayar, syare Nyo siurije so raveto inaora. Weramu vemo wintavono Sya bekere rai nora, yara Injae nya bekere bo rai.”

⁴⁰ Naije umba Yesus pakare po Apa arakove mandeije umawe maen unaki. Ti Po raura Petrus ai pare, “Risambayambe uma amije intabo vayave, weramu wagwaran inatavone ramu! ⁴¹ Syare wagwaran muno wasambayambe indamu vemo ana mo wasatopane mo wasakep inya! Tugae, wasanuga mbeker, weramu wasanasino kopa mayondi.”

⁴² Naije akato Yesus pakato be sambayambe akato pare, “Sya Injajo Winy, ranivara siurijo inanto rajje so raveto inaora kakai, weamo syare Injae wibuinya bekere mamaisy.” ⁴³ Arono pakare akato no Apa arakovo mandeije umawe mai, naije Po maen unakija akatoa nene weye mamije maomon dave.

⁴⁴ Weti pakato be sambayambe akatove mandei, Po raura maisyare umawe maisy akato. ⁴⁵ Umba pakare akato no Apa arakovo utavondi aije mai, Po raura mai pare, “Wabeanimai be wanakija nene? Inya! Sya uma amije ndea mamai to, ti soamo Risy, Arikainyo Vatan, inauananto no vatano mamune mansai. ⁴⁶ Wasea, wade ra wanta! Waperata, vatano po inamavune dea pararai to!”

Naito Yahudi wo Yesus aijar

(Markus 14:43-50; Lukas 22:47-53; Yohanes 18:1-11)

⁴⁷ Arono Yesus payaowa nene, naije Yudas de. Opamo Yesus apa arakovo abusyinarana eane rurum inta piye. Vatano wanui wo omake muno kaije raugav utavono Yudas ai. Onawamo syeno akokoe nawe, akarijo Yahudi nawe wo matutir. ⁴⁸ Yudas pare po Yesus amavun, weti po raura wusyimbe irati vatano wanuije umaso mai pare, “Vatano rui pirati syare syo anu, Wepamo napije.” ⁴⁹ Naije Yudas de nande kobe Yesus ai umba po raura pare, “Injajo Kurune, namane ngkovo nai!” Umba po anu.

⁵⁰ Umba Yesu po raura nanto ai pare, “Arakove, animaisye mi winde ra nyo rave, weamo nyo rave kai.”

Umba vatano wanui utavondi Yudas aije wiritidije ude kobe wo Yesu aijar. ⁵¹ Umba naije Yesu apa arakovo utavondi aije inta po apa omake rapatin no ama kokome rai, umba po rave vatano panapatambe syeno titi aije amarikoame raotar ti mpatimu.

⁵² Umba Yesu po raura nanto Apa arakovo utavondi aije umaso ai pare, “Nya omake ramawe akasyo no ama kokome rai, weye are pi pare po omake veano vatane inta aperam, weamo indati vatano kajinta wo aubaisyo omake rai jakato. ⁵³ Syare weananta rai: ranivara Syo sya Injaya anajo ratire, wea indati pavave Po apa naite ribuge wanui rave matutir ude indamu uno inaorai kobe. ⁵⁴ Weramu jeben kai, weye ana nande somamo nande indamu mamaisyo Ayao Amisye mo raurairive wusyimbe rai.”

⁵⁵ Umba Yesu po raura vatano wanuije umawe mai pare, “Risyo vatano mamune inta pi Risye ramu. Ti wabeanimaibe wade irati omake muno kaije rautan indamu wapo inaijar? Masyote anteter rituna syananyaube no Yavaro Amisye ama uga, weramu wapo inaijare ramu. ⁵⁶ Weramu ana so nande indamu mamaisyo urairijo anawae wo ratoe no Ayao Amisye raije rai.”

Naije kobe Yesu apa arakovo utavondi aije wo apaya ti no ara unajita aora.

Yesu te no Anugano Akari Akokoe Yahudi mansamun

(Markus 14:53-65; Lukas 22:54-55, 63-71; Yohanes 18:12-14, 19-24)

⁵⁷ Vatano wo Yesu aijar wo auga ti usisa no Syeno Titi Kayapas apa yavare rai. Naije kuruno makari mbaro Ananyao Musa raije nawe, akarijo Yahudije nawe, wanugan tenambe. ⁵⁸ Petrus po Yesu arijabe ti de siso no syeno titi apa yavare ama wanijate rai. Umba tuna syeno titi apa naite inta matavon indamu po animaisye mi akari akokoe Yahudi wo rapatimugo Yesu aije raen.

⁵⁹ Syeno akokoe muno Anugano Akari Akokoe Yahudi wo vatano wayao angkarive irati Yesu aije mawainde indamu wo aura tantunawi no mansamun, weye ware wo mangke raugaje Ai inda kakai. ⁶⁰ Vatano wanuije inta nawi ude wayao angkarive vayave, weramu awa ayaowe mamaisye ramu. Umba vatane jiruma sayyai no mansamun. ⁶¹ Yo raura yare, “Vatane wato pi po raura pare, ‘Risyo sya vambunine mamaisyo Syo Yavaro Amisy randamisy, masyote mandei umba Syo raijar akaeyo ntet akato.’ ”

⁶² Umba syeno titi seo tet, po raura nanto Yesu ai pare, “Mbeanimaibe irati Nyo ana yo raura nande Naije so raura akanande reansaije jeben?” ⁶³ Weramu Yesu manin bayave.

Umba syeno titi po raura Ai pare, “Syo nanajo Amisyo noa pitawabe Apa tame rai indamu Nyo raura kakavimbe reansai: Winyamo Mesias, Arikainyo Amisye, pi Win dako?”

⁶⁴ Yesu po raura nanto ai pare, “Sya tamo ndanajo mi taune windaura to, ti syare tugae, Risy ivae. Muno Syo raura wasai syare: masyoto makareye indati wapo Risy, Arikainyo Vatan, inae ituna no Amisyo Bambunin Dave anem ngkove rai. Muno wapo inae rino kamuro popere rai no naumo warae ti syaje.”

⁶⁵ Arono syeno titi po Yesu apa ayao umaso ranaun, naije pari rave weti po taune apa ansune rasajam umba po raura pare, “Ee! Vatane so pare po Amisyo no no munijo ntiti amaisi! Weti vemo wamo vatano kaijo wo aura tantunawi mawainde akato nora. Weapamo wasamarikoame mo ranaun to: Taune Po apa ayao kakaije raurawa wadanaun to, pare Opamo po Amisye amaisi! ⁶⁶ Ti wapare?”

Umba akari akokoe Yahudi wo raura akananto ware, “Reamare wamo mangke raugaje Ai indamu kakai.”

⁶⁷ Naije vatane inta wo Yesu amune ranyipube. Muno inta wo anepat, inta wo apoam. ⁶⁸ Umba wo raura nanto Ai ware, “Ranivara Winyamo Mesias wepi Winy, weamo Nyo vatano po nanepate so apa tame raura kakavimbe reansai!”

Petrus po Yesu amamarave
(Markus 14:66-72; Lukas 22:56-62; Yohanes 18:15-18, 25-27)

⁶⁹ Arono naije Petrus tuna no yavare umawe ama wanijate rai, umba wanya arikainyo manapatambe syeno titi aije inta nde mo raura nanto Petrus ai mare, “Winyirati ntavono Yesu vatano Galilea aive tavon.”

⁷⁰ Weramu Petrus po Yesu amamarave no vatane umawe mansamun pare, “Syantukambe nya ana ndaura so rai!”

⁷¹ Umba Petrus poroto te no unsanda wanijate. Naije wanya manapatambe kajinta mo aen akato, umba mo raura nanto vatano una no naije mansai mare, “Vatane sopamo tavondive Yesu vatano Nasaret ai tavone pa.”

⁷² Weramu Petrus po Yesu amamarave akato muno pare, “Tugae rave, syantukambe vatane wato ai!”

⁷³ Nugenta rainya umba vatano usai no we wo raura nanto Petrus ai ware, “Nanamote wato mamomaisyare vatano

Galilea, ti tugae winyamo vatano tavono Yesus aije inta pi winy.”

⁷⁴ Umba Petrus panaamatambe muno po raura pare, “Risyamo syantukambe vatane wato Ai!”

Naije kobe mangkuere kokebe. ⁷⁵ Umba Petrus aemeno Yesus apa ana daura rai pare, “Mangkuere kokebe rainy, indati nyo inamamarave susye mandei.” Umba Petrus puje poyo dave.

27

Yesus aunanto no Gubernur Pilatus ai
(Markus 15:1; Lukas 22:66-23:1; Yohanes 18:28-32)

¹ Awatan ngko dave syeno akokoe nawe, akarijo Yahudi nawe wanugan tenambe, wayao wo rapatimu indamu wo Yesus aubaisy. ² Weti wo Yesus aokaisy, umba wo augaveta wo aunanto no Gubernur Pilatus ai.

Yudas kakai
(Arakov 1:18-19)

³ Arono Yudas, opi po Yesus amavun, po raen wo mangke raugaje Yesus ai, naije animaumbe ti po doiye vasye tenamara eane abusyin umawe raugakare po rauranto syeno akokoe nawe akarijo Yahudi nawe mansai jakato. ⁴ Po raura mai pare, “Risyamo ayao kakaijo syo rave manakoe rave, weye syo vatano ayao kakaije meweno aije amavun ti aubaisy.”

Weramu wo raura nanto ai ware, “Soamo nyayao daijamo taune winy! Reamo naranive ramu, yara taune winya ana ndave ma, weti taune winyi nyo ranawan!”

⁵ Weti Yudas po doiye umaso raugaveto po ramau siso no Yavaro Amisyee ama uga umba poroto po taune apui ti sawa ti kakai.

⁶ Umba syeno akokoe wo doiye umawe ranugan, umba wo raura ware, “Doiye somamo doiyo veano vatane amavun ti aubaisy, weti wama anyayao inta mo raorai mare vemo rator siso doiyo raugasya no bayaijo ntuna no Yavaro Amisyee ama uga ratavon inya.” ⁷ Weti wayao ti wo rapatimu ware wo doiye umaso veano anoke inta ramavun indamu vatano marane mantuna rai. Anoke umaso ama tame rawainamo “vatano po anomane ranari apa anoke mije.” ⁸ Weti wo doiye umawe veano ramavun, wemi mbewar anoke umaso rawain akato no naiso ama tame mi Kopa Mavu.

⁹ Ana umaso nande indamu mamaisyoo Amisyee apa ayao wemirati anawae Yeremia po raura rai pare, “Arono vatano Israel wo Vatane umaso amavun, ware Apa mangke mi doiye vasye tenamara eane abusyin. ¹⁰ Ti umba wo doiye umaso veano vatano

po anomane ranari apa anoke ramavun, maisyare muno Amisyee po inaura raije wemaisy.”[✠]

Yesus te no Pilatus amun

(Markus 15:2-5; Lukas 23:3-5; Yohanes 18:33-38)

¹¹ Yesus pamo te no Gubernur Pilatus amun. Naije Pilatus po anajo pare, “Winyirati Akarijo Titi Yahudije pi Win dako?”

Umba Yesus po raura akananto ai pare, “Risy ivae, mamaisyoo nya ana ndaura wato rai.”

¹² Umba syeno akokoe muno akarijo Yahudi wo ayao kakai rantutibe Ai, weramu Po ana inta raura nakananto maije ramu. ¹³ Pilatus po anajo akato pare, “Mbeanimabe irati Nyo raura akananto mansaije jewen? Nyo raen wo naura tantunawi rave!” ¹⁴ Weramu Yesus po ayao inta raura akananto aije ramu, ti Gubernur Pilatus nantoive Ai.

Pilatus po mangke raugaje Yesus ai indamu kakai

(Markus 15:6-15; Lukas 23:13-25; Yohanes 18:39-19:16)

¹⁵ Arono Ono Paska ndea mamaisyoo, gubernur apa ana po ravevea nsiridi to mamo po vatano tuna no tanoano makova raije inta apaya irati apa mangke rai, vatano rui pirati vatano wanuije wo apatimu. ¹⁶ Arono naije vatane inta apa tame mi Barabas tuna no tanoano makova rai. Vatane wo aen tenambe weye apa ana dave ngkakai rave. ¹⁷ Weti arono vatano wanuije wanugan, weamo Pilatus po manajo pare, “Are pirati wapare syo apaya wasai? Barabasa dako, Yesus wepirati awaino Mesias we dako?” ¹⁸ Pilatus po raenamo akarijo Yahudi wo Yesus aunanto ai weye manuga mamuno Yesus ai weye vatano wanui manayanambe Ai.

¹⁹ Arono Pilatus tuna no kursijo titi rai indamu po mangke rapatimu, naije tavon apa anamu mo nyovara wao inta raude ai mare, “Vemo nyo vatano ayao kakaije meweno aije wato ave tatugadi jinya, weye namanoe inikimarive sya nikimarijo idae-noe mo inavea ijani dave.”

²⁰ Weramu syeno akokoe nawe akarijo Yahudi nawe awa ayao nsiso vatano wanuije mai indamu wo Pilatus anajo indamu po Barabas apaya mai, yara po mangke raugaje Yesus ai indamu kakai. ²¹ Weti arono Gubernur Pilatus po manajo pare, “Vatane jirume sonayamo wapare are pi syo apaya wasai?” naije vatano wanui wo raura ware, “Barabas!”

²² Umba po manajo akato pare, “Maisyare omai ti, animaisyee mirati syo rave Yesus wepirati awaino Mesias ai?”

Umba ugwain tenambe ware, "Auseo sawa inyo kapite rai!"

²³ Umba Pilatus po manajo pare, "Weramu ayao kakaije rui mirati Po rave?"

Umba vatano wanuije ugwain akoeve akato ware, "Auseo sawa inyo kapite rai!"

²⁴ Pilatus po raen apa ana po raura vatano wanuije mansai umaso mamu po raurawa marudija, yara onawamo ware ubera usasiwinyi. Weti po mana inta raugav po veano aneme rarondomo vatano wanuije umawe mansamun, umba po raura nantu mai pare, "Wapare wapo mangke raugaje Vatane so ai indamu kakai, weti syo inaneme rarondom indamu wapo raen ritavondi wasai jewen, yara Apa kakaije mamu taune wapa ana wadave ma!"

²⁵ Umba vatan tenambe wo raura akanande ai ware, "Reame reama arikainye nawe reamo mangkeo Vatane so apa kakaije ranawan kai."

²⁶ Umba Pilatus po Barabas apaya mansai. Yara po naite inta matutiri indamu wo kaijo wajje rave Yesu anepat, umba po aunanto mai indamu wo auseo sawa inyo kapite rai.

*Naito Roma wanaikebe Yesus ai
(Markus 15:16-20; Yohanes 19:2-3)*

²⁷ Gubernur Pilatus apa naite inta wo Yesu augeve siso no apa yavar. Umba wo awa arakovo naite mawainde wanugan tenambe Yesu akiani indamu wanaikebe Ai muno wo ambaon. ²⁸ Wo Yesu apa ansuno no anakea raije raugaje umba wo ansuno nsintair manawadi inta raugasyo Ai ti po rave, maisyare akarijo titi inta po rave ramaisy. ²⁹ Muno wo anansinao maisyare wanyavi ramaisy rauseo rakariwaibe akari rai, muno wo isyoe raunanto Po raijaro anem ngkove rai, maisyare akarijo titi po rave ramaisy. Umba wo vukane ranteter no Amun, muno wanaikebe Ai ware, "Winyirati Akarijo Titi Yahudi pi Winy!" ³⁰ Umba wo anyipube, muno wo isyoe umawe raugav akato veano akarije ranepati tutir. ³¹ Wanaikebe Aija jewen, umba wo ansuno nsintaire umawe raugaje aora umba wo taune Apa ansune raugasyo Ai ti po rave akato. Naije umba wo auga ti wusya indamu wo auseo sawa inyo kapite rai.

*Yesu auseo sawa inyo kapite rai
(Markus 15:21-32; Lukas 23:26-43; Yohanes 19:17-24)*

³² Wanyana unanuije ama yasyin, unanta irati vatano Kirene inta ai, apa tame mi Simon. Umba wo antitidi indamu po Yesu apa inyo kapite ranawan. ³³ Umba unanta no pukame inta rai, ama tame mirati raura ayao Yahudi rajamo Golgota, ama ine mare

Akari Pae. ³⁴ Umba wo anggurije raugav, manino parimane mo rakokoive, wo raunanto Yesu ai indamu Po ramanam. Po kavinta rausuv mamaumbe, weramu ponae Po ramanami.

³⁵ Umba arono naite wo auseo sawa inyo kapite raija jewen, wo aikarae rapatin indamu wo Apa ansune ratodijo taune mansai. ³⁶ Umba utantuna wo aman. ³⁷ Ayao wo rave Yesu akekebe wemirati wo ratoe wo rauseo no inyo kapite ama von no taiso: SOPAMO AKARIJO TITI YAHUDI. ³⁸ Umba wo vatano mamune jiruma yauseo syawa Yesu atavon, inta sawa no anem ngkov muno inta sawa no anem ngkakai.

³⁹ Vatano udetave so wo Yesu aen, makarije rangkiki seo Ai muno wo akaajian. ⁴⁰ Ware, "Winyirati nandija nyare Nyo Yavaro Amisyere randamisy yara masyote mandei Nyo rauseo ntet akato. Weti ranivara Winyamo Arikainyo Amisyere pi Winy, weamo nyaje inyo kapite wato raora indamu Nyo nanasine rapaya kakaije rai."

⁴¹ Maisyare wemai tavon syeno akokoe nawe, kuruno makari mbaro Ananyao Musa raije nawe, akarijo Yahudi nawe wanaikebe Yesu ai. ⁴² Ware, "Opamo po vatano kaijinta mapaya kakaije rai, yara taune anasine mamu Po rapaya rai kakai! Po raurave pare opamo Akarijo Titi Israel pi! Weti ranivara paje inyo kapite wato raora, wea indati wamanave Ai. ⁴³ Opamo panave Amisyere ai muno Po raura pare, 'Risyamo Arikainyo Amisyere pi Risy.' Weti ranivara Amisyere anayanambe Ai, weamo kove mamu Po apaya kakaije so rai!" ⁴⁴ Umba vatano mamune jiruma yauseo syawa atavone yo Yesu akaajian tavon.

*Yesu kakai
(Markus 15:33-41; Lukas 23:44-49; Yohanes 19:28-30)*

⁴⁵ Masyote yasyin dave, uma ami abusyinaro eane jirum, ananamane nande ntamijo munijo we rai tenambe yava uma amije mandei umba ngkarimu. ⁴⁶ Uma amije mandei umba Yesu gwain akoeve, po raura ayao Yahudi rai pare, "Eli, Eli, lama sabakhtani?" ama ine mare, "Syu Amisyere, Syu Amisyere, mbeanimaibe irati nakirive Inai?"

⁴⁷ Vatane inta una no naije wo Apa ayawe umaso ranaun, umba wo raura ware, "Wadanita, Po anawae Elia awain!" ⁴⁸ Vatano no no awa yasyine inta pavave poroto po maimare raugavere umba po raugasyo rayansundijo anggurijo nsaisyine rai. Umba po ransuisyo uvi rai, po rareanse no Yesu awa rai indamu Po rausuv. ⁴⁹ Weramu vatano kaijinta wo

raura ware, “Wade ra wamo aen dati, indati Elia de po apaya kakaije rai jaje rako jewena e?”

⁵⁰ Naije Yesus gwain akoeve akato, umba anawayo karimu, kakai kobe.

⁵¹ Naije kobe kaene nsawa unsanda Yavaro Amisyé ama Tanoano Ndandini Dave raije mamo nsaram no vone warae masyo no ate waraya mbe rurumbe. Mungki ravari ti orame mpaporainy.

⁵² Muno aipapo mpaporainy umba vatano wanui wanave Amisyé ai no wusyinoe mansanasine ngkovakato.

⁵³ Vatano ugwenene umaso wuje awa aipapo umaso raora arono Yesus kovakato, umba usisa no Yerusalem ti vatane wanui wo maen.

⁵⁴ Arono nait akari Roma pe, apa naito nanawirati wo Yesus amane nawe, wo mungkije muno anakotaro nande umawe raen, umba ujani dave, ware, “Tugae rave, sopamo Arikainyo Amisyé pi sop.”

⁵⁵ Naijeamo wanya wanuije inta wo ana umawe raerato waravaimbe. Onawamo utavondijo Yesus ai muno wanapatambe Ai no Apa unanui anya rai no arono puje Galilea raora. ⁵⁶ No awa yasyine umasoamo Maria Magdalena, muno Maria kaijinta, omamo Yakobusa pe Yusupa pe aya akoya, muno Sebedeus apa arikainye aya akoya me nao.

Yesus antuna

(Markus 15:42-47; Lukas 23:50-56; Yohanes 19:38-42)

⁵⁷ Masyote ndea mare ngkaumu kobe, umba vatano apa ananuge manui rave inta de, apa tame mi Yusup, no no munijo Arimatea. Opamo vatano tavondijo Yesus ai tavon. ⁵⁸ Vatane umaso de no Pilatusa nui indamu po Yesus anasino kopa ranajo. Umba Pilatus po apa naité matutir indamu wo Yesus anasino kopa raugaje wo ruananto ai. ⁵⁹ Weti Yusup po Yesus anasino kopa raugav, umba po ansuno mpopero nsauaman veano akepan. ⁶⁰ Umba po antuna no taune apa aipapo wanyino oramo ratotove rai. Po oramo manakoe inta raroaya usya ntuna aipapo ama unsanda raora, umba poroto. ⁶¹ Maria Magdalena me, Maria kaijinta me, jantuna yamumbe nanto aipapo umaso ama unsanda rai.

Naité wo Yesus apa aipapo raman

⁶² Simambe, masyoto sambaya rai, umba syeno akokoe nawe vatano Parisije nawe wanugan usisa usai no Pilatusa amun.

⁶³ Umba wo raura ware, “Injae, reansae-men arono Yesus ta noa nene Po vatane maponae Po raura pare indati masyote mandei, weamo Opamo kovakato no wene rai. ⁶⁴ Maisyare omai ti, reamare nyo naité matutir indamu wuruta wo aipapo ama unsanda raman. Vemo Apa arakovo

utavondi aije inta ude wanaonoambe anasino kopa rai nora muno wo raura vatane mai ware Yesus kovakato no wene rai to, wenora! Weye ranivara wo raura tai maisy, wea indati awa angkarijo wo raura rijabe manakoe rave.”

⁶⁵ Umba Pilatus po raura akananto mai pare, “Wapa naité nawi so, weti wata wapo aipapo ama unsanda raman kobe rave.”

⁶⁶ Weti wuruta wo kamane raunanto ama unsanda rai indamu vemo vatane inta po ransop usya nora, umba wo raura nanto naité umawe mai ware, “Wapo raman kobe rave yo!”

28

Yesus kovakato

(Markus 16:1-11; Lukas 24:1-12; Yohanes 20:1-10)

¹ Arono masyoto sambaya mewen ti ari Minggu ama awatan ngko dave akane ntipu, naije Maria Magdalena me, Maria kaijinta me yurija yo Yesus apa aipapo raen.

² Kavuratawe mungkijo akoe inta ravari, weye naito Amisyé inta no no munijo ntití paje, umba de po oramo unsanda aipapo umawe raroyar umba seo tuna ama vone rai. ³ Naito Amisyé umaso ba dave, maisyare ivake wemaisy, muno apa ansune mamó mpope dave. ⁴ Naito wo aipapo ramane umawe ujani dave ti ututar, umba mamune ngkaumudi ti utatayaje utavai no min, maisyare vatano ukakai to mansamaisy.

⁵ Umba naito Amisyé umawe po raura nanto wanya umawe yai pare, “Vemo ijaniv inya. Syo raen ipo Yesus akani, Wepirati auseo sawa inyo kapite rai to. ⁶ Soamo norije ramu, yara kovakato to maisyare arono wusyinaro Po raurave wemai to. Weti ide ipo Apa aipapo tami raije raeni so. ⁷ Weti ipavave ipakata ipo raura Apa arakovo utavondi aije mai ipare, ‘Soamo Yesus kovakato no wene rai to! Opamo puisya to no Galilea rai to. Ti wata no ratuije umba wapo aen.’ Syare isaemeno sya ana syo raura so rai.”

⁸ Wanya umaso yavave yo aipapo rapaya ti no. Onayamo ijani dave weraman yanayanambe rave tavon, weti yansanan yakare indamu yo raura Yesus apa arakovo utavondi aije mai. ⁹ Kavuratawe Yesus nande wanya umaso yai, Po raura pare, “Awatane ngkovo isai.” Umba je yararaijo Ai, yo vukane ranteter no Amun muno yo ajoe raijar indamu ibeaje Ai. ¹⁰ Umba Yesus po raura nande yai pare, “Ijaniv inya, yara ipakata ipo raura Sya arakove mai inda wuruta no Galilea, umba wo inaen no ratuije.”

Syeno akokoe muno akarijo Yahudi wo doije raunanto naito wo aipapo ramane mai indamu wayao angkarive

¹¹ Wanya umaso ija to, umba naito wo aipapo ramane umawe inta wakare no Yerusalem, wo anakotaro nande tenambe umaso raura syeno akokoe mansai. ¹² Weti syeno akokoe nawe akarijo Yahudi nawe wanugan indamu wayao rai. Umba wo rapatimu ware wo doijo manui raunanto naite umawe mansai indamu vemo wo Yesu apa kovakatoe raura inya. ¹³ Weti wo raura naite umawe mai ware, “Reamare wapo raura no taiso wapare, ‘Ama namanoe Yesu apa arakovo utavondi aije ude wo Yesu anasine ranaonoambe no arono reanaki.’ ¹⁴ Ranivara Gubernur Pilatus po ana umaso ranaun ti pariyo wasai pare wapo Apa aipapo raman kobe jeben, weamo indati reamo gubernur anuga raugabe indamu vemo po mangke raugaje wasai jinya.” ¹⁵ Weti naite umawe wo doijo uma wo raunandeowe raugav, umba ubeta awa ana wo matutiro raije rarijati. Weti wo ayao Yesu anasine ranaonoambeye umaso ravovo vatano Yahudi mansaija ndea unumeso.

Yesu po apa arakove matutir uta wo Ayao Kove ravovo no rui rui vayave

¹⁶ Weti Yesu apa arakovo abusyinara eane intabo utavondi aije wuruta no Galilea, umba usea unato uma Yesu po matutir uta raijoe rai. ¹⁷ Umba wo aen no ratuije, weti wo vukane ranteter no Amun muno ubeaje Ai, weramu inta nawamo manuga mamaundive Ai weye wanave kobe jeben. ¹⁸ Umba Yesu de pararaijo mai, Po raura nanto mai pare, “Injayo Amisye po vambunine raunande Rinai indamu ibe akarive no munijo ntiti muno mine vone so rai tenambe vintabo. ¹⁹ Maisyare omai ti, Syo wasatutir wata no rui rui vayave indamu wapo vatane kotaro ntuna no mine so rai mansanyao tenambe indamu utavondijo Rinai. Muno wapo maugasyo kuvuni mana raijo Injayo Amisye apa tame rai muno Apa Kavo tame rai muno Anawayo Vambunine ama tame rai. ²⁰ Muno wapo manyao indamu ubeta Sya ananyao syo raugaje wasai to rai tenambe. Tugae rave, ituna wasautan tutira ntoa munije ama akari.”

Ayao Kovo Amisy MARKUS

Ananyao Yohanes Pembaptis

(Matius 3:1-11; Lukas 3:2-16; Yohanes 1:19-28)

¹ Somamo Ayao Kovo mo Yesus Kristus, Arikainyo Amisy, aura. ² Arono wusyinoe anawae Yesaya po ratoe no apa bukuge rai no taiso:

“Amisy po raura pare,

‘Sopamo vatano Syo atutire pi so.

Syo atutir puisy manasyimbe Sya Mesias winai

indamu po unanuije ratayao Nai.’ ”*

³ “Vatane inta ugwaimbe no nugo vabukane vono

maninimbe pare,

‘Wapo unanuije ratayao irati Amisy ai,

wapo ratayao da nsarokir inda panya rai.’ ”*

⁴ Vatano ayao umaso mo aura opamo Yohanes Pembaptis, wepirati poroto no nugo vabukane vono maninimbe indamu po ayao Amisy ravov. Po vatane mansanyaube pare, “Wasakinav irati wapa ayao kakaije rai muno wade ramu syo wasaugasyo kuvuni mana rai indamu Amisy po wapa ayao kakaije rapaya wasai.” ⁵ Vatane wanui rave ude no Yohanesa nui. Vatano una no Yudea ama munije rai tenambe muno vatano una no Yerusalem, ude tenambe wo apa ayao raraniv. Wo awa ayao kakaije raura Amisy ai, umba Yohanes po magasyo kuvuni no mana Yordan rai.

⁶ Yohanes umaso pamo po unta apa ananemane rave ansambe, muno po sapije apa kea rave tarandimbe. Apa ana daisy mamomo kao syankerem muno po anyauene ama mana ramanam tavon. ⁷ Po ayaowe so raura pare, “Risuyisy yara Napi po inarija deye Opamo panakoe irati inakivan, weti Apa waijo nowo ajo kokome raije mamomo syo rapaya kakai weye risyamo imamaisy ramu. ⁸ Syo wasaugasyo kuvunijo mana rai, yara Wepi po Anawayo Vambunine ratutir maje wasai.”

Yohanes Pembaptis po Yesus augasyo kuvuni mana rai

(Matius 3:13-17; Lukas 3:21-22; Yohanes 1:32-34)

⁹ Arono naije, Yesus no no munijo Nasaret no no Galilea, de no mana Yordan, umba Yohanes po augasyo kuvuni mana rai. ¹⁰ Weti Yesus no no mana uga tipuga akaeyo, umba peraseo Po

naume raen nsaneka, umba Po Anawayo Vambunine raeno majeo Aiji maisyare insanijo punamoe. ¹¹ Umba danito Po Amisy anamote ranaun, ngkinde no no munijo ntiti mare, “Winyamo Sya Arikainyo inanga no Nai. Inanayanambe Nai rave.”*

Anakakai Akoe po Yesus aponae

(Matius 4:1-11; Lukas 4:1-13)

¹² Naije kobe Anawayo Vambunine mo Yesus atutir to no nugo vabukane vono maninimbe. ¹³ Yesus no no naije masyote tename jirum, muno Anakakai Akoe de po aponae. Anakotaro mamun maisyare make sivuiny una tavon no naije, weramu naito Amisy wo Yesus aeranande.

Yesus po vatane mambisy mawain indamu utavondi Ai

(Matius 4:18-22; Lukas 5:1-11)

¹⁴ Arono Akarijo Titi Herodes po Yohanes Pembaptis aijar ausiso no tanoano makava rai, umba Yesus poroto no Galilea indamu Po Ayao Kovo Amisy raura. ¹⁵ Pare, “Masyoto Amisy de be akarive Apa kawasae mai no mine vone so nandea mararai to. Weti wasakinav irati wapa ayao kakaije rai, muno wapanave irati Ayao Kovo Amisy so rai!”

¹⁶ Arono Yesus panya no onae tuga Galilea, Po vatano ibe arakobe inta yaen, aya tame mi Simona pe apa rijato Andreasa pe nai. Yo pame raveano jiane rakani no onae. ¹⁷ Yesus po raura nande yai pare, “Ide, itavondi Rinai! Indati Syo risanyo indamu ipo vatane makani tavon.” ¹⁸ Naije kobe yo pame rapaya ti ntuna umba javondijo Yesus ai.

¹⁹ Yesus panya kobe, umba Po vatano ibe arakobe kajinta yaen akato, aya tame mi Yakobus muno Yohanes, wenayamo Sebedeus apa arikainye naya. Jantuna no nyomane uga yo pame ranabe. ²⁰ Naije kobe Yesus po yawain, weti yo aya ajae Sebedeus apaya tuna no nyomane umaso rai, muno vatano aja po mavae inda wo apa anakere inta rajiare mansautan. Umba javondijo Yesus ai.

Vatano anawayo kakaije siso ai

(Lukas 4:31-37)

²¹ Yesusa pe apa arakovo utavondi aije nawe usisa no munijo Kapernaum. Arono masyoto sambaya rai, Yesus siso no Yahudi awa yavaro sambaya ama uga, umba pananyaube vatane mai. ²² Vatano wanuije umaso unantaive Yesus apa ananyaowe rai, weye Po mansanyao vambunimbe. Muno Apa ananyaowe nsasyeo kuruno Yahudi awa rai, weye Yesus po vatane mansanyao

maisyaare akari apa vambunine no irati ai amaisy.

²³ Arono naije vatano anawayo kakaije no aije inta siso tavon no yavaro sambaya rai, umba punanto pare, ²⁴ “Winyi Yesus, vatano Nasaret, animaisye mi Nyo rave reansai? Nyare nde ra Nyo reansaubai dako? Reamo naen: Winyamo Vatano Kakavimbe Amisye po natutire pi Winyi!”

²⁵ Yesus soowato anawayo kakaijo nsiso vatane umaso aije rai pare, “Manin! Nyuje vatane so aora!”

²⁶ Naije kobe anawayo kakaije munanto muno mo vatane umaso aveti tutar dave, umba muje vatane umaso aora kobe. ²⁷ Vatano wanuije so unantaive rave, ti wo raura vambinibe mai ware, “Wakoe! Apa ananyao wanyine so mbambunin dave! Arono Po anawayo kakaije matutir, weamo wuje vatane maora kobe, mamaisyo Apa ana po raura rai!” ²⁸ Weti wo ayao Yesus ravovo ti nto no propinsijo Galilea raito tenambe.

Yesus po saumane raunanto vatane wanui mansai

(*Matius 8:14-17; Lukas 4:38-41*)

²⁹ Yesusa pe wuje yavaro sambaya raora ti to no Simon Petrusa pe Andreea pe aya yavar. Muno Yakobusa pe Yohanesa pe javondijo mai tavon. ³⁰ Simon Petrusa apa anumam nggwanen, ranakea mamooan ti niki. Weti vatane wo ama wanene raura Yesus ai. ³¹ Weti Yesus poroto no ama niki ri umba Po raneme rajjar muno Po rajjaseo. Naije kobe ranakea nsauman, ti nseo mo anaisye ratayao indamu wo raisy.

³² Namandijo uma pasyo kobe, umba vatane wo vatano ugwanene nawe, vatano anawayo kakaije siso maije nawe, maugavere vintabo no Yesusa nui. ³³ Vatano una no munijo Kapernaum wanugande vintabo no yavare umawe ama repon. ³⁴ Umba Yesus po saumane raunanto vatane wanui mai, onawamo ujjoramo wanene kotare rai. Muno Po anawayo kakaije mawatano vatane wanui mansaora, weramu Po anawayo kakaije umaso maorai inda vemo wo raura inya, weye wo aen Opamo Mesiasa piye.

Yesus pananyaube no Galilea
(*Lukas 4:42-44*)

³⁵ Siman awatan ngko dave, Yesus nikija seo, umba poroto no nugo maninimbe indamu be sambayambe. ³⁶ Weramu Simon Petrusa pe apa arakove nawe wuruta wo akani. ³⁷ Arono nanta Ai, wo raura nanto Ai ware, “Vatan tenambe wo nakanija!”

³⁸ Weramu Yesus po raura nande mai pare, “Wade ra wanta no munijo kaijo mararaje so rai. Syare syo ayao Amisye

raura tavon no ratuije, weye wemi mbe-waramo ide no mine vone so.” ³⁹ Weti Yesus panya propinsijo Galilea raita, pananyaube no Yahudi awa yavaro sambaya rai, muno Po anawayo kakaije mawatano vatane inta mansaora.

Yesus po saumane raunanto vatano aravure mo ave ai

(*Matius 8:1-4; Lukas 5:12-16*)

⁴⁰ Vatano aravure mo ave ai inta de no Yesusa nui. Umba po vukane ranteter no Amun, po raura pare, “Injae, winyare mayar, syare Nyo saumane raunande rinai.”

⁴¹ Yesus aemeno vatane umaso ai, weti Po aijar, Po raura nanto ai pare, “Rimayar, ti syare winsauman.” ⁴² Naije kobe apa wanene umaso raumandi ai ti sauman kobe.

⁴³ Umba Yesus po atutir poroto muno Po aorai pare, ⁴⁴ “Vemo ndaurao vatane mai jinya. Yara nyoronto no syeno tuna no Yavaro Amisye rajje ai, nyo nanakea rarorono ai indamu po raen winyamo sauman to. Umba nyo anakotare raugare rame-seo Amisye ai inda mamaisyo Musa apa ananyaowe rai.” ⁴⁵ Indati vatan tenambe wo raen tugae Amisye po saumane raunande nai to.”

⁴⁵ Weramu vatane umaso poroto po apa saumane ravovo, weti vatane wanui ubekero ware wo Yesus aen. Weti Yesus siso munije ama uga rai kakai, yara no no marano maninimbe. Weramu vatano wanui una no rui rui vayave wo akani ti ude Ai.

2

Yesus bambunin po ayao kakaije rapaya vatane mai no mine vone so

(*Matius 9:1-8; Lukas 5:17-26*)

¹ Masyote inta umba Yesus pakare no munijo Kapernaum. Apa de to ngkin ti vatane udanaun ware de no yavare to. ² Umba vatano wanuije wanunugambea yavare ngkatutundi, ti unsanda we ntairi vatane mai. Umba Yesus po ayao Amisye raura mai. ³ Naije vatane mam-bisya wo vatano tunaive inta augaje nikiyo pata rai, umba wo anawanere no Yesusa nui. ⁴ Weramu wararajjo usisa Ai kakai, weye vatane wanui rave no ratuije. Weti usea wo manyumo tatije ransodeto no Yesus tuna seo ri, umba wo vatano tunaive umaso airidijasyo apa tanije rautan. ⁵ Arono Yesus po awa anave raen manakoe, Po raura nanto vatano tunaive inta manake ai pare, “Arikainyo winy, Syo nya ayao kakaije rapaya nai to.”

⁶ Kuruno Yahudi inta utantuna no naije tavon, uparijo Yesus ai weye wo ratantona

no manuga rai ware, ⁷ “Ee! Veanimaibe Po rauranare wemaisy? Po rakarae pare Po ayao kakai rapaya maisyare Amisy e amaisy! Weramu Amisy bo pi mamaisyo Po ayao kakaije rapaya vatane mai, weti Yesus sopamo pangkarivea!”

⁸ Naije kobe Yesus po awa ana wo ratantona raen no manuga rai, ti Po raura pare, “Wabeanimaibe wapo kakaije ratantona no wasanuga rai? ⁹ Syare syo vatane so apa ayao kakaije rapaya ai, weamo wapo ratantona wapare rimamaisy ramu. Wapan-tukambe Sya vambunine rai ti wapanave ramu. Weramu Syo anapaporainye inta raroron, indati wapo Sya vambunine raen kakavimbe. ¹⁰ Weti syare Syo saumane raurananto vatane umaso ai indamu wapo raen wapare Risy, Arikainyo Vatan, ribambunin syo ayao kakaije rapaya no mine vone so.” Umba Yesus po raura nanto vatano tunaive umawe ai pare, ¹¹ “Mbeseo! Nya tanije rauga da nin kai.”

¹² Naije kobe vatano tunaive umaso seo tet, po apa tanije raugav ara de pusyo kobe. Vatano wanuije wo raen, ti unantaiwe rave muno wo Amisy ararimbe. Wo raura ware, “Wakoe! Reamo anapaporainye raembeamo inta maisyare somaisy ramu.”

Yesus po Lewi awain

(Matius 9:9-13; Lukas 5:27-32)

¹³ Yesus pakare no nayave vono onae Galilea. Vatano wanuije ude Ai, umba Po manyao. ¹⁴ Umba panya pananave no naije, Po vatano po pajak ranugande akarijo pemerinta aije inta aen, apa tame mi Lewi,* Alpeus apa arikainy. Opamo tuna no apa tanoano pajak rai. Yesus po awain pare, “Winde tavono Rinai!” Umba Lewi seo, pusyo ti tavondijo Ai.

¹⁵ Arono Yesus pisyi no Lewi apa yavar, vatano wo pajak ranugande akarijo pemerinta aije wanui ude, muno vatano ayao kakaije no maije wanui ude tavon, weye vatano maisyare so wanui rave utavondijo Yesus ai. Wisyisyo Yesusa pe apa arakovo utavondi aije nawe matavon. ¹⁶ Weramu kuruno makari mbaro Ananyao Musa rai nanawirati usisa varoro Parisi raije inta wo Yesus aen pisyisyo vatane umaso matavon. Umba wo raura nanto Apa arakovo utavondi aije mansai ware, “Veanimaibe wapa kurune pisyisyo vatano wo pajak ranugande akarijo pemerinta aije nawe, vatano ayao kakaije no maije nawe matavon?”

¹⁷ Yesus danito po awa ana wo raura we ranaun, umba Po ananeneae inta raura pare, “Vatano saumane pamo bekero

anawae aije ramu, yara vatano gwanene pirati bekero anawae ai. Maisyare omaisy, are nawirati wo ratantona ware awa ayao kakaije meweno mai onawamo Syo mawaine ramu. Yara ride indamu Syo vatano awa ayao kakaije no maije mawain indamu awaura irati kove rai.”

Veanimaibe Yesus apa arakove matawandijo marore rai jewen

(Matius 9:14-17; Lukas 5:33-39)

¹⁸ Masyote inta Yohanes Pembaptis apa arakovo utavondi aije nawe, vatano Parisi nawe matawandijo marore rai indamu ube sambayambe. Yara Yesus apa arakove wisyisy. Umba vatane inta ude no Yesusa nui umba wo anajo ware, “Veanimaibe irati vatano utavondi Yohanes Pembaptis aije nawe, vatano utavondi Parisi mansaije nawe matawandijo marore rai, yara vatano utavondi Injae naije nawamo jewena e?”

¹⁹ Umba Yesus po ananeneae so raura nanto mai pare, “Ono vauname inta, vatano utavondi rai manayanambe weye anya bauname tuna matavon, weti matawandijo marore raije ramu. ²⁰ Weramu masyoto makareye, anya bauname umaso pamo augavo maora, weti arono naije vatane umawe matawandijo marore rai.”†

Yesus apa ayao wanyine nsasyeo vatano Parisi awa ayao wusyine rai

²¹ Umba Yesus po ananeneae kaijinta raura pare, “Ranivara vatane inta po ansune vasyeo wanyine rakasyoto ansuno wusyino mpatimuge rai, weamo mamaisy ramu, weye ansune vasyeo wanyine mo ansuno wusyine rapatimu ti nsaram akoeve rave kobe.

²² Muno vatane wo awijo wanyine raurarasyo karoa ugami wusyine rai, weamo mamaisy ramu. Weye awijo wanyine umaso ntipu akoeve ti mo karoa mbe wusyimbe umaso rapatimu ti ngkakai, muno awije mbuvar kobe. Yara awijo wanyine mamo raurarasyo no karoa ugami wanyine obo rai, wea umba mamaisy.”

Parisije wo Yesus apa arakove maura tantunawi weye wo kasyambo rakasyin no masyoto sambaya rai

(Matius 12:1-8; Lukas 6:1-5)

²³ Arono masyoto sambaya inta rai, Yesus de siso panya no nawaisyo kasyamber ama uga rai. Apa arakovo utavondi aije wanya autan muno wo kasyambere rakasyin. ²⁴ Weramu vatano Parisi wo raura nanto Yesus ai ware, “Veanimaibe Nya arakovo utavondi naije wo kasyambere rakasyin no masyoto unumeso? Weye Yahudi wama

* 2:14 Apa tame rawain tavonomo Matius. † 2:20 Yesus aurata irati anya bauname umaso ai.

ananyao mare vemo wamo anakere raijar no masyoto sambaya rai jinya!”

²⁵ Umba Yesus po raura akananto mansai pare, “Wabeanimaibe wananta Ayao Amisyeye raije jeben? Syare wasaemen animaisyey mi mo ratoy mare aneno Daud po rave arony wepe apa arakove nawe umaror, muno awa anaisyey meweno mai. ²⁶ Opamo siso no Yavaro Amisyey ama uga rai arony Abiatar be syeno titive, umba po rotijo raunanto Amisyey aije raugav ti po raisy, umba po raunanto apa arakove mai tavon ti wo raisy. Weramu Musa apa ananyao inta mare vemo vatan bayave wo raisy inya, yara syene bo nawi wo raisy.”

²⁷ Umba Yesus po raura nanto mai pare, “Abo! Wapa ananyao wapo rarijat mangke dave! Amisyey po vatane manari indamu utavondi ananyao masyoto sambaya rai oma jewena! Yara Po masyoto sambaya rapatimu indamu ngkovo vatane mai. ²⁸ Weti Risy, Arikainyo Vatan, ribe akarive masyoto sambaya rai.”

3

Yesus po saumane raunande vatano jorame ai no masyoto sambaya rai
(Matius 12:9-14; Lukas 6:6-11)

¹ Masyoto sambaya inta, Yesus siso no yavaro sambaya inta ama uga. Vatano aneme rani nsawa inta no no naije tavon. ² Weti vatano Parisijey inta wo Yesus anyanyuti tutira ware tugaeya rako Po saumane raunande arony masyoto sambaya raija rako? Weyey wo Apa ayao kakaijey rakani indamu wo aura tantunawi.

³ Umba Yesus po raura nanto vatano aneme rani nsawa umawey ai pare, “Windento nte no usyey so.” ⁴ Umba Yesus po raura nanto vatano una no we mansai pare, “Syare syo wasanajo rati. Mamaisyoy wama ananyao raijamo, rui mirati wamo rave no masyoto sambaya rai: Wamo ana ngkove rave rako, ngkakaijey mi wamo raveyey? Wamo vatane mapaya irati kakaijey rai rako, wamo maubaisyey?” Weramu vatane umanin bintabo. ⁵ Yesus po maen tenambe, pari. Muno animaumbe tavon weyey manuga matu. Umba Po raura nanto vatano aneme rani nsawa umawey ai pare, “Nanemey raojaito!” Umba vatane umawey po anemey raojaito, naijey kobe anemey nsauman. ⁶ Umba vatano Parisijey wujey yavaro sambaya raora, umba wavave wo vatano usisay varoro Akarijey Titi Herodes aijey mawain indamu wanyinyaubey tenambe, ware wo Yesus aubaisyey.

Yesus pananyaubey muno Po saumane raunanto vatano ujaforamey mai

⁷ Yesusa pe apa arakovo utavondi aijey nawey wujey wurutay no onay tuga Galileya, muno vatano Galileya wanuy rave utavondi. Muno vatano una no Yudeya wanuy udey Ai tavon, ⁸ muno vatano una no Yerusalem, vatano una no Idumeya, vatano una no ranijoy muramoy mana Yordan, vatano una mararaijey munijoy Tirus muno munijoy Sidon. Vatane umasoy udey no Yesusa nuy weyey wo Apa anapaporainyey ranaun. ⁹ Vatane soy wanuy rave, wetivay Yesus po apa arakovo utavondi aijey matutir wo nyomane inta ratayoy Ai indamuy seoy tuna ama voney rai, inda vemo vatano wanuijey wo akikipiy jinya. ¹⁰ Weyey Po saumane raunanto vatano ugwaney wanuy mansai to, weti vatano ugwaney kaijintay udey Ai, wo akikipiy weyey ware ubekery wantukamoy Ai. ¹¹ Vatano anawayoy kakaijey siso maijey udey tavon. Arony anawayoy kakaijey umasoy wo Yesus aen, ubeajey no Amun umba ugwain ware, “Winyamoy Arikainyoy Amisyey pi Winy!” ¹² Weramu Yesus po anawayoy kakaijey umasoy maorai indamuy vemo wo aura kakavimbey inya.

Yesus po apa arakovo abusyinara eaney rurum mawainde
(Matius 10:1-4; Lukas 6:12-16)

¹³ Umba Yesus seoy no pukamey inta rai, umba Po vatano bekero maijey mawain, weti udey Ai. ¹⁴ Umba Po vatane abusyinara eaney rurum mapatimuy, pare, “Weapamoy Sya arakovo syoy wasatutiray nawi weap. Syoy wasawain indamuy watavondi Rinali, muno Syoy wasatutir indamuy wapo Ayao Kovo Amisyey rauray vatane mai. ¹⁵ Muno Syoy vambuninay raunandey wasai indamuy wapo anawayoy kakaijey mawatan.”

¹⁶ Weti Yesus apa arakovo mansano abusyinara eaney rurum awa tamey mi som:

Simon (apa tamoy Yesus po rauray tavonay Petrus),

¹⁷ Yakobus,
apa rijatoy Yohanes

(wenayamoy Sebedeus apa arikainyey naya,

weramuy Yesus po yawainamoy Boanerges, ama iney mare “arikainyey kati-tir”),

¹⁸ Andreas,

Pilipus,
Bartolomeus,

Matius,

Tomas,

Yakobus (Alpeus apa kavoy pijey),
Tadeus,

Simon (opi awainamoy vatano Zelot),

¹⁹ Yudas Iskariot (opi po Yesus amavun).

Yesus apay vambunin muno Anakakai Akoe apay vambunin
(Matius 12:22-32; Lukas 11:14-23, 12:10)

²⁰ Umbawe Yesus pakato no yavar. Naije vatano wanuije ude wanunugambe akato, weti Yesusa pe apa arakovo utavondi aije nawe wisyisye ramu. ²¹ Arono Apa yavaruga wo ana umaso ranaun, wo raura ware, “Yesus be anaivea rako?” weti wuruta ware wo augav.

²² Kuruno makari mbaro Ananyao Musa rai inta una no Yerusalem ude, umba wo raura ware, “Akarijo anawayo kakai, apa tame mi Bersebur,* siso Yesus ai to, weti wepi po vambunine raunande Ai indamu Po anawayo kakaije mawatambe!”

²³ Yesus po mawain ude mararai, umba Po ananeneae inta raura nanto mai. Pare, “Anakakai Akoe po taune mawatano vatane maora kakai. ²⁴ Ranivara munije inta ama vatane maporabe jirum ti inta umarovave inta mai, wea umba munije umaso mandamisy. ²⁵ Muno ranivara yavaruga maporabe jirum ti inta umarovave inta mai, wea umba mandamisy tavon. ²⁶ Anakakai Akoe apa munijo be akarive raije maisyare wemai tavon. Ranivara Anakakai Akoe pe apa anawayo kakaije nawe maporabe jirum ti taune umarovave taune mansai, weamo apa munijo be akarive rai noa nugoenta ramu, yara mandamisy. ²⁷ Syo ananeneae inta raura: Ranivara vatano panaonoambe inta siso vatano bambunine apa yavare rai, weamo po vatane umaso aneme ajoe raokokai dati, umba po apa ananugo yavarugawe raugavo aora tenambe. Anakakai Akoe aurata irati vatano bambunine umaso ai, muno Risyamo syo apinde to, wemi mbewar Syo anawayo kakaije mawatan.

²⁸ Syo raura tugaive: vatane awa ayao kakai rui vayave muno awa ayao wo Amisyae aura tantunawi, Amisyae pare po rapaya mai arono usakinavo rai. ²⁹ Yara are pirati po Anawayo Vambunine raura tantunawi, opamo Amisyae po apa ayao kakaije umaso rapaya aije ramu. Yara Apa pariye no aija nuge nuganui.” ³⁰ Yesus po rauranare wemaisy, weye vatane umawe wo raura ware, “Yesus opamo anawayo kakaije siso Ai to.”

Yesus apa akoya me Apa rijate nawe ude Ai

(Matius 12:46-50; Lukas 8:19-21)

³¹ Umba naije Yesus apa akoya me Apa rijate nawe ude usai no yavare akirije umu. Umba wo vatane inta atutir ware po Yesus awain inda puje. ³² Vatane wanui rave utantuna Yesus akiani, ti inta wo raura nanto Ai ware, “Nya ingkoa me Nya rijate nawe

usai no akiri umuga ware ubeker indamu wo naen.”

³³ Yesus po raura nanto mai pare, “Are nawirati Sya akoe, Sya arakove waino mansai?” ³⁴ Umba sarirae ara Po raura nanto vatano utantuna akianije mansai pare, “Sya ingkoa me Sya arakove wenawi utantuna so, ³⁵ weye vatano anya, wanya utavondijo Amisyae apa bekere raije wenawirati Sya akoe waino mai muno Sya arakove waino mai.”

4

Ananeneae yo vatano po iru kamije rangkiki

(Matius 13:1-9; Lukas 8:4-8)

¹ Yesus pananyaube no onae tuga Galilea. Umba vatano wanui rave ude Ai wo akikipi, weti Yesus seo tuna no nyomano mampaya no onae umawe inta ama von, umba vatano wanuije umaso usai no nayave von. ² Umba Po ananeneae inta raura mansai pare:

³ “Wadanide! Vatane inta po nawaisyae ranari, umba po iru kamije rangkiki. ⁴ Arono panya po rangkiki, inta ntatayaje no unanuijo nawantave rai bo rai. Umba insaniye waje wo raisy, ti mewen. ⁵ Kamije inta mamu ntatae irati mino mbe orambe rai. Iru kamije umaso ama ntubai mamu mavave nseo, weye kopa ntapekan kobeye ramu. ⁶ Weramu arono uma seo, po kamijo ntubaije umasom rayano mayon ti ngkanen, weye wantainye musyo kopa rai kobe jewen yara nanto orame rai. ⁷ Kamije inta ntatae tavon no anansinaowe ama uga rai. Anansinaowe nseo tavon umba mo kamino wanyine umawe rakikipi ti ngkakai, ama mane mewen dai. ⁸ Umba kamije inta ntatae no kopa kove rai, umba ntubai seowa manakoe, muno ama mane nande rai kobe: inta ama mane nseo no tenamara eane abusyini, kaijinta ma tename mandei, muno inta nseo no tename radani.”

⁹ Yesus po ananeneae umaso raurana mewen, umba pare, “Syare wadanide! Are pirati amarikoame rasakinavo Sya ayao rai, weamo po ranaun.”

Veanimaibe Yesus po ananeneae raura

(Matius 13:10-17; Lukas 8:9-10)

¹⁰ Arono vatano wanuije umaso wusyo wuruta weti Yesus obop, Apa arakovo utavondi aije abusyinaro eane rurume nawe, vatano kaijo wo Apa ananyaowe ranaune nawe, ude tenambe ware indamu Po ananeneae umawe raura kakavimbe mai. ¹¹ Umba Po raura mai pare, “Amisyae apa be akarive Apa kawasae mai no mine so omamo ayao ngkokaije arono wusyinoe weti vatane unanta rai jewen,

* 3:22 Tamo Bersebur ama ine mare Anakakai Akoe piye.

yara weapirati Amisyé po rarorono wasai. Weti Syo raura kakavimbe wasai, weramu vatano kajjinta nawamo Syo ananeneae bo raura mansai. ¹² Maisyare omaisy indamu mamaisyó Ayao Amisyé so rai:

‘Vatane so mamije mo Sya ana idave raen,
weramu unanta raije ramu;
muno wo Sya ana idaura raraniv,
weramu unanta raije ramu.

Wemi mbewar usakinav wakare Rinai jewen,
weti awa ayao kakaije mamó Syo rapaya mansaije ramu.’¹³”

Yesus po ananeneae yo vatano po iru kami rangkikije raura kakavimbe (Matius 13:18-23; Lukas 8:11-15)

¹³ Umba Yesus po raura mai pare, “Wabeanimaibe irati wananta ananeneae umaso raije jewan? Indati wananta Sya ananeneae kajjinta rai tavone ramu. ¹⁴ Vatano po iru kami je rangkikije opamo aurata irati vatano po Amisyé apa ayaowe raura amaisy. ¹⁵ Kami je inta ntatae no unanu je nawantave rai bo rai omamo raurata irati vatano po ayao Amisyé umaso ranaun, weramu Anakakai Akoe de po ayao Amisyé no no anuga raugavo aora.

¹⁶ Kami je inta ntatae no mino mbe orambe rai omamo raurata vatano po ayao Amisyé ranaun, pavave po raijade anayanambe rautan. ¹⁷ Weramu ayaowe umaso masyo matu no anuga raije ramu, weti no tawane ramu. Arono siuri nande ai muno vatane wo ave tatugadi weye panave to, weamo po ayao Amisyé rapaya nakato.

¹⁸ Kami je inta ntatae no anansinao ama uga rai. Omamo raurata irati vatano po ayao Amisyé ranaun, ¹⁹ weramu po anakotaro mine vone so rantotobe, bekero po romane ranugan, muno apa bekero kajjinta manui rave. Wetivara anakotare umaso mo ayao Amisyé rakikipi no anuga rai, weti ayao Amisyé ama ine raen no aije ramu.

²⁰ Weramu kami je inta ntatae no kopa kove rai omamo raurata irati vatano po ayao Amisyé ranaun muno panave rai kobe weti ama ine raen no ai. Vatano maisyare sonawamo awa mano wo raugu je mamó inta nseo no tenamara eane abusyín, inta ma tename mandei, muno inta nseo no tename nadani.”

Yawainyo mbare rakepan no kavine uga (Lukas 8:16-18)

²¹ Umba Yesus po raura nakato pare, “Arono vatane inta po yawainye raindi, po rakepano kavine raije ramu muno po raugaje ntuna no niki raije ama ate ramu. Yara po rauseo ntuna no pata vono kakavin.

²² Weye animaisyé mi rangkokaibe indati raroron kakavimbe, muno ana ngkokaibe indati raen kakavimbe. Weti Sya ayao wananta rai jewan no naiso mamó indati wananta rai kobe no masyoto makare. ²³ Syare wadanide! Are pirati amarikoame rasakinavo Sya ayao rai, weamo po ranaun.”

²⁴ Yesus po raura nakato pare, “Syare wapo ayao nami wapo raranive so ratantona kobe rave. Ranivara wapo Sya ayaowe inta ratantona kobe indamu wapo ranaun, wea indati wananta Sya ayao kajjinta rai jakato umba wapa ana wapo ranaune miridi nseo. Weye tauno wapo veano rataune mamó Amisyé po rasarirae akare Po veano taune wasataun akato, weti manakoe rave wasai. ²⁵ Vatano ayao Amisyé no anuga raije opamo Amisyé po auga ti nanto rai ti apa ana po raene miridi nseo. Yara vatano ayao Amisyé no ai kobe jewan, opamo apa ana po raene miridi makaje ti raumandi kobe.”

Ananeneae yo kasyambere kami ntubai

²⁶ Yesus po raura nakato pare, “Arono Amisyé de be akarive Apa kawasae mai no mine vone so, omamo raurata irati vatano po kasyambere kami ravaya no apa nawaisyé rai amaisy. ²⁷ Namaneamo vatane so niki, yara sansimane ma seo, muno kasyambere kami umawe ntubai tutir umba manakoe. Weramu kasyambere kami mbeare rui ntubai manakoe, vatane umawe pantatukambe rai. ²⁸ Kopawe taune mo raunande rai mo ama tuba rakarimu. Manasyimbe tuba ngkarimu, umba ama ugem nande rai, umba kami no rai kobe. ²⁹ Kami umaso matu to, umba vatane umawe po rakasyin.”

Ananeneae yo sesawije kami

(Matius 13:31-35; Lukas 13:18-19)

³⁰ Yesus po manajo pare, “Arono Amisyé be akarive Apa kawasae mai no mine vone so, omamo animaisyé mi raurata rai? Omamo raurata ananeneae so rai: ³¹ Vatane inta po sesawije kami je raugav, to po rangkiki no nawaisy. Sesawi kami je omamo momoyain dave.* ³² Weramu arono ntubai nseo, ama mote makoeve mo anareo kai rakivan. Ama ririje manakoe ti insanije nande utantuna rai, wo ene ranari ama ririje rai.”

³³ Yesus po ananeneae manui raura maisyare ananeneae umawe ramaisy. Po ayao Amisyé raura ananeneaebe indamu Po vatane manyao, mamaisyó awa vambunine rarijatí. ³⁴ Po vatano wanui je manyao ananeneae bo rai, weramu arono

* 4:12 Yesaya 6:9-10 * 4:31 Sesawije kotaro ranyum no Indonesia omamo anareo mamaun, yara sesawijo kotaro ranyum no Israel ntubai ti manakoe rave, maisyare inyoe ramaisy.

taune Pe apa arakovo utavondi aije obo nao, wea umba Po anakotar tenambe raura kakavimbe mai.

Yesus po ovare muno rarene raura ti ntanamanin

(Matius 8:23-27; Lukas 8:22-25)

³⁵ Namandive kobe, Yesus po raura Apa arakovo utavondi aije mai pare, “Wade ra wanta no onae tuga ranijo warani.”

³⁶ Weti wo vatano wanuije umawe mapaya ti una no onae tuga, umba Yesusa pe apa arakovo utavondi aije nawe usea nyomane rai, umba ukayun kobe. Muno nyomano kaijinta ntavondi wuruta tavon.

³⁷ Nugoenta rainy yara ovaro bambunin dave paje kobe, muno rarene manakokoive mo nyomane ranepat, inta masyo no nyomane ama uga rai ti kavintare mana ntairi nyomane rai.

³⁸ Weramu Yesus opamo niki no nyomane ama parae, akarije raugaje ntamijo anukane rai. Naije Apa arakovo utavondi aije wo amin, ware, “Injayo Kurune, nseo! Mbeanimaibe naemo wansaije jewen? Kavinta wamansyan!”

³⁹ Yesus seo umba Po ovare ansopi, muno Po rarene raura to pare, “Manin! Ntandorar!” Umba ovare umawe manin kobe muno onae ntanamanin dave. ⁴⁰ Yesus po raura nanto Apa arakove mai pare, “Wabeanimaibe wajaniv? Wabeanimaibe wapanave Rinai jewen?”

⁴¹ Umba Apa arakovo utavondi aije ujani dave. Taune wo raura vambinibe mai ware, “Sopamo are pi so wirati Po ovare, rarene raura ti ntanamanin, ntavono Apa ayao rai so?”

5

Yesus po saumane raunanto vatano anawayo kakaije siso aije ai

(Matius 8:28-34; Lukas 8:26-39)

¹ Umba Yesusa pe apa arakove nawe wo onae Galilea raotar unanta no vatano Gerasa awa munije rai. ² Yesus no no nyomane rai umba paje, naije vatano no no tinda aipapo inta de Ai. Vatano napije pamo anawayo kakaije siso ai, ³ ti nove no aipapo rai. Sopamo bambunin dave, weti vatane inta wo aokaisyo waijo besije rai kakai, weye awa vambunine mamaisye ramu. ⁴ Susye manui rave vatane wo aneme ajoe raokokaisyo waijo besi rai to, weramu seo po rapatimuve tutir. Muno po aitamu besijo ajoe rausiso rai radaut tavon. Opamo bambunin dave ti vatane wo ajiare kakai.

⁵ Namane rinit vatane umaso no no aipapo muno puje to no no pukam, umba tamije

gwagwaimbe muno po orame veano anasine ratuturi ti mbe pabe anyi.

⁶ No gwaravaimbe po Yesus aeno dei, umba pansanan bayave re po apa vukane ranteter no Amun. ⁷⁻⁸ Umba Yesus po raura nanto ai pare, “Anawayo kakai, nyuje vatane so aora!”

Naije vatane umaso gwain akoeve rave pare, “Yesus, Arikainyo Amisyo no no munijo ntiti, Nyo rinave tai ruimaisye so? Syo Amisye apa tame rauranara Nyo inansewabe inya.”

⁹ Umba Yesus po anajo pare, “Nya tame mi rui?”

Vatane umawe po raura pare, “Sya tame mirati Legiun, weye reamanui rave.”

¹⁰ Muno anawayo kakaije umaso wo Yesus anajo kewabe tutir indamu vemo Po mawatan wuje uta nggwaravain nora.

¹¹ Mararai jirati unarijoe rai, ugeye wanui rave wo anaise rakanive no unate ama awananeme warea. ¹² Anawayo kakaije umaso wo raura nanto Yesus ai ware, “Reamayar dai mi so: reamare Nyo reansatutir sisa wana no ugeye wato mai.” ¹³ Umba Yesus po mansamayar kobe, weti anawayo kakaije wuje kobe umba uta sisa ugeye mai. Uge umawe wansansanan udadoyaro pene rai ti utaoponasyo no onae waraya, weti usayadi kobe. Awa manuije mirati ribuge jirum.

¹⁴ Vatano wo ugeye makum unaji damu wakata umanine ramu, yara wo ana nande uge mai raura kakavimbe vatano munijo we mai muno munijo we ama varodore raita tenambe. Weti vatano munijo we nao wakare wo raen. ¹⁵ Ude Yesus ai, umba wo vatano anawayo kakaije wuje aije umawe aen. Wakoe! Wepamo tuna Yesus atavon, po apa ansune rave, muno apa ana po ratantona ngkov akato. Weti vatano munije umawe ujani dave. ¹⁶ Umba vatano nanawirati wo raeno mamije raije wo ana nande vatano napije pe uge nawe mai raura kakavimbe mai. ¹⁷ Umba vatano wanui umaso wo Yesus anajo indamu puje irati awa munije raora.

¹⁸ Weti Yesus seo no nyoman, umba vatano anawayo kakai wuje ai umawe po Yesus anajo indamu tavondi Ai. ¹⁹ Weramu Yesus ponae, pare, “Vemo wintavondi Rinai nora. Yara nyakato ra nyo saumano Amisye po raunande naije raura vatane mai, muno nyo Amisye apa muinyo Po rarorono naije raura mai tavon.” ²⁰ Weti vatane umawe poroto kobe, siso puje Munije Abusyin* raita tenambe, po saumano Yesus po raunande anasine raije ravovo no ratuije. Weti vatane unantaive tenambe.

* 5:20 Raura ayao Yunani rajjamo Dekapolis, ama ine mare munije abusyin.

Yesu po saumane raunanto Yairu apa kavu wanya me, wanya rantukamo Apa ansune raije me yai

(Matius 9:18-26; Lukas 8:40-56)

²¹ Yesu seo nyomane rai jakato, Po onae raotar pakanande no onae tuga rani, umbu vatano wanuije ude wo akiani no onae tuga rai. ²² Umbu vatane inta de, apa tame mi Yairu. Opamo akarijo yavaro sambaya inta rai. Arono po Yesu aen, de po vukane ranteter no Amun. ²³ Umbu po Yesu anajo memembe pare, “Injae, sya kavu wanya nggwanen akoeve rave, kav-inta ratire ngkakai. Ti syare winde, indamu Nyu naneme raunanto ntamijo rai, indamu vemo ngkakai jinya, yara ranakea nsauman.”

²⁴ Weti Yesu tavondijo Yairu ai, umbu vatano wanui utavondi wo Yesu arijat, ti wo akikipi no awa yasyin.

²⁵ Awa yasyine umaso wanya nggwanen inta, omamo nantu waneno embae rai tutira tume abusynara eane rurun to. ²⁶ Omamo mo anawae wanui mapan to indamu wo saumane raunanto rai, muno ama ananuge mpatimugo mansai, weramu mbea marudi. Ranakea nsaumane jewen, yara ama yorame manakoe iridi. ²⁷⁻²⁸ Wanya so mo Yesu anaumbe to ti mo ratantona mare, “Syantukamo Apa ansune rai yayave indati risauman aje.” Weti wanya umaso no no vatano wanuije awa yasyin umbu mararaijo Yesu akirije rai, umbu rantukamo Apa ansune rai. ²⁹ Umbu kavuratawe ama mavu muje umawe nsopi kobe ti mo raen ranakea nsauman to.

³⁰ Naije kobe Yesu nantu rai pare Apa vambunine inta muje no anasine rai to. Weti sarirae Po vatano wanui umaso manajo pare, “Are nyirati nantukamo Sya ansune raije so?”

³¹ Apa arakovo utavondi aije wo raura ware, “Injae, taune Winyi nyu vatano wanuije so maen unande ti wo nakikipi kiani, weti Nyu manajo are nawirati wantukamo Nyu ansune raijo e?”

³² Weramu Yesu po vatane maen kiani indamu Po vatano mansantukamo Aijoe maen. ³³ Wanya umawe mo ranakea raen nsauman to, weti mo Yesu asyani ti ranakea ntutar. Umbu nde mo vukane ranteter no Amun, umbu mo raura kakavimbe mare, “Risyi syantukamo Nai to,” umbu mo ama ana nande rai umawe raura kakavimbe tenambe Ai. ³⁴ Umbu Yesu po raura nantu wanya umaso rai pare, “Wanya arikainyo winy, nyanave Rinai jivae, wirati winsaumanoe. Soamo nya yorame rapaya

nai to, weti nyoronto kai, syare Amisyu apa kavu saumane no nautan.”

³⁵ Arono naije Yesu payaowa nene, umbu vatano una no Yairu apa yavar inta ude ware, “Injaye Yairu, nya kavu ngkakai to, ti vemo winyakaore nyu Injaye Kurune ansosobe nora.”

³⁶ Yesu po awa ayao umaso ranaun weramu ponayo rai, weti Po raura nantu Yairu ai pare, “Vemo njani nora, yara nyanave yayave.” ³⁷ Umbu Po vatano wanui umawe mansamayaro utavondi Aije ramu, yara Petrusa pe Yakobusa pe apa rijato Yohanesa pe obo nao utavondi.

³⁸ Arono ude no Yairu apa yavar, Yesu po vatane maen woyovo arikainye umawe rai weye ngkakai to. ³⁹ Umbu siso no yavare umaso rai, Po raura mansai pare, “Wabean-imaibe wapoyov? Arikainye wato mamo ngkakaije ramu, yara ta nikija.” ⁴⁰ Weramu vatane umaso wugoeno Ai.

Weti Po vatano wanui umaso mawatan ti wuje. Umbu Po apa arakovo utavondi aije umawe nawe, arikainye umawe ama aja pe akoya me obo mauga ti usisa no tanoan uma wanya arikainye ntami rijoe rai. ⁴¹ Umbu Yesu po arikainye umaso raneme rajar, Po raura aje rai pare, “*Talita kum,*” ama ine mare, “Arikainyo winy, syare winseo!”

⁴² Naije kobe arikainyo kamurame umawe nseo, muno manya mananave. (Ama tume abusynara eane rurun to.) Muno vatano wo raen onawamo unantaive rave anaporainye umaso rai. ⁴³ Weramu Yesu po maorai pare, “Wabemo wapo ana umaso raura vatane inta mai nora!” Muno Po matutir indamu wo anaisyu raunanto arikainye umaso rai indamu mo raisy.

6

Vatano Nasaret wonayo Yesu ai
(Matius 13:53-58; Lukas 4:16-30)

¹ Yesusa pe apa arakovo utavondi aije nawe wuje umbu wakare no Yesu taune apa munijo nori. ² Masyoto sambaya rai, umbu Yesu po vatane manyao no yavaro sambaya we rai. Arono vatano wanuije wo anaun, unantaive rave. Wo raura ware, “Wakoe! Are pirati po ananyaowe so raunantu Yesu ai? Apa ana datantona nti somamo nori rui? Muno Po anaporainye so raveare rui? ³ Wamo vatane so aen, Opamo vatano po inyoe ranari. Apa akoya mirati Maria. Apa rijate nawirati Yakobusa pe Yosesa pe* Yudasa pe Simona pe nao. Apa aname nao una no naiso tavon.” Weti wonayo wanave Aiji.

⁴ Umbu Yesu po raura pare, “Tugae, anawae Amisyu to no munijo maran, weamo vatane wanave ai. Yara pare pakare

* 6:3 Yosesa pe tame rawain tavonamo Yusup (Matius 13:55).

no taune apa munije rai, weamo vatane wanave aije ramu. Taune apa arakove nawe apa yavaruga nawe wanave aije jewen tenambe.”

⁵ Yesus po aneme raugaje ntamijo vatano ugwanen inta mai indamu usauman. Weramu vatano Nasaret wanave Aije ramu, ti Yesus mamaisyo po anapaporainyo manui rarorono mansaije ramu. ⁶ Muno nantoive mai, weye wanave Aije ramu.

Yesus po apa arakovo utavondi aije abusynara eane rurum matutir (Matius 10:5-15; Lukas 9:1-6)

Umba Yesus pusyo ti siso no munije inta rai nanto no munijo kaijinta rai, pananyaube no irati raita tenambe. ⁷ Umba Po apa arakovo abusynara eane jirum mawainde, umba Po matutir wusya ube randurumbe. Muno Po vambunine raugaje mai indamu wo anawayo kakaije mawatano vatane maora. ⁸ Umba Po ananyaowe so raugaje mai pare: “Vemo wapo ana inta raugav irati wapa unanui anya rai nora, yara wapa isyoe bom. Vemo wapo anaisye, ingkujawane, doiye inta raugav inya. ⁹ Wasajo kokome rave kai, yara vemo wapo ansune raugavo randurum inya. ¹⁰ Arono vatane inta po wasaugav wasea apa yavare rai, syare wana no apa yavar tutir ava wapuje apa munije raora. ¹¹ Weramu ranivara wasisa munije inta rai, yara vatano una no nanawije wo wasave kobe jewen muno wo wasaranive jewen, weamo wapusya munijo namije raora. Umba wapo kapumo nowo wasajoe raije ranepataje no mansamun indamu wo raen indati taune wo ama mangke ranawan.”

¹² Wetivara Yesus apa arakovo abusynara eane rurum usya nara wuruta, wo ayao Amisyere raura vatane mai indamu usakinav irati awa ayao kakaije rai. ¹³ Muno wo anawayo kakai manuije mawatan, muno wo manine veano vatano ugwanen manasine raarer indamu usauman.

Yohanes Pembaptis kakai (Matius 14:1-12; Lukas 9:7-9)

¹⁴ Akarijo Titi Herodes po Yesus apa ana dave ranaun, weye Apa tame ravovo vatane mai tenambe. Vatane inta wo raura ware, “Yesus opamo Yohanes Pembaptis wepirati kovakato no wene ama uga rai to ti pakare wep. Wemi mbewar Po anapaporainyane raroron.” ¹⁵ Yara vatano kaijinta wo raura ware, “Opamo anawae Elia pi pakare to wep.” Umba inta ware, “Opamo anawae Amisyere maisyare anawae wusyine inta amaisy.”

¹⁶ Arono Herodes po ana umaso ranaun, po raura pare, “Yesus opamo Yohanes Pembaptis syo apa isyisye raotaroe, wepi kovakato ti pakare so.”

¹⁷⁻¹⁸ Yohanes Pembaptis apa kakaije nande no taiso: Herodes po apa arakovo Pilipus apa anamugo Herodias raovan to, weti Yohanes pananyaube Herodes pare, “Winyamo vemo nyo nya arakova apa anamu raovan inya! Nyo ananyao Amisy rakanyoandi!” Wetiva Herodias umaso mparijo Yohanes ai, weti ama anap Herodes po Yohanes ajar po augave siso no tanoano makova rai. ¹⁹ Herodias ranuga ngkakaijo Yohanes ai mare mo aubaisy, weramu ama anap Herodes po ramayare ramu. ²⁰ Weye Herodes po Yohanes aen opamo vatano anuga ngkov muno ngkakavimbe, weti po asyaniv. Maisyare omai ti, po aeranande kobe no tanoano makova ama uga. Masyote inta yai, Herodes po Yohanes awainde weye anayanambe po apa ananyaowe ranaun, weramu anuga nseo majeve tavon.

²¹ Masyote inta umba varore raugaje Herodiasa rai indamu mo Yohanes aubaisy. Arono naije Herodes apa masyoto ano raije mamaisy. Weti po one rave, umba po akarijo usarodoro augane nawe, nait akari akoe nawe, vatano titi no no Galilea nawe, mansawainde. ²² Weti vatane umaso ude, umba Herodias ama kavo wanya musyo nsarer. Herodesa pe apa arakove umawe nawe manayanambe ama sarere rai. Weti Herodes po raurairive patimuve wanya arikainye umaso rai pare, “Animaisye mi nyare mbekero rai, indati syo raunande nai. ²³ Nyare mbekero sya munijo ibe akarive raije rai, syo raporabe rurum, syo inta raunande nai.”

²⁴ Umba wanya arikainye umasom musyo ara moronto mo akoya ranajo mare, “Ingkoe, animaisye mi nyare syo ranajo?” Umba ama akoya mo raura nanto rai mare, “Nyo Yohanes Pembaptis akarije bo ranajo.”

²⁵ Umba wanya arikainye umasom mavave makato no Herodesa nui, umba mo raura mare, “Syare syo Yohanes Pembaptis akarije ranajo, indamu nyo raunande rinai no naiso kobe, nyo raugaje ntamijo pauraije rai.”

²⁶ Arono Herodes po ama ana mbekedaijewe ranaun, animaumbe rave, weramu po rawatambe ramu, weye apa arakove wo apa urairijo mpanyoane ranaun to ti. ²⁷ Weti po apa naite inta atutir inda poroto po Yohanes akarije raotar umba po raugav. Weti naite umaso poroto po akarije umawe raotar no tanoano makova ama uga. ²⁸ Umba po Yohanes akarije raugaje ntamijo pauraije rai, po raugav po raunanto

wanya arikainye umawe rai, umba mo ruananto akoya rai. ²⁹ Arono Yohanes apa arakovo utavondi aije wo ranaun Yohanes kakai to, ude wo anasino kopa raugaveta wo rantuna no aipapo.

Yesus po anaisye raunanto vatane ribuge radani wo raisy

(Matius 14:13-21; Lukas 9:10-17; Yohanes 6:1-13)

³⁰ Yesus apa arakovo po matutire umawe wakare, wanunugambe no Yesusa nui, umba wo ana wo rave muno ana wo ranyaowe raura vintabo Ai. ³¹ Vatane wanui rave uta ude Yesus ai, weti Wepe apa arakovo utavondi aije nawe wisyisye kakai. Weti Yesus po raura nanto Apa arakove umaso mai pare, “Wade ra wanta no nugo maninimbe inta rai indamu waboam wantantuna mumuimbe.” ³² Weti usea nyomane rai mumuimbe, wuje ti uta no nugo maninimbe inta rai.

³³ Weramu vatano wanuije umawe wo awa wusya raen muno awa uta rai mamu wo raen to. Weti vatano wanui una no munijo we inta wansansano yawa rai, ti wuisy, wo Yesusa pe apa arakove nawe manyut no onae tuga ranijo warani. ³⁴ Arono nyomane umawe nande to, Yesus pajje kobe. Umba Po vatano wanuije maen, aemeno mansai rave, weye vatane so maisyare muno domba awa vatano po maeranande mewene mai wemaisy. Weti Po mansanyao anakotaro manui rai.

³⁵ Namandive kobe, weti Yesus apa arakovo utavondi aije ude Ai, wo raura ware, “Mare ngkaumu kobe, nuge so nggwaravainy tavon. ³⁶ Injaje, koveamo Nyo vatano wanuije so matutir inda wuruta wo anaisye inta ramavun no munijo mararaije so.”

³⁷ Weramu Yesus po raura nanto mai pare, “Weapirati wapo anaisye inta ruanande indamu vatane so wo raisy.”

Umba Apa arakove wo raura akanande Ai ware, “Wakoe! Vatane so wanui rave! Anaisye inta ramavun inda wo raisy indati ama mangke nseo rave, yara reama doije mamaun ti mamaisye ramu.”

³⁸ Umba Yesus po manajo pare, “Wapa rotije ruimaisy? Wata wapo raen.”

Weti uta wo raen, umba ware, “Rotije vasyesye radanija mi ntuna, jiane ruruma yatavon.”

³⁹ Naije Yesus po vatano wanuije umaso matutir pare, “Wapaje watantuna no insumaije vono njayaibe wato rai. Inta wapangan nande intai, inta wapangan nande intai.” ⁴⁰ Weti vatano wanuije umaso utantuna tetebe, inta awa wanuije tename nadani, inta awa wanuije abusyine nadani. ⁴¹ Naije Yesus po rotije vasyesye radani

muno jiane rurum raugavere tenambe, umba peraseo no naume warae, Po kove raura seo Amisye ai. Umba Po rotije raporadijo aneme rai, umba Po raunanto Apa arakovo utavondi aije mai indamu wo ratodijo vatano wanuije umawe mansai inda wo raisy. Po jiane rurum umawe ratodijo mai tavon. ⁴² Wo raisya uman dave. ⁴³ Umba Yesus apa arakove wo anaisye ateteo ntuna ranunugambe akare no bayaije rai. Bayaije umaso ama manuije nanto no abusyinarara eane rurum. ⁴⁴ Anya vatan anui uma wo anaisye so raisye awa wanuije nanto no ribuge radani. Awa yavaruga utavondi wo rai tavon.

Yesus panya onae vone rai

(Matius 14:22-33; Yohanes 6:16-21)

⁴⁵ Naije kobe Yesus po apa arakovo utavondi aije matutir pare, “Wasea nyomane rai wapui da wata no munijo Betsaida onae tuga ranijo warani.” Umba Yesus po vatano wanuije umawe matutir indamu unajiv. ⁴⁶ Umba Po mapaya, poroto no pukame inta rai indamu be sambayambe.

⁴⁷ Naman kobe, umba Yesus apa arakove uborae unanta no onae ama yasyin, yara Yesus opamo ta no no yawa raija nene. ⁴⁸ Yesus po apa arakove maen, uboraya usiuri rave weye ovaro po mamune raide panyoan dave. Arono mararaijo sansiman, uma amije mandei to, umba Yesus panya onae vone raide so. Pare bera Po makivan inda puisy. ⁴⁹ Naije Apa arakove wo aeno panya onae vone raide, weramu wo ratantona ware, “Pakinik akoe!” Ti wunanta, ⁵⁰ weye wo aen tenambe, ti ujani dave.

Weramu naije kobe Yesus po raura mai pare, “Wamanin! Risyi so! Vemo wajaniv inya!” ⁵¹ Umba Yesus seo no awa nyomane rai, naije kobe ovaro umawe manin. Weti arakove umaso unantaive rave, ⁵² weye unanta anapaporainyo rotije radanije we raije ramu. Manuga matu ti unanta Apa anapaporainye ama ine raije jewen.

Yesus po saumane raunanto vatano ugwanene mansai no Genesaret

(Matius 14:34-36)

⁵³ Arono usisa no onae tuga ranijo warani no munijo Genesaret, wo oramo kamintuge raugasya. ⁵⁴ Umba Yesusa pe una no nyomane rai waje, weti vatane wo maen ware, “Yesusa pi de.” ⁵⁵ Weti wansansanan usisa no munije raita tenambe indamu wo vatano uजारome maugavo pata rai ude irati Ai. Munijo rui mirati wo ranaun Yesus siso rai, wo vatano uजारome maugaveta Ai no ratuije. ⁵⁶ Yesus to no rui vayave, munijo mamaun muno munijo manakoe muno varodoro rui vayave siso rai, umba

vatane wo awa watano ujaorame maugavere Ai no pasari ama wanijate rai. Umba wo anajo indamu watano ujaorame umaso wantukamo Apa ansune ama mamarane bo rai. Muno watano wantukamo Ai usauman tenambe.

7

*Ananyao aneno wusyini Yahudi
(Matius 15:1-9)*

¹ Naije watano Parisije inta nawe, kuruno makari mbaro Ananyao Musa raije inta nawe una no Yerusalem umba ude wanugande no Yesusa nui. ² Wo Apa arakovo utavondi aije maen wisyi bayave yara wo manemo nggwame rarandom wusyimbe mamaisyo ananyao Yahudi raije ramu.

³ Watano Parisi muno Yahudi kaijinta wo ananyao aneno wusyine raijar matuve. Weti ware wisyisy, weamo wo maneme rarandom wusyimbe mamaisyo awa ananyao rarijati, umbawe wisyisy. Yara ranivara wo maneme rarandom wusyimbe jeben datire, weamo wo anaisye inta raisye ramu. ⁴ Muno anaisyo ramavun no pasari, omamo inta raisye jeben tavon arono wo maneme rarandom dainy. Parisije awa ananyao kaijinta wo raugav no aneno wusyine mai ti wo raijar matuve mamano manui rave, maisyare awa ananyao kapi mana ramaname, pauraije, muno anomane rarandom.

⁵ Wemi mbewar watano Parisi muno kuruno Yahudi umawe wo Yesus anajo ware, “Veanimaibe irati Nya arakove wo aneno wusyine awa ananyao rakanyoandi? Arono wisyisy, wo manemo nggwame rarandom wusyini datije ramu!”

⁶ Yesus po ayaowe rasakinavo mai pare, “Weapamo wapa angkarije ntapekan! Yesaya po raura tugae rave arono wusyinoe po wasaura taiso:

‘Watane so wo rinarambe mawa bo rai,
yara manuga mamano nggwaravainyo Rinai.

⁷ Usambayambe Rinai, weramu ama ine meweno rai,
weye wo Risya ananyao ranigwano
vatane awa bo rai.’* ”

⁸ Yesus po raura nanto mai pare, “Weapamo wasakirive Amisyere apa ananyaowe rai to, yara watane awa ananyao obo mi wapo raijar matuve.”

⁹ Umba po raura nakato pare, “Wabeanimaibe wapo Amisyere apa ananyaowe rakanyoandi, yara watawondi taune wapa ananyao bo rai? ¹⁰ Maisyare so: Musa apa ananyao mi som, pare, ‘Mbeaje irati inya pe nangkoya me yai,’ muno pare, ‘Are pirati po aja pe akoya me yaura tatugadi,

opamo mangke raugaje ai indamu kakai.’* ”

¹¹ Yara wapa ananyao nsasyere weye wapare, ‘Are pirati pare po apa ananuge raunanto Amisyere bo ai, ¹² vemo po ana inta raunanto aja pe akoya me yai jinya.’ Maisyare omaisy, wapare watano napije po aja pe akoya me yaeranande aya bekedaije rai jeben kai. ¹³ Maisyare omai ti, wapo wapa ananyao raijaseo ntiti rave mo ayao Amisyere rakivan. Muno anakotaro kaijinta wapo rave tai mai tavon, ti manui.”

*Ana nggwamo watane mansai
(Matius 15:10-20)*

¹⁴ Umba Yesus po watano wanui mawainde akato, umba Po raura nanto mai pare, “Wadanide! Syare wananta Sya ayaowe so rai. ¹⁵ Anaisyo wadaisy omi mo wasaveti wagwambe no Amisyere amune raija jeben. Yara ana wadaura, wadave omi mo wasaveti wagwambe no Amun. ¹⁶ Weti wadanide! Are pirati amarikoame rasakinavo Sya ayao rai, weamo po ranaun.”

¹⁷ Yesus po watano wanuije umawe mapaya umba siso no yavar. Naije Apa arakovo utavondi aije wo anajo ananeneae umawe ama tunato raije rai. ¹⁸ Umba Yesus po raura nanto mai pare, “Wabeanimaibe wananta raije jeben? Anaisyo wadaisyere omamo mo wasaveti wagwambe no Amisyere amune raija jeben. ¹⁹ Weye anaisyo wadaisyere mamano masyo no wasanuga raije ramu, yara masyo no wapa wanyatije umba wapo rangkarave ti mewen.” (Maisyare naije Yesus po raura pare anaisyere kotare mamano ngko tenambe.)

²⁰ Umba Po raura mai jakato pare, “Ana ntipu no watane mansanuga umba muje omirati mo maveti ugwambe no Amisyere amune rai. ²¹ Weye ana ntipu no watane manuga umba muje omamo awa ana udatantona kotaro kakai, wo anaerere rave, wanaonoambe, wo watane maubaisy, ²² unakijo awa arakove awa wanya marijat, manuga ntantunaube, wo watane maponae, uparijo watane mai, wo watane maura tantunawi, mansararin, wonae wo ananyao raranivi. ²³ Ayao kotaro kakaije umawe ntipu no manuga umba muje, ti wemirati mo watane maveti ugwambe no Amisyere amune rai.”

*Wanya Yahudi jewene inta manawe
Yesus ai*

(Matius 15:21-28)

²⁴ Yesus puje munije umaso raora, umba poroto no munijo Tirus. Siso no yavare inta rai muno pare vemo watane wo Apa deye ranaun nora. Weramu Apa deye mamano ngkokaibe kakai. ²⁵ Yara naije kobe wanya

inta mo Apa deye ranaun, ti nde no Yesusa nui umba no vukane ranteter no Amun. Wanya umaso ama kavo wanya mamu anawayo kakaije nsiso rai. ²⁶ Akoya mo Yesus anajo indamu Po anawayo kakaije rawatan irati ama kavo raora. Weramu wanya somamo vatano Yahudije ma jewena, yara rano no munijo Penisia no no Siria.

²⁷ Yesus po raura nanto rai pare, “Ride Sya kawasae Yahudi obo mansai manasyimbe. Weye anaisyo rapatimugo arikainye wo raisy omamo arikainye awa nti vemo raeparaje vayave make mansai ramu.”*

²⁸ Wanya umawe mo raura nakananto Ai mare, “Injae, tugae. Weramu anaisyo arikainye wo raisy ama kukupe inta ntatae, wreamo make usai no meja ate wo rai kai.”

²⁹ Umba Yesus po raura nakananto rai pare, “Nya ana nyo raura wato mo ramai dave, weti nyakato kai. Nya kavo mamu anawayo kakaije muje raora to.”

³⁰ Wanya umawe makato no yavar, umba mo ama kavo raen no niki ri nsauman to. Anawayo kakaije umawe muje irati raora to.

Yesus po saumane raunande vatano awa ngkao muno amarikoame mpapakirije ai

³¹ Yesus puje munijo Tirus raora, umba poroto no munijo Sidon, umba pakato no Onae Galilea no no ranijo Dekapolis. ³² Naije vatane inta wo vatano amarikoame mpapaki muno awa ngkao inta augavere Yesus ai. Umba wo anajo indamu Po aneme raugaje ntamijo ai indamu sauman.

³³ Yesus po vatano yorame kotare jirume no ai umaso augavo vatano wanuije maora. Umba Po apa kawije rausiso vatane umaso amarikoame ama uga rai, muno nyipube taune Apa kawije rai umba Po rapaya nanto vatane umawe aunane rai. ³⁴ Umba peraseo no naume warae, anawayo nto, umba Po raura nanto vatane umawe ai pare, “Efata,” ama ine mare “Mpomo!” ³⁵ Naije kobe vatane umaso amarikoame mpomo, umba aunane ndaradam akato, weti payao kobe.

³⁶ Umba Yesus po vatano wanuije umawe maorai indamu vemo wo ana nande umawe ratoro vatano kaijinta mai jinya. Po maorai rijati akato, weramu vatane umaso wo raura pampambe tutir. ³⁷ Vatano wanui nantaive rave, wo raura ware, “Wakoe! Ana Yesus po rave mamu ngkov bintabol Po saumane raunanto vatano mamarikoame mpapakije mansai ti wo ana ranaun muno mawa ngkaowe mai ti wayao.”

* 7:27 Ananeneae somamo arikainye maurata irati kawasae Yahudi mansai, muno make maurata irati vatano Yahudi jewene mansai.

8

Yesus po anaisye raunanto vatane ribuge mambisy wo raisy
(Matius 15:32-39)

¹ Arono naije, vatano wanuije inta ude wanugan akato no Yesusa nui. Awa anaisye meweno mai, weti Yesus po apa arakovo utavondi aije mawainde umba Po raura pare, ² “Rinaemeno vatano wanuije so mansai rave. Soamo utavono Rinaija masyote mandei to, ti awa anaisye meweno mai umaror. ³ Weramu ranivara Syo matutir unaji bayave, indati marore po mansaveti umayondi, mamune ngkaumudi no unanuije ama yasyin, weye vatane inta nawamo awa unanuijo wanya rai nggwaravainy tavon.”

⁴ Yesus apa arakove wo raura nanto Ai ware, “Nugo vabukane vono maninimbe so anaisye mewen dai. Weramu vatane so wanui rave, weti rui rati nyare wamo anaisye rakani ti mamaisy?”

⁵ Umba Yesus po manajo pare, “Wapa rotije ruimaisy?”

Umba wo raura nakanande Ai ware, “Vasyesye kaururuma mi ntuna.”

⁶ Umba Yesus po vatano wanuije umaso matutir pare, “Watantuna no kopa vone so.” Umba Po rotije vasyesye kaururum raugav umba Po kove raura seo Amisy ai. Umba Po rotije umaso raporadijo aneme rai muno Po raunanto Apa arakovo utavondi aije mai indamu wo ratodijo vatano wanuije umaso mai. ⁷ Wo jiane inta raunande tavon, muno Po kove raura seo Amisy aijo jiane umawe rai. Umba Po apa arakove matutir wo jiane ratodijo vatano wanuije mai tavon. ⁸ Wo raisya uman dave. Umba Yesus apa arakove wo anaisye ama ateteo ntuna ranugan akasyo bayaije kaururum ntatairi. ⁹ Vatano wo anaisye umaso raisye awa wanuije nanto no ribuge mambisy. Umba Yesus po vatano wanuije umaso matutir unajiv. ¹⁰ Muno naije kobe Wepe apa arakovo utavondi aije nawe usea nyomane rai wuruta no munijo Dalamana.

Vatano Parisije wo Yesus anajo anaporainye rai

(Matius 16:1-4)

¹¹ Vatano Parisije inta ude Yesus ai, wo anajobe muno wayaowi Ai. Ware wo atopan, weti wo anajo indamu Po anaporainye inta rarorono mai indamu wo raen tugae rako jewena rako Opamo no no Amisy nui ti de rako? ¹² Weti Yesus anuga ranimaumbe, weti Po raura nanto mai pare, “Abo! Veanimaibe vatano arono naiso ubekero anaporainye obo rai? Weramu

ubeare wemai ti, Syo inta rarorono maije ramu.”¹³ Umba Yesu puje maora, seo no nyoman poroto no onae tuga ranijo warani.

Wasyisyaube Herodesa pe vatano Parisije nawe awa ananyaowe rai
(Matius 16:5-12)

¹⁴ Weramu Yesu apa arakovo utavondi aije manimarijo awa roti rai ti wo inta raugave ramu, yara rotije intabo pi ntami no nyoman.¹⁵ Umba Yesu po raura nande mai pare, “Wasyisyaube irati Herodes apa rai rai muno Parisi awa rai rai tavon.”

¹⁶ Weramu Yesu apa arakove unanta ana Po raura umaso raije ramu, weti wayao vambinibe ware, “Yesu po raura taije weye wama rotije meweno wansai.”

¹⁷ Yesu nanto ana wo raura rai, weti Po manajo pare, “Wabeanimaibe wapayao wapare rotije mewen? Syo wasaen wapa ana wadatantona nsarokire ramu! Abo, weapamo wananta Sya anapaporainye raije ramu muno wapanave Sya vambunine raije ramu!¹⁸ Weapamo wasamije no wasai, weramu wabeanimaibe wadaene jewen? Wasamarikoame no wasai, weramu wabeanimaibe wapo ana ranaene jewen? Wasaemen dako¹⁹ nandija arono Syo rotije vasyesye radani raporadi indamu vatane ribuge radani wo raisy, wasaemeno we rai ramu ge? Omamo anaisye ateteo ntuna ama bayaije ruimaisy wemi wapo ranugan akare?”

Umba wo raura akananto Yesu ai ware, “Bayaije abusyinara eane rurum.”

²⁰ Umba Yesu po manajo akato pare, “Arono Syo rotije vasyesye kaururum raporadi indamu vatane ribuge mambisy wo raisy, anaisye ateteo ntuna ama bayaije ruimaisya mi wapo ranugan akare?”

Umba wo raura nanto Ai ware, “Bayaije kaururum.”

²¹ Yesu po raura nakato pare, “Abo! Wananta Sya anapaporainye ama ine rai jewena nene!”

Yesu po saumane raunanto vatano amije ntuba ai no munijo Betsaida

²² Uta unanta no munijo Betsaida. Naije vatane inta wo vatano amije ntuba augavere Yesu ai, umba wo anajo indamu Po aneme raugaje ntamijo ai indamu sauman.²³ Umba Yesu po vatano amije ntuba umaso aneme raijar Po augav ti yirija no munije ama akiri. Umba Po nyipute raugaje vatane umaso amije rai muno Po aneme raugaje ntamijo ai. Umba Po anajo pare, “Soamo nyo ana raen to e?”

²⁴ Vatane umawe peravo usye rai to umba pare, “Syo vatane maen, maisyare inyoe tuturo ndento.”

²⁵ Umba Yesu po aneme raugaje ntamijo vatane umaso amije rai jakato. Naije kobe amije nsauaman, perato po anakotare raen kakavimbe rave.²⁶ Umba Yesu po raura nanto ai pare, “Nin kai no nya yavar, yara vemo nyakaisyo no munije so ama uga rai jinya!”

Petrus po Yesu aura kakavimbe opamo Mesiasa wepije

(Matius 16:13-20; Lukas 9:18-21)

²⁷ Yesu pe apa arakovo utavondi aije nawe usisa wuje munijo mararaijo munijo Kaisarea Pilipi rai. Uta unanuije ama yasyin, umba Yesu po apa arakove manajo pare, “Vatano wanuije nawamo wo raura ware Risyamo are pi Risy?”

²⁸ Umba Apa arakove wo raura akananto Ai ware, “Vatane inta wo naura ware Winyamo Yohanes Pembaptis pi Winy. Umba inta wo naura ware Winyamo anawae Elia pi Winy, umba inta ware Winyamo anawae wusyine inta pi Winy.”

²⁹ Umba Yesu po manajo pare, “Yara weapamo wapare Risyamo are pi Risy?”

Umba Petrus po raura akananto Ai pare, “Injae, Winyirati Mesias.”*

³⁰ Umba Yesu po apa arakove maorai pare, “Vemo wapo Sya tamo Mesias ravovo vatane mai nora!”

Yesu po apa kakaije raura wusyimbe
(Matius 16:21-28; Lukas 9:22-27)

³¹ Umba Yesu po apa arakovo utavondi aije manyao pare, “Risyirati Arikainyo Vatan, indati siurijo manakoe nande Rinai. Akarijo Yahudi nawe, syeno akokoe utantuna no Yavaro Amisye raije nawe, kuruno makari mbaro Ananyao Musa raije nawe ware wo rinawatambe. Indati vatane wo inaubaisy, weramu masyote mandei umba ikovakato no wene rai.”³² Yesu po ayao umaso raura kakavimbe Apa arakove mai.

Weramu Petrus po Yesu aijade teto arijat indamu payao nanto Ai mumuimbe. Petrus pare, “Injae, vemo Nyo ayaoowe wato raura nora, weye mamaisye ramu!”

³³ Weramu Yesu sarirae akare Po apa arakovo utavondi aije maen, umba Po raura nanto Petrus ai soowabe pare, “Anakakai Akoe, nyusyo ra nto rinaora! Nya ana ndatantona wato mamamo Amisye apa ma jewena, yara vatane awa ma.”

³⁴ Umba Yesu po vatano wanuije nawe, Apa arakovo utavondi aije nawe, mawainde. Po raura nanto mai pare, “Vatano rui pi beker pare tavondi Inaije pamo be taiso: opamo akirive taune apa bekere rai, umba po inyo kapite ranawan muno tavondi Rinai kobe.”³⁵ Are pirati

* 8:29 Vatano Yahudi wo Mesias anyube, weye opamo Vatano Amisye po apatimu indamu be akarive.

beker pare po apa kovo mine so ramavug, opamo indati apave kovo nuge nuganuije raije ramu. Yara are pirati nanto wene rai weye tavondi Rinai muno po Ayao Kove ravov, opamo indati apave kovo nuge nuganuije rai. ³⁶ Ranivara vatane inta apaura mine vone so rai vintabo weramu apa kovo nuge nuganuije rakanive ai, weamo apaura mine so raija marudi. ³⁷ Weye vatane apa kovo nuge nuganuije mamo anakotare inta veano ranigwane kakai.

³⁸ Weapamo wana no vatano ukakainoanive muno wonayo Amisyee aije awa yasyine rai. Weramu are pirati samane po Sya tame raura muno po Sya ananyao raura vatano wanui mai, weamo Risy, Arikainyo Vatan, indati risamane Syo aura tavon no Amisyee amun arono syakare no mine vone so irati Sya Injaya apa kovo ntiti rautan muno naito kov Amisyee mautan tenambe.”

9

¹ Yesus po raura pare, “Syoo raura tugaive wasai: Vatane inta una no wapa yasyine so wana unanta wene rai rainy, indati wo Amisyee aeno de irati Apa vambunine rautan indamu be akarive Apa kawasae mai no mine vone so.”

*Yesus apa kovo ntiti je raroron
(Matius 17:1-13; Lukas 9:28-36)*

² Masyote kaujentabo akato, Yesus po Petrusa pe Yakobusa pe Yohanesa pe mauga ti usea no unato ntiti je inta rai, obo una mumuimbe. Naije wo Yesus aen anakea rawerave ti nsasye no mansamun. ³ Apa ansune mpopper muno ntumbe rave, mo ansuno rapapi ra mpopper no mine vone so rakivan tenambe. ⁴ Naije kobe Yesus apa arakove mandei umawe wo Musa muno Elia yaen yayao nanto Yesus ai.

⁵ Umba Petrus po raura nanto Yesus ai pare, “Injayo Kurune, wana no soamo ko dave! Syare reamo randume mandeija yanari: inta ranari Injae namarom, inta ranari Musa amarom, inta ranari Elia amarom.” ⁶ Petrus po rauranare naije, weramu apa ana daura ma pantatukambe raija, weye onawamo ujani dave.

⁷ Kavuratawe kamuro poper inta nde mo mansatatu, umba udanita anamote inta ngkin no kamure ama uga mare, “Sopamo Sya Arikainyo inanuga no Ai. Wapo araniv kobe rave!”

⁸ Umba kavuratawe wo usaidijoe raen kiani jakato, vatano uma usaiyo matavonoe mansaumandi vintabo to yara Yesus taune bop.

⁹ Arono una no unat ti wakajeve, naije Yesus po apa ayao raura nanto mai inda mansaemen dai pare, “Vemo wapo ana

wapo raen umawe raura vatano kaijinta mai jinya, yara no ava Risy, Arikainyo Vatan, ikovakato no wene rai rati.”

¹⁰ Yesus apa arakovo mandeije umaso ubeta Apa ayao umaso rai, wo ana nande umawe raura vatane raije ramu. Weramu wayao vambinibe ware, “Apa ayao pare kakai ara kovakatoe wato ama tunato raije mamo no tai rui?” ¹¹ Umba wo Yesus anajo ware, “Veanimaibe kuruno makari mbaro Ananyao Musa raije wo raura ware anawae Elia wepi de wusyimbe rati, umba Mesias dijat?”

¹² Yesus po raura akananto mai pare, “Tugae, Elia pamo de wusyin indamu po anakotare ratayao mamai tenambe. Weramu animaisye mi Ayao Amisyee mo rinaura? Mo ratoe mare Risy, Arikainyo Vatan, indati risiuri rave muno vatane wo rinave tatugadi. ¹³ Muno Syo raura wasai: Elia pamo de to, weye Yohanes Pembaptis opamo vatano po Elia apa anakere raijare pi je. Muno vatane wo ave tatugadi mamasiso awa bekere rai, mamasiso irati urairijo ratoe no Ayao Amisyee raijoe rai.”

Yesus po saumane raunanto arikainyo anawayo kakai je nsiso aije ai

(Matius 17:14-21; Lukas 9:37-43a)

¹⁴ Arono Yesus muno Apa arakovo mandeije umawe wakare no Apa arakovo kaijinta mansai, wo vatano wanuije maen wanugano makiani. Kuruno makari mbaro Ananyao Musa rai inta wayao ensemble nanto Yesus apa arakove umawe mansai. ¹⁵ Arono vatano wanuije umaso wo Yesus aen, upaparo mai umba wansanan indamu wo kove raura Ai. ¹⁶ Yesus po apa arakove umawe manajo pare, “Animaisye mi wapa yao ensemble nanto kurune wato mai?”

¹⁷ Umba vatane inta no no awa yasyin po raura nanto Yesus ai pare, “Injayo Kurune, syo sya arikainye augare Winai weye anawayo kakai je mo aveti awa ngkao. ¹⁸ Arono anawayo kakai je mo antutup, weamo mo anasine raugaje mo ranepato kopa rai, awa kavavugae muje, atomokane ntitiki, umba anakea mpanyoan tenambe. Syo Nya arakovo utavondi naije manajo indamu wo anawayo kakai je umawe rawatambe, weramu umamaisye ramu.”

¹⁹ Umba Yesus po raura akananto mai pare, “Abo! Tugaeyamo weapamo vatano wapanave kobe jeven! Risiamo inatawandi wasai nugoenta to! Rino no wapa yasyine rai, Syo wasanyao nugoenta to, weti nandui rati umba wapare wapanave Rinai? Syare nyo arikainye umawe augavere Rinai.”

²⁰ Weti wo arikainye umawe augavere kobe Yesus ai. Weramu arono anawayo kakai je nowo arikainye umaso ai mo Yesus

aen, kavuratawe mo arikainye umaso aveti anasine mangkangkambe, umba tende doyabe no kopa rai, muno awa kavavugae muje. ²¹ Yesu po arikainye umaso apa aja anajo pare, “Opamo beare so maisya tume ruimai to?”

Apa aja pare, “No arono mamaunoea ndea panakoe so. ²² Anawayo kakaije so mo nandeve ai tutira manui rave mare mo aubaisy. Ti intanamo mo aveti temasyo taname rai, umba intanamo mo aveti temasyo mana rai. Injae, naemeno reansai! Ranivara Nya vambunine mamaisy, weamo syare Nyo kove raunande reansai!”

²³ Yesu po raura pare, “Vemo nyo raura nyare, ‘ranivara Nya vambunine mamaisy,’ weinya! Nya anave Rinaije mamaun dave. Yara Amisy pare po anakotaro rui vayave raunanto vatano panave Aije ai.”

²⁴ Naije kobe aja gwain pare, “Syanave ivae, weramu syanave mamaun ti syare Nyo kove raunande rinai inda syanave manakoe.”

²⁵ Arono naije Yesu po vatano wanuije maen wansansanan ude wanunugambe, weti pavave Po anawayo kakaije rawatan pare, “Anawayo kakaije, winyirati nyo arikainye so aveti amarikoame mpapaki, awa ngkao, syare winyusyo arikainye so aora! Muno vemo nyakaiso ai jakato inya!”

²⁶ Anawayo kakaije munanto akoeve, mo arikainye umawe aveti anasine ntampopot ai, umba musyo aora. Naije arikainye umaso anakea manin dave maisyare kakaije wemaisy, weti vatano wanui ware kakai to. ²⁷ Weramu Yesu po arikainye umawe aneme rajiseo, ti seo tet, sauman kobe.

²⁸ Umba Yesu siso no yavar muno Apa arakovo utavondi aije obo utavondi ti una mumuimbe. Umba arakove umaso wo Yesu anajo ware, “Injae, veanimaibe irati reamo anawayo kakaije umaso rawatambe jeben? Veanimaibe reamamaisy jeben?”

²⁹ Yesu po raura nanto mai pare, “Anawayo kakaije maisyare so maisyare rawatan irati ana kajinta rajiseo jeben, yara wasambayambe wadoura seo obom ndave, wea umba pusyo.”

*Yesu po apa kakaije raura nakato
(Matius 17:22-23; Lukas 9:43b-45)*

³⁰ Yesusa pe apa arakovo utavondi aije nawe wusya uno rajiseo raora umba wanya uta no Galilea. Yesu ponayo vatano wanuije wo aeni, ³¹ weye Po apa arakovo utavondi aije manyaube. Po raura mai pare, “Risy, Arikainyo Vatan, indati rinamavun nanto vatano mine so mai. Indati wo rinaubaisy, weramu masyote mandei umba ikovakato no wene rai.”

³² Weramu Apa arakovo utavondi aije wantatukambe Apa ana daura umaso ama tunato rajiseo rai, muno ujaniv weti wo anajo rajiseo ramu.

*Yesu beker pare wansanuga mpaaje,
maisyare arikainyo tuvane mansamaisy
(Matius 18:1-5; Lukas 9:46-48)*

³³ Yesusa pe wanya unanta no munijo Kapernaum. Usisa no yavar, umba Yesu po apa arakovo utavondi aije manajo pare, “Animaisy mirati wapayao ensemble rai no unanuije ama yasyine umawe?”

³⁴ Weramu usamane ti umanin bayave. Weye unanuije ama yasyine umawe wayao ensemble ware onawamo are pirati panakoeve mansai.

³⁵ Yesu tuna umba Po apa arakovo abusyinara eane rurum mawainde. Po raura mai pare, “Vatano are pirati pare seo tame rai, syare anuga mpaaje muno opamo apa arakove nawamo panapatambe mai tenambe.”

³⁶ Umba Yesu po arikainyo tuvane inta augavere te no mansamun, umba Po aijade po akepan. Muno Po raura nanto Apa arakove mai pare, ³⁷ “Are pirati bekobe arikainyo tuvano maisyare somaisy ai weye panave Rinai, opamo bekobe Rinai to ije. Muno are pirati bekobe Rinai, opamo bekobe Sya Injajo po inatutire Ai to.”

*Are pirati po wansave tatugadije jeben,
opamo wama arakova piye
(Lukas 9:49-50)*

³⁸ Umba Yohanes po raura nanto Yesu ai pare, “Injajo Kurune, reamo vatane inta aen po anawayo kakaije rawatano Injae nya tame rai. Weti reamo ansopi weye tavono wansaije ramu.”

³⁹ Yesu po raura pare, “Vemo wapo ansopi nora, weye are pirati po Sya tame veano anapaporainye raroron, weamo indati po inaura tantunawije jeben. ⁴⁰ Are pirati po wansave tatugadije jeben opamo wama arakova piye. ⁴¹ Are pirati po mana inta raunande wapo ramanam weye watavondijje Mesias rinai, opamo indati po ama ine raen, weye Amisy po kove inta raude ai jaje.”

*Anakotaro mo vatane manuga raugabe
indamu wo ayao kakaije rave
(Matius 18:6-9; Lukas 17:1-2)*

⁴² “Weramu are pirati po arikainyo tuvano wanave Inaije inta aponae ti po ayao kakaije rave, opamo indati Amisy po parijo mangke raugaje ai. Weti kove mamo orame rapuisyo vatane wato ai amaugusyo no mayane rai indamu mansyan, weye wemirati mangke mamaun, yara mangke Amisy pare po raugaje ai manakoeve mo mangke umaso rakivan.

⁴³ Ranivara naneme mo naugavo ayao kakaije raron, weamo nyo raotar da ndamauta. Weaveti winsiso kovo nuge nuganuije rai naneme intabo ngkovo obo rautan, omamo ngkovo nai. Weramu ranivara winyo ayao kakai rave tutir, weaveti winsiso tanamo mbadururo nuge nuganuije rai naneme jirum rautan, omamo ngkove ramu. ⁴⁴ Tanamo mbadurure ratuije omamo mpamoe ramu, muno kangkuname wo anasino kopa rai tutir, weti siurije noa nuge nuganui. ⁴⁵ Muno ranivara najoe mo naugavo nyo ayao kakaije rave, weamo nyo raotar da ndamauta. Weaveti winsiso kovo nuge nuganuije rai najoe intabo vayave rautan, omamo ngkovo nai. Weramu ranivara nyo ayao kakai rave tutir, weaveti namaugusyo tanamo mbadururo nuge nuganuije rai najoe jirum rautan, omamo ngkove ramu. ⁴⁶ Tanamo mbadurure ratuije omamo mpamoe ramu, muno kangkuname wo anasino kopa rai tutir, weti siurije noa nuge nuganui. ⁴⁷ Muno namije mamo mo naugavo ayao kakaije raron, weamo nyo rakewar uje. Weaveti winsiso munijo Amisybe akarive rajije rai namije intabo vayave rautan, omamo ngkovo nai. Weramu ranivara nyo ayao kakai rave tutir, weaveti namaugusyo tanamo mbadururo nuge nuganuije rai namije jirum rautan, omamo ngkove ramu. ⁴⁸ Tanamo mbadurure ratuije omamo mpamoe ramu, muno uve wo anasino kopa rai tutir, weti siurije noa nuge nuganui.

⁴⁹ Amisybe po taname veano vatano wanave Aije mamer tutudi indamu manuga ndandinit, maisyare muno syene wo garame rataopondijo anakotaro rameseo Amisybe aije rai indamu mamaisy. ⁵⁰ Weapamo wasaurata irati garame rai. Garam omamo ngkov, yara mare ngkurude to, weamo ngkov akatoe ramu. Weti maisyare muno garame mo kove raunande anaisybe rai, maisyare wemai tavon syare wapo kovo saumane raunande indamu wasaumano wasai vambinibe.”

10

Ananyao anya po apa wanya rauguje aora

(Matius 19:1-12; Lukas 16:18)

¹ Yesus puje no munijo Kapernaum raora umba Po mana Yordan raotar ti siso no Yudea. Vatano wanuije ude akato wanutugambe akiani umba Po mansanyao akato, weye arono rui vatano wanuije ude Ai opamo pananyaube.

² Vatano Parisije inta ude tavon ware wo atopano Apa ana daura rai. Weti wo anajo

ware, “Vatane inta po apa wanya rauguje aora, weamo mamai dako jewena e?”

³ Umba Yesus po raura nakananto pare, “Animaisybe mi Musa po wasanyao rai?”

⁴ Wo raura nanto Ai ware, “Musa po raura pare anya po apa wanya rauguje kai, po ama nyovara wao rauguje ratoe rati indamu mo raugav umba muje kobe.”

⁵ Umba Yesus po raura akananto mai pare, “Weapamo wasanuga matu wemi mbewar Musa po ananyao umaso raugaje wasai. ⁶ Weramu po ratoe tavon pare, ‘Arono munije ama manasyinoe Amisybe po vatane yanarijamo anya pe wanya me naye.’ ⁷ Maisyare omai ti, anya po akoya me aja pe yapaya ti inya, yara to apa wanya rai, yanasine mbe intabove.’ ⁸ Weti, we-nayamo ibe rurumbe akatoe ramu, yara ibe intabove. ⁹ Maisyare omai ti, Amisybe po anya, wanya umaso yanugande ibe intabove, weti vemo vatane wo yaporabe jirum akato inya.”

¹⁰ Arono Yesusa pe usisa yavare rai jakato, Apa arakovo utavondi aije wo anajo anakotare umawe rai. ¹¹ Umba Yesus po raura nanto mai pare, “Are pirati po apa wanya rauguje aora yara po wanya kaijinta raovan akato, vatano napije serer. ¹² Maisyare omai tavon, wanya inta mo ama anap auguje raora yara mo anya kaijinta aovan akato, weamo wanya namije nsrer.”

Yesus po kove raugaje arikainye mai (Matius 19:13-15; Lukas 18:15-17)

¹³ Vatane inta wo awa arikainye maugavere no Yesus nui indamu Po aneme raugaje ntamijo mai umba Po kove raugaje mai. Weramu Apa arakovo utavondi aije uparijo vatano wo arikainye maugare umaso mansai, weti ware wo mansaorai. ¹⁴ Arono Yesus po umaso raen, pari. Umba Po raura nanto mai pare, “Vemo wapo arikainye umaso mansaorai nora, yara mapaya vayave ra ude Inai kai! Weye vatano maisyare arikainye so awa ramaisybe jeben, opamo tavondijo kawasaeyo Amisybe akarive maije mai ramu.” ¹⁶ Naije Yesus po arikainye umawe maijade Po makepan, umba Po aneme raugaje ntamijo mai muno Po kove raugaje mai tetebe.

Vatano apa ananuge manui rave aije inta de Yesus ai

(Matius 19:16-30; Lukas 18:18-30)

¹⁷ Arono Yesus panya Apa ananui anya rai jakato, naije vatane inta pansanan de

no Yesusa nui. Umba po vukane ranteter no Amun, po anajo pare, “Kuruno ko dave Winy, animaisye mirati syo rave indamu syaveo kovo nuge nuganuije rai?”

¹⁸ Yesus po raura akananto ai pare, “Mbeanimaibe nyare Risya kov? Amisybe bo pi kov, yara kaije nawamo jeben. ¹⁹ Winyo Amisybe apa ananyaowe raen to no taiso: “Vemo nyo vatane maubaisy inya, vemo nyo anaerere rave inya, vemo nyanaonoambe inya, vemo nyayarurijabe vatane mai jinya, vemo nyo vatane maponae inya, muno mbeaje irati inya pe nangkoya me yai.”*

²⁰ Vatane umaso po raura akananto Yesus ai pare, “Injayo Kurune, ananyaowe umaso mamu ritavono rai tenambe no arono ikamuramoe.”

²¹ Yesus po vatane umaso aen muno aemeno ai, umba Po raura nanto ai pare, “Ana inta bo mirati wintavondijo raije ramu. Nyoronto nyo nya ananuge ramavun tenambe umba nyo ama doije raunanto vatano awa ananuge meweno mansaije mai, wea umba Amisybe po kove ratayao ti ntuna mo nanyut no munijoti. Wea umba nde ra ntavono Rinai.”

²² Arono vatane umaso po Yesus apa ayao umaso ranaun, amune ntende. Weti puje yara animaumbe rave weye apa ananuge manui rave.

²³ Umba Yesus po apa arakovo utavondi aije maen tenambe, Po raura nanto mai pare, “Vatano apa ananuge manui rave opamo sosobe aijo tavondijo kawasaeyo Amisybe be akarive maije mai.”

²⁴ Yesus apa arakove unantaive Apa ayao umaso rai. Umba Po raura nakato pare, “Sya arikainye weap, vatane ware utavondijo kawasaeyo Amisybe be akarive maije mai, weamo sosobe mai. ²⁵ Tugae, vatano apa ananuge manui pare siso kawasaeyo Amisybe be akarive maije mai omamo nsosobe rave, maisyare unta siso kuwayaisyije apa uga ai, weamo mamaisybe ramu.”

²⁶ Yesus apa arakovo utavondi aije upaparo mai, weti wo raura wasai vambinibe ware, “Wakoe! Maisyare omaisyamo are pirati indati kovo nuge nuganuije raunande ai? Vatane inta mamaisyoi rai ramu!”

²⁷ Yesus po maen umba pare, “Vatane nawamo umamaisybe ramu, yara Amisybe bo pi bambunin po kovo nuge nuganui raunande vatane mai. Amisybe bambunin po anakotaro rui vayave rave.”

²⁸ Umba Petrus po raura Ai pare, “Injae, Nyo reansaenamamo reamo anakotare rapaya vintabo to indamu reantavono Injae nai.”

²⁹ Yesus po raura akananto mai pare, “Syo raura tugaive: are pirati po apa arakovo anya, wanya nao rako, akoya me aja pe nai rako, apa arikainye nawe mapaya ti una, muno po apa yavere ndako apa nawaisybe rako rapaya ti ntuna indamu tavondi Rinai muno po Ayao Kove raugavo vatane mai, ³⁰ opamo Amisybe po kovo manakoe raugakanande ai. Amisybe pare po yavere, arakovo anya, wanya, akoya, arikainye, muno nawaisybe raugakanande ai ti awa manuije nseo rave no nugo naiso. Weramu vatano napije pamo vatano mine so manuga mamuno ai muno wo ave tatugadi weye tavondi Rinai, weramu arono munije ama akari indati Amisybe po kovo nuge nuganuije raunanto ai. ³¹ Weramu vatano wanui nanawirati wuibe no mine so indati wakare udijat arono munije ama akari. Yara vatano wanui nanawirati udijabe no mine so nawamo indati wakare wuisy akato.”*

Yesus po apa kakaije raura nakatove mandei

(Matius 20:17-19; Lukas 18:31-34)

³² Yesusa pe wanya ti uta no Yerusalem, Yesus wepi puisy. Apa arakovo utavondi aije onawamo manuga mamaun, muno vatano wo marijate ujani dave. Umba Yesus po apa arakovo abusyinara eane rurum mawainde mumuimbe, umba Po ana indati nande Aije raura mansai. ³³ Pare, “Wadanide! Soamo wamare wanta no Yerusalem. Wansisa rai umba Risy, Arikainyo Vatan, indati inamavun nanto irati syeno akokoe muno kuruno makari mbaro Ananyao Musa raije mai, umba wo mangke rapatimugo Rinai inda ikakai. Umba wo inaananto no vatano Yahudi jewene mansai. ³⁴ Indati wanaikebe Rinai muno wo inanyipube. Indati wo inanepato kajjo waije rai, umba wo inaubaisy. Weramu masyote mandei umba ikovakato no wene rai.”

Yakobusa pe Yohanesa pe aya ana yo ranajo

(Matius 20:20-28)

³⁵ Yakobus muno Yohanes, onayamo Sebedeus apa arikainye naya, je no Yesusa nui, umba yo raura Ai yare, “Injayo Kurune, ana inta mi ririmbekero rai rimare Nyo raunande irati ririnsamarom.”

³⁶ Weti Yesus po yanajo pare, “Animaisybe mirati wuribekero rai ipare Syo raunande isai?”

³⁷ Umba yo raura nanto Ai yare, “Rimbeker rimare ririmamo inta tuna no Injae

* **10:19** Keluaran 20:12-16; Ulangan 5:16-20 * **10:31** Ayao so ama ine mare vatano wanui nanawirati awa tame nnti no mine so indati wakare awa tame maje arono munije ama akari. Yara vatano wanui awa tame maje no mine so indati awa tame nnti jakato arono munije ama akari.

nanem ngkove rai, inta tuna no nanem ngkakai rai arono wimbe akarive muno Nyo nya kovo ntiti raroron.”

³⁸ Yesus po raura yai pare, “Wuripamo ipantukambe ipa ana idanajo wato rai! Indako ipare itavono Inai ti siurijo manakoe syare Syo ranawan omamo ipo ranawan tavon dako? Muno siurijo kakaijo syare inatawandi raije mamo ipare itavondi isatawandi rai tavon, wuripa mama dako?”

³⁹ Yo raura akananto Ai yare, “Ririma-maisy aje.”

Umba Yesus po raura nakananto yai pare, “Tugae, indati wuripamo itavono Inai ipo siurijo manakoe ranawan, muno isatawandi siurijo kakaije rai. ⁴⁰ Weramu are pirati tuna no inanem ngkove muno tuna no inanem ngkakai wemamo Risy syo rapatimuge ramu, yara Amisy pi po rapatimugo are nairati jantuna rai.”

⁴¹ Arono Yesus apa arakovo kaijo abusyin wo ana umawe ranaun, uparijo Yakobusa pe Yohanesa pe yai. ⁴² Weti Yesus po mawainde vintabo, umba Po raura nanto mai pare, “Wapo raen akarijo mine so manayanambe wo awa vambunine rarorono vatane mai. Muno vatano wanakoe manayanambe wo vatane matutir. ⁴³ Weramu weapomo wabemo wabe taije maisy inya. Yara are pirati beker pare panakoeve no wapa yasyin, syare opamo panapatambe wasai. ⁴⁴ Muno are pirati pare seo tame rai, syare opamo panapatambe vatane mansai tenambe. ⁴⁵ Syare wapapatambe maisyare naije weye Risy, Arikainyo Vatan, ride indamu vatane wanapatambe Rinai omamo jewen, yara ride indamu syanapatambe vatane mai muno Syo inanasine raunande kakai indamu Syo vatane wanui mapaya awa ayao kakaije rai.”

Yesus po saumane raunanto Bartimeus amije ntuba ai

(*Matius 20:29-34; Lukas 18:35-43*)

⁴⁶ Yesusa pe apa arakovo utavondi aije nawe usisa no munijo Yeriko. Arono wusya irati munije umawe raora, umba vatano wanuije wusya vintabo utavono mai. Naije vatano amije ntuba inta tuna no unanuije ama tuga panatambe. Vatane so apa tame mirati Bartimeus, opamo Timeus apa kavo pije. ⁴⁷ Bartimeus umaso po Yesus, vatano Nasaret, anauno detowi, weti gwain pare, “Yesus, Daud apa ajavijo Winy, naemeno rinai!”

⁴⁸ Vatano wanui uparijo ai ware, “Manin!”, weramu gwain akoeve akato pare, “Daud apa ajavijo Winy, naemeno rinai!”

⁴⁹ Umba Yesus te kobe, Po raura pare, “Wapo awainde.”

Umba wo vatano amije ntuba umawe awainde ware, “Winde rati! Muno nanuga mbambunin! Weye Yesus po nawain.” ⁵⁰ Vatano amije ntuba umawe po ansuno po veano akepane rapaya ti ntami, umba seo pavave de no Yesusa nui.

⁵¹ Yesus po anajo pare, “Animaisye mi nyare Syo raunande nai?”

Umba vatano amije ntuba umaso po raura pare, “Injajo Kurune, syare ibekero syo nuge raeni.”

⁵² Umba Yesus po raura akananto ai pare, “Nyoronto kai. Winyanave Rinai jivae, wirati winsaumanoe.”

Naije kobe vatano umaso amije mbar ti po ana raen kakavimbe, muno panya Yesus atavono Apa unanui anya rai.

11

Yesus aovambe no Yerusalem (Matius 21:1-11; Lukas 19:28-40; Yohanes 12:12-19)

¹ Arono Yesus pararai no Yerusalem, nanto no munijo Betpage muno Betania, no no Pukamo Saitun ama awananem. Umba Yesus po apa arakove rurumo javondijo aije yatutir uisy. ² Pare, “Wurita sisa no munijo mararai no usye wato rai. Naije kobe ripo keledaijo kamuram raokae ti nte no ratuije inta raen. Keledaije ratuije omamo vatane inta useave rai rainya nene. Ti ripo waije raneka rai indamu ipo rauga da ride no Rinui. ³ Vatan inta ware wo risanajo ware, ‘Ibeanimaibe ipo keledaije wato raneka ti ripo raugav?’ Weamo ipo raura nanto mai ipare, ‘Injajo Yesus pare beker rai, ti kav-inta rati umba Po raugavakare.’”

⁴ Yesus apa arakovo rurume umaso ija nyanta irati keledaijo kamuram umaso rai raokae ti nte no unsanda yavare repon unanuije tuga. Umba yo keledaije umaso raneka. ⁵ Vatano usai no ratuije wo yanajo ware, “Ibeanimaibe irati ipo keledaijo kamurame so rapaya?”

⁶ Umba yo ana uma Yesus po raura yaijoe raura mai, weti vatane umaso wo raura ware, “Ipo keledaije so rauga kai.”

⁷ Arono yo keledaije rauga ti nyande Yesus ai, Apa arakovo utavondi aije wo awa ansuno veano makepane rayanondijo keledaije ama akiri mona rai, umba Yesus seo tuna rai. ⁸ Vatano wanuije wo awa ansuno veano makepane rayanondijo unanuije yasyine rarijat, muno inta wo kaipe waowe rauga no nawaisy wo rayanondijo unanuije rarijat tavon. Umba Yesus panya rai ti to kobe. ⁹ Vatano wanuije wanya inta wuisy, inta udijate. Umaso manayanambe tenambe ti ugwain ware, ¹⁰ “Amisy ararimbe!”

Kove ngkov irati Napi de tamo Amisy e rautane Ai![✠]

Kove ngkov irati wama aneno Daud apa ajavi Apa de be akarive wansaije rai! Amisyo no no munijo ntiti ararimbe!”

¹¹ Umba Yesus siso no Yerusalem. Arono siso no Yavaro Amisy, panya Po raen kiani tenambe. Weramu mare mbera ngkaumur kobe ti puje to no munijo Betania muno Apa arakovo abusynara eane rurume utavono Ai.

*Yesus panaamatambe inyo ara rai
(Matius 21:18-19)*

¹² Sansimambe umba Yesusa pe apa arakovo utavondi aije nawe wuje Betania raora, naije Yesus maror. ¹³ Po inyo ara inta raen nteto gwaravaimbe, ama waowe muman dave, ti poroto no ama ruk indamu Po ama mane raen. Weramu arono nanto ama ruke rai, Po raen ama mane mewen dai yara ama waowe bo ma, weye ama masyoto mane nande ma nde rainya nene. ¹⁴ Umba Yesus panaamatambe inyo ara umaso rai pare, “No naiso kobe, indati vatane inta po nya mane inta raisy akatote ramu gao nuge nuganui.” Muno Apa arakovo utavondi aije wo Apa ayao po raura nanto inyo ara umaso ranaun.

*Yesus siso no Yavaro Amisy
(Matius 21:12-13; Lukas 19:45-48;
Yohanes 2:13-22)*

¹⁵ Naije unanta no Yerusalem, umba Yesus siso no Yavaro Amisy. Umba Po vatano wanamavumbe no naije mawatan. Muno Po vatano wo doi amijo kajinta raugare raveano doi ami Yahudi ranigwane awa meja rangkukuv, umba Po vatano wo insanijo puname mamavune awa bangkoe rangkukuv tavon. ¹⁶ Umba Po vatane mansopi, pare, “Vemo wapo ananuge rauga wapanya wapo Yavaro Amisy ama wanijateye raideta nora.” ¹⁷ Muno Po vatano nanawije manyao pare, “Ayao Amisy mo ratoe mare, ‘Sya yavare omamo rawainamo yavaro sambaya vatane kotaro ntuna no mine so mansai tenambe.’ Weramu wapo ravea maisyare vatano mamun wanaonoambe awa una rai bo inta ramai dave.”[✠]

¹⁸ Arono syeno akokoe utantuna no Yavaro Amisy raije nawe, kuruno makari mbaro Ananyao Musa raije nawe wo Yesus apa ana po rave umawe ranaun, ubeker ware wo aubaisy. Weramu wo asyaniv weye vatano wanuije unantaive Apa ananyaowe rai.

¹⁹ Mare ngkaumur kobe, weti Yesusa pe apa arakovo utavondi aije nawe wuje irati munijo Yerusalem raora.

Wapanave Amisy e ai kobe, weamo animaisye mi wapo ranajo Ai, indati Po raurande wasai

(Matius 21:20-22)

²⁰ Awatan ngko dave, Yesusa pe wanawadijo inyo ara umawe ama ruke raito. Muno wo inyo ara umaso raen omamo ngkanena masyo no ama piipe waraya ti ngkakai to. ²¹ Petrus aemeno ana namanawe rai weti po raura nanto Yesus ai pare, “Injayo Kurune, nyerato! Inyo ara nyanaamatambe raijoe ngkanen to!”

²² Umba Yesus po raura pare, “Syare wapanave Amisy ai. ²³ Syo raura tugaive: ranivara wapo unate wato raura nanto wapare, ‘Nyansop usya ntento no mayan!’ weamo wadoura somamo Amisy po raurande wasai kobe. Weramu weapamo vemo wamamaundive rai jakato inya, yara wapanave wapare animaisye mirati wapo ranajo nande kobe, naijeamo Amisy po raurande wasai. ²⁴ Maisyare omai ti, animaisye mi wabe sambayambe wapo ranajo Amisy ai, weamo wapanave kobe wapare Po raurande wasai. Tugae, indati Po raurande kobe wasai.

²⁵ Arono wabe sambayambe, ranivara wasanuga mparijo vatane inta ai ma inta no wasai, weamo syare wata wapo aneme raija dati inda wasanuga nsauman. Syare wapo raveare wemaisy indamu wapa Ajayo no no munijo ntiti Po wapa ayao kakaije rapaya wasai. ²⁶ Weramu ranivara wapo aneme raijare jeven, indati wapa Ajayo no no munijo ntiti Po wapa ayao kakaije rapaya wasaije ramu.”

Akarije inta wo Yesus apa vambunine ranajo

(Matius 21:23-27; Lukas 20:1-8)

²⁷ Wakare akato no Yerusalem, umba Yesus pananave Yavaro Amisy rakiani. Naije syeno akokoe utantuna no Yavaro Amisy raije nawe, kuruno makari mbaro Ananyao Musa raije nawe, akarijo Yahudi nawe ude Ai. ²⁸ Wo anajo ware, “Vambunino rui mirati Nyo raveare somaisy? Are pirati po vambunine so raugaje Nai?”

²⁹ Yesus po raura nanto mai pare, “Syare syo wasanajo tavon. Wapo raura nande Rinai rati, umba Syo raura nande wasai arepa vambunine mi Syo raveare somaisy. ³⁰ Arono Yohanes Pembaptis po vatane maugasya kuvuni mana rai, Amisy pi po vambunine raugaje ai rako, vatane inta pi po raugaje ai rako? Wapo raura!”

³¹ Umba syeno akokoe nawe, kurune nawe, akarijo Yahudi nawe, wanugan wayao mumuimbe. “Ranivara wamo ayaowe rasakinav wamare Amisy pi po vambunine raugaje Yohanes ai, wea

✠ 11:17 Yesaya 56:7; Yeremia 7:11

indati Yesus po wansanajo veanimaibe wamanawe Yohanes ai jewen? ³² Weramu ranivara wamare vatane inta pi po vambunine raugaje Yohanes ai, indati vatane uparijo wansai.” Wo vatano wanuije masyaniv weti wonae wo Yohanes aura tantunawiji, weye vatano wanui umaso wo ratantona ware opamo anawae Amisye inta pije. ³³ Weti wo raura nakananto Yesus ai ware, “Reamamo reamantukambe.”

Umba Yesus po raura nanto mai pare, “Maisyare omai ti, Risyamo syonae syo ana wapo inanao Sya vambunine rajie umawe raura wasaijija.”

12

*Ananeneae nawaisyo angguri
(Matius 21:33-46; Lukas 20:9-19)*

¹ Umba Yesus po ananeneae inta raura akananto akarijo Yahudi umawe mai. Po raura pare, “Vatane inta po nawaisye rayare, po anggurije ranyum, umba po yane rayano rakiani. Umba po ateme rawae indamu po rave anggurije mane rakugan asyo ama uga rai, umba po randume ranari no nawaisye ama uga indamu vatano po nawaisye ramane no rai. Umba po vatane inta mawainde indamu wo apa nawaisye raeranande, pare po mane ratodijo mai—wo inta raugav muno wepo inta raugav. Umba pusyo poroto no munijo maran. ² No ava anggurije umawe mawit kobe, umba vatano apave nawaisye umaso rai po apa vatano panapatambe aije inta atutir indamu de no vatano wo apa nawaisye raeranande mansai indamu po apa mane inta raugav.

³ Weramu arono vatano panapatambe umaso de no nawaisy, vatano wo nawaisye raeranande umawe wo ajar umba wo anepati, muno wo awatambe ti nin anem bayave yara pakato. ⁴ Umba vatano apave nawaisye rai umawe po vatano panapatambe aije kaijinta atutir akato ti pakato. Weramu vatano wo nawaisye raeranande umawe wo akarije ranepat muno wo ave tatugadi. ⁵ Umba vatano apave nawaisye rai umawe po vatano panapatambe aije kaijinta atutir akato ti pakato. Weramu vatano wo nawaisye raeranande umawe wo aubaisy. Umba maisyare omai tutir bayave, po vatano wanapatambe aije wanuije matutir akato, weramu wo inta manepati muno wo kaijinta maubaisy.

⁶ Rija dave, apa kavo anuga no ai rave obo pirati no. Weti po apa kavo umaso atutiro vatano wo nawaisye raeranande mansai. Po ratantona pare, ‘Indati wanave sya arikainye ai jaje.’

⁷ Weramu vatano wo nawaisye raeranande umaso wayao vambinibe ware, “Sopamo akarijo nawaisye apa arikainye pi so! Wade wamo aubaisy, indamu arono apa aja kakai, umba wamura nawaisye so rai.” ⁸ Umba wo arikainye umawe ajar wo aubaisy, umba wo anasino kopa ramagusyo no nawaisye ama akiri.”

⁹ Umba Yesus po manajo pare, “Animaisye mirati akarijo nawaisye umawe po rave? Indati de aje, po vatano wo nawaisye raeranande umawe mansaubaisy, umba po nawaisye raunanto vatano kaijinta mai jakato indamu wo raeranande akato. ¹⁰ Wabeanimaibe wananta Ayao Amisye so rajie jewen? Mare:

‘Orame somamo vatano wo yavare ranari wonayo rai
ti wo ramauta vayave.

Weramu omirati oramo manasyin dave Amisye po
ratayao indamu yavare rausea nteto rai mo rajiar matuve.

¹¹ Somamo Amisye apa ana daveye ma.
Wamo raen, wanantaive rai.’* ”

¹² Arono akarijo Yahudi umawe wo Yesus apa ananeneae umasom ranaun, upari weye wo raen Po ratantona pare onawamo maurata irati vatano mamun wo nawaisye raeranande umawe mansai. Weti ware beker indamu wo ajar. Weramu wo vatano wanuije masyaniv, weti usya ti uta aora.

*Ananyao pajak raunanto pemerinta ai
(Matius 22:15-22; Lukas 20:20-26)*

¹³ Akarijo Yahudi wo vatano Parisije muno vatano usisa varoro Akarijo Titi Herodes aije inta matutir indamu wo Yesus atopano Apa ana दौरा rai. ¹⁴ Weti ude no Yesusa nui umba wo raura ware, “Injayo Kurune, reamo naenam Nyo ayao tugae obo raura. Nyo vatane masyanive ramu muno Nyo vatane inta mansamamaribe ramu, yara Nyo Amisye apa bekere raura tugaive vatane mai. Weti reamare Nyo raura reansai: Mamaisyo wama ananyao rajjamo wamo pajak ravae dako jewena e? Wamo doije raunanto Akarijo Titi Roma Kaiser ai rako jewen kaije?”

¹⁵ Yesus po mansaen awa angkarije ntapekano mai. Po raura nanto mai pare, “Wabeanimaibe wapare wapo inatopan? Syare wapo doije vasye inta rarorono Rinai.”

¹⁶ Weti wo doije vasye inta raunanto Ai. Umba Yesus po manajo pare, “Arepa amune mi no doije rajie so? Arepa tame mi so?”

Wo raura nanto Ai ware, “Akarijo Titi Roma amune ma muno apa tame mijie.”

* 12:11 Mazmur 118:22-23. Orame umaso raurata irati Mesias ai.

¹⁷ Umba Yesus po raura nakananto mai pare, “Akarijo Titi Roma apa ma, weti animaisye mirati po ranajo wasai, wapo rauranto ai. Muno animaisye mirati Amisye po ranajo wasai, wapo raunanto Amisye ai tavon.”

Arono wo ayao umaso ranaunoe, unantaive rai.

Yesus po ayao wene muno kovakatoe raura

(Matius 22:23-33; Lukas 20:27-40)

¹⁸ Vatano Saduki inta ude no Yesusa nui. Wenawamo wo ratantona ware arono munije ama akari, vatano ugwenen to nawamo ukovakatoe ramu. Umba ubeker wo Yesus atopano Apa ana daura rai, weti wo raura Ai ware, ¹⁹ “Injayo Kurune, Musa po ananyao so ratoe wansai pare, ‘Ranivara anyia inta kakai, apa arikainye meweno ai, weamo apa rijate inta noamo po apa anamugo kavinije umawe raovan akato indamu ama arikainye inta aenamo nanto teto ajayo anui uma kakajoe apa tanoane rai jakato.’ Musa apa ananyao no tai maisy. ²⁰ Weti vatano anyia mano kaururum ube arakobe. Awa anuije baurum, umba kakai, apa arikainye meweno ai. ²¹ Umba naije apa rijato no akaje aije po apa anamu kavinije umawe raovan akato, weramu opamo kakai tavon, arikainye meweno ai. Muno ana maisyare omaisye bo mirati no apa rijato no akaje aije ai tavon. ²² Maisyare omaisy ao maje irati rija dave kaururume ai. Weti arakove nanentabo po wanya umawe raovan, weramu kakai tavon, apa arikainye meweno ai. Umba wanya umawe taune ngkakai tavon. ²³ Maisyare omaisyamo, arono vatano ugwenen to maijasea ukovakato no munije ama akari, wanya umawe mammo are pi apaura rai? Vatano kaururume umawe wo raovan to!”

²⁴ Umba Yesus po raura nanto mai pare, “Weapamo wapo Ayao Amisye raen kobe jeben muno wapo Amisye apa vambunine raene ramu, ti wapantatukambea. ²⁵ Arono vatano ugwenen to maijasea ukovakato no wene rai, indati ubaunam akatoe ramu, yara unoare maisyare muno naito Amisy uno no munijo ntijite mansamaisy. ²⁶ Ananyao vatano ugwenen yara ukovakato mammo Ayao Amisye mo raura kakavimbe. Wasaemen dako ayao Amisye po raura nanto Musa ai arono aroronno ai no tanamo mbadurur no randa uga umbuga kanene rai we raija rako? Amisye po raura Musa ai pare, ‘Risyamo nya aneno Abraham, muno Isak, muno Yakob, awa Amisye pi Risy.’” ²⁷ Ayao umaso ama tunato raije mare anene umaso

ugwenen to weramu manawayoe tuna tawan. Maisyare omaisy, Amisye pamo vatano ugwenene awa Amisye pa jewena, yara vatano ujaisye awa Amisye pije. Vatano Saduki weap, wapantatukambe rave!”

Ananyao mbe mobe

(Matius 22:34-40; Lukas 10:25-28)

²⁸ Kuruno akari mbaro Ananyao Musa rai inta po Yesusa pe Saduki nawe awa ayao umawe ranaun. Po ratantona pare Yesus po raura nanto mai kobe rave, weti po Yesus anajo pare, “Ananyao rui mirati mbe mobe ananyao kotare rakivan tenambe?”

²⁹ Umba Yesus po raura nanto ai pare, “Ananyao manasyin mbe mobe rave mi som: ‘Vatano Israel, wadanide! Wama Amisye opamo intabo pa. ³⁰ Muiny irati nya Amisye ai rave. Nanuga ntenami muiny irati Ai muno nya ana ndatantona ntenami rai muno nya vambunine rai tenambe.”

³¹ Muno ananyao jirum mo ramai tavon no taiso: ‘Muiny irati nya arakove mansai maisyare muno taune wimuinyo taune nai wemaisy.’ Ananyao kajijinta mo ananyaowe rurume so rakivane ramu.”

³² Umba kuruno akari mbaro Ananyao Musa raije umawe po raura nanto Yesus ai pare, “Injayo Kurune, tugae rave. Nya ana ndaura so tugae: Amisye opamo intabo pa, amisyo kajijinta no tavone ramu. ³³ Muno Amisye beker pare wamuiny irati Ai rave, wansanuga ntenami rai muno wama ana wandatantona ntenami rai muno wama vambunine rai tenambe; muno wamuiny irati wama arakove mansai mamaisyo taune wamuinyo taune wansai ramaisy. Ananyao umaso nayamo ibe mobe, yo ananyao anakotaro rameseo Amisye aije rakivan.”

³⁴ Arono Yesus po kurune umaso anaun po ayao mamaisye raura, naije Po raura akananto ai pare, “Winyamo kavintare nyare nsiso kawasaeyo Amisye be akarive maije mai.” Muno no naiso kobe vatane inta bambunin po Yesus anajo akatoe ramu weye vatane wo asyani tenambe.

Mesias opamo Daud apa ajavi muno apa akarije pije

(Matius 22:41-46; Lukas 20:41-44)

³⁵ Arono Yesus pananyaube no Yavaro Amisy ama uga rai, po raura pare, “Kuruno makari mbaro Ananyao Musa raije wo raura ware Mesias opamo Daud apa ajavi pije. ³⁶ Weramu Daud taune po Mesias aura pare Opamo apa Akarijo Titi pije! Weye Anawayo Vambunine mo Daud augav indamu po Mesias aura no taiso:

‘Amisye po raura nanto sya Akarijo Titi ai pare,

“Nyaje ntuna no inanem ngkove rai java

Syo Nya marova maveaje utantuna no najo ate rai

indamu wimbe akarive mai.”[✳]

³⁷ Daud po Mesias aura pare, ‘sya Akarijo Titi pije,’ yara Mesias opamo apa ajavi pije!”[†]

Vatano wanuije manayanambe wo Yesus apa ananyaowe ranaun.

Wasyisyaube kuruno Yahudi mansai weye awa angkarije ntapekan

(*Matius 23:5-7; Lukas 20:45-47*)

³⁸ Yesus po mansanyao akato pare, “Wasyisyaube irati kuruno makari mbaro Ananyao Musa raije mai! Wenawamo manayanambe wanya irati awa ansuno nggwaravainy manawadi rautan, muno manayanambe vatane ubeaje mai no pasari. ³⁹ Manayanambe utantuna no kursijo ngko dave rai no yavaro sambaya rai, muno manayanambe utantuna vatano awa tame ntiti matavon arono one rave. ⁴⁰ Wo wanya kavinije maponae indamu wo awa ananuge muno awa yavare raugavo maora. Muno awa sambaya nggwaravainy indamu vatane wo mansararimbe. Weramu vatane wato indati awa mangke manakoe, weye awa angkarije ntapekan.”

Wanya kavinije mo doije inta raunanto Amisye ai

(*Lukas 21:1-4*)

⁴¹ Yesus no no Yavaro Amisy, naije paje tuna araraive bayaijo veano doije ranugande rai, umba Po vatano wanuije maen wo awa doije raveasyo no bayaije umaso ama uga rai. Vatano wanui awa ananuge manuijo mai wo doijo manuije raveasyo rai. ⁴² Naije wanya kavinijo ama ananuge meweno raije inta nde tavon, umba mo doije vasye rumur raveasyo tavon, aya mangke mamaun dave. ⁴³ Yesus po apa arakovo utavondi aije mawa inde, umba Po raura nanto mai pare, “Tugae, wanya kavinije so ama ananuge mewen dai rave, weramu ama doijo mo raveasyo no bayaije umaso aya mangke mo doijo vatano kaijinta wo raveasyo raije rakivan. ⁴⁴ Weye vatane umawe awa ananugo manuije ama nanake mi wo raunanto. Yara wanya kavinije somamo ama ananuge mewen dai rave, weramu mo ana mo rave anaisye ramavune raunanto vintabo.”

13

Yesus po Yavaro Amisye ama mandamisyije raura

(*Matius 24:1-2; Lukas 21:5-6*)

¹ Arono Yesus puje Yavaro Amisye raora, Apa arakovo utavondi aije inta po raura nanto Ai pare, “Injayo Kurune, winyerade! Yavaro Amisye so ngko dave! Muno ama orame mamo manakoe rave!”

² Umba Yesus po raura nanto ai pare, “Syare syo yavaro manakoe ngko dave so raura wasai. Yavare so ama orame mamo indati mandamisyi vintabo ti ntuna no min, muno inta ntuna matuve akato jewen.”

Anakotaro nande arono munije ama akari mararai

(*Matius 24:3-14; Lukas 21:7-19*)

³ Yesus poroto no Pukamo Saitun, umba paje tuna amumbeto no Yavaro Amisye nori. Naije Petrusa pe Yakobusa pe Yohanesa pe Andreasa pe ude Ai indamu wayao mumuimbe. ⁴ Wo raura Ai ware, “Injae, reamare Nyo raura reansai kakavimbe: Nandui rati umba anakotaro Nyo raura umawe mamaisy? Arono ama masyote mararai, weamo animaisye mirati indati rarorono wusyimbe?”

⁵ Yesus po raura nanto mai pare, “Wasyisyaube! Vemo vatane inta wo wasaponae inya! ⁶ Weye indati vatane wanui ude wo Sya tame veano taune mawain ware, ‘Risyrati Mesias!’ Umba wo vatano wanuije maponae. ⁷ Arono rui rati wadaniv vatane wo marova rave no munijo mararai, muno ayao oware nde wasai mare vatane wo marova rave no munijo marane rai tavon, weamo vemo wajaniv inya. Weye ana namije mamo indati nande, weramu munije ama akari omamo mamai dainya nene. ⁸ Munije inta marovave irati munijo kaijinta mai, muno akarijo titi inta marovave akarijo titi kaijinta ai. Mungkije nande no rui rui vayave, muno nugo marore ntami. Weramu omai mbintaboamo manasyin bayave ma, maisyare muno wanya mare ntuna arikainye autan ti njajoramije wemaisy.

⁹ Syare wasyisyaube! Weye indati vatane wo wasajar wo wasaunanta no akarijo akokoe mansamun, umba wo wasanepato kaijo waije rai no yavaro sambaya ama uga rai. Wonayo wasai weye watawondi Rinai, weti indati wo wasaugaveta no gubernur mansamun muno akarijo titi mansamun. Somamo varoro ngkovo wana raije mi som indamu wapo Sya tame raura kakavimbe akarijo nanawije mai. ¹⁰ Indati Ayao Kove so ravovo vatane kotaro ntuna no

✳ **12:36** Mazmur 110:1; Arakov 2:35; Ibrani 1:13 † **12:37** Ayao so mare Daud apa ajavi Yesus pamo be akarijo titive Apa aneno Daud akivan.

mine so mansai tenambe rati, umba munije ama akarije nande. ¹¹ Arono indati vatane umawe wo wasaugaveta ra wasayai no akarije umawe mansamun indamu wo wasanajobe, vemo wasanuga mamauno wapa ayao wapare wapo rasakinavo maije rai nora. Weye animaisye mirati wapare wapo raura mamono arono naije Amisye po ayao raunande wasai inda wadaura. Weti wapa ayao wato mamono taune wapa ayao majewena, yara Anawayo Vambunine ama ayao omi wadaura.

¹²⁻¹³ Indati masyote nde nande arono vatan tenambe manuga mamuno wasai weye weatavondi Rinai. Vatane wo taune awa arakove mansamavun indamu maubaisy. Muno ajae wo taune awa arikainye mansamavun indamu maubaisy tavon. Arikainye wo awa akoye nawe awa ajae nawe mave tatugadi, muno wo maunanta inda maubaisy. Weramu are nawirati matawandi kobe muno wanawe Rinai tutir ava nto ama marane rai, onawamo indati Amisye po mapaya irati kakaije rai indamu ukova nuge nuganu.”

Siurijo manakoe nande no masyoto rijat
(*Matius 24:15-28; Lukas 21:20-24*)

¹⁴ “Indati wapo Vatano Mamun Akoe aeno te no Yavaro Amisye rai.* (Vatano weapirati wabacave ayao umaso rai, syare wananta ama ine rai.) Arono naije, syare vatano una no Yudea unajiv usea no unat. ¹⁵ Vatano utantuna no yavare von, vemo wakaje usisa wo ananuge inta rauga no yavar uga inya! ¹⁶ Maisyare omai tavon, vatano una no nawaisy uga, vemo wakare wo ansune rauga no yavar uga inya! Yara unaji bayave. ¹⁷ Abo! Arono siurijo namije nde, wanya vavinsanai nawe, wanya wo ukame raunanto awa arikainye maije nawe, awa siurije manakoe rave, weye wansanan unajive kakai. ¹⁸ Wasambayambe indamu vemo siurije umaso nande no embayo nanayao rai jinya! ¹⁹ Arono wusyin Amisye po mine so ranarijoe ndea naiso vatane awa siurije mamaun, yara awa siurijo rijate so manakoe rave. Arono indati siurijo rijate so mewen to, weamo siurijo maisyare umasom inta makanande akatoe ramu. ²⁰ Ranivara siurije umaso noa nugoenta, weaveti vatano mine so ukakai tenambe vintabo. Weramu indati Amisye po siurije umaso ransop akaje ti ntumainy, weye aemeno Apa kawasae po mansatayaowe mai.

²¹ Arono naije, ranivara vatane inta po raura wasai pare, ‘Waperade! Mesias opi noe so!’ dako, ‘Napi ratuije!’ dako,

vemo wapanave ai jinya! ²² Weye indati mesias angkarije muno anawae angkarije ude. Wo anapaporainye raroron indamu wo vatano wanuije maponae, muno ubeker ware wo kawasaeyo Amisye po mansatayaowe maponae tavon, weramu umaisy ramu. ²³ Weti wasyisyaube! Syo ana nande no masyoto rijate raura wasai wusyimbe to inda wasyisyaube.”

Arono Arikainyo Vatane pakare no mine vone so

(*Matius 24:29-31; Lukas 21:25-28*)

²⁴ “Arono siurije umawe mewen, uma amije ngkaumudi muno embae mbar akatoe ramu. ²⁵ Tumo no no naume warae utataopon, muno naume mansumugo anakotaro no raije rautan.*

²⁶ Arono naije vatano mine vone so wo Risy, Arikainyo Vatane, inae rino kamure rai ti syaje, ride irati Sya vambunino manakoe muno Sya kovo ntiti rautan. ²⁷ Indati Syo naito Amisye matutir indamu wo vatano Syo matayaowe manunugambe vintabo, nanawirati una no ovaro ami mambisyo mine so muno una no rui rui vayave no mine so ntoa ama marane rai muno naumo warae ama marane rai.”

Ana nande arono munije ama akari mararai

(*Matius 24:32-35; Lukas 21:29-33*)

²⁸ “Syare wapo ananeneae Tumbina ranyao: Arono wapo Tumbina* raeno seowi, wapare, ‘Indati anamuke man akato.’ ²⁹ Maisyare omai tavon, arono wapo anakotaro Syo raura umawe raen, indati wapo raen wapare munije ama akari mararai rave to. ³⁰ Syo raura tugaive: arono anakotare umawe nde nande tenambe, indati vatano susyo naiso inta nawirati wene nande mai rainy ti una ti wo raen. ³¹ Naume warae me mine so me indati yaumandi, yara Sya ayaowe mamono ntamija nuge nuganu.”

Wapo Yesus apa pakare raije ranyut, weti wasyisyaube muno wapanatatayaube
(*Matius 24:36-44; Lukas 21:34-36*)

³² “Weramu nandui rati anakotare so mare nande, vatane wantatukambe ama masyote muno ama uma amije rai. Naito Amisy una no munijo ntiti wantatukambe rai muno Risy, Arikainyo Amisy, syantatukambe rai tavon. Yara Injayo Amisy obo pi po raen. ³³ Wapantukambe masyoto namije rai, weti wasyisyaube muno wapanatatayaube! ³⁴ Maisyare ananeneae so ramaisy: vatane inta pare puje to no munijo maran, weti po apa vatano wanapatambe aije mawainde, umba po anakere raugaje

* 13:14 Daniel 9:27, 11:31, 12:11

* 13:25 Yesaya 13:10, 34:4; Yoel 2:10; Muni Akari 6:12-14

* 13:28 Ayao Yunani

naiso mo inyo ara raura.

mansai tetebe indamu wo apa yavare raer-ande. Muno po raura nanto vatano po unsanda ramane ai pare, ‘Winyisyaube! Nyo sya yavare so raman mavabe!’

³⁵ Risy inaurata irati vatano apave yavare umawe raije ai. Weti wasyisyaube! Weye wapantukambe Sya masyoto syakare raije rai—namandi rako, namane yasyin ndako, arono awatano mangkuere kokobe rako, arono uma seo kai rako. Weti syare wasyisyaube! ³⁶ Syare ide papabe, vemo rinande wasaijo wanakije rai jinya. ³⁷ Ana Syo raura wasaije so, Syo raura vatane mai tenambe, syare wasyisyaube!”

14

Akarijo Yahudi wo unanuije rakani indamu wo Yesus aubaisy

(*Matius 26:1-5; Lukas 22:1-2; Yohanes 11:45-53*)

¹ Masyote rurum akato, umba Yahudi wo Ono Paska rave muno wo rotijo ragije mewen daije raisy. Arono naije syeno akokoe utantuna no Yavaro Amisyse raije nawe, kuruno makari mbaro Ananyao Musa raije nawe, wo unanuije rakani indamu wo Yesus aijar muno wo aubaisy. Wo raura ware, “Wade wamo aijar maninimbe. ² Weramu vemo wamo aijar no one ama uga so rai nora, weye vatano wanui indati upari ti usivuiyny.”

Manino mbovove rauvaro Yesus akarije rai

(*Matius 26:6-13; Yohanes 12:1-8*)

³ Arono naije Yesus no no munijo Betania, tuna no Simon apa yavar, wepirati aravure mo ave no wusynoe. Umba wanya inta nde mo botoro nsasabe inta raugav ntairi jirati manino mbovove rai, ama mangke nseo rave. Arono Yesus pisyisy, wanya umawe mo botore umaso ama vone radaut, umba mo manine rauvaro Yesus akarije vone rai. ⁴ Vatane inta una no naije upari ti wo raura ware, “Veanimaibe wanya so mbaono manino mbovove so rai ti mewen? ⁵ Manine so ama mangke nseo rave, weti kove mamo ramavun bayave umba ama doije raunanto vatano awa ananuge meweno maije mai.” Weti wo wanya umawe ranayao soowabe.

⁶ Weramu Yesus po raura pare, “Weinya! Wabeanimaibe wapo wanya so raura ti ranimaumbe? Ama ana mo rajaro rinai mamo ngko dave. ⁷ Vatano awa ananuge meweno maije onawama una no wapa yasyine rai tutir, weti arono rui wapare wapo maeranande, weamo wapo maeranande kai. Weramu Risyamo rino no wapa yasyin tutire ramu. ⁸ Weti masyoto unumeso wanya so mare mo ana ngkove inta raunande Rinai, weamo mo raunande kai. Ama ana

mo rave umawe mamo mamaisy. Weye mo manino mbovove rauvaro Rinai indamu mo inanasine ratayao wusyimbe irati Sya masyoto inantuna raije rai. ⁹ Syo raura tugaive: mine vone so rui rui yavaye vatane wo Ayao Kovo Amisyse ravov, weamo wo wanya so ama ana ndave raura tavon indamu maemeno rai.”

Yudas pare po Yesus amavun

(*Matius 26:14-16; Lukas 22:3-6*)

¹⁰ Umba Yudas Iskariot, opamo Yesus apa arakovo abusynara eane rurum utavondi aije inta piye, poroto no syeno akokoe mansai indamu po Yesus amavun nanto mai. ¹¹ Wo Yudas apa ayao umaso ranaun ti manayanambe, weti wurairive ware wo doije inta raunanto ai. Umba Yudas po varore rakani indamu po Yesus amavun.

Yesus apa arakove wo anaisyo Paska ratayao

(*Matius 26:17-19; Lukas 22:7-13*)

¹² Ono Paska ndea mamaisy arono vatano Yahudi wo rotijo ragije mewen daije raisy, muno ama masyoto manasyine wo domba inta aubaisy wo ameseo Amisyse ai umba wo ama ine raisy. Weti Yesus apa arakovo utavondi aije wo anajo ware, “Injae, rui rati nyare mbekero reamo anaisyo Paska ratayao Nai?”

¹³ Umba Yesus po apa arakove ruruma yatutir pare, “Wurisisa no Yerusalem, ripare rinanta vatane inta ai po mana rawavino kivirop kopa rai ti po raugav. Wiritavono ai. ¹⁴ Arono wirita no apa yavaro pare siso ri, syare ipo raura irati vatano apave yavare rai ai ipare, ‘Injajo Kurune po nanajo pare nya tanoano rui mirati Wepe apa arakovo utavondi aije nawe wo anaisyo Paska raisyo rai?’ ¹⁵ Indati vatane umaso po tanoano vono warae ama uga manakoe inta rarorono isai. Tanoane umaso mamai bintabo irati meja muno ananuge kotaro isyi daije rautan, ti ripo anaisyse ratayao wansamarom no naije.”

¹⁶ Umba Yesus apa arakovo jirumo javondi aije umaso yurija no Yerusalem. No ratuije nyanta irati anakotaro uma Yesus po raura we rai mamai bintabo. Umba yo anaisyo Paska ratayao ti ntuna.

Yesusa pe apa arakovo utavondi aije nawe wo anaisyo Ono Paska raisy

(*Matius 26:20-30; Lukas 22:14-23; Yohanes 13:18-30; 1 Korintus 11:23-25*)

¹⁷ Naman kobe, umba Yesusa pe apa arakovo abusynara eane rurum nawe ude utantuna no tanoane umawe rai. ¹⁸ Umba utantuna wisyisy, naije Yesus po raura nanto mai pare, “Syo raura tugaive, weapamo inta nyare nyo inamavun nanto

Sya marova mansai —winy nyisyisyo inatavon.”

¹⁹ Yesus apa arakovo utavondi aije wo ayao umaso ranaun ti manimaumbe rave. Umba nenantabo wo Yesus anajo rai, inta pare, “Injae, risya jewena rako?”

²⁰ Umba Yesus po raura nanto mai pare, “Opirati no no Sya arakovo abusyin eane rurum watawondi inaije wapa yasyin. Opirati ririmo rotije rayansundijo pauraie intabo rai. ²¹ Tugae, Risy, Arikainyo Vatan, indati ikakai maisyare muno ratoe no Ayao Amisyé rai. Weramu kakaije nde vatano po Arikainyo Vatane inamavune ai! Weti syare ngko dave mamo vatane wato ano jeben kai no mine vone so, weamo ngkovo ai weye indati mangke umaso nande aije ramu.”

²² Arono wo anaisyé raisy, Yesus po rotije rajjade umba Po kove raura seo Amisyé ai. Umba Po raporati muno Po ratodijo Apa arakovo utavondi aije mai, umba Po raura pare, “Wadagav wadaisy, somamo inanasine mi som.”

²³ Umba Yesus po mokijo anggurije rajjade akato, umba Po kove raura seo Amisyé ai. Umbawe Po raunanto Apa arakove mai, muno wo anggurije umawe ramanam tenambe. ²⁴ Yesus po raura pare, “Somamo Sya mavugo nsororopo vatano wanuije mansaije mi som, mo Amisyé apa urairijo wanyine raokaisy. ²⁵ Syo raura tugaive, Syo anggurije inta ramanam akatoe ramu gao Syo anggurijo wanyine ramanam arono Amisyé de be akarive Apa kawasae mai no mine vone so.”

²⁶ Umba ukinyo ansyerano ngkangkamane inta rai, umbawe wuruta kobe no Pukamo Saitun.

Yesus daura to pare Petrus indati po amamarave

(Matius 26:31-35; Lukas 22:31-34; Yohanes 13:36-38)

²⁷ Umba naije Yesus po raura nanto Apa arakovo utavondi aije mai pare, “Weapamo indati wapo inapaya ti ino ara wanajiv bintabo inaora. Maisyare Ayao Amisyé mo ratoe mare, ‘Syo vatano po domba maeranandeye aubaisy, umba apa domba mandamisy ti unanajibe.’” ²⁸ Weramu arono indati ikovakato to, syakare syuisy ti Syo wasanyut no Galilea.”

²⁹ Petrus po raura nanto Yesus ai pare, “Jewena! Arakovo kajjinta unanajibe kai, yara risyamo syo napaya ramu!”

³⁰ Yesus po raura akananto ai pare, “Syo raura tugaive, namane so mangkuere pana kokebeve rurum dainy, winyamo indati nyo inamamarave susye mandei.”

³¹ Weramu Petrus po raura kikisyi nanto ai pare, “Ikakaijo Injae natavon kai, yara syo namamarave ramu!” Umba arakovo kajjinta wo raura tavonare wemaisy.

Yesus sambayambe no Getsemani
(Matius 26:36-46; Lukas 22:39-46)

³² Yesusa pe apa arakovo utavondi aije nawe wanya unanta no nawaisyo wo rawaina ware Nawaisyo Getsemani. Umba Yesus po raura nanto Apa arakove mai pare, “Watantuna no naiso wapo inanyut, weye syare syoroto ibe sambayambe rati.”

³³ Umba Yesus po Petrusa pe Yakobusa pe Yohanesa pe mawainde indamu utavondijo Ai. Naije Yesus animaumbe muno anuga nseo maje. ³⁴ Po raura mai pare, “Inanuga mpatimu rave maisyare muno syare ikakai kobe vayave. Wano no so muno wagwaranon inatavon.”

³⁵ Yesus poroto gwaravaindi, umba Po apa vukane ranteter no kopa umba be sambayambe, pare beker indamu Amisyé po apa siurije raveto aora. ³⁶ Po raura pare, “Injae, Sya Injae!” Anakataro rui vayave wimbambunin Nyo ratayao ti maimaisy. Wimayar, syare Nyo siurije so raveto inaora. Weramu vemo wintavono Sya bekere rai nora, yara Injae nya bekere bo rai.”

³⁷ Naije umba Yesus pakare Po apa arakove mandeije umawe maen unaki. Ti Po raura Petrus ai pare, “Simone, winya nikija! Risambayambe uma amije intabo vayave, weramu winggwaran ramu! ³⁸ Syare wagwaran muno wasambayambe indamu vemo ana mo wasatopane mo wasakep inya! Tugae, wasanuga mbeker, weramu wasanasino kopa mayondi.”

³⁹ Yesus pakato be sambayambe maisyare umawe omaisy akato. ⁴⁰ Umba pakare akato no Apa arakovo mandeije umawe mai, weramu Po maen unakija akatoa nene weye mamije maomon dave. Usamane ti wo ana inta raura nanto Yesus aije ramu, yara umanin bayave.

⁴¹ Yesus sambayambe umba pakare akato maive susye mandei, umba Po raura pare, “Wabeanimai be wanakija nene? Mewen to! Kavintanamo, Risy, Arikainyo Vatan, in-aunanto no vatano mamune mai. ⁴² Wasea, wade ra wanta! Waperata, vatano po inamavune dea pararai to!”

Vatane wo Yesus aijar
(Matius 26:47-56; Lukas 22:47-53; Yohanes 18:1-11)

⁴³ Arono Yesus payaowa nene, naije Yudas de. Opamo Yesus apa arakovo abusyinara eane rurum inta piye. Vatano wanui wo omake muno kaije raugav

✧ 14:27 Zakaria 13:7

* 14:36 Yesus pare, “Abba,” ama ine mare “Injae” ayao Yahudi rai.

utavono Yudas ai. Onawamo syeno akokoe nawe, kuruno Yahudi nawe, akarijo Yahudi nawe wo matutir. ⁴⁴ Yudas pare po Yesu amavun, weti po raura wusymbe irati vatano wanuije umaso mai pare, "Vatano rui pirati syare syo anu, Wepamo napije. Ti wapo aijar muno wapo augaveta, syare wapo aman mavabe."

⁴⁵ Naije Yudas de nande kobe Yesu ai umba po raura pare, "Injayo Kurune!" Umba po anu. ⁴⁶ Umba vatano wanui umawe ude kobe wo Yesu aijar. ⁴⁷ Umba naije vatane inta no no awa yasin po apa omake rapatin no ama kokome rai umba po rave vatano panapatambe syeno titi aije amarikoame raotar ti mpatimu.

⁴⁸ Umba Yesu po raura nanto vatano wanuije umawe mai pare, "Risiamo vatano mamune inta pi Risye ramu. Ti wabeanimaike wade irati omake muno kaije rautan indamu wapo inaijar?" ⁴⁹ Masyote anteter syananyaube no Yavaro Amisy ama uga muno weapamo wana no naije tavon, weramu wapo inaijare ramu. Weramu ana so nande indamu mamaisy Ayao Amisy mo ratoe rai."

⁵⁰ Naije kobe Yesu apa arakovo utavondi aije wo apaya ti no ara unajita aora.

⁵¹ Arono naije vatano kamurame inta po Yesu atavon, po ansune vasye bo rave anasine ratatuv. Vatano wanuije umawe ware wo aijar tavon, ⁵² weramu po apa ansuno no anasine raije rapaya ti ntami, umba ate kokanive pansanan ti poroto.

Yesu te no Anugano Akari Akokoe Yahudi mansamun

(Matius 26:57-68; Lukas 22:54-55, 63-71; Yohanes 18:12-14, 19-24)

⁵³ Vatano wo Yesu aijar wo auga ti usisa no syeno titi apa yavare rai. Muno naije syeno akokoe utantuna no Yavaro Amisy raije nawe, akarijo Yahudi nawe, kuruno makari mbaro Ananyo Musa raije nawe, wanugan tenambe. ⁵⁴ Petrus po Yesu arijabe ti de siso no syeno titi apa yavare ama wanijate rai. Umba Petrus tuna syeno titi apa naite inta matavon, wo taname ravauba.

⁵⁵ Syeno akokoe muno Anugano Akari Akokoe Yahudi wo vatane mawainde indamu wo Yesu aura tantunawi no mansamun, weye ware wo mangke raugaje Ai inde kakai. Weramu mamaisy ramu, ⁵⁶ weye vatano wanuije inta ude wayao angkarive vayave. Weramu inta apa ayao nsasye inta apa rai, ti awa ayao wo Yesu angkivane mbe intabove jeben.

⁵⁷ Umba vatane inta usea usayai, wo ayao angkarije so raura indamu wo Yesu angkivan: ⁵⁸ Ware, "Reamo vatane wato Apa ayaowe ranaun no taiso pare, 'Syare

syo Yavaro Amisyo vatane wo ranarije so randamisy, umba masyote mandei jakato Syo Yavaro Amisyo wanyino vatane wo ranarije ramuge rajjar akaeyo ntet akato.' "

⁵⁹ Weramu inta awa rai, ti awa ayao wo Yesu angkivane mbe intabove jeben.

⁶⁰ Umba syeno titi seo tet, po raura nanto Yesu ai pare, "Mbeanimaike irati Nyo ana wo raura nande Naije so raura nakanande reansaije jeben?" ⁶¹ Weramu Yesu manin bayave. Po ayao inta raura nakanantoe ramu. Umba syeno titi po anajo akato pare, "Winyamo Mesias, Arikainyo Amisy, pi Win dako?"

⁶² Yesu po raura pare, "Risye ivae. Indati wapo Risye, Arikainyo Vatan, inae ituna no Amisyo Bambunin Dave anem ngkove rai. Muno wapo inae rino kamuro popere rai no naumo warae ti syaje."

⁶³ Arono syeno titi po Yesu apa ayao umaso ranaun, naije pari rave weti po taune apa ansune rasajam. Umba po raura pare, "Vemo wamo vatano kaijo wo Yesu aura tantunawije mawainde akato nora. ⁶⁴ Wapo ranaun tenambe to: vatane so pare po Amisy amaaisy! Weti wapare?"

Umba wo rapatimu ware, "Reamare wamo mangke raugaje Ai indamu kakai."

⁶⁵ Naije vatane inta wo Yesu anyipube. Wo amune ratavono ansune vasye rai muno wo anepati, umba wo anajo ware, "Winyamo anawae pi Winy, weamo Nyo vatano po nanepate so apa tame raura kakavimbe reansai!" Umba syeno titi apa naite wo Yesu augaveta umba wo anepati tavon.

Petrus po Yesu amamarave

(Matius 26:69-75; Lukas 22:56-62; Yohanes 18:15-18, 25-27)

⁶⁶ Petrus pamo tuna no yavare umawe ama wanijate rai, umba wanya arikainyo manapatambe syeno titi aije inta nde ai. ⁶⁷ Mo Petrus aen po taname ravauba, weti mo amune rayasir kobe umba mo raura mare, "Winyirati ntavono Yesu vatano Nasaret umawe Aive tavon."

⁶⁸ Weramu Petrus po Yesu amamarave. Po raura nanto wanya umawe rai pare, "Syantukambe nya ana ndaura so rai!" Umba Petrus poroto te no unsanda wanijate. Naije kobe mangkuere kokebe.

⁶⁹ Wanya manapatambe umawe mo Petrus aen akato umba mo raura vatano usai no wanijate mansai mare, "Vatane sopamo vatano utavondijo Yesu aije inta piye." ⁷⁰ Weramu Petrus po Yesu amamarave akato.

Nugoenta rainya umba vatano usai no we wo raura nanto Petrus ai ware, "Winyamo

vatano Galilea, weti tugae winyamo vatano tavondive Yesus aije inta pi winy.”

⁷¹ Umba Petrus panaamatambe, muno po raura pare, “Risyamo syantatukambe vatano wapo aura wato Ai!”

⁷² Naije kobe mangkuere kokebe rurum. Umba Petrus aemeno Yesus apa ana daura rai pare, “Manguere pana kokebeve rurum dainy, winyamo indati nyo inamamara- rave susye mandei.” Umba Petrus poyo dave.

15

Yesus te no Pilatus amun

(*Matius 27:1-2, 11-14; Lukas 23:1-5; Yohanes 18:28-38*)

¹ Awatan ngko dave syeno akokoe nawe, akarijo Yahudi nawe, kuruno Yahudi mamo manui rave. ² Umba Pilatus po Yesus anajo pare, “Winyirati Akarijo Titi Yahudije pi Win dako?”

Umba Yesus po raura nakananto ai pare, “Risy ivae, mamaisyo nya ana ndaura wato rai.”

³ Umba syeno akokoe wo Yesus aura tantunawi ware Apa ana dave ngkakai mamo manui rave. ⁴ Weti Pilatus po Yesus anajo akato pare, “Mbeanimaibe Nyo raura akananto maije jewen? Nyo raen wo naura tantunawi rave!”

⁵ Weramu Yesus po ayao inta raura akananto aije ramu, weti Pilatus nantoive Ai.

Pilatus po mangke raugaje Yesus ai indamu kakai

(*Matius 27:15-26; Lukas 23:13-25; Yohanes 18:39-19:16*)

⁶ Arono Ono Paska ndea mamaisy, vatano Yahudi nawamo awa koano utavondi raivea nsiridi to mamo wo Gubernur Pilatus anajo indamu po vatano tuna no tanoano makova raije inta apaya irati apa mangke rai. ⁷ Arono naije vatane inta apa tame mi Barabas tuna no tanoano makova rai. Barabas umaso pamo makova weye tavondijo vatano wo marova rave pemerinta Roma aije mai ti po vatane inta maubaibe to. ⁸ Vatano wanuije ude indamu wo Pilatus anajo inda po vatano tuna no tanoano makova inta apaya irati mai, maisyare po rave no Ono Paska raiveve wemaisy. ⁹ Umba Pilatus po manajo pare, “Wapare syo Akarijo Titi Yahudije so apaya wasai rako?” ¹⁰ Weramu Pilatus po raenamo syeno akokoe wo Yesus aunanto ai weye manuga mamuno Yesus ai weye vatano wanui manayanambe Ai.

¹¹ Umba syeno akokoe wo vatano wanuije umaso manuga raugabe indamu wo Pilatus anajo indamu po Barabas apaya mai.

¹² Umba Pilatus po raura akananto vatano wanuije umawe mai pare, “Maisyare omai ti, animaisye mi syo rave irati vatano wapo awaino Akarijo Titi Yahudije so ai?”

¹³ Ugwain ware, “Auseo sawa inyo kapite rai!”

¹⁴ Pilatus po manajo pare, “Weramu ayao kakaije rui mirati Po rave?”

Umba vatano wanuije ugwain akoeve akato ware, “Auseo sawa inyo kapite rai!”

¹⁵ Pilatus beker pare po vatano wanuije umaso maveti manayanambe, weti po Barabas apaya mai. Po naite inta matutir indamu wo kaijo waije rave Yesus anepat, umba po aunanto mai indamu wo auseo sawa inyo kapite rai.

Naito Roma wanaikebe Yesus ai

(*Matius 27:27-31; Yohanes 19:2-3*)

¹⁶ Naite umaso wo Yesus augave siso no Gubernur Pilatus apa yavar. Umba wo awa arakovo naite mawa inde wanagan tenambe indamu wanaikebe Yesus ai muno wo ambaon. ¹⁷ Wo ansuno nsintair manawadi inta raugasyo Ai ti po rave, maisyare akarijo titi inta po rave ramaisy. Muno wo anansinao maisyare wanyavi ramaisy rauseo rakariwaiibe akari rai, raurata irati sapeo akarijo titi po rave ramaisy. ¹⁸ Umba wo awain ware, “Winyirati Akarijo Titi Yahudi pi Winy!” ¹⁹ Wo isyoe veano Yesus akarije ranepati tutir, wo anyipube, muno wo vukane ranteter no Amun ube ponaibe ware ubeaje Ai. ²⁰ Wanaikebe Aija jewen, umba wo ansuno nsintaire umawe raugaje aora umba wo taune Apa ansune raugasyo Ai ti po rave akato. Naije umba wo auga ti wusyaya indamu wo auseo sawa inyo kapite rai.

Yesus auseo sawa inyo kapite rai

(*Matius 27:32-44; Lukas 23:26-43; Yohanes 19:17-27*)

²¹ Wanyana unanuije ama yasyin, unanta irati vatane inta ai, apa tame mi Simon, opamo to no unat umba pakare no munijo Yerusalem. Naije naito Roma umawe wo antitidi indamu po Yesus apa inyo kapite ranawan. (Simon opamo vatano munijo Kirene inta pije, apa arikainye aya tame mi Aleksandera pe Rupusa pe naye.) ²² Wo Yesus augaveta no pukame inta rai, ama tame mirati raura ayao Yahudi raijamo Golgota, ama ine mare Akari Pae. ²³ Umba naije wo anggurije raugav, manino mur mo rakokoive, ware wo raunanto Yesus ai indamu Po ramanam, weramu ponayo Po ramanami. ²⁴ Umba wo auseo sawa inyo

kapite rai. Wo aikarae rapatin indamu wo Apa ansune ratodijo taune mansai.*

²⁵ Wo Yesus auseo sawa inyo kapite rai no arono awatan ngkovo uma amije kaimambisy. ²⁶ Ayaowo ana wanaikebe Ai mammo wo ratoe rauseo no inyo kapite ama von no taiso: SOPAMO AKARIJO TITI YAHUDI. ²⁷ Umba wo vatano mamune jiruma yauseo syawa atavon, inta sawa no anem ngkov muno inta sawa no anem ngkakai. ²⁸ Ana nande umaso mammo mamaisyo Ayao Amisyeye so rai mare: "Opamo ato siso vatano mamune mansai.*"

²⁹ Vatano udetave so wo Yesus aen, makarije rangkiki seo Ai muno wo akaajian ware, "Winyirati nandija nyare Nyo Yavaro Amisyeye randamisy yara masyote mandei Nyo rauseo ntet akato. ³⁰ Weti ranivara Winyamo nya vambunine no Nai, weamo nyaje inyo kapite raora indamu Nyo nanasine rapaya kakaije rai!"

³¹ Maisyare wemai tavon syeno akokoe nawe kuruno Yahudi nawe wanaikebe Yesus ai ware, "Opamo po vatano kaijinta mapaya kakaije rai, yara taune ansine mammo Po rapaya rai kakai! ³² Po raurave pare opamo Mesias, Akarijo Titi Israel pijie! Weti ranivara wamo aen paje inyo kapite wato raora, wea indati wamanave Ai." Muno vatano yausea syawa atavone umawe yo akaajian tavon.

Yesus kakai

(*Matius 27:45-56; Lukas 23:44-49;*

Yohanes 19:28-30)

³³ Masyote yasyin, uma ami abusyinara eane jirum, ananamane nande ntamijo munijo we rai tenambe yava uma amije mandei umba ngkarimu. ³⁴ Uma ami nanto mandeije so rai, naije Yesus gwain akoeve, po raura ayao Yahudi rai pare, "*Eloi Eloi, lama sabakhtani?*" ama ine mare, "Sya Amisyeye, Sya Amisyeye, mbeanimaiibe irati nakirive Inai?"

³⁵ Vatane inta una no naije wo Yesus apa ayaowe umaso ranaun, umba wo raura ware, "Wadanita, Po anawae Elia awain!" ³⁶ Vatano no no awa yasyine inta pavave poroto po maimare raugavere umba po raugasya rayansundijo angguriyo nsaisyine rai. Umba po ransuisyo uvi rai, po rareanse no Yesus awa rai indamu Po rausuv. Umba po raura pare, "Wade ra wamo aen dati, indati Elia de po augaje inyo kapite rai jaje rako jewena e?"

³⁷ Naije umba Yesus gwain akoeve, umba anawayo karimu, kakai kobe.

³⁸ Naije kobe kaene nsawa unsanda Yavaro Amisyeye ama Tanoano Ndandini Dave raije mammo nsaram no vone warae masyo no ate waraya mbe rumumbe.

³⁹ Arono nait akari Roma wepirati te no inyo kapite ama usye rai po Yesus apa kakaije umaso raen, po raura pare, "Wakoe! Tugae rave, vatane sopamo Arikainyo Amisyeye pi sop."

⁴⁰ Naijeamo wanya inta nawirati wo ana umawe raerato waravaimbe. No awa yasyine umasoamo Salome muno Maria Magdalena muno Maria kaijinta ntavon, omamo Yakobuso kamurame pe Yosesa pe aya akoya mije. ⁴¹ Wanya sonawamo utavondi Yesus ai muno wo aeranande arono no no Galilea. Umba wanya kaijo wanuije inta utavondi Ai ude no Yerusalem rai tavon.

Yesus antuna

(*Matius 27:57-61; Lukas 23:50-56;*

Yohanes 19:38-42)

⁴² Masyoto namije mammo vatano Yahudi awa masyoto wanakangkanive irati awa masyoto sambaya rai. ⁴³ Masyote ndea mare ngkaumu kobe, umba vatano munijo Arimatea inta apa tame mi Yusup de. Opamo vatano ato siso Anugano Akari Akokoe Yahudi rai muno vatan tenambe wo aura opamo vatano titi. Po masyoto Amisyeye de be akarive no mine vone so raije anyuto dei. Umba opamo janive ramu, yara anuga mbambunin ti to kobe no Pilatusa nui indamu po Yesus anasino kopa ranajo ai. ⁴⁴ Arono Pilatus po Yesus apa kakaije ranaun, nantoive rai. Weti po vatane inta atutir poroto po nait akari umawe awainde, umba po anajo pare, "Yesus opamo kakai to rako?" ⁴⁵ Nait akari umaso po raura pare, "Kakai to." Weti Pilatus po Yusup amayaro po Yesus anasino kopa rauga kai.

⁴⁶ Yusup po ansuno mpopero nsauman ramavun. Umba po Yesus anasino kopa raugaje inyo kapite rai, po ansuno mpopere umawe veano akepan, umba po antuna no aipapo oramo ratotove rai. Umba Yusup po oramo manakoe inta raroya usya ntuna aipapo ama unsanda raora. ⁴⁷ Umba Maria Magdalena me, Mariajo Yosesa apa akoya me, yo Yesus apa antuna raije raen.

16

Yesus kovakato

(*Matius 28:1-10; Lukas 24:1-12; Yohanes 20:1-10)*

¹ Arono masyoto sambaya namije mewen, Maria Magdalena me, Mariajo Yakobus apa akoya me, Salomea me, wuruta wo manino mbovove ramavun indamu wo raugavere veano Yesus anasino kopa raikar, mamaisyo vatano Yahudi awa koano wo vatane mantuna rai. ² Ari Minggu ama awatan ngko dave una seo

kai, wuje wuruta no aipapo. ³Unanuije ama yasyin wayao vambinibe ware, “Are pirati indati po oramo unsanda aipapo raroyar?”
⁴ Weramu arono unanta aipapo rai, wo ama oramo manakoe umawe raen raroaya to. ⁵ Usisa no aipapo umaso ama uga, wo vatano kamurame inta aen tuna no ranijo anem ngkov, po ansuno mpopere rave. Wo aen ti upaparo mai.

⁶Umba vatano kamuram umaso po raura nanto mai pare, “Vemo wapaparo wasai jinya. Weapamo wapo Yesus vatano Nasaret akani, Wepirati auseo sawa inyo kapite rai to. Soamo norije ramu, yara kovakato to! Wade wapo Apa aipapo tami rajje raeni so. ⁷Weti syare wapakata wapo ayaowe so raura Apa arakovo utavondi aije mansai muno Petrus ai tavon. Wadaura mai wapare, ‘Yesus puisya to no Galilea rai to. Ti wata no ratuije umba wapo aen, maisyare muno Po raura wasai to we-maisy.’”

⁸ Umba wanya umaso wuje unajivo aipapo umaso raora, weye upaparo mai muno ujaniv ti ututar. Weti wo ana inta raura vatano kajjinta maije ramu, weye ujani dave.

Yesus po anasine rarorono Maria Magdalena rai

(Matius 28:1-10; Yohanes 20:1-2, 11-18)

⁹ Arono Yesus kakai yara kovakato no ari Minggu ama awatan ngko dave, weamo manasyimbe Po anasine rarorono Maria Magdalena rai. Maria umaso mamu wusyinoe Yesus po anawayo kakaije kaururum rawatano raora. ¹⁰ Arono naije, Yesus apa arakovo utavondi aije manimaumbe Ai muno woyov. Maria Magdalena nde mo raura mai mare, ¹¹ “Yesus kovakato to! Syo aen to!” Weramu wanave ramu.

Yesus po anasine rarorono Apa arakovo tavondijo aije jiruma yai

(Lukas 24:13-35)

¹² Naije akato Yesus po anasine rarorono Apa arakovo javondi aije jiruma yai, weramu anakea nsasye. Yesus arorono yai arono yanya ti ija no munije inta rai. ¹³ Arono yo aen, yavave yakare yo ana umaso raura irati arakovo kajjinta mai. Weramu wanave tavone ramu.

Yesus po anasine rarorono Apa arakovo utavondi aije mai

(Matius 28:16-20; Lukas 24:36-49; Yohanes 20:19-29; Arakov 1:6-8)

¹⁴ Umba Yesus po anasine rarorono Apa arakovo abusyinara eane intabo arono wisyisy. Po raura pare, “Wabeanimaibe wapa anave mamaun muno wapa ana wapo ratantona nsosobe rave, ti wapanave vatano wo inaen to we maije jewan?”

¹⁵ Umba Yesus po raura mai pare, “Wata no munijo mine tename so rai umba wapo Ayao Kove so raura vatane mai tenambe.

¹⁶ Are pirati panave ramu, opamo Amisy po mangke raugaje ai. Yara are pirati panave muno augasyo kuvuni mana rai, opamo Amisy po apaya apa ayao kakaije rai. ¹⁷ Vatano wanave Rinaije nawamo Syo vambunine raugaje mai indamu wo anapaporainye raroron maisyare so: Wo Sya tame raura indamu wo anawayo kakaije rawatano vatane mansaora, muno wo ayao kotaro wantatukambe rajje raura. ¹⁸ Ranivara wo tawae mamune rajjaro maneme rai, muno ranivara wo ana mamune ramanam, weamo unanta yorame inta rajje ramu. Muno wo maneme raugaje ntamijo vatano ugwane mansai, weamo vatane umaso usauman.”

Yesus seo no munijo ntiti

(Lukas 24:50-53; Arakov 1:9-11)

¹⁹ Amisy Yesus payao nanto maija jewan, umba Amisy po aijaseo no munijo ntiti. No ratuije Yesus be akarive Ajayo Amisy atavon, tuna no aneme ngkove rai. ²⁰ Umba Apa arakovo utavondi aije wuruta wo ayao Amisy so raura no rui rui vayave. Amisy no mansautan muno Po vambunine raugaje mai indamu wo anapaporainye raroron, wirati mo raroron kakavimbe ayao Amisy wo raura omamo ayao tugae ma.

Ayao Kovo Amisy LUKAS

Ayao manasyin

¹ Risyrirati Lukas, syo nyovara waowe so ratoe ore injayo Teopilus winai, winyirati sya injayo ko dave. Vatano wanuije inta wo Amisy apa ana po rave no wama yasyine so ratoe tavon to. ² Amisy apa ana dave umaso mamo Yesus apa arakovo utavondi aije wo raeno taune mamije rai no manasyinoe, umba wo veano wansanyao. ³ Anakotare umawe mamo syo ranyao mavabea nugoenta to, weti syare syo ayao mamaisy inta ratoeyo namarom, injayo Teopilus, ⁴ indamu nyo raen ayao nya kuru-ne wo nanyao rai omamo tugae rave.

Yohanes Pembaptis ano raije raurairive

⁵ Arono Herodes be akarijo titive no munijo Yudea, naije syeno tuna no Yavaro Amisy inta apa tame mirati Zakaria. Zakaria umaso pamo ato siso syeno varoro Abia mansai. Apa anamu ama tame mirati Elisabet, omamo ravaki no syeno Harun apa susye rai. ⁶ Zakaria muno Elisabet onayamo aya ana yo rave mamai no Amisy amune rai, muno javondijo Apa ananyaowe rai mavabe tenambe. ⁷ Weramu aya arikainye meweno yai weye Elisabet omamo mbakije ramu, muno wenayamo ibe vatan anuive rave to.

⁸ Noa masyote inta syeno varoro Abia mawain inta usisa wanapatambe Amisy ai no Yavaro Amisy rai, muno Zakaria panapatambe matavon. ⁹ Umba syene umaso wo aikarae rapatin, mamaisy awa koane rai, indamu wo syen inta apatimu. Weti Zakaria opirati wo apatimu indamu po kemenyano ranavano mbovove rame-seo Amisy ai no Yavaro Amisy ama uga. ¹⁰ Umba Zakaria siso rai, pare po kemenyane ramer, muno vatano wanuije wanugambe no Yavaro Amisy ama akiri umba ube sambayambe.

¹¹ Naije kobe naito Amisy inta anasine rarorono Zakaria ai, tet no tewa oramo kemenyane ramero raije ama ranijo anem ngkov. ¹² Arono Zakaria po naito Amisy umaso aen, paparo ai muno jani dave. ¹³ Umba naito umaso po raura pare, "Zakaria, vemo njani nora. Amisy po nya sambaya ranaun to. Indati nya anamugo Elisabet mo arikainye inta avaki, umba apa tamo nyo veano awaine mamo Yohanes. ¹⁴ Indati winyamo nanayanambe rave, muno vatano wanuije wo arikainye umaso anauno anowi indati manayanambe tavon. ¹⁵ Weye opamo indati vatano

panakoe no Amisy amun. Weti vemo po awije inta ramanam inya. Muno opamo Anawayo Vambunine mo vambunine raugaje ai no arono ta no no akoya ranobon. ¹⁶ Wepirati indati po vatano wanui no Israel maugavakare no awa Amisy ai. ¹⁷ Amisy po nya arikainye umaso atutir indamu puisyeye Ai. Po Anawayo Vambunin maisyare po raunanto Elia aijoe raunande ai indamu po Amisy apa kawasae manyao indamu wanatatayaube ra manuga ngkakavimbe arono masyoto Amisy de rai. Apa ananyaowe no taiso: 'Are nawirati uparijo awa arikainye mai, weamo wo maneme raijar indamu manuga nsauaman akato. Muno are nawirati ubeta Amisy aije ramu, weamo usakinav indamu utavondi Apa ayao mamaisy obo rai.'[✠]"

¹⁸ Umba Zakaria po raura naito Amisy umaso ai pare, "Risye sya anamu me riri-mamo imbe vatan anuive to, ti rimbakije ramu. Weti nya ana ndaura wato mamo nande ririnsai tai rui? Syare nyo ana inta rarorono rinai inda syo raen ti syanave nya ayaowe rai."

¹⁹ Umba naito Amisy po raura akananto ai pare, "Risyrirati Gabriel, syanapatambe Amisy ai, muno Opirati po inatuti da ride syo ayao kove so raura nai. ²⁰ Ana syo raurairive so indati noa masyote inta mamaisy rai. Weramu winyamo nyanave sya ayao umawe raije jewen, ti nyayao akatoe ramu yara soamo nawa ngkao ava indati ana syo raura so mamaisy."

²¹ Vatane umawe wo Zakaria anyut ti unantaive rave, ware, "Veanimaibe irati no no Yavaro Amisy ama uga nugoenta rave?" ²² Arono Zakaria puje Yavaro Amisy raora, payao nanto mai kakai weye awa ngkao, weti ana nande ai mamo po ranyijo aneme bo rai. Umba vatane umaso wo aen, ware, "Wato pamo somaida Amisy po ana inta rarorono ai no Yavaro Amisy ama uga umu to."

²³ Umba Zakaria panapatambe no Yavaro Amisy rai yava apa masyoto rapatimugo aije raija mewen, umba pakato no apa yavar. ²⁴ Nugoenta ramu, yara kavinta nakato umba apa anamugo Elisabet ranakeave kobe, umba mainda no no yavar ava embae radani. ²⁵ Mare, "Wusyinoe vatane wo inaura tantunawi weye ibakije ramu, weramu soamo Amisy po kovo manakoe raugaje rinaije so."

Yesus apa anowe raurairive

²⁶ Elisabet ranakea raena embae kau-jentabo to, umba Amisy po apa naito Gabriel atutir ti poroto no munijo Nasaret, omi no no Galilea. ²⁷ Poroto no wanya

mansae inta ama tame mirati Maria, omi ama vainye rave irati Yusup ai, opamo avaki no Daud apa susye rai. ²⁸ Naito Amisy umaso de nande Maria rai, umba po raura nanto rai pare, “Masyote ngkovo nai! Winyirati Amisy tuna nautan muno Po kovo manakoe raugaje nai.”

²⁹ Maria mo naito Amisy umaso apa ana daura ranaun, naije mpaparo rai. Mo ratantona no ranuga mare, “Wakoe! Apa ayao umaso ama ntunato rajie no tai rui? Syo raen kobe rainy!”

³⁰ Umba naito Amisy umawe po raura nanto rai pare, “Maria, vemo njaniv inya. Amisy po napatimu indamu Po kove raugaje nai. ³¹ Indati winanakea raen umba ntuna irati arikainyo anya inta autan, nyo Apa tame veano awainamo Yesus. ³² Sopamo vatano pakoeve, Apa tame rawainamo Arikainyo Amisy Titi Rave. Amisy po aijaseo be akarijo titive mamaisyo Apa aneno wusyin Daud amaisy. ³³ Indati be akarive Apa kawasaeyo Israel* mansaija nuge nuganui.”

³⁴ Umba Maria mo raura nanto naito Amisy umaso ai mare, “Ibe tai ruimai dati ana nyo raura wato mamaisy? Weye risyamo syantukamo anya inta ai rainy weye ta ino mansaevea nene.”

³⁵ Naito Amisy umaso po raura akananto Maria rai pare, “Indati Anawayo Vambunine maje nai muno Amisy Titi Rave apa vambunine no nautan indamu wimbe nanakeave. Weti indati vatane wo nya arikainye so aura ware, ‘Opamo Arikainyo Amisy piye, anuga ngkakavimbe.’ ³⁶ Inya! Winya arakovo Elisabet mbe vatan anuive to, weramu soamo mbe ranakeave! Wemirati vatane wo raura ware wanya nte bayave, mbakije ramu. Weramu soamo ranakea raena embae kaujentabo to. ³⁷ Weye Amisy bambunin po anakotaro rui vayave raveti mamaisy.”

³⁸ Umba Maria mo raura mare, “Risyamo syanapatambe Amisy ai. Nya ana ndaura umawe nande rinai kai.” Umba naito Amisy umaso po rapaya ti no.

Maria mo Elisabet rapan

³⁹ Masyote inta yai jakato, umba Maria nto no munije inta rai no Yudea, ama varoro unate inta rai. ⁴⁰ Umba moronto nsiso no Zakaria apa yavar, mo kove raura nanto Elisabet rai. ⁴¹ Arono Elisabet mo Maria ama ayao ranaun, umba arikainyo no no ranobone aansunuve, umba Anawayo Vambunine mo vambunine raugaje Elisabet rai, ⁴² ti mayao akoeve mare,

“Wanya wanui rave no mine vone so, weramu winyirati Amisy po napatimu indamu Po apa kove raugaje nai. Muno Po apa kove raugaje arikainyo no no nanobone Ai tavon. ⁴³ Wakoe! Winyamo sya Akarijo Titi apa akoya mi winy, yara risyamo vatano mamaun, weti nyo inapan, weamo mamaisy ramu. ⁴⁴ Arono winsiso sya yavar ti syo nanamote ranaun, naije kobe sya arikainyo no no inanobon aansunuve weye anayanambe rave. ⁴⁵ Kove ngkov irati winai, weye nyanave Amisy apa ayao rai to, nyare Apa ana po raura naije nde nande.”

Maria ngkangkamambe Amisy ai

⁴⁶ Maria mo raura mare,
“Rikangkamambe Amisy ai no inanuga,
⁴⁷ muno syo ararimbe weye Po inapaya ayao kakaije rai.
⁴⁸ Risyamo vatano mamaun dave, weramu Amisy aemeno rinai to.
Weti wama susyo miridije nto nao wo inaura ware risiy syaura Apa kove rai.
⁴⁹ Weye Amisy Bambunin Dave opirati po ana manakoe so rave rinai.
Apa tame ndandini dave!
⁵⁰ Amisy aemeno vatane mai ntoa awa ajavi wo mampame mai, nanawirati wo asyanive mansai tenambe.
⁵¹ Po apa vambunine raroron.
Po vatano manuga rararin mawatan ti unanajibe tatugadi.
⁵² Po akarijo titi maveaje,
yara Po vatano mamaun maijaseo titive.
⁵³ Po anaisy ko dave raunanto vatano marore po mave mai inda uman,
yara Po vatano awa ananuge manui rave mawatan ti unajiv manem bayave ara wusya.
⁵⁴ Po apa arikainyo Israel wansaeranande maisyare muno Po raurairive wama aneno wusyine mansai wemaisy.
⁵⁵ Amisy animari Apa urairije umaso rajie ramu,
yara aemeno Abraham muno apa susye miridije nto mansaija nuge nuganui.”

⁵⁶ Maria nowo Elisabet rarijata embae mandei, umba makato no ama yavar.

Yohanes Pembaptis ano

⁵⁷ Masyote ndea mamaisyo akoe Elisabet mare ntuna rai, umba mo arikainyo anya inta avaki. ⁵⁸ Ama arakove wo ranaun Amisy po kovo manakoe raugaje rai, weti ude manayanambe tenambe.

⁵⁹ Arikainye umaso apa masyote kaumandei, umba vatane ude tenambe indamu usambayambe ai muno wo koano sunat

* 1:33 Ayao Yunani naiso mo raura mare, “Yakob apa susye.”

rave ai mamaisyo Ananyao Musa rai. Umba ware wo ajayo Zakaria apa tame veano awain. ⁶⁰ Weramu Elisabet mo raura nanto mai mare, “Wenora, yara apa tame mirati Yohanes.”

⁶¹ Umba vatane umawe wo raura nakananto Elisabet rai ware, “Nya arakov bakipambe re sonawamo inta apa tamo Yohanes veano inta awaino intai ramu, ti mamaisye ramu.” ⁶² Weti wo ranyijo maneme bo rai indamu wo Zakaria anajo nanto ware, “Tamo rui mirati indamu wamo veano arikainye umaso awain?”

⁶³ Umba Zakaria po orame vasye inta ranajo mai, umba po ratoe rai pare, “Apa tame mirati Yohanes.” Weti vatan tenambe unantaive rave. ⁶⁴ Naije kobe Amisye po Zakaria awa raneka umba payao akato ti po Amisye ararimbe. ⁶⁵ Umbawe apa arakove unantaive rave ana umaso rai, muno ayao umaso ravov ti nanto no Yudea ama varodoro unate raita tenambe. ⁶⁶ Vatano wo ranaune nao wo ratantona no manuga ware, “Wakoe! Arikainye uma wato pamo Amisye apa vambunine no ai! Weti noa panakoeyamo, indati beo animai?”

Zakaria kangkamambe Amisye ai

⁶⁷ Arikainye umaso apa ajae Zakaria pamo Anawayo Vambunine mo vambunine raugaje ai umba po ayao Amisye nde ai raura pare:

⁶⁸ “Wade wamo Israel wama Amisye ararimbe!

Weye de Apa vatane wansai to, Po wansapaya ayao kakaije rai.

⁶⁹ Po Vatano vambunine inta atutir indamu Po wansapaya ayao kakaije rai.

Opamo Mesias, napi avaki no Daud apa susye rai,

⁷⁰ maisyare muno Amisye po raurairive Apa anawae wusyine mai wemaisy.

⁷¹ Wepirati po wansapaya irati wama marova mai muno vatano wo wansave tatugadi mansai tenambe.

⁷² Po muinye rarorono wama anene mai, muno teto Apa urairijo po rave mansai rai tutir.

⁷³ Apa urairije umaso mamo Po raugaje wama aneno Abraham ai

⁷⁴ pare Po wansapaya irati wama marova mansai,

inda vemo wanjaniv nora, yara wamanapatambe Ai kai,

⁷⁵ muno wansanuga ndandinit muno wama ana wandave mamaisy no Amune rai arono ta wana no mine vone so rai.

⁷⁶ Umba sya arikainyo winy, vatane indati wo nawainamo Amisyo Titi Rave apa anawae pi winy,

weye winyirati nyuisyewe indamu nyo unanuije ratayao Ai.

⁷⁷ Indati nyo Amisye apa vatane manyaonyare,

‘Amisye po wapa ayao kakaije rapaya wasai, wea indati wananta irati Apa kove rai.’

⁷⁸ Amisye aemeno wansai ti Po apa Mesias atutir de po wansapaya ayao kakaije rai.

Opamo aurata irati uma seo apa kove rautan no awatan ngko dave wemaisy.

⁷⁹ Apa vare mbaro vatano una no kaumure ama uga† muno ujanivo wene raije mansai.

Po unanuijo to no saumane rarorono wansai.”*

⁸⁰ Zakaria apa kavo Yohanes umaso panakoe seo to, apa ana datantona ntiti muno apa anave mbambunin. No no nugo vabukane vono maninimbe yava apa masyote mamaisy, umba de po anasine rarorono vatano Israel mansai indamu po Amisye apa ayao raura mai.

2

Yesus ano

(Matius 1:18-25)

¹ Arono naije Akarijo Titi Roma apa tame mi Agustus po apa ayao rauguje indamu po vatano mine so awa wanuije rator. ² Po ratoro manasyimbe mamo arono Kirenus be gubernurive no propinsijo Siria. ³ Weti vatan tenambe wuruta no awa munije rai janyi, indamu awa tame ratoe tetebe.

⁴ Weti Yusup puje no munijo Nasaret no no propinsijo Galilea, to no Betlehem no no propinsijo Yudea, omamo aneno Daud apa munije mije, weye Yusup pamo avaki no Daud apa susye rai. ⁵ Yusup to no Betlehem indamu pemerinta po apa tame ratoe. Muno Maria ntavondi, wemirati ama vainye rave Yusup ai. Omamo mbe ranakeave to. ⁶⁻⁷ Yare syisya no yavaro vatano marane udea unaki raive inta rai, weramu yavare umawe ngkatutundijo vatane mai to. Weti yurija nyaki yavaro maero makume usai daije bo rai. Umbawe Maria ntuna kobe ama arikainyo anya manasyine umaso autan. Mo ansune vasye veano atavan, umba mo augasyo nikijo ugoro veano maere awa anaisye raveaje raije ama uga rai.

Naito Amisye wo Yesus apa ano raije raura vatano wo domba maeranande mai

⁸ Namano napije vatano wo domba maeranande inta una no anoko insumaije ntami rai, mararajo munijo Betlehem

† 1:79 Kaumure raurata irati ayao kakaije rai. * 1:79 Yesaya 9:1-2

umawe rai. ⁹ Naije kobe naito Amisyete inta paje anasine rarorono mai, muno Amisyete apa varo ngkove mbaro mai tenambe, ti ujani dave. ¹⁰ Umba naito Amisyete umaso po raura nanto mai pare, “Vemo wajaniv inya. Namane so ide wasai indamu syo ayao kove so raura wasai. Ayao kove so indati mo anayanambe raugavo vatan tenambe mansai. ¹¹ Namane soamo arikainye inta ano no Daud apa munijo Betlehem. Arikainye sopamo Mesias, wapa Akarijo Titi piye, wepirati Amisyete po atutir indamu Po vatane mapaya ayao kakaije rai. ¹² Syo raura wusymbe wasai, inda wata wananta arikainye umaso Ai: Indati wapo aen atavano ansune vasye rai, muno augasyo nikijo ugano veano maere awa anaisyete raveaje raije ama uga rai.”

¹³ Umba naije kobe naito Amisyete wanui rave waje utavono naito umawe ai, umba wo raura ware:

¹⁴ “Amisyete ararimbe, Opi no no munijo ntiti!

Po kovo saumane raugaje mine vone so rai, nde vatano are nawirati Amisyete anayanambe maije mai.”

¹⁵ Umba naito Amisyete wuje wakata no munijo ntiti, naije vatano wo domba maeranande umawe wo raura vambinibe mansai ware, “Wade ra wanta no Betlehem inda wamo ana uma Amisyete po raura wansaije we raen.”

¹⁶ Wavave wuruta, umba unanta Maria me Yusupa pe arikainye umaso pe mai. Wo arikainye umaso aen nikijo ugano veano maere awa anaisyete raveaje raije ama uga rai. ¹⁷ Umba wo anakotaro naito Amisyete po raura maijoe ravov. ¹⁸ Muno vatano wanuije wo ayao uma vatano wo domba maeranande wo raura we ranaun, weti unantaive rave tenambe. ¹⁹ Maria mamamo raemeno ayao umaso rai tenambe muno mo ratantona no ranuga rai tutir. ²⁰ Umba vatano wo domba maeranande umaso wakare no anoko insumaije ntami raije umawe rai, ukangkamambe muno wo Amisyete ararimbe, weye ana wo raen umawe mamaisyete naito Amisyete po raura maijoe rai.

²¹ Arono arikainye umaso Apa masyote kaumandei, naije vatane ude indamu wo sunative Ai indamu mamaisyete Ananyao Musa rai. Umba wo Apa tame veano awainamo Yesus. Tame somamo naito Amisyete po raura to no arono akoya ranakea raeno autan dainyoe.

Yesus apatimugo Amisyete ai

²² Umba masyote manasine rarandom mamaisyete Ananyao Musa rai ndea mamaisyete. ²³ Weti Yusupa pe Maria me yo ayao

arikainyete Yesus augaveta no Yerusalem. Yuriya syisya no Yavaro Amisyete rai indamu yo Yesus apatimugo Amisyete ai. ²³ Maisyare Ayao Amisyete mo ratoe mare, “Arikainyete anya ano manasyimbe wepamo apatimugo Amisyete ai indamu apaura ai.” ²⁴ Yare yo insaniyo puname jiruma yameseo Amisyete ai tavon indamu mamaisyete Ananyao Amisyete rai.

²⁵ Arono naije vatane inta no no Yerusalem, apa tame mirati Simeon, opamo vatano kov muno po Amisyete asyaniv. Muno Anawayo Vambunine no irati ai. Po Mesias apa deye ranuyut, Wepirati pare po vatano Israel mapaya kakaije rai. ²⁶ Anawayo Vambunin mo raurairive Simeon ai wusymbe to mare, “Winyamo wingkakai rainyete yara noa indati nyo Amisyete apa Mesias aeno taune namije rai rati.” ²⁷ Masyote naije Anawayo Vambunin mo Simeon atutir indamu de no Yavaro Amisyete. Arono naije Yusupa pe Maria me yo Yesus augavete syisya no Yavaro Amisyete ama uga indamu yo augavere no Amisyete amun maisyare muno Ananyao Musa mo raura wemaisyete. ²⁸ Umba Simeon po Yesus aijade po akepano aneme rai umba po Amisyete ararimbe pare:

²⁹ “Amisyete winyete, naisoamo Nyo nya urairiye ravea mamai to, weti nyare Nyo inaugav, weamo Nyo inauga kai.

Saumane no inanuga rai to,

³⁰ weye syo Vatano po Israel mapaya kakaije raije aeno inamije rai to.

³¹ Opamo Nyo atayao indamu Po kove raurananto vatano una no mine tename so raije mai.

³² Opamo aurata irati varo mbaro vatano Yahudi jewene mansai, muno Po kovo ntiti raugavere Nya kawasae Israel mansai.”

³³ Yusupa pe Maria me unantaive ayao Simeon po raura nanto aya Arikainyete aije rai. ³⁴ Umba Simeon po Amisyete anajo indamu Po kove raugaje yai, umba po raura nanto Maria rai pare, “Arikainyete sopamo Amisyete po apatimu to, indati Wepi be war vatano Israel wanui ude Amisyete ai ti Po kove mai yara wanui kaijinta nawamo wonayo Ai ti po mangke raugaje mai. Weye opirati Vatano Amisyete po aroron ti atutir deye so, weramu vatano wanui indati wo awatambe, ³⁵ wirati awa ana wo ratantona no manuga raroron kakavimbe. Muno winyamo indati nanimaumbe rave, maisyare omako nsuge inta nteto nanuga rai wemaisyete, arono nyo Apa siurije raen!”

³⁶ Naije wanya kavinije inta, ama tame mi Hana, omamo anawae Amisyete ma. Ama

aja pamo Panuel, opamo avaki no susyo Asyer rai. Omamo mbe vatan anuive rave. Wusyinoe mo anya inta aovan, inya tenambea tume kaururum, ³⁷ umba ama ana umaso kakai, ti Hana mbe kavinine. Umba mbe kavinine nugoenta rave weye soamo ama tume tename mambisy eane mambisy. Omamo mo Yavaro Amisyepapaya ramu, yara namane rinit no tawan no rai tutir, manapatambe Amisyepai, nsambayambe muno ratawandijo marore rai. ³⁸ Arono naije kobe, wanya umaso nde mo kove raura seo Amisyepai, muno mo arikainyo Yesus umaso aura kakavimbe nanto vatano wo masyoto Amisyepo vatano Israel mapapaya kakaije raije ranyute mansai tenambe.

Yusupa pe Maria me yo Yesus au-gavakata no Nasaret

³⁹ Arono Yusupa pe Maria me ibeta Ananyao Amisyepo raugaje rai tenambea mewen, unajiv wakata no munijo Nasaret no no Galilea. ⁴⁰ Arikainyepo umaso panakoe piridije seo, muno bambunin, muno Apa ana po ratantona mba dave. Amisyepo kovo manakoe raugaje Ai.

Yesus apa tume abusyinara eane rurum, umba siso Yavaro Amisyepai

⁴¹ Tume anteter Yesus apa aja pe akoya me yurija no Yerusalem indamu itavondijo Ono Paska rai. ⁴² Yesus apa tume abusyinara eane rurum, umba yo auga ti wuruta Ono Paska rai, mamaisyepo awa koano itavondi raivea nsiridi to rai. ⁴³ Arono one umawe mewen, Yesus apa aja pe akoya me inyajiv, yara aya kavo Yesus opamo ta no no Yerusalem, weramu aja pe akoya me yantatukambe. ⁴⁴ Yo rakarae yare aya kavo tavondijo awa arakove inta mai ti udijata. Yanya masyote intai, umba yaemeno Ai, ti yo akani no aya arakove umawe awa yasyin. ⁴⁵ Weramu nyanta Aije ramu, ti yakare no Yerusalem indamu yo akani.

⁴⁶ Sisa masyoto mandeije rai, umba nyanta Ai no Yavaro Amisyepo ama uga. Yo aen tuna no kuruno Yahudi awa yasyin, Po awa ananyaowe raraniv, muno Po manajo. ⁴⁷ Vatano wo anaunantaive rave tenambe, weye Apa ana datantona ntiti muno Apa ana daura mba dave. ⁴⁸ Arono Yusupa pe Maria me yo Yesus aen, ipaparo yai. Apa akoya mo aura to mare, "Sya arikainyo Winy, mbeanimaibe Nyo ririnsaveare somaisy? Risye inya pe ririnsanuga nseo majeve weye ririmo nakanija marudi."

⁴⁹ Umba Yesus po raura akananto yai pare, "Injae, Ingkoe, ribeanimaibe irati ipo inakani? Wuripantukambe Risyamoya Injaya po inatutir indamu ino no Apa yavare ama uga." ⁵⁰ Weramu Apa aja pe

akoya me nyanta irati Apa ana po raura yai raije ramu.

⁵¹ Umba Yesus tavondi yai, wakata tenambe no Nasaret. Animaisyepo mirati aja pe akoya me yo raura Ai, omamo Yesus beto rai kobe. Muno Apa akoya raemeno anakotare umaso rai tenambe no ranuga. ⁵² Umba Yesus panakoe piridije seo muno Apa ana po ratantona miridije nseo titive. Amisyepo anayanambe Ai muno vatane manayanambe Ai tavon.

3

Yohanes Pembaptis apa ananyao
(*Matius 3:1-12; Markus 1:1-8; Yohanes 1:19-28*)

¹⁻² Kaisar Tiberius be akarijo titive no munijo Roma rai ama tume abusyinara eane radani, umba Amisyepo raura Zakaria apa kavo Yohanes Pembaptis ai no nugo vabukane vono maninimbe. Arono naije, Pontius Pilatus be gubernurive no munijo Yudea, muno Herodes be akarive no munijo Galilea, muno Herodes apa arakovo Pili-pus be akarive no munijo Iturea muno munijo Trakonitis, muno Lisanias be akarive no Abilene. Muno Hanasa pe Kayapasa pe ibe syeno titive vatano Yahudi mansai. ³ Arono naije Yohanes Pembaptis siso no mana Yordan ama varodore rai tenambe. Po ayao Amisyepo raura pare, "Wasakinav irati wapa ayao kakaije rai muno wade ramu syo wasaugasyo kuvuni mana rai indamu Amisyepo wapa ayao kakaije rapaya wasai." ⁴ Maisyare muno anawae Yesaya po ratoo no apa bukuge rai wemaisyepo pare:

"Vatane inta ugwaimbe no nugo vabukane vono maninimbe pare, 'Wapo unanuije ratayao irati Amisyepai, wapo ratayao da nsarokir inda panya rai.

⁵ Kambibive ratutun da mavae, unate muno papukame rakaro da mae-jea mavae.

Unanuijo nanto nande raree nsarokibe, muno unanuijo sakanate rayare da ngkakavin.

⁶ Indati vatano mine tename so wo raen, ware Amisyepo vatane mapaya ayao kakaije rai.'"

⁷ Vatane wanui ude Yohanes ai, ubeker indamu po maugasyo kuvuni mana rai. Weramu po raura mai pare, "Weapamo vatano mamun maisyare tawae mamunoe! Wabeanimaibe wade no so? Wapo rakarae wapeare syo wasaugasya kuvuni mana rai, wea indati wanajivo Amisyepo pari mangke makare akatoo rai. Weramu wapa ana wapo ratantona mamaisyepo ramu. ⁸ Syare wasakinavo wapa ayao

kakaije rai rati, umba ana ngkove obo mi wapo rarijat, wea umba mamaisy. Weramu vemo wasararin wapare, 'Abraham opamo wama anena pije, ti munije ama akari indati Amisye po mangke raugaje wansai jewen,' wemai nora! Syo raura wasai: Amisye pamo bambunin po orame wato ranigwan ube vatanbe ti Abraham apa ajavi waino mai, yara Po wasatugaro marambe.⁹ Apa mangke po ratayao vatane mai mamomamararai kobe to. Omamo raurata irati Apa tama mawes, pare Po inyoe rate no ama ruke rai. Weti inyowo rui mirati mo mano kove rauguje ramu, weamo tama veano rate ti ramaugasyo taname rai."

¹⁰ Umba vatane wo Yohanes anajo ware, "Weti animaisye mirati nyare reamo rave?"

¹¹ Yohanes Pembaptis po raura akananto mai pare, "Are pirati apave ansune jiruma rai, weamo po inta raunanto vatano apa ansune meweno aije inta ai. Are pirati apave anaisye inta rai, weamo po inta raunanto vatano apa anaisye meweno aije inta ai tavon."

¹² Umba vatano wo pajak ranugande pmerinta aije inta ude no Yohanes Pembaptisa nui indamu po maugasyo kuvuni mana rai. Umba wo anajo ware, "Injayo Kurune, animaisye mirati nyare reamo rave?"

¹³ Umba Yohanes po raura akananto mai pare, "Wapo doije ranugande pmerinta ai mamaisyo po rapatimuge obo rai. Yara vemo taune wapo nake inta raijanande tavon, nseo mo rapatimu to rakivan nora."

¹⁴ Umba naite inta ude wo anajo ware, "Maisyare omai ti, reamamo animaisye mirati reamo rave?"

Umba po raura akananto mai pare, "Vemo wapo vatane mantitidi indamu wo doije raunande wasai jinya, muno vemo wapangkarive wapo rangkivano vatane mai jinya. Muno vemo wapo nuge rapanan inya, yara wapare doijo pmerinta po rave wasavae mamomamaisy."

¹⁵ Naije vatano wanuije umaso wo ratantona no manuga ware, "Yohanes Pembaptis sopamo Mesias wamo anyubeye opije dako?"

¹⁶ Weramu Yohanes Pembaptis po raura akananto mansai tenambe pare, "Syo wasaugasyo kuvuni mana rai. Yara indati Vatane inta de opamo panakoe irati inakivan, weti Apa wajio nowo ajo kokome raije mamomo syo rapaya kakai weye risyamo imamaisye ramu. Indati Opamo po wasaugasya kuvuni mana rai jewen, yara Po Anawayo Vambunine ratutir maje wasai

muno taname ntavon.*¹⁷ Opamo aurata irati vatano po bayaije raijar no anem, po veano gandume rarayan bintabo. Po ama ine ranugan siso tuna no apa yavare rai, yara po ama kea ramero tanamo nen tutire rai."

¹⁸ Maisyare omaisy, Yohanes Pembaptis po Ayao Kovo Amisye raura muno po ananyao kotare raura vatane mai.¹⁹ Umba Yohanes po Herodes, opamo be akarive no munijo Galilea, apa ayao kakaije raura kakavimbe nanto ai, weye Herodes po apa arakovo Pilipus apa anamu Herodias raovan to muno apa ayao kakai kajijinta manui.²⁰ Umba po ayao kakaije so raijanande tavon: omamo po Yohanes ausiso makova no tanoano makova rai. Maisyare omai ti, Herodes no tawan no apa ayao kakaije umawe rai ti miridije nseo tutir.

Yohanes Pembaptis po Yesus augasyo kuvuni mana rai

(Matius 3:13-17; Markus 1:9-11; Yohanes 1:32-34)

²¹ Arono Yohanes Pembaptis po vatano wanuije maugasyo kuvuni mana rai, umba Yesus de, Yohanes po augasyo kuvuni tavon. Yesus be sambayambe, umba naume nsaneka²² ti Anawayo Vambunine maje Ai maisyare insanijo punamoe. Naije danito Po Amisye anamote ranaun, ngkinde no no munijo nnti mare, "Winyamo Sya Arikainyo inanuga no Nai. Inanayanambe Nai rave."*

Yesus apa anene awa susye

(Matius 1:1-17)

²³ Arono Yesus po apa anakere raijar, weamo Apa tume nanto no tenamara eane abusyini. Vatane wo ratantona ware Opamo Yusup apa kavo pije.

Yusup umaso opamo Eli apa kavo pije.

²⁴ Eli opamo Matat apa kavo pije.

Matat opamo Lewi apa kavo pije.

Lewi opamo Malki apa kavo pije.

Malki opamo Yanai apa kavo pije.

Yanai opamo Yusup apa kavo pije.

²⁵ Yusup opamo Matika apa kavo pije.

Matika opamo Amos apa kavo pije.

Amos opamo Nahum apa kavo pije.

Nahum opamo Hesli apa kavo pije.

Hesli opamo Nagai apa kavo pije.

²⁶ Nagai opamo Maat apa kavo pije.

Maat opamo Matika apa kavo pije.

Matika opamo Simej apa kavo pije.

Simej opamo Yosek apa kavo pije.

Yosek opamo Yoda apa kavo pije.

²⁷ Yoda opamo Yohanan apa kavo pije.

Yohanan opamo Resa apa kavo pije.

* 3:16 Ayao taname so ama tunato raije mbare ramu. Vatane inta ware wansaugasya taname rai omamo indamu mo wansanuga ratayao da ngkakavimbe (1 Petrus 1:7; Markus 9:49). Yara inta ware taname so raugaje vatano wanawe jewene obo mansai (anemo 9 so rai muno Muni Akari 20:15). * 3:22 Mazmur 2:7; Yesaya 42:1

Resa opamo Zerubabel apa kavo pije.
 Zerubabel opamo Seatiel apa kavo pije.
 Seatiel opamo Neri apa kavo pije.
 28 Neri opamo Malki apa kavo pije.
 Malki opamo Adi apa kavo pije.
 Adi opamo Kosam apa kavo pije.
 Kosam opamo Elmadam apa kavo pije.
 Elmadam opamo Er apa kavo pije.
 29 Er opamo Yesua apa kavo pije.
 Yesua opamo Eliezer apa kavo pije.
 Eliezer opamo Yorim apa kavo pije.
 Yorim opamo Matat apa kavo pije.
 Matat opamo Lewi apa kavo pije.
 30 Lewi opamo Simeon apa kavo pije.
 Simeon opamo Yehuda apa kavo pije.
 Yehuda opamo Yusup apa kavo pije.
 Yusup opamo Yonam apa kavo pije.
 Yonam opamo Eliakim apa kavo pije.
 31 Eliakim opamo Melea apa kavo pije.
 Melea opamo Mina apa kavo pije.
 Mina opamo Matata apa kavo pije.
 Matata opamo Natan apa kavo pije.
 Natan opamo Daud apa kavo pije.
 32 Daud opamo Isai apa kavo pije.
 Isai opamo Obed apa kavo pije.
 Obed opamo Boas apa kavo pije.
 Boas opamo Salmon apa kavo pije.
 Salmon opamo Nahason apa kavo pije.
 33 Nahason opamo Aminadab apa kavo pije.
 Aminadab opamo Admin apa kavo pije.
 Admin opamo Arni apa kavo pije.
 Arni opamo Hezron apa kavo pije.
 Hezron opamo Peres apa kavo pije.
 Peres opamo Yehuda apa kavo pije.
 34 Yehuda opamo Yakob apa kavo pije.
 Yakob opamo Isak apa kavo pije.
 Isak opamo Abraham apa kavo pije.
 Abraham opamo Tera apa kavo pije.
 Tera opamo Nahor apa kavo pije.
 35 Nahor opamo Seruk apa kavo pije.
 Seruk opamo Rehu apa kavo pije.
 Rehu opamo Peleg apa kavo pije.
 Peleg opamo Eber apa kavo pije.
 Eber opamo Salmon apa kavo pije.
 36 Salmon opamo Kenan apa kavo pije.
 Kenan opamo Arpaksad apa kavo pije.
 Arpaksad opamo Sem apa kavo pije.
 Sem opamo Noak apa kavo pije.
 Noak opamo Lamek apa kavo pije.
 37 Lamek opamo Metusala apa kavo pije.
 Metusala opamo Henok apa kavo pije.
 Henok opamo Yared apa kavo pije.
 Yared opamo Mahalalel apa kavo pije.
 Mahalalel opamo Kenan apa kavo pije.
 38 Kenan opamo Enos apa kavo pije.
 Enos opamo Set apa kavo pije.
 Set opamo Adam apa kavo pije.
 Adam opamo Amisyé apa kavo pije.

4

*Anakakai Akoe po Yesus aponae
 (Matius 4:1-11; Markus 1:12-13)*

¹ Yesus opamo po mana Yordan rapaya ti no, umba Anawayo Vambunine mo vambunine raugaje Ai, mo atutir poroto no nugo vabukane vono maninimbe. ² Umba Anakakai Akoe de po aponaeya masyote tename jirum. Yesus po anaisye inta raisye ramu, weti masyote tename jirum umaso mewen, umba maror.

³ Umba Anakakai Akoe po raura nanto Ai pare, “Ranivara Winyamo Arikainyo Amisyé pi Winy, weamo Nyo orame wato raura aje indamu mbe anaibeia Nyo raisy.”

⁴ Weramu Yesus po raura akananto ai pare, “Syonae, weye Ayao Amisyé mo ratoe mare, ‘Anaisye bo mi vatane wo rai da umano raije ramu.’”

⁵ Naije akato Anakakai Akoe po Yesus augave seo no pukamo titije inta rai, umba kavuratawe po munijo akokoe vatane ube akarive rai tenambe no mine tename so rarorono Ai. ⁶ Umba po raura nanto Yesus ai pare, “Amisyé po vambunine raunande rinai indamu ibe akarive mine vone so rai tenambe. Weti are bayave syare syo raunanto ai, weamo syo raunanto ai kai. ⁷ Weti wimbeaje rinai muno Nyo inararimbe, wea umba syo munije tename so raunande indamu winyaura rai tenambe.”

⁸ Umba Yesus po raura akananto ai pare, “Syonae, weye Ayao Amisyé mo ratoe taiso: ‘Nyo Amisyé obo ararimbe, nyanapatambe Obo ai.’”

⁹ Umba Anakakai Akoe po Yesus augav to seo te no Yavaro Amisyé ama tati rai jakato no Yerusalem. Umba po raura nanto Yesus ai pare, “Ranivara Winyamo Arikainyo Amisyé pi Winy, weamo nsopa da ntemasyo no mine waraya. Indati nana-sine mamo inta ranepate ramu. ¹⁰ Weye Ayao Amisyé mo ratoe mare:

‘Amisyé po apa naite matutir wo naman; ¹¹ wo naijaro maneme rai inda vemo najoe rantukamo orame rai jinya.’”

¹² Umba Yesus po raura nakananto ai pare, “Syonae, weye Ayao Amisyé mo raura mare, ‘Vemo nyo Amisyé atopano apa vambunine rai jinya.’”

¹³ Arono Anakakai Akoe po Yesus atopana jeben, umba po apaya vavai, po varoro kaijinta rakani jakato indamu po Yesus atopan.

*Yesus po apa anakere raijar no Galilea
 (Matius 4:12-17; Markus 1:14-15)*

¹⁴ Umba Yesus pakato no Galilea, Opamo Anawayo Vambunine ama vambunine manakoe Ai. Vatane wo Yesus apa ana dave muno Apa ananyaowe ravovo no Galilea

raita tenambe. ¹⁵ Po vatane manyao no Yahudi awa yavaro sambaya rai, muno vatan tenambe ukangkamambe Ai.

*Vatano Nasaret wo Yesus awatambe
(Matius 13:53-58; Markus 6:1-6)*

¹⁶ Yesus pakato no munijo Nasaret, omamo munijo no rai no arono mamau-noea panakoe raije mijem. Umba masyoto sambaya inta siso no yavaro sambaya rai, maisyare muno Opamo tavondi raivea nsiridi rai to wemaisy. Umba seo tet indamu Po bacave Ayao Amisyre rai. ¹⁷ Naije vatane inta po nyovara wao raakuvije inta raunanto Ai, omamo anawae Yesaya apa ayao ratee rai. Weti Yesus po raneka umba nanto irati ayao namiso rai, ti bacave rai:

¹⁸ “Anawayo Amisyre no irati Rinai,
weye Po inapatimu inda Syo Ayao
Kove raura irati vatano awa ananuge
meweno maije mai.

Muno Po inatutir inda Syo ayaowe so raura syare:

Vatano mansajaro arove nawamo Syo mapaya arove rai,

muno vatano mamije ntuba Syo saumane raunande mai inda wo nuge raen akato,

muno vatano nanawirati vatano kaije wo mave tatugadi Syo mapaya irati awa siurije rai.

¹⁹ Muno Po inatutir inda Apa masyoto po kove raugaje Apa vatane mansaije Syo ravov.”*

²⁰ Yesus po nyovara wao umaso raakuvi jakanande umba Po raunanto vatano panapatambe no yavaro sambaya umaso ai jakato, umba paje tuna. Vatano utantuna no naije mami ntamijo Ai tutir. ²¹ Umba Yesus po manyao pare, “Masyoto unumeso Ayao Amisyro idaura ti wadanaune umawe ama masyote mamai to soamo nande no wasamun.”

²² Weti vatan tenambe manayanambe Ai muno unantaive Apa ayao ko dave Po raura we rai. Wo raura ware, “Wakoe! Sopamo wama arakovo Yusup apa kavo pije, weramu Apa ayao umawe sarokir dave!”

²³ Umba Yesus po raura nanto mai pare, “Syo raen wapare wapo ayao varije so raura Rinai mare, ‘Anawae, Nyo saumane raunande taune Winai!’ Muno wapare, ‘Reamo ranaun Nyo anapaporainye inta raroron no munijo Kapernaum rai to, weti reamare Nyo inta raroron tavon no taune Nya munijo Nasaret so rai.’ ”

²⁴ Umba Yesus po raura iridi pare, “Syo raura tugaive: anawae to no munijo maran, weamo vatane wanave ai. Yara pare pakato no taune apa muni, weamo vatane wanave aije ramu. ²⁵ Tugae, arono anawae Elia

aijoe maruge maje jewen, none tamija tume mandei embae kaujentabo. Umba maroro akoe tamijo munije rai tenambe. Arono naije wanya kavinije wanui una no munijo Israel. ²⁶ Weramu Amisyre po anawae Elia atuti da poroto no wanya kavini Israel umaso inta mansaije ramu, weye wanave jewen. Yara poroto no wanya kavinijo maran no no munijo Sarpat, mararaijo munijo Sidon rai.* ²⁷ Maisyare omai tavon, arono anawae Elisa aijoe, vatano Israel wanui unanta irati waneno aravure rai, weramu Elisa po saumane raunanto inta aije ramu, weye vatano Israel wanave jewen. Yara po saumane raunanto vatano marane obo inta ai, apa tame mi Naaman, vatano Siria pa. Maisyare omai ti, vatano Nasaret weap, Syo anapaporainye inta raroron wasaije ramu, weye wanave jewen!”

²⁸ Arono vatano utantuna no yavaro sambaya umaso rai wo Yesus apa ayao umaso ranaun, upari rave. ²⁹ Weti usea usayai wo Yesus awatan puje awa munije raora, umba wo auga ti uta no pene inta ama tati, omamo no no munijo Nasaret ama akiri. Ware wo amaugo raijasyo. ³⁰ Weramu Yesus po makivandi awa yasyine rai to kobe, yara de pusyo ti to.

*Yesus po anawayo kakaije rawatambe
(Markus 1:21-28)*

³¹ Umba Yesus poroto no munijo Kapernaum no no Galilea. Arono masyoto sambaya rai, siso no Yahudi awa yavaro sambaya ama uga umba pananyaube vatane mai. ³² Vatane umaso unantaive Apa ananyaowe rai, weye Po mansanyao vambunimbe maisyare akari apa vambunine no irati ai amaisy.

³³ Vatano anawayo kakaije no aije inta siso tavon no yavaro sambaya rai, umba punanto akoeve, gwain pare, ³⁴ “Winyi Yesus, vatano Nasaret, animaisyre mi Nyo rave reansai? Nyare nde ra Nyo reansauba dako? Reamo naen: Winyamo Vatano Kakavimbe Amisyre po natutire pi Winy!”

³⁵ Yesus soowato anawayo kakaijo nsiso vatane umaso aije rai pare, “Manin! Nyuje vatane so aora!” Umba anawayo kakaije umaso mo vatane umaso aveti tende tami no vatano wanuije awa yasyin. Naije kobe muje irati vatane umaso aora, muno mo anakea raveti nJORAM akatoo ramu.

³⁶ Vatano wanuije so unantaive rave, ti wo raura vambinibe mai ware, “Wakoe! Apa ananyao so mbambunin dave! Arono Po anawayo kakaije matutir, weamo wuje vatane maora kobe, mamaisyo Apa ana po raura rai!” ³⁷ Weti wo ayao Yesus ravovo

* 4:19 Yesaya 61:1-2 * 4:26 1 Raja-raja 17:1, 8-16

ti maneka manakoe no munijo namije rai tenambe.

Yesus po saumane raunanto vatano wanuije mai

(Matius 8:14-17; Markus 1:29-34)

³⁸ Yesus pakauje yavaro sambaya rai ti to no Simon Petrus apa yavar. Simon Petrus apa anumam nggwanen, ranakea mamooan dave, weti vatane wo Yesus anajo indamu Po saumane raunande rai. ³⁹ Weti Yesus poroto no ama niki ri, umba Po wanene umaso rawatan ti musyo raora. Naije kobe nikija nseo, ti mo anaisye ratayao indamu wo raisy.

⁴⁰ Namandijo uma pare pasyo kobe, umba vatane wo vatano ugwaneno wanene kotare raije maugavere vintabo no Yesusa nui. Umba Yesus po aneme raugaje ntamijo mansai indamu usauman. ⁴¹ Muno anawayo kakaije wuje vatano wanuije maora, ugwain ware, “Winyirati Arikainyo Amisy!” Weramu Yesus po anawayo kakaije umaso maorai inda vemo wo raura akato inya, weye wo aen Opamo Mesiasa pije.

Yesus pananyaube no munijo kaijinta rai
(Markus 1:35-39)

⁴² Siman awatan ngko dave, Yesus poroto no nugo maninimbe. Naije vatano wanuije wo akanija unanta Ai, umba wo raura nanto Ai ware, “Vemo Nyo reansapaya nora.” ⁴³ Weramu Yesus po raura akanande mai pare, “Syare syoroto Syo Ayao Kove ravovo no munijo kaijinta rai tavon, weye wemi mbewaramo ide no mine vone so. Ayao Kove mare Amisy de be akarive Apa kawasae mai no mine vone so rai.”

⁴⁴ Weti Yesus panya propinsijo Yudea raita, pananyaube no Yahudi awa yavaro sambaya rai.

5

Yesus po apa arakovo manasyino utavondi Aije mawain

(Matius 4:18-22; Markus 1:16-20)

¹ Masyote inta Yesus te no onae tuga Genesaret. Vatano wanuije wo akijaniri indamu wo ayao Amisy Po raura we ranaun. ² Umba Yesus po nyomane rurumo jantavai no nayave vone raen. Nyomane umaso mamoo vatano wo jiane rakani waje raora to indamu wo awa pame rarandom. ³ Yesus seo no nyomane umaso inta rai, wemamo Simon Petrus apa nyomane ma. Umba Po Simon Petrus atutir pare, “Nyo nyomane ratutir usyo mampaya no onae ama nggwaro rai.” Umba Yesus paje tuna no nyomane umaso ama von umba pananyaube vatano wanuije umawe mai.

⁴ Umba pananyaubea jewen, Po raura nanto Simon Petrus ai pare, “Mborae usyo no ntento warave indamu wapo wapa pame rantet, indati wananta jiane inta mansai.”

⁵ Umba Simon Petrus po raura nakananto Ai pare, “Injayo Kurune, namano nggwara-vainyoe reamo pame ranteta marudi. Weramu Nyo inatutir, ti syo rantet akatoe so.”

⁶ Wo pame umaso rantet, naije wo raen akatoamo jiano nsawa raije manui rave, ti pame mpatimugo jiane umaso rai. ⁷ Weti wo awa arakovo una no nyomano kaije umawe mawain nanto ware, “Wade tavon indamu wamo jiane so ranugan tenambe.” Umba wo ranugan asyo tenambe nyomane jirume so yaija ama uga ntatairi jiane rai, kavinta ratire nyomane masyo.

⁸ Arono Simon Petrus po ana umaso raen, po vukane ranteter no Yesus amun, umba po raura pare, “Injae, Winyamo vatano kakavin dave, weti syare nyusyo ra nyoronto inaora! Vemo ntuna inatavon inya, weye risyamo ayao kakaije no rinai.”

⁹ Simon Petrusa pe, vatano utavondi aijo apa nyomane raije nawe nantaive rave weye wo jiane umaso raen manui rave. ¹⁰ Muno Simon Petrus apa arakovo jantuna no nyomano kaije umawe nyantaive tavon. Onayamo Sebedeus apa arikainye naya, aya tame mirati Yakobus muno Yohanes.

Umba Yesus po raura nanto Simon Petrus ai pare, “Vemo njaniv inya. Wusyinoe winyamo nyo jiane rakani, weramu no naiso kobe nyare nyo vatane makani ra utavondijo Rinai.”

¹¹ Wo awa nyomane rakarimu no nayave vone warea kobe, muno wo awa ananuge rapaya ti ntuna tenambe, umba utavondijo Yesus ai.

Yesus po saumane raunanto vatano aravure mo ave ai

(Matius 8:1-4; Markus 1:40-45)

¹² Masyote inta Yesus no no munije inta rai, umba vatano aravure ntepekano anakea raije inta po aen, ti po vukane ranteter no Amun. Umba po raura Ai pare, “Injae, winyare mayar, syare Nyo saumane raunande rinai.”

¹³ Weti Yesus po vatane umaso aijar, umba Po raura nanto ai pare, “Rimayar, ti syare winsauman.” Naije kobe apa wanene umaso raumandi ai. ¹⁴ Umba Yesus po vatane umaso aorai pare, “Vemo ndaurao vatane mai jinya. Yara nyoronto no syeno tuna no Yavaro Amisy raije ai, nyo nanakea rarorono ai indamu po raen winyamo sauman to. Umba nyo anakotare raugare rameseo Amisy ai, inda

mamaisyo Musa apa ananyaowe rai.* In-dati vatan tenambe wo raen tugae Amisye po saumane raunande nai to.”

¹⁵ Weramu vatane wo Yesus apa anapaporainye muno Apa ananyaowe ravov tutir ti ayao umaso maneka manakoe. Umba vatano wanui ude indamu wo anaun muno ware Po saumane raunanto manakea njajorame rai tavon. ¹⁶ Weramu masyote intanamo Yesus poroto be sambayambe no nugo maninimbe.

Yesus bambunin po ayao kakaije rapaya vatane mai no mine vone so

(Matius 9:1-8; Markus 2:1-12)

¹⁷ Masyote inta Yesus pananyaube, umba vatano Parisije inta nawe, kuruno Yahudi nawe utantuna no naije. Inta una no munijo Galilea ama munije ranteter ude, inta una no munijo Yudea ude, muno inta una no Yerusalem ude tavon. Naije Amisye po vambunine raugaje Yesus ai indamu Po saumane raunanto vatano ugwanene mansai. ¹⁸ Arono naije, vatane inta wo vatano tunaive inta augaje nikijo pata rai, umba wo anawan ude, ware ubeker wo augave siso no yavare ama uga indamu wo augaje niki no Yesus amun. ¹⁹ Weramu vatane wanui rave no ratuije, weti wararaijo usisa Ai kakai. Weti wo vatane umaso aijaseo no yavare umawe ama manyume von. Umba wo manyumo tatije ransodeto, umba wo vatano tunaive umaso airdijasyo apa tanije rautan no Yesus amun no vatano wanuije umawe awa yasyin.

²⁰ Arono Yesus po awa anave raen manakoe, Po raura vatano tunaive umawe ai pare, “Arakove, Syo nya ayao kakaije rapaya nai to.”

²¹ Naije kuruno Yahudi nawe vatano Parisije nawe uparijo Yesus ai, wo ratantona no manuga rai ware, “Ee! Veanimaiibe Po rauranare wemaisyo? Po rakarae pare po ayao kakai rapaya maisyare Amisye amaisyo! Weramu Amisye bo pi mamaisyo po ayao kakaije rapaya vatane mai, weti Yesus sopamo pangkarivea!”

²² Umba Yesus po awa ana wo ratantona raen no manuga rai, ti Po raura pare, “Wabeanimaiibe wapo kakaije ratantona no wasanuga rai? ²³ Syare syo vatane so apa ayao kakaije rapaya ai, weamo wapo ratantona wapare rimamaisye ramu. Wapanatatakambe Sya vambunine rai, ti wapanaive ramu. Weramu Syo anapaporainye inta raroron, indati wapo Sya vambunine raen kakavimbe. ²⁴ Weti syare Syo saumane raunanto vatane umaso ai indamu wapo raen wapare Risy, Arikainyo Vatan, ribambunin syo ayao kakaije rapaya no mine vone so.”

Umba Yesus po raura nanto vatano tunaive umawe ai pare, “Nseo! Nya tanije rauga da nin kai.”

²⁵ Naije kobe vatano tunaive umaso seotet no vatano wanuije umaso mansamun. Umba po apa tanije raugav ara pakato no apa yavar, ti po Amisye ararimbe.

²⁶ Vatano wanuije umaso unantaive rave ti wo Amisye ararimbe muno wo asyaniv, wo raura ware, “Wakoe! Masyoto unumeso wamo anapaporainye umaso raen to, wanantaive rai rave.”

Yesus po Lewi awain

(Matius 9:9-13; Markus 2:13-17)

²⁷ Yesus po anapaporainye umaso raro-rana mewen, umba puje. Umba Po vatano po pajak ranugande akarijo pemerinta aije inta aen, apa tame mi Lewi,* tuna no apa tanoano pajak rai. Yesus po awain pare, “Winde tavono Rinai!” ²⁸ Umba Lewi seo, po apa ananuge rapaya ti ntuna tenambe, yara pusyo ti tavondijo Yesus ai.

²⁹ Umbawe Lewi po one rave no apa yavar, po ratayao Yesus ai. Muno vatano wo pajak ranugande akarijo pemerinta aije wanui ude muno vatano kaijinta ude tavon ti wisyi tenambe. ³⁰ Weramu vatano Parisije muno awa kuruno makari mbaro Ananyao Musa raije manuga ngkovo Apa arakovo utavondi aije mai jewen, ti ware, “Wabeanimaiibe wapisyisyo vatano wo pajak ranugande akarijo pemerinta aije nawe, vatano ayao kakaije no maije nawe matavon?”

³¹ Umba Yesus po ayaowe rasakinavo mai pare, “Vatano saumane pamo bekero anawae aije ramu, yara vatano gwanene pirati bekero anawae ai. ³² Maisyare omaisy, are nawirati wo ratantona ware awa ayao kakaije meweno mai onawamo Syo mawaine ramu. Yara ride indamu Syo vatano awa ayao kakaije no maije mawain indamu usakinavo awa ayao kakaije rai.”

Yesus apa ayao wanyine nsasyeo vatano Parisi awa ayao wusyine rai

(Matius 9:14-17; Markus 2:18-22)

³³ Vatane inta wo raura nanto Yesus ai ware, “Yohanes Pembaptis apa arakovo utavondi aije matawandijo marore raija indamu ube sambayambe. Utavondi raivea, muno vatano Parisi utavondi raive tavona. Weramu, Injae, Nya arakove nawamo wisyi bayave muno wo anggurije rananam.”

³⁴ Umba Yesus po ananeneae so raura nanto mai pare, “Ono vauname inta, vatano utavondi rai manayanambe weye anya bauname tuna matavon, weti matawandijo marore raije ramu. ³⁵ Weramu masyoto makareye, anya bauname umaso pamo

* 5:27 Apa tame rawain tavonamo Matius. † 5:35 Yesus aurata irati anya bauname umaso ai.

augavo maora, weti arono naije vatane umawe matawandijo marore rai.”†

³⁶ Yesus po ananeneae kaijinta raura pare, “Ranivara ansuno wusyine inta mpatimu, vemo wamo ansuno wanyine inta raotar raunanto rarijato ansuno wusyino mpatimugoe rai nora. Weaveti wamo ansuno wanyine raotar ti mamaisye ramu, muno ansune vasye wanyino raotaroe mo ansuno wusyine umawe ramaisye ramu. ³⁷ Muno vatane wo awijo wanyine rauvarasyo karoa ugami wusyine rai, weamo mamaisye ramu. Weye awijo wanyine umaso ntipu akoeve ti mo karoa ugami umaso rapatimu ti ngkakai, weaveti awije mbuvar kobe. ³⁸ Yara awijo wanyine mamo rauvarasyo no karoa ugami wanyine obo rai, wea umba mamaisy.† ³⁹ Weramu are pirati po awijo wusyine ramanam, weamo pare ngko dave, ti ponayo awijo wanyine rai.”

6

Yesus apa arakove wo kasyambere rakasyin no masyoto sambaya rai
(Matius 12:1-8; Markus 2:23-28)

¹ Arono masyoto sambaya inta rai, Yesus de siso panya no nawaisyo kasyambere ama uga rai. Umba Apa arakovo utavondi aije wo kasyambere rakasyin, umba wo ama kokome rapapaya maneme rai umba wo ranumu gara wo raisy. ² Weramu vatano Parisi wo raura ware, “Wabeanimaiibe irati wapo kasyambere rakasyin no masyoto unumeso? Weye Yahudi wama ananyao mare vemo wamo anakere rajjar no masyoto sambaya rai jinya!”

³ Umba Yesus po raura akananto Parisije mai pare, “Wabeanimaiibe wananta Ayao Amisye raije jeben? Syare wasaemen animaisye mi mo ratoe mare aneno Daud po rave arono wepe apa arakove nawe umaror. ⁴ Opamo siso no Yavaro Amisye ama uga rai, umba po rotijo raunanto Amisye aije raugav ti po raisy, umba po raunanto apa arakove mai tavon ti wo raisy. Weramu Musa apa ananyao inta mare vemo vatan bayave wo raisy inya, yara syene bo nawi wo raisy.” ⁵ Umba Yesus po raura nanto mai pare, “Risy, Arikainyo Vatan, ribe akarive masyoto sambaya rai.”

Parisi wo Yesus aura tantunawi weye Po saumane raunanto vatane inta ai no masyoto sambaya rai

(Matius 12:9-14; Markus 3:1-6)

⁶ Arono masyoto sambaya kaijinta, Yesus siso no yavaro sambaya inta ama uga umba pananyaube. Vatano anem ngkove

nsawa inta no no naije tavon. ⁷ Weti kuruno Yahudi makari mbaro Ananyao Musa raije nawe, vatano Parisije inta nawe wo Yesus ananyuti tutira ware tugae ya rako Po saumane raunande arono masyoto sambaya raija rako? Weye wo Apa ayao kakaije rakani indamu wo aura tantunawi.

⁸ Weramu Yesus po awa ana udatantona no manuga raen to, weti Po raura nanto vatano aneme rani nsawa umawe ai pare, “Windento nte no usye so.” Weti vatano napije seo tet kobe.

⁹ Umba Yesus po raura nanto vatano una no we mansai pare, “Syare syo wasanajo rati. Mamaisyo wama ananyao rajjamo, rui mirati wamo rave no masyoto sambaya rai: Wamo ana ngkove rave rako, ngkakaije mi wamo raveye? Wamo vatane mapaya irati kakaije rai rako, wamo maubaisye?” ¹⁰ Yesus po maen tenambe umba Po raura vatano aneme rani nsawa umawe ai pare, “Naneme raojaito!” Umba vatane umawe po aneme raojaito, naije kobe aneme nsauman.

¹¹ Weramu kuruno Yahudi nawe vatano Parisi nawe upari rave, weti wanugan wayao ensembe ware, “Animaisye mirati wandave Yesus ai?”

Yesus po apa arakovo abusynara eane rurum mawain

(Matius 10:1-4; Markus 3:13-19)

¹² Masyote inta yai jakato, Yesus panya seo no pukam indamu be sambayambe. Namano waravainyoe be sambayambe Ajayo Amisye ai. ¹³ Sansiman umba Po apa arakovo utavondi aije mawainde tenambe, umbawe Po abusynara eane rurum mapatimu, pare, “Weapamo Sya arakovo syo wasatutire nawi weap. Syo wasapatimu indamu wapo Sya ayao ravov.” ¹⁴ Yesus apa arakovo po matutire awa tame mi som:

Simon (apa tamo Yesus po raura tavona Petrus),
apa rijato Andreas,
Yakobus,
Yohanes,
Pilipus,
Bartolomeus,
¹⁵ Matius,
Tomas,
Yakobus (Alpeus apa kavo pije),
Simon (opi awainamo vatano Zelot),
¹⁶ Yudas (Yakobus apa kavo),*
Yudas Iskariot (opi po Yesus amavun).

Yesus pananyaube muno Po saumane raunanto vatano ujajorame mai
(Matius 4:23-25)

† 5:38 Ananeneae jirume so aya ine mare Yesus apa ananyao wanyine nsasyeo vatano Parisi awa ananyao wusyine rai.

* 6:16 Yudas so awain tavonamo Tadeus.

17 Umba Yesus pakaje no pukame ama ruk muno Apa arakovo utavondi aije wanui wakaje tavon, usayai tenambe no anoko mavae inta rai. Naije Apa arakovo utavondi aije wanui rave, muno vatano wanui una no Yudea, inta una no Yerusalem, muno inta una no Tirus muno Sidon, mararai no mayane von. 18 Vatane umaso ude indamu wo Yesus anaun muno ware Po saumane raunanto manakea njajorame rai tavon. Muno vatano anawayo kakaije no mansaije nao, Yesus po anawayo kakaije mawatano mansaora tavon. 19 Vatano wanuije umaso ware ubeker wantukamo Yesus ai, weye Apa vambunino muje no anasine mo saumane raugavo vatane mai tenambe.

Ananyao kove ngkove irati vatane mai (Matius 5:1-12)

20 Yesus po apa arakovo utavondi aije maen, umba Po raura nanto mai pare:

“Weapirati wapa ananuge meweno wasai, weamo kove ngkove irati wasai, weye indati wasisa no munijo Amisy be akarive raije rai.

21 Weapirati soamo wamaror, weamo kove ngkove irati wasai, weye indati Amisy po anaisy rau-nande wapo rai ti mamaisy.

Weapirati soamo wapoyov, weamo kove ngkove irati wasai, weye masyoto makanande indati wapugoen.

22 Ranivara vatane manuga mamuno wasai ti wo wasamumuiibe muno wo wasaura tantunawi muno wo wapa tame raura tatugadi weye watafondijo Arikainyo Vatane rinai, weamo kove ngkov irati wasai!

23 Syare wasaemen: wapa anene wo anawae wusyine mave tatugadi tavon to. Weti ranivara vatane wo wasave tatugadi weye watafondi Rinai, syare wasanayanambe muno wasarera wamarinsayan, weye Amisy po kove ratayao ti ntuna mo wasanyut no munijo ntiti.

24 Yara vatano wapa ananuge manui rave, weamo indati kakaije nde wasai, weye wapa ana kovo wadajjar no mine so manui rave to, indati kovo kajinta mo wasanyut aka-toe ramu.

25 Vatano wapa anaisy mawes wasai ti wamano obo rai, weamo indati kakaije nde wasai, weye indati wamaror akato.

Muno vatano wapugoen muno wansananibe no mine vone so, weamo indati kakaije nde wasai,

weye indati wasanimaumbe muno wapoyov akato.

26 Weapirati vatano wanuije wo wasararimbe, weamo indati kakaije nde wasai, weye maisyare omai tavon aneno wusyine wo anawae angkarije mararimbe tai omai tavon.”

Muiny irati nya marova mai (Matius 5:38-48, 7:12)

27 “Weramu Syo raura vatano wapo Sya ayaowe so raranye wasai: Syare wapo muinye raroron irati wapa marova mai, muno wabekobe irati vatano manuga mamuno wasaije mai. 28 Syare wapo Amisy anajo indamu Po kove raugaje vatano wanaamatambe wasaije mai, muno wasambayambe vatano wo wasave tatugadije mansai. 29 Ranivara vatane inta po nawamona rani ranepat, weamo nsarirae indamu po rani ranepat tavon. Vatane inta pare po nya ansuno no no nanakea raugavo naora, weamo po rauga kai, muno syare nyo ansuno kajinta raunanto ai tavon. 30 Vatane inta pare po ana inta ranajo nai, weamo nyo raunanto ai kai. Muno ranivara vatane inta po nya ananuge inta raugavo naora, weamo vemo nyo ranajo po raugakanande inya. 31 Weabekero vatano kai awa ana udave ngkovo wasai rai, weamo weapa ana wadave ngkovo mansai tai wemai tavon.

32 Ranivara wapo muinye raroron irati vatano umuinyo wasaije obo mansai, omamo mamai dainya, weti vemo wapo ratantona wapare Amisy po kove raugaje wasai, wemai nora. Weye vatano ukakainoanive umuiny irati vatano umuinyo maije mai tavon. 33-34 Ranivara wabekobe irati vatano ubekobe wasaije obo mansai, omamo mamai dainya, weti Amisy po kove raugaje wasai jewen. Muno ranivara wapo ananuge ndako doije ndako raunanto vatano awa ananuge manuije bo mai weye wapare veravo wo ananuge inta rasakinav akare wasai, omamo mamai dainya, weti Amisy po kove raugaje wasai jewen. Weye vatano ukakainoanive wo rave tai maisy tavon.

35 Yara syare wapo muinye raroron wapa marova mai, wabekobe mai muno wapo ananuge, doije raunanto vatano awa ananuge meweno maije mai, yara vemo wapare wo ana inta ranijan akare wasai jinya. Wea umba Amisy po kovo manakoe inta ratayao ti ntuna mo wasanyut no munijo ntiti. Wapo raveare wemaisy indamu mamaisy wapa Ajayo no no munijo ntitije Apa ana dave rai weye Opamo bekobe irati vatano mamune mai muno vatano wo kove raura seo Ai jewene mai tavon. 36 Wapa

Ajayo no no munijo ntiti aemeno vatane mai tenambe, weti syare wasaemeno mai tavon.”

Wasaemeno vatano kaijinta mansai
(*Matius 7:1-5*)

³⁷ “Vemo wapo vatano kaijinta maura nanto awa ayao kakai rai ra mangke rapatimugo mai jinya, inda vemo Amisye po mangke rapatimugo wasai tavon inya. Vemo wapo maura tantunawi nora, muno wapare wapo mangke bo raugaje mai nora, indamu vemo Amisye po wasaura tantunawi muno Po mangke rasakinav akanande wasai nora, weye taune wapa ayao kakai no tavon. Yara syare wapo vatane wato maneme rajar indamu wasanuga nsauman tenambe, wea indati Amisye po wapa ayao kakai rapaya wasai tavon. ³⁸ Syare wapo vatane awa bekedaije raunanto mai, wea indati Amisye po kove inta raugakanande wasai, omamo mo wapa ana wadaunanto vatane mansaije umawe rakivan akato, weti manui rave. Wapo raunande manakoeve mai, indati Amisye po kovo manakoeve raunande wasai. Yara wapo raunande mamaumbe, weamo Amisye po kovo mamaune inta raugaje wasai tavon. Tauno wapo veano vatano kaijinta matauni omamo Amisye po rasarirae akare, Po veano taune wasataun akato tavon.”

³⁹ Umba Yesus po ananeneae inta raura taiso pare, “Weapamo wasaurata irati vatano amije ntuba be akarive vatano mamije ntuba kaijinta mai. Vatano amije ntuba inta po vatano amije ntuba kaijinta augav no aya unanui anya rai, weamo mamaisye ramu, weaveti itatayasyo ateme rai kava. ⁴⁰ Arikainyo sekora onawamo usea ra wo awa kurune akivane ramu. Weramu ranivara arikainye umaso wo ranyaowa mamai to, wea indati wo awa kurune amaisy. Arakove, Risyamo wapa kurune pi Risy.

⁴¹ Wabeanimaije wapo vatano kaijinta awa ayao kakaije bo raen, yara umba taune wapa ma wadaene ramu ge? Omamo maisyare wapo inyo kengkene raen no wapa arakove inta amije rai, weramu taune wapantukambe inyo vasye akoe ngkapi no taune wasamije raije rai. ⁴² Wabeanimaije wapo raura wapa arakove mai wapare, ‘Arakove, winde syo inyo kengkeno no namije raije wato raugaje namije raora,’ yara umba wapantukambe inyo vasye no taune wasamije rai wato rai je? Weapamo wapa angkarije ntapekan! Syare wapo wapa inyo vasye raugaje taune wasamije raora rati, inda wapo ana raen kakavimbe, wea umba wapo wapa arakovo kaijinta awa raugajeamo mamaisy.”

Ananeneae inyo ama mane mamaisyo ama mote rai

(*Matius 7:17-20, 12:33-35*)

⁴³ “Inyo moto kove mo mano kakaije raugaje ramu, muno inyo moto kakaije mo mano kove raugaje ramu. ⁴⁴ Inyo mane mamamaisyo ama mote rai. Inyo moto mamun omamo mo mano kovo manavane raugaje ramu. ⁴⁵ Maisyare omai ti, vatano kove po ayao kove raura weye anuga ntairijo ana ngkove rai, yara vatano kakainoanive po ayao kakaije bo raura weye anuga ntairijo ana ngkakaije rai. Weye vatane apa ana no anuga rai ntipu muje po raura no awa.”

Ananeneae yavaro rauseo ntet matuve muno yavaro rauseo ntet matuve jeben

(*Matius 7:24-27*)

⁴⁶ “Wabeanimaije wapo inawain wapare, ‘Reama Akari, Akarijo winy,’ weramu watavondijo Sya ananyaowe raije jeben? ⁴⁷ Are pirati de irati Rinai ti po Sya ayaowe ranaun muno tavondi rai, opamo aurata rui? Syo raura kakavimbe wasai syare ⁴⁸ opamo aurata irati vatano po yavare rauseo nteto kopa matuge rai. Manasyin po ateme rawae ti masyo rave, umba po ajije raveasyo nsaiyo ateme umaso rai indamu yavare umaso matu. Arono manayame njam, mo yavare umaso rapupuji, weramu yavare umaso nteto matuve weye rauseo nteto kopa matuge rai ti ntindimu. ⁴⁹ Yara are pirati po Sya ayaowe ranaun muno tavondi raije jeben, opamo aurata irati vatano po yavare rauseo nteto kopa vone bo rai, yara po rawae jeben. Weti arono manayame njam, mo yavare umaso rapupuji, umba mo yavare umaso rabbit kobe muno mandamisyije manakoeve rave kobe.”

7

Yesus po saumane raunanto arikainyo panapatambe nait akari Roma inta ai

(*Matius 8:5-13; Yohanes 4:46-54*)

¹ Yesus po apa ananyaowe umaso raura vatano wanui umaso mansaija jeben, umba poroto no munijo Kapernaum. ² Naije nait akari Roma inta, opamo anuga no irati apa arikainyo panapatambe aije ai. Arikainyo panapatambe umaso pamo gwaneno akoevea kavintare kakai. ³ Arono nait akari umawe po Yesus apa ana dave ranaun, po akarijo Yahudi inta yatutir indamu yurija yo Yesus anajo indamu de Po saumane raunande arikainyo panapatambe aije umaso ai.

⁴⁻⁵ Weti akarijo vatano Yahudi umaso je nyande Yesus ai, umba yo raura kikibe nanto Ai yare, “Nait akari umaso bekobe irati vatano Yahudi wansai, muno po doiye

inta raunande indamu reamo veano yavaro sambaya inta rauseo ntet. Weti rimare naemeno ai Nyo kove raugaje ai ra mamaisy.”

⁶ Umba Yesus tavondijo yai kobe, ti wuruta. Arono Yesus pararai kobe no nait akari umawe apa yavare rai, umba nait akari umaso po apa arakove inta yatutir inda je yo apa ayaowe raura Yesus ai. Apa ayaowe rauranare so yare, “Injae, vemo winsiso sya yavare rai jinya, yara jewen kai, weye risyamo imamaisy ramu. ⁷ Wemi mbewar syore no Injae winaije jewen, weye risyamo imamaisy ramu. Weramu syare Nyo raura vayave, indati arikainyo panapatambe rinaije umaso sauman. ⁸ Vatano apa vambunine manakoe po vatano kaijinta matutir indamu wo apa anakere raijar. Maisyare omaisy ri tavon: sya akari po inatutir, muno risyamo syo naito ibe akarive maije matutir. Syo naite inta atutir poroto, weamo poroto kobe, muno syo naite inta atutir de, weamo de kobe. Weti Winya vemo taune nyoronto inya, yara Nyo ayao bo raura vayave, indati mamaisy aje.”

⁹ Arono Yesus po ayao umaso ranaun, nantoive rai, umba sarirae akare Po raura nanto vatano wanui utavondi Aije mai pare, “Tugae, nait akari Roma umaso apa anave mamomo mo vatano Yahudi awa anave rakivan bintabo!”

¹⁰ Umba nait akari apa arakovo po yatutire umawe yakare no apa yavar, umba yo raen arikainyo panapatambe umaso sauman to.

Yesus po anya kamuramo kakaije inta aveti kovakato no munijo Nain

¹¹ Masyote inta yai jakato, Yesus poroto no munijo Nain. Apa arakovo utavondi aije muno vatano wanuije utavondijo Ai. ¹² Wararaijo munije umaso ama paranda uje rai, umba vatane inta wo vatano kakaije inta augaje nanae rai ti wo anawan ude wusya no munije umaso ama akiri. Vatano kakaije umaso apa akoya mamomo wanya kavinije ma, muno ama kavomo intabo dave wepirati kakai to. Vatano wanuije una no munije umaso utavondijo rai ti wuje tenambe.

¹³ Arono Amisy Yesus po wanya kavinije umaso raen, anuga mantaun muno aemeno rai rave, ti Po raura nanto rai pare, “Vemo nyoyov inya.” ¹⁴ Umbawe pararai nanto no vatano kakaije apa nanae rai, umba Po raijar. Vatano wo nanae umawe ranawane usai kobe. Umba Yesus po raura nanto vatano kakaije umawe ai pare, “Arikainyo kamurame winy, syare winseo!” ¹⁵ Naije kobe arikainyo kamurame umaso seo tuna umba payao. Umba Yesus po auga akananto no akoya nui.

¹⁶ Vatano wanuije umaso ujani dave muno wo Amisy ararimbe. Wo raura ware, “Sopamo anawae anakoe de no wama yasyin. Amisy de po apa kawasae maeranande to.” ¹⁷ Ayao umaso ravovo no Yudea muno ama varodore raita tenambe.

Yohanes Pembaptis po Yesus anajo muno Yesus po Yohanes aura (Matius 11:2-19)

¹⁸ Yohanes Pembaptis apa arakovo utavondi aije wo Yesus apa ana dave raura Yohanes ai. Weti Yohanes Pembaptis po apa arakove jiruma yawainde, ¹⁹ po yatutir indamu ija yo Yesus anajoare somaisy, yare: “Injae, Winyamo Mesias Amisy po naurairive opi Win dako, reamo vatano kaijinta anyute?”

²⁰ Weti yurija no Yesusa nui, umba yo raura Ai yare, “Yohanes Pembaptis po irinsatutir indamu ririnde ririmo winanajo: Winyamo Mesias Amisy po naurairive opi Win dako, reamo vatano kaijinta anyute?”

²¹ Arono naije Yesus po saumane ruananto vatano wanuije mansai, onawamo ujaoram wane kotare rai, muno Po anawayo kakaije mawatano vatane maora, muno Po saumane ruananto vatano mamije ntuba mai indamu wo nuge raen. ²² Weti Yesus po raura akananto yai pare, “Syare ipo Sya ananyaowe ranaun muno ipo Sya anapaporainye raen, umba ipakata no Yohanesa nui umba ipo raura ai: Soamo vatano mamije ntuba wo nuge raen, vatano tunaive wanya, vatano aravure mo mave manakea nsauan, vatano mamarikoame mpapaki soa mamarikoame mpomo ti wo ana ranaun, vatano ugwenen to soamo ukokovainy akato, muno Ayao Kovo Amisy idavovo vatano awa ananuge meweno maije mansai. Weti ipakata ipo ana umaso raura Yohanes ai. ²³ Muno ipo ayao namiso raura ai tavon: Vatano are pirati mamaundive Rinai jewen, yara panave Rinai kobe tutir, opamo Amisy po kove raugaje ai.”

²⁴ Arono Yohanes Pembaptis apa arakovo javondijo aije yakata to, umba Yesus po Yohanes aura vatano wanuije mai pare, “Nandijawe arono wata no nugo vabukane vono maninimbe indamu wapo Yohanes aen, opamo vatano apa ana po ratantona nanto nande maisyare ovare po insumaije ramawi wemai dako? Jewena! ²⁵ Weti arono wata wapo Yohanes aen, animaisy mi wapo raen? Indako opamo po ansuno ngko dave rave rako? Jewena! Yara vatano wo ansuno ngko dave rave onawirati untuna awa ananugo manui rave ama vone rai no awa yavaro ngko dave rai. ²⁶ Weti Yohanes umaso are piye? Opamo anawae pa. Syo raura wasai syare opamo po

anawae kaijinta mansakivan. ²⁷ Yohanes umaso pamo Ayao Amisye mo aurairive no wusyinoe. Amisye po aura to pare: 'Sopamo vatano Syo atutire pi so. Syo atutir puisy manasyimbe Sya Mesias winai indamu po unanuije ratayao Nai.'²⁸

²⁸ Syo raura tugaive: No mine vone so wusyinoea ndea naiso vatane inta panakove po Yohanes umaso akivane ramu. Yara vatano rui pirati apa tame maje rave no kawasae Amisye be akarive mai, opamo po Yohanes akivan."

²⁹ Vatano wanui muno vatano wo pajak ranugande akarijo pemerinta ai wo Yesus apa ayaowe umaso ranaun, umba wo raura ware Amisye apa bekere mamo mamai dave, weye onawamo Yohanes po maugasyo kuvuni mana rai to. ³⁰ Weramu vatano Parisi muno kuruno makari mbaro Ananyao Musa rai onawamo wonayo Amisye apa bekero Yesus po raura maije rai, weye wusyinoe Yohanes po maugasyo kuvuni mana rai ramu.

³¹ Yesus po raura nakoto pare, "Vatano arono naiso onawamo syo mansaura ananeneae so rai. ³² Arikainye inta wanunugambe ti utantuna no pasari ama wanijate rai. Arikainye inta wo awa inta mawainde ware, 'Wade wangkin da wansarer.' Weramu awa arakove umaso wonae. Weti ugwain akato mansai ware, 'Ngko to, weamo wamo ana kaijinta bo rave. Wade ramu wangkin ransyerano weotore rai indamu wansanimaumbe tenambe.' Weramu wonae tutir.

³³ Maisyare wemai ti, weapamo wasaurata irati arikainyo wonae umawe mansai, weye waponayo Yohanes Pembaptis ai muno waponayo Rinai tavon. Arono Yohanes de wasai, opamo po anaisy kove inta raisye ramu muno po anggurije ramaname ramu, weramu waponayo ai, wapare, 'Opamo anawayo kakaije siso aija.' ³⁴ Risy, Arikainyo Vatane, ride wasai, Syo anaisy rai muno Syo anggurije ramanam, weramu weapamo waponayo Rinai tavon, wapo inaura wapare, 'Opamo sasokabe anaisy rai muno maeno anggurije rai. Muno opamo be arakobe irati vatano wo pajak ranugande akarijo pemerinta aije mai muno vatano ayao kakaije no maije mai.' ³⁵ Weramu Amisye apa ana datantona mamo ntiti rave, weti vatano utavondi Apa bekere rai onawamo awa ana wo raveye mo raroron kakavimbe Apa ana datantona mamo mamaisy."

Yesus pisyi no vatano Parisi apa yavar

³⁶ Vatano Parisiye inta apa tame mi Simon po Yesus awainde inda siso pisyi no

apa yavar. Weti Yesus poroto siso no apa yavar pisyisy. ³⁷ Munijo namije wanya inta, omamo vatan tenambe wo raen mo ayao kakaije rave tutir. Wanya umaso mo Yesus anauno de tuna pisyi no vatano Parisi umawe apa yavar. Weti mo botoro nsasabe ntaire jirati manino mbovove rajie inta raugavere, nde siso no Parisiye umawe apa yavar. ³⁸ Umba nde nte no Yesus akiri mararaijo ajoe rai. Naije moyov rami ngkaruge ntatae no Yesus ajo, umba mo rakarivunye veano ajoe raupupaisy inda ngkanen. Muno mo ajoe ranu muno mo manino mbovove umawe rauvaro ajoe rai.

³⁹ Naije vatano Parisiye uma po Yesus awainde no apa yavare we po ana umawe raen, po ratantona no anuga pare, "Yesus pantatukambe wanya mo aijare so rai, omamo ama ayao kakaije ntapekan dave. Weti syo ratantona Opamo anawae tugae pa jewena, weye Po wanya so ama ayao kakaije raen no rajie ramu."

⁴⁰ Umba Yesus po raura nanto vatano Parisiye umaso ai pare, "Simon, syare Syo ana inta raura nai."

Umba Simon po raura nakanande Yesus ai pare, "Injayo Kurune, ndaura kai."

⁴¹ Umba Yesus po ananeneae inta raura Simon ai pare, "Vatane jiruma yo doiye inta ranajo akarije inta ai. Inta pamo po doi ratusiye radani ranajo, yara inta pamo po doi abusiyne radani vayave ranajo. Yurairive yare indati yo doiye umaso ranigwan akare aje. ⁴² Weramu onayamo aya doiye meweno yai, ti yo doijo uma yo raugavoe ranigwane ramu. Weti akarije umawe po raura yai pare, 'Ipo doiye umawe raugakare jeben kai, yara syo ipa raupai bayave ti mewen.' Weti, Simon, Syo nanajo: vatano yo doiye raugave umawe rui pirati apa muinye manakoeve akarije umawe ai?"

⁴³ Umba Simon po raura akananto Yesus ai pare, "Syo ratantona syare vatano apa doijo manui rayaridije opirati muiny manakoeve akarije umawe ai."

Yesus po raura nanto ai pare, "Tugae." ⁴⁴ Umba sarirae akare, Po wanya umawe raen, umba Po raura nanto Simon ai jakato pare, "Syare nyo wanya so raen. Ide no nya yavar, weramu mana inta ratayao inda inajoe rarandom mamaisy wama koane rai omamo nyo rave ramu. Yara wanya so mi mo inajoe rarandom rami ngkaruge rai, muno mo rakarivunye veano inajoe raupupaisy ti ngkanen akato. ⁴⁵ Winyamo nyo inajade nyo inanu mamaisy wama koane rai oma jeben tavon. Yara wanya so mi mo inajoe ranu tutir, mo inapaya jeben. ⁴⁶ Winyamo nyo manine inta rauvaro inakari rajie ramu, yara wanya so

mirati mo manino mbovove rauvaro inajoe rai. ⁴⁷ Tugae, wanya so ama muinyo mo rarorono Rinaije so manakoe, maisyare vatano apa doijo manui rayaridije umawe amaisy, weye Syo ama ayao kakaijo manui rapaya rai to. Yara are pirati po ratantona pare apa ayao kakaije meweno ai, opamo apa muinyo po rarorono Rinaije mamaun.”

⁴⁸ Umba Yesus po raura wanya umaso rai pare, “Syo nya ayao kakaije rapaya nai to.”

⁴⁹ Vatano kaijo nanawirati utantuna wisyisy umawe wayao nanto mansai vambinibe ware, “Vatane sopamo are piye wirati Po ayao kakaije rapaya vatane majioe?”

⁵⁰ Weramu Yesus po raura nanto wanya umawe rai pare, “Nyanave Rinai jivae, ti Syo napaya nya ayao kakaije rai to. Weti nyakato kai, syare Amisyae apa kovo saumane ntuna nautan.”

8

Wanya inta wanapatambe Yesus ai

¹ Nugoenta ramu, yara kavinta nakato umba Yesus poroto siso no munije inta rai nanto no munijo kaijinta rai, pananyaube muno Po Ayao Kovo Amisyae raura vatane mai pare, “Indati Amisyae de be akarive Apa kawasae mansai no mine vone so rai.” Muno Apa arakovo abusyinaro eane jirume utavondijo Ai. ² Wanya inta utavondi tavon, onawamo arono wusyinoe Yesus po saumane raunande manakea njajorame rai to muno inta nawamo Po anawayo kakaijo siso maije rawatambe maora to. Wanya umaso awa tame mi som: Maria Magdalena, omamo Yesus po anawayo kakaije kaururum mawatambe raora to; ³ muno Yohana, Kusa apa anamu, opamo panapatambe Akarijo Titi Herodes ai; muno Susana; muno wanya wanui kaijinta tavon. Wanya umaso wo taune awa ananuge, awa doije inta raunande indamu wo Yesusa pe mansaeranande.

Ananeneaeyo vatano po iru kamije rangkiki

(Matius 13:1-9; Markus 4:1-9)

⁴ Vatano wanui una no munije ranteter ude tutir bayave, wanugan ti wanui rave. Arono naije Yesus po ananenea so raura nanto mai pare, ⁵ “Vatane inta po nawaisyae ranari, umba po iru kamije rangkiki. Arono panya po rangkiki, inta ntatayaje no unanuijo nawantave rai bo rai, ti vatane wo ratakadi. Umba insanije waje wo raisy ti mewen. ⁶ Kamije inta mamu ntatae irati mino mbe orambe rai. Iru kamije umaso ntubai, weramu mayon akato, weye kopa ngkanen, mana mewen dai. ⁷ Kamije inta ntatae tavon no anansinaowe ama

uga rai. Anansinaowe nseo tavon umba mo kamino wanyine umawe rakikipi ti ngkakai. ⁸ Umba kamije umasom inta ntatae no kopa kove rai, umba ntubai seowa manakoe, muno ama mane nande rai kobe, nseo no tename nadani.”

Yesus po ananeneaeyo umaso raurana mewen, umba Po raura pare, “Wadanide! Are pirati amarikoame rasakinavo Sya ayao rai, weamo po ranaun.”

Veanimaibe Yesus po ananeneaeyo raura
(Matius 13:10-17; Markus 4:10-12)

⁹ Yesus apa arakovo utavondi aije wo anajo ware ananeneaeyo umaso ama ine no tai rui? ¹⁰ Umba Yesus po raura nande mai pare, “Amisyae apa be akarive Apa kawasae mai no mine so omamo ayao ngkokaibe arono wusyinoe weti vatane unanta rai jeben, yara wepirati Amisyae po rarorono wasai. Weti Syo raura kakavimbe wasai, weramu vatano kaijinta nawamo Syo ananeneaeyo bo raura mansai indamu mamaisyo Ayao Amisyae so rai mare: “Vatane so mansami mo Sya ana idave raen, weramu unanta raije ramu; muno wo Sya ana idaura raraniv, weramu unanta raije ramu.”*⁹

Yesus po ananeneaeyo iru kamije rangkiki raura kakavimbe

(Matius 13:18-23; Markus 4:13-20)

¹¹ Umba Yesus po raura nanto Apa arakove mai pare, “Ananeneaeyo iru kamije rangkiki omamo ama ine no taiso: Iru kamije omamo raurata irati ayao Amisyae rai. ¹² Kamijo ntatae no unanuijo nawantave rai bo rai omamo raurata irati vatano wo ayao Amisyae ranaun, weramu Anakakai Akoe de po ayao Amisyae no no manuga raugavo maora indamu vemo wanave rai jinya muno Amisyae po mapaya ayao kakaije rai jinya.

¹³ Kamije inta ntatae no mino mbe orambe rai omamo raurata irati vatano wo ayao Amisyae ranaun, wavave wo rajade manayanambe rautan. Weramu ayao umaso masyo ntonam matuve no manuga raije ramu, weti no tawane ramu. Arono Anakakai Akoe po matopan, weamo vatane umaso wo ayao Amisyae rapaya nakato.

¹⁴ Kamije inta ntatae no anansinao ama uga rai. Omamo raurata irati vatano wo ayao Amisyae ranaun, weramu wo anakotaro manui rantotobe, muno ubekero romane muno mansanasine ama marinsene obo rai. Wetivara anakotare umaso mo ayao Amisyae rakikipi no manuga rai, weti ayao Amisyae ama ine raen no maije ramu.

¹⁵ Weramu kamije inta ntatae no kopa kove rai, omamo raurata irati vatano manuga ngkove wo ayao Amisyae ranaun,

* 8:10 Yesaya 6:9-10

wo raugasyo ti ntami no manuga rai. Umba matawandi java ama ine raen no mai kobe.”

*Ananeneae yawainyo mbar
(Markus 4:21-25)*

¹⁶ Umba Yesus po raura nakato pare, “Arono vatane inta po yawainye raindi, po rangkokaibe no kavine ama uga raije ramu, muno po raugaje ntuna no pata niki raije ama ate ramu. Yara po rauseo ntuna no pata vono kakavin indamu vatano usisa wo ama vare raen. ¹⁷ Weye animaisye mi rangkokaibe, indati raroron kakavimbe, muno ana ngkokaibe indati raen kakavimbe. Weti Sya ayao wananta rai jewen no naiso mamu indati wananta rai kobe no masyoto makare rai. ¹⁸ Weti syare wapo Sya ayao raraniv mavabe muno wapo ratantona kobe rave. Weye vatano ayao Amisye no anuga raije opamo Amisye po auga ti nanto rai ti apa ana po raene miridi neso. Yara vatano ayao Amisye no ai kobe jewen, opamo apa ana po raene miridi makaje ti raumandi kobe.”

Yesus apa akoya me Apa rijate nawe ude Ai

(Matius 12:46-50; Markus 3:31-35)

¹⁹ Yesus apa akoya me, Apa rijate nawe ude ware wo Yesus apan, weramu ude nande Aije ramu, weye vatane wanui rave usaiyo aora. ²⁰ Umba vatane umaso inta po raura nanto Yesus ai pare, “Nya ingkoa me Nya rijate nawe usai no akiri umuga, ware ubeker indamu wo naen.”

²¹ Weramu Yesus po raura nanto mai pare, “Vatano wo ayao Amisye ranaun muno utavondi raije wenawirati Sya akoe muno Sya arakove waino mai.”

Yesus po ovare muno rarene raura ti ntanamanin

(Matius 8:23-27; Markus 4:35-41)

²² Masyote inta Yesus po raura nanto Apa arakovo utavondi aije mai pare, “Wade ra wanta no onae tuga ranijo warani.” Weti usea nyomane rai, umba wuruta kobe. ²³ Ukayun kobe, umba Yesus niki. Nugoenta rainy yara ovaro bambunin dave paje onae umaso rai kobe, ti mana masyo no nyomane ama uga rai. Nyomane ntairijo mana rai ti kavintare manutu.

²⁴ Weti Yesus apa arakovo utavondi aije ude wo amin, ware, “Injayo Kurune, winseo! Kavintanamo wamansyan!”

Weti Yesus seo umba Po ovare muno rareno akokoe ransopi. Umba ovare umawe manin kobe muno onae ntanamanin. ²⁵ Umba Po raura nanto Apa arakove mai pare, “Wabeanimaike wapana ve jewen?”

Weramu Apa arakove unantaive rave muno ujaniv. Taune wo raura vambinihe mai ware, “Sopamo are pi so wirati Po ovare, rarene raura ti ntanamanin ntavono Apa ayao rai so?”

Yesus po saumane raunanto vatano anawayo kakaije siso aije ai

(Matius 8:28-34; Markus 5:1-20)

²⁶ Yesusa pe apa arakovo utavondi aije nawe ukayun tutir usisa no vatano Gerasa awa munije rai, no onae tuga Galilea ama ranijo warani. ²⁷ Yesus paje po nyomane rapaya, umba vatano anawayo kakaije siso aije inta de nande Ai. Opamo vatano apa munije mirati Gerasa, weramu nugoenta rave no no yavare ramu, yara no no tinda aipapo bo rai, muno po ansune inta raveye ramu. ²⁸⁻²⁹ Arono po Yesus aen, punanto muno po apa vukane ranteter no Amun. Umba Yesus po raura nanto ai pare, “Anawayo kakai, nyuje vatane so aora!”

Umba vatane umaso gwain akoeve rave pare, “Yesus, Arikainyo Amisyo no no munijo ntiti, Nyo rinave tai ruimaisye so? Syo Amisye apa tame rauranara Nyo inansewabe inya.” Anawayo kakaije umaso mo antutubea nugoenta to. Weti vatane wo waijo besi veano aneme, ajoe raokokae to muno wo aman, weramu susye manui rave vatane wato seo po waijo besije umawe rapatimu, umba anawayo kakaije mo auga ti to no nugo vabukane vono maninimbe.

³⁰ Umba Yesus po anajo pare, “Nya tame mi rui?”

Vatane umawe po raura pare, “Sya tame mirati Legiun.” Apa tame umaso ama ine mare “ribuge manui rave,” weye anawayo kakaije usisa aije wanui rave. ³¹ Anawayo kakaije umaso wo Yesus anajo rijati indamu vemo Po matutir utatasyo Atemo Wene rai jinya.*

³² Mararai jirati unarijoe rai, ugeye wanui rave wo anaisye rakanive no unate ama awananeme warea. Anawayo kakaije umaso wo Yesus anajo ra Po mansamayar indamu usisa una no ugeye wato mai. Umba Yesus po mansamayar kobe. ³³ Weti anawayo kakaije wuje kobe umba uta sisa ugeye umawe mai. Uge umawe wansansanan udadoyaro pene rai ti utaoponasyo no onae waraya, weti usadayi kobe.

³⁴ Vatano wo ugeye umawe makum wo ana nande umaso raen, umba unajiv wo raura kakavimbe vatano munijo we mai muno munijo we ama varodore raita tenambe. ³⁵ Umba vatano munije umawe wanui wuje ude ware wo ana nande umawe raen. Ude Yesus ai, umba wo vatano

* 8:31 Atemo Wene mamu anawayo kakaije umakova rai yava Amisye po mangke raugaje mai.

anawayo kakai wuje ai umawe aen. Wakoe! Wepamo tuna pararaijo Yesu ajoye rai, po ansune rave muno apa ana po ratantona ngkov akato. Weti vatano munije umawe ujani dave. ³⁶ Umba vatano wo ana nande umawe raeno mamije raije wo raura nanto mai ware, “Yesu po anawayo kakaije mawatan irati vatane umaso ai ti sauman.” ³⁷ Umba vatan tenambe una no Gerasa wo Yesu anajo indamu puje irati awa munije raora weye ujani dave. Weti Yesu seo no nyoman, pare nin.

³⁸ Arono naije vatano anawayo kakai wuje ai umawe po Yesu anajo indamu tavondi Ai. Weramu Yesu ponae, ³⁹ Po atutir pare, “Nyakato ra nyo saumano Amisye po raunande naije raura vatane mai.” Weti vatane umawe pakato no apa muni, umba po saumano Yesu po raunande aije ravovo no munije umaso raita tenambe.

Yesu po saumane raunanto Yairu apa kavo wanya me, wanya rantukamo Apa ansune raije me yai

(Matius 9:18-26; Markus 5:21-43)

⁴⁰ Yesu pakare no Galilea, umba vatano wanuije wo augave sen manayanambe Ai, weye Wepirati wo anyube. ⁴¹ Umba vatane inta de, apa tame mi Yairu. Opamo akarijo yavaro sambaya raije inta piye. Paje po vukane ranteter no Yesu amun, umba po anajo indamu de no apa yavar. ⁴² Pare, “In-jae, sya kavo wanya nggwanen akoeve rave, kavinta ratire ngkakai. Muno wemamo sya kavo intabo ndave, ama tume abusyinara eane rurum.”

Weti Yesu tavondi Yairu umaso ai, muno vatano wanui utavondi ti wo akikipi no awa yasyin. ⁴³ Awa yasyine umaso wanya nggwanen inta, omamo nanto waneno embae rai tutira tume abusyinara eane rurun to. Ama ananuge mpatimugo anawae mai, weramu nsaumane jeben. ⁴⁴ Wanya umaso mararaijo Yesu akirije rai, umba rantukamo Apa ansune ama marane bo rai, umba kavuratawe nsauaman kobe, ama mavu muje umawe nsopi.

⁴⁵ Umba Yesu po raura pare, “Are nyirati nantukamo Rinai?”

Vatane wo raura tenambe ware, “Reama jewena.” Umba Petrus po raura pare, “In-jayo Kurune, vatano wanuije so wo nakikipi kiani. Weti wanui rave mantukamo Nai, intabo pe ramu.”

⁴⁶ Weramu Yesu po raura akananto pare, “Vatane inta rantukamo Rinai to. Weye Sya vambunine inta muje no inanasine rai ti idanaun to.”

⁴⁷ Wanya umawe mo raen ama ana mo rave mamu Yesu po raen to. Weti ranakea ntuta dave weye mo Yesu asyaniv, umba nde mo vukane ranteter

no Amun. Mo raura no vatano wanuije mansamun tenambe mare, “Inantukamo Nai weye ijarah nugoenta to. Weramu arono inantukamo Nya ansune rai, umba kavuratawe risauman kobe.”

⁴⁸ Umba Yesu po raura nanto wanya umaso rai pare, “Wanya arikainyo winy, nyanave Rinai jivae, wirati winsaumano. Weti nyoronto kai, syare Amisye apa kovo saumane no nautan.”

⁴⁹ Arono naije Yesu payaowa nene, umba vatano no no Yairu apa yavar inta de po raura pare, “Injayo Yairu, nya kavo ngkakai to, ti vemo winyakaore nyo Injayo Kurune ansosobe nora.”

⁵⁰ Weramu Yesu po ana umaso ranaun, umba Po raura nanto Yairu ai pare, “Vemo njani nora, yara nyanave vayave, indati nya kavo nsauaman aje.”

⁵¹ Arono Yesu de siso no Yairu apa yavar, ponayo vatano wanuije usisai, yara Petrusa pe Yohanesa pe Yakobusa pe muno arikainye umawe ama aja pe akoya me obo nao. ⁵² Naije vatano wanuije woyovo wanya arikainy ama ngkakaije rai. Umba Yesu po raura mai pare, “Wabemo wapoyo nora. Yara arikainye wato mamu ngkakaije ramu, yara ta nikija.”

⁵³ Weramu vatane umaso wugoeno Ai, weye wo wanya arikainye umaso raen ngkakai to. ⁵⁴ Umba Yesu po arikainye umaso raneme raijar, Po raura nanto rai pare, “Arikainyo winy, syare winseo!”

⁵⁵ Umba arikainye umaso ranawayo vambunin makare rai umba nseo kobe. Yesu po vatano utantuna no naije matutir indamu wo anaisye raunanto arikainye umaso rai indamu mo raisy. ⁵⁶ Wanya arikainye umaso ama aja pe akoya me nyantaive rave, weramu Yesu po yaorai pare, “Ibemo ipo ana umaso raura vatane inta mai nora!”

9

Yesu po apa arakovo abusyinara eane jirum matutir

(Matius 10:5-15; Markus 6:7-13)

¹ Yesu po apa arakovo abusyinara eane jirum mawainde, umba Po vambunine raugaje mai indamu wo anawayo kakaije mawatano vatane maora, muno wo saumane raunanto vatano ugwaneno wanene kotare raije mansai. ² Umba Po matutir indamu wuruta wo Ayao Kovo Amisye ravovo vatane mai ware kavinta umba Amisye de be akarive Apa kawasae mai no mine vone so. Muno Po matutir inda wo saumane raunanto vatano ugwanene mansai. ³ Umba Po raura mai pare, “Vemo wapo ana inta raugav irati wapa unanui anya rai nora. Vemo wapo isyoe, anaisye, ingkujawane, doije inta raugav inya, muno

vemo wapo ansune raugavo randurum inya. ⁴ Arono vatane inta po wasaugav wasea apa yavare rai, syare wana no apa yavar tutir ava wapuje apa munije raora. ⁵ Weramu ranivara wasisa munije inta rai yara vatano una no nanawije wo wasave kobe jeben, weamo wapusya munijo namije raora. Umba wapo kapumo nowo wasajo unane raije ranepataje no vatane umaso mansamun indamu wo raen indati taune wo ama mangke ranawan.”

⁶ Wetivara Yesus apa arakovo utavondi aije umaso wusya nara wuruta, wo Ayao Kove ravovo no munije raita tenambe muno wo saumane raunanto vatano ugwanene mai no rui rui vayave.

Akarijo Titi Herodes pantatukambe Yesus ai

(Matius 14:1-12; Markus 6:14-29)

⁷ Akarijo Titi Herodes po Yesusa apa ana dave ranau ti pananepabe, weye vatane inta wo raura ware, “Yesus opamo Yohanes Pembaptis wepirati kovakato no wene ama uga rai to ti pakare wep.” ⁸ Yara vatano kajinta wo raura ware, “Opamo anawae Elia pi pakare akato.” Umba inta ware, “Opamo anawae wusyine inta pirati kovakato ti pakare wep.” ⁹ Akarijo Titi Herodes po raura pare, “Sya naite wo Yohanes Pembaptis apa isyisye raota to. Weramu Vatane sopamo are piye dave? Syo Apa ana dave ranaumbea nggwaravain to.” Weti Herodes beke dave pare po Yesus aen.

Yesus po anaisye raunanto vatane ribuge radani wo raisy

(Matius 14:13-21; Markus 6:30-44; Yohanes 6:1-14)

¹⁰ Arono Yesus apa arakovo po matutire umawe wakare, wo ana wo rave umawe raura vintabo irati Yesus ai. Umba Po maugav usya mumuimbe uta no munijo Betsaida. ¹¹ Weramu vatano wanuije wo ranau to, ti wuruta ware wo Yesus ari-jade. Umba Yesus anuga ngkovo mai ti Po manugande, umba Po mansanyao irati masyoto Amisye indati de be akarive Apa kawasae mai no mine so raije rai. Muno Po saumane raunanto vatano ugwanene mansai tenambe tavon.

¹² Namandive kobe, weti Yesus apa arakovo abusyina eane rurume ude Ai, wo raura ware, “Injae, koveamo Nyo vatano wanuije so matutir wuruta no munijo mararaije so, indamu wo anaisye inta rakani indamu wo raisy muno wo awa unaki raije inta rakanijo mai. Weye nuge so nggwaravain dave.”

¹³ Weramu Yesus po raura nanto mai pare, “Weapirati wapo anaisye inta raurande indamu vatane so wo raisy.”

Yesus apa arakove wo raura akanande Ai ware, “Reamamo reama rotije vasyesye radani obo mirati ntuna, jiane ruruma yatavon. Nyare reamo anaisye inta ramavuno vatano wanuije so mansai je?” ¹⁴ Vatano wanuije umaso nawamo anya vatan anui obo matora nseo rave no ribuge radani.

Umba Yesus po raura Apa arakove mai pare, “Wapo vatano wanuije umaso matuti da waje utantuna. Wapo maosoro awa wanuije abusyine nadani rai indamu inta utantuna intai, muno inta utantuna intai.” ¹⁵ Weti Apa arakove wo matayao mamaisyo Po raura rai, ti vatano wanuije umaso waje utantuna vintabo.

¹⁶ Umba Yesus po rotije vasyesye radani muno jiane rurum raugavere tenambe, umba peraseo no naume warae, Po kove raura seo Amisye ai. Umba Po rotije muno jiane umaso raporadijo aneme rai, Po rauranto Apa arakovo utavondi aije mai indamu wo ratodijo vatano wanuije umawe mai, inda wo raisy. ¹⁷ Wo raisya uman dave. Umba Yesus apa arakove wo anaisye ateo ntuna ranunugambe akare no bayaije rai. Bayaije umaso ama manuije nanto no abusyina eane rurum.

Petrus po Yesus aura kakavimbe Opamo Mesias wepije

(Matius 16:13-20; Markus 8:27-30)

¹⁸ Masyote inta Yesus be sambayambe mumuimbe, umba Apa arakovo utavondi aije ude Ai. Umba Po manajo pare, “Vatano wanuije nawamo wo raura ware Risyo are pi Risy?”

¹⁹ Umba wo raura akananto Ai ware, “Vatane inta wo naura ware Winyamo Yohanes Pembaptis pi Winy. Umba inta wo naura tavon ware Winyamo anawae Elia pi Winy, umba inta ware Winyamo anawae wusyino kakaije inta pi kovakato ti napi Winy.”

²⁰ Umba Yesus po manajo pare, “Yara weapamo wapare Risyo are pi Risy?”

Umba Petrus po raura akananto Ai pare, “Injae, Winyirati Mesias, Amisye po natutir nde indamu mbe akarive.”

²¹ Umba Yesus po apa arakove maorai pare, “Vemo wapo Sya tamo Mesias ravovo vatane mai nora!”

Yesus po apa siurijo kakai raura wusy-imbe

(Matius 16:21-28; Markus 8:31-9:1)

²² Yesus po raura tavon pare, “Risyrati Arikainyo Vatan, indati siurijo manakoe nande Rinai. Akarijo Yahudi nawe, syeno akokoe utantuna no Yavaro Amisye raije nawe, kuruno makari mbaro Ananyao

Musa raije nawe ware wo rinawatambe. Indati vatane wo inaubaisy, weramu masyote mandei umba ikovakato no wene rai.”

²³ Umba Yesus po raura vatane umaso mai tenambe pare, “Vatano rui pi beker pare tavondi Inaije pamo be taiso: opamo akirive taune apa bekere rai, umba po inyo kapite ranawano masyote anteter muno tavondi Rinai kobe. ²⁴ Are pirati beker pare po apa kovo mine so ramavug, opamo indati apave kovo nuge nuganuije raije ramu. Yara are pirati nanto wene rai weye tavondi Rinai, opamo indati apave kovo nuge nuganuije rai. ²⁵ Ranivara vatane inta apaura mine vone so rai vintabo weramu apa kovo nuge nuganuije rakanive ai, weamo apaura mine so raija marudi. ²⁶ Are pirati samane po Sya tame raura muno po Sya ananyao raura vatano wanui mai, weamo Risy, Arikainyo Vatan, indati risamane Syo aura tavon no Amisy e amun arono syakare no mine vone so irati Sya kovo ntiti rautan muno Sya Injaya apa kovo ntiti rautan muno naito kov Amisy e mauntan tenambe. ²⁷ Syo raura tugaive wasai: Vatane inta una no wapa yasyine so wana unanta wene rai rainy, indati wo Amisy e aeno de indamu be akarive Apa kawasae mai no mine vone so.”

*Yesus apa kovo ntiti je raroron
(Matius 17:1-8; Markus 9:2-8)*

²⁸ Masyote kaumandei akato, Yesus po Petrusa pe Yakobusa pe Yohanesa pe mauga ti usea no unate inta rai indamu ube sambayambe. ²⁹ Yesus be sambayambe, umba naije kobe amune rawerave ti nsasye, muno Apa ansune mpopper mba dave maisyare ivake wemaisy. ³⁰ Umba kavuratawe vatane ruruma je, onayamo Musa pe Elia pe nai, yayao nanto Yesus ai. ³¹ Nyande yanasino varo kovo ntiti rautan, yo Yesus apa kakaijo no no Yerusalem ndea mararaije raura Ai, omamo nande indamu mamaisyo Amisy e apa bekere rai.

³² Arono naije Petrusa pe Yohanesa pe Yakobusa pe mamije maomon dave ti unaki. Weramu kavuratawe usea wo Yesus apa varo ngkovo ntiti raen muno wo Musa muno Elia yaen isyaiyo Yesus atavon. ³³ Arono Musa pe Elia pe yare yuje Yesus aora, naije Petrus po raura nanto Yesus ai pare, “Injayo Kurune, wana no soamo ko dave! Syare reamo randume mandei ja yanari: inta ranari Injae namarom, inta ranari Musa amarom, inta ranari Elia amarom.” Petrus po rauranare naije, weramu apa ana daura ma pantatukambe raija.

³⁴ Petrus payaowa nene, naije kamuro popere inta nde mo mansatav, weti ujaniv. ³⁵ Umba udanita anamote inta

ngkin no kamure ama uga mare, “Sopamo Sya Arikainyo syo apatimuge pi so. Wapo araniv kobe rave!”

³⁶ Anamote umaso mayaowa jewen, umba arakovo mandei je umawe wo Yesus aen obo pi no akato no we. Wo ana wo raene umawe raura vatano kaijinta maije ramu, yara umanin bayave yava nugoenta.

Yesus po saumane raunanto arikainyo anawayo kakai je nsiso aije ai

(Matius 17:14-21; Markus 9:14-29)

³⁷ Sansimambe Yesusa pe apa arakovo mandei je umawe wo unate raijakaje, umba vatano wanuije ude Yesus ai. ³⁸ Umba vatane inta no no awa yasyin gwain pare, “Injayo Kurune, naemeno rinai! Ribeker Nyo saumane raunande sya arikainye so ai, opamo sya arikainyo intabo dave. ³⁹ Anawayo kakai je inta nsiso ai to, ti mo antutup, kavuratawe arikainye so punanto, umba anawayo kakai je mo aveti anasine mangkangkambe awa kavavugae muje. Ama vambunine mo apaya jewenara mo aijananto tutir. ⁴⁰ Syo Nya arakovo utavondi naije manajo indamu wo anawayo kakai je umaso rawatambe, weramu umamaisy e ramu.”

⁴¹ Umba Yesus po raura vatane umawe mai pare, “Abo! Tugaeyamo weapamo vatano wasanuga matu muno wapanave kobe jewen! Risyamo inatawandi wasai nugoenta to! Rino no wapa yasyine rai, Syo wasanyao nugoenta to, weti nandui rati umba wapare wapanave Rinai? Syare nyo nya arikainye umawe augavere no so.”

⁴² Arono arikainye umaso de no Yesus nui, naije kobe anawayo kakai je umawe mo augaje mo anepato kopa rai, muno mo aveti anasine mangkangkambe. Weramu Yesus po anawayo kakai je umaso rawatan muno Po saumane raunanto arikainye umawe ai. Umba Po arikainye umaso auga akananto no aja nui. ⁴³ Vatano wanuije unantaive Amisy e apa vambunino manakoe Po raugaje Yesus aije so rai.

*Yesus po apa kakai je raura nakato
(Matius 17:22-23; Markus 9:30-32)*

Arono naije vatan tenambe unantaive Yesus apa ana dave rai vintabo, umba Yesus po raura Apa arakovo utavondi aije mai pare, ⁴⁴ “Syare wapo Sya ayaowe so ranaun kobe rave, vemo wasanikakovaro rai nora: Indati Risy, Arikainyo Vatan, rinamavun nanto vatano mine so mai.” ⁴⁵ Weramu Yesus apa arakove umaso wantatukambe Apa ana daura umaso ama tunato raije rai, weye Amisy e po rangkokaibe mansai indamu vemo unanta rai jinya. Weramu ujani ti wo Yesus anajo rai je ramu.

Yesu beker pare wansanuga mpaaje, maisyare arikainyo tuvane mansamaisy (Matius 18:1-5; Markus 9:33-37)

⁴⁶ Masyote inta Yesu apa arakovo utavondi aije wayao ensembe ware onawamo are pirati panakoeve mansai. ⁴⁷ Yesu po awa ana wo ratantona raen no manuga rai, weti Po arikainyo tuvane inta augavere teto arijat no Apa awananeme rani. ⁴⁸ Umba Po raura nanto mai pare, “Sya arakove, are nyirati mbekobe irati arikainyo tuvane maisyare somaisyey aije weye nyanave Rinai, winyamo mbekobe Rinai to ije. Muno are nyirati mbekobe irati Rinai, winyamo mbekobe irati Sya Injayo po inatutire Ai to. Weye are pirati anasine mpaaje no wapa yasyine so, opamo panakoeve wasai.”

Are pirati po wasave tatugadije jeben, opamo wapa arakova pije (Markus 9:38-40)

⁴⁹ Umba Yohanes po raura nanto Yesu ai pare, “Injao Kurune, reamo vatane inta aen po anawayo kakaije rawatano Injao nya tame rai. Reamo ansopi, weye tavono wansaije ramu.”

⁵⁰ Yesu po raura akananto ai pare, “Vemo wapo ansopi nora. Weye are pirati po wansave tatugadije jeben, opamo wama arakova pije.”

Vatano Samaria inta wonayo Yesu ai

⁵¹ Arono Yesu apa masyoto seo ti to no munijo ntiti warae ndea mararai, naije Po apa to raije rapatimu ti poroto no Yerusalem. ⁵² Weti Po vatane inta matutir indamu wuisy, wuruta usisa munije inta rai no Samaria indamu wo anakotere ratayao anyut. ⁵³ Weramu vatano Samaria umaso wonayo Yesu siso awa munije raiji, weye pare poroto no Yerusalem. Ware, “Are pirati pare poroto no reama marova Yahudi awa munijo Yerusalem rai, opamo reamonayo ai.”

⁵⁴ Arono Yesu apa arakovo Yakobusa pe Yohanes pe yo ana umaso raen, yo raura nanto Yesu ai yare, “Injao, winyare mayar, reamo Amisyey anajo indamu Po taname raugaje no munije so rai indamu mo vatane so manan da mangku da makanive.”

⁵⁵ Weramu Yesu sarirae akare Po manayao pare, “Vemo wabeare wemai nora!” ⁵⁶ Umba wuruta no munijo kaijinta rai jakato.

Vatane ware utavondi Yesu ai, weramu awa bekeru matu rainy (Matius 8:19-22)

⁵⁷ Yesu pe apa arakove nawe awa unanui anya ama yasyin, umba vatane inta

de po raura Yesu ai pare, “Injao Kurune, nyare to no rui vayave, syare itavondi Nai.”

⁵⁸ Umba Yesu po raura nanto ai pare, “Makeo sivuinye apa ateme no ti nikijo rai, muno insanije pamo apa ene no ti nikijo rai. Yara Risyi Arikainyo Vatan sya niki raije meweno Rinai. Weti nyare wintavondi Rinai, indati mbearu muno Risya wemaisyey.”

⁵⁹ Yesu po raura nanto vatano kaijinta ai pare, “Winde ra wintavono Rinai.”

Weramu vatane umaso apa ayaowe rasakinavo Yesu ai pare, “Injao, syare Nyo inapaya indamu syakato syo sya injaya ambai rati, umba syakarea itavondi Nai.”

⁶⁰ Umba Yesu po raura nakananto ai pare, “Syare vatano ugwenen to nawamo wo vatano ugwenen to mambai kai,* yara winyamo nyoronto nyo ayao ravovo vatane mai nyare Amisyey indati de be akarive Apa kawasae mai no mine vone so.”

⁶¹ Vatano kaijinta po raura nakato Yesu ai pare, “Injao, syare itavondi Nai, weramu syare Nyo inapaya indamu syakato syo sya yavaruga mansaneme raija dati, umba syakare itavondi Nai.”

⁶² Yesu po raura akananto vatane umaso ai pare, “Weinya! Are pirati Amisyey po awain indamu po Apa anakere raijar, vemo po apa anabe muno apa anakero wusyine ratantona inya, weaveti opamo mamaisyey ramu.”

10

Yesu po apa arakovo utavondi aije mamo tename mandeij eane abusyin matutir

¹ Naije Amisyey Yesu po vatano tename mandeij eane abusyin mapatimu, Po matutir wusya ube randurumbe. Pare onawamo wuisy yara Opamo dijat, usisa munijo rui mirati kavinta pare siso raije rai tetebe.

² Umbawe Yesu po ananeneae so raura mai pare, “Vatano wanuije umaso maurata irati anaisyo matugo manui rave no no nawaisyey rai, weramu vatano wo ine ranugande mamaun. Vatano be akarive nawaisyey umaso raije opamo Amisyey. Weti syare wapo anajo indamu Po vatane inta matutir indamu usisa Apa nawaisyey rai wo ama ine ranugande.

³ Weti, wata! Syo wasatutir wapusya, wasaurata irati domba wapasya wasayai no makeo sivuiny awa yasyine rai. ⁴ Vemo wapo doije muno ingkujawane inta raugav inya. Muno vemo wapo wasajo kokome raugavo randurum inya. Vemo wasopijo wapa unanui anya rai jinya, yara wapanya tutir.

⁵ Arono wasisa no yavare inta rai, syare wapo raura wapare, ‘Amisyey po kovo

* **9:60** Ayao so ama ine mare, “Syare vatano wantatukambe Amisyey aije nawamo wo awa arakovo ugwenen to mambai kai.”

saumane raugaje wasai.’⁶ Ranivara yavaruga umaso onawamo manuga nsaumano wasai, weamo Amisye po kovo saumane raugaje mai. Yara jewen, weamo Po kove umawe raugakanande taune weabo wasai.⁷ Syare wana no yavaro wasea raije umaso obo rai, muno wapisi no awa yavare rai kai. Weye wapo anakere so raijaro mansai, weti wo anaisye, ana wadamaname raunande wasai omamo mamaisy. Yara vemo wasea wapaje yavare ranteter nora.*

⁸ Ranivara wasisa munije inta rai muno vatane wo wasaugave wasen, weamo anaisyo rui mirati wo raunande wasai, omamo wapo rai bayave.⁹ Wapo saumane raunanto watano uganene mai muno wapo raura mai wapare, ‘Masyoto Amisye de be akarive Apa kawasae mai no mine vone so nandea mararai to.’

¹⁰ Weramu ranivara wasisa munije inta rai yara vatane wonae wo wasaugave sisowi, weamo wapunya ti wata no unanuije ama yasyin umba wapo raura,¹¹ wapare, ‘Wapa munije so ama kapumo nowo reansajoe raije somamo reamo ranepataje no wasamun indamu wapo raen wapo taune wapa mangke ranawan. Wasaemen: Masyoto Amisye de be akarive Apa kawasae mai no mine vone so nandea mararai to.’¹² Syo raura tugaive: arono masyoto mangke rapatimu nande, indati munijo Sodom muno munijo Gomora aya mangke ndaradam, yara munijo uma wonae manuga rausiso wasai jewenoe indati awa mangke raugaje mai ntiti mo we rakivan.”

Yesus po munije inta raura tantunawi, weye usakinavo awa ayao kakaije raije ramu (Matius 11:20-24)

¹³ “Kakaije nde munijo Korazin nai, muno kakaije nde munijo Betsaida nai tavon! Syo anapaporainyo manuije rarorono wasai to, weramu wasakinavo wapa ayao kakaije raije ramu. Ranivara Syo anapaporainye umawe raroron no munijo Sidon muno Tirus yai ratire,* indati watano marane ratuije nao wanave muno manimaumbe awa ayao kakaije rai ti usakinavo rai.¹⁴ Tugae, arono indati masyoto Amisye po mangkeo mine so rapatimu, munijo marano Tirus muno Sidon aya mangke mamaun, yara munijo Yahudi Korazin muno Betsaida ipa mangke manakoe rave.

¹⁵ Munijo Kapernaum winy, nyo ratantona nyare indati Amisye po naijaseo no munijo ntiti. Weramu Syo raura nai syare

indati Amisye po namaugusyo no tanamo mbadururo nuge nuganuije rai!”

¹⁶ Umba Yesus po raura Apa arakovo utavondi aije mai pare, “Are pirati po ananyao wapo raura we raraniv, opamo maisyare po Sya ananyaowe raranive omaisy. Yara are pirati po wasawatambe, opamo maisyare po inawatambe omaisy. Muno are pirati po inawatambe, opamo po Sya Injayo po inatutire awatambe tavon.”

Yesus apa arakovo tename mandeij eane abusyin wakare

¹⁷ Yesus apa arakovo tename mandeij eane abusyin wakare manayanambe rave. Wo raura nanto Yesus ai ware, “Injae, reamo Nya tame veano anawayo kakaije mawatambe!”

¹⁸ Yesus po raura nakananto mai pare, “Syo Anakakai Akoe aen no no naumo warae temaje maisyare ivakoe.¹⁹ Syo vambunine raugaje wasai indamu wapo wama marova wato apa vambunine rapinde tenambe, weti anakotare inta mo wasansewabe jewen. Ranivara wapo tawae muno mingkikipije ratekar asyo, weamo mo wasatao jewen.²⁰ Weramu vemo wasanayanambe wapo anawayo kakaije rawatambe to namije rai nora, yara syare wasanayanambe weye Amisye po wapa tame ratoeyo Apa bukugo no munijo ntiti rai to.”*

Yesus anayanambe ti Po kove raura seo Amisye ai

(Matius 11:25-27, 13:16-17)

²¹ Arono naije Anawayo Vambunine mo vambunine raunande Yesus ai ti anayanambe, umba Po raura pare, “Injaya Amisye, wimbe akarive munijo ntiti muno mine so rai. Syo kove raura seo Nai, weye ana umaso mamo Nyo rangkokaiibe watano makarije mbare mai, yara Nyo rarorono watano wantatukambe mansai. Injae, wemirati mamaisyo Nya mbekere rai.”

²² Umba Yesus po raura watano wanuije umaso mai pare, “Sya Injaya po anakotaro rui vayave raunande Rinai to. Sya Injaya obo pi po apa Kavon rinaen kobe, yara vatan inta wo rinaene ramu. Muno vatan inta wo Sya Injaya aene ramu, yara Apa Kavon ribui syirati syo aen kobe; muno watano ibeker syare Sya Injaya arorono maije obo nawirati wo aen tavon.”

²³ Umba Yesus sarirae akare Po raura Apa arakovo utavondi aije mai mumuimbe pare, “Weapirati Amisye po kovo manakoe raugaje wasai to, weye wasami mo Sya ana syo rave raen kakavimbe.²⁴ Sya raura tugaive: arono wusyinoe anawae

* 10:7 1 Korintus 9:14; 1 Timotius 5:17-18

* 10:13 Korazin muno Betsaida omamo munijo Yahudije ma, yara Sidon muno Tirus omamo munijo maran, watano Yahudi jewene utantuna rai.

* 10:20 Muni Akari 3:5

wanui muno akarijo titi wanui ubeker indamu taune mansami mo Mesias rinaeno Sya ana dave rai maisyare muno weapo rinaene somaisy, weramu wo rinaeno mansami rai jewen. Muno Mesias syayaowa ubeker wo rinaranivo taune mansamarikoame rai, maisyare muno soamo weapo rinaranive somaisy, weramu wo rinaranivo mamarikoame rai jewen. Yara weapirati anakotare so nde wasai to.”

Ananeneae vatano Samaria bekobe irati vatano Yahudije ai

²⁵ Umba naije kuruno akari mbaro Anyayao Musa rai inta de Yesus ai indamu po atopano Apa ana daura rai, weti po anajo pare, “Injayo Kurune, animaisye mirati syo rave indamu syaveo kovo nuge nuganuije rai?”

²⁶ Umba Yesus po raura akananto ai pare, “Animaisye mirati ratoe no Anyayao Musa rai? Winya ana ndatantona mamu noare rui?”

²⁷ Umba vatane umaso po raura akananto pare, “Anyayao Musa mo rauranare so: ‘Muiny irati nya Amisye ai rave. Nanuga ntenami muiny irati Ai muno nya ana ndatantona ntenami rai muno nya vambunine rai tenambe.’ Muno ‘Muiny irati nya arakove mansai maisyare muno taune wimuinyo taune nai wemaisy.’”

²⁸ Umba Yesus po raura akananto pare, “Nya ana ndaura umaso mamu tugae. Weti wintavondijo rai mavabe, indati nyave irati kovo nuge nuganuije rai.”

²⁹ Weramu kurune umaso ararin, po ratantona pare apa ana po rave mamu mamai to. Weti po Yesus anajo akato pare, “Weramu syare Nyo nya ayao umaso raura kakavimbe rinai: are nawirati sya arakove waino mai?”

³⁰ Umba Yesus po raura akananto ai, Po ananeneae inta raura pare, “Vatano Yahudi inta no no Yerusalem puje to no munijo Yeriko. Panyana unanuije ama yasyin umba vatano mamune inta unande ai ti wo anepati, wo apa ansune rakanunundi ai, wo raugavo aora muno apa ananuge tavon, umba wo apaya ti tami no unanuije ama tuga rai, kavinta ratire kakai.

³¹ Masyoto naije syeno Yahudi inta panya unanuije umawe raide tavon. Arono perato po vatano wo anepati umawe aen, panya evadi ai no unanuije ama tuga rani bo rai, panawadi ti poroto kobe. ³² Naije akato vatano Lewi, opamo panapatambe no Yavaro Amisye rai, panya unanuije umaso raide tavon. Arono po vatano anepati umawe aen tavon, panya evadi ai tavon ti poroto maisyare syene umawe amaisy.

³³ Umba naije akato vatano Samaria inta puje ti pananave po unanuije umaso raide akato, ti nanto vatano Yahudi anepati umawe ai. Yahudi onawamo vatano Samaria awa marova nanawije, weramu arono po vatano anepati umaso aen, aemeno ai rave. ³⁴ Weti pararai nanto ai, umba po apa pare umawe raomar irati mana angguriye muno manine rai, umba po ansune vasye veano raokae. Umbawe po auseo tuna taune apa keledaije ai, po auga ti to no yavaro ratayao da vatano marane inta ware udea unaki raive inta rai, umba po aeranande. ³⁵ Sansimambe akato, vatano Samaria umawe po doijo perakije jirum raunanto vatano apave yavare umawe raije ai, umba po raura nanto ai pare, ‘Nyanapatambe vatane umaso ai jao sauman. Doije umaso mamaun, indati syo nya doije inta raugakanande nai no arono syakare.’”

³⁶ Umba Yesus po kuruno Yahudi umawe anajo pare, “Vatano mandeije umaso onawamo are pirati vatano anepati umawe apa arakove waino ai tugaive?”

³⁷ Kuruno Yahudi umawe po raura akananto pare, “Vatano aemeno vatano anepati umawe ai, opamo apa arakovo tugae piye.”

Umba Yesus po raura pare, “Tugae, weti nyoronto nyo raveare naije.”

Yesus po Maria me Marta me yapan no aya yavar

³⁸ Naije Yesusa pe apa arakovo utavondi aije nawe wanya tutir kobe, uta unanta no munije inta rai. Naije wanya inta ama tame mirati Marta mo Yesus awaindamu de no ama yavar. ³⁹ Marta ama rijata mi Maria, omamo ntuna mararaijo Amisy Yesus ajoe rai indamu mo Apa ananyaowe ranaun. ⁴⁰ Yara Marta mamu ramun nsari-raiveo ama anakere kotaro yavaruga bo rai. Weti nde no Yesusa nui, umba mo raura mare, “Injae, mbeanimaibe winaemeno rinai tavone ramu ge? Sya rijate so mo inapaya ti ribui syanapatambe no yavaruga so rai, yara omamo jewena. Weti syare Nyo ratutir indamu manapatambe inatavon.”

⁴¹ Weramu Amisy Yesus po raura nanto rai pare, “Marta, Marta, winanuga mamaun muno nyo anakere so bo rantotobe tutir. ⁴² Yara ana intabo mirati manakoe rave, omamo Sya ayaowe so mije. Maria nanto rai, ti syare Syo raugavo raora jewen.”

11

*Yesus apa ananya sambaya
(Matius 6:9-13, 7:7-11)*

✧ 10:27 Imamat 19:18; Ulangan 6:5

¹ Masyote inta Yesus be sambayambe. Be sambayambea jewen, umba Apa arakovo tavondi aije inta po raura nanto Ai pare, “Injae, syare Nyo reansanyao sambaya rai, maisyare muno Yohanes Pembaptis po apa arakovo utavondi aije manyao sambaya rai wemaisy.”

² Umba Yesus po raura nanto mai pare, “Wapare wabe sambayambeamo, syare wadaura taiso:

Reama Injayo Amisy, reamare vatan tenambe wo

Nya tamo ndandinit rararimbe.

Reamare winde wimbe akarive mine so rai tenambe.

³ Reamare Nyo reama anaisyo mamaisyo reansai masyote antetere raunande reansai.

⁴ Reamare Nyo reama ayao kakai rapaya reansai,

maisyare muno reamo vatano kai awa ana udave ti ngkakai reansai rapaya mai wemaisy.

Vemo Nyo reansaugavo ana mo reansatopane raron nora.”

⁵ Umba Yesus po ananeneae inta raura Apa arakove mai pare, “Ranivara weapamo inta nyoronto nya arakove inta ai no apa yavar arono namane yasyin, umba nyo raura nyare, ‘Arakove, syare nyo rotije vasyesye mandeiija raunande rinai. ⁶ Weye sya arakove inta pi kavoe de rinai no sya yavar weramu sya anaisyeweweno rinai, weti inta inda syo raunanto po raisye ramu.’

⁷ Weamo vatano no no yavare umawe po raura nande nai pare, ‘Vemo nyo reansave papabe muno nyo reansansosobe inya, weye syo unsanda rauguji to muno risye sya arikainye nawe reamare wanaki. Weti syonayo syakaeyo syo ana inta raunande najijja.’ ⁸ Weti nya arakove umaso aemeno naije ramu muno ponayo po ana inta raunande apa arakove winaiji. Weramu ranivara nyo anajo tutir yara winsamane inya, indati nya arakove umaso aemeno nai ti seo po inta raunande nai kobe.

⁹ Weti syo raura wasai: Syare wapo Amisyae anajo, indati Po raunande wasai. Wapo rakani, indati wananta rai. Wapo unsanda rananepat, indati Amisyae po unsanda rausiso wasai. ¹⁰ Weye are pirati po ranajo, opamo Amisyae po raunande ai. Are pirati po rakani, opamo indati nanto rai. Are pirati po unsanda rananepat, opamo Amisyae po unsanda rausiso ai.

¹¹ Syo raura ajae wasai: Arono wapa arikainye woyovo jiane rai, weamo wapo jiane raunanto kobe mai, yara wapo tawae raunanto maije ramu. ¹² Muno arono

woyovo mangkuere kamije rai, weamo indati wapo mingkiki raunanto mai ramu, yara wapo mangkuere kami mi wapo raunanto. ¹³ Weapamo ayao kakaije no wasai, weramu wapo anakotaro ngkove raunanto wapa arikainye mansai. Maisyare omai ti, wapa Ajayo no no munijo ntiti Opamo kakavimbeo wasakivan bintabo, weti tugae Po Anawayo Vambunine raugaje Apa arikainye wasai arono wapo anajo.”

Yesus apa vambunin muno Anakakai Akeo apa vambunin

(Matius 12:22-30; Markus 3:20-27)

¹⁴ Masyote inta Yesus po anawayo kakaije rawatano vatano awa ngkao inta aora. Arono anawayo kakaije umawe muje aora, naije kobe vatano awa ngkao umaso payao akato. Weti vatano wanuije unantaive rave. ¹⁵ Weramu vatane inta una no awa yasyine wo raura ware, “Akarijo anawayo kakai, apa tame mi Bersebur,* wepi po vambunine raunande Yesus ai indamu Po anawayo kakaije mawatambe!”

¹⁶ Vatano kaijinta ware wo Yesus atopani, weti wo anajo indamu Po anapaporainye inta rarorono mai indamu wo raen tugae rako jewena rako Opamo no no Amisyae nui ti de rako?

¹⁷ Weramu Yesus po awa ana wo ratantona umaso raen to, weti Po raura pare, “Ranivara munije inta ama vatane maporabe jirum ti inta umarovave inta mai, wea umba munije umaso mandamisy. Muno ranivara yavaruga maporabe jirum ti inta umarovave inta mai, wea umba mandamisy tavon. ¹⁸ Anakakai Akeo apa munijo be akarive raije maisyare wemai tavon. Ranivara Anakakai Akeo pe apa anawayo kakaije nawe maporabe jirum ti taune umarovave taune mansai, weamo apa munijo be akarive rai noa nugoenta ramu, yara mandamisy. Syo raura tai maisy weye wapo raura wapare Risyamo syo Anakakai Akeo apa vambunine rave anawayo kakaije rawatambe. ¹⁹ Weramu taune wapa arakovo utavondi wasaije nawamo wo anawayo kakaije mawatan tavon, weti are pirati po vambunine umaso raunande mai? Wapa arakovo nanawije wo raen ware Amisyae bo pirati bambunin po anawayo kakaije mawatambe. Weti wapa ana wapo rinangkivane umawe wapare Risyamo syo anawayo kakaije mawatan irati Anakakai Akeo apa vambunine rai, omamo mamaisyeweweno ramu. ²⁰ Yara tugae mamamo Syo anawayo kakaije mawatano Amisyae apa vambunine rai. Maisyare omaisy wapo raen soamo Amisyae de be

* 11:15 Tamo Bersebur ama ine mare Anakakai Akeo pije. Anemo 18 muno 19 yo “Bersebur” ratoe tavon.

akarive Apa kawasae mai no wapa yasyine so rai to.

²¹ Anakakai Akoe aurata irati vatano bambunine inta ai, wepirati po apa anaiyuge rajjar, po veano apa yavare raman indamu apa ananuge ntuna no ama uga mamu vemo vatane inta po raugav inya. ²² Weramu ranivara vatano kajijinta de, apa vambunine manakoeve vatano umawe apa rakivan, ti pe isyivuiyny umba po apinde, weamo po apa anaiyuge raugavo aora, umba po apa ananugo yavaruga raugavo aora tenambe muno po ratodijo apa arakove mansai. Weti ranivara Syo anawayo kakaije mawatan, omamo mare Sya vambunine manakoe Anakakai Akoe apa rakivan.

²³ Are pirati tavondijo Rinaije jewen, opamo be marovave Rinai. Are pirati po anakere rajjaro inatavone jewen, opamo po Sya anakere ransosobe.”

Anawayo kakaije puje vatane inta aora to umba pakare siso akato

(Matius 12:43-45)

²⁴ “Arono anawayo kakaije puje vatane inta aora, panya toe de no mino ngkanembe rai indamu po apa no rajje rakani, weramu po rakanija marudi. Weti po raura pare, ‘Syare syakato no vatano syuje aora ai jakato.’ ²⁵ Arono sakina pakare, de pakaiso vatane umawe ai jakato, po raen vatane umawe anuga mamu ana inta tuna rajje jewen, yara kakavimbe. ²⁶ Weti anawayo kakaije umawe pakato po anawayo kakaije kaururum mamun dave inta mauga tavon, wakare wakaisa tenambe vatane umawe ai jakato, umba una kobe no we. Umba naije vatane umawe apa siurijo manasyine mamaun, yara apa siurijo rijat akato so manakoe rave.”

Amisye po kove raugaje vatano utavondijo Apa ayao rajje mai

²⁷ Yesus po raura taije maisya jewen, umba wanya inta no no vatano wanuije awa yasyin mo raura nande Ai mare, “Kove ngkov irati nangkoya rai, weye mo nano muno mo ukame raunande Nyo raisy.”

²⁸ Weramu Yesus po raura akananto rai pare, “Yara kovo mo we rakivane mamu namirati Amisye po raugaje vatano wo Apa ayao ranaun muno utavondijo rai mavabe mai.”

Vatane wo Yesus anajo indamu Po anapaporainye rarorono mai

(Matius 12:38-42; Markus 8:12)

²⁹ Vatano wanuije umaso wo Yesus awari kiani, umba Po raura mai pare, “Vatano arono naiso onawamo awa ayao kakai

ntapekano mai. Wo anapaporainye inta ranajo Rinai indamu mbe rarorombe Risyamo Amisye po inatutire pi Risy. Weramu Syo raura wasai syare Syo anapaporainyo manuije rarorono wasaije ramu yara intabo mi Syo rarorono wasai, omamo anapaporainyo nande anawae Yunus ai obo ma. ³⁰ Arono Amisye po Yunus apaya irati jiano saroe anuga rai, vatano Niniwe wo aen, ware, ‘Sopamo anawae no no Amisye nui ti de pa.’ Indati Risy, Arikainyo Vatane, syo anapaporainye inta raroron mamaisyo Yunus apa rai, indamu vatano arono naiso wapo raen ti wapanave Risyamo Amisye po inatutir.

³¹ Wusyinoe wanya mbe akarive no munijo Syeba no no nugo gwaravainyo omamo nde indamu mo Akarijo Titi Salomo apa ananyao ntitiije ranaun. Maisyare omai ti, arono masyoto Amisye po mangke rapatimugo vatano mine so rajjamo, indati Akarijo Ntiti Syeba umawe neso mo Amisye anajo indamu Po mangke raugaje vatano susyo naiso wasai. Weye omamo no no mine tename so ama marane rai umba manya nde indamu mo Salomo anaun, yara soamo Vatano apa ana datantona ntiti Po Salomo akivan Opamo napi te no wapa yasyine so, weramu wapanave Aije ramu.

³² Maisyare omai tavon, indati vatano munijo Niniwe usea tavon no masyoto mangke rapatimu namije rai, wo Amisye anajo indamu Po mangke raugaje vatano susyo naiso wasai. Weye vatano Niniwe umawe usakinavo awa ayao kakaije rai to arono anawae Yunus po ayao Amisye raura mai, yara soamo Vatano panakoe po Yunus akivan Opamo no no wapa yasyine so rai, weramu wapanave Aije ramu.”

Var muno kaumur

(Matius 5:15, 6:22-23)

³³ “Arono vatane inta po yawainye raindi, po rangkokaibe jewen, muno po rakepano kavine rai jewen, yara po rauseo ntuna no pata vono kakavin indamu vatano usisa wo ama vare raen. ³⁴ Wasamije raurata irati yawainyo mbaro wasanuga rajje rai. Ranivara wasamije ngkov, indati wasanuga mbar. Yara wasamije ngkakai, indati wasanuga ngkaumudi.† ³⁵ Weti wasyisyaube, vemo wasamije makakave ti wasanuga ngkaumudi nora. Weye ranivara wapanave ayao inta rai wapare omamo ayao tugae ma, weramu jewen yara omamo ayao angkarije ma, weamo vare omirati no wasai jewen, yara kaumure obo mi no wasai. ³⁶ Ranivara wasanuga mbar tenambe weti ama rani inta ngkaumudije

† 11:34 Vare mamu raurata irati ayao kove muno tugae rai, yara kaumure raurata irati ayao kakai muno angkarije rai.

jewen, weamo indati mba kobe, maisyare yawainye inta mbaro wasaije wemaisy.”

Yesus po Parisije awa ayao kakaije raura kakavimbe

(Matius 23:1-36; Markus 12:38-40)

³⁷ Yesus payaowa jewen, umba vatano Parisije inta po awainde pisyi no apa yavar. Weti Yesus poroto pisyi no we. ³⁸ Umba vatano Parisi umaso paparo ai weye Yesus po Parisije awa koane rakanyoandi. Weye Po mana veano anemo nggwame rarandom wusyimbe ramu, yara pisyi bayawe.

³⁹ Umba Amisy Yesus po raura ai pare, “Vatano Parisije, weapamo wasaurata irati pauraijo nggwame rai. Wapo pauraije ama akirije bo rarandom ti mpopper, yara ama uga mamu ta no irati wame rautan. Weapamo wapo wasaneme rarandom muno wapo koano kaijinta maisyare so rarija mavabe, yara wasanuga ntantunaube muno ntairijo ayao ngkakainoanive rai. ⁴⁰ Vatano Parisije, weapamo wapantatukambe! Amisy po wasanakea vone obo ranari jewen, yara Po wasanuga ranari tavon, weti beker pare omamo ngkakavimbe tenambe. ⁴¹ Ranivara wasanuga ngkovo vatano awa ananuge meweno maije mai, muno wapo anaisye muno ananuge raunanto mai, wea umba weapamo wakakavin bintabo.

⁴² Vatano Parisije, kakaije nde wasai! Weye watavondi Amisy apa anyaoawe rai tenambe ramu. Tugae, wapa anare wadayanyum maisyare bawane, kaumamawane, muno marinsane mamu wapo raporadive abusyin umba wapo vasye intabo raunanto anakero Amisy rai. Yara anyao manakoe mbe mobe maisyare ayao mamaisye rapatimu muno muinyo Amisy aije mamu wabeta rai ramu. Weramu urare wemirati wabeta rai! Weti kove mamu watavondi anyao mbe mobe rai mavabe, muno anyao mamaune mamu vemo wasanimari rai tavon nora.

⁴³ Inya, vatano Parisi, kakaije nde wasai! Weye wasanayanambe watantuna no kursijo ngko dave rai no yavaro sambaya rai, muno wasanayanambe vatane ubeaje wasai no pasari.

⁴⁴ Kakaije nde Parisije wasai! Weye weamaisyare aipapo we, namirati ama tame mewen dai, weti vatane uta ti wananave ama vone weye wantatukambe rai. Parisije, weapamo maisyare aipapo umaso ramaisy, weye vatane utavondi wapa anyaoawe rai yara wantukambe wasanuga mamu ngkakainoanive.”

⁴⁵ Umba kuruno makari mbaro Anyao Musa raije inta po raura nanto Yesus ai pare, “Injayo Kurune, Nya ayao umawe mamu Nyo reansaura tantunawi tavon.”

⁴⁶ Umba Yesus po raura akananto ai pare, “Kuruno wasakari mbaro Anyao Musa raije weap, kakaije nde wasai! Weye wapa koane muno anyao wapo raugaje vatane mai omamo manui rave ti mangkeo mai utavondi rai, yara taune weapamo watavondi raije ramu. Wapo vatane umaso masopane jewen muno wapo ana mangkeo mai raijasea jewen tavon.

⁴⁷⁻⁴⁸ Kakaije nde wasai! Weye wapo vatano Amisy po matutir ude wasaije mawatambe. Wabe tai mai ti ta wapo wapa aneno wusyine awa kakai wo rave webo raijar akare. Wapo anawae wusyine awa aipapo ama vone ranari ti ngkov, weramu wapa anene nawirati wo mansao weye wonae utavondijo awa anyaoawe raiji. ⁴⁹ Wusyinoe Amisy, wepirati apa ana ratantona ntiti rave, Po raura pare, ‘Indati Syo sya anawae muno Sya vatano wo Sya ayaowe ravov inta matutir ude wasai. Indati weapamo wapo inta maubaisy muno wapo inta mave tatugadi.’ ⁵⁰ Weti vatano arono naiso weap, Syo raura wasai: anawae nanawirati maubai tenambe no arono mine so ranari mansanan awa naiso, wapo mangke umaso ranawan. ⁵¹ Weye Amisy apa vatano po matutire wanui onawamo vatano Yahudi wapo maubaisy, manasyin dave Habel ai, miridije nde awa nande Zakaria ai, opamo wo aubai no Yavaro Amisy me ama tewa orame me aya yasyin. Syo raura tugaive: Amisy po ama mangke umaso ranugan bintabo, indati Po raugaje wasai. Vemo wasanimari jinya! Mangke tenambe umaso raugakaje irati vatano susyo naiso wasai.

⁵² Kuruno wasakari mbaro Anyao Musa raije weap, kakaije nde wasai! Weye wapo vatane maorai wapare vemo unanta ayao Amisy rai jinya. Taune weapamo watavondi ayao Amisy raije ramu, muno vatano ubekero utavondi raije nao wapo mansopi.”

⁵³ Arono Yesus puje unarijoe raora, Parisije nawe kuruno makari mbaro Anyao Musa raije nawe upari rave. Arono naije kobe ube marovave Ai. Muno wo anajo anakotaro manui rave rai, ⁵⁴ weye ware wo atopano Apa ana daura rai.

12

Yesus po apa arakove manyao

(Matius 10:26-33, 12:32, 10:19-20)

¹ Vatano wanui rave wanugan, ubeker ware wo Yesus anaun. Awa wanui nseo no ribuge manui, weti inta wo inta majoe ratakadi. Umba Yesus po raura Apa arakovo utavondi aije mai pare, “Wasyisyaube irati vatano Parisi awa angkari ntapekane rai. Vemo watavondi

mai jinya, weye onawamo ube ponai-bea ware awa ana udave ma mamai dave, weramu manuga mamu ngkakainoanive vintabo. ² Weramu animaisye mi vatane wo rangkokaibe, indati Amisye po raroron kakavimbe. Muno animaisye mi ngkokaibe no vatane manuga rai, indati raen kakavimbe. ³ Animaisye mi wapo raura maninimbe arono namane ntami, indati sansiman vatane wo ranaun tenambe. Muno animaisye mi wapo ransamuabe wapa arakove mai no wapa yavar, indati vatane wo raura manamoto manakoe rai no kakavin.

⁴ Weti Sya arakove weap, wabemo wapo vatano wo wasanasine raubaisye masyaniv inya. Onawamo awa vambunine ma nsopi wo wasanasine raubaisye obo raija, yara mo rakivan akaeyo, onawamo mamaisye ramu. ⁵ Syo rarorono wasai are pirati wapo asyaniv: Syare Amisye bo pirati wapo asyaniv, weye wene nde wasanasino kopa so rai mamu Wepi po raijar, muno Opi bambunino po wasamaugusyo tanamo mbaduro nuge nuganuije rai. Tugae, Amisye wepi nyo asyaniv!

⁶ Insanijo momoyainy mansamavuna awa mangke mamaun dave. Weramu Amisye animari maije ramu yara Po maeranande tenambe. ⁷ Vatane nanentabo wapa mangke ma ntiti jirati insani manui awa rakivan. Wasakarivuinye mamu Amisye po ratora mamai to! Weti vemo wajaniv inya, weye Amisye po wasaeranande tavon.

⁸ Syo raura wasai: Are pirati po rinaura kakavimbe no vatano mine so mansamun pare, 'Risiamo itavondi Yesus ai,' weamo indati Syo vatano napije aura no naito Amisye mansamun syare, 'Sya arakovo tavondi Rinai pije.' ⁹ Yara are pirati po inamamarave no vatano mine so mansamun, weamo indati Syo amamarave tavon no naito Amisye mansamun.* ¹⁰ Are pirati po Risy, Arikainyo Vatane, inaura tantunawi umba sakinavo apa ayao kakaije umaso rai, weamo indati Amisye po apa ayao kakaije umawe rapaya ai. Yara are pirati po Anawayo Vambunine raura tantunawi, weamo Amisye po vatano napije apa ayao kakaije umaso rapaya aije ramu.

¹¹ Arono vatane wo wasaugaveta no akarijo Yahudi muno akarijo marane mansamun indamu wo wasanajobe, vemo wasanuga mamauno wapa ayaowo wapare wapo rasakinavo maije rai nora. ¹² Weye animaisye mirati wapare wapo raura mamu arono naije Anawayo Vambunine mo raroron kakavimbe wasai jaje."

Ananeneayeo vatano apa ananuge manuijo ai ti pantukambe apa kove rai

¹³ Vatane inta no no vatano wanuije awa yasyin po raura nanto Yesus ai pare, "Injajo Kurune, sya injaya kakai to ti syare Nyo raura sya anuija ai indamu po irima injaya apa ananuge raosor inda syo nake inta raugav."

¹⁴ Umba Yesus po raura akananto ai pare, "Risiamo akarijo Syo ripa ananuge so raosoro risaije pi Risy ramu!" ¹⁵ Umba Po raura vatano wanuije mai pare, "Wasyisyaube, vemo wasanuga ntantunaube inya, weye vatane apa ananuge manui wemi mo kovo tugae raugavo aija jewen."

¹⁶ Umba Po ananeneae inta raura pare, "Vatane inta pamo apa ananuge manui rave. Apave irati kopa inta rai, muno apa anamuke manuijo rai rave. ¹⁷ Umba vatane umaso po ratantona no anuga pare, 'Sya yavare ntairi to, ti sya anamuke inta makaiso ntuna rai kakai. Weti soamo animaisye mi syo rave?'"

¹⁸ Umba po ratantona akato pare, 'Sya ana syo ratantona mi som: syare syo yavaro wusyino anaisye ntuna raije randamisy, indamu syo yavaro anakoe anaisye ntuna raije inta ranari jakato. Wea indati sya kasyambere muno sya ananuge raugav siso ntuna rai jakato. ¹⁹ Weye sya ananuge manui rave to, weti syare inanayanambe tumo namiso rai muno tumo makare akatoe rai. Weti indati imainda no vayave rai, muno syisyisy muno syo anggurije ramanam muno imarinsembe so obo rai.'

²⁰ Weramu Amisye po raura ai pare, 'Winyamo nyantukambe rave! Namane so wingkakai, indati are pirati apaura irati nya ananuge akoe so rai?'"

²¹ Maisyare omai tavon are pirati beker pare po ananuge mine vone so ranugan manui indamu tavondi taune apa ananibe obo rai, yara tavondi Amisye apa bekere raije ramu."

Vemo wasanuga mamauno anakotaro mine vone so rai jinya

(Matius 6:25-34)

²² Umba Yesus po raura Apa arakovo utavondi aije mai pare, "Maisyare omai ti, syare vemo wasanuga mamauno anakotaro mine vone so rai nora, maisyare wapa ana wadaisye muno wapa ansuno wapo rave rai jinya. ²³ Arono wangkova no mine so, ana mbe mobe mamu anaisye muno ansune ma jewen. ²⁴ Syare wapo insanijo wawake maen. Onawamo wo nyoamane rayanyume ramu, wo ama mane ranugane ramu, muno wo ama mane ranugande no awa yavare ramu. Weramu Amisye pi po maeranande. Amisye pare vatane wepirati wapanakoeveo insanije mansakivan, weti tugae Po wasaeranande! ²⁵ Wapare

* 12:9 2 Timotius 2:12; 1 Yohanes 2:22-23

wabekero wapa matam akari ravera ngg-waravainy, weapamo wamamaisye ramu, yara Amisye bo pi mamaisy. Weti vemo wasanuga mamauno wapa matam akarije rai nora. ²⁶ Muno vemo wasanuga mamauno anakotaro kaijinta rai jinya, weye Amisye pi mamaisyo rai tenambe.

²⁷ Syare wapo kavasasije ama ugem ratantona rati. Kavasasije mo ansune rakasyuge ramu, weramu Amisye po ama uge raugaje rai indamu mbe ansumbe. Akarijo Titi Salomo apa ansune ngkov, weramu kavasasije ama ugem ngko dave raveo Salomo apa ansune rakivan. ²⁸ Maisyare omaisy, Amisye po ansuno ngko dave raunanto kavasasije rai, wemi ama ugem noa masyote inta yai vavai umba ngkanen kobe. Weramu Amisye pare vatane wepirati wapanakoeveo kavasasije rakivan, weti tugae Po ansuno mamaisye inta raunande wasai tavon. Arakove, wabeanimaibe wapanave Sya ananyaowe so raije jeben?

²⁹ Maisyare omaisy, vemo wasanuga mamauno wapa ana wadaisye muno wapa ana wadamane rai jinya. ³⁰ Vatano wantatukambe Amisye ai wo anakotare umaso rakani tutir. Weramu wapa Ajayo no no munijo ntiti Po wapa bekedaije raen tenambe, weti vemo wasanuga mamauno rai nora. ³¹ Yara syare wabeker indamu Amisye be akarive wasai muno watavondi Apa bekere rai, wea indati Amisye po anakotare umawe raunande wasai vintabo.

*Romano tugae no no munijo ntiti
(Matius 6:19-21)*

³² Sya arakove, weapamo wapanuije ramu, weramu vemo wajaniv nora. Weye Amisye beker indamu wabe akarive atavon no Apa munijo be akarive raije rai. ³³ Syare wapo wapa ananuge ramavun indamu wapo ama doije ratodijo vatano awa doije meweno maije mansai. Wapo raveare wemaisy indamu wapo romane ratayao mo wasanyut no munijo ntiti. Wapa romano namije indati raumandi wasaije ramu, weye munijo ntiti rajamo katatindopane mo ananuge raotadije ramu muno vatane inta wanaonoambe jeben bayave. ³⁴ Are pirati po romano mine vone so bo rakani, opamo anuga ntento irati anakotaro mine vone so rai. Yara are pirati po Amisye apa kovo no no munijo ntiti je bo rakani, opamo anuga nseo irati Amisye ai."

*Wamanatatayaube ra wamo Yesus apa masyoto pakare raije ranyut
(Matius 24:43-51)*

³⁵ "Wapanatatayaube Sya masyoto syakare raije rai. ³⁶ Weapamo wasaurata irati vatano wanapatambe akarije inta aije mansamaisy. Akarije umaso poroto no

ono vauname rai ti vatano wanapatambe aije wo apa pakare raije ranyut. Arono pakare po unsanda rananepat, wavave wo unsanda umaso rausiso ai. ³⁷ Indati akarije umawe po kove raugaje apa vatano wanapatambe nanawirati wanatatayaube ti wo anyute mansai. Tugae, pare po mawainde indamu waje utantuna, umba taune panapatambe mai arono wisisy. ³⁸ Vatano wanapatambe umaso indati manayanambe weye ranivara awa akarije pakare namane yasyine rako, akane mare ntipu rako, muno po mansaenamo wanatatayaube indamu wavave wo unsanda rausiso ai, weamo po kove raugaje mai.

³⁹ Weti wadanide: Arono vatano panaonoambe pare siso yavare inta rai, vatano apave yavare umawe raije pantukambe apa masyoto de raije rai, ti syisyaube ramu. Weti vatano panaonoambe siso kobe, po apa ananuge inta raugavo aora. ⁴⁰ Weti wabemo wapo vatano apave yavare umawe raije amaisy inya, yara syare weapamo wapanatatayaube. Weye Risy, Arikainyo Vatan, sya masyoto de raije mamo wapantukambe rai, weti wapanatatayaube indamu wapo inanyut."

⁴¹ Umba Petrus po Yesus anajo pare, "Injae, Nyo ananeneae umaso raura reabo reansai rako, vatan tenambe mansaije?"

⁴² Umba Amisy Yesus po ananeneae kaijinta raura nakato pare, "Vatano panapatambe inta opamo akarikuga mbar muno beto akarijo yavaruga apa bekere rai mavabe. Weti apa akarije umaso panave ai ti po atutir indamu be akarive apa vatano wanapatambe kaijinta mai indamu masyote anteter po awa anaisye raunanto mai. Umba akarijo yavaruga puje munijo we raora. ⁴³ Ranivara vatano panapatambe umawe po apa anakere raija kobe yava akarijo yavaruga pakare, wea indati apa akarije anayanambe ai ti po kove raunanto ai. ⁴⁴ Tugae, akarije umaso po vatano panapatambe umaso aijaseo titive indamu po ananugo ntuna no yavaruga umaso raer-anande tenambe.

⁴⁵ Weramu ranivara vatano panapatambe umaso po ratantona no anuga pare, 'Sya akarije pamo to noa gwaravain dave weramu pana de rainy,' weti po vatano wanapatambe umawe manepati tenambe, muno pisyisy muno po awije ramanama maen, weamo mamaisye ramu. ⁴⁶ Weye naije akato apa akarije umawe pakare ama masyote muno uma amije mamo pantatukambe rai. Umba akarije wato po mangke raugaje vatano mamuno uma panapatambe aijoe ai, po anepati mangkebe umba po augaveto po

amaugusyo no vatano ubeta Amisye ai jewene matavon. ⁴⁷ Vatano panapatambe wato po apa akarije apa bekere raen to, weramu po rarijate ramu, weti apa akarije po mangke manakoe raugaje ai. ⁴⁸ Weramu are pirati pantatukambe apa akarije apa bekere rai ti po ana ngkakai inta rave yara pantukambe rai, opamo indati apa akarije po mangke mamaune bo raugaje ai.

Amisye beker pare weapanapatambe Ai mamaisyo Apa ana po raunande wasai rarijati. Weti Po vambunine raunande wasai inda wananta Apa bekere rai, weamo beker pare watawondi rai kobe rave. Muno ranivara panave wasai ti Po vambunine raunande manakoeve wasai, weamo beker pare wapanapatambe manakoeve Ai.”

*Yesus apa ayaowe mo vatane maosor
(Matius 10:34-36)*

⁴⁹ Yesus po raura pare, “Ide ramu Syo taname raugaje vatano una no mine vone so mansai. Ibeke dave syare taname umaso mammo raon to. ⁵⁰ Weramu manasyimbe indati inowo siurijo manakoe rai. Muno inanuga nseo majewe yava Sya siurije umaso mewen to. ⁵¹ Wapo ratantona wapare ride indamu Syo kovo saumane raugavo mine so rai. Weramu Syo raura wasai syare jewena. Yara ride indamu Syo yavaruga maosor ti usivuinjo vambinibe. ⁵² No naiso kobe yavaruga indati wayaowi vambinibe ti maosor, weye vatane inta wanave Sya ayaowe rai yara inta wanave jewen. Weti yavaruga inta ama vatane radani, yara vatane mandei wayaowi vatane rurume mai, muno vatane rurum umaso yonayo vatane mandei umawe mai. ⁵³ Indati aja ponayo apa arikainyo anya ai, muno arikainyo anya ponayo aja ai. Akoya monayo ama arikainyo wanya rai muno arikainyo wanya monayo akoya rai. Ajamo ngkakaije monayo ajamo ngkove rai muno ajamo ngkove monayo ajamo ngkakaije rai.”

*Yesus po apa anapaporainyo po raro-
rone raura
(Matius 16:1-4)*

⁵⁴ Umba Yesus po raura vatano wanuije mai pare, “Arono wapo kamuro karisya raen no ranijo varet, wapare, ‘Kavintanamo maruge maje.’ Wea umba maruge maje kobe. ⁵⁵ Muno arono ovaro wambiraowe pare nande, wapare, ‘Kavintanamo nuge non dave.’ Wea umba non dave. ⁵⁶ Weapamo wapa angkarije ntapekan! Wapo anakotare umaso raen dave. Weramu wabeanimaibe wananta anakotaro raroron arono naiso, maisyare Sya anapaporainyo syo raroronee rajie jewen?”

*Yesus po ananyao pariye raura
(Matius 5:21-26)*

⁵⁷ “Wabeanimaibe wapo ayao mamaisye inta rapatimuge jewen? ⁵⁸ Ranivara vatane inta pariyo nai rave, weti pare po nauga ra panaikebe nai no akarijo po mangke rapatimuge amun, kove mamo nyo aneme rajiar wusyimbe rati, arono ipanya no unanuije yasyine raide nene, wirati indamu isanuga nsauman akato. Weye ranivara nyo aneme rajiare jewen, wea indati vatano napije po naunanto akarijo po mangke rapatimuge ai, umba akarije umaso po naunanto apa naite mai jakato, umba naite wo naisiso no tanoano makova rai. ⁵⁹ Syo raura tugaive: indati wintuna no tanoano makova rai jao nyo nya mangke umaso ravaeya mewen bintabo.”

13

*Nsakinavo ayao kakai rajewen, weamo
ngkakai nai*

¹ Arono naije vatane inta ude Yesus ai wo raura ware, “Nandijawe Gubernur Pilatus po vatano Galilea inta maubaisy arono wo maere rameso Amisye ai.”

² Umba Yesus po raura akananto mai pare, “Wapo ratantona wapare vatano Galilea umawe usiuri tai maisy weye awa ayao kakaije ntapekan dave awa arakovo Galilea kaijinta mansakivan. Weti wapare awa ayao kakai ntapekan wemi mbewar usiuri ti ukakai. ³ Weramu Syo raura wasai syare jewena. Yara ayao kakaije no wasai tenambe, weti ranivara wasakinavo wapa ayao kakaije rajie ramu, weaveti indati kakaije nde wasai tavon! ⁴ Nandijawe yavaro anakoe mararai no mana amijo Siloam inta mbit ti mo vatano abusyinara eane kaumandei je makipi ti ukakai. Weapamo wapo ratantona wapare vatane wato awa ayao kakaije ntapekan dave awa arakovo una no Yerusalem mansakivan, wemi mbewar ukakai. ⁵ Weramu Syo raura wasai syare jewena. Yara ayao kakaije no wasai tenambe, weti ranivara wasakinavo wapa ayao kakaije rajie ramu, weaveti indati kakaije nde wasai tenambe tavon!”

⁶ Umba Yesus po ananenee inta raura pare, “Amisye aurata irati vatano apaura irati inyo ara inta rai no apa nawaisye ama uga. Masyote inta de po mane rakani weramu po ama mane inta raene ramu. ⁷ Weti po raura vatano panapatambe apa nawaisye umawe rajie ai pare, ‘Inya! Tume mandei to ide syo mane rakani no inyo ara so rai, weramu syo mane inta raene ramu. Weti syare nyo rate vayave, weye mo kopa ama manijo kove rai bayave yara mane ramu.’

⁸ Weramu vatano panapatambe umawe po raura akananto ai pare, ‘Injae, kai.

Syare nte akato tumo makanande so bo rai jakato. Indati syo kopa ama kauge raugavo ama ruke rai, muno syo raeranande akato. ⁹ Tumo makanande so, wamo raen dati. Mare man, nte kai. Yara mare mane jewen, wea umba wamo rate.’”

Yesus po saumane raunanto wanya inta rai no masyoto sambaya rai

¹⁰ Masyoto sambaya inta Yesus siso pananyaube no yavaro sambaya inta rai. ¹¹ Naije wanya inta nggwanena ama tume abusynara eane kaumandei, weye anawayo kakaije nsiso rai to. Mo ravea ama mona ngkavin ti nseo nteto nsarokibe jewen. ¹² Yesus po raen, umba Po rawain nde, Po raura nanto rai pare, “Inkgoe, Syo nya wanene rapaya nai to.” ¹³ Umba Po aneme raugaje ntamijo rai. Naije kobe nsauman ti nseo nte nsarokibe kobe, umba mo Amisy ararimbe.

¹⁴ Weramu akarijo yavaro sambaya umaso pariyo Yesus ai weye Po saumane raunanto wanya umaso rai no masyoto sambaya rai. Weti Po raura nanto vatano wanuije mansai pare, “Masyote kaujentabo wapo anakere rajar, weti arono naije umba wade indamu Yesus po saumane raunande wasai. Yara vemo wade masyoto sambaya rai jinya.”

¹⁵ Weramu Amisy Yesus po raura akananto ai pare, “Winyamo nya angkarije ntapekan! Masyoto sambaya rai, vatan tenambe wo awa sapije, awa keledaije mapaya nanyi indamu wo maugaveta wo mana ramanam. ¹⁶ Wasaemeno wapa maere kotare mai no masyoto sambaya rai, yara wabeanimaibe wasaemeno wapa aneno Abraham apa ajavije so raije ramu? Anakakai Akoe po wanene raunande rai po veano raokokaeya ama tume abusynara eane kaumandei to. Weti Syo ama wanene rapaya rai no masyoto sambaya rai kai.” ¹⁷ Yesus apa ayao umaso mo Apa marova mave samaneve, weramu vatano wanui kaijinta manayanambe wo Apa anapaporainyo po raroroneo raen.

Ananeneaeyo sesawije kamije muno rai (Matius 13:31-33; Markus 4:30-32)

¹⁸ Umba Yesus po ananenea inta raura pare, “Arono Amisy be akarive Apa kawasae mai no mine vone so, omamo animaisy mi raurata rai? ¹⁹ Omamo raurata ananenea so rai: Vatane inta po sesawije kamije raugav, to po rangkiki no nawaisy. Sesawije kamije umaso momoyain dave,* weramu ntubai nseo,

ama mote manakoe maisyare inyo mote ramaisy. Insanije nande wo ene ranari ama ririje rai.”

²⁰ Umba Yesus po raura nakato pare, “Arono Amisy be akarive Apa kawasae mai no mine vone so, Apa kawasae maurata irati rai. ²¹ Wanya inta mo rai mamaun inta raija ti raugasyo mo veano tepuno manakoe raroya da ntipu tenambe inda manui.”

Unsanda munijo ntiti nandi (Matius 7:13-14, 21-23)

²² Yesus apa unanui anya pare to no Yerusalem, Apa unanui anya som, pananyaube munijo siso raije rai tenambe. ²³ Naije vatane inta po Yesus anajo pare, “Injae, vatano Amisy po kakai rapaya mai ti usisa muni kove rai nawamo wanuije ramu rako?”

²⁴ Umba Yesus po raura akananto ai pare, “Syare wabekero vambunimbe indamu wasisa unsanda nandi nto no kovo nuge nuganuije rai. Syo raura wasai: Vatano wanuije ubeker ware usisa rai, weramu usisa kakai. ²⁵ Arono indati ama masyote mamaisy, Vatano apave yavare rai Po unsanda umaso raugaji. Indati weapamo wasai no unsanda ama akiri wapo rananepat, wapare, ‘Injae, Nyo unsanda rausiso reansai!’

Weramu Po raura uje wasai pare, ‘Syantukambe wasai. Weapamo wanori ruija umba wadea?’

²⁶ Umba wapo raura wapare, ‘Injae, reamisyisy, reamo mana ramanamo natavon to. Arono nyananyaube no reama munijo we, reamo ranaun tavon to.’

²⁷ Weramu Po raura nakanande mansai pare, ‘Syantukambe wasai! Weti wanaji da wata no wato. Weapirati kakai ntipu wasai tutir!’

²⁸ No ratuije wapoyov tawan muno wasiuri tutir, weye waperata wadaen Abraham muno Isak muno Yakob muno anawae wusyine onao tenambe utantuna manayanambe rautan no munijo Amisy be akarive raije rai, weramu weapamo Po wasamaugusyo kaumuro marane rai. ²⁹ Umba vatano marano una no ovare mijijo mambisy so wanui ude indamu wisyisy muno manayanambe no munijo Amisy be akarive raije rai. ³⁰ Tugae, vatano wanui nanawirati udijabe no mine so indati wakare wuisy akato no munije ama akari. Yara vatano wanui nanawirati wuibe no mine so indati wakata udijat.”†

* **13:19** Sesawije kotaro ranyum no Indonesia omamo anareo mamaun, yara sesawijo kotaro ranyum no Israel ntubai ti manakoe rave, maisyare inyoe ramaisy. † **13:30** Ayao so ama ine inta mare arono munije ama akari vatano Yahudi wo Ayao Amisy ranaun wusyimbe, inta wakare udijat ti usisa muni kove raije ramu. Yara vatano Yahudi jeweno nanawirati wo ranaun dijabe, inta wakare wuisy ti usisa muni kove rai kobe.

*Yesus aemeno Yerusalem rai
(Matius 23:37-39)*

³¹ Arono naije vatano Parisije inta ude Yesus ai, umba wo raura Ai ware, “Winyamo vemo wino tawan no so nora, yara nyoronto no munijo kaijinta, weye Akarijo Titi Herodes pare po naubaisy.”

³² Yesus po raura akananto mai pare, “Wata wadaura vatano angkarije wato ai wapare masyoto unumeso muno siman Syo anawayo kakaije mawatan muno Syo saumane raunanto vatano ugwanene mansai. Masyote mandei umba Sya anakere so mewen. ³³ Weramu masyoto unumeso, siman, nandi Syo sya unanui anya rave tutir. Syare syoroto no Yerusalem weye anawae Amisyete inta aubai no munijo kaijinta rai omamo mamaisyete ramu, yara no Yerusalem obo rai.

³⁴ Aro...! Yerusalem, weapirati wapo anawae maubaisy muno wapo orame rave vatano Amisyete po matutir ude wasaije maepara ugwenen to. Susyete manui rave to syare Syo wasanugan nande Syo wasakuka maisyare mangkuero mo ama tuvane rakuka wemaisyete, weramu waponae. ³⁵ Weti indati Amisyete aneme mpaya wasai indamu wapa marova wo wapa munijete muno Yavaro Amisyete randamisyete. Syo raura wasai: arono naiso kobe wapo inaeen akatoe ramu gava masyoto wapo inaura wapare, ‘Kove ngkov irati Napi de tamo Amisyete rautane Ai!’ ”

14

Yesus po saumane raunanto vatano gwanen inta ai

¹ Arono masyoto sambaya inta, Yesus poroto pisyi no akarijo Parisije inta apa yavar. Vatane wo Yesus apa ana daveyete ranyanyuti. ² Umba vatano gwanen anakea mbambanaije inta de tet no Amun.

³ Umba Yesus po raura nanto vatano Parisijete nawe, kuruno Yahudi makari mbaro Ananyao Musa raije nawe mai pare, “Animaisyete mi Ananyao Musa mo raura mare: Wamo saumane raunande no masyoto sambaya rai rako jewena e?”

⁴ Weramu umanin bayave. Weti Yesus po vatano gwanene umawe aneme raijar umba Po saumane raunanto ai, umba Po atutir pare, “Nin kai.”

⁵ Umba Yesus po raura mai pare, “Weapamo inta nya arikainyete dako, nya sapijete inta dako, temasyo no ateme raijo masyoto sambaya rai, wea indati nyavave nyo aijaseo rako jewena e? Wasaemeno wapa arikainyete muno wapa sapijete mai, yara wabeanimaibe wasaemeno vatano ugwanene maije jewen?” ⁶ Weramu vatane wato wo ayao inta rasakinav akananto kakai, yara umanin bayave.

Yesus po vatano akokoe muno vatano mamaun maura

⁷ Yesus po raen vatane inta ude wo kur-sijete ntuna usyete raije rakani indamu vatane wo maen ware wenawamo vatano akokoe nawijete. Weti Yesus po ananeneaje inta raura mai pare, ⁸ “Arono vatane inta po nawain ti nto no ono vauname rai, weamo vemo winyete ntuna usyete raije rakani jinye. Weyete ranivara vatano panakoeve po nakivane inta de, weamo akarijo one de nai, po raura nai pare, ⁹ ‘Arakove, nseo ra nyakato ntuna no ratuijete, weyete vatano panakoeve umaso pare de tuna no nya uma ntuna raijete wato rai.’ Weti indati winyamo nsamane rave nyakato ntuna no aruri bo rai. ¹⁰ Yara arono vatane inta po nawainde apa one rai, weamo nyoronto kai, weramu vemo nyo ntuna raijete ratayao nora, yara ntuna no aruri omamo ngko tenambe. Umba naije akarijo one umawe de nai, po raura nai pare, ‘Arakove, winde nyajete ntuna no usyete kove so rai.’ Maisyete omaisyete, po naijaseo titivete no vatano una no naijete mansamun.”

¹¹ Umba Yesus po ananeneaje umaso ama ine raura kakavimbe pare, “Are pirati po taune aijaseo titivete no mine vone so, opamo indati Amisyete po apaaje, yara are pirati po taune anuga ravetete mpaaje no mine vone so, indati Amisyete po aijaseo titivete.”

¹² Umba Yesus po raura akananto vatano po awainde apa one umaso raijete ai pare, “Arono nyare nyo vatane mawainde nya one rai, vemo nyo nya arakove nawe vatano awa ananuge manuijete nawe obo mawain inya. Weyete indati wo nawainde awa one rai jakato, weti wo nya kove umawe ranigwan akare. ¹³ Yara nyare nyo one rave, weamo syare nyo vatano awa ananuge maweno maijete nawe, vatano manakea mamai kobe jewene nawe, vatano tunaive nawe, vatano mamijete ntuba nawe, mawainde. ¹⁴ Indati winyamo nyaura kove rai, weyete vatane umaso wo nya kove ranigwane kakai. Yara Amisyete bo pirati po kove ratayao ti mo nanyut no munijete ama akari arono Po vatano awa ana wo rave mamai no Amun maijasea ukovakato no wene rai.”

*Ananeneaje ono akoe
(Matius 22:1-10)*

¹⁵ Arono naijete vatane inta pisyisyete Yesus atavon dani nanto po Apa ayao umawe ranaun, po raura pare, “Are pirati tavono one rai no munijete Amisyete be akarivete raijete rai, tugae opamo apaura kove rai.”

¹⁶ Umba Yesus po ananeneaje inta raura pare, “Vatane inta po ono akoe inta raura, umba po vatano wanuijete mansawainde rai. ¹⁷ Masyoto apa one umaso ndea mamai kobe, po vatano panapatambe aije atutir indamu po vatane umawe mawainde

pare, 'Wade wanta one rai! Anaisye mamu ratayaowa mawesa ntuna to.'

¹⁸ Weramu vatane umaso wonayo ude rajiji vintabo. Vatano manasyine po raura pare, 'Risyamo syo kopa inta ramavun kai ti syare ito syo raen, weti mpari jinya weye syoreye ramu.' ¹⁹ Inta po raura akanande ai jakato pare, 'Risyamba syo sapije abusyin mamavun kai ti syare syo mauga damu syo maeno wo sya anakere rajija dako jewene. Weti mpari jinya weye syoreye ramu.' ²⁰ Inta po raura akananto ai pare, 'Risyamba ibanam kajioe, weti risyoreye ramu.'

²¹ Vatano panapatambe one umaso rajije pakato po ayao umaso raura apa akarije ai. Weti apa akarije umaso po ranaun, pari rave. Umba po raura nakananto vatano panapatambe aije umaso ai pare, 'Nyavave nyoronto no unanuijo kota ama radirije raito, nyo vatano awa ananuge meweno maije nawe, vatano manakea mamai kobe jewene nawe, vatano mamije ntuba nawe, vatano tunaive nawe, maugavere no so indamu utavondijo sya one so rai.'

²² Umba vatano panapatambe aije umawe tavondijo apa akarije umaso apa ayaowe rai. Arono pakare po raura pare, 'Injae, nya ana ndaura mamu syo raura mai to, ti ude tenambe. Weramu tantuna rajije so inta ntami vayavea nene.'

²³ Weti akarije umaso po raura vatano panapatambe aije umawe ai jakato pare, 'Nyoronto no unanuijo akoe muno unanuijo mamaune raito, muno nyoronto no unat, umba nyo vatane mantitidi ra ude sya one so rai, weye syare sya one so ama tantuna rajije so ntairijo vatane mai.' ²⁴ Syo raura tugaive: vatano uma syo mawain wusyimbe onawamo inta de ra po anaisye so raisye jeben bayave!' "

Wamo anakotaro rui vayave rapaya ntami umba wantavondijo Yesus ai (Matius 10:37-39)

²⁵ Vatano wanuije wanya Yesus atavono apa unanui anyi rai, weti Yesus sarirae akare po raura mai pare, ²⁶ "Are pirati de Rinai muno bekobe irati akoya me aja pe apa anamu me apa arikainye nawe, apa arakovo anyi, wanya nawe, muno taune anasine rajija manakoe, yara bekobe irati Rinaije mamaun, opamo Sya arakovo tavondi inaije pe ramu. Yara are pirati bekobe irati Rinaije manakoe rave, tugae opamo tavondi Rinaije pijep." ²⁷ Are pirati po taune apa inyo kapite ranawan ara tavondi Rinaije ramu, weveti opamo Sya arakove waino aije ramu.

²⁸ Vatane inta pare po yavare inta ranari, weveti tuna po ama doijo veano ranarije ratoro wusyimbe rati, inda po raen pare

mamai dako jewena rako. ²⁹ Yara po kangkamano nteto yavare ama ruke rai raugasya wusyimbe weramu apa doije meweno ai, weveti mamaisye ramu, ti vatano kajijinta wugoeno ai, ³⁰ ware, 'Vatane sopamo po yavare so rauseo nte damu po ranari tutir da mewene ramu.'

³¹ Maisyare omai tavon, akarijo titi inta pare po marovave akarijo kajijinta ai, weamo po ratantona wusyimbe pare, 'Sya naite ribuge abusyin wenawamo awa vambunine mamaisyo sya marova apa naito ribuge tename awa vambunine rajija rako jewena rako?' ³² Ranivara po ratantona pare awa vambunine mamaisye ramu, weamo arono apa marova pe apa naite nawe ude ra umarovave rainy yara una ugwaravaimbea nene, pare po apa vatane inta atutir to po ana raura apa marova umaso ai indamu yo yaneme rajiar bayave, yara imarovave jeben kai.'

³³ Umba Yesus po raura kakavimbe pare, "Syare weapamo maisyare wemai tavon. Vatano wapare watavondi Rinai, syare wapo anakotaro rui vayave rapaya ntami tenambe umba watavondijo Rinai. Yara are pirati ponae po anakotaro rui vayave rapaya ntami, opamo Sya arakove waino aije ramu."

Ananyao garam

(Matius 5:13; Markus 9:50)

³⁴ "Weapamo wasaurata irati garam rai. Garam omamo ngkov, wapo rataopono anaisye rai, wea umba manavan. Weramu ranivara garam umaso ngkurude to, weamo ngkov akatoo ramu. ³⁵ Wea indati vatane wo ramauta vayave. Wadanide! Are pirati amarikoame rasakinavo Sya ayao rai, weamo po ranaun."

15

Ananeneaeyo domba inta aumandi

(Matius 18:12-14)

¹ Masyote inta vatano wo pajak ranugande akarijo pemerinta aije inta nawe, vatano ayao kakaije no maije inta nawe ude no Yesusa nui indamu wo anaun. ² Umba vatano Parisije nawe, kuruno makari mbaro Ananyao Musa rajije nawe wo rantutibe ware, "Veanimaibe Yesus bekobe vatano awa ayao kakaije no maije mai muno pisyisyo matavon?"

³ Maisyare omai ti, Yesus po ananenea inta raura nanto mai. ⁴ Pare, "Ranivara vatane inta no no wapa yasyin apave domba tename radani mai umba intabo aumandi, weamo animaisye mirati po rave? Indati po domba abusyine kaimambisy eane kaimambisy mapaya ti una no anok, umba poroto po uma aumandijoe akani jao nanto ai. ⁵ Arono nanto ai, weamo

anayanambe rave, ti po aijaseo no apa ivam po akomboni, ⁶ umba po auga ti pakare. Arono siso no apa yavar, umba po apa arakove mawainde pare, 'Wade ra wansanayanambe tenambe, weye sya domba aumandijoe opamo syo akanija syo aen to.' ⁷ Maisyare omaisy tavon, Amisy pe apa naite awa manayanambe no no munijo ntiti manakoe rave weye vatane intabo sakinavo apa ayao kakaije rai, weti mo awa manayanambe vatano mansano abusyine kaimambisy eane kaimambisy mansai rakivan, nanawirati wo taune makarae ware onawamo manuga mamaisy ti ware usakinavo ayao kakai rai jewen kai."

Ananeneaeoyo doije intabo aumandi

⁸ "Maisyare somai tavon: wanya inta amave doije vasye abusyin ama mangke nseo, weramu vasye intabo aumandi. Weamo tugae mo yawainye raindi umba mo anaingkainyo yavaruga rayavir, mo akani mavabe yava nanto ai. ⁹ Nanto ai ti mo ama arakove mawainde, mo raura nanto mai mare, 'Inanayanambe rave weye sya doijo akaniveowe inanto ai to, weti wade ra wansanayanambe tenambe.' ¹⁰ Maisyare omai tavon, naito Amisy una no munijo ntiti manayanambe arono vatano ayao kakaije no aije intabo sakinavo apa ayao kakaije rai."

Ananeneaeoyo arikainyo aumandi

¹¹ Yesus po ananeneae inta raura nakato pare, "Vatane inta apa arikainyo anya rum. ¹² Masyote inta apa arikainyo rijate po raura nanto aja ai pare, 'Injae, syare ririma ananugo nyare nyo raosoro ririnsai mamono nyo sya nake raunande rinai. Weye ribeker syare syaura sya nake rai no naiso kobe.' Naije ajae umaso po apa ananugo manuije raosor, po inta raunanto apa arikainyo rijate ai, inta raunanto apa arikainyo anuije ai.

¹³ Masyote inta yai jakato, umba arikainyo rijate umaso po apa ananuge umawe rambayano vatane mansai ti mewen bintabo, umba po ama doije raugav umba pusyo ti to no munijo nggwaravainy. Nai ratuije apa doijo po raugave umawe po rambaon bayave ti mewen. ¹⁴ Weti apa doije mewen mbintabo ai, muno arono naije tavon munijo namije marore tami rai, weti arikainye umaso aarebe. ¹⁵ Weti poroto po anakere raijaro vatano no no munije umaso inta ai indamu po doije inta ijaro ai. Umba apa akarije umaso po atutir ti to po apa ugeye maeranande. ¹⁶ Arikainye umaso marore po ave rave, weramu vatane inta po anaisy inta raunanto po raisy ramu, weti pare beker po uge awa anaisy kukupe inta raisyi.

¹⁷ Umba apa ana datantona ngkov akato, po raurana pare, 'Vatano wanapatambe sya injaya aije onawamo awa anaisy mawes, yara risyamo kavintare ikakaijo marore rai. ¹⁸ Weti syare syakato no injaya nui, umba syo raura ai syare, "Injae, sya ana idave ngkakaijo winai muno Amisy ai. ¹⁹ Weti vemo nyo nya arikainye waino rinai jakato inya, weye risyamo imamaisy ramu, yara nyo inawainamo vatano syanapatambe naije pi risy inda nyo rinavae."'

²⁰ Naije arikainye umaso nin ti pakato no aja nui. Pakato pararai rainya nene, umba apa aja po aen, muno aemeno ai, weti aja pansanan po apa kavo aijanande po anu. ²¹ Umba arikainye umaso po raura nanto aja ai pare, 'Injae, sya ana idave ngkakaijo winai muno Amisy ai, weti winyamo vemo nyo nya arikainye waino rinai jakato inya.'

²² Weramu ajae umaso po vatano wanapatambe aije mawainde umba po raura nanto mai pare, 'Wapavave, wapo ansuno ngko dave inta raugavere indamu sya arikainye so po rave muno wapo sinsinjo ngko dave inta rave apa kawije rai tavon. Umba wapo ajo kokome inta raunanto po rave tavon no ajoe rai. ²³ Umba wapo sapijo kamuramo mani rave inta aotar inda wamo raisy muno wansanayanambe. ²⁴ Weye sya arikainye umaso pusyo ti to no munijo maran, ti syo amune raumandi maisyare muno kakaije wemaisy, weramu naisoamo pakare ti syo amune raen akato to maisyare muno kovakato wemaisy.' Umba wo apa one rave, manayanambe.

²⁵ Arono naije apa kavo anuije pamo to po nawaisy raijar. Umba pakare ti pararaijo yavare rai, naije danito po vatane manamote ranauno ukinye muno usarer bovambe weye wo one rave. ²⁶ Weti po vatano panapatambe umawe inta awainde po anajo pare, 'Animaisy mi wapo rave no yavare wato?'

²⁷ Umba vatano panapatambe umaso po raura nande ai pare, 'Nya rijata pi pakare to, weti inya po matutir pare wo sapijo kamuramo mani rave inta aubai da wo aisyo one umaso rai, weye apa arikainye umawe pakare to muno anakea nsauman ivae.'

²⁸ Naije arikainyo anuije umaso pari, ti ponayo siso no yavaruga raiji. Umba aja pusyo payao memembe ai inda siso tavondijo one umaso rai. ²⁹ Weramu arikainyo anuije umaso po raura nanto ai pare, 'Syanapatambe Injae naija tume manui rave to. Muno Injae, nyo anakere inta rauranamo, syo nya rawatambe ramu yara syo raijar. Weramu animaisy mi Injae nyo raunande rinai? Nyo kombine inta raunande rinai indamu risy sya arakove nawe reamo sya one inta rave ramu, jewen dave. ³⁰ Yara nya arikainye uma wato pamo

po nya ananugo nyo raunanto aije ma po raveti impatimu wanya anaerere mai. Weramu arono pakare, nyo sapijo kamuramo mani rave aubai da nyo apa one rave!

³¹ Aja pare, 'Sya arikainye, winyamo no inarijat tutir. Weti animaisye mi syaura rai omamo winyaura rai tavon ivae. ³² Weramu syare wamo one rave wansanayanambe, weye sya arikainye umaso pusyo ti to no munijo maran ti syo amune raumandi maisyare muno kakaije wemaisy, weramu naisoamo pakare ti syo amune raen akato ti maisyare muno kovakato wemaisy.' "

16

Ananeneayo vatano panapatambe wepirati akarikuga mba dave

¹ Yesus po ananeneae inta raura nanto Apa arakovo utavondi aije mai pare, "Vatano apa ananuge manui rave inta apaura irati vatano panapatambe inta ai indamu po apa ananuge, apa doiye raeranande. Weramu umba vatano kaijinta wo vatano panapatambe umaso aura tantunawi no apa akarije amun ware, 'Sopamo po nya ananuge rambaon bayave ti mewen to.' ² Weti akarije umaso po vatano panapatambe umawe awainde, umba po raura pare, 'Syo ranaun nya ana ndave mamomo ngkove ramu. Weti syare nyo bukugo sya ananuge ama manuije ratoe raije raugavere indamu syo raen winyamo nyo raeranande mavabe rako jewena rako. Weye tugae rave, wimamaisyo anakere so raije jeben, yara syare syo raunanto vatano po nanigwane inta ai.'

³ Umba vatano panapatambe umaso po ratantona pare, 'Animaisye mi indati syo rave? Soamo sya akarije po anakere umaso raugavo inaora. Syantatukambe anakero mangke rai, weye inanakea mayondi. Muno rituna no unanuije ama tuga syanatambe doiye rai, weamo isamane. ⁴ O, inanto rai! Sya ana idatantona mamomo syare ibekobe vatane inta mai no masyoto unumeso indamu arono indati syuje anakere so raora to, weamo vatane umaso wo inaugav siso awa yavare rai.'

⁵ Maisyare omai ti, po vatane inta mawainde, nanawirati wo apa akarije umawe apa ananuge inta rauga to yara wo raugakare rainya nene. Umba po raura nanto vatano manasyine ai pare, 'Ananugo sya akarije pare nyo raugakare aije mamomo ama mangke nanto no ruimaisya?'

⁶ Umba vatane wato po ayaowe rasakinao ai pare, 'Manino saitune ama botorije nanto no tename radani.'

Umba vatano panapatambe umawe po raura nanto ai pare, 'Syare syo nya ana nyo ravae ama mangke raotar, ti nanto no tename jirum eane abusyin.'

⁷ Umba naije akato, po raura vatano jirum ai jakoto pare, 'Arakove, ananugo sya akarije pare nyo raugakare aije mamomo ama mangke nanto no ruimaisya?'

Umba vatane wato po raura nande ai pare, 'Kasyambere ama karone ribuge intabo.'

Umba vatano panapatambe umawe po raura nanto ai pare, 'Syare syo nya ana nyo ravae ama mangke raotar, ti nanto no ratusije kaumandei bayave.'

⁸ Arono akarije umawe po ana umaso ranaun, po vatano panapatambe aije umawe ararimbe weye akarikuga nsansinao. Weye vatano mine so makari nsansinao wo anakotaro mine so ratayao indamu ngkovo taune mansai, ti mo vatano utavondi Amisye aije makivan.*

⁹ Syo raura wasai syare wapo wapa ananugo mine so veano kove raugavo vatano kaijinta mai ti weape wenawe wabe arakobe. Maisyare wemaisy, wapo kove ratayao wasanyut no munijo ntiti, umba arono wapa ananugo mine so mewen kobe, wea indati Amisye po wasaugave sisa no yavaro kovo nuge nuganuije rai.

¹⁰ Ranivara vatane inta po apa ananuge raeranande kobe arono ananuge umaso manui jeben, weamo ranivara ananugo manui raunande ai, indati po raeranande kobe tavon. Vatano maisyare sopamo vatan tenambe wanave ai. Yara ranivara vatane inta po vatano kaijinta maponae arono apa ananuge manui jeben, wea indati po vatane maponae tavon aje arono apa ananuge manui rave. ¹¹ Maisyare omai ti, ranivara romano wemirati Amisye po raunande wasai no mine somamo wapo raeranande kobe jeben, weaveti Amisye indati po romano tugae no munijo ntiti raunande wasai jeben. ¹² Muno ranivara vatan inta apa ananuge mi po raunande indamu wapo raeranande, weramu wapo raeranande kobe jeben, weamo Amisye indati po taune wapa ananugo kove no munijo ntiti raunande indamu wapaura rai jeben.

¹³ Wapare wapo Amisye pe romano mine vone so me yakani kava, indati mamaisye ramu. Maisyare muno ananeneae so ramaisy: Vatane inta panapatambe vatane jirume yai, wea indati bekobe apa akarije inta ai rave, yara akari inta pamo indati panapatambe ai kobe jeben. Muno opamo tavondi akarije inta apa ananyaowe rai,

* 16:8 Ayao Yunani mo vatano utavondi Amisye aije mawainamo "vatano una no Amisye apa vare rai."

yara ponayo kaijinta apa rai. Weti wapare wabekero Amisye ai muno romane rai kava omamo mamaisye ramu.”

Yesu po anyanyao inta raugaje
(*Matiu 11:12-13, 5:31-32; Markus 10:11-12*)

¹⁴ Vatano Parisije udani nanto wo ana Yesu po raura we ranaun umba wugoeno Ai, weye onawamo manayanambe awa romane rai. ¹⁵ Weti Yesu po raura akananto mai pare, “Weapamo wapa ana wapo rave no vatane mansamun omamo mamaisye, weramu Amisye po wasanuga raen omamo ngkakainoanive. Anakotaro vatano mine so wo raura titive omamo Amisye ponayo rai.

¹⁶ Anyanyao Musa muno Ayao Anawae omamo vatane utavondi rai tutir ava masyoto Yohanes Pembaptis de. Weramu soamo Ayao Kove so ravov, omamo Amisye indati de be akarive Apa kawasae mai no mine vone so. Muno vatano wanui rave ubeke dave ware utavondijo Amisye apa kawasae umaso mansai. ¹⁷ Weramu Anyanyao Musa omamo no tawan. Naumo warae me mine so me noa nugoenta rave umba raumandi, yara Anyanyao Musa ama ayao mona intabo dako, muno ama urupijo mamaun dave inta raumandi jeben, yara no tawan.

¹⁸ Are pirati po apa wanya rauguje aora yara po wanya kaijinta raovan akato, wepamom serer. Muno anyanya kaijinta wepi po wanya rauguje umaso raovan akato, wepamom vatano serer tavon.”

Ananeneae vatano apa ananuge manuije pe Lasarusu pe nai

¹⁹ “Vatane inta pamo apa ananuge manuije rave. Weti masyote anteter po ansuno ngko dave bo rave, mainda no no yavar muno po one rave. ²⁰ Muno vatano apa ananuge meweno aije inta apa tame mirati Lasarus, opamo vatano bose no anakea rai. Weti masyote anteter nikive no vatano apa ananuge manuije umaso apa unsanda uje. ²¹ Lasarus umaso maror dave weti pare bekero po anaisye kengkeno ntatae no vatano apa ananuge manuije umaso apa meja ama ate inta raisy. Muno naije tavon make ude wo apa bose ranenev.

²² Masyote inta Lasarus umaso kakai, umba naito Amisye wo augave to no munijio ngko dave no aneno Abraham apa tuna ri. Vatano apa ananuge manuije umaso kakai tavon, ti vatane wo antuna, ²³ muno anawayoe no irati siurijio manakoe rai no tanamo mbadururo nuge nuganuije rai. Arono naije peraseo po Lasarus aeno tuna Abraham atavono ratuije. ²⁴ Umba vatano apa ananuge manuije umawe gwain pare, ‘Injajo Abraham, naemeno rinai! Syare

nyo Lasarus atutir indamu po kawije rayan-sundijio mana rai inda de po ransaokobe inaunane rai, weye risiuri rave no taname so ama uga rai.’

²⁵ Umba Abraham po raura nakananto pare, ‘Sya arikainyo winy, naemen: arono wino no mine vonoe nyaura irati anakotaro ngkove rai to, yara Lasarus apa siurije manakoe. Weti soamo syo Lasarus ayove yara winyamo nya siurije manakoe rave. ²⁶ Muno obo rai jeben, yara wama yasyine somamo anone kapito wansaora to. Vatano nanawiso inta wore no watoe ramu, muno vatano una no watu inta ude no soe ramu.’

²⁷ Umba vatano apa ananuge manuije umaso po raura pare, ‘Maisyare omai ti, injajo Abraham, syo raura kikibe nai rave indamu nyo Lasarus atutir indamu pakato no sya injaya apa yavar. ²⁸ Weye sya arakove radani nanawi una no ratuije, weti nyo Lasarus atutir indamu to po ana raura mai, indamu vemo utatayo siurijio kakaije so rai tavon inya.’

²⁹ Weramu Abraham po raura nanto ai pare, ‘Nya arakove wenawamo awave Anyanyao Musa muno Ayao Anawae rai. Weti indati utavondijio rai jaje!’

³⁰ Weramu vatano apa ananuge manuije umaso po raura nakananto pare, ‘Injajo Abraham, omamo mamaisye ramu. Yara vatane inta kakai yara kovakato de mai, wea umba usakinavo awa ayao kakaije raijije.’

³¹ Umba Abraham po raura akananto ai pare, ‘Ranivara wanave Anyanyao Musa muno Ayao Anawae raije jeben, wea indati vatano kakaije inta kovakato pakare po ana inta raura mai, weamo wanave jeben tavon.’ ”

17

Yesu po ayao kakaije muno anave raura
(*Matiu 18:6-7, 21-22; Markus 9:42*)

¹ Yesu po raura Apa arakovo utavondi aije mai pare, “Tugae, anakotaro mo vatane maponae ti wo ayao kakaije rave omamo no tutir. Weramu are pirati po vatano kaijinta maponae ti wo ayao kakaije rave, opamo kakaije mo augav. ² Muno are pirati po arikainy tuvano wanave Inaije inta aponae ti po ayao kakaije rave, opamo indati Amisye po parijio mangke raugaje ai. Weti kove mamo orame rapuisyo vatane wato ai amaugusyo no mayane rai indamu mansyan, weye wemirati mangke mamaun, yara mangke Amisye pare po raugaje ai manakoe mo mangke umaso rakinvan. ³ Weti wasyisyaube!

Nya arakove inta po ayao kakaije inta rave, weamo nyo raura nanto kakavimbe ai nyare, ‘Vemo mbeare omai nora.’ Umba ranivara sakinavo apa ayao kakaije rai,

weamo nyo aneme rajjar indamu isanuga nsauman. ⁴ Muno ranivara nya arakova po ayao kakaije rave nai tutir ti nseo no susye kaururum, weamo vemo nyo apaya inya. Yara arono rui vayave pare sakinavo apa ayao kakaije rai, weamo nyo aneme rajjar akato indamu isanuga nsauman.”

⁵ Amisy Yesus apa arakove wo raura Ai ware, “Injae, reamare Nyo reama anave ravera mbambunin.”

⁶ Umba Yesus po raura akananto mai pare, “Wapanave mamaun bayave kai, weamo mamaisiy. Weye ranivara wapa anave mamaun maisyare sesawi kamijo momoyain dave ramaisiy, weamo wapo inyoe wato raura nanto wapare, ‘Inyo moto winy, mpatin da nto ntemasyo no nawanano warave,’ weamo mamaisiy nya ana ndaura rai kobe.”

Ananeneae vatano panapatambe akarije inta ai

⁷ Yesus po ananeneae inta raura taiso pare, “Vatane inta panapatambe akarije inta ai, po mine rakaro no apa nawaisiy muno po apa maero domba maeranande. Mare ngkaumu kobe vatano panapatambe umaso pakato no yavar, weramu animaisiy mirati apa akarije po raura nanto ai? Apa akari apa ana po rave ai mi som: Po awainde inda paje tuna pisyisy wusyimbe ramu. ⁸ Yara pare, ‘Nyo sya anaisye ratayao! Nyanapatambe rinai indamu risyisyi dati! Umbawe winyamo nyisyisy akato rijabe.’ ⁹ Akarije umaso po kove raura vatano panapatambe umaso aije ramu, yara pare, ‘Apa anakere mije, ti po rave kai.’ ¹⁰ Weapamo wasaurata irati vatano panapatambe umawe ai. Arono wapo anakero Amisy po raugaje wasaije rave mwen to, syare wasaemen weapamo Apa vatano wapanapatambe vayave nawirati weap. Vemo wasararin nora, weye anakero wapo rave mamano anakero Po wasatutiro rai to mije.”

Yesus po saumane raunanto vatano abusyino aravure mo mave mansai

¹¹ Yesus apa unanui anya pare to no Yerusalem, weamo panya no munijo Samaria muno munijo Galilea aya anone rarijato. ¹² Umba siso no munije inta rai, naije nanto vatano aravure mo mave inta mansai mansano abusyin. Usaiyo waravaimbe, ¹³ umba ugwin ware, “Yesus, Injayo Kuruno Winy, naemeno reansai!”

¹⁴ Arono Yesus po maen, po raura mai pare, “Wata wapo wasanasine rarorono syeno utantuna no Yavaro Amisy rajje mai indamu mamaisiy Ananyao Musa rai.” Naije wanya kobe, umba manakea nsauman.

¹⁵ Vatane inta no no awa yasyin po anakea raen nsauman to, weti pakare

anayanambe ti gwain pare, “Amisy ararimbe! Risauman to!” ¹⁶ Umba po vukane ranteter no Yesus amun, umba po kove raura nanto Ai. Vatane umaso pamo vatano Samaria pa.

¹⁷ Umba Yesus po raura akananto ai pare, “Vatano abusyine umawe manakea nsauman to, weramu umba vatano kaimambisye wenawi rui? ¹⁸ Veanimaibe vatano kaije umawe wakare wo Amisy ararimbe jewen, yara vatano marane so bo pi de po Amisy ararimbe?” ¹⁹ Umba Yesus po raura vatano Samaria umaso ai pare, “Nseo muno nyoronto. Nyanave Inai jivae, wirati winsaumanoe.”

Amisy apa be akarive Apa kawasae mai (Matius 24:23-28, 36-41)

²⁰ Vatano Parisije inta wo Yesus anajo ware, “Nandui rati Amisy de be akarive mine vone so rai?”

Yesus po raura akananto mai pare, “Amisy apa de be akarive Apa kawasae mai no mine vone somamo ana inta raroron kakavimbe indamu vatane wo raeno mansamije rai ma jewena. ²¹ Muno vemo vatane wo raura ware, ‘Waperade! Amisy de be akarive no naiso!’ indako ‘Waperato no ratuije!’, wenora. Weye tugae mamamo Amisy apa be akarive no no Apa kawasae wapa yasyine so rai to.”

Arono munije ama akari

²² Umba Yesus po raura Apa arakovo utavondi aije mai pare, “Ama masyote nde nande arono wabeke dave wapare wapo masyoto Arikainyo Vatane syakare rajje raen. Weramu indati wapo raene ramu weye Sya masyote umaso mamai dainya nene. ²³ Arono naije vatane inta wo raura wasai ware, ‘Napi ratuije!’ dako, ‘Napi so!’ dako, weramu wabemo wata wapo inakani jinya. ²⁴ Weye arono indati Risy, Arikainyo Vatane, syakare no mine vone so rai kobe, omamo maisyare muno ivake ratukande no ranijo wanamuram ndento no varet we-maisy. Weti vatan tenambe wo raen kobe. ²⁵ Weramu manasyimbe indati siurijo manakoe nande Arikainyo Vatane rinai, muno vatano arono naiso wo inawatambe.

²⁶ Arono Risy, Arikainyo Vatan, syakare rai, weamo mamaisiy wusyino arono Noakija no no mine vone so we ramaisy. ²⁷ Arono naije vatane wo masyoto makanande ratantona ramu, yara manayanambe anaisye, ana ramaname bo rai tutir. Anya wo wanya maovan muno ajae wo awa arikainyo wanya awa vainye raokaisy. Maisyare omaisy miridije ntoa masyoto Noakija siso apa nyomane rai. Umba kavuratawe manayame njam mo mapupuji ti ukakai vintabo.

²⁸ Maisyare omai tavon arono Lota no no mine vone so. Vatano munijo Sodom wisyisy, muno wanamavumbe, muno wo anareye rayanyum, muno wo yavare ranari janyi. ²⁹ Maisyare omaisy miridije ntoa Lota puje no munijo Sodom raora, umba Amisy po tanamo mbadurur no no naumo warae raugaje mai, ti ukakai vintabo. ³⁰ Maisyare omai tavon arono indati Risy, Arikainyo Vatan, ride papabe, Syo sya kovo nnti raroron kakavimbe.

³¹ Arono indati masyoto namije nande, vatano tuna no apa yavare ama akiri muno apa ananuge ntuna no apa yavar uga, vemo de pakaiso dauga nora! Maisyare omai tavon, vatano to no no nawaisy uga, vemo sarirae pakare nora! ³² Syare wasaemen irati ana nande Lota pe apa anamu me yaije rai!³³ ³³ Are pirati beker pare po apa kovo mine so ramavug, opamo indati apave kovo nuge nunganui raije ramu. Yara are pirati akirive taune apa kovo mine vone so rai, opamo indati apave kovo nuge nunganui rai.

³⁴ Syo raura wasai syare arono naije vatane jiruma nyakijo tanije intabo rai, umba Amisy po inta augav, yara inta pamo no kobe. ³⁵ Wanya jiruma yo kasyambere kami ranumu, Amisy po inta raugav, yara inta mammo no. ³⁶ Vatane jiruma yo nawaisy rajjar, Amisy po inta augav, yara inta pamo no.”

³⁷ Yesus apa arakovo utavondi aije wo anajo ware, “Injae, ana umaso nande no munije rui?”

Yesus po raura akananto mai pare, “Arono wapo insanijo koroe maeno wanugani, wapare, ‘Somaida maere ine inta ntuna no naije.’ Maisyare omai tavon, arono anakotaro Syo ratodi umawe nande tenambe, wapare, ‘Arikainyo Vatane pakare.’ ”

18

Ananeneae wanya kavini muno akarijo po mangke rapatimu

¹ Arono naije Yesus po ananeneae inta raura nanto Apa arakovo utavondi aije mai indamu usambayambe tutir, vemo wo sambaya rapaya inya. ² Po raura pare, “Akarijo po mangke rapatimu inta no no munije inta rai. Opamo po Amisy asyanive ramu, muno po vatano kajinta mantotobe ramu. ³ No munijo naije wanya kavinije inta de irati akarije umaso ai, masyote anteteramo ntoe ndeve akarije umaso ai, mo raura mare, ‘Injae, nyo inaeranand! Syare nyo ayao mamaisy inta rapatimu indamu vemo sya marova po inave tatugadi jinya.’

⁴ Manasyimbe akarije umaso ponayo po wanya kavinije umaso raranivi. Weramu arono ntoe ndeve mo anajo tutir, umba po ratantona pare, ‘Risiamo syo Amisy asyanive ramu muno syo vatano kajinta mantotobe ramu. ⁵ Weramu wanya kavinije umaso ntoe ndeve mbe anakebe rinai rave tutir. Weti indati syare syo raraniv, syo ayao mamaisy inta rapatimugo rai indamu vemo mo inandapae tutir inya.’ ”

⁶ Umba Amisy Yesus po ananeneae umaso ama ine raura kakavimbe pare, “Arakove, syare wapo akarijo mamaisy jewene umaso apa ayao ratantona kobe. ⁷ Akarije umaso kakainoanive, weramu po ayao mamaisy rapatimugo wanya kavinije umawe rai weye mo anajo tutir. Maisyare wemaisy, tugae rave Amisy po ayao mamaisy rapatimugo taune Apa kawasae mai, nanawirati ube sambayambe wo awaino namane rinit. Muno Po maeranande manei jeven, weye aemeno mansai rave. ⁸ Syo raura wasai, Amisy pavave ra po ayao mamaisy rapatimugo Apa kawasae mai. Weramu syo wasanajo: arono Arikainyo Vatan risyakare no mine vone so, indati rinanto vatano wanave Rinai inta mansai rako jewena e?”

Ananeneae yo vatano Parisi muno vatano po pajak ranugande

⁹ Umba Yesus po ananeneae kajinta raura. Po raura nanto vatano mansararine mai, nanawirati wo ratantona taune awa ana wo rave mamaisy yara wo vatano kajinta mansaura tantunawi. ¹⁰ “Vatane jirum yurija no Yavaro Amisy indamu ibe sambayambe. Inta pamo vatano Parisije pa, inta pamo vatano po pajak ranugande akarijo pemerinta ai. ¹¹ Vatano Parisije umaso te mumuimbe umba be sambayambe taiso pare, ‘Amisy winy, syo kove raura seo Nai weye risyamo maisyare vatano kajinta mansamaisy ramu. Syo vatane maponae ti awa doije raugavo maora ramu, muno syo anakotaro ngkakainoanive inta rave ramu, muno syo anaerere rave ramu. Muno syo kove raura seo weye risyamo syo vatano po pajak ranugande uma wato amaisy ramu. ¹² Mingguge intabo apa masyote jirum inatawandijo marore rai indamu ibe sambayambe. Muno animaisy mi syo rajjar, syo rapora abusyimbe ti syo nake intabo raunande Amisy winai.’

¹³ Weramu vatano po pajak ranugande akarijo pemerinta aije teto gwaravaimbe muno ponae peraseo no naumo warae. Yara animaumbe apa ayao kakaije rai ti po apa popane ranepat muno be sambayambe

pare, 'Amisyo winy, naemeno rinai! Weye risiyamo sya ayao kakaije ntepekan dave.' "

¹⁴ Umba Yesus po ananeneae umaso raura kakavimbe pare, "Wadanide! Arono vatane jirum umaso yakata no yavar, Amisye pare vatano po pajak ranugande opamo mamai no Amune rai, yara vatano Parisije pamo jewena. Weye are pirati po taune aijaseo titive no mine vone so, opamo Amisye indati po apaaje, yara are pirati po taune anuga raveti mpaaje no mine vone so, indati Amisye po aijaseo titive."

*Yesus po kove raugaje arikainye mai
(Matius 19:13-15; Markus 10:13-16)*

¹⁵ Vatane inta wo awa arikainyo ma-maune maugavere no Yesusa nui indamu Po aneme raugaje ntamijo mai umba Po kove raugaje mai. Weramu arono Apa arakovo utavondi aije wo ana umaso raen, uparijo vatane umaso mai, weti ware wo mansaorai. ¹⁶ Weramu Yesus po arikainye umaso mawainde, umba Po raura pare, "Vemo wapo arikainye umaso mansaorai nora, yara mapaya vayave ra ude Inai kai! Weye vatano maisyare arikainye so mansamaisy onawirati mato sisa kawasaeyo Amisye be akarive mansaije mai. ¹⁷ Syo raura tugaive: are pirati apa anave Amisye aije omamo maisyare arikainye so awa ramaisyewen, opamo tavondijo kawasaeyo Amisye be akarive maije mai ramu."

Akarijo Yahudi apa ananuge manui rave aije inta de Yesus ai

(Matius 19:16-30; Markus 10:17-31)

¹⁸ Akarijo Yahudi inta de po Yesus anajo pare, "Kuruno ko dave winy, animaisy mirati syo rave indamu syaveo kovo nuge nuganuije rai?"

¹⁹ Yesus po raura akananto ai pare, "Mbeanimaibe nyare Risy kov? Amisye bo pi kov, yara kaije nawamo jewen. ²⁰ Winyo Amisye apa ananyaowe raen to, no taiso: 'Vemo nyo anaerome rave inya, vemo nyo vatane maubaisy inya, vemo nyanaonoambe inya, vemo nyayarurijabe vatane mai jinya, muno mbeaje irati inya pe nangkoya me yai.' "

²¹ Akarijo Yahudi umaso po raura akananto Yesus ai pare, "Injayo Kurune, ananyaowe umaso mamamoritavono rai tenambe no arono ikamuramoe."

²² Yesus po akarijo Yahudi apa ayao umaso ranaun, umba Po raura ai pare, "Ana inta bo mirati wintavondijo rajie ramu. Nyo nya ananuge ramavun tenambe umba nyo ama doije raunanto vatano awa ananuge meweno mansaije mai, wea umba Amisye po kove ratayao ti ntuna mo nanyut no muniji nntiti. Wea umba nde ra ntavono Rinai."

²³ Weramu arono akarije umaso po Yesus apa ayao umawe ranaun, naije animaumbe rave weye apa ananuge manui rave.

²⁴ Yesus po aen opamo animaumbe. Wemi mbewar Po raura nanto ai pare, "Vatano apa ananuge manui rave opamo sosobe aijo tavondijo kawasaeyo Amisye be akarive maije mai. ²⁵ Tugae, vatano apa ananuge manui pare siso kawasaeyo Amisye be akarive maije mai omamo nsosobe rave, maisyare unta siso kuwayaisiyije apa uga ai weamo mamaisy ramu."

²⁶ Vatano wo Yesus apa ayao umaso ranaun wo anajo ware, "Wakoe! Maisyare omaisyamo are pirati indati kovo nuge nuganuije raunande ai? Vatane inta mamaisy rai ramu!"

²⁷ Yesus po raura nanto mai pare, "Vatane nawamo umamaisy ramu, yara Amisye bo pi mamaisy. Weye anakotaro nsosobe vatane mai omamo Amisye pi bambunin po rave aje."

²⁸ Umba Petrus po raura pare, "Injae, Nyo reansaenamoro reamotakatote rapaya vintabo to indamu reantavono Injae nai."

²⁹ Umba Yesus po raura akananto mai pare, "Syo raura tugaive: are pirati po apa yavare ndako, apa anamu ndako, apa arakovo anya, wanya nao rako, aja pe akoya me nai rako, apa arikainye nawe mapaya ti una, indamu panapatambe Amisye ai, ³⁰ indati vatano napije Amisye po kovo manakoe raugakanande ai no nugo naiso, muno arono munije ama akari indati Po kovo nuge nuganuije raunanto ai."

Yesus po apa kakaije raura nakatove mandei

(Matius 20:17-19; Markus 10:32-34)

³¹ Yesus po apa arakovo abusyinaro eane jirume mawainde mumuimbe, umba Po raura nanto mai pare, "Wadanide, soamo wamare wanta kobe no Yerusalem ratuije. Indati ana mo Arikainyo Vatane rinaurairive tenambe ti ratoe no Ayao Anawae omamo indati mamaisy rai. ³² Weti indati wo inaananto no vatano Yahudi jewene mansai indamu wanaikebe Rinai, wo inaura tantunawi muno wo inanyipube. ³³ Muno wo inanepato kaijo waije rai, umba wo inaubaisy. Weramu masyote mandei umba ikovakato no wene rai."

³⁴ Weramu Yesus apa arakove umaso wantatukambe Apa ana po raura umaso ama ntunato rajie rai, weye Amisye po rangkokaije mai.

Yesus po saumane raunanto vatano amije ntuba ai

(Matius 20:29-34; Markus 10:46-52)

³⁵ Arono Yesus pararai no munijo Yeriko, naije vatano amije ntuba inta tuna no

unanuije ama tuga panatambe. ³⁶ Po vatano wanuije manauno wanya ti udeta, weti po manajo pare, “Animaisye mi je?”

³⁷ Umba wo raura akanande ai ware, “Yesus, vatano Nasaret, Opi de to we.”

³⁸ Weti vatano amije ntuba umawe gwain pare, “Yesus, Daud apa ajavijo Winy, naemeno rinai!”

³⁹ Vatano wanya usye uparijo vatano amije ntuba umaso ai, ware, “Wimanin!” Weramu opamo gwain akoeve akato pare, “Daud apa ajavijo Winy, naemeno rinai!”

⁴⁰ Umba Yesus te kobe, Po vatane matutir pare, “Wapo vatane wato augavere.” Arono vatano amije ntuba umaso pararaijo Ai, umba Yesus po anajo pare, ⁴¹ “Animaisye mi nyare Syo raunande nai?”

Umba po raura akananto Yesus ai pare, “Injae, syare ibekero syo nuge raeni.”

⁴² Umba Yesus po raura akananto ai pare, “Syo saumane raunande nai, nami mpora da nyo ana raen. Nyanave Rinai jivae, wirati winsaumanoe.” ⁴³ Naije kobe vatane umaso amije mbar ti po ana raen kakavimbe, muno tavono Yesus ai, po Amisye ararimbe. Vatano wanuije wo ana umaso raen wo Amisye ararimbe tavon.

19

Yesus po Zakeus apan

¹ Yesus siso no munijo Yeriko panya anawadito. ² Arono naije akarijo vatano wo pajak ranugande akarijo pemerinta aije inta apa tame mirati Zakeus. Opamo apa ananuge manui rave. ³ Zakeus po ratantona pare, “Yesus opamo are pi je?” Weti pare bekero po aeni. Weramu apa tete ntumainy muno vatano wanui usaiyo aora ti po Yesus aene ramu. ⁴ Weti pansanano wusyi umba to po inyo ara raiseo indamu po Yesus aeno kavinta dei.

⁵ Arono Yesus nande no inyo umaso ama ruke rai, peraseo Po aen ti po aura seo pare, “Zakeus! Nyaje avave! Weye masyoto unumeso syare Syo napan no nya yavar.”

⁶ Umba Zakeus pavave siridijo inyoe raijakaje. Anayanambe rave, ti po Yesus augave siso no apa yavar. ⁷ Weramu vatano wanuije wo ana umaso raen, wayao ensemble ware, “Yesus po vatano ayao kakaije no aije so apan no apa yavar ti ngkove ramu.”

⁸ Umba Zakeus seo tet umba po raura nanto Yesus ai pare, “Injae, syare syo sya ananuge so raporabe rurum, syo nake inta raunanto vatano awa ananuge meweno maije mai. Muno are pirati syo aponae to ti syo apa doije inta rauga bayave, indati syo apa rasakinav akananto ai muno syo doijo kaijinta rajaro ratavon inda manui, umba syo raunanto ai.”

⁹ Umba Yesus po raura nanto Zakeus ai pare, “Masyoto unumeso Syo winye nya yavaruga nawe wasapaya wapa ayao kakaije rai, weye winyamo nya anave mamamaisyo nya aneno Abraham apa anave ramai tavon. ¹⁰ Weye Risy, Arikainyo Vatan, ride indamu Syo vatano nanawirati ugwaravainyo Amisye ai makani muno Syo mawainde indamu Syo mapaya awa ayao kakaije rai.”

Ananeneaeoyo doijo emasi (Matius 25:14-30)

¹¹ Vatano wanuije wo Yesus apa ayaowe umawe ranaun, umba Po ananeneae inta raura mai jakato. Weye arono naije Opamo pararai no Yerusalem weti vatane wo ratantona ware masyoto Amisye de be akarive mine vone so raije mararai kobe to. ¹² Yesus apa ananeneae no taiso pare, “Vatano apa tame ntiti pare poroto no munijo nggwaravainy indamu akarijo titi no naije po aijaseo be akarijo titive taune apa munije rai umba pare pakare. ¹³ Pana poroto rainy, po apa vatano wanapatambe aije abusyini mawainde, umba po doijo emasi vasye abusyini ratodijo mai, ti vatane nanentabo apa doije vasye intabo. Umba po raura mai pare, ‘Syare syoroto. Wapo doije so rave wapo rambayan wadasarirae inda manui.’

¹⁴ Umba vatano titi umaso poroto. Weramu vatano una no apa munije umaso wonayo ai, weti wo vatane inta matutir indamu wuruta wo raura akarijo titi umawe ai ware, ‘Vemo nyo vatano de wato aijaseo be akari titive reansai jinya, weye reamamo wamonayo aija.’

¹⁵ Weramu akarijo titi umaso po vatane umawe aijaseo be akarive apa munije rai. Umba naije pakare po apa vatano wanapatambe aije mawainde usai no amun indamu po manajo apa doijo po raunanto maije rai, pare ama manuije miridije nseo ma ruimaisyo?

¹⁶ Vatano panapatambe manasyine de po raura nanto apa akarije umaso ai pare, ‘Injae, doijo emasi vasye intabo nyo raunande rinaije omamo syo rasariraeya nseo abusyine rai to.’

¹⁷ Umba akarije umawe po raura nanto ai pare, ‘Ko dave! Winyamo sya vatano nyanapatambe rinai ngko dave. Ana maun inta syo raunande nai nyo raeranande kobe, weti syo munije abusyini raunande nai indamu wimbe akarive rai.’

¹⁸ Umba vatano jirumo panapatambe ai pakare akato, po raura ai pare, ‘Injae, doije vasye intabo nyo raunande rinaije omamo syo rasariraeya nseo radanije rai to.’

¹⁹ Umba akarije umawe po raura nanto ai pare, ‘Ko dave! Weti syo munije radani raunande nai indamu wimbe akarive rai.’

²⁰ Umba vatano panapatambe kaijinta pakare akato, po raura pare, 'Injae, nyo raen: nya doije vasye intabo mi so. Syo ratavano ansune vasye rai. ²¹ Syo ratavan ti ntami vayave weye syo nasyaniv. Winyamo naemeno vatane maije jeben. Vatano kaijinta wo anakere raijar, weramu winyamo nyo awa doije raija tenambe.'

²² Umba akarije umaso po raura nanto ai pare, 'Winyamo vatano mamun! Nyana-patambe rinai kobe jeben! Indati syo mangke raugaje nai mamaisyo taune nya ana ndaura umawe rai. Nyo inaura nyare vatano kaijinta wo anakere raijar, weramu risyamo syo awa doije raija tenambe. ²³ Arono wusyinoe syo doije raunande nai, weamo syare nyo raugato ntami no yavaro doije ntuna raije rai, wirati indamu ama manuije miridije nseo. Inda arono syakare, syo doije umaso raugav muno ama seano miridije nseo ratavon. Weti mbeanimaibe nyo rave tai maisye jeben?'

²⁴ Umba akarije umaso po raura nanto vatano usai no nanawije mai pare, 'Wapo doije vasye intabo umawe raugavo vatane wato aora, yara wapo raunanto vatano apa doije vasye abusyine umawe amarom tavon.'

²⁵ Vatano usai no nanawije wo raura ware, 'Injae, vemo nyo raunanto vatane wato ai nora, weye apave doije vasye abusyine rai to.'

²⁶ Umba akarije umaso po raura akananto mai pare, 'Raunanto ai kai! Weye are pirati po sya ananuge raeranande kobe, opamo syo kove raunande ai ti manui. Yara are pirati po sya ananuge raeranande kobe jeben, opamo syo apa ananuge raugavo aora.' ²⁷ Umba akarije umaso po raura apa naite mai pare, 'Wata wapo sya marova uma wonayo ibe akarive maije maugavere no rinamune so indamu wapo maubaisy.' "

Yesus aovambe no Yerusalem

(Matius 21:1-11; Markus 11:1-10; Yohanes 12:12-19)

²⁸ Yesus po ananeneae umaso raurana mewen, umba puisyewe apa arakove mai, wanya tutir to no Yerusalem. ²⁹ Arono Yesus pararai no munijo Betpage muno Betania no no pukame ama tame mi Pukamo Saitun, naije Po apa arakove rurumo javondijo aije yatutir yuisy. ³⁰ Po raura yai pare, "Wurita sisa no munijo mararai no usye wato rai, umba ipo keledaijo kamuram raokae ti nte no ratuije inta raen. Keledaije ratuije omamo vatane inta useave rai rainya nene. Ti ripo waije raneka rai indamu ipo rauga da ride no Rinui. ³¹ Vatane inta ware wo risanajo ware, 'Ibeanimaibe ipo keledaije wato raneka ti ripo raugav?' Wea umba ipo

raura ipare, 'Injajo Yesus pare bekero rai.' "

³² Yesus apa arakovo jirume umaso ija nyanta irati keledaijo kamurame inta rai, mamaisyo Apa ana daura umawe rai. ³³ Arono yo keledaije umaso raneka, vatano awave raije wo raura nande yai ware, "Ibeanimaibe irati ipo keledaijo kamurame so rapaya?"

³⁴ Umba yo raura akananto mai yare, "Injajo Yesus pare bekero rai."

³⁵ Weti yo keledaije umaso rauga ti ije no Yesusa nui. Umbawe Apa arakovo utavondi aije wo awa ansuno veano makepane rayanondijo keledaije ama akiri mona rai, umba wo Yesus aijaseo tuna rai. ³⁶ Vatano wanuije wo awa ansuno veano makepane rayanondijo unanuije yasyine rarijat. Umba Yesus panya rai ti to kobe.

³⁷ Yesus paje irati Pukamo Saitun raora, umba pararaijo Yerusalem rai. Naije Apa arakovo wanuije uma utavondijo aijoe manayanambe tenambe ti manamote manakoe wo Amisye ararimbe weye anapaporainyo Yesus po raroron tenambe mammo wo raen to. ³⁸ Wo raura ware, "Kove ngkov irati Akarijo Titi de tamo Amisye rautane Ai!"

Amisye ararimbe, Opi no no munijo ntiti, weye anuga nsaumano wansai!"

³⁹ Vatano Parisije inta una no vatano wanuije awa yasyin wo raura nande Yesus ai ware, "Injajo Kurune, reamare Nyo nya arakove wato mansaura nanto ra umanin."

⁴⁰ Yesus po raura akananto mai pare, "Sya arakove wo inararimbe kai. Yara wapore wapo vatane so mansopi, indati orame so mirati mo manigwan ti nggwain mo inararimbe!"

Yesus poyovo Yerusalem rai

⁴¹ Arono Yesus pararai ti po Yerusalem raen kobe, naije poyovo rai. ⁴² Po raura pare, "Vatano Yerusalem, ibeke dave syare wapo raen masyoto unumeso animaisye mi mo kovo saumane raugavo wasai! Risyirati syo kovo saumane raunande, weramu omamo ngkokaibe wasai ti wapantatukambe rai. ⁴³ Masyoto makareye wapa marova ude wo wasawariki muno wo yane ranari wasakiani indamu vemo inta wusya inya. ⁴⁴ Indati wapa marova wo weape wapa arikainye nawe wasaubaisy, umba wo oramo veano Yerusalem ranarije randamisiy vintabo ti ntuna no min. Anakotare umaso nande wasai weye wapantatukambe Vatano Amisye po atutir ti de wasaije Ai."

Yesus siso no Yavaro Amisye

(Matius 21:12-17; Markus 11:15-18; Yohanes 2:13-22)

⁴⁵ Naije Yesus siso no Yavaro Amisy, umba Po vatano wanamavumbe no naije mawatan. ⁴⁶ Po raura nanto mai pare, “Ayao Amisy mo ratoe mare, ‘Sya yavare omamo rawainamo yavaro sambaya.’ Weramu wapo ranigwano vatano mamun wanaonoambe awa una rai bo inta ramai dave.”

⁴⁷ Umba Yesus pananyaube no Yavaro Amisy rai masyote anteter. Weramu syeno akokoe utantuna no Yavaro Amisy raije nawe, kuruno makari mbaro Ananyao Musa raije nawe, akarijo Yahudije nawe, ubeker ware wo aubaisy. ⁴⁸ Ubeker wo unanuije rakani indamu wo aubaisy, weramu wantatukambe ware wo raveare rui, weye vatan tenambe manayanambe wo Apa ayaowe raraniv.

20

Akarije inta wo Yesus apa vambunine ranajo

(*Matius 21:23-27; Markus 11:27-33*)

¹ Masyote inta Yesus pananyaube muno Po Ayao Kovo Amisy raura vatane mai no Yavaro Amisy ama uga. Syeno akokoe utantuna no Yavaro Amisy raije nawe, kuruno makari mbaro Ananyao Musa raije nawe, akarijo Yahudi nawe ude Ai. ² Umba wo anajo ware, “Nyo raura reansai: vambunino rui mirati Nyo raveare somaisy? Are pirati po vambunine so raugaje Nai?”

³ Yesus po raura akananto mai pare, “Syare syo wasanajo tavon. Wapo raura nande Rinai rati: ⁴ Arono Yohanes Pembaptis po vatane maugasya kuvuni mana rai, Amisy pi po vambunine raugaje ai rako, vatane inta pi po raugaje ai rako?”

⁵⁻⁶ Umba syeno akokoe nawe, kurune nawe, akarijo Yahudi nawe, wanugan wayao mumuimbe. “Ranivara wamo ayaowe rasakinav wamare Amisy pi po vambunine raugaje Yohanes ai, wea indati Yesus po wansanajo veanimaibe wamanave Yohanes ai jewen? Weramu ranivara wamare vatane inta pi po vambunine raugaje Yohanes ai, indati vatane uparijo wansai ti wo orame rave wansaepar weye wanave ware Yohanes opamo anawae Amisy inta pije.” ⁷ Weti wo raura nakananto Yesus ai ware, “Reamamo reamantatukambe.”

⁸ Umba Yesus po raura nanto mai pare, “Maisyare omai ti, Risyamo syonae syo ana wapo inanao Sya vambunine raije nawe raura wasaijija.”

Ananeneae nawaisyo angguri

(*Matius 21:33-46; Markus 12:1-17*)

⁹ Umba Yesus po ananeneae inta raura vatano wanuije mai pare, “Vatane inta

po nawaisye rayare, umba po anggurije ranyum no rai. Umba po vatane inta mawainde indamu wo apa nawaisye raeranande, pare po mane ratodijo mai—wo inta raugav, muno wepo inta raugav. Umba pusyo poroto no munijo maran, tuna no ratuije noa gwaravainy. ¹⁰ No ava anggurije umawe mawit kobe, umba vatano apave nawaisye umaso rai po apa vatano panapatambe aije inta atutir indamu de no vatano wo apa nawaisye raeranande mansai, indamu wo apa mane raunanto ai. Weramu vatano uma wo nawaisye raeranande wo anepati, umba wo awatambe ti nin anem bayave yara pakato. ¹¹ Umba vatano apave nawaisye rai umawe po vatano panapatambe aije kaijinta atutir akato ti pakato. Weramu vatano wo nawaisye raeranande umawe wo anepati muno wo ave tatu-gadi, umba wo awatambe ti nin anem bayave yara pakato. ¹² Umba vatano apave nawaisye rai umawe po vatano kaijinta atutir akato, weramu wo anepati akato umba wo awatan.

¹³ Umba akarijo nawaisye umawe po raura pare, ‘Animaisy mirati syo rave? Syare syo taune sya kavo inanuga no aije atutir poroto mai. Opamo indati wanave ai jaje.’

¹⁴ Weramu arono vatano wo nawaisye raeranande umawe wo arikainye umaso aen, naije wayao vambinibe ware, ‘Sopamo apa arikainye pi so! Wade wamo aubaisy, indamu arono apa aja kakai, umba wamaura nawaisye so rai.’ ¹⁵ Umba wo arikainye umawe awatan ti pusyo no nawaisye ama akiri umba wo aubaisy.”

Umba Yesus po manajo pare, “Animaisy mirati akarijo nawaisye umawe po rave? ¹⁶ Indati de aje, po vatano wo nawaisye raeranande umawe mansaubaisy, umba po nawaisye raunanto vatano kaijinta mai jakato indamu wo raeranande akato.”

Arono vatano wanuije wo Yesus apa ananeneae umaso ranaun, naije manuga mantaun muno ujaniv, weti ware, “Weinya! Vemo mangke manakoe wato nande reansai jinya!”

¹⁷ Yesus amije no tawan irati mai, umba Po raura nanto mai pare, “Inya! Ayao Amisy somamo ama tunato raije no tai rui?”

‘Orame somamo vatano wo yavare ranari wonayo rai, ti wo ramauta vayave.

Weramu omirati oramo manasyin dave Amisy po ratayao indamu yavare rausea nteto rai mo rajar matuve.”[✠]

¹⁸ Are pirati pantukamo orame umaso rai ti tende ama vone rai, opamo pandamisy.

Muno are pirati orame so ntemaje ai ti mo akep, opamo pandamisiyi ti be kapumbe.”*

¹⁹ Arono kuruno makari mbaro Ananyao Musa raije nawe, syeno akokoe utantuna no Yavaro Amisyey raije nawe, wo ananeneae umaso ranaun, upari rave. Weti ubeker ware wo Yesus aajar no masyoto naije, weye wo raen Apa ayao po raura umawe mare onawamo maurata irati vatano mamun wo nawaisyey raeranande umawe mansai. Weramu wo aijare ramu, weye wo vatano wanuije masyaniv.

Ananyao pajak raunanto pemerinta ai (Matius 22:15-22; Markus 12:13-17)

²⁰ Akarijo Yahudi wo varore rakani indamu wo Yesus aajar, weti wo vatane inta matutir ude Ai indamu wo anyanyuti maninimbe. Vatane umaso mansamune ngkov weramu manuga mamu mamun, weye ubeker ware wo Yesus atopano Apa ana daura inta rai indamu wo aугaveta wo aunanto no Gubernur Pilatus ai indamu po mangke raugaje Ai. ²¹ Weti vatane umawe wo anajo ware, “Injayo Kurune, reamo naenamo Nyo ayao tugae obo raura muno Nya ananyao mamu nsarokir. Muno Nyo vatane inta mansamamaribe ramu, yara Nyo Amisyey apa bekere raura tugaive vatane mai. ²² Weti reamare Nyo raura reansai: Mamaisyoy wama ananyao raijamo wamo pajak ravae dako jewena e? Wamo doije raunanto Akarijo Titi Roma Kaisar ai rako jewen kaije?”

²³ Yesus po mansaen awa angkarije ntapekano mai. ²⁴ Weti Po raura mai pare, “Wapo doije vasyey inta rarorono Rinai. Arepa amune mi no no doije raije so? Arepa tame mi som?”

Umba wo raura akananto Ai ware, “Akarijo Titi Roma amune ma muno apa tame mije.”

²⁵ Umba Yesus po raura nanto mai pare, “Akarijo Titi Roma apa ma, weti animaisyey mirati po ranajo wasai, wapo raunanto ai. Muno animaisyey mirati Amisyey po ranajo wasai, wapo raunanto Amisyey ai tavon.”

²⁶ Vatane umawe ware wo Yesus atopano Apa ana daura rai no vatano wanuije mansamun, weramu unanta Apa ayao kakaije inta raije ramu. Weti umanin bayave, weye unantaive Apa ana po raura nanto maije rai.

Yesus po ayao wene muno kovakatoe raura

(Matius 22:23-33; Markus 12:18-27)

²⁷ Umba naije vatano Saduki inta ude no Yesusa nui. Wenawamo wo ratantona ware arono munijey ama akari, vatano

ugwenen to nawamo ukovakatoe ramu. Umba ubeker wo Yesus atopano Apa ana daura rai, weti wo raura Ai ware, ²⁸ “Injayo Kurune, Musa po ananyao so ratoy wansai pare, ‘Ranivara anyay inta kakai, apa arikainyey meweno ai, weamo apa rijate inta noamo po apa anamugo kaviniyey umawe raovan akato indamu ama arikainyey inta aenamo nanto teto ajayo anui uma kakaijoe apa tanoane rai jakato.’ Musa apa ananyao no tai maisyey. ²⁹ Weti vatano anyay mano kaururum ube arakobe. Awa anuijey po wanya inta raovan, umba kakai, apa arikainyey meweno ai. ³⁰⁻³¹ Ana maisyey omaisyey bo mirati no apa rijato no akajey aijey ai muno aya rijato mandeijey ai muno miridijey ndey irati rija dave kaururumey ai. Wo wanya umawe raovan tetebe weramu ukakai, awa arikainyey meweno mai. ³² Umba wanya umawe tauney ngkakai tavon. ³³ Maisyey omaisyey, arono vatano ugwenen to majasey ukovakato no munijey ama akari, wanya umawe mamu are pi apaura rai? Weyey vatano kaururum umawey wo raovan to!”

³⁴ Yesus po raura akananto mai pare, “Vatano una no mine vone so arono naisoy ubaunam. ³⁵ Weramu arono munijey ama akari, vatano Amisyey po mansaen pare umamaisyoy ukovakato no wene rai ti ukova una no munijoy nti, onawamo indati ubaunam akatoe ramu. ³⁶ Muno indati ukakai jakatoe ramu, yara maisyey naitoy Amisyey mansamai tavon. Vatane umaso onawamo Amisyey apa arikainyey wainoy mansai weyey Amisyey po majasey ukovakato.

³⁷ Muno ananyao vatano ugwenen indati ukovakato mamu Musa tauney po raroron kakavimbe. Weyey arono Amisyey arorono ai no tanamo mbadurur no randa uga umbuga kaneney rai, Musa po Amisyey awainamo anenoy Abraham, muno Isak, muno Yakob, awa Amisyey piyey. ³⁸ Ayao umaso ama tunato raijey mare aneney umaso ugwenen to weramu manawayoy tuna tawan. Maisyey omaisyey, Amisyey pamo vatano ugweneney awa Amisyey pa jewena, yara vatano ujaisyey awa Amisyey piyey. Weyey Wepirati vatan tenambe ujaisyoy Ai.”

³⁹ Kuruno makari mbaro Ananyao Musa raijey inta wo raura akanandey Yesus ai ware, “Injayo Kurune, Nya ana ndaura wato maisyey.” ⁴⁰ Muno aronoy we kobe vatane inta po Yesus anajo akatoe ramu, weyey vatane wo asyani tenambe.

Mesias opamo Daud apa ajavi muno apa akarijey piyey (Matius 22:41-46; Markus 12:35-37)

* **20:18** Orame umaso raurata irati Mesias (Yesus) ai, weti are pirati panave Ai jewen yara po awatambe, opamo indati mangke nandey ai. ✨ **20:37** Keluaran 3:6

⁴¹ Yesus po raura nanto vatano wanuije mai pare, “Wapa kurune wo raura ware Mesias opamo Daud apa ajavi piye. ⁴² Weramu Daud taune po Mesias aura pare Opamo apa Akarijo Titi piye! Weye Daud po Mesias aura no Mazmuro no taiso:

‘Amisye po raura nanto sya Akarijo Titi ai pare,

“Nyaje ntuna no inanem ngkove rai java

⁴³ Syo Nya marova maveaje utantuna no najo ate rai indamu wimbe akarive mai.”[✳]

⁴⁴ Daud po Mesias aura pare, ‘sya Akarijo Titi piye,’ yara Mesias opamo apa ajavi piye!”[†]

Wasyisyaube kuruno makari mbaro Ananyao Musa raije mai

(*Matius 23:1-36; Markus 12:38-40*)

⁴⁵ Vatano wanuije umaso udani nanto wo Yesus apa ayao daura nanto Apa arakovo utavondi aije mai ranaun pare, ⁴⁶ “Wasyisyaube irati kuruno makari mbaro Ananyao Musa raije mai! Wenawamo manayanambe wanya irati awa ansuno nggwaravainy manawadi rautan, muno manayanambe vatane ubeaje mai no pasari. Manayanambe utantuna no kursijo ngko dave rai no yavaro sambaya rai, muno manayanambe utantuna vatano awa tame ntiti matavon arono one rave. ⁴⁷ Wo wanya kavinije maponae indamu wo awa ananuge muno awa yavare raugavo maora. Muno awa sambaya nggwaravainy indamu vatane wo mansarimbe rai. Weramu vatane wato indati awa mangke manakoe, weye awa angkarije ntapekan.”

21

Wanya kavinije inta mo doije inta rauranto Amisye ai

(*Markus 12:41-44*)

¹ Yesus no no Yavaro Amisy, umba Po vatano awa ananuge manuijo maije maen wo doijo manuije raugasyo bayaijo veano doije ranugande rai. ² Muno Po wanya kavinijo ama ananuge meweno raije inta raen tavon, mo doije vasye rurum raugasyo tavon, weramu aya mangke mamaun dave. ³ Umba Yesus po raura pare, “Tugae, wanya kavinije so ama ananuge mewen dai rave, weramu ama doijo mo raugasyo no bayaije umaso aya mangke mo doijo vatano kaijinta wo raugasyo raije rakivan. ⁴ Weye vatane umawe awa ananugo manuije ama nanake wemirati wo raunanto. Yara wanya kavinije somamo ama ananuge mewen dai

rave, weramu mo ana mo rave anaisye ramavune raunanto vintabo.”

Yesus po Yavaro Amisye ama mandamisiye raura

(*Matius 24:1-2; Markus 13:1-2*)

⁵ Yesus apa arakovo utavondi aije inta wo raura ware, “Wakoe! Yavaro Amisye so ama orame ngko dave muno ama ananugo vatane wo raunanto Amisye aije so ngko dave tavon!”

⁶ Weti Yesus po raura nanto mai pare, “Indati masyoto makareye Yavaro Amisy wapo raene so, ama oramo ngko dave somamo mandamisiyi vintabo ti ntuna no min, muno inta ntuna matuve akato jewen.”

Anakotaro nande arono munije ama akari mararai

(*Matius 24:3-14; Markus 13:3-13*)

⁷ Umba Yesus apa arakove wo anajo ware, “Injajo Kurune, reamare Nyo raura reansai kakavimbe: Nandui rati umba anakotaro Nyo raura umawe mamaisy? Muno munije ama akari namije mare nande, weamo animaisye mirati indati rarorono wusyimbe?”

⁸ Umba Yesus po raura akananto mai pare, “Wasyisyaube! Vemo vatane inta wo wasaponae inya! Weye indati vatane wanui ude wo Sya tame veano taune mawain ware, ‘Risiyirati Mesias!’ muno inta ware, ‘Munije ama akarije nandea mararai rave to!’ Weramu vemo watavondijo mai jinya. ⁹ Arono rui rati wadaniv vatane wo marova rave, muno inta wo marova rave taune awa akarijo pemerinta mansai, weamo vemo wajaniw inya. Weye ana namije mammo indati nande wusyimbe, weramu munije ama akarije omamo mamai dainya nene.”

¹⁰ Umba Yesus po raura mai pare, “Munije inta marovave irati munijo kaijinta mai, muno akarijo titi inta marovave akarijo titi kaijinta ai. ¹¹ Mungkijo manakoe nande, muno nugo marore tami, muno waneno mamangke ntamijo vatane mai no rui rui vayave. Muno anainame raroron nande no naumo warae weti vatane wo raen ujani dave.

¹² Weramu anakotaro raura so nande rainyamo, indati vatane wo wasaijar muno wo wasave tatugadi weye weapamo watavondi Rinai. Indati wo wasaugaveta indamu akarijo yavaro sambaya raije wo mangke rapatimugo wasai, muno wo wasausisa no tanoano makova rai. Muno wo wasaugaveta wo anangkakivane rantuna wasai no akarijo titi muno gubernur mansamun weye watavondijo Rinai. ¹³ Somamo varoro ngkovo wana raije mi som indamu wapo inaura kakavimbe

✳ **20:43** Mazmur 110:1; Arakov 2:35; Ibrani 1:13 † **20:44** Ayao so mare Daud apa ajavi Yesus pamo be akarijo titive Apano Daud akivan.

akarije umaso mansai. ¹⁴ Weramu arono wo wasangkakivambe, vemo wasanuga mamauno wapa ayao wapare wapo rasakinavo maije rai nora. ¹⁵ Weye indati Syo wasakarikuga raveti mba dave muno Syo ayaowe raunande wasai inda wadaura vambunimbe. Indati wapa marova wo ayaowe rasakinavo wasai kakai weye umamaisye ramu. ¹⁶ Arono naije indati taune wapa ajae, muno wapa akoye, muno wapa arakove, muno wapa yavaruga indati wo wasamavun nanto wapa marova mai. Muno weapamo inta wo wasaunanto indamu wasaubaisy. ¹⁷ Indati vatan tenambe manuga mamuno wasai weye weatavondi Rinai. ¹⁸ Weramu Amisye po wasaeranande aje, weti indati wasakarivuinye wato inta aumandije ramu. ¹⁹ Wasatawandi kobe, indati wapaura irati kovo nuge nuganuije rai.”

Yerusalem ama mandamisyije raura
(*Matius 24:15-21; Markus 13:14-19*)

²⁰ “Arono wapo raen naito wanuije wo Yerusalem rawariki, tuge indati ama mandamisyije ndea mararai. ²¹ Arono naije syare vatano una no Yudea wansanan usea no unat. Syare vatano una no munijo Yerusalem ama uga rai wuje raora. Vemo vatano una no maran ude wakaisya no munijo we rai jinya. ²² Masyoto namije omamo masyoto Amisye po mangke raugaje vatano Yahudije mansai inda mamaisyo anawae wusyine awa ana wo ratoe no Ayao Amisye raije rai. ²³ Arono siurijo namije nde, wanya vavinsanai nawe, wanya wo ukame raunanto awa arikainye maije nawe, awa siurije manakoe rave, weye wansanan unajive kakai. Indati siurijo manakoe nande Israel so rai, muno Amisye apa pariye maje vatano Yahudije so mansai. ²⁴ Weti indati naite wo awa omake raugav ti wo Yahudi inta maotar, muno wo inta maugavo arove no munijo maran. Muno vatano wantatukambe Amisye ai umarovave Yerusalem rai ti wo rapinde, umba ube akarive rai java masyoto Amisye po rapatimugo maije ndea mamai to, umba maneme mpaya rai.”

Arono Arikainyo Vatane pakare
(*Matius 24:29-31; Markus 13:24-27*)

²⁵ “Arono munije ama akari, anainam inta raroron no naumo warae, no uma pe embae me tume pe mai tenambe. Muno mine vone so, mayane ama aneae indati mbumu manakokoive rave, weti vatan tenambe utantuna no mine so ujani dave. ²⁶ Ujani dave ti mansamune ngkaimudi muno manuga nseo majeve weye wantatukambe animaisye mirati nande mine so rai. Weye naume mansumugo anakotaro no raije rautan. ²⁷ Arono naije

vatano mine vone so wo Risy, Arikainyo Vatane, inaeen rino kamure rai ti syaje, ride irati Sya vambunine muno Sya kovo ntiti rautan. ²⁸ Arono wapo anakotare umaso raen, syare wasanuga mbambunin muno wasamune rampiraseo weye masyoto Amisye po wasapaya kakaije raije ndea mararai to.”

Ananeneae tume

(*Matius 24:32-35; Markus 13:28-31*)

²⁹ Umba Yesus po ananeneae inta raura Apa arakove mai pare, “Syare wapo tumo warae ratantona. ³⁰ Arono wapo Tumbina raeno seowi, wapare, ‘Indati anamuke man akato.’ ³¹ Maisyare omai tavon, arono wapo anakotaro nande umawe raen, wapare masyoto Amisye de be akarive mine vone so raije ndea mararai to.

³² Syo raura tugaive: arono anakotare umawe nde nande tenambe, indati vatano susyo naiso inta nawirati wene nande mai rainy ti una ti wo raen. ³³ Naume warae me mine so me indati yaumandi, yara Sya ayaowe mammo ntamija nuge nuganui.”

Wasyisyaube

³⁴ “Wasyisyaube! Vemo wapo one rave tutir muno wamaeno awije rai nora, muno vemo wapo wapa ana bekedaije muno wapa anakotaro nsosobe wasai obo ratantona nora, weye indati Sya masyoto syakare no mine so rai de papabe wasai. ³⁵ Masyoto naije mantukande papabe, raurata irati avirijo ntende papabe rai, ti mo vatan tenambe utantuna no mine vone so mansakep. ³⁶ Weti wasyisyaube muno wasambayambe tutir indamu Amisye po vambunine raugaje wasai indamu wasatawandi siurijo mangkeo mare nande wasaije rai no masyoto rijat. Wasatawandi kobe rave, indati wasamane jeven arono wasayai no Arikainyo Vatan rinamun.”

³⁷ Masyote anteter Yesus pananyaube no Yavaro Amisye ama uga, yara namane anteter puje Yerusalem raora umba poroto niki no Pukamo Saitun. ³⁸ Awatan ngko dave vatano wanuije wanugan no Yavaro Amisye ama uga indamu wo Apa ananyaowe ranaun.

22

Vatane wanugan ware wo Yesus aubaisy
(*Matius 26:1-5, 14-16; Markus 14:1-2, 10-11; Yohanes 11:45-53*)

¹ Yahudi awa ono wo rotijo ragije mewen daije raisye nandea mararai to. One so rawainamo Ono Paska. ² Naije syeno akokoe utantuna no Yavaro Amisye rai muno kuruno makari mbaro Ananyao Musa raije wo unanuije rakani indamu wo Yesus aubaisy. Ware wo aijar maninimbe, weye wo vatano wanuije masyaniv.

³ Umba naije Anakakai Akoe siso Yudas, apa tamo akoe mi Iskariot, anuga rai. Yudas sopamo siso irati Yesus apa arakovo abusy-inara eane rurum utavondi aije mansai. ⁴ Weti Yudas poroto no syeno akokoe utantuna no Yavaro Amisyere raije nawe, akarijo naito Yahudi wo Yavaro Amisyere ramane nawe mansai. Umba wayao vambinibe animaisyere mirati Yudas po rave ramu po Yesus amavun nanto mai. ⁵ Weti syeno akokoe muno nait akari umawe manayanambe ti wurairive ware wo doiye inta raunanto Yudas ai. ⁶ Yudas pare yombe, umba po varore rakani indamu po Yesus amavuno mansai maninimbe indamu vemo vatano wanuije wo raen inya.

Yesus apa arakove yo anaisyo Paska ratayao

(Matius 26:17-19; Markus 14:12-16)

⁷ Naije Ono Paska ndea mamaisy arono vatano Yahudi wo rotijo ragije mewen daije raisy muno wo domba inta aubaisy wo amesero Amisyere ai umba wo ama ine raisy. ⁸ Arono naije Yesus po Petrusa pe Yohanesa pe yatutir pare, "Ita ipo anaisyo Paska ratayao indamu wandaisy."

⁹ Umba ipo anajo yare, "Injae, rui rati nyare mbekero ririmo anaisyo Paska ratayao wansai?"

¹⁰ Umba Yesus po raura akananto yai pare, "Wurisisa no Yerusalem, ripare rinanta vatane inta ai, opamo po mana rawavino kiviro kopa rai ti po raugav. Wiritavono ai, ita no apa yavaro pare siso ri. ¹¹ Umba ipo raura irati vatano apave yavare rai ai ipare, 'Injajo Kurune po nanajo pare nya tanoano rui mirati Wepe apa arakovo utavondi aije nawe wo anaisyo Paska raisy rai?' ¹² Indati vatane umaso po tanoano vono warae ama uga manakoe inta rarorono isai. Tanoane umaso mamai bintabo irati meja muno ananuge kotaro isyi daije rautan. Weti ripo anaisyere ratayao wansamarom no naije."

¹³ Umba Petrusa pe Yohanesa pe yurija no Yerusalem. No ratuije nyanta irati anakotaro uma Yesus po raura we rai mamai bintabo. Umba yo anaisyo Paska ratayao ti ntuna.

Yesusa pe apa arakovo utavondi aije nawe wo anaisyo Ono Paska raisy

(Matius 26:20-30; Markus 14:17-26; Yohanes 13:18-30; 1 Korintus 11:23-25)

¹⁴ Arono uma pasyo kobe ti Ono Paska mamai to, naije Yesusa pe apa arakovo utavondi aije nawe waje utantuna tenambe indamu wisyisy. ¹⁵ Umba Yesus po raura mai pare, "Risiamo ibeke dave ituna wamisyi tenambe irati Ono Paska so rai, arono Sya siurijo mangke mana nande rainye so. ¹⁶ Syo raura tugaive: indati Syo

Ono Paska raisy akatoe ramu gao Amisyere de be akarive Apa kawasae mai no mine vone so ti wamanugan wamo Apa ono akoe raisy akato."

¹⁷ Umba Yesus po mokijo anggurije raijade, Po kove raura seo Amisyere ai, umba Po raura pare, "Wapo anggurije so raugav muno wapo ratodijo wasai indamu wadamanam. ¹⁸ Syo raura tugaive, indati Syo anggurije inta ramanam akatoe ramu gao Amisyere de be akarive Apa kawasae mai no mine vone so."

¹⁹ Naije Yesus po rotije raijade umba Po kove raura seo Amisyere ai. Umba Po raporadi muno Po ratodijo Apa arakovo utavondi aije mai, umba Po raura pare, "Somamo inanasine mi so, omamo Syo raurande wasai. Wapo rotije so raisy indamu wasaemen irati Rinai."

²⁰ Maisyare omai tavon, arono wo anaisyo Paska umaso raisya mewen, umba Yesus po mokijo anggurije raijade akato, umba Po raura pare, "Somamo Sya mavugo nsororopo wasaije mi som, mo Amisyere apa urairijo wanyine raokaisy."

²¹ Weramu vatano po inamavune pi pe wantantuna wamisyi tenambe no meja so. ²² Tugae, Risy, Arikainyo Vatan, indati ikakai mamaisyo Amisyere apa bekere rai, weramu kakaije nde irati vatano po Arikainyo Vatane inamavune ai!"

²³ Naije Yesus apa arakove wayao vambinibe ware, "Are pirati no no wama yasyine so ti, indati apa ana dave maisyare somaisy?"

Are pi panakoeve no Amisyere apa kawasae awa yasyin

²⁴ Umba naije Yesus apa arakovo utavondi aije wayao ensembe mansai ware, "Are pirati panakoeve no wama yasyin?"

²⁵ Yesus po raura nanto mai pare, "Akar-ijo titi mine so manayanambe wo awa vambunine rarorono vatane mai, muno vatano awa vambunine no maije manayanambe wo vatane matutir. Wo vatane mansantitidi indamu ubeta awa bekere rai, weramu taune wo taune mansaura ware, 'reamamo reamo vatano wanuije maeranande kobe.' ²⁶ Weramu weapamo wabemo wabe taije maisy inya. Yara vatano rui pirati panakoeve no wapa yasyin, syare po taune atantona maisyare vatano ma-maun wemaisy. Muno vatano rui pirati be akarive, syare opamo panapatambe vatane mai tenambe. ²⁷ Arakove, no mine vone so vatano panakoeve tuna pisyi bayave, muno vatano kaijinta wanapatambe ai. Weramu wamamo wansasye. Ribe akarive wasai muno syanapatambe wasai tavon.

²⁸ Vatano wanui wonayo Rinai ti wo inave tatugadi, weramu weapamo wapo

inapaya ramu, yara watawondijo Rinai tutir. ²⁹ Maisyare omai ti, Syo wasapatimu indamu wabe akarive, maisyare muno Sya Injaya po inapatimu indamu ibe akarive. ³⁰ Indati watantuna wapisyisyo inatavon arono ide ibe akarive mine vone so rai. Muno watantuna no kursijo ntiti, wabe akarive susyo Israel abusyinara eane jirume mansai tenambe.”

Yesus daura to pare Petrus indati po amamarave

(Matius 26:31-35; Markus 14:27-31; Yohanes 13:36-38)

³¹ Yesus po raura Petrus ai pare, “Simon, Simon. Anakakai Akoe po Amisyé anajo indamu varore raugaje ai indamu po wea tenambe wasatopano wapa anave Rinaije rai, maisyare muno vatane po gandum rarayan ti ama ine ransopo ama kea rai wemaisy. ³² Weramu ibe sambayambe Simon winai, indamu vemo nyo nya anave Rinaije rapaya kobe inya, yara kavinta nakato umba nyakare Rinai. Muno arono nyakare Rinai to, weamo syare nyo nya arakove so awa anave rajaseo mbambunin akato tavon.”

³³ Weramu Petrus po raura akananto Yesus ai pare, “Injae, risyamo indati syo napaya ramu! Yara syanatatayauibe indamu risuiri natavon, weti vatane wo naugave siso no tanoano makova rai, weamo ritavondi imakova. Muno vatane wo naubaisy, weamo syare rikakaijo natavon.”

³⁴ Umba Yesus po raura nanto Petrus ai pare, “Petrus, Syo raura tugaive, namane so mangkuere pana kokebe rainy, winyamo indati nyo inamamaravea susye mandei.”

Indati vatano mine vone so wo Yesus apa arakove mawatambe

³⁵ Umba Yesus po manajo pare, “Wusyinoe arono Syo wasatutir indamu wapo Ayao Kove ravovo vatane mai, Syo wasanyao syare vemo wapo doiye, ingkujawane, ajo kokome inta raugav inya. Arono naije ana inta meweno wasai rako jewena e?”

Wo raura akananto Yesus ai ware, “Jewena.”

³⁶ Umba Yesus po raura akananto mai pare, “Weramu soamo nsasye, weti wapo doiye muno ingkujawane raugav wapa unanui anya rai. Muno are nyirati nya omake meweno nai, weamo nyo nya ansuno waravainye inta ramavun dati umba nyo ama doiye veano omake inta ramavun namarom inda nyo raugav. ³⁷ Weye Ayao Amisyé ama ana mo rinaurairive omamo indati mamaisy, wemi mo ratoe no taiso: ‘Opamo ato siso vatano ukakainoanive

mansai.’” Tugae, kavinta nakato urairije umaso indati mamaisy.”

³⁸ Yesus apa arakove wo raura ware, “Injae, winyerade, wama omake mamo jiruma.”

Umba Yesus po raura akananto mai pare, “Mamai to.”

Yesus sambayambe no Pukamo Saitun (Matius 26:36-46; Markus 14:32-42)

³⁹ Yesus puje Yerusalem raora, umba poroto no Pukamo Saitun maisyare muno masyote anteter porotove wemaisy. Apa arakove utavondi Ai tavon. ⁴⁰ Arono unanta no Pukamo Saitun, Yesus po raura nanto Apa arakove mai pare, “Wasambayambe indamu vemo ana mo wasatopane mo wasakep inya!”

⁴¹ Yesus poroto gwaravaindi, umba Po apa vukane ranteter no kopa umba be sambayambe. ⁴² Pare, “Sya Injae, wimayar, syare Nyo siurije so raveto inaora. Weramu vemo wintavono Sya bekere rai nora, yara Injae nya bekere ro rai.” ⁴³ Umba naije naito Amisyé inta aroron ti de Yesus ai po vambunine raugaje Ai. ⁴⁴ Yesus anuga nseo majeve ti be sambayambe vambunimbe. Apa mamoaene ngkaputin nsorop maisyare muno mavu maje ramaisy.

⁴⁵ Be sambayambea mewen, umba Yesus pakare no Apa arakovo utavondi aije mai. Po maen unaki, weye manimaumbe yava manakea mayondi. ⁴⁶ Yesus po raura mai pare, “Wabeanimaibe wanaki? Wasea! Syare wasambayambe indamu vemo ana mo wasatopane mo wasakep inya!”

Naito Yahudi wo Yesus aijar

(Matius 26:47-56; Markus 14:43-50; Yohanes 18:1-11)

⁴⁷ Arono Yesus payaowa nene, naije vatano wanui ude, muno Yudas, opamo Yesus apa arakovo abusyinara eane rurum inta piye, po unanuije rarorono mai. Umba Yudas de Yesus ai po anu. ⁴⁸ Yesus po raura nanto ai pare, “Yudas, mbeanimaibe nyo Arikainyo Vatan rinanu? Weye nyare nyo inamavun!”

⁴⁹ Yesus apa arakovo utavondi aije wo raura ware, “Injae, nyare reamo vatane umaso maperam omake rai je?” ⁵⁰ Umba arakove inta po apa omake veano vatano panapatambe syeno titi aije amarikoamo anem ngkove raotar ti mpatimu.

⁵¹ Weramu Yesus po raura akananto mai pare, “Weinya!” Umba Po vatane umawe amarikoamo uma mpatimugoe raugakananto no akato ti nsauaman.

⁵² Umba Yesus po raura nanto syeno akokoe utantuna no Yavaro Amisyé raije nawe, akarijo naito Yahudi wo Yavaro Amisyé ramane nawe, akarijo Yahudije

nawe mai, weye ude ware wo aijar. Pare, “Risiamo vatano mamune inta pi Risye ramu. Ti wabeanimaibe wade irati omake muno kaije rautan indamu wapo inaijar?⁵³ Masyote anteter rituna no wapa yasyin no Yavaro Amisye ama uga, weramu wapo inaijare ramu. Weramu soamo varore raugaje wasai to. Wapo inaijaro namane yasyine so rai, omamo Anakakai Akoe apa ana dave mije.”

Petrus po Yesus amamarave

(*Matius 26:57-58, 69-75; Markus 14:53-54, 66-72; Yohanes 18:12-18, 25-27*)

⁵⁴ Umba wo Yesus aijar, wo augaveta no syeno titi apa yavar, muno Petrus dijat apa vavane no mai. ⁵⁵ Umba vatane wo taname raon no yavare umawe ama wanijate rai, umba utantuna rakiani, muno Petrus tuna irati matavon. ⁵⁶ Wanya arikainyo manapatambe syeno titi aije inta mo Petrus aen tuna no taname ama tuga. Taname ama vare mba nanto Petrus amune rai, weti wanya so mo amune rayasir kobe, umba mo raura mare, “Sopamo tavondijo Yesus aije inta pi sop.”

⁵⁷ Weramu Petrus po Yesus amamarave pare, “Syantukambe vatane wato ai!”

⁵⁸ Kavinta umba vatano kaijinta po Petrus aen, umba po raura pare, “Winyamo vatano tavondijo Yesus aije pi winy!”

Weramu Petrus po raura akananto ai pare, “Risya jewena!”

⁵⁹ Petrus tuna vavaijo uma amije intabo ai, umba vatano kaijinta de soowato ai pare, “Winyamo vatano Galilea, weti tugae rave winyamo vatan watavono Yesus aije inta pi winy ivae.”

⁶⁰ Umba Petrus po raura akananto ai pare, “Syantukambe nya ana ndaura so rai!” Arono Petrus payaowa nene, naije kobe mangkuere kokebe. ⁶¹ Umba Amisy Yesus sarirae po aerananto. Umba Petrus aemeno Yesus apa ana daura umawe rai pare, “Mangkuere kokebe rainy, indati nyo inamamarave susye mandei.” ⁶² Umba Petrus puje poyo dave.

Vatane wanaikebe Yesus ai muno wo anepati

(*Matius 26:67-68; Markus 14:65*)

⁶³ Naije naito wo Yesus aman wanaikebe Ai muno wo anepati. ⁶⁴ Wo amune ratavano ansune vasye rai umba wo anajo ware, “Winyamo anawae pi Winy, weamo Nyo vatano po nanepate so apa tame raura kakavimbe reansai!” ⁶⁵ Umba wo Yesus akaajian dave.

Yesus te no Anugano Akari Akokoe Yahudi mansamun

(*Matius 26:59-66, 27:1; Markus 14:55-64, 15:1; Yohanes 18:19-24*)

⁶⁶ Awatan ngko dave, akarijo Yahudi nawe, syeno akokoe nawe, kuruno Yahudi nawe, wanugan umba wo Yesus augavere te no mansamun indamu wo akanijo Apa ayao kakaije rai. ⁶⁷ Umba wo anajo ware, “Reamare Nyo raura kakavimbe reansai: Winyamo Mesiasa pi Win dako?”

Weramu Yesus po raura akananto mai pare, “Ranivara Syo raura kakavimbe wasai, weamo wapanave Inaije ramu.

⁶⁸ Muno ranivara Syo wasanajo, weamo indati wapo ana inta raura akanande Rinaije ramu. ⁶⁹ Weramu kavinta nakato umba Risy, Arikainyo Vatan, ituna no Amisyo Bambunin Dave anem ngkove rai.”

⁷⁰ Umba akarijo akokoe Yahudi wo raura tenambe ware, “Maisyare omaiti, Winyamo Arikainyo Amisye pi Winy e?”

Yesus po raura akananto mai pare, “Sya tamo wadanajo mi taune wadaura to, ti syare tugae Risy ivae.”

⁷¹ Umba wo raura ware, “Wandaniv Yesus taune po apa ayao kakaije raurawa wandanaun to pare Opamo Arikainyo Amisye pa! Weti vemo wamo vatano kaijo wo aura tantunawije mawainde akato nora, weye wamo Apa ayao kakaije umaso ranaun to.”

23

Yesus te no Pilatus amun

(*Matius 27:1-2, 11-14; Markus 15:1-5; Yohanes 18:28-38*)

¹ Anugano Akari Akokoe Yahudi umawe usea usayai, umba wo Yesus augaveta no Gubernur Pilatus amun. ² Umba naije wo Yesus angkivan ware, “Reamo Vatane so aenamo Po vatano Yahudi wanuije manuga raugabe indamu umarovave pemerinta Roma ai, muno Po mansopi inda vemo wo pajak ravae nanto Akarijo Titi Roma ai nora. Muno Po raura pare Opamo Mesias, vatano Yahudi reama Akarijo Titi pije.”

³ Umba Pilatus po Yesus anajo pare, “Winyirati Akarijo Titi Yahudije pi Win dako?”

Umba Yesus po raura akananto ai pare, “Risy ivae, mamaisyoy nya ana ndaura wato rai.”

⁴ Umba Pilatus po raura nanto syeno akokoe muno vatano wanuije mansai pare, “Rinanto ayao kakai inta rai Vatane so ai ramu.”

⁵ Weramu akarijo Yahudi umawe wo antitidi jakato ware, “Vatane sopamo Apa ayao nsiso irati vatano wanui mansai no Yudea so raita tenambe. Manasyimbe pananyaube no Galilea rai umba de no naiso, Po vatane manuga raugabe indamu ube marovave vatano Roma wasai.”

6 Arono Pilatus po awa ayao umaso ranaun, naije po manajo pare, “Sopamo vatano Galilea pa e?”

7 Akarijo Yahudi wo raura akananto ai ware, “Tugae, Opamo vatano Galilea pa.”

Weti Pilatus po apa naite matutir indamu wo Yesus augaveta no Herodesa nui, weye Herodes opirati be akarive propinsijo Galilea rai. Muno arono naije Herodes opamo de no Yerusalem rai to.

Yesus te no Herodes amun

8 Herodes anayanambe rave po Yesus aen, weye nugoenta rave to po Yesus apa ana dave muno Apa ananyaowe ranaun, weramu po aen dainy. Muno beke dave pare po Apa anapaporainye inta raen. 9 Weti Herodes po Yesus anajobe manui, weramu Yesus po ana inta raura nakatoe ramu. 10 Syeno akokoe nawe, kuruno makari mbaro Ananyao Musa raije nawe usai no naije, wo Yesus aura tantunawi rave. 11 Umba Herodesa pe apa naite nawe wanaikebe Yesus ai muno wo akaajian. Wo ansuno manawadi ngko dave inta raugasyo Ai ra po rave, mamaisyo ansuno akarijo titi po rave ramaisy, indamu wo ambaon. Umba Herodes apa naite wo auga ti wakare no Pilatusa nui. 12 Masyoto naije Herodesa pe Pilatusa pe ibe arakobe. Wusyinoo ibe marovave irati yai.

Pilatus po mangke raunanto Yesus ai indamu kakai

(Matius 27:15-26; Markus 15:6-15; Yohanes 18:38-19:16)

13 Pilatus po syeno akokoe nawe, akarijo Yahudije nawe, vatano wanuije nawe mawainde. 14 Umba po raura nanto mai pare, “Wapo Vatane so augavere rinai, wapare Opamo po vatano Yahudi wanuije manuga raugabe indamu ube marovave pemerinta Roma ai. Syo anajobe no wasamune rai to, weramu wapa ana wapo rangkivano Ai umaso mamo mamaisye ramu. Inanto ayao kakaije inta raijo Aije ramu. 15 Maisyare omai tavon, Herodes nanto ana ngkakai inta rai no Vatane so ai tavone ramu, weye po auga ti pakare irati rinai yara po mangke raugaje Aije ramu. Vatane sopamo po ana ngkakai inta rave ramu, weti mangke raugaje Ai indamu kakai weamo mamaisye ramu. 16 Weti syare syo naite inta matutir indamu wo anepati umba syo apaya vayave.” 17 Pilatus po raura tai maisy weye arono Ono Paska ndea mamaisy, po vatano Yahudi tuna no tanoano makova raije intabo apaya irati apa mangke rai, mamaisyo Yahudi awa koano Ono Paska raive rai.

18 Weramu soamo vatano Yahudi wanugan no naije ugwain tenambe ware,

“Weinya! Reamare nyo Yesus aubaisy, yara nyo Barabas apaya irati reansai.”

19 Barabas umaso pamo makova no tanoano makova rai weye tavondijo vatano wo marova rave pemerinta Roma aije mai no Yerusalem, ti po vatane inta maubai베ve to.

20 Pilatus pare po Yesus apaya, weti po ayao inta raura vatano wanuije mansai jakato. 21 Weramu vatano wanuije umawe ugwain akato ware, “Auseo sawa inyo kapite rai! Auseo sawa inyo kapite rai!”

22 Pilatus po raura maive mandei jakato pare, “Weramu ayao kakaije rui mirati Vatane so po raveti ngkakai Ai? Inanto inta raije ramu, weti syare syo mangke raugaje Ai indamu kakai omamo mamaisye ramu. Indati syo naite inta matutir indamu wo anepati umba syo apaya vayave.”

23 Weramu vatano wanuije umaso ugwain akoe akato indamu Yesus auseo sawa inyo kapite rai. Ugwain kekebe tutir, weti wo Pilatus antitidi tavondi awa bekere rai. 24 Weti Pilatus po mangke rapatimugo Yesus ai indamu kakai, mamaisyo vatano wanuije umaso awa bekere rai. 25 Muno po Barabas apaya mansai, mamaisyo awa ana wo ranajoe rai. Wepirati tuna no tanoano makova rai weye tavondijo vatano wo marova rave pemerinta Roma aije mai muno opamo po vatane inta maubai베ve to. Umba Pilatus po Yesus aunanta irati vatano wanuije mansai indamu wo aveare awa bekere omaisy.

Yesus auseo sawa inyo kapite rai

(Matius 27:32-44; Markus 15:21-32; Yohanes 19:17-27)

26 Umba wo Yesus auga ti wusya indamu wo auseo sawa inyo kapite rai. Wanyana unanuije ama yasyin umba unanta irati vatano Kirene inta ai, apa tame mi Simon. Vatane umaso pamo to no unat umba pakare no munijo Yerusalem. Wo Yesus apa inyo kapite raunanto Simon ai ti po ranawan ti dija no Yesus akiri.

27 Vatano wanuije wo Yesus arijat no akiri, muno wanya inta woyov wo arijat muno manimaumbe Ai. 28 Yesus sarirae, umba Po raura nanto mai pare, “Wanya Yerusalem weap, vemo wapoyovo Rinai nora, yara syare wapoyovo taune wasai muno wapa arikainye mansai tavon. 29 Weye masyoto makareye umba siurijo manakoe nande vatano Yerusalem wasai. Arono naije vatane wo raura ware, ‘Wanya wo arikainye inta mavaki ramu muno wo ukame raunanto arikainye inta mai ramu indati awaura kove rai weye awa arikainye meweno mai.’ 30 Masyoto naije vatane inta wo raura nanto pukame inta

rai ware, ‘Pukame! Ngkipu ra nde ra nyo reansatav, indamu vemo reananta irati siurije so rai jinya.’³¹ Risyamo ayao kakaije meweno Rinai weramu wo siurijo manakoe so raunande Rinai, weti tugae rave wapa siurije indati miridi nseowa manakoe kobe weye weapirati wapa ayao kakaije ntapekano wasai.*

³² Naito Roma wo vatano mamune jiruma yauga tavon indamu wo yaubaisyo Yesus atavon. ³³ Umba unanta no pukame inta rai, ama tame mirati Akari Pae. Umba wo Yesus auseo sawa inyo kapite rai, muno wo vatano mamune jirume umawe yauseo syawa atavon, inta sawa no anem ngkov muno inta sawa no anem ngkakai. ³⁴ Umba Yesus be sambayambe pare, “Injae, syare nyo vatane so awa ayao kakaije so rapaya mansai, weye wantatukambe awa ana udave so rai.”

Naite umawe wo aikarae rapatin indamu wo Apa ansune ratodijo taune mansai. ³⁵ Vatano wanuije usai no naije wo aen, muno akarijo Yahudi wanaikebe Ai ware, “Opamo po vatano kaijinta mapaya kakaije rai. Ranivara Opamo Mesiasye po apatimuge piye, veanimaike Po taune anasine rapaya kakaije so raije jewen?”

³⁶ Naito Roma umawe wanaikebe Yesus ai tavon, muno wo angguriyo nsaisiyine ruananto Ai indamu po ramanam. ³⁷ Umba wo raura ware, “Ranivara Winyirati Akarijo Titi Yahudije pi Winy, weamo Nyo taune nanasine wato rapaya kakaije rai.”

³⁸ Ayao wo ratoe no Apa inyo kapite ama von no taiso: SOPAMO AKARIJO TITI YAHUDI.

³⁹ Umba vatano mamune inta sawa atavone po akaajian pare, “Winyamo Mesiasa pi Winy e? Wea indati Nyo taune nanasine rapaya kakaije rai, muno Nyo irinsapaya tavon!”

⁴⁰ Weramu vatano mamuno kaijinta po raura apa arakove umawe ai pare, “Mbeanimaike nyo Amisyeye asyanive jewen? Weye winyamo mangke raugaje nai indamu ngkakai, maisyare muno Vatane so apa mangke ramaisy. ⁴¹ Winye risye rima mangke mamo mamaisy irati rima ana ngkakai rindave rai. Yara Vatane sopamo apa ayao kakaije meweno Ai.” ⁴² Umba po raura nanto Yesus ai pare, “Yesus, syare naemeno rinai arono Winy najaseo wimbe akarive.”

⁴³ Umba Yesus po raura nakananto ai pare, “Tugae, masyoto unumeso win-tavondijo Rinai no munijo nti.”†

* **23:31** Aneme somamo Yesus po raura ananeneabe pare Opamo aurata irati inyo njayaisy inta rai weye ayao kakai meweno Ai, yara vatane wato maurata irati inyo ngkanen to rai weye onawamo vatano awa ayao kakaije no mai.

† **23:43** Ayao Yunani naiso mare Firdaus, ama ine mare “munijo nti.”

Yesus kakai

(*Matius 27:45-46; Markus 15:33-41; Yohanes 19:28-30*)

⁴⁴ Masyote yasyin, uma ami abusyinarane eane jirum, ananamane nande ntamijo munijo we rai tenambe yava ama amije mandei, ⁴⁵ weye uma kaumudi ti bare ramu. Kavuratawe kaene nsawa unsanda Yavaro Amisyeye rai nsaram no warae maje ti mbe rurumbe. ⁴⁶ Naije umba Yesus gwain akove pare, “Injae, Syo inawayoye augore no naneme uga rai.” Umba anawayo karimu, kakai kobe.

⁴⁷ Nait akari Roma po ana umaso raen, umba po Amisyeye ararimbe pare, “Tugae rave, Vatane sopamo ayao kakaije meweno Ai.”

⁴⁸ Arono vatano wanuijo wanugan no naije wo Yesus apa kakaije umaso raen, naije manimaumbe rave umba unajiv. ⁴⁹ Muno Yesus apa arakove nawe, wanya utavondijo Ai no arono puje no Galilea nawe, usaiyo gwaravaimbe muno wo ana umaso raen tavon.

Yesus antuna

(*Matius 27:57-61; Markus 15:42-47; Yohanes 19:38-42*)

⁵⁰⁻⁵¹ Umba vatane inta de, apa tame mi Yusup, vatano munijo Arimatea no no Yudea. Opamo vatano anuga ngkov muno apa ana dave mamai dave. Yusup opamo ato siso Anugamo Akari Akokoe Yahudi mansai, weramu arono wo mangke rapatimugo Yesus ai, opamo tavondi awa ana wo rapatimuge umaso raije ramu. Opamo po masyoto Amisyeye de be akarive no mine vone so raije ranyuto ndei. ⁵² Yusup umaso de no Pilatusa nui indamu po Yesus anasino kopa ranajo ai. ⁵³ Umba Yusup po Yesus anasino kopa raugaje umba po raugav, po ansuno mpopero nsauman veano akepan. Umba po antuna no aipapo oramo ratotove rai. Aipapo namije mamo vatano kaijinta antuna raive rainy. ⁵⁴ Masyoto napije pamo vatano Yahudi awa masyoto wanakangkanive irati awa masyoto sambaya rai.

⁵⁵ Wanya utavondijo Yesus ai no munijo Galilea wo Yusup arijat ti wo Yesus apa aipapo raen, muno wo anasino kopa ama tami raije raen tavon. ⁵⁶ Umba wanya umaso unajiv wo manino mbovove ratayao indamu wo rauvaro Yesus anasino kopa rai. Umba siso irati masyoto sambaya rai ti umaina una vayave, mamaisyeye ananyao Yahudi rai.

24

Yesus kovakato

(Matius 28:1-10; Markus 16:1-11; Yohanes 20:1-18)

¹ Ari Minggu ama awatan ngko dave, wanya umawe wuruta no Yesus apa aipapo rai, muno wo manino mbovovo wo ratayaowe rauga tavon. ² Umba wo oramo unsanda aipapo raen raroya to. ³ Usisa no aipapo umaso ama uga, weramu unanta Amisy Yesus anasino kopa raije ramu, ⁴ weti wananepabe. Naije kobe vatane jirum aya ansune mamopo ntumbe rave, isyaiyo matavon. ⁵ Wanya umaso ujani dave, weti wo awa vukane ranteter muno wo mansamune rangkukuv no mine von. Umba vatane jirume umaso yo raura yare, "Aipapo mamopo vatano ugwenen to obo mantuna rai, weti wabeanimaibe wapo vatano kove akani no aipapo rai?" ⁶ Naisoamo norije ramu, yara kovakato to! Wasaemeno Apa ana po raura wasai no Galilea rajioe rai, ⁷ purairive pare, "Risy, Arikainyo Vatan, indati inaunanto vatano ukakainoanive maneme rai. Wo inauseo sawa no inyo kapite rai, weramu masyote mandei umba ikovakato." "

⁸ Umba wanya umaso maemeno Yesus apa ana daura umawe rai. ⁹ Weti unajivo aipapo raora, wakata wo ana umaso raura tenambe no Yesus apa arakovo abusynara eane intabo mai, muno Apa arakovo kajijinta mai tavon. ¹⁰ Naije Maria wanya Magdalena me, Yohana me, Mariajo Jakobusa apa akoya me, muno wanya kajijinta utavono mai tavon. Wena tenambe wakare wo ana umaso raura nanto Yesus apa arakovo abusynara eane intabo umawe mansai. ¹¹ Weramu wo ratantona ware wanya sonawamo waumandivea, weti wanawe ramu.

¹² Weramu Petrus seo tet, pansanan to no Yesus apa aipapo rai. Umba benanto peravo aipapo ama uga raito, po ansune vasye mpopero veano Yesus anasino kopa rakepane obo raeno ntamiji. Weti Petrus nantoive irati apa ana po raene umaso rai, umba nin ti pakato.

Yesus po anasine rarorono vatane rumo ija no Emaus yai

(Markus 16:12-13)

¹³ Masyoto napije kobe, Yesus apa arakovo javondi aije ruruma yurija no munije inta ama tame mi Emaus. Munijo Emaus ti nde no Yerusalem ama waravainye ma kilometer abusynara eane intabo. ¹⁴ Arono yanya, yayao irati Yesus apa ana nande ai muno Apa kakaije rai. ¹⁵ Weti yanya yayao ana umaso raive, umba naije Yesus taune de nande panya yatavon.

¹⁶ Weramu maisyare ana inta nsosobe yami raije wemaisy, weti yantatukambe Ai.

¹⁷ Umba Yesus po yanajo pare, "Animaisy mi ripanya ipayaube raije wato?"

Umba isyai yanimaumbe. ¹⁸ Vatane umaso inta apa tame mi Kleopas po Yesus anajo pare, "Winyamo nyo ana vatane wo rave no Yerusalem nandijawe ranaun dainya e? Vatano Yerusalem wo raen tenambe to."

¹⁹ Umba Yesus po raura akanande yai pare, "Animaisy mi?"

Umba yo raura akananto Ai yare, "Ana nande Yesus vatano Nasaret ai. Opamo anawae pa, Apa ayaowe muno Apa ana dave mamopo mbambunin dave, weti vatan tenambe manayanambe Ai muno Amisy anayanambe Ai tavon. ²⁰ Weramu syeno akokoe nawe, wama akarijo Yahudi nawe wo aunanto akarijo pemerinta ai indamu po mangke raugaje Ai, umba apa naite wo auseo sawa inyo kapite rai indamu kakai.

²¹ Manasyinoe reansanaveano Amen reamare Opirati po vatano Israel mapaya irati awa marova mai, weramu soamo jewen to. Yesus kakai no nandijawe ndea unumeso masyote mandeije mi som. ²² Muno wanya inta una no reama yasyine ude wo raura reansai to, awa ayao mo reansaveti reampaparo reansai. Weye awatan ngkove umawe wuruta no Apa aipapo, ²³ umba wakare wo raura ware unanta irati Yesus anasine raije ramu, yara wo naito Amisy inta yaen, yo raura nande mai yare, "Soamo Yesus kovakato to." ²⁴ Weti reama arakove inta wuruta no Apa aipapo umba wo raen mamaisyo ana wanya umawe wo raura we rai, weramu wo Yesus aene ramu."

²⁵ Umba Yesus po raura nanto yai pare, "Wuripamo ipantukambe rave! Ipanawe ayao anawae wo raura we rai kobe rainya nene! ²⁶ Anawae wurairive ware Mesias nanto irati siurijo manakoe rai manasyimbe, umba siso Apa kovo ntiti rai." ²⁷ Naije kobe Yesus po Ayao Amisy ama ayao mo taune aura raura kakavimbe yai no taiso: manasyimbe Musa apa ayao mo Mesias aura mansanan ava Ayao Anawae wo raura rai.

²⁸ Umba naije wararajo munijo ware uta raije rai. Umba Yesus pare panawadi tutir. ²⁹ Weramu yo amavu yare, "Nde ramu wana tenambe no reanonije so rati, weye uma pare pasyo ti kaum kobe to." Weti Yesus tavondijo yai ti siso no aya yavare ama uga.

³⁰ Arono utantuna wisyisy, Yesus po rotije inta rajjar, umba Po kove raura seo Amisy ai, umba Po raporadi po ratoro yai. ³¹ Naije kobe yamije mporar ti yo aen kakavimbe, yare, "O! Sopamo Yesusa piye." Kavuratawe Yesus aumandi kobe no aya yasyin. ³² Umba

inta po raura nanto inta ai pare, “Tugae rave, irinsanuga ranayanambe rave arono Po Ayao Amisyae ama ine raura kakavimbe rinsai no unanuije ama yasyinoe.”

³³ Umba syea kobe yakare no Yerusalem, nyanta Yesu apa arakovo utavondi aije abusyinara eane intabo mansai. Muno arakovo kaijinta wanugan tenambe no naije. ³⁴ Umba arakovo abusyinara eane intabo wo raura yaijo manasyimbe ware, “Tugae, Injayo Yesu kovakato to! Po anasine rarorono Simon Petrus ai to.”

³⁵ Umba arakovo jirume umawe yo ana nande no unanuije ama yasyin arono Yesu arorono yaijoe raura, umba yare, “Arono Po rotije raporadi, naije ririmo aen kakavimbe.”

Yesu po anasine rarorono Apa arakove mai tenambe

(Matius 28:16-20; Markus 16:14-18; Yohanes 20:19-23; Arakov 1:3-8)

³⁶ Arakove umaso wayao ana umaso raija nene, umba kavuratawe Yesu de te no awa yasyin Po anasine raroron kakavimbe mansai, umba Po raura nanto mai pare, “Saumano Amisyae maje wasai!”

³⁷ Upaparo mansai muno ujani dave, weye wo ratantona ware, “Vemo anananeme pa!”

³⁸ Umba Yesu po raura nanto mai pare, “Wabeanimaibe wajaniv? Wabeanimaibe wasanuga mantaun? ³⁹ Syare wapo inaneme muno inajoe raen dati. Risyi Yesu, rikovakatowi so! Wapo inaijar muno wapo inaen. Risyamo anananeme pi Risyae jewena. Anananeme pamo apa pae meweno ai muno anasine meweno ai, yara Risyamo sya pae no Rinai muno Sya ine no Rinai.”

⁴⁰ Umba Po aneme muno ajoe rarorono mansai. ⁴¹ Weramu wanave kobe rainya nene weye manuga ranayanambe muno unantaive rave. Weti Po raura mai pare, “Wapa anaisyae inta ntuna no soa e?” ⁴² Umba wo jiano ramere nake inta raunande Ai. ⁴³ Weti Po jiane nake umawe raugav umba Po rai no mansamun indamu wanave Ai.

⁴⁴ Umba Po raura nanto mai pare, “Arono wusyinoe rino wasatavon, Syo raura wasai to syare ana mo inaurairive ti ratoe tenambe no Ananyao Musa muno Ayao Anawae muno Mazmurije rai omamo indati mamaisyoe rai tugae.”

⁴⁵ Naije Po makarikuga raneka indamu unanta Ayao Amisyae rai. ⁴⁶ Po raura nanto mai pare, “Ayao Amisyae mo inaurairive no wusyinoe mare indati Mesias risiuri ti rikakai weramu masyote mandei umba ikovakato no wene rai. ⁴⁷ Muno mo raurairive

tavon mare Amisyae apa Ayao Kove mamo wadavovo Sya tame rai, manasyin dave no Yerusalem, umba wadavovo vatane kotaro ntuna no mine so mansai tenambe. Ayao Kove so mare are pirati sakinavo apa ayao kakaije rai muno panave Rinai, indati Amisyae po apaya ayao kakaije rai. ⁴⁸ Weapamo wapo Sya kakai yara kovakatoe raen to, weti wata wapo ravov. ⁴⁹ Indati risyare Syo ana sya Injaya po raurairiveowe ratutiro wasai. Weti wana no Yerusalem wapo ranyut ava Amisyae apa vambunine maje wasai.”*

Yesu seo no munijo ntiti

(Markus 16:19-20; Arakov 1:9-11)

⁵⁰ Umba Yesu po mansauga ti wuje Yerusalem raora umba wuruta wararaijo munijo Betania rai. Umba Yesu po aneme raijaseo ntamijo mai, Po kove raugaje mai. ⁵¹ Po kove raugaje maija jewen, umba naije kobe seo maora kobe ti to no munijo ntiti. ⁵² Weti wo vukane ranteter ubeaje Ai muno wo ararimbe, umba manayanambe rave wakare no Yerusalem. ⁵³ Umba wo Amisyae ararimbe tutir no Yavaro Amisyae ama uga.

* 24:49 Arakov 1:8

Ayao Kovo Amisy YOHANES

Ayao mo kove raunande

¹ Arono manasyin dave munijo akoe tename so ranari rainy, Yesu Kristus, apa tame mi Ayao Amisy, opamo no wusyimbe to. Wepe Amisy pe inya kava. Muno Po Injayo Amisy amaisy. ² Arono manasyin dave, Wepamo no Amisy autan to.

³ Wepi po anakotaro mine so ranari tenambe. Muno anakotare inta pora nande taune amave jeben, yara Yesu Kristus po ranari tenambe. ⁴ Kovo nuge nuganui ama ruke no irati Ai, muno kove so maisyare varo mbaro vatano una no mine so mansai. ⁵ Varo namije mbaro kaumuro mine so rai muno kaumure umaso mbambunin da mo rapamo kakai.*

⁶ Amisy po vatane inta atutir de, apa tame mi Yohanes. ⁷ Muno Yohanes de po varo namije raura kakavimbe, indamu vatan tenambe wanave. ⁸ Weramu Yohanes wepirati vare opa jewena, yara wepirati de po vare umaso raura kakavimbe. ⁹ Varo kakui mo vatan tenambe mavar nde no mine so, wepamo Yesusa pije.

¹⁰ Yesu Kristus no no mine so muno Wepi po mine so ranari vintabo, weramu vatano mine so wantukambe Ai. ¹¹ De no taune Apa munije rai, weramu Apa kawasae wonayo Ai. ¹² Weramu vatano are nawirati manuga raneka wo augav muno wanave irati Ai, onawamo Amisy po varore raugaje mai indamu Apa arikainye waino mansai. ¹³ Amisy apa arikainye waino mansai omamo maisyare vatane ibaanam ti yo arikainye mansaen omaisya jeben, muno anya beker wanya inta rai ti mo arikainye mavaki ma jeben tavon. Yara Amisy taune po vambunine raunande mai indamu Apa arikainye waino mai.

¹⁴ Yesu umaso, Apa tame mi Ayao Amisy, opamo be vatanbe to, paje ti pe wana no mine so. Muinye manakoe no Ai muno Apa ayao mamo tugae rave. Muno Apa kovo ntiti mamo reandaen to. Opamo Injayo Amisy apa Arikainyo intabo dave weti Amisy apa kovo ntiti no Ai vintabo.

¹⁵ Yohanes po Yesu aura kakavimbe. Po rawaino anamoto manakoe rai pare, "Napiso pirati syo aura syare Opamo indati po inarija de, weramu Opamo panakoe inakivan weye arono rino no mine so rainyamo Opamo no to."

¹⁶ Muinye manakoe no Ai, weti Po kove raugaje wansai tutir. ¹⁷ Amisy po Musa atutir indamu po anyayao raugaje vatane mansai, weramu po Yesu Kristus atutir indamu Po apa muinye muno Apa ayao tugae rarorono wansai. ¹⁸ Vatane wamamo inta po Amisy aeno amije rai intai ma jeben tenambe. Yara Amisy apa Arikainyo intabo wepi po Injayo Amisy aroron kakavimbe irati wansai, weye Arikainye umaso po Injayo Amisy amaisy muno be intabove Ai.

Yohanes Pembaptis po taune aura kakavimbe

(*Matius 3:1-12; Markus 1:1-8; Lukas 3:3-6, 15-17*)

¹⁹ Akarijo Yahudi una no Yerusalem wo syene muno vatano Lewi inta[†] matutir wuruta wo Yohanes anajo taiso: "Winyamo are pi winy?"

²⁰ Naije Yohanes po taune aura kakavimbe pare, "Mesias wepi risya jewena."

²¹ Wo anajo akato ware, "Maisyare omaisyamo, winyamo are pi winy? Indako winyamo Elia pi winy e?"

Yohanesa pare, "Jewen."

"Indako winyamo anawae aurairive wamo anyube wepirati win dako?"

"Jewen tavon."

²² Umba wo raura Yohanes ai ware, "Maisyare omaisyamo, taune nyo naura kakavimbe nande reansai indamu reamakata reamo raura vatano wo reansatutire mansai mamaisyo taune nyo naura rai."

²³ Naije umba Yohanes payao nande mansai, po taune aura kakavimbe maisyare anawae Yesaya po aurairive rai no taiso:

"Risyrirati vatano igwaimbe no nugo vabukane vono maninimbe syare, 'Wapo unanuije ratayao da nsarokir indamu Amisy panya rai.'"[✧]

²⁴ Naije vatano nanawirati vatano Parisije wo matutire ²⁵ wo Yohanes anajo akato ware, "Ranivara winyare winyamo Mesiasa pi winya jeben, muno Elia pi winya jeben tavon, muno anawae aurairive pi winya jeben tenambe, mbeanimaibe nyo vatane maugasya kuvuni mana rai?"

²⁶ Yohanes payao akananto mansai pare, "Syo vatane maugasya kuvuni mana rai, weramu wasayai di wato Vatano wapanatukambe ai napi pe wana wato. ²⁷ Vatano napije indati po inarija de, muno Apa waijo nowo ajo kokome rajje mamo syo rapaya kakai, weye risyamo imamaisy ramu."

* 1:5 Kaumure raurata irati anakotaro ngkakai rai, yara vare raurata irati ana ngkove rai. Raen no 1 Yohanes 1:5-10.

† 1:19 Vatano mavaki susyo Lewi onawirati wanapatambe no Yavaro Amisy rai. ✧ 1:23 Yesaya 40:3

²⁸ Anakotare so nande tenambe no munijo Betania, mana akoe Yordan ama ranijo wanamuram, nai rati Yohanes po vatane maugasya kuvuni mana rai.

Yohanes de po wansarorono Yesus apa de rai

²⁹ Siman akato Yohanes perato po Yesus aeno dei. Naije po raura nanto vatano una no naije mansai pare, “Waperata, Amisy e apa Domba Tuvan, Napi po ayao kakai mine so rapaya, de ratuije!” ³⁰ Wepirati syo aura kakavimbe syare Po inarija de, weramu Opamo panakoe inakivan weye arono rino no mine so rainyamo Opamo no to. ³¹ Wusyinoe taune risyamo syantukambe Ai tavona, weramu soamo syo aen to. Muno sya ride ti syo vatane maugasya kuvuni mana rai omamo indamu syo Napiso aro-rono vatano Israel wasai indamu wapo aen kakavimbe.”

³² Naije Yohanes po Yesus aura kakavimbe no taiso: “Syo Anawayo Vambunin raen no naumo warae maje ntuna irati Ai, maisyare insanijo punamoe amaisy. ³³ Arono naije risyamo syo aen tavone ramu ti are pi so. Weramu arono Amisy e po inatutir syo vatane maugasya kuvuni mana rai, Po raura inai to pare, ‘Vatano rui pi nyo aen Anawayo Vambunin maje ntuna Ai, Vatano napije wepirati indati po Anawayo Vambunine ratutir maje vatano wanui mansai.’ ³⁴ Muno risyi Yohanes syerato syo aen to, weti syo raura kakavimbe: Opamo Arikainyo Amisy.”

Vatano utavondi Yesus ai manasyimbe

³⁵ Siman akato Yohanes muno apa arakovo itavondi ai yano jirum una no naije akato. ³⁶ Arono Yohanes po Yesus aen panya ti de to, naije po aura pare, “Syerato Amisy e apa Domba Tuvane pi ratuije!”

³⁷ Yohanes apa arakovo javondi ai umaso yo apa ayao po raura so raraniva jewen, naije yurija javondi jirati Yesus ai. ³⁸ Yesus sakinav peravo akiri akare Po yaen javondi Ai. Weti Po yanajo pare, “Ipare?”

Umba yo raura akananto Ai yare, “Injayo Rabi, Winyamo soamo nori rui?” (Rabi ama ine mare Kurune ayao Yahudi rai.)

³⁹ Umba Yesus po raura yai pare, “Wiride rati indati taune ipo raen.” Weti javondi Ai wuruta, yo Apa norije raen. Arono naijeamo uma amije mambisy namandive, weti inya irati atavon ava ngkaumu kobe.

⁴⁰ Vatano yo Yohanes apa ayao raranive umaso weti javondi Yesus ai, inta apa tame mirati Andreas, opamo Simon Petrus apa rijata pije. ⁴¹ Naije Andreas pavave po apa anui Simon akani. Arono nanto ai, po raura pare, “Reananto irati Mesias ai to!” (Tamo Mesias mo tamo Kristus ramaisy, ama ayao mare, “Vatano Amisy e po apatimu indamu

be akari titive wansai.”) ⁴² Andreas po Simon augav to no Yesusa nui.

Yesus ami ntamijo Simon ai, umba Po raura pare, “Winyirati Simon, Yona apa arikainye pi winy. Weramu nya tame syare Syo raura mammo Kepas.” (Tamo Kepas mo tamo Petrus ramaisy, ama ine mare “oramomantantuman.”)

Yesus po Pilipusa pe Nataniera pe yawain

⁴³ Siman akato Yesus po raura patimuve pare, “Risiamo to no Galilea.” Umba to nanto irati Pilipus ai, naije Po raura nanto ai pare, “Nde ramu ntavono Rinai!” ⁴⁴ Pilipus opamo vatano Betsaida pa, maisyare omai tavon Andreas pe Petrusa pe onayamo vatano Betsaida tavon. ⁴⁵ Pilipus nanto irati Nataniera ai, umba po raura nanto ai pare, “Reananto Vatano aurairive no ayao Musa po rateo Ai muno anawae Amisy yo aurairive no wusyinoe Ai to. Wepirati Yesus, vatano Nasaret, Yusup apa arikainy.”

⁴⁶ Weramu Nataniera po raura nanto pare, “Wakoe! Vatano panakoe pamo no no Nasaret umba de rako?!”

Weti Pilipus pare, “Nde rati! Taune nyo aen dati.”

⁴⁷ Yesus po Nataniera aeno dei, naije Po aura pare, “Waperato! Vatano Israel kakui, wepi de wato. Angkarije meweno ai.”

⁴⁸ Umba Nataniera po ranajo nanto Yesus ai pare, “Injae, Nyo inaena rako?”

Yesus po raura akananto ai pare, “Arono Pilipus po nawain dainyamo, wintuna no inyo ara ama ruke rai, weramu risyeravore Syo naen to.”

⁴⁹ Umba Nataniera paparo ai ti po raura akananto Yesus ai pare, “Tugae! Injayo Kurune, Winyamo Arikainyo Amisy. Winyirati Akarijo Titi Israel pi Winy!”

⁵⁰ Yesus payao pare, “Winyanave somamo ta syeravore Syo naeno wusyimbe no inyo ara ama ruke wije! Weramu omamo anakotaro mamaun bayave. Anakotaro manakoeve mo we rakivan omamo indati nyo raen aje! ⁵¹ Syo raura tugave: Indati wapo naumo warae raen nsaneke, muno naito Amisy e usea waje ude Arikainyo Vatane rinai.”

2

Ono vaunam rave no munijo Kana

¹ Sisa masyoto mandeije rai, ono vaunam inta rave no munijo Kana no no propinsijo Galilea. Arono naije Yesus apa akoya ntavono one umaso rai. ² Muno Yesusa pe apa arakovo utavondi ai nawe mawainde utavono ono namije rai tavon. ³ Arono anggurije mewen, Yesus apa akoya mo raura nanto Yesus ai mare, “Umaso awa anggurije mewen to.”

⁴ Yesu po raura akananto akoya rai pare, “Ingko, vemo nyo inatutir nora. Weye Sya masyoto syo sya vambunine raroron ma-mai dainya nene.”

⁵ Weramu Apa akoya mo raura nanto vatano wanapatambe mansai mare, “An-imaisme mirati Yesu po wasatutir wapo rave, weamo wabeta rai vayave.”

⁶ Umba vabiu inta ntuna no yavare umaso indamu mana ramenasya raija veano vatane maneme rarondom ma-maisyo Yahudi awa koane rai. Vabiuge umaso rano kawije intabo. Vabiu intabo ama mana ramenasya rai ratoro literije rai ratusije intabo. ⁷ Naije Yesu po raura nanto vatano wanapatambe mansai pare, “Wapo mana rayatasyai irati vabiu umawe rai tutudi.” Umba wo mana rayatasyai rai tenambe ntatairi. ⁸ Umba Yesu po matutir akato pare, “Soamo wapo inta raugav indamu vatano be akarive one so rai po ramanam.” Ti wo inta raugaveta ai.

⁹ Arono po ramanam, mana umaso mammo nsiwara mbe anggurive to, muno taune tavon pamo pantukambe anggurijo so rauga di rui? (Weramu vatano wanapatambe nanawirati wo raugavo ai wo raen to.) Naije akarijo one umaso po anya pare baunam umaso awain. ¹⁰ Muno po raura nanto ai pare, “Wakoe! Wamo raembe nsiridi to mammo arono wamo one inta rave, anggurijo ama manavan ngko dave wemirati manasyin dave raunande vatane mai. Weti wo ramanam ava ware wonae udamanami to. Umba one mare mewen, weamo wamo anggurije ama ateteo manavane kobe jeben omi raunanta akato. Weramu winyamo nya ndaugav rijabe so anggurijo manavan dave! Nyo raunande ti wandamanama ngko dave!”

¹¹ Anapaporainye so Yesu po raroron no munijo Kana no no propinsijo Galilea, wemirati Apa anapaporainyo manasyin dave. Yesu apa anapaporainye so Apa vambunino ntiti rave Po raroron, weti Apa arakovo utavondi ai wo raen wanave Ai.

¹² Umba Yesu poroto no munijo Kapernaum. Muno akoya me, Apa rijate nanawe, Apa arakovo utavondi aije nanawe, wanya tenambe uta no Kapernaum. Muno masyote inta yai una no munijo namije rai.

Yesu siso Yavaro Amisy rai no Yerusalem

(Matius 21:12-13; Markus 11:15-17; Lukas 19:45-46)

¹³ Arono Ono Paska Yahudi mararai kobe, Yesu panya akato to no Yerusalem. ¹⁴ Nande no Yavaro Amisy rai, naije Po raen vatano wanui wanamavumbe no Yavaro Amisy ama usye rai. Inta wo

sapije mansamavun, domba tavon muno inta wo insani maisyare insanijo punam mansamavun tavon. Muno vatano wo doi amijo kaijinta raugavere raveano doi amijo Yahudi ranigwane utantuna tavon no naije.

¹⁵ Yesu po ana umaso raen, naije kobe Po kaijo waije raokae nake rai inta ranari Po raveano mawatan bintabo, awa domba muno sapije mautan, ti unanajibe Yavaro Amisy raora tenambe. Meja uma vatane wo ratayao ti wo doije ranigwane wemamo Yesu po rasasakinavo mansai, weti awa doije mbuvarasyo no min pusyiki tatugadi. ¹⁶ Naije Yesu po raura nanto vatano wo insani mansamavune mansai pare, “Wapo wapa anakotare so raugav wapuje Yavaro Amisy raora vintabo! Sya Injaya apa Yavare mi so! Vemo wapo ranigwano yavaro anamavune obo inta rai nora!”

¹⁷ Naije Yesu apa arakovo utavondi ai maemen irati anawae Amisy apa ayao po ratoe so rai:

“Inanuga ntento Injayo Amisy nya Yavare rai rave.

Omamo maisyare taname ntipu inanuga rai mo ranena mangkur.”[✱]

¹⁸ Umba vatano Yahudi wayao ensemble nanto Yesu ai ware, “Winya varore mi so ma jewena, indamu Nyo reansaveare so-maisyere ramu! Weti Nyo anapaporainye inta raroron inda reamo Nya vambunine raen dai!”

¹⁹ Yesu po raura akananto mansai pare, “Wapo Yavaro Amisy so randamisy, weramu masyote mandeij Risyo raugakaseo ntet.”

²⁰ Naije vatano Yahudi wo raura akananto Ai ware, “Tume tename jirum eane kaujentabo umba Yavaro Amisy so ranarija mewen. Weti winyare Nyo ranarija meweno masyote mandeija bo yai, mamaisyere ramu.”

²¹ Weramu Yavaro Amisy uma Po raura somamo taune anasine mirati Po raurata rai. ²² Maisyare omai ti, arono Yesu kowakato no wene rai, Apa arakovo utavondi ai mansaemen akato Apa ana po raura umawe rai. Muno wanave irati Ayao Amisy muno Yesu apa ana po raura rai.

Yesu po vatan tenambe mansaena nto no manuga rai

²³ Yesu no no Yerusalem arono Ono Paska rave, naije vatano wanui rave wanave Ai weye po anapaporainye raroron. ²⁴ Weramu Yesu taune pamo panave mansai ramu, weye Opamo po vatane mansaen bintabo. ²⁵ Vatane inta po anakotaro no no vatane manuga raura kakavimbe nanto Yesu ai mammo jeben kai, weye taune Pamo po raen bintabo to.

3

Yesusa pe Nikodemusa pe yayao

¹ Vatano Parisije inta apa tame mirati Nikodemus, opamo akarijo vatano Yahudi inta pije. ² Namane inta de no Yesusa nui, naije payao nande Ai pare, “Injayo Kurune, reamo naen Winyamo Amisyé po natutir, weye are pirati po anapaporainye inta rarorinare Nyo rave ramaisy, Opamo Amisyé tavondi ai pije.”

³ Yesu po raura akananto ai pare, “Syo raura tugaive: Vatane inta pare ato siso kawasaeyo Amisyé be akarive maije mai, weamo ano akato wanyimbe, wea umba siso.”

⁴ Naije Nikodemus pare, “Vatano panakoe to umba ano wanyimbe tai rui? Indako pakato no akoya ranobone rai jakato umba avaki wanyimbe akato rako?”

⁵ Naije Yesu po raura akananto ai pare, “Syo raura tugaive: Vatane inta pare ato siso kawasaeyo Amisyé be akarive maije mai, weamo avaki mana rai muno Anawayo Vambunine rai wusyimbe rati. ⁶ Vatane wansaeno wansanasino kopa so raijamo wama vatan anui nawirati wo wansavaki. Yara wama kovo wamo raeno wansamije rai jeweno wem omamo Anawayo Vambunin wemirati mo wansavaki rai. ⁷ Maisyare omai ti, arakovo Nikodemus, vemo mpaparo nai nora, arono Syo raura syare wea tenambe wasavaki jakato. ⁸ Ovare po nuge ramawisy no rui rui vayave. Anamuare bo wamo ranaun, weramu wamantukambe apa no rai ti de rai muno pare poroto ri rui. Weti Anawayo Vambunine mo vatane mavaki omamo maisyare ovare amaisy. Wamo Anawayo Vambunin raeno wansamije rai ramu, weramu tugae Mo kove raugaje vatane mai mamaisyo Ama bekere bo rai.”

⁹ Naije Nikodemus po Yesu anajo pare, “Maisyare omai ti, anakotare somamo indati nandearé rui?”

¹⁰ Yesu po raura akananto ai pare, “Winyamo kuruno akoe no munijo Israel. Mbeanimaibe winanto anakotare so rai jewen? ¹¹ Syo raura tugaive: Ana reamo raene mirati reamo raura wasai muno ana reamo raeno reansamije rai wemirati reandaura kakavimbe wasai. Weramu weapanave raije ramu. ¹² Umawe Syo ana nande no mine so inta raura kakavimbe wasai to, weramu wapanave rai jewen. Wabeare so, Syo ana nande no munijo ntiti inta raura, weamo indati wapanave rai jewen kobe. ¹³ Vatane inta pana to no munijo ntiti rai rainy. Weramu Risyirati Arikainyo Vatan syo anakotaro munijo ntiti raen tenambe, weye ino no munijo ntiti syaje no mine so.

¹⁴ Maisyare wusyinoe Musa no no nugo vabukane vono maninimbe po tembaga ranari tawaive po ratuga seo inyo inta rai, maisyare muno omaisy Risy, Arikainyo Vatan, indati inajaseo no inyo rai tavon, ¹⁵ indamu vatano are pirati panave Rinai, indati apaura irati kovo nuge nuganuije rai.”

¹⁶ Weye Amisyé muiny irati vatan tenambe mansai no mine vone so wirati Po apa Kavó intabo dave aunande indamu vatano wanave Aije indati ukakai awa ayao kakai raije jewen, yara awaura irati kovo nuge nuganuije rai. ¹⁷ Weye Amisyé po apa Kavó atutir de mine so rai indamu Po mangke raugaje vatano mine so mai mamó jewena, yara indamu Po mapaya awa ayao kakaije rai.

¹⁸ Vatano wanave Amisyé apa Kavó ai, indati mangke raugaje mansai jewen. Yara vatano wanave Ai jewen, awa mangke mamó Amisyé po rapatimu mansai to weye wanave Apa Kavó intabo dave Aije ramu. ¹⁹ Amisyé po rapatimu pare Po mangke raugaje mai weye Apa Vare nde mine so rai to, weramu vatane ubekero kaumure bo rai rave, weye awa ana udave ngkakai muno mamun. ²⁰ Vatano are pirati po ayao kakaije rave, opamo anuga mamuno Amisyé apa Vare umaso rai. Ponae de Vare umaso rai indamu vemo apa ayao kakai erananta raen kakavimbe inya. ²¹ Weramu vatano po Amisyé apa ayao tugae obo rarijat, weamo de Vare umaso rai indamu apa ana po rave raen kakavimbe omamo maisyó Amisyé apa bekere rai.

Yohanes Pembaptis po Yesu aura kakavimbe

²² Arono naije Yesusa pe apa arakovo utavondi ai nawe wuruta no propinsijo Yudea. Yesu no no Yudea masyote kavinta yai muno Apa arakove matavon. Muno Po vatane maugasya kuvuni mana rai.

²³ Weramu Yohanes pamo po vatane maugasya kuvuni mana rai tavon no munijo Aion mararai no Salim, weye mana manui rave no naije. Vatano wanui ude indamu Yohanes po maugasya kuvuni mana rai. ²⁴ Arono naije Yohanes pamo ausiso tanoano makova rai rainy.

²⁵ Yohanes apa arakovo utavondi ai nanawe, vatano Yahudi inta pe, wayaowi jirati koano vatane wo maneme, majoe rarondome rai. ²⁶ Wuruta no Yohanesa nui muno wo raura nanto ai ware, “Injayo Kurune, winyamo ta naemeno Vatano nandija po Injae natavon no mana Yordan we Aija e? Arono naije Injae nyo arorono reansai. Vatano napije soamo Po vatane maugasya kuvuni mana rai tavona, weti

vatan tenambe uta irati Ai. Abo! Indati Po nakivan aje!”

²⁷ Yohanes po raura akananto mansai pare, “Anakotaro rui vayave vatane awaura rai mamō Amisyē wēpi po raunande. ²⁸ Taune weadaniv syo raurawa wadanaun to syare, ‘Risiamo Mesias wēpi risya jewena. Yara rinatutir syo usye raugavo Ai.’ ²⁹ Syo ananeneae inta raura wasai: Arono anya pare baunam, opirati po apa wanya raugav. Weramu apa arakov napirati po ono vauname ratayao amaram, tet po anyuto dei. Muno opamo ananibe rave arono daniv anya bauname so de nande to. Maisyare omaisy risiamo inananibe rave weye syo ranaun Mesias de to, Wepirati syo vatane matayao indamu wanave Ai piye. ³⁰ Indati vatano utavondi Yesu ai awa wanui miridije nseo, yara vatano utavondi rinai awa wanui makaje ti mamaun.”

Yesu no no munijo ntiti umba paje

³¹ Yesu opamo no vombe rave no warae umba de, weti Opamo titi vintabo vatane makivan. Vatano mine so nawamo awa munije me awa anakotaro uaura omamo mine so ama ma. Weramu Vatano no no munijo ntiti umba paje Opamo po vatan tenambe wansakivan. ³² Yesu taune po munijo ntiti raen muno taune Po Amisyē apa ayaowe raranivo amarikoame rai. Weramu arono Po anakotare umaso raura kakavimbe, vatane wanave raije ramu. ³³ Yara vatano rui pirati panave Apa ayao rai, weamo po raen Amisyē pamo apa ayao mbe tugaive. ³⁴ Weye Yesu wēpi Amisyē po atutir weti Apa daura mamō Amisyē apa bom, weye Anawayo Vambunin raugasyo Ai ti Mo ausuru tenambe.

³⁵ Injajo Amisy muiny irati Apa Arikainye ai, weti Po anakotaro rui vayave raunande Ai vintabo. ³⁶ Vatano are nawirati wanave Arikainyo Amisy napije ai, weamo awaura irati kovo nuge nuganuije rai. Yara vatano ponae beto irati Ai, weamo apaura kovo namije rai ramu, yara Amisyē apa pari mangke Po raugaje aija nuge nuganui.

4

Yesusa pe wanya Samaria me yayao

¹ Vatano Parisi udaniv Yesu apa vatano po maugasya kuvuni mana rai muno utavondi Ai wanui rave Yohanes apa makivan. ² (Weramu Yesu taune po maugasya kuvuni mana rai ramu, yara Apa arakovo utavondi aije obo nao wo rave.) ³ Yesu po ana umaso ranaun, naije Po Yudea rapaya nara pakare no Galilea.

⁴ Apa unanui anya to no Galilea mamō siso no propinsijo Samaria wusyimbe rati. ⁵ Naije Yesu pui yava nanto munije inta

rai no Samaria umaso rai, ama tame mirati Sikar. Munijo namije mararai mino aneno Yakob po raunande apa kavo Yusup ai no wusyinoe rai. ⁶ Mino namije mirati aneno Yakob apa mana ami po rawae norije. Yesu panyawa mayondi, weti nanto tuna no mana ami umaso ama tuga rai. Arono naijeamo uma amije indati nanto no masyote yasyin.

⁷⁻⁸ Yesu tuna no naije, weramu Apa arakovo utavondi ai nanawamo wuruta wo anaisyē ramavun no munijo mararai namije rai. Umba wanya Samaria inta nde mo mana rawavin. Umba Yesu po ranajo pare, “Syare nyo mana inta raunande Syo ramanam.”

⁹ Naije wanya Samaria umaso mayao akanande Yesu ai mare, “Injae, Winyamo vatano Yahudi muno risiamo vatano Samaria. Umba mbeanimaibe Nyo inanao mana rai?” (Weye vatano Yahudi nanawamo wayao nande vatano Samaria mansai ramu.)

¹⁰ Umba Yesu po mana umaso raura ananeneaebe akananto wanya umaso rai pare, “Syō mana ranajo nai, weramu raniwara winyo Amisyē apa kovo pare Po raunande naije raen datire, muno winyo rinaen kakavimbe ratire, indati winyirati nyo mana ranajo Rinai muno indati Syo mana mo kove raugaje raunandeo nai.”

¹¹ Wanya namije mo raura akanande Yesu ai mare, “Injae, Winya kapijo mana rayate meweno Naija, muno mana somamo masyo ravea. Weti mana uma mo kove raunande weti ndaura wato mamō Nyo rawavin no rui? ¹² Wusyinoe reama aneno Yakob po mana ami po rawae so raunande apa ajavi reansai. Taune po mana ramaname rauga di so muno apa arikainye nao tavon muno apa maero po makume nao tavon. Injae, mbeanimaibe Winyo rakaraeya nyare Winyirati nyanakoe Nyo reama aneno Yakob akivan?”

¹³ Yesu po ananeneae inta raura nanto rai jakato pare, “Vatano wo mana wato ramanam indati mansawa ngkangkamandi akato. ¹⁴ Yara vatano wo mana namirati Syo raunande ramanam, indati mawa ngkangkamandi akatōe ramuga nuge nuganui. Weye mana namirati indati Syo raunande namije maisyare mana amijo njai tutir kobe no vatane anuga raija nuge nuganui.”

¹⁵ Naije wanya umaso mayao akananto Ai mare, “Injae, syare Nyo mana ndaurawe inta raude syo ramanam, indamu inawa ngkangkamandive akato jeben muno indamu vemo syakare syo mana raugabe akato no so inya.”

¹⁶ Umba Yesu pare, “Nyakato nyo nya anya awain umba ipakare no so.”

17 Umba wanya umaso mo raura akananto Yesus ai mare, “Risiamo sya ana waino anya inta ai ramu.”

Umba Yesus po raura akananto rai pare, “Nya ana nyo raura wato mo ramai dave. 18 Weye winyamo nyo anya radani maovan to, muno anya soamo pe wirinakava opamo nya ana piye pa jewena. Nya ayao umaso mammo mo ramai dave.”

19 Umba wanya umaso mare, “Injae, soamo syo naen Winyamo anawae Amisyie inta pi Winy. 20 Kawasae Samaria reamamo reama aneno wusyine ubeaje Amisyie ai ri rati pukame naiso. Weramu, Injae, Nya kawasae Yahudi weapamo wapo raura wapore Yerusalem obo mirati vatane ubeaje Amisyie ai.”

21 Umba Yesus po raura rai pare, “Ingkoe, syare nyanave Sya ana syo raura so rai: Indati masyote nde nande arono vatane ubeaje Amisyie ai, weramu indati unate so ma jewen, Yerusalem tavona jewen. 22 Vatano Samaria weap, wabeaje napirati wapo aene jeweno we ai. Yara vatano Yahudi reamamo reambeaje Napirati reamo aeno we Ai. Weye Vatano po vatane mapaya awa ayao kakaije rai pamo Yahudije pa. 23 Masyote nggwaravainy akatoe ramu, yara soamo nde to arono Anawayo Vambunine mo vambunine raugaje vatane mansai inda ubeaje Injajo Amisyie aijo tugaive, weye wenawirati ubeaje Ai mamaisyo apa bekere rai. 24 Amisyie pamo anawayoe pa; anasine meweno Ai. Maisyare omai ti, vatane ware ubeaje Amisyie ai inda mamaisy, weamo Anawayo Vambunine mo vambunine raugaje rati muno ubeaje Aijo tugaive manuga ntenami rautan.”

25 Wanya namije mo raura mare, “Syo raen Mesias, Opi awainamo Kristus, indati pare de. Ranivara de to, naije Po anakotare raura kakavimbe wansai tenambe.”

26 Yesus po raura kakavimbe pare, “Risyi syayao nande nai Risiamo Mesias opi Risy.”

27 Arono naije Yesus apa arakovo utavondi ai wakare. Uppaparo mansai weye Yesusa pe wanya inta me yayao. Wo ratantona ware ana rui wanya so mo Yesus anajo rai? Muno veanimaibe Po raura nande rai? Weramu arakove inta bambunin da po anajo ramu.

28 Umba wanya umaso mo ama vabiui umawe rapaya ti ntami, yara nin ti makato mo raura vatano una no munijo nanawije mansai mare, 29 “Syare wade ra wapo Vatano napi po risya anakotaro syo raveve no wusyinoe raura kakavimbe nande rinai tenambeye aen dati! Risyo akarae syare

indako vatane sopamo Mesias* wepi so dako?” 30 Umba vatano nanawije wuje awa munije so rai muno wuruta no Yesusa nui.

31 Arono naije Yesus apa arakovo utavondi ai wo anajo indamu pisyisy, ware, “Injajo Kurune, Nyo anaisyie raisy!”

32 Weramu Yesus po ananeneae raura akananto mansai pare, “Anaisyie inta mi no Rinai, weramu weapamo wapantatukambe rai.”

33 Naije Apa arakove umaso taune wo taune mansanajo vambinibe ware, “Vatane inta wo anaisyie inta raugavo amaroma rako?”

34 Umba Yesus po raura akananto mansai pare, “Sya anaisyie raurata irati itavondi Amisyio po inatutire Apa bekere rai, muno Syo Apa anakero po raugaje Inai raija damu mewen. 35 Weapa ana wadaura inta mammo wapore embae mambisyamo wapa anaisyio wapo rayanyume matu to, umba wapo ama ine ranugan. Weramu Risya syo raura nande wasai mammo syare waperata: nawaisyie matu to, weti soamo anatatayaube ranugane rai! Anare idaura mammo vatano wanui wato, nanawirati wanatatayaube manuga rai indamu wanave Rinai. 36 Weti vatano wo ama ine ranugan onawamo Amisyie pi po mavae. Muno awa ino wo ranugane mammo vatano ude wanave ti ukova nuge nuganui. Indati vatano wo anare kami rangkiki muno vatano wo ama ine ranugan, wenanao tenambe mananibe kava. 37 Weti ayao varije somamo tugaie rave: ‘Inta wo anare kamije rangkiki muno kajinta wo ama ine raugav.’ 38 Syo wasatutir wata wapo nawaisyie ama ine raugav. Taune wapo nawaisyio namije raijare jewen, yara vatano kaije wo rayare muno wo anare rayanyun dai to. Yara syare weapamo wata wapo ama ine raugav ngkovo wasai. Tugaie, vatano kajinta wo ayao Amisyie rayanyumo vatane wato manuga rai to, weramu weapamo indati wapo ama ine raen arono unande wanave irati Rinai.”

39 Vatano Samaria una no munijo namije wanui wanave Yesus ai weye wanya umawe mo raura mansai mare, “Yesus po sya anakotaro syo raeve no wusyinoe ratodi rinai tenambe.” 40 Maisyare omai ti, vatano Samaria umaso unande Yesus ai, wo amavu indamu pe una. Weti Wepe una no naije masyote rorum. 41 Muno vatano wanui rave wanave weye Yesus taune po manyao. 42 Vatano wanui nanawije wo raura nanto wanya umawe rai ware, “Arono wusyini reamo winya ana nyo Yesus aura obo ranaun. Weramu naisoamo

* 4:29 Tamo Mesias mo tamo Kristus ramaisy, ama ayao mare, “Vatano Amisyie po apatimu indamu be akari titive wansai.”

taune Po raura nande reansai reandaraniv muno reamanave rai: Yesu so tugaeyamo Akarijo po vatano mine so mapaya awa ayao kakaije rai piye.”

Yesu po saumane raunanto arikainyo gwanen inta ai no munijo Kapernaum (Matius 8:5-13; Lukas 7:1-10)

⁴³ Yesu no no munijo Sikar masyote rurum, naije akato poroto no Galilea. ⁴⁴ Apa ayao po raura we no taiso: “Anawae Amisyeto no munijo maran, weamo vatane wanave ai. Yara pakato no taune apa munije raijamo vatane wo aranive ramu.”⁴⁵ Arono Yesu siso no Galilea, vatano Galilea manayanambe ti wo augave siso, weye arono Ono Paska umawe una no Yerusalem muno Yesu apa anapaporainyo po raroron no naije mamomo wo raen tenambe to.

⁴⁶ Naije akato Yesu pakare no munijo Kana no Galilea, wemirati munijo wusyinoe Po mana ravea mbe anggurive. Munijo namije vatano po anakere raijar no pemerinta inta no naije, apa arikainye pamo gwanen no munijo Kapernaum. ⁴⁷ Vatano pemerinta umaso daniv Yesu no no Yudea de nande Galilea rai to, weti poroto no Yesu nui. Umba po anajo indamu poroto no apa munijo Kapernaum indamu Po saumane raugaje apa kavo napirati gwanena pare pararai kakai kobe ai.

⁴⁸ Yesu po raura nanto vatano pemerinta umaso ai pare, “Kawasae weapamo Syo wasaen damu wapa anave mamai dainy! Wapare wapo anapaporainye raeno wasamije rai, wea umba wapanave. Weramu Syo wasaen wapanave Rinai tugaive rainy.”

⁴⁹ Vatane umaso payao akato pare, “Injae, winde paep, sya arikainye kakai rainyne so.”

⁵⁰ Naije Yesu po raura akananto vatane umaso ai pare, “Nyoronto kai, nya arikainye sauman to.”

Vatane umaso panave Yesu apa ayao po raura so rai, weti poroto kobe. ⁵¹ Pui yava unanuije ama yasyin, naije apa vatano wanapatambe aije ude nande ai. Umba wo raura ai ware, “Injae, nya arikainye sauman to!”

⁵² Naije po manajo pare, “Weti uma ami ruimai dave sauman?”

Umba wo raura ware, “Namanawe uma ami intabo masyote yasyin, arikainye anakea mamokane raumandi ai.”

⁵³ Naije ajae napiso aemendi pare, “Syo raenamo uma ami wapo raura wato tavon, Yesu po raura nande pare, ‘Nya arikainye sauman to.’ ” Weti ajae umaso muno apa yavaruga tenambe wanave Yesu ai.

⁵⁴ Anapaporainye umaso mamomo anapaporainyo jirum Yesu po raroron no Galilea arono puje no Yudea umba de no Galilea.

5

Yesu po saumane raugaje vatano gwanen inta ai arono masyoto sambaya rai

¹ Naije akato ono akoe Yahudi inta ama masyote mamaisy, weti Yesu poroto no Yerusalem. ² No Yerusalem, mararai no Unsanda Domba rai, waro kampo inta ntuna no naije, ama tame raura ayao Yahudi raijamo Betesda. Muno ama repone radani no ama tuga rai. ³ Repone radani umaso vatano ugwanen wanui rave unaki rai: inta nawirati mamije ntuba, muno inta nawirati majo mayondi muno tunaive. Vatane umaso una mana umaso ranyuto ama mansumu rai. ⁴ Weye intanamo naito Amisy inta paje pasyo waro umaso rai, weamo mansumu. Muno vatano ugwanen rui pi pasyo wusyimbe mana umaso rai arono mansumu, weamo apa wanene nsauaman. Weti apa wanene kotaro rui vayave, nsauaman kobe.

⁵ No ratuije vatane inta pamo gwanembeve tume tenamara eane abusyine eane kaudandei. ⁶ Yesu perato po vatane umaso aen opamo apa wanene nggwaravain dave to. Naije Yesu po anajo aje pare, “Mbekero nsauamane raija rako?”

⁷ Vatano gwanene umaso po raura akananto Ai pare, “Injae, arono mana mansumu, ibeker vatane inta po inajaseo po inaugasya mana rai, weramu vatane inta po inaugave ramu. Arono syare taune syoroto syasyo mana rai, weamo vatano kaijinta pavave pasyo wusyimbe to, ti imamaisy ramu.”

⁸ Naije Yesu payao aje ai pare, “Mbe-seo! Muno nya tanije rakapan indamu nyanya!” ⁹ Kavuratawe vatane umaso saumano anawadive kobe. Po apa tanije rakapan po raugav muno panya kobe.

Anapaporainye so Yesu po rave no Yahudi awa masyoto sambaya rai. ¹⁰ Maisyare omai ti, akarijo Yahudi wayao nanto vatano uma saumane so ai, wo raura ware, “Unumeso mamomo masyoto sambaya mije, weti wama ananyao mare vemo nyo nya tanije rakapan ndauga nora!”

¹¹ Weramu vatano napije po raura akananto mansai pare, “Vatano po saumane raugaje inai Wepi po inatutir pare syo sya tanije raijaseo inda syo raugav syanya.”

¹² Weti wo anajo akato ware, “Are pirati po natutir nyo nya tanije raijaseo muno nyanya?”

¹³ Weramu vatano uma saumane wep pantatukambe Vatano are piye, weye aumandi vayave no vatano wanui nanawije awa yasyine rai.

¹⁴ Naije akato Yesu pakananto irati vatano uma saumane so ai no Yavaro Amisy ama uga rai, muno payao nanto ai pare, “Soamo winsauman to. Vemo nyo ayao kakaije rave akato nora indamu vemo nanto siurijo manakoe rai jakato nora.”

¹⁵ Umba vatane umaso poroto po raura akarijo Yahudi mansai pare, “Yesu wep-irati po saumane raugaje rinai.”

¹⁶ Maisyare omai ti, akarijo Yahudi manuga ngkakaijo Yesu ai ti ubeker wo ave tatugadi, weye ware Po awa ananyao rakanyoandi arono Po saumane raugaje vatane mai no masyoto sambaya rai.

¹⁷ Weramu Yesu po raura nanto mansai pare, “Sya Injaya po apa anakere rajjar tutira unumeso. Muno ri tavon Syo Apa anakere rajjar tutir.”

¹⁸ Yesu apa ayao so mo akarijo Yahudi maveti upari rave ti wo unanui rakani indamu wo Yesu aubaisy. Upari weye Yesu po Yahudi awa ananyao rakanyoandi, namirati mare vemo anakere rajja no masyoto sambaya rai nora. Weramu obo rai jeben, yara upari weye Yesu po taune aura pare Amisy opamo taune Apa Aja piye, ama ayao mare Yesu opamo po Amisy amai tavon.

Yesu apa vambunine

¹⁹ Yesu po raura nanto vatano Yahudi nanawije mansai pare, “Syo raura tugaive: Risyi Arikainyo Amisy syo anakere inta rajjaro taune Sya vambunine rajje ramu. Risyamo syo Injaya apa ana daijare raen muno Sya ana idaijare ma ntaavondi Injaya apa rai. Weye animaisy mirati Injaya po rajjar omirati Apa Arikainye risy syo rajjar. ²⁰ Weye Injaya muiny irati Apa Arikainye rinai, weti Po apa anakere raroron irati Rinai tenambe. Tugae, masyoto rijat indati Injaya Amisy po apa anakero manakoe rave inta rarorono Rinai jakato ti mo Sya anaporainye umawe rakivan, weti wapo raen wapaparo wasai. ²¹ Injaya Amisy pamo po vatano nanawirati ugwenen to maijasea ukovakato muno Po kovo nuge nugani raunanto irati mai. Maisyare omai tavon, Apa Arikainye risy syo kovo namije raunanto irati vatane mansai tavon, maisyosyo Sya bekere rai.

²² Injaya po mangke raugaje vatane mai vayave ramu, yara mangke rapatimu mamu Po raugaje no Apa Arikainye rinai indamu Syo rajjar. ²³ Wirati indamu vatane ubeaje irati Apa Arikainye rinai maisyare muno ubeaje Injaya ai wemaisy. Weramu vatano ubeaje Arikainyo Amisy ai

jeben, weamo ubeaje Injaya wepi po Apa Arikainye rinatutire Ai tavone ramu.

²⁴ Sya raura tugaive: Vatano po Sya ayao so ranaun ti beto rai muno panave irati Amisy po inatutire Ai, apaura kovo nuge nuganije rai. Opamo indati mangke raugaje ai ramu, yara paya wene rai to muno siso irati kove rai. ²⁵ Syo raura tugaive: Masyote nggwaravainy akatoe ramu yara soamo nde to arono vatano ukakai to wo Arikainyo Amisy rinanamoto ranaun kakavimbe. Wea umba vatano wo inaraniv ti utavondi Rinai nanao awaura kove rai. ²⁶ Weye Injaya pamo kovo nuge nugani ama ruke piye, muno Po raugaje Apa Arikainye rinai, weti Apa Arikainye risyamo kove ama ruke pi Ri tavon. ²⁷ Mangke rapatimu mamu Po raugaje Rinai indamu Syo rajjar weye Risyirati Arikainyo Vatan. ²⁸ Vemo wapaparo wasai anakotaro raura so rai jinya! Weye ama masyote mamu indati nde nande arono vatano wene nde mansai to nanawamo wo inanamote ranaun. ²⁹ Naije umba wuje no awa aipapo rai. Vatano awa ana udave ngkov indati ukovakato no wene rai muno awaura kovo nuge nuganije rai. Yara vatano awa ana wo rave ngkakai muno mamun, ukovakato no wene rai wea umba mangke raugaje mansai.”

Ayao mo Yesu aura kakavimbe

³⁰ Yesu po raura iridi pare, “Risyamo syo ana inta rajjaro taune Sya bekere rajje ramu. Risyamo syo mangke rapatimu maisyosyo Injaya apa ayao mo inatutiro rajje bo rai. Muno Syo rapatimu mamu maisyosyo weye itavondi taune Sya bekere rajje ramu, yara Amisy po inatutire Apa bekere rai.

³¹ Ranivara taune Syo taune inaura kakavimbe, weamo indati vatane wanave Inai jeben kai. ³² Yara Sya Injaya pirati po inaura kakavimbe vatane mansai muno Syo raen Apa ana daura namije mamu tugae.

³³ Weapo vatane inta matutir ude Yohanes Pembaptis ai muno apa ayao po inaura kakavimbe omamo mamai dave. ³⁴ Weramu Yohanesa dako, vatano kaijinta nao rako, ukangkamambe Rinai mi syo rakanija jebena. Syo Yohanes apa ana daura umaso raura indamu wapo ranaun muno wapanave Rinai ti Amisy po wasapaya wapa ayao kakaije rai. ³⁵ Yohanes opamo maisyare yawainyo rakaindi ramaisy, weye apa ayao mbaro wasanuga rai ti wasananibe rave masyote kavinta yai.

³⁶ Weramu Sya ana idaijare mo inaura kakavimbe tavon, mo Yohanes apa ayao umawe rakivan. Weye anakero Injaya

Amisye po raugaje Rinai indamu syo rai-
jar wemi mo inaura kakavimbe Risymo
Injayo Amisye po inatutir. ³⁷ Muno Injayo
Amisy wepi po inatutire taune Po inaura
kakavimbe tavon. Wepamo wapo Amisye
anamote rarani dainy muno wapo anakea
raen dainy tavon. ³⁸ Muno wapo Apa ayao
raugave nsiso wasanuga raije ramu. Weye
Risyrirati Amisye po inatutir, weramu wa-
panave Rinaije ramu. ³⁹ Weapo Ayao Amisy
ranyao mavabe weye weapo rakarae omi
mo wasauga ti wasisa irati kovo nuge nu-
ganuije rai. Weramu Syo raura wasai: Ayao
Amisyo namije mamo Risyrirati mo inaura
kakavimbe! ⁴⁰ Weramu waponae wade Ri-
nai indamu wapaura kovo nuge nunganuije
raiji.

⁴¹ Risiyamo vatane ukangkamambe Rinai
mi syo rakanija jewena. ⁴² Risyo wasaen
dave: Syo wasanuga raen weamuinyo
Amisye aije ramu. ⁴³ Ride so, ride Injaya
apa vambunine rautan, weramu wasanuga
raneka wapo inaugave ramu. Yara ranivara
vatano kaije wo raura ware ude taune
awa vambunine rai, wapare wasanuga
raneka wapo mansaugav. ⁴⁴ Wapare
wapanave Amisy intabo obo ai, weramu
wapo asyaniv kobe jewen, yara vatan
bayave nawirati wapo masyaniv. Weye
wabekere da Amisye anayanambe wasai ti Po
wasararimbe wemamo waponae dai, yara
wapo rave mamo wasanayanambe vatane
wo wasararimbe. Wabeare so, weamo
wade wapanave Rinai jeben kobe.

⁴⁵⁻⁴⁶ Wapare Musa pamo vatano
weasanave amen. Weramu Syo wasaen
wapa anave ai mamaisye ramu. Weye
ranivara weapanave Musa ai ratire, weamo
indati wapanave Rinai tavona. Weye
Risyrirati Musa po inaura kakavimbe no apa
ana po ratoe rai. Maisyare omai ti, arono
munije ama akari, Risiyamo syanaikebe
wasai no Injayo Amisy amune raije ramu,
yara Musa wepirati panaikebe wasai weye
weaponae wapanave Rinaiji. ⁴⁷ Tugae,
wapanave Musa apa ayao po inaura rai
ramu. Maisyare omaisy umba wapanave
Sya ayao syo raura rai tavone ramu.”

6

*Yesu po anaisye raunanto vatane ribuge
radani wo raisy*
(*Matius 14:13-21; Markus 6:32-44;
Lukas 9:10-17*)

¹ Masyote inta yai jakato, Yesu poroto
po onae Galilea raotor to no ama ranijo
warani. Onae namije ama tamo kaije mirati
Tiberias. ² Vatano wanui rave utavondi Ai
weye wo Apa anapaporainye raen arono

Po saumane raunanto vatano uguanewe
mansai to. ³ Yesu seo no unat muno Apa
arakovo utavondi aije usea no unato naije
tavon muno utantuna. ⁴ Arono naije vatano
Yahudi awa Ono Paska ndea mangkepan to.

⁵ Yesu perato po vatano wanugande Ai
mansaen wanui rave. Weti Po raura nanto
Pilipus ai pare, “Pilipus, rui rati wamo
anaisye inta ramavun indamu vatano
wanui rave so wo raisy?” ⁶ Yesu po
anajo indamu Po anuga raen: apa anave
mbambunin dako? Weramu Yesu apa ana
indati po rave mamo taune Po raen to.

⁷ Pilipus po raura akananto Yesu ai pare,
“Wakoe! Rotije mamo wamo doijo wanui
rave veano ramavun, weramu indati mo
vatano wanui rave so mansamai tavone
ramu. Wo rakisyi rave kai weramu mamai
tavone ramu!”*

⁸ Naije Yesu apa arakovo utavondi ai
umaso inta apa tame mi Andreas, opamo
Simon Petrus apa rijata pije. Andreas
umaso po raura akananto Yesu ai pare,
⁹ “Arikainye inta pi apave rotije vasyesye
radani yai muno apa jiane yano jirum
tavon. Weramu anaisyo maisyare wato
maisya indati yo vatano wanui rave so
mansamaisy aje ye?”

¹⁰ Yesu po raura pare, “Wapo vatane so
matuti da waje utantuna.” Mino namije
mamo insumai ntuna rai manakoe, weti
vatano wanui rave umaso waje utantuna
rai. Muno awa wanuije mamo anya vatan
anui bo matora nseo no ribuge radani.
¹¹ Naije Yesu po rotije umaso raugav Po
kove raura seo Amisye ai, umba Po ra-
todijo vatano wanui utantuna umaso man-
sai muno jiane ratodi tavon mamaisy irati
awa bekere rai.

¹² Arono wisyisyu uman to, Yesu po
apa arakove matutir pare, “Wapo anaisye
ama ateteo ntantuna ranunugande indamu
vemo inta raepata inya.” ¹³ Weti rotije
radani ama atete wo ranugan akare umaso
mamo bayaije abusynara eane jirum
ntatairi.

¹⁴ Arono vatane wo Apa anapaporainyo
po rarorone so raen, wo raura ware,
“Sopamo tugae rave anawae Amisye po
aurairive indati de mine so rai.” ¹⁵ Yesu
po vatano wanui umaso mansaen ubeker
ware ude wo antitidi indamu be akari titive.
Maisyare omai ti, pusyo ti to no mumuimbe
no unat.

Yesu panya onae vone rai

(*Matius 14:22-33; Markus 6:45-52*)

¹⁶ Muno arono masyote mare ngkaumu
kobe, Yesu apa arakove wakata no onae.
¹⁷ Umba usea nyomane rai ware wo onae

* **6:7** Ayao Yunani naiso mo raura mare, “doije nanto no 200 dinar mamo mamaisye ramu.” Roma awa doijo peraki rawainamo dinar.

raotar uta no munijo Kapernaum. Arono masyote ngkaumu dave to, Yesus pakare Apa arakove mansai rainy. ¹⁸ Naije onae mamu ovare panyoan dave weti aneae makokoe. ¹⁹ Arono uborae yava ama waravainye mamu rakarae maisyare kilometerije radani rako kaujentabo rako, werata wo Yesus aen panya onae vonne raide pangkepan no awa nyomane rai, weti ujani bintabo. ²⁰ Weramu Yesus po raura nanto mansai pare, "Risya so! Vemo wajaniv inyal!" ²¹ Weti onawamo mananibe, wo augave seo no nyoman. Muno naije kobe tavon nyomane nto nanto no nayave ruko nyomane mare nsiso rajie rai to.

Vatano wanui wo Yesus akani

²² Siman akato vatano wanui nanawirati una tawan no onae ama tuga umawe rai wo raura ware, "Namanawe nyomane intabo dave no so. Wandaen Yesus opamo seo nyomane umawe rajie ramu, yara Apa arakove obo nawirati usea rai, wuruta to." ²³⁻²⁴ Vatano wanui rave umaso wo Yesus muno Apa arakove mansaumandi, weti ware wo Yesus akani. Arono naije nyomane inta no no munijo Tiberias nde nande, wo rakarimu mararai no anoko Amisy Yesus po kove raura seo Amisy ai umba vatano wanui wo anaisyo rotije raisy. Maisyare omai ti, vatano wanui umaso usea nyomano uma nde so rai janyi, ware wo onae raotar indamu wo Yesus akani no munijo Kapernaum.

Anaisyo mo kovo nuge nuganuije raunande

²⁵ Arono vatano wanui umaso unanta Yesus ai no Kapernaum no onae tuga ranijo warani, wo anajo ware, "Injajo Kurune, nandui rati winde no naiso?"

²⁶ Yesus po raura akananto mansai pare, "Syu wasanuga raen kakavimbe: weapo inakani weye namanawe wapo rotije raisya waman dave. Weramu Sya anapaporainyo syo rarorone mamu weananta ama ine rajie ramu. ²⁷ Vemo wapo anaisyoe obo rakani nora, weye indati anaisyoe wato mbaug ti meweno wasai jakato. Yara syare wapo anaisyo Risy Arikainyo Vatan syo raunande wasaije rakani ti wadaisy, weye anaisyoe so mbaug ramu. Wapo raisy weamo wakova nuge nuganui. Injajo Amisy po apa vambunine raugaje Rinai indamu syo anaisyoe so raunande wasai."

²⁸ Umba vatano wanui umaso wo ranajo ware, "Animaisyoe mirati reamo rave indamu reantavondi Amisyoe apa bekere rai?"

²⁹ Yesus po raura akananto mansai pare, "Amisyoe apa bekere mi som: wapanave

irati Rinai weye risyirati Vatano Amisyoe po inautitir weti ide to."

³⁰ Naije wo anajo akato ware, "Anapaporainyo rui mirati nyare Nyo raroron indamu reamo raen muno reamanave Nai? Animaisyoe mirati nyare Nyo rave?" ³¹ Wusyinoe Musa po anapaporainye inta raroron arono po anaisyoe manna raunande wama anene wo raisy no nugo vabukane vono maninimbe. Omamo Ayao Amisyoe mo ratoe mare, 'Po anaisyoe rotije no no munijo ntiti raugaje mansai.'^{*}

³² Yesus po raura mansai pare, "Syu raura tugaive: Sya Injajo pi po anaisyoe tugaie no no munijo ntiti raugaje wasai, yara Musa po raugaje jewan. ³³ Weye anaisyoe Amisyoe po raunande wemirati no no munijo ntiti maje indamu mo kove raugavere vatano mine so mansai."

³⁴ Umba vatano wanui umaso wo raura ware, "Injae, Nyo anaisyoe uma wato raugaje reansai tutir!"

³⁵ Yesus po raura kakavimbe mansai pare, "Risyirati anaisyoe mo kovo nuge nuganui raunande wepi Risy. Are pirati de Rinai, weamo maror akatoe ramu. Muno are pirati panave Rinai, weamo awa ngkangkamandi akatoe ramu. ³⁶ Weramu Syo raura akaore wasai: Wapo inaeo wasamije rai to, weramu wapanave Inai ramu. ³⁷ Are pirati Injajo Amisyoe po aunande Rinai, opamo indati de Rinai jaje. Muno are pirati de Rinai, opamo Risy amaута ramu. ³⁸ Weye Risyamo ino no munijo ntiti umba ide to indamu Syo taune sya bekere rajiare ramu, yara Injajo po inatutire Apa bekere mi Syo rajiar. ³⁹ Muno Injajo po inatutire Apa bekere mi so: vatano Po maunande indamu utavondi Rinai, vemo inta aumandi nora, yara Syo maijasea ukovakato vintabo no munije ama akari. ⁴⁰ Weye Injajo Amisyoe apa bekere mi so: are pirati po Risy, Arikainyo Amisy, rinaen no anuga rai muno panave irati Rinai, wewamo apave irati kovo nuge nuganuije rai, muno Risy aijaseo kovakato no munije ama akari."

⁴¹ Vatano Yahudi uparijo Yesus ai weye Po taune aura pare, "Risyirati anaisyoe no no munijo ntiti umba ide." ⁴² Wo raura ware, "Yesu wepi so dako? Yusup apa kavo piye! Apa ajaya pe akoya me onayamo wamo yaena! Umba veanimaibe irati taune Po raura pare, 'Risyamo ino no munijo ntiti ide to?'"

⁴³ Yesus po raura akananto mansai pare, "Vemo wapayao ensembe nora. ⁴⁴ Vatane nawamo inta de Rinai tatuga bayawe ramu, yara vatano rui pirati Injajo po inatutire pare po augave sen, wepi de Rinai. Vatano

napije indati Syo aijaseo kovakato no munije ama akari. ⁴⁵ Anawae wusyine inta po raurairive ti ratoe apa bukuge rai pare, 'Vatan tenambe nawamo indati Amisyeyo manyao.'⁴⁶ Maisyare omai ti, are nawirati wo Amisyeyo apa ayao raraniv muno wo raugave nsiso manuga rai, weamo ude Rinai. ⁴⁶ Vatan inta po Injayo Amisyeyo aeno amijeyo raijeyo jewen bayave yara Ribuisyeyo weyeyo rino no Amisyeyo ai umba ide, weti Risyo Injayo Amisyeyo aeno inamijeyo rai to. ⁴⁷ Syo raura tugaive: are pirati panave, apave irati kovo noa nuge nuganuijeyo rai.

⁴⁸ Risyrirati anaisyoyo mo kovo nuge nuganuijeyo raunandeyo wepi Risyeyo. ⁴⁹ Wapa aneneyo wo anaisyoyo manna raisyeyo no nugo vabukaneyo vono maninimbeyo weramuyewenawamoyogwenen to. ⁵⁰ Weramuyeyo are pirati po anaisyoyo no no munijoyo ntiti ti majeyo so raisyeyo opamoyeweneyo nandeyo ai jakatoyo ramuyeyo. ⁵¹ Risyrirati anaisyoyo mo kove raunandeyo wepi Risyeyo, ino no munijoyo ntiti syajeyo to. Ranivarayo vataneyo inta po anaisyoyo namisoyo raisyeyo, opamoyekovayeweneyo nuganuijeyo. Muno anaisyoyo Syoyo raunandeyo so omamoyo inanasinyo mijeyo, wemirati Syoyo raunandeyo indamuyovatanoyo mine so ukovoyo rai."

⁵² Weti vatanyo Yahudiyoyowayoyo ensembeyo mansai vambinibeyo ware, "Po raurapare Po anasinyo raunandeyo wamoyoraisyeyo, omamoyono tayoruiimaisyeyo?"

⁵³ Weti Yesusyoyo raurayokanantoyo mansai pare, "Syoyo rauratugaive: ranivarayowepoyo Arikainiyoyo Vatan syayeyo ineyo raisyeyo jewen muno Syayomavuyoramanamyotavonyo jewen, weamoyowapavoyekovoyonugenyoguganuijeyo raijeyo ramuyeyo. ⁵⁴ Are pirati po Syayeyo ineyo raisyeyo muno po Syayomavuyoyoramanamyoyoweamoyopavoyekovoyonugenyoguganuijeyo rai muno Risyo aijaseoyokovakato no munijeyo ama akari. ⁵⁵ Weyeyo Risya ineyo mamoyotugayorave anaisyeyo mayomuno Syayomavuyoyomamoyotugayorave mayoramanamoyoma. ⁵⁶ Vatan are pirati po inanasinyo raisyeyo muno po Syayomavuyoyoramanamyoyoweamoyobe intabovoye Rinai muno Risyamoyobe intabovoyetawan irati aiyavonoyo.

⁵⁷ Injayoyowepiyoyo inatutireyoyo Opamoyokovayonotawan, muno Risyamoyorikovayonotawan tavonyoweyeyo Po kove raunandeyo Rinai. Maisyare omaisyamoyovatanoyo are pirati po inaisyoyo, opamoyokovayonotawan weyeyo Syoyokove raunandeyo ai. ⁵⁸ Somirati anaisyoyo no no munijoyo ntiti ndeyo mo anaisyoyowusyinyo aneneyo ugwenen to, weramuyeyo are pirati po anaisyoyo namisoyo raisyeyo, opamoyo indati kovayonugenyoguganuijeyo."

⁵⁹ Anakotare so ntenambeyo Yesusyoyo raurayonotawan muno Kapernaum aronoyo Po ananyoyo raugavoyonoyavaryosambayayoyo ama ugayorai.

Yesusyoyo apayarakove intayowonayeyo Ai ti waunsuyakiriveyeyo Ai no Galileya

⁶⁰ Aronoyo Yesusyoyo apayarakove wo apayayoyoranaunayomewen, arakove umasoyowanuiyoworaurayoware, "Yesusyoyo apayayoyosompanyoan dave. Are pirati bambuninyo po raranibeyo?"

⁶¹ Yesusyoyo po apayarakove manugayoraen wo Apayanyoyoraurayoudantutibeyo, wetiyoyoraurayonantoyomansai pare, "Wabeanimaibeyowapare Syayanyoyosompanyoan? Moyowapayanave rantaunasyoyoraveyeyo e?" ⁶² Indati animaisyeyo miyowaporakarayoraronoyowepoyo Arikainiyoyo Vatan rinaenoyosyakatoyo no Syayomunijoyomanasyinyo inoyoraijeyo rai? ⁶³ Anawayoyo Vambuninyo wemirati moyokove raunandeyo indamuyovataneyo ukovayonotawan, yarayovatanoyo mine so moyokove umasoyoraunandeyo kakai weyeyo awayovambuninyo mamaisyeyo ramuyeyo. Syayayoyosyoyoraurayowasajeyo so Anawayoyo Vambuninyo moyoraunandeyo, muno omamoyombambuninyo indamuyomokovoyonugenyoguganuijeyo raunandeyo wasai. ⁶⁴ Weramuyewepamoyointayowapanavoyoramyeyo. "Yesusyoyo anayomasoyoraurayoweyeyo Poyovataneyo manugayoraenoyowusyimbeyo: vatanyoruiyowawindati wanavoyojewen muno vatanyoruiyoyopirati po amavuninyo indamuyoaubaisyeyo. ⁶⁵ Yesusyoyo raurayoriridipare, "Indati vataneyo intayowanavoye Rinai jewen. Wemiyombewar Syoyoraurayowasai umaweyorai syare vataneyo intayode Rinai tatugayobayavoyoramyeyo. Yarayovatanoyoruiyoyopirati Injayoyo amayardati, wepiyode Rinai."

⁶⁶ Aronoyo naijeyo Yesusyoyo apayarakove wanuiyointayowonayeyo Ai ti wansukyakiriveyeyo kobeyo, naijeyo utavondiyoyo Ai jakatoyojewen.

Petrusyoyo tauneyo anavoyoraurayoyo

⁶⁷ Naijeyo Yesusyoyo raurayonantoyo Apayarakovoyomansanyo abusinyarayoye aneyojirumeyomasoyomansai pare, "Wepamoyowapare wanajivyavonyodakoyojewenayeyo e?"

⁶⁸ Simon Petrusyoyo raurayokanantoyo Yesusyoyo ai pare, "Injaeyo, are pirati reantayoyo Ai jakatoyo? Winyamoyonyayoyowemirati moyokovoyonugenyoguganuijeyo raunandeyo. ⁶⁹ Reamanavoye Nai muno reamoyonaen Winyamoyovatanoyo Kakavimbeyo no no Amisyeyo ai umba Poyonaturitide reansai piyoyo Winyeyo."

⁷⁰ Yesusyoyo po raurayokanantoyo mansai pare, "Risyamoyosyoyorarakove wasanoyabusinyarayoye aneyojirumeyowasatayoyoto. Weramuyeweyo tenambeyo so, vataneyo intayopirati panapatambeyo Anakakai Akoye ai!" ⁷¹ Vatanyo Poyoyosoyowepirati Yudas, Simon Iskariotyoyo apayarikainiyeyo piyeyo, weyeyowepirati pare po Yesusyoyo amavuninyo indamuyoaubaisyeyo. Opamoyo Yesusyoyo apayarakovoyabusinyarayoye aneyojirumintayopijeyo.

7

Yesus poroto no Yerusalem weye Yahudi wo awa ono manakoe inta rave

¹ Naije Yesus panya propinsi Galilea raita, yara ponae panya no Yudea weye vatano Yahudi una no naije ware ubeker da wo aubaisy. ² Arono naije Yahudi awa Ono Wo Randume Ransano mangkepan to. ³ Yesus apa rijate wo anajo ware, “Mbeanimaibe wino tawan bayave no Galilea so?! Nseo! Winyoronto no Yudea indamu Nya arakovo utavondi nai wo Nya ana nyo rave raen. ⁴ Weye vatane inta beker pare apa tame manakoe, weamo po apa ana dave raroron kakavimbe. Yara po rangkokaibea no vayave munijo mamaune rai, weamo mamaisywe ramu. Weti reamare Nyo nya ana ndave raugav no kakavin indamu munije tename so wo naen tenambe.” ⁵ Yesus apa rijate wo aura taije maisy weye wanave Aije ramu.

⁶ Weti Yesus po raura akananto mansai pare, “Sya masyoto Amisywe po ratayao Rinaije mamai dainya, yara weapamo wapare masyoto rui vayaveamo wata kai. ⁷ Vatano mine so nawamo manuga ngkakaijo wasaije ramu, yara manuga ngkakaijo Rinai weye risyo vatano mine so awa ana udave ngkakainoanive raura kakavimbe. ⁸ Wata one wato rai kai! Yara Risyo syore rainy, weye Sya masyote mamai dainy.” ⁹ Yesus po ayao umaso raurana mewen, umba no tawan no Galilea.

¹⁰ Weramu arono Apa rijate wuruta no ono akoe umawe rai to, Yesus poroto tavon, weramu poroto maninimbe weti vatane wo aene ramu. ¹¹ Vatano Yahudi wo akani no ono namije rai indamu wo aubaisy, weti wo raura ware, “Yesus opamo nori rui?”

¹² Muno vatano wanui wo Yesus ansamuabe taune mansai vambinibe. Inta ware, “Wato pamo vatano kove pa!” Weramu inta wo raura ware, “Jewena! Yara Po vatane maponae.” ¹³ Weramu vatano wanui umaso wo Yesus aura kakavimbe no vatano Yahudi mansamune ramu, weye wo Yahudi masyaniv.

Yesus po taune aura kakavimbe

¹⁴ Vatane wo awa ono namije rave masyote inta yai jakato, umba Yesus to no Yavaro Amisywe rai pananyaube no naije. ¹⁵ Weti vatano Yahudi upaparo mansai, ware, “Yesusa be sekorave rainy, weramu Po anyanyao so raen dave. Are pirati po anyao ti payaoware so?”

¹⁶ Yesus po raura akananto mansai pare, “Sya anyanyao mamu muje no taune Rinai ramu, yara no no Injajo po inatutire Ai. ¹⁷ Are pirati pare po Injae apa bekere rarijat, weamo indati po ranaun Sya anyanyao so ama nori rati Injae ai, yara nori rati taune Rinaije ramu. ¹⁸ Weye vatano are pirati po taune apa ana datantona bo raurave, weamo apa bekere mamu po taune aijaseo titive. Weramu are pirati po raura indamu po Aja po atutire aijaseo titive, weamo mamai tugae piye, yara ayao angkarije mewen irati ai. ¹⁹ Musa po Amisywe apa anyanyao raunande wasai to, weramu weapamo wapo anyanyao umaso rarijate ramu. Wabeanimaibe wapare weapo inaubaisy?”

²⁰ Vatano wanui umawe wo raura ware, “Are pirati pare po naubaisy? Reamamo jewena! Winyamo anawayo kakaije siso Naija!”

²¹ Weramu Yesus po raen onawamo uparijo Ai jivae, weye ware Apa anapaporainye mamu anakere ma, vemo Po rave no masyoto sambaya rai nora. Weti Po raura akananto mansai pare, “Syo anapaporainye intabo rave, weramu waparajo Rinai weye Syo rave no masyoto sambaya rai. ²² Weramu weapamo arono masyoto sambaya wapo sunative wapa arikainye mansai,* weye Musa po anyanyao sunat raugaje wasai to. (Weramu tugae, Musa wepirati po raugaje jewen, yara aneno wusyin nawirati wo raugaje arono Musa ano rainy.) ²³ Wapare vemo wapo Anyanyao Musa rakanyoandi nora, weti anyanyao sunat omamo watavondi rai no masyoto sambaya rai kai.† Weti arono masyoto sambaya nandijawe Risyo saumane raunanto vatano gwanene ai ti anasine nsauman kobe, wabeanimaibe waparajo Rinai? ²⁴ Vemo wapo anakotare rapatimu mamaisywe ana wadaeno wasamije bo raije rai nora. Yara syare wapo ratantona mavabe rati indamu wapa ana wapo rapatimu mamai tenambe.”

Yesus opamo nori rui umba de

²⁵ Arono naije vatano una no Yerusalem inta wo Yesus aura ware, “Vatane so pirati wama akarije ware wo aubaisywe piye! ²⁶ Weramu wamo Yesus anyanyut pananyaube no vatano wanui mansamun umawe wama akarije umanin bayavea, wo ayao inta rasakinav akananto Aije ramu. Indako wama akari so onawamo

* 7:22 Vatano Yahudi ware masyoto sambaya mamu vemo vatane wo anakere raijaro rai nora. Muno ware Yesus apa anapaporainye mamu anakere ma, yara ware utavondi sunat rai omamo anakere ma jewena. † 7:23 Vatano Yahudi awa anyanyao sunat no taiso: Arono arikainyo anyo ano aje apa masyote kaumandei, weamo be sunative indamu ato siso Amisywe apa kawasae mansai. Yahudi wo ratantona ware anyanyao so manakoe weti wo rarijat mavabe. Weti ranivara arikainyo ano aje apa masyoto kaumandei nande mamai no masyoto sambaya rai, weamo tavondi koano sunat rai kai.

wanave Ai ware wama Mesias wepije to rako?[†] 27 Weramu Yesusa pamo apa no raije mamu reamo raena, yara Mesias opamo arono rui rati pare de, weamo Apa no rai ti de mamu vatane inta po raene ramu.”

28 Naije Yesu pananyaube no Yavaro Amisyere rai, gwaina pare, “Risiyamo wapo inaen ivae muno Sya ino rai mamu wapo raen tavon. Weramu ide taune Sya bekere rai ramu, yara Amisyu tugae wepi po inatutir. Amisyere so weapamo wapantatukambe Ai. 29 Taune Risiyamo syo Injayo Amisyere aen, weye ino no Wenui umba ide muno Wepi po inatutir.”

30 Vatano Yahudi wo Yesu apa ayao umaso raraniva mewen, ware ubeke damu wo aijar. Weramu vatane inta pana pantukamo Ai rainy, weye Apa masyoto Amisyere po ratayao Aije ndea mamai dainy.

31 Weramu vatano wanugano naije wanui rave wanave Ai. Wo raura ware, “Tugae, sopamo Mesias wepi de to ije. Weye Apa anapaporainyo po rarorone manui rave, maisyare Mesias amaisy.”

32 Vatano Parisi udaniv nanto wo ranauno vatano wanui umaso wo Yesu ansamuabe mansai vambinibe ware Opamo Mesiasa piye. Wetiva vatano Parisi wato muno syeno akokoe wo naito wo Yavaro Amisyere ramane inta matutir indamu wo Yesu aijar.

33 Naije Yesu payao pare, “Risiyamo ino akato wasarijata masyote nggwaravainy akatoe ramu, yara kavinta umba syakato no Injayo po inatutire nui. 34 Weapamo indati wapo inakani, weramu wananta Rinai kakai. Weye munijo syoroto rai, weapamo indati wata rai kakai.”

35 Vatano Yahudi wayao vambinibe mansai ware, “Apa munije rui mirati pare to no rai weti wananta Ai kakai? Indako pare nin da tavondi wama arakovo Yahudi nanawirati utantuna no munijo marano Yunani mai rako? Pare po vatano Yunani una no naije mansanyaube rako?”

36 Apa ayao po raura pare, “Weapamo indati wapo inakani, weramu wananta Inai kakai, muno munijo syoroto rai, weapamo indati wata rai kakai, Apa ayao so ama ine no tai rui?”

Yesu apa ayao maisyare mana ami njayaisy

37 Ono namije ama akari rai arono ama masyoto akoe, Yesu seo tet muno gwain pare, “Are pirati awa ngkangkamandi, weamo de Rinai muno po mana ramanam!”

38 Maisyare Ayao Amisyere mo raura mare: are pirati panawe Rinai, indati vatano

napije kove ntipu anuga rai, maisyare mana ntipu irati mana ami rai ti njam.”

39 Yesu apa ayao mbe ananeneaebe umaso ama ine no taiso: Mana umawe raurata irati Anawayo Vambunine rai, Namirati indati mare majeo vatano wanave Yesu aije mansai. Weramu arono naije Anawayo Vambunine mamu maje rainy, weye Yesu kakai muno kovakato rainy.

40 Vatano nanawije inta wo Yesu apa ayao namije ranaun, weti wo raura ware, “Sopamo tugae rave anawae aurairive wamo anyube pi so.”

41 Muno kaijinta wo aura tavona ware, “Mesias wepi so, Napi Amisyere po atutir de wansai.”

Weramu kaijinta wo aura ware, “Opamo jewena, Mesias opamo no no Galilea umba de ramu! 42 Weye Ayao Amisyere mo raura mare Mesias opamo de no Daud apa susye rai muno nori rati Betlehem, munijo wusyinoe aneno Daud tuna rai.”[§] 43 Maisyare omai ti, vatano wanui awa ana udatantona Yesu ai mbe intabowe jeven ti wayaowi Ai. 44 Vatano nanawije inta ubeker ware wo aijar indamu wo ave tatugadi, weramu vatane inta pana pantukamo Ai rainy.

Nikodemus payao po Yesu aoraijo watan akoe mansai

45 Umba naito wo Yavaro Amisyere ramane umaso wakata, naije syeno akokoe muno vatano Parisi wo manajo nande ware, “Wabeanimaibe wapo augave jeven?”

46 Naije vatano wo Yavaro Amisyere ramane umaso wo raura ware, “Vatane wato apa ananyao ngko dave. Ananyao kaijinta mo Apa ramaisyere ramu!”

47 Vatano Parisi wo raura akananto mansai ware, “Ee! Weapamo Yesusa po wasaponae tavon to e? 48 Yara Yahudi wama akari nawe Parisi reame inta wamanawe Yesu aije jeven bayavea! 49 Vatano wanui wato obo wanave Ai, weramu onawamo wantatukambea, wo Ananyao Musa raene ramu. Indati Amisyere po mangke raugaje mai jaje.”

50 Nikodemus, napirati wusyinoe de Yesu ai, no no naije, po vatano Parisi umaso awa ana wo Yesu aura tantunawije ranaun. Nikodemus pamo vatano Parisi piye tavon, weti payao nanto mansai taiso: 51 “Wakoe! Animaisyere mi wapare wamo rave Yesu ai? Ranivara vatane inta po Apa ana dave raura kakavimbe rainy, weamo vemo wamo mangke rapatimugo Ai vayave nora. Omamo mamaisyere wama ananyao raije ramu.”

[†] 7:26 Tamo Mesias mo tamo Kristus ramaisy, ama ayao mare, “Vatano Amisyere po apatimu indamu be akari titive wansai.” [§] 7:42 Tugaeyamo Yesu ano no Betlehem (Lukas 2:4-7), weramu vatano Yahudi umaso wo rakare ware ano no Galilea.

⁵² Naije apa arakove umaso wo raura akananto Nikodemus ai ware, “O! Mbeanimaibe wintavondijo vatano Galilea wato Ai? Winyamo vatano Galilea tavon dako? Nyo Ayao Amisye ranyao kobe rati! Weye Galilea omamo anawae inta no no naije umba deye ramu.”

⁵³ Naije unajiv no taune awa yavare ranteter.

8

Wanya anaerere ugavo rai

¹ Weramu Yesus poroto kobe no Pukamo Saitun. ² Awatan ngko dave pakare akato no Yavaro Amisye rai, muno vatano wanui rave ude irati Ai. Yesus tuna po manyao. ³ Umba kuruno makari mbaro Ananyao Musa rai muno vatano Parisi wo wanya anaerere ugavo rai inta raugav ude no Yesusa nui. Wo wanya umaso raugave usya nte no awa yasyin. ⁴ Umba wo raura ware, “Injayo Kurune, wanya so omamo reamo rajjar weye reamo raen kavoe mo ayao kakai anaerere rave. ⁵ Musa apa ananyao inta mare wanya anaerere maisyare so omamo orame rave ramaug ava ngkakai.* Weti, Kurune, Winya ana ndatantona mamu noare rui?” ⁶ Awa ana wo raura so ware wo Yesus atopan indamu payao tatugadi, weamo wo kakai rantuna Ai kobe.

Weramu Yesus beaje po apa kawije veano ana ratoe no kopa. ⁷ Wo anajo tutir, weti beakaeyo naije Po raura akananto mansai pare, “Weapamo are pirati ayao kakai meweno ai, weamo manasyimbe po orame rave wanya so ramaug.” ⁸ Naije beakaje Po ratoe akato.

⁹ Weramu arono wo Yesus apa ayao so ranaun, unajivo nanentabo eve, weti manasyimbe ananuiny dave mansai. Unajiva mewen dave, weti Yesus obo no kobe no naije muno wanya umawe ma no tavona nene. ¹⁰ Yesus beakaeyo akato, Po raura nanto rai pare, “Inya, wanya winy, vatane umawe nawamo uta no rui? Inta ta no ra po mangke rapatimugo naija e?”

¹¹ Ama ayao mo raura Yesus ai mare, “In-jae, jewena.”

Umba Yesus po raura nanto rai pare, “Risyamo syo mangke raugaje nai tavone jewen. Nyoronto muno vemo nyo ayao kakai rave akato inya, masyoto unumeso kobe.”

Yesus wepirati baro mine so rai

¹² Umba Yesus po raura nanto vatano wanui mansai jakato pare, “Risyamo inaurata irati vare rai, ibaro vatano mine so mansanuga rai. Are pirati tavondi Rinai, opamo pana kaududi rai jakatoe ramu,

yara varo mo kove raunande mbaro anuga rai tutir.”

¹³ Vatano Parisi wo raura nanto Yesus ai ware, “Nya ayao wato mamaisye ramu, weye taune Winyo taune naura kakavimbe. Vatane po taune aura, weamo vatane wanave aije ramu.”

¹⁴ Yesus po raura akananto mansai pare, “Risyamo syo taune inaura kakavimbe kai, weramu taune Syo inaura kakavimbe somamo tugae muno mamaisy, weye Risyano rai ti de mamu taune Syo raen muno Risyano syakato rai mamu taune Syo raen tavon. Weramu weapamo wapantukambe Sya no rai ti de rai muno syakato rajje rai. ¹⁵ Weapamo wapo mangke rapatimugamo vatano mine so awa ana udatantona rai yayave. Yara Risyamo syo mangke rapatimugo vatane inta ai ramu. ¹⁶ Weramu ranivara Syo mangke rapatimu, weamo mangke namije mamaisy, weye taune Ribui syo rapatimuge ramu, yara Injajo po inatutire pamo tavondi inautan. ¹⁷ Muno wapa Ananyao Musa ama ayao inta ratoe taiso: Vatane intabo po anakotare inta raura omamo mamai dainy, yara vatane jiruma aya ayao intabo irati anakotare umaso rai, weamo mamai to ti wamanave rai.* ¹⁸ Weti vatane jiruma yo inaura kakavimbe taiso: manasyimbe, taune Risyano inaura kakavimbe, muno jirum, Injajo po inatutire po inaura kakavimbe.”

¹⁹ Naije wo raura akananto Ai ware, “Weti Nya Injaya nori rui?”

Yesus po raura akananto mansai pare, “Risyano muno Sya Injaya, weapantatukambe Ririnsai. Ranivara wapo inyen, weamo Sya Injaya wapo aen to.” ²⁰ Yesus po apa ananyao so raura aje no Yavaro Amisye ama uga rai, mararaijo bayaijo namirati vatane wo doije raugasyo rajje rai. Muno vatane inta po aijare ramu, weye Apa masyoto Amisye po ratayao Aije mamai dainy.

Yesus apa no rai mamu mine so ma jewena

²¹ Umba Yesus po raura nanto vatano wanui mansai jakato pare, “Risyamo syoroto muno weapamo indati wapo inakani. Weramu wananta Rinai jewen, weye munijo syoroto rai mamu maweso weade rai jewen. Weapamo indati wakakai wapa ayao kakai rai.”

²² Weti akarijo Yahudi wo raura ware, “Veanimaibe Yesus po raura pare, ‘Munijo syoroto rai mamu maweso weade rai jewen?’ Indako pare Po taune aubai dako?”

²³ Umba Yesus po raura nanto mansai pare, “Weapamo vatano mine nawirati weap, yara Risyamo sya munije mi munijo ntiti warae. Mine somamo wapa munije

mijem, yara Risyamo sya munije ma jewena. ²⁴ Wemi mbewar umawe Syo raura wasai syare weapamo indati wakakai wapa ayao kakai rai. Weye ranivara wapanave Rinai jeven arono Syo inaura kakavimbe syare Risyamo are pi Risy, indati tugae rave wakakai kobe muno wapa ayao kakai mamu Amisy po rapaya wasaije ramu.”

²⁵ Weti wo anajo ware, “Are pi Winy?”

Yesu po raura akananto mansai pare, “Veanimaibe syayao akanande wasai? Arono manasyinoe Syo inaura kakavimbe tenambe to. ²⁶ Ayao rapatimu syare Syo raura wasai manakoe weye wapa ana wadave ngkakai. Injayo po inatutire Apa ayao mamai dave, muno ayao rui mirati idaranivo Ai wemi Syo raura kakavimbe irati vatano mine wasai.”

²⁷ Yesu po Ajayo Amisy aura umaso, weramu vatano wanui nanawije wantatukambe rai. ²⁸ Weti Po raura mansai pare, “Arono indati wapo Arikainyo Vatane inauseo inyo kapite rai, wea umba wapo raen Sya ayao syo inaura kakavimbe mamu mamai dave. Muno Risyamo sya ana syo rave mamu no no taune Rinai ma jewena. Yara ananyao rui mirati Injaya po raura Inai webo mirati Syo raura. ²⁹ Wepirati po inatutir, muno tuna inautan tutir. Po inapaya syanya syayave ramu, weye Sya ana idave mamaisyo Apa bekere rai tenambe, ti anayanambe Rinai.”

³⁰ Arono Yesu po ananyao kotare umaso raura, vatane wanui rave wanave Ai.

Yesu po Amisy apa ayao tugae raura

³¹ Naije Yesu po raura nanto vatano Yahudi nanawirati wanave Aije mai pare, “Ranivara weano tawan no Sya ayao rai, weapamo tugae rave Sya arakovo watawondi rinai nawirati weap. ³² Indati weapo Amisy apa ayao tugae raen, muno ayao tugae so mo wasapaya irati anakotaro mo wasaijaro arove rai.”

³³ Umba wo raura akananto Yesu ai ware, “Veanimaibe Winyo raura nyare reamamo indati reampaya aro rai? Reamamo aneno Abraham apa susyo po reansampambe nawirati ream. Muno vatan inta wo reansaijaro arove ramu.”

³⁴ Yesu po raura akananto mansai pare, “Syo raura tugaive: are pirati po ayao kakaije rave, weamo ayao kakai mo aijaro arove. ³⁵ Vatano aijaro arove ato siso yavaruga raije ramu. Yara arikainyo yavaruga opamo ato siso yavaruga rai no tawan tutir. ³⁶ Maisyare omai ti, ranivara Arikainyo Amisy risy wasapaya aro rai, weamo tugae rave wapaya rai kobe. ³⁷ Weapamo Syo wasaen wana no Abraham apa susye rai, weramu wabeke damu wapo

inaubaisy, weye Sya ayao mamu waponayo rai muno weapo raugave nsiso no wasanuga raije ramu. ³⁸ Ana rui mirati Syo raeno sya Injaya nui, wemirati Syo raura wasai. Weramu weapamo ana rui mirati wapo raranivo wapa aja ai, wemirati weapo raijar.”

³⁹ Umba wo raura akanande Yesu ai ware, “Reama injaya pirati Abraham.”

Umba Yesu po raura mansai pare, “Weapamo Abraham apa arikainye nawirati weapa jewena, weye weapa ana wadave nsasyeo Abraham apa ana dave rai. ⁴⁰ Weapa ana wadave mamu wabeke damu wapo inaubaisy. Weramu Risyamo syo ayao tugae obo raura wasai muno ayao tugae namije mamu Syo raraniv no Injayo Amisy ai. Vatano po ayao tugae raura pamo Abraham po aubaisy ramu. ⁴¹ Weti wapa ajae sasyeo Abraham ai. Muno wapa ana wadave mamu wapa aja apa ana dave mijem.”

Naije wo raura ware, “Reamamo arikainyo insumaije jewena! Yara vatano Yahudi reama Injaya intabo dave, Opirati Amisy.”

⁴² Yesu po raura nanto mansai pare, “Ranivara Amisy pamo wapa Ajae waino ai ratire, weamo weamuinyo Inai, weye risyamo ino no Injayo Amisy ai umba syuje ti ide so. Muno ide irati taune Sya bekere rai ramu, yara Injayo Amisy po inatutir apa bekere rai. ⁴³ Wabeanimaibe wananta Sya ayao so rai jeven? Indako waponae wapo Sya ayao raranivi? ⁴⁴ Anakakai Akoe wepirati wapa Ajae waino ai, weti weabeto irati apa bekere rai. Anakakai Akoe wepirati po vatane maubaisy arono manasyin dave rai muno opamo anuga mbeto ayao tugae raije ramu, weye anuga mamu ayao tugae ravaki rai jeven. Po ayao aarurijate raura tutir, weye anuga ntairijo angkarije rai. Anakakai Akoe pamo vatano arurijat akoe piye muno ayao arurijat kotar vatano mine so wo raura omamo no no Anakakai Akoe ai po raugaje. ⁴⁵ Weramu Risy ayao tugae raura, muno weapanave Inai ramu. ⁴⁶ Weapamo wananta ayao kakai inta rai no Rinai jeven. Risy ayao tugae raura, weti wabeanimaibe weapanave Inai jeven? ⁴⁷ Are pirati Amisy apa arikainye waino ai, opamo po Amisy apa ayaowe raraniv. Weramu wapo Apa ayaowe raranive jeven, weye weapamo Amisy apa arikainye waino wasai jeven.”

Yesu no wusyimbe, Po Abraham akivan

⁴⁸ Umba vatano Yahudi wo Yesu aura tantunawi ware, “Reama ana reamo raura umawe mamu no rai tugae: Winyamo

* 8:48 Vatano Yahudi onawamo manuga mamuno vatano Samaria mansai.

vatano Samaria pi Winy!* Muno anawayo kakaije siso nanuga rai to!”

⁴⁹ Yesus po raura pare, “Anawayo kakai inta siso inanuga rai jewen. Ibeaje irati Sya Injaya ai, weramu weapo inaura tantunawi. ⁵⁰ Risyamo syo tamo ntiti rakani taune inamarome ramu, yara Injayo Amisyepi wepirati po tamo ntiti raugaje Rinai. Wepirati indati po mangke rapatimugo vatano nanawirati wo inaura tantunawi mansai. ⁵¹ Syo raura tugaive: Are pi beto Sya ayao rai, opamo nanto wene rajja nuge nunganuije ramu.”

⁵²⁻⁵³ Vatano Yahudi wo raura akananto Ai ware, “Wakoe! Winyo raura nyare, ‘Are pi beto Sya ayao rai, opamo nanto wene rajja nuge nunganuije ramu.’ Weramu Nya ayao so mamaisye ramu weye Abraham opamo kakai, maisyare omai tavon Amisyepi apa anawae wusyine nanawamo wene nde mansai tavon. Indako Winyamo nyanakoe reama aneno Abraham akivana rako? Opamo wene nde ai to! Anawae nanawamo wene nde mansai to! Weti Winyamo are pi Winy? Reamare Winyamo anawayo kakai siso nanuga rai to!”

⁵⁴ Yesus po raura akananto mansai pare, “Risyo tamo ntiti rakanijo inamarom, weamo mamaisye ramu. Injaya wepi po tamo ntiti raunande Rinai, Napirati weapo aura wapare wapa Amisyepi. ⁵⁵ Weapamo wapantatukambe Amisyepi ai, weramu Risyamo syo aen. Muno ranivara Risyo raura syare, ‘Risyamo syantukambe Amisyepi ai’ weratire, indati Risyamo aarurijat akoe pi Risy maisyare weasamaisy. Weramu Syo raura tugaive: Risyamo syo Amisyepi aen muno ibeto Apa ayao rai. ⁵⁶ Arono wusyinoe wapa aneno Abraham ananibe weye po ranaun Sya masyoto syare ide no mine so raije pare po raen. Tugae, soamo Abraham po Sya ide no mine so raen to, weti ananibe rave.”

⁵⁷ Umba vatano Yahudi wo raura ware, “Nya tume mamamo nseo no tename jirum eane abusyin rainya nene! Umba winyare Nyo aneno Abraham aen e?”

⁵⁸ Yesus po raura akananto mansai pare, “Syo raura tugaive: arono Abraham avaki rainyamo, Risyamo rino to.”† ⁵⁹ Naije vatano Yahudi nanawije uparijo Ai, weti wo orame ratayao wo rave Yesus amaug ware wo aubaisy. Weramu Yesus kokaibe mansai muno puje Yavaro Amisyepi rai ti to kobe.

9

Yesus po saumane raunande vatano amije ntuba ai

¹ Arono Yesus panya pananawe, to nanto vatano amije ntuba inta ai. Vatane so amije ntuba no arono ano kobeyoe. ² Yesus apa arakove wo anajo ware, “Injayo Kurune, arepa ayao kakai mo vatane so aveti amije ntuba: taune pi po rave rako, apa vatan anui nanai rako?”

³ Yesus po raura mansai pare, “Taune pa jewen, muno apa vatan anui nanaya jewen tavon, weramu beare so indamu Amisyepi apa vambunine raroron kakavimbe. ⁴ Syo raura ananeneabe taiso: anakere raijaro simane rai omamo mamaisy, weramu arono namane nde, wama anakere rapaya. Naisoamo Amisyepi po inatutire Po varore raugaje wansai indamu wamo Apa anakere raijar, weramu kavinta umba wama varoro namije mare mewen kobe. Weti syare wamo Amisyepi apa anakere raijar naiso kobe. ⁵ Arono rino no mine so, Risyirati varo mo kove raunande vatano mine so mansaije wepi Risy.”

⁶ Yesus po apa ayaowe so raurawa jewen, naije nyipube aje no kopa muno Apa nyipute rave kopa rakurive. Umba Po rauranto po rave vatano amije ntuba umaso amije raupaisy. ⁷ Muno Po raura nanto ai pare, “Nyoronto nyo namune rarondom no Waro Kampoa Siloam rai.” (Siloam mamamo ayao Yahudi ma, ama ine mare “Ratuti to.”) Weti vatane umaso to po amune rarondom rai. Arono sakinav pare pakare, amije mpora ti po nuge raen.

⁸ Vatano ami ntuba umaso apa arakove nanawe, vatano wusyinoe wo aen panatambe ananuge raiveve nawe, soamo wo aen weti wo raura tenambe ware, “Vatane so pirati wusyinoe tuna panatambe ananuge raiveve wepi so dako?”

⁹ Inta nawirati wo raura ware, “Napi ivae.”

Weramu inta wo raura ware, “Opamo jewena, yara vatano kaijinta pi so, amune mo vatano amije ntuba umawe amaisya.”

Weramu taune po raura kakavimbe mansai pare, “Tugae, risyirati wusyinoe inamije ntuba!”

¹⁰ Naije wo raura nanto ai ware, “Animaisye mi nande nai ti namije mpora ti nyo nuge raene so?”

¹¹ Po raura akananto mansai pare, “Vatano apa tame mirati Yesus po kopa inta rakurive umba Po rave inamije raupaisy, umba Po raura pare, ‘Nyoronto namune rarondom no Waro Kampoa Siloam rai.’ Weti syoroto, inamune rarondom rai, naije inamije mpora ti syo nuge raen kobe.”

¹² Weti wo anajo ware, “Vatano nyo aura wato, Napi rui?”

† 8:58 Yesus apa ayao so mare Opamo po Amisyepi amaisy. Wemi mbewar ti vatano Yahudi uparijo Ai rave.

Po raura akananto mansai pare, “Syan-tatukambe.”

Vatano Parisi uparijo Yesus ai weye Po saumane raunande no masyoto sambaya rai

¹³ Naije wo vatano amije ntuba umawe augaveta no vatano Parisi mansamun. ¹⁴ Masyoto Yesus po saumane raunande vatano amije ntuba ai omamo vatano Yahudi awa masyoto sambaya mijje. Vatano Parisi wo ratantona ware Yesus apa anapaporainye umaso mammo anakere ma, weti vemo Po rave no masyoto sambaya rai nora.

¹⁵ Umba vatano Parisi umaso wo vatano amije ntuba umawe anajo ware, “Ani-maisyje mi nande nai ti namije mpora ti nyo nuge raen?”

Vatane umaso po raura akananto mansai pare, “Yesus po kopa raugaje inamije rai muno syo rarondom. Naije inamije mpora ti syo nuge raen kobe.”

¹⁶ Umba Parisije inta wo raura ware, “Yesus wato pamo Amisyje po atutir de pa jewena, weye Po Ananyao Musa rakanyoandi. Po rakanyoandi arono Po anakere rajja no masyoto sambaya rai.”

Weramu Parisi kajje wo raura ware, “Jewena! Vatano ayao kakai no ai pamo indati po anapaporainyo maisyare so inta rarorone ramu. Maisyare omai ti, wandaen Yesus pamo vatano ko dave.” Weti vatane umaso wayao ensembe mansai vambinibe.

¹⁷ Umba vatano Parisi wo vatane umawe anajo akato ware, “Vatano po namije raveti mpora ti nyo nuge raen pamo animaisyje mi nyo ratantona Ai?”

Naije po raura pare, “Vatane so anawae pa.”

¹⁸ Weramu vatano Parisi wonae wanave anapaporainye umaso rajji. Ware, “Vatane sopamo amije mporaro anapaporaimbe tugae rako jewena rako? Indako arono manasyinoe amije ntuba ramu rako?” Maisyare omai ti, wo apa vatan anui yawa inde, ¹⁹ muno wo yanajo ware, “Ipa arikainye so pirati ipare ano kobe wea amije ntuba rako? Veanimaibe soamo amije mpora ti po nuge raen?”

²⁰ Apa vatan anui yo raura akananto mansai yare, “Arikainye sopamo irima arikainye pa. Muno arono akoya mare mo ano ajeamo irimo aen, rima arikainye amije ntuba. ²¹ Weramu veanimaibe soamo amije mpora ti po nuge raen, muno are pirati po saumane raunande ai, irimamo imantatukambe. Weti taune wapo anajo weye opamo arikainy tuvane pa jewena, yara apa ana po ratantona matu to. Taune po raura wasai jaje.” ²² Apa vatan anui yo ayao so raura mansai weye yo akarijo Yahudi masyaniv. Yo masyaniv weye awa

ayao mamai to ware vatano nanawirati wanave ware Yesus sopamo Mesias wepije, onawamo mangke raugaje mai indamu vemo wakasisa yavaro sambaya rai nora. ²³ Ayao so mbewar ti apa vatan anui yare, “Rima arikainye so arikainyo tuvane pa jewena, yara apa ana po ratantona matu to, weti wapo taune bo anajo kai.”

²⁴ Naije wo vatano ami ntuba umaso awain akato muno wo raura nanto ai ware, “Inya! Nyo ayao tugae bo raura weye soamo nyayao no Amisyje amun ti! Wamo Yesus napije aen opamo Vatano apa ayao kakai no Ai.”

²⁵ Umba vatano uma saumane so po raura akananto mansai pare, “Vatano napije apa ayao kakai no Ai pa rako, risyamo syantatukambe. Weramu sya ana syo raene mammo risyamo namanawe inamije ntuba, muno soamo inamije mpora ti syo nuge raen.”

²⁶ Umba wo ranajo ware, “Ana rui Po rave nai? Po namije raveti mpora ti nyo nuge raene mammo Po raveare rui?”

²⁷ Vatano napije po raura mansai pare, “Syo raura wasai to, weramu weaponae wapo raranivi. Wabeanimaibe soamo wabeker indamu syo raura wasai jakato? Indako wapare wabekero wapanave Ai, maisyare Apa arakovo utavondijo ai mansamai dako?”

²⁸ Naije wo vatane umaso akaajian wo aura ware, “Taune winyirati ntavondi Ai! Reamamo jewena. Reama ntavondi ai opamo Musa! ²⁹ Reamo raen Amisyje pamo po apa ayao raura de Musa ai to, yara Vatane wato pamo reamamo reaman-tatukambe Ai: Opamo no no rui umba dea?”

³⁰ Vatane umaso po raura akananto mansai pare, “Sinam dave irati weapan-tatukambe Apa munijo no rai ti de rai, yara Po inamije ntuba raveti mpora ti syo nuge raen. ³¹ Wamo raen vatano ayao kakai no mansai wenawamo Amisyje po maranive ramu, yara vatano ubeaje Ai muno utavondi Apa bekere rai wenawirati Po maraniv. ³² Arono munije so ama manasyine rajja ndea unumeso rai, vatano amije ntuba no arono ano aje kajioe inta amije mpora tai somaisy indamu wamo anaumbe rainy. ³³ Ranivara vatane wato pamo no no Amisyje ai jeben, weaveti Po anapaporainye inta rarorone ramu.”

³⁴ Wo raura akananto ai ware, “Nyare? Winyirati ayao kakai ntapekano nai rave arono navaki ajewe, weti mbeanimaibe nyare nyo reansanyao?” Arono naije kobe wo aorai siso no yavaro sambaya rai.

³⁵ Yesus po ranaun wo vatane umaso awatambe ti pusyo. Weti nanto ai muno Po raura ai pare, “Winyamo nyanave Arikainyo Vatan ai rako?”

³⁶ Vatane umaso po Yesus anajo pare, “Injae, are pi Nyo aura we? Syare Injae nyo aura rinai indamu syanave Ai.”

³⁷ Yesus po raura pare, “Vatano napije pi Risy: Risyi nyo inaeno namije rai muno soamo syayao nande nai.”

³⁸ Naije po raura pare, “Injae, soamo syanave.” Po vukane ranteteraje no Yesus amun muno beaje Ai.

³⁹ Yesus po raura pare, “Ride no mine so indamu Syo ayao mamaisye rapatimu vatane mai. Wirati vatano mamije ntuba nanawamo indati wo nuge raen, yara vatano mamije ngko ti wo nuge raen to indati wo raen akatoe ramu yara mamije ntuba.”

⁴⁰ Vatano Parisi una no naije inta wo Yesus apa ayao umaso ranaun, weti wo anajo ware, “Reamamo reansamije ntuba tavon dako?”

⁴¹ Umba Yesus po raura akananto mansai pare, “Weapamo wapo raura wapare weapo raeno wasamije rai muno wapare wapo Ayao Amisye raen. Weramu weapamo watawondijo Amisye ai jewen, weti wapa ayao kakaije no tawan no wasai. Ranivara wasamije ntuba ratire, indati wapantatukambe ayao kakaije rai, ti Amisye po mangke raugaje wasai jewen.”

10

Yesus aurata irati vatano po maero domba makum

¹ Yesus po raura pare, “Syo raura tugaive: arono vatano anaonoan siso no tanoano maero domba makumo raije rai, opamo po ama unsanda rausiso jewen yara po ama yane rarijati umba to siso. ² Weramu vatano po unsanda raisiso, wepirati vatano po maero domba makum. ³ Vatano napije pamo vatano po unsanda ramane po unsanda rausiso ai, muno po maero domba awa tame rawain, weamo wo araniv muno po maugav wusya. ⁴ Arono po maugava wusya, panya no wuisy muno maero domba wo arijat weye wo anamote ranaun to. ⁵ Weramu vatano no no maran inta de, weamo maero domba utavono ai jewen, yara unajiv ti uta aora weye wo vatano maran anamote ranaune ramu.”

⁶ Wemirati Yesus po raura ananeneaebe mansai, weramu unanta ama ine raije jewen.

⁷ Weti Yesus po raura intabo akato pare, “Syo raura tugaive: Risyirati rinaurata irati tanoano domba ama unsanda rai. ⁸ Vatano ude wuisyewe Rinai wenawamo vatano anaonoan tenambe, weti maero domba wo manamote raranive ramu. ⁹ Risyirati

syo inaura ananeneaebe tai rati unsanda rai, weti are pirati panya de siso po unsanda so raide, weamo Syo apaya apa ayao kakaije rai indamu apave kovo nuge nuganuije rai. Opamo aurata irati Sya domba inta ai, weti indati siso domba awa tanoane rai umba siman akato pusyo po apa anaisye rakani. ¹⁰ Vatano anaonoan apa bekere mamo panaonoambe muno po domba maubaisy weti makanive. Yara Risyia ide no mine somamo indamu vatane awaura kovo nuge nuganui rai muno Syo kove raugaje ti ntairi mai.

¹¹ Risyirati syo sya maero domba maeranande mavabe. Weti Syo inanasine raunandea ikakai indamu Syo sya domba mapaya kakaije rai. ¹² Weramu vatano apa anakere mamo doije rave avae indamu po maero domba maeranande, opamo po maeranande mavabe jewen weye apaura domba umaso maije ramu. Weti arono po makeo sivuiny aeno dei, janiv ti nin ti to maere umawe mansaora. Naije makeo sivuiny siso pare po domba maubaisy weti domba unajiv tenambe ti mangkat kobe. ¹³ Vatane wato opamo nin ti to maero domba maora weye apa anakere mamo doije bo mirati po rakani. Bekobe domba mansai mamo meweno anuga rai.

¹⁴ Weramu Risyamo risyirati syo sya domba maeranande mavabe. Syo raura ananeneaebe, weye Sya domba maurata irati Sya kawasae mai. Syo sya kawasae mansaen tenambe muno wenawamo wo rinaen tavon, ¹⁵ maisyare Injajo Amisye po rinaen muno Risy Injaya aen. Syo inanasine raunande ti ikakai indamu Sya kawasae awave kove rai. ¹⁶ Syaura vatano kaijinta mai nanawirati mato siso kawasae so mai tavone jewen. Onawamo syare Syo maugave siso tavon.* Wo inanamote raraniv tavon, indati Syo manugan ube intabove Sya kawasae umawe matavon. Weti awaura anugane intabo rai muno awaura Akarije intabo ai, Wepirati Risy.

¹⁷ Injaya muiny irati Rinai weye Syo inanasine raunandea ikakai indamu ikovakato. ¹⁸ Vatano rui pare po inaubaisy opamo apa vambunine mamaisye jewen. Yara Syo inanasine raunande mamaisyo taune Sya bekere rai. Risyia vambunin inanasine raunanto ikakai muno Risyia vambunin ikovakato. Risyia anakere somamo Syo raugav no Injaya ai.”

¹⁹ Vatano Yahudi usayai no naije wo Yesus apa ayao umaso ranaun, weti wayaowi vambinibe weye awa ana wo ratantona mbe jirumbe. ²⁰ Wanui rave inta wo raura ware, “Anawayo kakai inta siso anuga raija

* **10:16** Yesus apa kawasae kaijinta onawamo vatano wanave Ai nanawirati una no rui rui vayave no mine tename so.

muno anawi mo avea. Veanimaibe wapo aranibe?”

²¹ Weramu kajjinta wo raura ware, “Vatano anawayo kakai siso anuga rai pamo payaoware wato maisye ramu. Muno anawayo kakai opamo bambunin po saumane raunanto vatano amije ntuba aije ramu.”

Vatano Yahudi wo Yesus atugaro marambe

²² Arono naije vatano Yahudi wo ono akoe rave no Yerusalem. One somamo indamu vatano Yahudi maemendi Yavaro Amisy ama masyoto manasyimbe ama unsanda rausiso raije rai. Arono naije ovaro nanayao tami. ²³ Yesus pananave no Yavaro Amisy ama repono Salomo rai. ²⁴ Weti vatano Yahudi wanugano akiani muno wayao nanto Ai ware, “Mbeanimaibe Nyo ana no nai rangkokaibe reansai? Reamare Nyo naura kakavimbe: Winyamo tugae rave Mesias, wepi Win dako?”

²⁵ Yesus po raura akananto mansai pare, “Syo raura wasai to, weramu weapanave Sya ayaowe raije ramu. Risyi syo anapaporainye raroron manui rave, mamasyo Injayo Amisy apa bekere rai. Sya anapaporainye umaso mo Sya vambunine raroron kakavimbe irati wasai to. Weramu weapanave raije jeben tavon. ²⁶ Weapamo wapanave jeben weye weapamo wasato siso Sya maero domba maije ramu. ²⁷ Sya maero domba wo inanamote raraniv. Risyamo syo mansaen muno utavono Inai. Sya domba umaso maurata irati Sya kawasae mai. ²⁸ Risyi kovo nuge nuganu raunanto Sya kawasae mansai indamu ana tawan muno wene makare mai jeben. Vatane inta po manaonoambe inaneme raora jeben. ²⁹ Sya Injaya, Wepirati po maunande Rinai to, Apa vambunine manakoe rave, mo vambunino kaijo rui rakivan bintabo. Weti vatane inta po Sya kawasae mantauno Injaya aneme rai kakai. ³⁰ Risyi muno Sya Injaya irimamo intabo.”

³¹ Naije vatano Yahudi wo orame raugav akato, ware wo rave Yesus amau da kakai. ³² Weramu Yesus po raura nanto mansai pare, “Syo anapaporainyo manakoe manui rave rarorono wasai to, namirati Injaya po raunande Syo raijar. Sya anapaporainyo namije rui mirati mbewar ti wapare wapo rinamaugo rai?”

³³ Vatano Yahudi wo raura nanto Ai ware, “Nya anapaporainyo nyo raroron wemirati mbewar ti reamo orame rave namaug, oma jewena. Yara Winyo Amisy aura tantunawi weye winyare Winyamo Amisy pi Winy! Weramu wandaen Winyamo vatan

bayave pi Winy. Nyo Amisy aura tantunawi, weti reamare reamo naubaisy.”

³⁴ Umba Yesus po raura pare, “Tugae, Amisy taune po raura pare, ‘Weapamo maisyare Amisy amaaisy.’” Ayao umaso ratoe no Ayao Amisy wapare watavondi raije rai. ³⁵ Wandaen ayao ratoe Ayao Amisy rai mammo wamo inta ranigwane kakai. Maisyare somaisy, Amisy apa ayao umawe no rai tugae, namirati Po raura pare vatano wo Apa ayao raijare nawamo ‘maisyare Amisy amaaisy.’ ³⁶ Weti Amisy po mawain taije maisy, wabeanimabe weapare Risyo Amisy aura tantunawi weye Risyo raura syare Risyamo Arikainyo Amisy? Yara Risyamo Injayo Amisy po inapatimu muno Po inatutir ide no mine so. ³⁷ Ranivara anakero Injaya po inatutir Syo raijare jeben datire, weamo vemo wapanave Rinai nora. ³⁸ Wapare wapanave Rinai jeben, weamo syare wapanave Sya anapaporainye obo rai, weye omamo Amisy apa anakero Syo raijare mije. Maisyare naije, weapo raen muno weananta rai: Injaya pamo no intabove Inai muno Risyamo ino intabove Injaya ai.”

³⁹ Vatano Yahudi umaso ware ubera wo Yesus aijar akato, weramu Yesus nino mansai ti to.

Yesus to no mana Yordan ama ranijo warani

⁴⁰ Yesus po mana Yordan raotar akato, to nanto no ama ranijo warani, namirati wusyinoe Yohanes po vatane maugasya kuvuni mana rai. Umba Yesus no tawan no naije. ⁴¹ Muno vatano wanui ude Ai. Wo raura mansai vambinibe ware, “Yohanes po anapaporainye rarorone ramu, weramu ana po Vatane so aura mammo no rai tugae.” ⁴² Muno vatane wanui rave no naije wanave Yesus ai.

11

Lasarus gwanen dave ti kakai

¹ Vatan inta apa tame mirati Lasarus opamo nori rati Betania. Muno apa aname jiruma, aya tame mirati Maria muno Marta, inya no munijo namije rai tavon. ² Maria umaso mammo wanya mo manino mbovove rauvaru Amisy Yesus ajoe rai muno mo rakarivuinye veano ajo raupaisy mije. * Masyote inta Lasarus gwanen. ³ Weti apa aname umaso yo aya arakove inta atutir de no Yesusa nui po aya ayao raura Ai taiso: “Injae, rima anakavo Injae nanuga no ai rave opamo gwanena.”

⁴ Arono Yesus po ayao namije ranaun, Po raura pare, “Wanene somamo mo wene raugave ramu. Yara wanene so nande arakovo Lasarus ai indamu Injayo Amisy

po apa kovo ntiti raroron kakavimbe muno Po Arikainyo Amisy risya kovo ntiti raroron tavon.”

⁵ Yesus muiny irati Marta, Maria muno Lasarus mansai. ⁶ Weramu arono Po Lasarus anaun gwanen, weamo no vayave no naije masyote jirum akato. ⁷ Masyoto jirumo nanaije mewen, umba Po raura nanto Apa arakovo utavondi ai mansai pare, “Wade wamakata no munijo Yudea.”

⁸ Wo raura ware, “Injayo Kurune, kavoe vatano Yahudi una no Yudea ware wo orame rave winaepar, ubeker wo naubaisy. Weti mbeanimaibe nyare nyakato no ratuije?”

⁹ Yesus po raura ananeneaebe mansai pare, “Masyote anteter mba dave arono uma seo ao to pasyo akato. Weti vatano panya arono sansimane ntami apa kawi rantukame ramu, weye uma bar ti po apa unanuije raen kobe. ¹⁰ Weramu vatano wanya arono namane ntami indati awa kawije rantukam weye nuge ngkaumur. Sya masyoto ikakai rajie nde rainy, weti wanta kai.”

¹¹ Umba Yesus po raura akato pare, “Wama arakovo Lasarus niki to, weramu Risiamo kavinta ito Syo amin.”

¹² Yesus apa arakovo utavondi ai wo ayao rasakinav ware, “Lasarus niki, wea kavinta sauman.”

¹³ Yesus apa ayao ama ine mi so: Lasarus opamo kakai to. Weramu Apa arakove wo rakarae ware Yesus pare Lasarus ta niki vayavea. ¹⁴ Maisyare omai ti, Yesus po raura kakavimbe mansai pare, “Lasarus opamo kakai to. ¹⁵ Arono kakai kobe, rino no ratuije ramu. Weramu inanayanambe weye syare Syo ana inta rarorono wasai indamu wapanave kobe. Soamo wade wanta no Lasarus nui.”

¹⁶ Naije Tomas napi aura tavonamo Didimus (weye arikainyo tapume pa) po raura nanto Yesus apa arakovo kaijinta mansai pare, “Wade wantavondi ai muno wangkakai atavon!”

Yesus po Marta muno Maria yayove

¹⁷ Arono Yesus puuya nanto no Lasarus norije rai, Lasarus tami no aipapo rajia masyote mambi to. ¹⁸ Munijo Betania mangkepan no Yerusalem, ama waravainye mamu kilometerije mandei. ¹⁹ Vatano Yahudi wanui rave ude wo Marta muno Maria yapan indamu woyov weye aya anakavo kakai.

²⁰ Arono Marta mo Yesus anauno dei, muje ti nande Ai no apa unanuije rai, yara Maria no no yavare ama uga. ²¹ Marta mo raura nanto Yesus ai mare, “Injae, ranivara Winy no no naiso ratire, sya anakavo pamo kakai ramu. ²² Weramu syo raen Amisyse

pamo indati po Winya nyo ranajo Ai raunande.”

²³ Yesus po raura akananto Marta rai pare, “Nya arakova indati kovakato no wene rai.”

²⁴ Marta mo raura mare, “Syo raen Lasarus kovakato arono munije ama akari.”

²⁵ Yesus po raura nanto rai pare, “Risyrati syo kove raunande muno Syo kovakato raunanto vatano kakai to mansai. Are pirati panave Rinai to, umba wene nde anasine rai kai, weramu opamo indati kova no tawan weye Syo kovo nuge nuganui raunande ai. ²⁶ Muno vatano kova no so ara panave Rinai, wepamo weno nuge nuganui omamo siso rai ramu. Winyamo nyanave ayao Syo raura so rai rako?”

²⁷ Marta ama ayao mo raura mare, “Risyanave Injae winai, Winyamo Arikainyo Amisy muno Mesias. Winyirati Injayo Amisyse po natutir nde no mine so wepi Winy.”

Yesus poyov

²⁸ Marta mo ama ayao raurawa mewen, naije makato mo ama rijata Maria rawain muno mo ransamuabe nanto rai mare, “Injae Kurune pamo no no naisoa. Po nawain.”

²⁹ Maria mo raraniva jeben, umba mbe-seo mavave nto no Yesusa nui. ³⁰ Arono naije, Yesus pana siso munijo namije rai rainy, yara no no unanuije rajia nene, nai rati Marta nande aijoe. ³¹ Vatano Yahudi nanawirati wo Maria rayove no ama yavar wo raen mbe-seo mavave musyo. Weti wuruta utavondi rai, weye wo rakarae ware vemo moronto moyov no aipapo.

³² Maria muiya nanto Yesus nori muno mo aen, ama vukane ranteteraje no amun muno mo raura mare, “Injae, ranivara Winy no no naiso ratire, sya anakavo kakai ramu.”

³³ Arono Yesus po Maria raen moyov muno vatano Yahudi utavondi rai woyov tavon, anuga ranimaambe muno mbe memembe rave. ³⁴ Naije Po manajo pare, “Nai rui rati wapo Lasarus augaveta antuna?”

Wo raura Yesus ai ware, “Injae, nde ramu Nyo raen.”

³⁵ Naije Yesus poyov.

³⁶ Weti vatano Yahudi wayao ware, “Waperata Opamo muiny dave irati Lasarus ai!”

³⁷ Weramu vatano Yahudi nanawije inta wo raura ware, “Po saumane raunanto vatano amije ntuba ai. Weti veanimaibe Po apa vambunine rave Lasarus apa kakai raorai jeben?”

Yesus po Lasarus aijaseo kovakato

³⁸ Yesu anuga ranimaumbe muno mbe memembe akato, weti to no aipapo. Aipapo namije mamu tinda ma, orame veano ama unsanda rauguji. ³⁹ Yesu payao pare, “Orame wato rajjato ngkakavin.”

Weramu Lasarus napi kakai to so apa anamo Marta mayao akananto Yesu ai mare, “Weramu, Injae, sya anakavo Lasarus kakai apa masyote mambisy tami no aipapo rai. Indati apa kopa mandami ti ranavan!”

⁴⁰ Yesu po raura nanto Marta rai pare, “Umawe Syo raura kakavimbe nai to: syare ranivara nyanave, indati Amisy po apa kovo ntiti raroron.”

⁴¹ Weti wo orame umawe rajjato ngkakavin. Yesu peraseo no naumo warae muno payao pare, “Kove raura akaore Sya Injajo Amisy winui weye Nyo ana Syo ranajo raranu to. ⁴² Syo raen anakotaro rui Syo ranajoeve mamu Injae nyo raraniv. Weramu vatano wanui rave soamo usyai inakijaniri, weti Syo sya sambaya so raura indamu wo ranau ti wanave ware Injajo Amisy winyo inatutir.”

⁴³ Arono Yesu po ayao so raurawa mewen, naije gwain akoeve, “Lasarus, nyuje!”

⁴⁴ Naije kobe vatano kakai to napije puje. Aneme ajoe mamu ansune vasye ta mo rakepana nene muno ansune vasye rave amune rakepane mamu ta no tavona nene.

Yesu payao nanto vatano usyai no naije mansai pare, “Wapo apa ansune vasye rapaya ai indamu vemo panyawa nsaowave ai nora.”

Vatano wanyinyaube indamu wo Yesu aubaisy

(Matius 26:1-5; Markus 14:1-2; Lukas 22:1-2)

⁴⁵ Arono Lasarus kakajoe, vatano Yahudi wanui ude wo Maria rapan, weti wo Yesu apa anaporainye umawe raen kakavimbe, naije wanave Ai. ⁴⁶ Weramu vatane inta uta awa ayao nsiso irati vatano Parisi mansai, wo Yesu apa ana dave umaso raura tatugadi. ⁴⁷ Maisyare omai ti, vatano Parisi nawe, syeno akokoe nawe, akari akokoe Yahudi nawe wanugan indamu wayao rai. Ware, “Animaisy mirati wamo rave Vatane wato ai? Wepamo anaporainyo manui rave Po raroron to. ⁴⁸ Ranivara wamo apaya vayave Po apa anakere so rajja tutir, weamo indati vatan tenambe wanave Ai. Wea indati akarijo Roma uma be akarive wansai po apa naite matutir ude wo wama Yavaro Amisy randamisy muno wo wama susyo Yahudi mandamisy tavon.”

⁴⁹ Arono tumo naije, syeno titi apa tame mirati Kayapas. Po raura pare, “Weapamo wapantatukambe vintaboa! ⁵⁰ Muno wananta anakotare so rajje ramu! Vatano Yahudi wangkakai vintabo omamo maimaisy ramu, yara vatane intabo kakaijo wansai tenambe wemi ngkov.”

⁵¹ Kayapas po ayaowe umaso raura, taune apa ana po ratantona mamu jewen yara nori rati Amisy ai. Weye Kayapas opamo syeno titi piye arono tumo naije, weti po raurairive pare indati Yesu kakai jirati vatano Yahudi mansai. ⁵² Muno indati kakaijo vatano Yahudi obo mansai ramu, yara indamu Amisy po apa arikainy una no munijo rui rui vayave no mine vone so manugan ti ube intabove.

⁵³ Arono naije kobe vatano Yahudi wanyinyaube indamu wo Yesu aubaisy. ⁵⁴ Maisyare omai ti, Yesu po aroron akato no vatano Yahudi wanui mansamun akato jewen. Po munijo Yudea rapaya nara poroto no munije inta ama tame Efraim, mararai no nugo vabukane vono maninimbe. Yesu muno Apa arakovo utavondi ai uta una no naije.

⁵⁵ Arono naije vatano Yahudi awa Ono Paska mararai kobe. Weti vatano Yahudi wanui una no munije raita wuruta no Yerusalem indamu wo manasine rarondom mamaisy awa koane rai indamu ukakavin utavondi jirati Ono Paska rai. ⁵⁶ Wo Yesu akani, weti arono wanugan no Yavaro Amisy, wo manajo vambinibe ware, “Wapare Yesu indati de one so rai rako jewena rako? Animaisy mi wapo ratantona?” ⁵⁷ Wo raura vambinibe tai maisy weye syeno akokoe muno vatano Parisi awa ayao rauguje to ware vatane inta po Yesu apa no rajje raen, weamo to po raura mansai indamu wo ajar.

12

Manine rauvaru Yesu ajo rai no Betania
(Matius 26:6-13; Markus 14:3-9)

¹ Arono Ono Paska nande rainy, yara masyote kawije intabo ndento rati, naije Yesu to no munijo Betania. Lasarus, napi-rati Yesu po ajaseo kovakato, opamo nori rati Betania umaso. ² Weti munijo namije vatane wo anaisy ratayao Yesu ai. Muno Marta omamo mo anaisy raun mo raurande vatane mai. Lasarus opamo tavondi apa arakove mai wisisyo Yesu atavon.

³ Naije Maria nde mo manino narwastu botorije inta raugav. Manine umaso mbovov muno ama mangke nseo rave. Umba Maria mo manine umaso rauvaru Yesu ajoe rai, muno mo rakarivuinnye veano raupaisy. Weti manine umaso

ranavan mbovove ntami jirati yavaro we rai tenambe.

⁴ Weramu Yudas Iskariot no no naije tavon. (Opamo ato siso Yesus apa arakove matavon muno wepirati kavinta pare po Yesus amavun.) Arono naije Yudas po raura pare, ⁵ “Wakoe! Manine uma wato ama mangke nseo rave!”^{*} Weti veanimaibe mo rambayane jewen indamu ama doije raugav, wamo raunanto vatano awa ananuge meweno maije mai?” ⁶ Payao tai somaisy, weramu opamo aemeno vatano awa ananuge meweno maije mansai ramu. Yara beker po doije umaso rave taune amarom, weye opamo po Yesusa pe apa arakovo utavondi aije nawe awa doijo ranugane randi, weramu taune panaonoambe rai.

⁷ Weramu Yesus po raura Yudas ai pare, “Weinya! Mbemo nyo wanya so raura nora! Weye mo manine rauvaro Rinai indamu mo inanasine ratayao Sya masyoto inantuna raije rai. ⁸ Vatano awa ananuge meweno mai wenawamo una no wapa yasyine rai tutir. Yara Risiyamo rino no wapa yasyine mammo ama masyote nggwaravainy akatoe ramu. Weti wanya so mare mo ana ngkove inta raunande Rinai masyoto unumeso, mo raunande kai.”

Vatano Yahudi manuga mamuno Lasarus ai indamu wo aubaisy

⁹ Vatano Yahudi wanui udaniv Yesus no no ratuije, weti wuruta no naije indamu wo akani. Weramu wo Yesus obo akani ramu, yara ware wo Lasarus aen tavon, wepirati Yesus po aijaseo kovakato no wene rai. ¹⁰ Syeno akokoe awa ayao intabo indamu wo Lasarus aubai tavon, ¹¹ weye wepirati bewaramo vatano Yahudi wanui wo awa syene mapaya yara wakata wanave Yesus obo ai.

Yesus aovambe no Yerusalem

(*Matius 21:1-11; Markus 11:1-10; Lukas 19:28-38*)

¹² Siman akato vatano wanui ude indamu utavono Ono Paska rai no Yerusalem. Vatano wanui umaso wo Yesus anaun panya ti de to. ¹³ Naije wo angkaji waowe raugav, mananibe wusya wo Yesus aovambe ware,

“Amisyee ararimbe!

Kove ngkov irati Napi de tamo Amisyee rautane Ai!”[†]

Kove ngkov irati Akarijo Titi Israel ai!”

¹⁴ Yesus nanto keledai kamurame inta rai muno seo tuna rai, maisyare muno wusyinoe Ayao Amisyee mo ratoea ntami to mare:

¹⁵ “Vatano Yerusalem, † wajani nora! Waperata! Wapa Akarijo Titi pi de, seo tuna keledai kamuram inta rai!”^{*}

¹⁶ Arono naije Yesus apa arakovo utavondi ai nanawamo unanta ayao umaso rai jewen. Weramu arono Yesus kovakato ti seo pakato no munijo ntiti warae, naije umba mansaemen animaisyee mirati vatano wanui wo rave Ai umawe rai, omamo Ayao Amisy mo raurairive ti ratoea ntami to.

¹⁷ Vatano wanui nanawirati utavondi arono Yesus po Lasarus awain puje aipapo rai muno Po aijaseo kovakato no wene rai, soamo wo Lasarus apa kovakato raura kakavimbe. ¹⁸ Wemi mbewar ti vatano wanui wuje ra unande Yesus ai no unanui, weye udaniv Wepirati po anapaporainyee umawe raroron to. ¹⁹ Weti vatano Parisi upari, wo rangkino taune mansai vambinibe ware, “Abo, waperata! Vatana tenambe uta utavono Yesus ai! Muno wamo mansopi kakai!”

Vatano Yunani inta wo Yesus akani

²⁰ Ono Paska umaso rai, vatane uta no Yerusalem indamu ube sambayambe. Muno vatano Yunani inta utavondi tavon. ²¹ Ude Pilipus ai muno wo raura ware, “Injae winy, reambeker wananta irati Yesus ai.” (Pilipus opamo vatano Betsaida no no Galilea.) ²² Weti Pilipus to po raura Andreas ai, umba yurija yo raura Yesus ai.

²³ Naije Yesus po raura pare, “Sya masyote nande to: kavinta rati umba Injajo Amisyee pare po Arikainyo Vatan risya kovo ntiti raroron kakavimbe. ²⁴ Syo raura tu-gaive: Kasyambere kami intabo kai, ranivara avaya kopa rai jewen, weamo be intabove tutir. Yara intabo so avaya kopa rai, indati po kami manui rauguje. ²⁵ Are pirati po apa kovo mine so bo ratantona, opamo indati apave kovo nuge nuganui raije ramu. Yara are pirati akirive taune apa kovo mine vone so rai, opamo indati apave kovo nuge nuganui rai. ²⁶ Are pirati pare panapatambe Rinai, weamo syare tavondi Inai indamu Sya tuna ri rui, opamo tuna inatavon. Vatano panapatambe Rinai pamo indati Injajo Amisyee po apa tame rajaseo ntitive.”

Yesus po apa weno nde ai raura kakavimbe

²⁷ Yesus po raura nakato pare, “Soamo inanuga nseo majeve. Weti animaisyee mi syare Syo raura? Indako Syo raura syare, ‘Injajo Amisy, Nyo siurijo nande so rapaya Rinai kai?’ Vemo Syo raura taije maisy inya!

* **12:5** Manino narwastu botorije intabo ama mangke mi doije vasye 300. Arono nugo Roma wusyinoe, anakere ama doije veano ravae no taiso: anakero masyote intabo weamo doije vasye intabo ai, weti doije vasye nanto no 300 mare anakere rajara masyote 300 tavon. † **12:13** Mazmur 118:25-26 † **12:15** “Vatano Yerusalem” muno “vatano Sion” aya ine mamai kava, weye munijo Yerusalem ntami no Unato Sion rai. † **12:15** Zakaria 9:9

Weye siuri so mirati mbewaramo ide no mine vone so. ²⁸ Injayo Amisy, Nyo nya kovo ntiti raroron kakavimbe!”

Naije kobe daniv anamote no no munijo ntiti ngkinde mare, “Tugae, Syo sya kovo ntiti raroron kakavimbe to, muno indati syare Syo raroron akato!”

²⁹ Vatano wanui usayai no naije wo anamoto namije raraniv. Wo raura ware, “Katitire mi ngkino we ndako?”

Weramu inta nawamo ware, “Oma jewena! Yara naito Amisy e inta pi payao de Yesus ai!”

³⁰ Umba Yesus po raura mansai pare, “Amisy e anamoto namije ngkino wasamarom indamu wapo ranaun. Yara ngkino rinamarome ma jewen. ³¹ Soamo masyoto mangke raugaje nande to, arono Amisy e pare po mangke rapatimugo vatano mine so mansai. Muno pare Po Anakakai Akoe, opirati be akarive mine so rai, awatambe pusyo. ³² Weramu Risyamo arono indati wo inajaseo ti rino vombe irati mine so rai, weamo Syo vatan tenambe maugav ti wanave Rinai.” ³³ Yesus po raura taije indamu Po apa kakaijo sawa no inyo kapite rai raura wusyimbe.

³⁴ Vatano wanui nanawije wo raura Yesus ai ware, “Mbeanimaibe Nyo raura nyare wo Arikainyo Vatan aijaseo vombe no mine so rai ti kakai? Arikainyo Vatan napije pa are piye? Opamo Mesias we dako? Weramu reama Ananyao Musa mo ratoe mare Mesias opamo kova nuge nuganui, yara kakai jewen.”

³⁵ Yesus apa ayao po rasakinavo mansai pare, “Masyote kavinta vayave vare no wasarijat. Weti wapanya arono vare no wasarijat, indamu vemo wapakakave nora. Weye are pirati pare panya namane rai, opamo apa to rai mamo ngkaumudi weti pare toare rui. ³⁶ Risyirati inaurata irati vare so rai. Weti syare wapanave Rinai arono rino wasarijata nene so, indamu wawawainamo arikainyo var.”

Arono Yesus po ayao so raurawa jewen, puje ti poroto kokaibe mansai.

Veanimaibe vatano Yahudi wanave jewen

³⁷ Yesus po anapaporainyo manui rave raroron, weti vatano wanui wo raeno mamije rai, weramu wanave Ai ramu. ³⁸ Ana nande so mamaisyo Ayao Amisy namirati anawae Yesaya po ratoe rai pare: “Amisy e winy, vatane wanave ayao reamo ravove raije jewen.

Muno unanta Amisy nya anapaporainyo nyo raroron rai jewen tavon.”³⁹

³⁹ Ana mbewar ti vatano nanawije wanave kakai, mamaisy irati anawae Yesaya po ratoe rai tavon no taiso:

⁴⁰ “Amisy e po raura pare,

“Syo mansamije raveti ntuba

muno manuga raveti matu,

indamu vemo wo raeno mamije rai nora,

muno manuga nanto rai nora.

Wonayo usakinav wakare Rinaiji,

wemi mbewar Syo saumane raunande mansaije ramu.”⁴⁰

⁴¹ Ayaowe umaso Yesaya po raura weye po Yesus apa kovo ntiti namije raen, weti po raura kakavimbe.

⁴² Arono naije, akarijo Yahudi wanui wanave Yesus ai. Weramu wo awa wanave so raura kakavimbe ramu, weye wo vatano Parisi masyanivo wo mansaorai usisa no awa yavaro sambaya rai. ⁴³ Wo vatane masyanive omamo manakoe irati wo Amisy e asyanive rakivan, weye ubeke dave ware vatane umarinsembe mai.

Yesus po mangke rapatimu raura

⁴⁴ Umba Yesus gwaino anamoto manakoe rai pare, “Vatano wanave Rinai onawamo wanave Ribui inai jewen, yara wanave Injayo Amisy po inatutire Ai tavon. ⁴⁵ Muno vatano wo inaeno mamije rai, onawamo wo Amisy po inatutire aen. ⁴⁶ Ride no mine so maisyare vare ramaisy. Are pirati panave Inai, weamo tuna kaumure ama uga rai jakatoe ramu.

⁴⁷ Yara vatano wo Sya anyanyo raraniv weramu utavono rai jewen wenawamo Syo mangke raugaje mansai jewen. Weye ride indamu Syo mangke raugavo vatano mine so mai jewen, yara Risy a ide mamo indamu Syo vatano mine so mapaya awa ayao kakaije rai. ⁴⁸ Weramu vatano are pirati po inatugaro marambe muno po Sya ayao raranive jewen, opamo indati mangke rapatimugo ai arono munije ama akari. Mangke rapatimugo ai weye ponae Sya anyanyowe rai. ⁴⁹ Weye Risy a anyanyo syo raura mamo muje no taune Rinai ma jewen, yara Injayap apa ma. Wepirati po inatutir weti ide, weti animaisy e mirati pare Syo raura, wemamo Syo raura kobe. ⁵⁰ Muno Syo raen Amisy e apa anyanyo mamo mo kovo nuge nuganuije raunande. Weti ana rui mirati Syo raura omamo mamaisy irati Injaya apa ana po raura Rinai bo rai.”

13

Yesus po apa arakovo utavondi ai majo rarandom

¹ Masyote intabo akato sisa irati Ono Paska rai. Arono naije Yesus po raen Apa masyoto de no mine so ama marane nde

nande indamu puje mine so raora, pakato no Ajaya nui. Muiny irati Apa kawasae una no mine so mansai, muno muiny irati mai tutira ntoa ama marane rai.

² Yesus muno Apa arakove wisyisy no naman. Muno Yudas, opamo Simon Iskariot apa kavo piye, tavondi. Weramu Anakakai Akoe apa bekero ngkakai nsiso Yudas anuga rai to indamu po Yesus amavun. ³ Yesus po raen Ajayo Amisy po vambunine raunande Ai indamu be akarive anakotare rai tenambe. Po raen tavon Wepamo no no Amisy nui ti de no mine so muno kavinta pakare no Amisy nui. ⁴ Maisyare omai ti, seo tet kobe Po apa ansuno manawadi raugaje muno Po andukije inta rave atiririje raweyae. ⁵ Naije Po mana rauvaro ugane inta rai muno Po apa arakovo utavondi aije majo rarandom muno Po apa andukijo uma po rave atiriri raweyae we veano mana raupaisy ngkangkaman.

⁶ Arono Simon Petrus apa varoro Yesus po ajo rarondome rai, naije po raura nanto Yesus ai pare, “Injae, nyare Nyo inajo rarandom tavona e?”

⁷ Yesus po apa ayao raura ai pare, “Soamo winanto ana Syo rave so ama ine raije ramu, yara indati masyoto makare umba winanto rai.”

⁸ Petrus po raura akananto Ai pare, “Injae, wenora! Mbemo Nyo inajo rarandom inya! Mamaisy ramu!”

Yesus po apa ayao raura ai jakato taiso: “Ranivara Syo najo rarondome jeben, weamo winyamo Sya arakovo tavondijo rinai pi winye jeben.”

⁹ Umba Petrus po raura pare, “Maisyare omaisyamo, Injae, inajo bo rarandom weamo nsopi nora, yara inanem muno inakari ntenambe!”

¹⁰ Yesus po raura akananto ai pare, “Vatano po mana rayajam opamo kakavimbe tenambe, weti vemo po ayajam akato nora, yara ajo bo rarandom ngko kai. Weti weapamo wakakavimbe, weramu vatane inta no no wapa yasyin kakavimbe jeben.”

¹¹ Yesus po vatano pare po amavune aen to. Wemirati mbewaramo Po raura pare, “Weapamo wakakavimbe, weramu vatane inta no no wapa yasyin kakavimbe jeben.”

¹² Yesus po majo rarondoma jeben, naije Po apa ansuno manawadi raugakasya Ai muno seo tuna nakato. Umba Po raura akananto mansai pare, “Weapamo wananto Sya ana syo rave wasai kavoe raija rako? ¹³ Weapo inawainamo Kurun muno wapa Akari. Wapo inawaine somamo mamaisy weye tugae Risyamo wapa Kurune muno wapa Akari pi Risy. ¹⁴ Risyi

wapa Akari muno wapa Kurun syo wasajo rarandom, weti syare weapamo wapo rinamaisy indamu wapo taune wasajo rarandom vambinibe. ¹⁵ Sya ana syo raijaro wasai so mbe unanuive wasai, indamu weapo raijaro wasai vambinibe maisyare muno Risy ramaisy. ¹⁶ Syo raura tugaive: Vatano panapatambe apa akarije ai opamo panakoe po apa akarije akivane ramu. Muno vatano akarije po atutire opamo panakoe po apa akarije akivane tavone ramu. ¹⁷ Soamo weapo Sya ananyaowe so raen to, weti ranivara wapo raijaro rarijati, weamo kove ngkovo irati wasai.”

Yesus daura to pare indati vatane inta po amavun

(*Matius 26:20-25; Markus 14:18-21; Lukas 22:21-23*)

¹⁸ “Sya ayao syo raura somamo indati Syo wasaura tenambe ma jewena. Syo wasaen tenambe, weye Syo wasapatimu to. Weramu vatane inta no no wapa yasyin anuga ngkakajo Rinai, indamu mamaisy Ayao Amisy mo raurairive rai no taiso:

‘Vatan inta wepirati pisyisyo inatavon, opamo indati marovave Inai.’¹⁸

¹⁹ Ayao namije mamamo ama masyote nde nande rainy, yara Syo raura wasai wusy-imbe rati. Weaveti arono indati nde nande to, syare wapo raen Sya urairi mo ramai dave, naije wapare, ‘Mesiasa pi so.’

²⁰ Syo raura tugaive: are pirati bekobe irati vatano Syo atutire ai, opamo maisyare bekobe irati Rinai. Muno are pirati bekobe irati Rinai, opamo maisyare bekobe irati Sya Injajo po inatutire Ai tavon.”

²¹ Yesus po ayao umaso raurana mewen, umba anuga nseo maje, naije Po raura pare, “Syo raura tugaive, weapamo indati inta nyo inamavun nanto Sya marova mansai.”

²² Arakovo utavondi Ai upaparo mansai, weti wo mansami ranyanyut tutudi weye wantatukambe are pirati Yesus po aura so.

²³ Arono naije arakovo napirati Yesus anuga no ai rave tuna pangkepano Ai.* ²⁴ Simon Petrus po aneme veano arakove umaso angki indamu po Yesus anajo are pirati Po aura so.

²⁵ Weti arakovo napi pangkepano Yesus ai umaso po anajo pare, “Injae, are pirati Nyo aura umaso?”

²⁶ Umba Yesus po raura akananto pare, “Vatano Syo rotije rayansundi ti Syo raurananto po raisy, wepirati napije to.” Naije Yesus po roti nako raotare inta raugav muno Po rayansundi Po raunanto Yudas ai, opamo Simon Iskariot apa kavo piye.

* 13:18 Mazmur 41:9

* 13:23 Arakovo Yesus anuga no ai rave wepamo Yohanes.

²⁷ Arono Yudas po anaisyo Yesus po raunande raija to, naije kobe Anakakai Akoe siso anuga rai.

Naije Yesus po raura nanto Yudas ai pare, "Nyavave, anakotaro nyare nyo rave mamono nyo rave riije." ²⁸ Weramu vatano utantuna wisyisyo Yesus atavon inta nanto irati Apa ayao po raura nanto Yudas ai umaso raije ramu. ²⁹ Inta nawamo wo rakarae ware vemo Yesus po Yudas atutir indamu po anakotare inta ramavuno one so rai. Indako jewenamo Yesus po atutir indamu po doiije inta raunanto vatano awa ananuge meweno maije mansai, weye Yudas wepirati po arakove awa doiije randi.

³⁰ Arono Yudas po rotije raija to, naije panawadi pusyo kobe. Namane nde to.

Yesus po ananyao wanyine raunande

³¹ Arono Yudas pusyo to, Yesus po raura pare, "Kavinta rati Amisye po Arikainyo Vatane risya kovo ntiti raroron kakavimbe, muno ana indati nande Rinai mo Amisye apa kovo ntiti raroron. ³² Syo Amisye apa kovo ntiti raroron, weamo Amisye pavave po Risya kovo ntiti raroron.

³³ Sya arikainye weap, Risyamo ino akatoe wasarijata masyote nggwaravainy akatoe ramu. Weapamo indati wapo inakani, weramu munijo syoroto rai, weapamo indati wata rai kakai. Syo ayao so raura wasai maisyare muno umawe Syo raura akarijo Yahudi mansai to.

³⁴ Ananyao wanyin Syo raurade wasai mi so: Wamuiny irati wasai tutudi. Maisyare rimuinyo wasai, maisyare omai tavon weapamo wamuinyo wasai vambinibe. ³⁵ Ranivara weamuinyo wasai tutudi, naije vatan tenambe wo wasaen ware weapamo vatano watavondi Rinai."

Yesus daura to pare Petrus indati po amamarave

(*Matius 26:31-35; Markus 14:27-31; Lukas 22:31-34*)

³⁶ Simon Petrus po Yesus anajo pare, "Injae, nyare nto no rui?"

Yesus po raura akananto ai pare, "Risya munijo syoroto rai soamo Winyamo ntavondije ramu. Weramu masyoto rijate indati wintavondi Inai jaje."

³⁷ Simon Petrus po raura akato pare, "Injae, mbeanimaibe nyare soamo risya tavondi Nai jewen? Risyamo indati syo inanasine raunandea ikakai natavon!"

³⁸ Yesus po apa ayao rasakinav akananto ai pare, "Nyare winanasine raunande ti ngkakai rinatavon, weramu Syo raura tugaive: namane so mangkuere pana kokebe rainy, indati winyo inamamaravea susye mandei!"

14

Yesus wepirati be unanuive wansai indamu wanta Injayo Amisye ai

¹ Yesus po raura pare, "Wabemo wasanuga mamaun inya. Wapanave tawano Amisye ai; syare wapanave tawano Rinai tavon. ² Sya Injaya apa yavare mamono ama tanoano ta na rai manui rave. Risyoroto indamu Syo Injaya apa yavare ratayao wasanyut. Sya ayao syo raura so no rai tugaie; syangkarive ramu. ³ Arono syusya to Syo tanoane ratayao wasanyut, Risyamo indati syakare Syo wasaugav, indamu rui rati rito nori, weapamo wano rai tavon. ⁴ Weti unanuijo Syo raito no munijo Syo ratayao wasai omamo weapo raen tavon."

⁵ Umba Tomas po raura Yesus ai pare, "Injae, Nya nto rai mamono reamantatukambe rai. Weti unanui Nyo raito mamono nyare indati reamo raen tai rui?"

⁶ Yesus po raura kakavimbe pare, "Risyrati unanui nto no Injayo Amisye nui; muno Risyrati sya ayao mamai tugaie; muno Risyrati syo kovo nuge tuganuije raunande vatane mai. Ribui syirati unanuijo vatane uta no Injayo Amisye ai. ⁷ Ranivara weapo rinaen tugaive, weamo weapo Sya Injaya aen tavon to ije. Tugaie, wapo rinaen to, weti soamo wapo Injayo Amisye aen dave muno wapo aeno wasanuga rai."

⁸ Pilipus po raura nanto Yesus ai pare, "Injae, Nyo Amisye aroron indamu reamo aen dave, wea umba reamare mamai dave reansai to."

⁹ Weramu Yesus po raura akananto ai pare, "Pilipus, nugoenta rave to ituna wasatavon, weramu nyantatukambe Rinai. Vatano po rinaeno amije rai, weamo po Injaya aen to ije. Weti mbeanimaibe nyo raura nyare Injayo Amisye arorono wasai? ¹⁰ Risyamo ino intabovon no Injayo Amisye ai muno Injayo Amisye no intabovon Rinai. Pilipus, syo ratantona winyanave ayao umaso rai kobe rainy. Sya ayao syo raura nai omamo ayao no taune Rinai vayave jewen. Yara Injayo Amisy, Wepi no tawan intabovon no Rinui, Po raugaje inda Syo raura. Muno Sya ana syo rajjar omamo Amisye wepi po raugaje inda Syo rajjar. ¹¹ Syare wapanave Sya ayao so rai: Risyamo ino intabovon no Injaya nui muno Injaya pamo no intabovon Rinai. Yara jewenamo, syare wapanave Rinai weye Syo anapaporainye manui raroron to.

¹² Syo raura tugaive: vatano are pirati panave Rinai opamo indati po Sya anakero ridaija to, raija tavon. Muno opamo apa anakero daijare ma indati mo Sya rakivan, weye Injayo Amisye po vambunine raugaje ai weye risyakato no Injaya nui. ¹³ Muno

anakotaro rui vayave wapo ranajo Rinai muno wapo Sya tame veano raokae, indati Syo raugaje wasai kobe, wirati indamu Risy Arikainyo Amisy syo Injaya apa kovo ntiti raroron kakavimbe. ¹⁴ Anakotaro rui wapo ranajo muno wapo Sya tame veano raokae, Syo raugaje mamaisyo wapo ranajo rai kobe.”

Yesus po Amisye apa Anawayo Vambunine raurairive

¹⁵ “Ranivara weamuiny irati Rinai, weamo weapo Sya ananyao syo raugaje rarijat. ¹⁶ Indati Risy Injaya anajo indamu Po Anawayo Vambunino mo inanigwane raugaje wasai indamu Mo wasaeranande muno ntuna wasautana nuge nuganui. ¹⁷ Anawayo Vambunino namije mo Amisye apa ayao tugae obo raura. Vatano mine so wonayo Anawayo Vambunine rai weye wenawamo wo raeno mansamije rai ramu muno wantukambe Rai. Weramu weapamo wapo raen weye ntuna wasautan muno no tawan no wasanuga rai.

¹⁸ Weapamo Syo wasapaya watantuna arikainyo vavabe ramu. Yara Risyamo syakare wasai. ¹⁹ Masyote nggwaravainy akatoe ramu, yara kavinta vayave indati vatano mine so mo inaeen akatoe ramu. Weramu weapamo wapo inaeen akato. Risyamo ikova no tawan. Maisyare omai ti, Syo kovo nuge nuganuije raugaje wasai indamu weapamo wakova no tawan tavon. ²⁰ Arono naije indati wapo raen kakavimbe: ino intabove Injaya ai, muno weapamo wano wano intabove Rinai, muno rino intabove wasai.

²¹ Vatano wo Sya ananyao raraniv muno wo rarijat, wenawirati muiny irati Rinai. Muno vatano umuiny irati Rinai, vatano nanawije Injayo Amisye muiny irati mai. Muno Risyamo rimuiny irati mai tavon muno inaroron kakavimbe irati mai.”

²² Umba Apa arakove inta apa tame mi Yudas (Yudas Iskariot wepi so pa jeben). Yudas napiso po Yesus anajo pare, “Injae Yesus, veanimaibe nyare winaroron kakavimbe reansai, yara vatan tenambe mine so mansai jeben?”

²³ Yesus po raura kakavimbe mansai pare, “Vatano muiny irati Rinai opamo po Sya ananyao rarijat. Indati Sya Injaya muiny irati ai. Injaya muno Risy irinde ai muno irimintantuna irati vatano napije autan. ²⁴ Vatano muinyo Rinai jewene nanawamo ubeta Sya ananyao raije ramu. Ananyao namije mamono no taune Rinai mamono jeben, yara no no Injayo po inatutire Ai.

²⁵ Arono ta Risy wana tenambe nene so, Syo ayao so raura tenambe wasai. ²⁶ Weramu Anawayo Vambunin,

namirati Injayo Amisye po raunande wasai indamu Mo inanigwan, Wemirati mo wasaeranande muno Mo wasanyao anakotare rai tenambe. Omamo no wasautan indamu vemo wasanimari Sya ananyao syo raugaje wasai rai jinya, yara wasaemen dai tenambe. ²⁷ Vemo wasanuga mamaun nora muno wajani nora. Saumane mamono Syo raugaje ntuna no wasanuga rai, taune Risy saumano syo raunande. Saumano namije mamono mine so ama mo raunande ramaisye ramu.

²⁸ Risy ayao syo raura mamono weapo raranivo Inai to syare, ‘Indati syoroto, weramu indati syakare wasai.’ Arakove, ranivara weamuinyo Inai, weamo wasanayanambe Risy syoroto so rai, weye syakato no Sya Injaya nui, wepirati panakoe rinakivan. ²⁹ Ayao namije mamono ama masyote nde nande rainy, yara Syo raura wasai wusyimbe rati. Weaveti arono indati nde nande to, syare wapo raen Sya urairi mo ramai dave, naije wapanave Rinai.

³⁰ Syo raura wasaija nggwaravainy akatoe ramu, weye Anakakai Akoe pavave de. Wepi be akarive mine so rai, weramu opamo be akarive Rinai jeben. ³¹ Yara ana indati nande Rinai mamono indamu vatano mine so wo raen Risyamo rimuiny irati Injayo Amisye ai muno Apa ana po inatutir indamu Syo raijar omamo Syo raijar tenambe, yara Syo inta rawatambe ramu.

Yombe, Sya arakove. Kova to! Wade ramu wanta.”

15

Yesus aurata irati anggurije ama mote rai

¹ Yesus po taune aura kakavimbe akato pare, “Risyirati inaurata irati anggurije ama moto ngkove rai, wemi man dave. Muno Sya Injaya wepirati be akarive nawaisyo angguri umaso rai. ² Risy aneme inta mare ama mane meweno rai, weamo Injaya po raotar. Yara anemo rui mirati ama mane no rai, weamo ama wao inta ratondomo indamu ngkakavino rai indamu ama mane makauje rai ti manui rave. ³ Weapamo wakakavimbe, weye Syo sya ananyao raugaje wasai mo wasanuga ratayaowa ngkakavimbe to. ⁴ Syare wana tawan intabove no Rinai muno Risyamo ino tawan intabove wasai tavon. Anggurije aneme inta mare mpatimu ti no mumuimbe, weamo ama mane meweno rai, yara aneme no tawan no anggurije ama mote rai, weamo man dave. Maisyare omaisy wea tavon, ranivara weapamo

wano tawan no Rinai jewen, weamo wapa ana wadave ti ngkove mewen.*

⁵ Risyirati inaurata irati angguriye ama mote rai muno weapirati wasaurata angguriye ama aneneme rai. Are pirati no tawan no Inai muno rino tawan no ai, indati apa ana dave ngko dave mamano manui. Weramu wana tawan no Rinai jewen, weamo wapa ana wadave ti ngkove ma mewen. ⁶ Are pirati no tawan no Inai jewen, indati syo amaugo marambe maisyare angguriye ama anemo ngkanen. Anenemo ngkanen omamo indati ranugande intabo ramaugo taname rai, taname mo ranena mangkur. ⁷ Weramu ranivara weapamo wano tawan no Rinai muno wapo Sya ananyao raija matuve no wasanuga rai, weamo wapa anakotaro rui wapo ranajo Injaya ai omamo Po raugaje wasai jaje. ⁸ Muno weapa ana wadave ngko dave mamano manui, wea indati vatano kaijinta wo raen ti wo wasaura ware, 'Sonawamo utavondi Yesus ai.' Wea umba wo Injaya Amisy ararimbe.

⁹ Maisyare Injaya Amisy muiny irati Rinai, maisyare omai tavon Risyamo muiny irati weasai. Weti syare weapamo wano tawan no Rinai indamu Sya muinye no irati wasai tutir. ¹⁰ Weabeta Sya ananyaowe rai, weamo indati wano tawan no Rinai muno Sya muinye no irati wasai tutir, maisyare muno ribeto Sya Injaya apa ananyaowe rai ti ino tawan no Ai muno Apa muinye no irati Rinai tutir. ¹¹ Anakotare so Sya raura wasai tenambe indamu wasanayanambe maisyare taune Risy inayanambe. Syare wasanuga ranayanambe rave.

¹² Risy ananyao syo raugaje wasai no taiso: Syare wamuiny irati wasai tutudi maisyare muno rimuinyo wasai. ¹³ Are pirati po anasine raunandea kakai indamu po apa arakova mapaya kakaije rai, opamo apa muinye manakoe rave, mo muinyo kaijinta rakivan. ¹⁴ Weapamo wabeta Sya ananyao syo raugaje wasaije rai, weamo Sya wasawainamo Sya arakov. ¹⁵ Soamo Sya wasawaino vatano wapanapatambe wemaisy akatoe ramu, weye vatano wapanapatambe nawamo awa akari po apa ana po raveye raura mai tenambe jewen. Weramu soamo Sya wasawainamo Sya arakov, weye ana Sya raraniv no Amisy ai omamo Sya raura wasai vintabo. ¹⁶ Weapirati wapo inapatimu jewen, yara Risyirati syo wasapatimu. Muno Sya wasapatimu indamu wata wapo ana wadave ngko dave raija. Umba wapa ana wadave ama kove raumandije

ramu, yara no tawan. Arono naije anakotaro rui vayave wapo ranajo Injaya Amisy ai muno wapo Sya tame veano raokae, indati Po raunande wasai jaje. ¹⁷ Risy ananyao syo wasatutiro rai mi so: 'Wamuiny irati wasai tutudi.'

Vatano mine so manuga mamuno Yesus apa arakove mansai

¹⁸ "Ranivara vatano mine so manuga mamuno wasai, weamo syare wasaemen: Risyirati manuga mamuno Rinai wusyimbe. ¹⁹ Are nawirati utavondi ananyao mine so rai, weamo vatano mine so ubekobeo mai weye wo mansamaisy. Weramu weapamo watavondijo mai jewena, weti manuga mamuno wasai. Syo wasawain ti wapu je vatano nanawije mansaora to, wemi mbewar manuga mamuno wasai. ²⁰ Wasaemen irati Sya ayao syo raura wasaije rai syare: 'Vatano panapatambe apa akarije ai opamo panakoe po apa akarije akivane ramu.'* Maisyare omai ti, ana rui mirati vatane wo rave nande Rinai to, wemirati indati wo rave nande wasai tavon. Vatane wo arare veano rinave to, weti indati wo arare veano wasave tavon. Yara vatano kaijinta ubeta Sya ananyao rai to, weti indati ware ubeta wapa ananyao rai tavon. ²¹ Vatano mine so wantatukambe irati Injaya Amisy wepi po inatutire Ai. Maisyare omaisy, ware wo wasave tatugadi weye wapanave Rinai.

²² Ranivara ride Sya vatano mine so mansanyao jewen datire, weamo Amisy pariyo awa ayao kakai raije ramu. Weramu soamo ride Sya mansanyaube to, weramu wonae wanavei, weti Amisy po awa ayao kakai rapaya ramu. ²³ Are pirati anuga mamuno Rinai, weamo anuga mamuno Sya Injaya ai tavon. ²⁴ Sya anapaporainyo syo raroron no awa yasyine rai omamo manakoe, vatano kaije wo rarorone ramu. Ranivara Sya anapaporainye umaso rarorone jewen datire, weamo Amisy pariyo awa ayao kakai raije ramu. Weramu vatano nanawije wo Sya anapaporainye umaso raen to, weramu mansanuga mamuno Risy sya Injaya pe ririnsai. ²⁵ Anakotare umaso nande indamu mamaisy Ayao Amisy mo ratoe no taiso:

'Risy ayao kakai mewen irati Rinai, weramu manuga mamuno Rinai vayave.*'

²⁶ Indati Risy Anawayo Vambunino no Injaya Amisy ai ratutir nde Mo wasaeranande. Wemirati no no Injaya ai umba nde Mo Apa ayao tugae raura. Arono nde nande

* **15:4** Yesus po raura ananeneaebe so. Mane raurata irati ana wandave ti ngko dave rai. Weti arono wana tawan intabove no Yesus ai, wama ana wandave ngko dave. Weramu wamare wamo Yesus apaya ti wamanya mumuimbe, weamo wama ana wandave ngko dave mamano meweno wansai. ✧ **15:20** Yohanes 13:16 ✧ **15:25** Mazmur 35:19, 69:4

to, indati Mo rinaura kakavimbe. ²⁷ Muno weapamo indati wapo rinaura kakavimbe tavon, weye weapamo wana rinatavon arono manasyin kobeyoe Syo Amisyee apa anakere raijar nde ava unumeso.”

16

¹ “Syo anakotare umaso raura kakavimbe wasai to indamu arono anakotaro ngkakai nande wasai, vemo wapa anave Rinaije mpatimu nora. ² Weye indati vatane wo wasorai wasisa no yavaro sambaya rai. Muno masyoto makareye vatane inta wo wasaubaisy, umba wo rakarae ware wo wasaubaisy somamo awa wanapatambe Amisyee ai mije. ³ Wo wasave tatugadi tai somaisy weye wantatukambe Injajo Amisyee ai muno wantatukambe Rinai tavon. ⁴ Syo raura kakavimbe wasai indamu arono anakotaro ngkakai so mare nande wasai, wasaemen Syo raura wusyimbe to.”

Yesus po Anawayo Vambunin ama anakere raura

“Manasyinoe Syo anakotare umaso raura wasai ramu weye taune rino wasarijata nene. ⁵ Weramu soamo syare ito no Sya Injajo wepi po inatutire Ai. Muno weapamo inta nyo Sya to raije ranajobe ramu. ⁶ Yara wasanimaumbe rave weye Syo raura syare syoroto. ⁷ Weramu ana tugae mamo Sya syoroto mamo ngkov irati wasai. Weye ranivara syoroto jeven, weamo Anawayo Vambunino mo wasaeranande indati nde wasai jeven. Weramu ranivara syoroto, indati Syo ratutir nde wasai.

⁸ Anawayo Vambunin nde toyamo, indati Mo vatano mine so mauga ti wo taune awa ayao kakaije raen. Mo raura mansai mare awa ayao kakaije ntepekan ti umamai no Amisyee amune rai jeven, weti indati Po mangke raugaje mai. ⁹ Mo raura mare vatane wanave Rinai jeven omamo ayao kakaije mije. ¹⁰ Muno mare Ribuisy ma-maisyo Amisyee amune rai, weti syakato no Injajo Amisyee ai muno wapo inae akatoe ramu. ¹¹ Muno Mo mangke raura kakavimbe mare Amisyee indati po mangke raugaje Anakakai Akoe ai, wepirati be akarive mine so rai.”

¹² Umba Yesus po raura akato pare, “Risya ayao syare syo raura wasai manui ta noa nene, weramu weapamo wananta rai rainy. ¹³ Arono Anawayo Vambunin nde toyamo, indati Mo Amisyee apa ayao tugae raura kakavimbe indamu wananta rai tenambe. Taune Ama ayao mo raura ma jewena, yara ayao Mo raraniv no Injajo Amisyee ai wemi Mo raura. Muno anakotaro indati nande wemirati Mo raura kakavimbe. ¹⁴ Mo ama ayao raugav no

Rinai, umba Mo raura wasai. Maisyare omaisy, Mo inajaseo titive ti vatane wo inararimbe. ¹⁵ Anakotar tenambe Injajo Amisyee apaura rai omamo risyaura rai. Wemi mbewar Syo raura syare ayao kotaro Anawayo Vambunine mo raura wasai mamo Mo raugav no Rinui.”

Arakove manimaumbe wusyimbe indati mananibe

¹⁶ Naije Yesus po raura nanto Apa arakovo utavondi ai mansai pare, “Kavinta wapo rinaene jeven, umba kavinta nakato wapo inae akato.”

¹⁷ Apa arakove wo araniva jeven, naije wayao vambinibe ware, “Yesus apa ayao kavoe po raura ama ine no tai rui? Pare, ‘Kavinta wapo rinaene jeven, umba kavinta nakato wapo rinaene akato.’ Muno pare, ‘Risiamo syoroto no Injajo nui?’! ¹⁸ Payao pare, ‘Kavinta,’ weramu ayao so ama ine no tai rui? Reamamo wamanatukambe Apa ayaowe rai!”

¹⁹ Yesus po manuga raen ware wo ana inta ranajo Ai. Weti Po raura mai pare, “Wapo wasanajo vambinibe Sya ayao umawe rai rako? Umawe syare, ‘Kavinta wapo inae jeven, umba kavinta nakato wapo inae akato.’ ²⁰ Syo raura tugaive: weapamo indati wapoyova wabe memembe, weramu vatano mine so onawamo indati mansanayanambe. Weapamo wasanimaumbe, weramu indati mo ranigwan akato mamo wasananibe. ²¹ Ranivara wanya inta mararai mo ama arikainye avaki, wanya so ranimaumbe weye ama masyoto ama siuri raunande rai nde rai. Weramu arikainye avakija kakavin to, ama siuri umawe rakanive rai vintabo weye rananibe ama arikainye ai mo avaki to. ²² Maisyare omaisy wea tavon: Soamo wasanimaumbe, weramu indati syakare Syo wasaen akato. Arono naije wasananibe akato, muno wasananibe somamo vatane inta po raugavo wasaora kakai.

²³ Arono masyoto namije nande wasai, wapo anakotare ranajo Rinai jakato jeven. Syo raura tugaive: anakotaro rui vayave wapo ranajo Injajo Amisyee ai muno wapo Sya tame veano raokae, indati Po raunande wasai jaje. ²⁴ Ndea unumeso wapo Sya tame veano wapa sambaya raokae jeven. Weramu naisoamo syare wapo Sya tame veano raokae, wea umba Amisyee po wapa ana wadanajo raunande wasai indamu wasananibe rave.

²⁵ Sya ayao syo raura umawe mbe anane-neae wasai. Weramu ama masyote mare nde nande, arono naije ananeneae mamo Syo inta raura akato jeven, yara syanawadi Syo Injajo aura kakavimbe wasai. ²⁶ Arono naije indati wapo Injajo anajo, muno wapo

Sya tame veano raokae. Risyamo syo ranajo Injaya ai wasamarome ramu. ²⁷ Injaya apa muinye manakoeyo wasai weti wapana wadi wapo anajo kai. Injayo Amisy muiny irati wasai weye weamuiny irati Rinai muno wapana Rinai wapare risyamo tugae rino no Injayo Amisy ai umba ide. ²⁸ Tugae, rino no Injaya ai umba ide mine so rai to, weramu soamo Syo mine so rapaya syakato no Injaya nui.”

²⁹ Naije Yesu apa arakove wo raura Ai ware, “Injae, soamo Nyo ananeneae rapaya ti Nyo raura kakavimbe to. ³⁰ Soamo reandaen Nyo anakotar tenambe raen kobe. Reamare reamo nanajo ana inta rai weamo jewen kai, weye Winyamo nyo reansanuga raen to! Nyo anakotare raen tenambe, weti reamanave tugae Winyamo no no Amisy ai umba nde.”

³¹ Yesu po raura akananto mansai pare, “Soamo wapana ve to rako? ³² Weramu Syo raura wasai: Masyote nggwaravainy akatoe ramu yara soamo nde to arono weapamo indati wapandamisy, ti wanajiv no taune wapa yavare rai tutudi muno wapo inapaya ti Ribui no. Weramu Ribui no jewen, yara Injaya pe irina kava.

³³ Anakotare umaso Syo raura wasai to indamu vemo wasanuga mamaun nora, yara Syo kovo saumane raugaje wasanuga rai. Wana no mine so rai, wasiuri weye vatane wo wasave tatugadi. Weramu wabemo wajaniv nora, yara wasatawandi! Risy mine so ama vambunino ngkakainoanive rapinde to!”

17

Yesu be sambayambe Amisy ai

¹ Yesu po apa ayao umawe raurawa mewen, umba peraseo no naumo warae muno payao to Injayo Amisy ai pare, “Injae, masyoto Nyo rapatimu soamo nde nande to. Maisyare omai ti, syare masyoto unumeso Nyo Nya Kavoy risyamo sya kovo ntiti raroron indamu Syo Nya kovo ntiti raroron tavon. ² Weye Nyo vambunine raunande Nya Kavoy rinai to indamu ibe akarive vatano mine so mansai tenambe. Wirati Sya kawasae nanawirati Nyo mansaunande Rinai onawamo Syo kovo nuge nuganui raunande mansai tenambe. ³ Vatano awave kovo nuge nuganuije rai onawamo vatano nanawirati wo Injae naen Wibuin nyirati Amisy tugae, muno wo Risyi Yesu Kristus inae tavon, Risyi Nyo inatutir. ⁴ Syo Nya kovo ntiti rarombe mine so rai tenambe to weye Syo Nya anakero nyo raugaje Inai rajara mewen to. ⁵ Injae Amisy, kavinta syakare no Winui jakato. Syare Nyo Sya kovo ntiti raunande

Rinai jakato, wemirati risyaura rai arono munije so ranari rainy.”

Yesu be sambayambe Apa arakovo utavondi ai mansai

⁶ “Injae, arakove sonawamo manasyinoe utavondi mine so ama bekere rai. Weramu winyaura mai muno Nyo mansaunande Rinai indamu utavondi Rinai. Syo winaroron mansai to muno ubeta Nya ayao rai to. ⁷ Soamo wo raen anakotaro rui Syo rave no mine so, Injae winyamo nyo ama vambunine raunande Rinai. ⁸ Weti ayao ndaunande indamu Syo raura mansai omamo Syo raura to, muno wo rajia to. Wo raen tugave Risyamo ino no Injae winai umba ide muno wanave Winyirati nyo rinatutir ide mine so rai.

⁹ Ibe sambayambe vatan tenambe mansai jewen. Yara ibe sambayambe arakovo Nyo maunande Rinai mansai, weye wenawirati nyaura mai. ¹⁰ Onawamo wo Sya kovo ntiti raroron kakavimbe. Anakotar tenambe syaura rai mammo Injae nyaura rai tavon. Muno anakotaro nyaura rai mammo syaura rai tavon.

¹¹ Soamo ide no Winui. Risyamo ino akato no mine so rajie ramu, weramu Sya arakove so una tawan no mine so rai. Injayo Amisy kakavimbe winy, syare Nyo Sya arakove so maeranande Nya tame ama vambunine rai, wemirati tamo Nyo raunande Rinai. Syare Nyo maeranande indamu wenanawamo ube intabove, maisyare Winy muno Risy irimamo rimbe intabove tavon. ¹² Arono Risyamo ta rino sya arakove so marijat, Syo maeranande Nya tame ama vambunine rai, tamo Nyo raunande Rinai. Syo maeranande weti inta aumandi jewen. Weramu vatano napirati Amisy winyo apatimu indamu kakai wepamo indati aumandi kobe inda mamaisyoy Ayao Amisy mo raurairive rai.*

¹³ Soamo ide no Injae winui. Syo sya ayao raugaje Sya arakove mai arono ta ino no mine vone so rai indamu manayanambe rave maisyare muno inanayanambe. ¹⁴ Risyoy Nya ayao raugaje Sya arakove so mansai to. Weti vatano mine so manuga mamuno mai, weye wenawamo utavondi mine so ama bekere rajie ramu, maisyare muno Risyamo ritavondi mine so ama bekere rajie jewen tavon. ¹⁵ Risyoy nanajo indamu Nyo arakove so maugavuje mine so raora omamo jewen. Yara Syo nanajo indamu Nyo mansavijuri jirati Anakakai Akoe ai. ¹⁶ Onawamo utavondi mine so ama bekere rajie ramu, maisyare muno Risyamo itavondi rajie jewen tavon. ¹⁷ Injae, Nya ayao mammo ayao tugae ma, weti syare Nyo ayao tugae so veano Sya arakove manuga

* 17:12 Vatane sopamo Yudas Iskariot.

ratayao indamu ubeta Nya bekere rai. ¹⁸ Risyamo Nyo inatutir ide syanapatambe Nai no mine so. Maisyare omaisyamo, Sya arakove onawamo Syo matutir uta wanapatambe Nai no mine vone so rai tenambe. ¹⁹ Risyo taune inaunanto Injae nai indamu ibeto Nya bekere rai tenambe, wirati indamu Sya arakove wo taune mansaunanto Nai tavon indamu ubeta Nai tugaive.”

Yesus be sambayambe vatano wanave mai tenambe

²⁰ “Arakove so bo nawirati risambayambe mansaije ramu. Yara vatano nanawirati wanave udijat weye Sya arakove so wo mansanyao wenanawamo ribe sambayambe mansai tavon. ²¹ Ibe sambayambe indamu vatan tenambe nanawirati wanave onawamo ube intabove, maisyare muno Injae winyamo wimbe intabove rinatavon muno Risyamo ibe intabove natavon. Syare ube intabove no Winye Rinsai indamu vatano mine so wanave Winyirati nyo inatutir ide no mine so.

²² Injayo Amisy, Nya kovo ntiti nyo raugaje Rinai omamo Syo raunanto mansai to, indamu wenawamo ube intabove maisyare Winy muno Risy rimbe intabove. ²³ Risyamo ibe intabove matavon muno Winyamo wimbe intabove inatavon indamu wenawamo ube intabove tugaive. Umba vatano mine so wo raen tugaive Winyirati nyo inatutir, muno wo raen wimuiny irati mansai maisyare muno wimuiny irati Rinai wemaisy.

²⁴ Injae, ribeker indamu vatano Nyo maunande Rinai utantuna tawan irati inarijat no munijo ntiti, indamu wo kovo ntiti no Inai raen kobe. Sya kovo ntiti mamu Nyo raunande Rinai weye wimuiny irati Rinai arono munije tename so ranari rainy.

²⁵ Injae, Winyirati ayao kakaije meweno Nai rave! Vatano mine so wantatukambe Injayo Amisy winai, weramu Risy naen muno Sya arakovo nanawiso wo raen Risyamo Nyo inatutir. ²⁶ Risyo mansanyao to indamu wo naen. Muno syare Syo mansanyao tutir ava wo naen mamai kobe, wirati Sya arakovo nanawiso umuiny irati mansai vambinibe maisyare muno wimuiny irati Rinai muno Risyamo ibe intabove matavon.”

18

Naito wo Yesus aijar

(Matius 26:47-56; Markus 14:43-50; Lukas 22:47-53)

¹ Arono Yesus be sambayambe jewen, Wepe apa arakovo utavondi ai nawe wanya

uta wo mana Kidron raotar. Nawaisy into no no naije, weti Yesusa pe apa arakove usisa no nawaisy so ama uga rai. ² Yudas, napirati po Yesus amavun, po nawaisy so raen to, weye Yesus muno Apa arakove wanugambe raive to. ³ Weti Yudas prototo no nawaisy umaso, po naito Yavaro Amisy ramane into mansaugav tavon, nanawirati syeno akokoe muno vatano Parisi wo matutir. Muno naito Roma into utavondi tavon. Naito tename umaso wo anaiyu raugav, muno perita muno yawainye raindi wo raugav tavon.

⁴ Yesus nanto irati anakotaro indati nande Ai so rai tenambe. Weti panya nanto mararai mansai umba Po manajo pare, “Are pi wapo akani?”

⁵ Wo raura akananto Ai ware, “Yesus, vatano Nasaret, Wepirati reamo akani.”

Yesus po raura kakavimbe mansai pare, “Vatano wapo akani wepi Risy.”

Yudas, vatano po Yesus amavun, teto marijat no naije. ⁶ Arono Yesus po taune aura pare, “Vatano wapo akani wepi Risy,” naito umaso upaparo mai ti waunsu akiri akare, yarawe veano mataruran vintabo no min.

⁷ Yesus po manajo rijati pare, “Are pi wapo akani?”

Wo raura akato, “Yesus, vatano Nasaret.”

⁸ Yesus po taune aura akato pare, “Syo raura wasai to: Vatano wapo akani wepi Risy. Tugae, Risyirati wapo inakani, weti syare wapo Sya arakove so mapaya inda uta kai.” ⁹ Anakotaro so nande indamu mamaisyo Yesus apa ayao po raura wusyimbe rai pare, “Injayo Amisy, Sya arakovo Nyo maunande indamu utavondi Inai, vemo into aumandi nora.”*

¹⁰ Simon Petrus po apa omake rakarimu, po vatano panapatambe syeno titi aije amarikoamo anem ngkove raotar ti mpatimu. Vatano panapatambe umaso apa tame mirati Malkusa. ¹¹ Naije Yesus po apa ayao raura nanto Petrus ai pare, “Nya omake ramawe akasyo no ama kokome rai! Siurijo Sya Injaya po ratayao Rinaije so syo rawatambe ramu, yara Syo ranawan.”

Yesus augaveta no Hanas ai

(Matius 26:57; Markus 14:53; Lukas 22:54)

¹² Naije naito Roma nawe, awa akarije pe, naito Yahudi wo matutire nawe wo Yesus aijar muno wo waije rave aneme raokokaisy. ¹³ Manasyimbe wo augaveta no akari Hanas ai, wepirati Kayapas apa awatea pije.* Kayapas opamo syeno titi arono tumo naije. ¹⁴ Wepirati arono wusyiyin pananyaube irati vatano ube akarive

* 18:9 Yohanes 6:39

* 18:13 Kayapas po Hanas apa kavo raovan.

Yahudi mansai, apa ayao po raura we no taiso: “Vatane intabo kakaijo wansai tenambe wemi ngkov.”[✠]

Petrus po Yesus amamarave manasy-imbe

(*Matius 26:69-70; Markus 14:66-68; Lukas 22:54-57*)

¹⁵ Simon Petrusa pe, Yesus apa arakovo tavondi ai kajinta pe,† yanya itavono Yesus ai rijabe. Arakovo kaije umaso pamo syeno titi po aen to, ti tavono Yesus ai siso no syeno titi apa yavare ama wanijate rai. ¹⁶ Yara Petrus opamo siso ramu, weye opamo syeno titi po aen dainy, weti nowo Yesus atuna marambe no yane ama unsanda uje rai. Maisyare wemai ti, Yesus apa arakovo kaije umawe pakauje no akiri umba po wanya manapatambe ti nteto unsanda uje rai ranajo pare Petrus amayara siso rako? Naije mo amayar weti po Petrus augav ti siso no yavare ama wanijate umawe rai. ¹⁷ Wanya uma nteto unsanda uje rai umaso mo Petrus anajo mare, “Inya! Winyirati Vatane uma wato apa arakove inta pi win dako?”

Petrus po raura akanande pare, “Risiamo jewena!”

¹⁸ Arono naije nuge mbavat, weti vatano wanapatambe no yavare umaso muno naito wo Yavaro Amisy ramane umawe wo taname raon no wanijate naije, usayai mararai wo ravauba. Petrus poroto tet tavon ti po taname ravauba.

Syeno titi po Yesus anajo

(*Matius 26:59-66; Markus 14:55-64; Lukas 22:66-71*)

¹⁹ Syeno titi po Yesus anajo pare, “Nya arakovo utavondi naije onawamo are nawije? Muno Nya ananyao mamano no tai rui?”

²⁰ Yesus po raura kakavimbe pare, “Risiamo sayao nanto kakavimbe no vatano wanui mansamun. Risiamo syananyaube no yavaro sambaya ama uga rai muno Yavaro Amisy rai, wemirati vatano Yahudi wanugambe rai. Risyo sya ananyao inta rangkokaibe wasai jeven.

²¹ Weti, veanimaibe Injae nyo inanajo rai? Nyo vatano nanawirati wo Sya ananyao raranivo Rinai manajo rati. Onawamo wo Sya ayao raen ivae.”

²² Arono Yesus po raura taije, naite umawe inta po apoam muno pare, “Ee! Mbeanimaibe nyayao soowabe nanto syeno titi wato ai? Mamaisy ramu!”

²³ Yesus po raura akananto ai pare, “Ranivara Risyo ayao inta raura ti ngkakai, weamo nyo Sya kakai namije raroron ti!

Yara Sya ayao mamaisy, veanimaibe nyo inapoam?”

²⁴ Umba Hanas po naite inta matutir wo Yesus augaveta no Syeno Titi Kayapas ai. Yesus pamo aneme raokokaisyo waije umawe raija nene.

Petrus po Yesus amamarave akato jirum muno mandei

(*Matius 26:71-75; Markus 14:69-72; Lukas 22:58-62*)

²⁵ Simon Petrus opamo teta po taname ravauba. Naije vatane wo anajo ware, “Tugaeya rako winyamo tavono Vatane wato aivea rako?”

Weramu Petrus po ramamarave pare, “Risiamo jewena!”

²⁶ Vatano panapatambe syeno titi arijati inta no no naije, vatane sopamo vatano Petrus po amarikoame raotaroe pe nayamo aya yavaruga intaboa. Weti po Petrus anajo pare, “Tugaeya rako, syare winyirati syo naen ntavono Ai no nawaisyo wepi win dako?”

²⁷ Petrus po ramamarave akato, “Risya jewena!” Muno mamai dave no arono naije mangkuere kokebe.

Yesus augaveta no Pilatus ai

(*Matius 27:1-2, 11-25; Markus 15:1-14; Lukas 23:1-10*)

²⁸ Awatan ngko dave akarijo Yahudi wo Yesus auguje no Kayapas apa yavare raora, wo augaveta no gubernur Roma apa yavare rai. Weramu vatano Yahudi umaso usisa no yavaro gubernur ama uga raije ramu, indamu vemo ugwambe no Amisy amune rai nora, weye ware wo anaisyo Ono Paska raisy.†

²⁹ Umba Pilatus puje apa yavare raora umba poroto mansai. Po manajo pare, “Anangkakivano rui mirati wapare wapo rantuna Ai? Ayao kakai rui mirati Po rave?”

³⁰ Wo raura ware, “Ranivara Vatane sopamo Apa ayao kakai meweno ai ratire, weamo reamo augave de no winamune ramu.”

³¹ Pilatus po raura akananto mansai pare, “Taune wapo augaveta muno wapo mangke rapatimu Ai mamaisy taune wapa ananyao rai!”

Vatano Yahudi wo raura akananto Pilatus ai ware, “Weramu pemerinta Roma weapamo wapare reamo mangke raugaje vatane ai indamu kakai wenora.”

³² Anakotare so nande indamu mamaisy Yesus apa ayao purairive wusyimbe rai

✠ **18:14** Yohanes 11:50 † **18:15** Arakovo kaije sopamo Yohanesa. ‡ **18:28** Yahudi awa ananyao mare ranivara vatano Yahudi inta siso vatano Yahudi jewene apa yavare rai, weamo vatano Yahudi umaso pamo gwambe no Amisy amune rai ti vemo tavondi awa one rai jinya.

pare indati Opamo auseo sawa inyo kapite rai.[§]

³³ Pilatus de pakasiso no apa yavare rai, umba po Yesus awain. Muno po anajo pare, “Weti Winyirati vatano Yahudi awa Akarijo Titi pi Win dako?”

³⁴ Yesus po raura pare, “Winya ana nyo inanajo rai somamo taune nya ayao nyo ranajo Inai ma rako? Indako vatano kajinta wo raura nai, umba nyo inanajo rai rako?”

³⁵ Pilatus po raura akananto Ai pare, “Risyamo vatano Yahudi pi risya jewena! Yara taune Winya kawasae muno syeno akokoe nanawirati wo naugav wo naunande rinai. Weti Nyo raura kakavimbe: Winyamo animaisye mi Nyo raveti ngkakai?”

³⁶ Yesus po apa ayao raura pare, “Sya munijo ibe akarive rai mamu mine so ma jewen. Weramu ranivara munijo ribe akarive rai mamu mine so ratire, weamo Sya kawasae usivunyo rinaorai indamu vemo vatane wo rinaijar inaugavere no akarijo Yahudi mai nora. Weramu tugaeya, munijo ibe akarive rai mamu nori rati mine so ma jewen.”

³⁷ Weti Pilatus po anajo akato pare, “Maisyare omai ti, Winyamo akarijo titi inta pi Win dako?”

Yesus po raura akananto ai pare, “Risyiva, mamaisyo nya ana ndaura wato rai. Sya inavaki muno Sya ide no mine somamo indamu Syo ayao tugae raura kakavimbe. Are nawirati ubeker unanta ayao tugae rai, onawamo wo rinaraniv.”

³⁸ Pilatus po raura pare, “Ee! Syo ratantona ayao tugae mamu vatan inta nanto rai kakai.”

Umba Pilatus puje apa yavare raora, muno po raura aje vatano Yahudi mansai pare, “Rinanto ayao kakai inta rai Vatane so ai ramu. ³⁹ Weramu taune wapa koano watavondi raivea nsiridi to mamu arono Ono Paska nde nande, weamo syo vatano makova intabo apaya apa mangke rai. Weti wabeker syo Yesus, wapa Akarijo Titi Yahudije so, apaya wasai rako?”

⁴⁰ Weramu vatano wanui umaso ugwagwaimbe akaseo Pilatus ai ware: “O! Wato pa nyo apaya nora! Yara Barabas opi nyo apaya!” (Barabas sopamo vatano panaonoambe, muno be marovave pemerinta Roma ai.)

19

Wo mangke raugaje Yesus ai inda kakai (Matius 27:26-31; Markus 15:15-20; Lukas 23:12-25)

¹ Arono naije kobe Pilatus de pakasiso muno po vatane matutir wo kaijo wai rairiro ama atu rai rakoato Yesus ai. ² Naite wo anansinao maisyare wanyavi ramaisyauseo rakariwaibe akari rai ti ama anansinao mpatota no akari rai. Muno wo ansuno nsintair manawadi inta raugasyo Ai ti po rave, maisyare akarijo titi po rave ramaisy. ³ Umba naite umaso uta ude wo raura wanaikibe Yesus ai ware, “Winyirati Akarijo Titi Yahudi pi Winy!” Muno wo apoamo rani rani.

⁴ Umba Pilatus pakauje akato muno po raura akaje vatano wanui mansai pare, “Waperade! Syare syo augave syuje wasai, indamu wapo raen risyamo inanto ayao kakai inta rajio Ai ramu.” ⁵ Arono naije Yesus puje, anansinao mpapako akari rai muno Po ansuno nsintair manawadi rave. Pilatus po raura mansai pare, “Waperade! Napi so!”

⁶ Arono syeno akokoe nawe, naito wo Yavaro Amisye ramane nawe wo Yesus aen, wo akekebe kobe ware, “Auseo sawa inyo kapite rai! Auseo sawa inyo kapite rai!”

Pilatus payao de mansai pare, “Wapo augav, muno wapo auseo sawa inyo kapite rai, yara risyamo nanto Apa ayao kakai inta rajie ramu.”

⁷ Vatano Yahudi wo raura akananto Pilatus ai ware, “Mamaisyo reama ananyao rai weamo Vatane sopamo mangke raugaje Ai indamu kakai, weye Po taune aura pare Opamo Arikainyo Amisy.”

⁸ Arono Pilatus po maraniva jewen, jani dave kobe. ⁹ Weti de pakasiso no apa yavar muno po Yesus augave siso tavon. Umba Pilatus po anajo akato pare, “Winyamo vatano nori rui?” Weramu Yesus po ayao inta raura akananto Pilatus aije ramu. ¹⁰ Weti Pilatus po raura akato pare, “Nyonaen nyayao nande inaija rako? Nyo raen risyamo sya vambunine ma indamu syo napaya, muno sya vambunine ma indamu syo nauseo nsawa inyo kapite rai!”

¹¹ Yesus po raura akananto Pilatus ai pare, “Nya vambunine wato Amisye wepi po raunande nai. Weti vatano po rinamavun ti po inauande no winaneme rai opamo apa ayao kakai manakoe winya rakivan.”

¹² Arono Pilatus po Yesus apa ayao umaso ranaun, beker pare po apaya. Weramu vatano Yahudi ugwain ware, “Yesus po taune aura pare opamo Akarijo

§ 18:32 Arono mangke rapatimu vatane inta ai indamu kakai, pemerinta Roma po vatano napije auseo sawa no inyo kapite rai. Yara Yahudi wo orame veano vatano napije aepar ava kakai.

Titi. Maisyare omai ti Opamo be marovave Akarijo Titi Roma ai. Weti nyare nyo apaya, weamo wimbe arakobe Akarijo Titi Roma aije ramu.”

¹³ Pilatus po ayao so raraniva jewen, umba po Yesus augave uje indamu po mangke rapatimugo Ai. Weti seo tuna no apa kursijo titi rai no wanijate ama tame mirati Wanijate Oram. (Wanijate so raura ayao Yahudi raijamo Gabata.) ¹⁴ Arono naijeamo masyote yasyin, masyoto namije mamō vatano Yahudi awa masyoto wanakangkanive irati Ono Paska rai mije. Pilatus po raura nanto vatano wanui mansai pare, “Wapa akarijo titi pi so!”

¹⁵ Vatane ugwgwaimbe kobe ware, “Aubaisy! Aubaisy! Auseo sawa inyo kapite rai!”

Pilatus po manajo pare, “Mamaisy aje rako? Syo wapa akarijo titi auseo sawa inyo kapite rai rako?”

Syeno akokoe wo raura akananto ai ware, “Kaisar Roma obo pirati reama akarijo titi pi!”

¹⁶ Pilatus po Yesus aunanto no vatano wanui umaso maneme rai indamu wo auseo sawa inyo kapite rai. Umba wo augav ti uta kobe.

Yesus auseo sawa inyo kapite rai

(*Matius 27:32-38; Markus 15:21-27; Lukas 23:26, 33-43*)

¹⁷ Yesus puje po taune apa inyo kapite ranawan to no pukame ama tame mirati Akari Pae. (Mine so raura ayao Yahudi raijamo Golgota.) ¹⁸ Pukamo namije naite wo Yesus apaku auseo sawa inyo kapite rai. Vatane jiruma nanairati yauseo syawa atavon, inta sawa no anem ngkakai muno inta sawa no anem ngkov muno Yesus sawa no yasyin.

¹⁹ Yesus apa inyo kapito sawa raije mamō Pilatus po vatane inta atutir po ayaowe so ratoe rauseo rapaku ama vone rai mare:

SOPAMO YESUS, VATANO NASARET
AKARIJO TITI YAHUDI

²⁰ Vatano Yahudi wanui wo ayao ratoe umaso raen, weye muni namije mararaijo pukame umaso rai. Ayao omane umaso ratoe ayao Yahudi rai, ayao Roma rai muno ayao Yunani rai tavon. ²¹ Syeno akokoe upari, weti wo raura nanto Pilatus ai ware, “Vemo nyo ratoeya nyare, ‘Sopamo Akarijo Titi Yahudi,’ wemai nora! Nya ayao omane wato mamaisy ramu. Yara nyo ratoeya nyare, ‘Yesus po taune aura pare: Risyirati Akarijo Titi Yahudi.’”

²² Weramu Pilatus po awa ayao rasakinav pare, “Syo ratoe no tawan weye wemi ratoe to.”

²³ Naite wo Yesus auseo sawa inyo kapite raija jewen, umba wo Apa ansune raijar wo ratodija mambisy, weti naite inta apaura inta rai, inta apaura inta rai. Weramu Apa ansuno akoe namirati ama pame mewen dai yara ranari anawadiwe wemamo ngko dave ti wo raotadi ramu. ²⁴ Weti wyaogo vambinibe mansai ware, “Vemo wamo ansuno manawadi so raotar nora. Yara wamo aikarae rapatin dai, are pirati mo arorona apaura rai.” Ana umaso nande indamu mamaisy Ayao Amisy mo raurairive no wusyinoe rai mare:

“Wo Sya ansune ratodijo taune mansai muno wo aikarae rapatin dai indamu wo Sya ansune raugav bintabo.”[☆]

Maisyare omai ti, naite wo Yesus apa ansune ratodi taije maisy.

²⁵ Mararai no Yesus apa inyo kapite rai, Apa akoyam, muno Apa akoyo rijata, muno Klopas apa anamu ama tame mi Maria, muno Maria Magdalen. ²⁶ Arono Yesus po apa akoya raen muno Apa arakovo anuga no ai rave* aen tet nande akoya ratavon, payao aje akoya rai pare, “Ingko, soamo Sya arakove sopamo nya arikainye pi so!”

²⁷ Muno payaude Apa arakova ai tavon pare, “Nya ingkoa mi som! Syare nyo raeranande.” Weti arono Yesus kakai, arakovo napije po Yesus apa akoya raugav no apa yavaruga rai indamu po raeranande.

Yesus kakai

(*Matius 27:45-50; Markus 15:33-37; Lukas 23:44-46*)

²⁸ Yesus po anakotare raende tenambea mewen bintabo to, umba Po raura pare, “Rinawa ngkangkamandi!” Apa ayao umaso Po raura indamu mamaisy Ayao Amisy mo ratoe rai.[☆] ²⁹ Weti wo maimare raugasya rayansundijo angguriyo nsaisyine rai, umba wo ransuisyo uvi rai, wo rareanseo no Yesus awa rai. ³⁰ Yesus po angguriyo nsaisyine umaso ramanama jewen, umba payao pare, “Mamai bintabo to.” Naije akari nsawa aruranaje muno Po anawayo aunanto no Injayo Amisy aneme rai.

Naite wo Yesus atukam

³¹ Arono naije masyoto vatano Yahudi wanakangkanive irati awa masyoto sambaya rai. Muno masyoto sambaya nde nande umaso omamo Masyoto Akoe. Vatano Yahudi ware masyoto sambaya omamo vemo vatane inta sawa no inyo kapite rai nora, weti ude wo Pilatus anajo indamu po apa naite matutir wo vatano mausea usawa inyo kapite rai nawamo majo radaundi indamu ugwenen, umba

☆ 19:24 Mazmur 22:18

* 19:26 Arakovo Yesus anuga no ai rave wepamo Yohanesa.

☆ 19:28 Mazmur 22:15,

wo maveaje. ³² Weti naije naite ude wo vatane jirum yauseo syawa Yesus atavon yajoe radaut kobe. ³³ Weramu arono ude mangkepano Yesus ai, wo aen kakai to weti wo ajoe radaute ramu. ³⁴ Yara naite inta po weyame rave Yesus atukam no Apa taugande rai. Naije kobe Apa mavu nsororop muno mana ntavono rai. ³⁵ Risyi Yohanes syo ayaowe so ratoe, syo ana nande Yesus ai umaso raeno taune inamije rai to, weti syo ratoe so indamu vatano wanui wapanave. Sya ayao syo raura kakavimbe so ana tugae; syo raen omamo tugae ma. ³⁶ Anakotare so nande indamu mamaisyo Ayao Amisye mo ratoe rai mare, “Apa pae mamu inta radaute ramu.”^{*}
³⁷ Muno aneme kajijinta mo raura tavon mare,
 “Vatano wo atukame indati usayai muno wo anyanyut.”^{*}

Yesus antuna
 (Matius 27:57-61; Markus 15:42-47; Lukas 23:50-56)

³⁸ Umba vatano munijo Arimatea inta apa tame mirati Yusup de po raura nanto Pilatus ai. Yusup umaso pamo Yesus apa arakovo tavono aive inta pije, weramu opamo tavondi maninimbe vayave weye po vatano Yahudi masyaniv. Weti Yusup umaso de no Pilatusa nui indamu po Yesus anasino kopa ranajo ai. Umba Pilatus po ramayar, weti Yusup de po Yesus anasino kopa raugav. ³⁹ Muno Nikodemus de atavon. Wepirati de Yesus ai arono wusyinoe namane inta rai. Deye so, po manino mur inta raugavo manino gaharu inta ratavon, ama mangke ma kilo tenamara eane abusyin. ⁴⁰ Yusupa pe Nikodemusa pe yo Yesus anasino kopa raugav, umba wo ansuno mpopero nsauman veano akepan, umba wo manino mbovove rauvaro Ai, mamaisy irati vatano Yahudi awa koano wo vatane mantuna rai.

⁴¹ Nai mino Yesus auseo sawa inyo kapite rai di so, nawaisye inta mararai no naije, muno mino namije ama uga rai aipapo inta ntuna rai, ta nggwanyina nene muno vatane inta antuna rai rainy. ⁴² Masyoto namije mamu vatano Yahudi awa masyoto wanakangkanive irati awa masyoto sambaya rai muno aipapo somamo nggwara-vainye ramu, weti wo Yesus augaveto antuna rai.

20

Yesus kovakato no wene ama uga rai
 (Matius 28:1-10; Markus 16:1-8; Lukas 24:1-12)

¹ Ari Minggu ama awatan ngko dave nuge mpampunamija nene, Maria Magdalena moronto mo Yesus apa aipapo raen, oramo veano ama ansanda rauguji mamu manso to. ² Mansanan makare, nde nande Simon Petrus muno Yesus apa arakovo anuga no ai rave yai,* mare, “Injayo Yesus opamo vatane inta wo auguje aipapo rai to muno wamamo wamantatukambe irati augaveto raije rai.”

³ Naije Petrusa pe, Yesus apa arakovo kai umawe pe ibesea yanya yurija yo Yesus apa aipapo raen. ⁴ Yansanan kava, weramu Petrus maneai, yara arakovo kai umawe pavave rave, weti to nanto wusyimbe aipapo rai. ⁵ Naije to benanto peravo aipapo ama uga raito vayave, peratoamo ansune vasye bo mi ntami. ⁶ Umba Simon Petrus de nande dijabe, naije siso kobe no aipapo ama uga rai. Weti po ansune vasye veano Yesus akepan raen ntuna no min. ⁷ Muno ansune vasye mamaun veano Yesus akari rakepan omamo raakuvi mumuimbe ti ntami nggwaravaimbe ansune vasye manakoe rai. ⁸ Umba arakovo kai uma de wusyimbe to siso aipapo ama uga rai tavon, po raen ti panave. ⁹ Arono naije Ayao Amisye ama urairi mo Yesus aura kovakato no wene rai ma nyanta rai rainy nene. ¹⁰ Umba arakove umaso inyajiv no yavar.

Yesus aroron kakavimbe Maria Magdalena rai

¹¹ Maria Magdalena ntet mararai no aipapo rai muno moyov. Umba mbenanto ti meravo aipapo ama uga raito. ¹² Mo naito Amisye jiruma yaen. Naite umaso aya ansune mpoper, onayamo itantuna no Yesus apa antuna rai we rai. Inta tuna no akari rai muno inta pamo tuna no ajo rai. ¹³ Naite umaso yo Maria ranajo yare, “Akoe winy, mbeanimaibe nyoyov?”

Naije mo raura akananto mare, “Risya Injayo Kurune pamo vatane wo augaveto ti aumandi muno syantatukambe wo augaveto raije rai.” ¹⁴ Mayaowa jewen, naije nsakinav meravo rakiri akare rati, mo Yesus aeno te no naije. Weramu mantatukambe are pi so. ¹⁵ Umba Yesus po raura nanto rai pare, “Akoe winy, mbeanimaibe nyoyov? Are pirati nyo akani?”

Maria mo rakarae mare vemo vatano po nawaisye raeranande pa. Weti mo anajo mare, “Anui, winyirati nyo sya Injayo Kurun auguje, nyo augaveto nyo antuna no kajijinta rako? Syare nyo augaveto tuna no ruijamo ndaura indamu rito syo augav.”

¹⁶ Yesus po apa ayao raura akananto rai pare, “Maria!”

* 19:36 Bilangan 9:12; Mazmur 34:20 * 19:37 Zakaria 12:10 * 20:2 Arakovo Yesus anuga no ai rave wepamo Yohanesa.

Maria nsakinav merav akananto no Yesusa nui, umba mo awain nanto ayao Yahudi rai mare, “Rabuni!” (ama ine mare Kurune).

¹⁷ Yesus po raura nanto rai pare, “Vemo nyavakanande Rinai nora, weye syana to Injae ai rainya nene. Weramu syare nyoronto nyo Sya ayao so raura Risya arakove mansai, ndaura taiso nyare, ‘Syare iseo syakato no Sya Injae Amisy ai, wepirati weapa Injayo Amisy tavon.’”

¹⁸ Weti Maria Magdalena moronto kobe, mo raura Apa arakove mansai mare, “Syo Injayo Yesus aeno inamije rai to!” Umba mo Apa ayao nami po raugaje raije raura kakavimbe mai tenambe.

Yesus aroron kakavimbe Apa arakove mansai

(Lukas 24:36-39, 47-49)

¹⁹ Ari Minggu namije ama masyote ndea ngkaumur kobe, Yesus apa arakove wanugan no yavare inta rai, wo yavaro namije ama unsanda rakeke tenambe weye wo vatano Yahudi masyaniv. Arono naije, Yesus de nande teto papabe no awa yasyin muno Po raura aje mansai pare, “Saumano Amisy maje wasai!” ²⁰ Arono Po ayao saumane raura aje mansaija jewen, naije Po apa paro no anem unane rai rarorono mai, muno Po apa taugandeo weyame veano ratukame raroron tavon. Apa arakove so mananibe weye wo Amisy Yesus aeno mamije rai.

²¹ Yesus po kove raura intabo akato pare, “Saumano Amisy maje Sya arakove wasai! Naisoamo Risyo wasatutir maisyare muno Injayo Amisy po rinatutir.” ²² Po apa ayao so raurawa jewen, umba Po anawayo veano mansamawisy asyo muno Po raura pare, “Syare wapo Anawayo Vambunine raugave nsiso wasanuga rai! ²³ Ranivara weapo vatan inta apa ayao kakai rapaya, weamo Amisy po rapaya kobe. Muno ranivara weapo ayao kakai rapaya jewen, weamo Amisy po rapaya jewen tavon.”

Yesus aroron kakavimbe Tomas ai

²⁴ Arono Yesus arorono manasyimbe irati Apa arakove mansai, Tomas tuna Apa arakove matavone ramu. Tomas umaso pamo Yesus apa arakovo mansano abusyin eane jirum inta piye, apa tame rawain tavonamo Didimus (weye arikainyo tapume pa). ²⁵ Weti arakove umawe wo raura Tomas ai ware, “Injayo Yesus de aroron kakavimbe reansai muno reamo aen to.”

Weramu Tomas po raura akananto mansai pare, “Risyo syo paku ama vava no aneme rai raen dainy, muno syo kawije rausiso pakuge ama vava rai rainy, muno risyavakananto syo Apa

taugandeo weyame rave ratukame raija dainy. Maisyare omai ti, risyamo syanave ramu.”

²⁶ Masyote kaumandei jakato, Yesus apa arakove wakere wanugan tenambe no yavare umawe rai. Arono naije umba Tomas tuna matavon. Yavare umaso ama unsanda rakeke tenambe, weramu Yesus de nande te no awa yasyin muno Po kove raura aje mansai pare, “Saumano Amisy maje wasai!” ²⁷ Naije Po raura nanto Tomas ai pare, “Nyeravaje nyo inaneme raeno namije rai muno nya kawije raugaje ntami rai nyo ranaun. Muno nyavakare nyo Sya taugandeo raijar. Nanuga mamaun akato nora, soamo nyanave!”

²⁸ Tomas po apa ayao raura nanto Yesus ai, “Tugae, sya Akari muno sya Amisy pi Winy!”

²⁹ Umba Yesus po raura akananto ai pare, “Winyamo nyanave weye nyo rinaen to. Kove ngkov irati vatano wanawe weramu wo rinaeno mansamije rai jewen!”

Ana mbewar ti Yohanes po apa bukuge so ratoe

³⁰ Yesus apa anapaporainyo kaijinta mamano manui, weti Apa arakove wo raeno mansamije rai, weramu ratoe tenambe bukuge so raije ramu. ³¹ Weramu so ratoe tenambe indamu wapanave Yesus ai, wepirati Arikainyo Amisy muno Mesiasa piye. Weye wapanave Ai, weaveti wakova nuge nuganuije rai.

21

Yesus arorono Apa arakove mansai no Onae Tiberias

¹ Yesus arorono Apa arakove mansai jakato no Onae Tiberias muno Apa po aroron kakavimbe no taiso. ² Onae umaso Apa arakove so wanugan: Simon Petrus, Tomas awainamo Didimus, Nataniera vatano Kana no propinsijo Galilea, Sebedeus apa arikainye jirum, muno Yesus apa arakovo kaije jirum wanugambeve no naije. ³ Simon Petrus po raura nanto apa arakove mansai pare, “Arakove, risyare ito syo jiane rakani.”

Weti wo raura akananto ai ware, “Reamare reantavondi.” Naije wuruta kobe, usea nyomane rai. Weramu namano waravainyoe ma jiane inta ijaru mai ramu.

⁴ Arono una pare tipu seo kobe, nuge mbabar, naije Yesus de tet no nayave ruk. Weramu Apa arakove wo aen kakavimbe jewen muno wantatukambe vatane sopamo Yesusa piye.

⁵ Yesus po manajo pare, “Inya! Arikainye weap! Wapo jiane inta raugav ivae rako?”

Wo raura akananto Ai ware, “O, jewen dave!”

⁶ Yesu po raura akato mansai pare, “Wapo wapa pame ramaugakasya no wapa nyomane ama ranijo wasanem ngkove rai, indati wananta jiane inta mansai jaje.” Naije wo awa pame ramaugo rai kobe, inda jiane manui rave nsiso rai, mangke rave ti wo rakarimu kakai!

⁷ Yesu apa arakovo anuga no ai rave po raura Petrus ai pare, “Injayo Yesusa pi wato!” Arono arakove umaso po raura pare, “Injayo Yesu pi wato!” naije kobe Simon Petrus po apa ansune rave anasine raora (weye anasine no kakavimbe) muno sopatasyo no onae. ⁸ Weramu arakovo kaijinta utantuna no nyomane rai kobe, wo raugav udiat sisa. Muno wo pame rakarimu nsiso no yawa, namirati jiane ntairi rai. Uboraeti udiat sisa so ama waravainye ma meterije tename radani. ⁹ Weti una no nyomane rai wasya, umba werata wo raen tanamo raondi ti mbe riambe muno jiane inta ramero rai muno roti inta ntami tavon.

¹⁰ Yesu payao nanto mansai pare, “Wapo jiano nsawa wapa pame rai wato inta raugav wade no so.”

¹¹ Simon Petrus seo no nyoman muno po pame rakarimu nsiso no yawa. Pame so ntairi jiano manakokoe rai, ama manui nseo no tename kaururum eane abusyin eane mandei. Jiano namije manui rave, weramu pame mpatimu rai jeven.

¹² Yesu payao nanto mansai pare, “Wade, wapisyi kai.” Apa arakove so ubeker ware wo anajo, “Are pi Winy?” Weramu usamane wo anajowi, weye wo aen tugae Amisy Yesu wepi so. ¹³ Umba Yesu nanto pangkepano mansai, Po rotije raugav muno Po raunanto mansai, muno Po jiane raunanto tavon.

¹⁴ Yesu aroron kakavimbe Apa arakove mansai ama susyo mandeije mi so, arono kovakato no wene rai.

Yesu po Petrus apa muinye ranajo

¹⁵ Arono wisyisya mewen, Yesu po Simon Petrus anajo pare, “Simon, Yohanes apa arikainy winy, nya muinyo Rinai manakoeya mo arakove so awa rakivana rako?”

Petrus po raura akananto Ai pare, “Tugae, Injae, risya muinyo Winai nyo raen to.”

Yesu po raura akato pare, “Nyo Risya maero domba mansakum.”

¹⁶ Umba Yesu po anajo rijati akato pare, “Simon, Yohanes apa arikainy winy, wimuinyo Rinai tugaeya rako?”

Petrus po raura akananto Ai pare, “Tugae, Injae, risya muinyo Winai ma nyo raen to.”

Yesu po raura akananto Simon ai pare, “Nyo Risya maero domba maeranande.”

¹⁷ Susyo mandei Po anajo akato pare, “Simon, Yohanes apa arikainy winy, wimuinyo Rinai tugaeya rako?”

Petrus animaumbe, weye Yesu po anajobe tutira susye mandei to pare, “Wimuinyo Rinai tugaeya rako?” Weti Petrus po raura akananto Ai pare, “Injae, Winyo anakotare raen tenambe, weti sya muinyo Winai nyo raen to.”

Yesu po raura akato pare, “Nyo Risya maero domba mansakum. ¹⁸ Syo raura tugaive: Arono wingkamuram, taune winy nyo ansune muno nya tarandine rave, nyanya nto no rui vayave mamaisyo taune nya bekere rai. Weramu arono indati wimbe vatan anuive rave, winaneme raunanto vatano kai mansai wo raokae yara wo naugaveta no varoro nyonae rajioe rai.”* ¹⁹ Maisyare wemaisy, Yesu po Petrus apa wene raurairive wusyimbe pare indati vatane wo aubaisy weye panave Yesu ai, muno apa wene maisyare naije mo Amisy apa kovo ntiti raroron.

Umba Yesu po Petrus awain pare, “Petrus, soamo ntavono Rinai!”

Yesu apa arakovo anuga no ai rave

²⁰ Arono Petrus sakinav peravo akiri akare, po Yesu apa arakovo anuga no ai rave aeno tavondi po yarijade. (Opamo tuna pangkepano Yesu ai arono namano wisyi tenambeowe muno wewepirati po anajo pare, “Injae, are pirati indati po namavun?”) ²¹ Petrus po arakove so aen ti po Yesu anajo pare, “Injae, arakovo napiso indati aveare rui?”

²² Yesu po raura akananto Petrus ai pare, “Ranivara ribeker syare arakove so kova no tawan ao risyakare mine so rai, omamo no taune Risya syo rapatimuge rai. Weramu winyamo ntavono Rinai vayave!”

²³ Arono naije arakovo utavondi Yesu ai wo ayao namije rampampambe wo raura ware arakovo napije pamo indati wene nande ai jeven. Weramu Yesu opamo apa ayao ama ine no tai maisye jeven, yara apa ayao mamamo pare, “Ranivara ribeker syare arakove so kova no tawan ao risyakare mine so rai, omamo no taune Risya syo rapatimuge rai.”

²⁴ Risyrati arakovo Yesu po inaura umaso. Muno risyi syo anakotaro nande tenambe umaso raen to, muno syo ratoe so. Reamo raen ayao ratoe tenambe somamo tugae rave.

* **21:18** Yesu apa ayao urairije so ama tunato rajije no taiso: Arono indati Petrus be vatan anuive rave, weamo naito Roma wo aneme raokokaisyo wajije rai muno wo auseo sawa inyo kapite rai indamu kakai.

²⁵ Anakotaro kai Yesus po rajjar manui. Ranivara anakotaro namije ratoe nantabove tenambe, syo rakarae bukugo namije manui muno mine tename so mamauno rai.

ARAKOVO YESUS PO MATUTIR

Yesus po Anawayo Vambunine raurairive

¹ Risiyirati Lukas, syo bukuge syo ratoe Teopilus nai. Wusyinoe sya bukugo manasyine syo ratoe nai to, wemirati syo Yesus apa anakero po raijar muno Apa ananyao po raugaje ratoe tenambe rai. ² Ana syo ratoe no bukugo namije rai mamo arono manasyimbe Yesus po apa arakove mawain utavondi Ai muno Po Anawayo Vambunine ama vambunine veano mansanyao, mansanan ava masyoto Amisye po auga seo no munijo ntiti. ³ Arono Yesus seo rainyamo, siuri rati muno kakai, umba masyote tename jirum Po taune aroron indamu Apa arakove wo aen ti wanave ware, “Tugae, Yesus opamo kovakato.” Arono naije Po mansanyao irati masyoto Amisye indati de be akarive Apa kawasae mai no mine so raije rai. ⁴ Masyote inta pisyisyo matavon, umba Po matutir pare, “Vemo wapo Yerusalem rapaya inya, yara wana indamu wapo ana Amisye po raurairive wasaije ranyut. Omamo Syo raura wasaive to. ⁵ Yohanes po vatane maugasya kuvuni mana rai, weramu masyote kavinta yai jakato, umba Anawayo Vambunine maje irati wasai.”

Amisye po Yesus auga seo no munijo ntiti

⁶ Masyote inta rai jakato, Yesusa pe apa arakove nawe wanunugambe, umba wo Yesus anajo ware, “Injayo Kurune, soamo nyare Nyo munijo Israel raugakasea ntet akato muno wimbe akarive rai rako?”

⁷ Weramu Yesus po raura akananto mansai pare, “Injayo Amisy wepi po ama masyote rapatimu, taune bo Apa varore mijje. Weti weapare wapo masyote so raen, omamo mamaisye ramu. ⁸ Kavinta indati Amisye po apa Anawayo Vambunine raugaje wasai indamu wapo Ama vambunine raijar. Indati wapo rinaura kakavimbe no munijo Yerusalem muno Yudea muno Samaria muno mine tename so rai tenambea nto ama marane rai.”

⁹ Yesus po ayaowe umaso raura mansaija jewen, umba Amisye po aijaseo no munijo ntiti. Apa arakove wo anyanyuto seowi, wo anyanyut ava kamure inta nande no aora ti wo aen akatoe ramu.

¹⁰ Mami ntami tawan no naumo warae, kavuratawe inda vatane jirum nyande sayai no mansamun. Aya ansune mpope dave. ¹¹ Yo maura nande yare, “Inya, vatano Galilea! Wabeanimaibe wasayai wapo

naumo warae ranyuta no?! Yesus, napirati Amisye po augave seo no naumo warae, indati pakare akato maisyare muno Apa seo ti wapo anyanyute so ramaisy.”

Yesus apa arakove wo vatane inta apa-timu indamu po Yudas anigwan

¹² Arono naije Yesus apa arakove umaso una no Pukamo Saitun, weti wanya wakare no Yerusalem. Nggwaravainye ramu, yara ama tauno waravainye mamo kilometer intabo. ¹³ Unande no Yerusalem, naije wuruta no awa yavaro una raije rai. Usea no tanoane inta rai no yavare ama ranivono warae. Arakove umaso awa tame mi so:

Petrus,
Yohanes,
Yakobus,
Andreas,
Pilipus,
Tomas,
Bartolomeus,
Matius,
Yakobus (Alpeus apa kavo pije),
Simon (opi awainamo vatano Zelot),
Yudas (Yakobus apa kavo pije).

¹⁴ Arakove umaso wanunugambe, manuga mamo intabo muno ube sambayambe tutir. Naije Yesus apa rijate nawe Apa akoe Maria me muno wanya kaijinta utavondi tavon.

¹⁵ Masyote inta arakovo wanave Yesus aije wanunugambe, awa wanuije nanto no tename kaujentabo (120), umba Petrus seo tet indamu payao nanto mai. ¹⁶ Po raura pare, “Sya arakove weap! Ana nande Yudas aijoe omamo nande indamu mamaisyo Ayao Amisye rai. Weye wusyinoe Anawayo Vambunine mo Yudas umaso aura ti Daud po ratoe. Yudas wepirati po naite maugav inda wo Yesus aijar. ¹⁷ Opamo ato siso no Yesus apa arakove reansai muno po Apa anakere raijaro reansarijat.”

¹⁸ (Yudas umaso po Yesus amavun, umba po doije umaso raveano mine inta ramavun. Mine umaso mirati to tende rai, anobone mporar apa wanyati ntimuje yara kakai kobe.* ¹⁹ Vatano utantuna no Yerusalem wo ranaun tenambe. Weti wo tame raugaje mine umaso rai, wo rawaino awa ayao rai ware Akeldama, ama ine mare Kopa Mavu.)

²⁰ Petrus po raura iridi pare, “Ayao kovo Mazmur mo Kopa Mavu umaso raurairive taiso:

‘Apa mino namije rapaya ntami vayave kai; vemo vatane inta una rai jinya.’*

Muno ayao inta mo ratoe akato mare,

‘Apa teto raije wemamo vatano kaijinta po ranigwan kai.’*

* 1:18 Matius 27:3-8

* 1:20 Mazmur 69:25

* 1:20 Mazmur 109:8

21-22 Maisyare omai ti, sya arakove weap, syo raura wasai: Koveamo vatano kaijinta po Yudas anigwan inda tavondijo wansai, indamu po Yesus apa kovakato raura kakavimbe tavon. Weti arakovo nanawirati utavono Amisy Yesus ai kobe no arono Yohanes po augasyo kuvuni mana rajjoe mansanan ava Amisy po auga seo no munijo ntiti onawamo wamo mansaen tenambe inda wamo arakove inta apatimu tavondi wansai.”

23 Weti naije wo vatane jiruma yatayao, aya tame mirati Matias muno Yusup awain tavonamo Barsabas (muno apa tamo Roma mamamo Yustus). 24 Umba ube sambayambe ware, “Amisy winy, Nyo vatane manuga raen tenambe. Weti are pirati Nyo apatimu, wepamo Nyo arorono reansai, 25 indamu po Yudas apa teto rajje ranigwan weye Yudas po rapaya to, to no apa siurije rai. Nyo vatano po anigwane apatimu indamu tavondijo Yesus apa arakove reansai reamo Nya anakere rajjar.” 26 Umba wo aikarae rapatin no vatano jirume umaso yai. Muno Matias wepirati mo aroron, weti Yesus apa arakovo po mansatutire mansano abusynara eane intabo wo augave siso matavon.

2

Anawayo Vambunine maje irati Yesus apa arakovo utavondi aije mansai

1 Masyoto Pentakosta nande to, naije vatano wanave Yesus aije wanunugambe no yavare inta no Yerusalem. 2 Kavuratawe inda kine inta no no naumo warae maisyare ovaro tutu dave inta nande. Umba nsiso no yavaro ana rajje umaso rai tenambe. 3 Vatano utantuna no naije wo raen maisyare taname ama vadurur ratodi ntuna vatane makari rai tetebe. 4 Muno Anawayo mo ama vambunine raugaje ti ntairi mai indamu wo ayao kotaro wantatukambe rajje rator.

5 Arono naije vatano Yahudi awa munije no no rui rui vayave ude Ono Pentakosta rai no Yerusalem. Wenanawamo wanave Amisy ai rave, weramu wantukambe Yesus ai. 6 Vatano Yahudi umaso wo vatano wanave Yesus aije maraniv wo ayao kotare raura, weti vatano wanui unande indamu udaraniv. Udaraniw yara wanepabe weye wo taune awa ayaowe ranaun vatano wanave Yesus aije umaso wo raura tetebe. 7 Umba vatano wanui umaso upaparo mansai, ware, “Wakoe! Vatano Galilea nanawi so rako?! 8 Umba wamo mansanaunamo wo taune wama ayao raura tetebe ti?! 9 Wamamo wama munije nsasye, mbe intabove jewen. Wamamo vatano Partia muno vatano Media muno vatano Elam. Wama munije

ntavonamo Mesopotamia muno Yudea muno Kapadokia muno Pontus muno Asia 10 muno Perigia muno Pampilia muno Mesir muno Libia mararaijo munijo Kirene rai. Muno wamamo vatano munijo Roma inta wande so tavon. Weti wama munije nsasye tenambe. 11 Wamamo vatano Yahudi muno vatano Yahudi jewen wamirati wantavondi ananyao Yahudi rai to. Wan tavonamo vatano Kreta muno vatano Arab. Wama munije manui rave, weramu taune wama ayao wemamo taune wamo ranaun tetebe, weye vatane so wo wama ayaowe veano Amisy ararimbe ware, ‘Amisy pi bambunin, Apa ana daveye ngko dave!’ ”

12 Maisyare omai ti, vatano munije kotare umaso unantaive muno wanepabe rai. Wo raura vambinibe ware, “Wamo ana nande so raen kobe jewen. Weti ama ayao noare rui?” 13 Weramu vatano kaijinta wanaikebe mansai ware, “Ee...! Vatane wato nanawamo wo awije ramanama!”

Petrus po Ayao Kove raura aje vatano wanui mansai

14 Umba Petrus seo tet muno apa arakovo abusyn eane intabo usayai atavon. Umba po rawaino anamoto manakoe rai pare, “Sya arakovo Yahudi muno vatane tenambe wana no Yerusalem so rai! Wasamarikoame rasakinavo sya ayaowe so rai kobe. Syare syo raura kakavimbe wasai. 15 Wapo ratantona wapare ream maeno awije rai. Ana wapo ratantona somamo mamaisyere ramu! Weye soamo awatan ngkobe nene, weti vatane inta wo awije ramanam da maene ramu. 16 Yara anapaporainyo maisyare so omamo anawae Yoel po raurairive to no taiso:

17 Amisy pare,

‘Arono munije ama akari mararai, indati Syo sya Anawayo Vambunine raugaje vatane mansai tenambe.

Weti wapa arikainyo anya, wanya indati wo Sya ayao nde mai ravov,

muno wapa arikainyo kamurame wo ana Syo rarorono mai rajen no awa nikimarije rai,

muno wapa vatano awa akoe matu mai nawamo Syo nikimarije raunande mansai.

18 Masyoto namije indati Syo sya Anawayo Vambunine raugaje vatano wanapatambe Rinai mai tenambe, anya muno wanya, weti wo Sya ayao nde mai ravov.

19 Indati Syo anainame raroron nande no naumo warae muno Syo anapaporainye raroron no mine so rai no taiso:

Ana mavu muno tanamo mbadurur muno kijao manakoe ntatipu.

²⁰ Uma amije ngkaumudi muno embae ramije mavu.

Arono anakotare umaso raen kobe, weamo Amisye apa masyoto akoe muno ntiti rave nande.

²¹ Arono naije are pirati po rinawain, Syo apaya apa ayao kakaije ama mangke rai.*

²² Inya! Sya arakovo Israel, wapo rinaranide! Syo Yesus, vatano Nasaret, aura kakavimbe wasai. Amisye po vambunine raunande Yesus ai indamu wapo raen tugae yamo Yesus wepirati Amisye po atutir. Weti Yesus po anapaporainye muno anainame rarorono wasai. Taune wapo raen tenambe to. ²³ Yesus umaso pamo vatane wo aunanto no wasaneme rai, mamaisyo Amisye apa ana po rapatimu rai, omamo Po raen wusyimbe to. Umba wapo aunanto vatano mamune mansai indamu wo auseo sawa no inyo kapite rai, weti wapo aubai to! ²⁴ Weramu Amisye po aijaseo kovakato muno Po wene ama siurije rapaya Ai, weye Yesus no tawan no wene ama uga rai omamo mamaisye ramu. ²⁵ Wusyinoe Daud po Amisye apa urairije raugaje, wemirati mo Yesus apa kovakato raura wusyimbe maisyare so:

'Syo Amisye aen te no inamun tutir.

Weti inanuga mamaune ramu weye Amisye pamo no inautan.

²⁶ Wemi mbewar inananambe muno rikangkamambe Ai.

Wene mare nde inanasine so rai, weramu inanave Amisye bo amen.

²⁷ Amisye, risyamo Nya arikainyo panapatambe pi risy,

indati Nyo inapaya ti rituna tawan no wene ama uga raije ramu,

muno Nyo inapaya ti inanasine so ntami mauge ramu.

²⁸ Nyo unanuijo to no kovo nuge nuganuije rarorono rinai.

Wintuna inautan weti rinananambe.*

²⁹ Sya arakovo Yahudi, syare syo aneno Daud apa ayao umaso raura kakavimbe wasai. Tugae, aneno Daud opamo kakai to. Vatane wo antuna muno apa aipapo mamu soamo ntami. ³⁰ Weramu Daud sopamo arono wusyinoe Amisye po raurairive patimuve ai to pare, 'Daud, nya susye rampamo iridi to mamu indati Syo vatan inta aijaseo be akarive Sya kawasae mansai, maisyare soamo wimbe akarive wemaisy.' Weti Daud po urairije umaso raen muno opamo anawae Amisye inta pije. ³¹ Weti po ana indati nande no masyoto

rijate raen, ti po Mesias apa kovakato raura wusyimbe to. Pare Mesias opamo Amisye aneme mpaya Ai ti tami tawan no wene ama uga raije ramu, muno anasine ntami mauge ramu. ³² Yesus wepirati Daud po aura umaso. Yesus pamo Amisye po aijaseo kovakato, muno raen tenambe reamo Apa kovakato raeno wansamije rai tugae. ³³ Muno Amisye po Yesus umaso aijaseo titive tuna no Amisye anem ngkove rai indamu be akarive atavon. Muno Injajo Amisy po Anawayo Vambunino nami raurairiveowe raunanto Yesus ai. Umba Yesus po Anawayo Vambunine umaso raugaje reansai jakato, wirati wapo ranaun reamo ayao kotare raura so.

³⁴⁻³⁵ Daud po raura akato taiso:

'Amisye po raura nanto sya Akarijo Titi ai pare,

"Nyaje ntuna no inanem ngkove rai java

Syo Nya marova maveaje utantuna no najo ate rai

indamu wimbe akarive mai."*

Daud po raura taije maisy, weramu opamo Amisy po aijaseo anem ngkove raije ramu. Weti wamo raen Daud po taune aura jewen, yara po Yesus aura umaso. ³⁶ Maisyare omai ti, sya arakovo Israel, syo rauranara wananta rai, ayaowe somamo tugae: Yesus wepirati wapo auseo sawa inyo kapite rai, Yesus napiso Amisy po aijaseo be akarive vatane mansai tenambe muno Opamo wama Mesiasa pije,* wepirati Amisy po atayao wansai."

³⁷ Arono vatane umaso wo Petrus apa ayao umaso ranauna mewen, umba man-imaumbe rave weye awa ayao kakaije ntapekan. Weti wo ranajo irati Petrus muno arakovo kaijo Yesus po mansatutire mansai ware, "Arakove, soamo reambeare rui?"

³⁸ Umba Petrus po ayaowe rasakinav akananto mansai pare, "Sya arakove weap, wasakinavo wapa ayao kakaije rai! Umba wade ramu reamo tamo Yesus veano wasaugasya kuvuni mana rai, indamu Amisy po wapa ayao kakaije rapaya wasai. Wea umba Po Anawayo Vambunine raunande wasai. ³⁹ Urairije umaso mamu Amisy po raugaje wasai muno wapa susyo miridije nto mansai muno vatano una no rui rui vayave mansai. Weti are nawirati wama Amisy po mawainde, purairive pare Po awa ayao kakaije rapaya muno Po Anawayo Vambunine raunande mai."

⁴⁰ Umba Petrus payao nggwaravainy akato. Po mansanyao pare, "Wasakinavo wapa ayao kakaije rai indamu wemo

* 2:21 Yoel 2:28-32 ✧ 2:28 Mazmur 16:8-11 ✧ 2:34-35 Mazmur 110:1 * 2:36 Tamo Mesias mo tamo Kristus ramaisy, ama ayao mare, "Vatano Amisy po apatimu indamu be akari titive wansai."

mangke Amisye indati po raugaje vatano ukakainoanive mansai nande wasai tavon inya! Weye vatano arono naiso ukakainoanive vintaboa.”

Vatano wanave Yesus ai awa wanuije miridi nseo manakoe

⁴¹ Vatano wanui rave wanave Petrus apa ayaowe rai, muno Yesus apa arakove wo maugasya kuvuni mana rai tenambe. Weti masyoto naije vatano nanawirati wanave Yesus ai awa wanuije nanto no ribuge mandei. ⁴² Awa bekere manakoe ti wanunugambe tutir indamu ube sambayambe muno wo Yesus apa arakovo po matutire awa ananyaowe raraniv. Muno wisiyi kava, wo rotije raisy indamu maemen irati Yesus apa kawai rai.

⁴³ Arono naije Yesus apa arakovo po matutire wo anapaporainye raroron manui rave no Yerusalem. Weti vatan tenambe unantaive muno wo Amisye asyaniv. ⁴⁴ Vatano wanave Yesus ai nanawamo ube intabove tutir. Wo awa ananuge ranunugambe indamu awevo rai tenambe. ⁴⁵ Wo awa mine ramavun muno awa ananuge ntavon, umba ama doije mamu wo ranugan tenambe. Weti are pirati apa doije meweno ai, wo inta raunanto amarom. ⁴⁶ Masyote yanteteramo wanunugambe no Yavaro Amisye rai tutir, muno wanunugambe tavon no awa yavare raita indamu wisisyi. Manayanambe muno manuga ngkovo mansai vambinibe. ⁴⁷ Wo Amisye ararimbe tutir. Vatan tenambe manayanambe mai, weye awa ana udaveye ngkov. Vatano wanui wanave Yesus ai ti Amisye po mapaya ayao kakaije rai, weti masyote anteter vatano wanave awa wanuije miridi nseo.

3

Petrus po saumane raunanto vatano tunaive ai

¹ Masyote inta uma amije mandei, weti Petrusa pe Yohanesa pe yirija no Yavaro Amisye rai indamu ibe sambayambe. ² Nyande ama unsanda sisa inta rai, ama tame mirati Unsanda Ngko Dave. Vatano tunaive inta tuna no naije. Vatane umaso tunaive kobe no arono ano aje kaijoe. Masyote yanteter apa arakove wo auga no unsanda umaso raive tutir indamu po doije ratano vatane mansai. ³ Petrusa pe Yohanesa pe ije yare isisa, weramu vatano tunaive umaso po yaen kobe ti po doije ranajo yai. ⁴ Weti Petrusa pe Yohanesa pe yo vatano tunaive umaso anyanyut. Umba Petrus po raura aje ai pare, “Nyo ririnsanyanyut kaija!” ⁵ Weti vatano tunaive umaso po yanyanyut kobe, weye

po ratantona indati yo doije inta raunande ai.

⁶ Weramu Petrus po raura aje akato pare, “Emasije, perakije omamo risyave inta raije ramu. Yara sya ana syave raije mamu soamo syo raunande nai: Yesus Kristus vatano Nasaret apa vambunine rai, nseo ntet indamu nyanya!” ⁷ Umba Petrus pavakaje po anem ngkove raijar po aijaseo tet. Naije kobe vatano tunaive umaso ajoe mbambunin tenambe. ⁸ Weti sopa seo te kobe panya. Tavondi Petrusa pe Yohanesa pe yai usisa no Yavaro Amisye ama uga rai. Vatane umaso pamo sasopati ara po Amisye ararimbe. ⁹ Vatan tenambe wo aeno pananave muno kangkamambe Amisye ai. ¹⁰ Weti upaparo mansai, ware, “Wakoe! Vatane sopamo napirati noe po doije ranajobeve no Unsanda Ngko Dave raije pi so! Animaisye mi nande ti maisyare somaisy?!”

Petrus po Ayao Kove raura no Yavaro Amisye ama uga rai

¹¹ Vatano sauman to umawe pamo ananibe Petrusa pe Yohanesa pe yai, weti sawa yaneme rai ara wanya. Wuruta no Yavaro Amisye umaso ama repon, rawainamo Repono Salomo. Muno vatan tenambe wansanan ude no repone umaso tavon, weye unantaive anapaporainye umawe rai ti. ¹² Wanugano makiani, weti Petrus po raura nanto mai pare, “Vatano Israel, wabeanimaibe wapaparo wasai? Wabeanimaibe wasami ntami tawan no reansai? Wapo ratantona wapare veravo taune ririma vambunine ndako, ririnsanuga ngkove ndako, wemi mbewar vatane so panya. Vemo wapo ratantonanare naije maisy inya! ¹³ Yara wama aneno Abraham muno Isak muno Yakob awa Amisye wepirati po anapaporainye umaso raroron to. Po rave indamu Po Yesus, wepirati Apa Arikainyo panapatambe Aije, Apa kovo ntiti raroron. Weramu wepamapo wapo Yesus umaso aunanta no Pilatus ai indamu po mangke raugaje Ai. Arono naije Pilatus po ratantona pare po Yesus apaya yayave, weramu wepamapo waponae ti wapo Yesus amamarave mangkebe. ¹⁴ Yesus opamo anuga ngkakavimbe muno mamai dave, weramu waponayo Ai, yara wapo Pilatus anajo indamu po vatano kaije apaya, wepirati po vatane inta aubaibe to. ¹⁵ Muno wapo Yesus aubai to, Wepirati po kovo nuge nuganuije raunande. Weramu wene mo Yesus aijar tutire ramu, weye Amisye po aijaseo kovakato. Apa kovakato mamu ririmo raeno ririnsamije rai tugae.

¹⁶ Arakove, wapo raen vatane sopamo nugoenta tunaive. Weramu soamo anasine nsauman muno mbambunin weye panave

kobe Yesus ai muno Apa vambunine rai. Apa anave Yesus aije wemirati mo saumane raugaje ai, maisyare wapo raene somaisy.

¹⁷Sya arakove, weape wapa akarije nawe wapo Yesus aubai to. Weramu syo raen wapantatukambe wapa ana wadave Yesus aije umaso rai. ¹⁸Syo raura wasai, ana nande Yesus aije omamo nande indamu Amisyepo po apa urairije raveti mamaisy. Weye Apa anawae wo Amisyepo apa ayao raurairive to no wusyinoe ware Mesias indati siuri. ¹⁹Maisyare omai ti, syare wasakina wapa ayao kakaije rai indamu Amisyepo raupaisyo wasai. ²⁰Wea umba Amisyepo tuna wasautan muno Po vambunine raugaje wasanuga rai. Indati Po Yesus atutir de akato no mine so rai. Yesus wepamo wapa Mesias, wepirati Amisyepo atayao wasai. ²¹Weramu Yesus tuna tawan no munijo ntiti yava Amisyepo apa masyoto arono indati Po mine so ratayao ti nggwanin akato, mamaisyo Po apa anawae matutir ti wo raurairive no wusyinoe rai. ²²Musa po raura nanto watano Israel mansai pare, "Wapa Amisyepo indati po wapa arakove inta atayao no wapa susye rai, Po aijaseo be anawaebe wasai maisyare rinamaisy. Syare wapo anawae wato araniv mavabe indamu wabeta Apa ananyao rai tenambe. ²³Weramu are pirati po aranive jenenamo, watano napije atugaro marambe Amisyepo apa kawasae maora."^{*}

²⁴Arono anawae Samuel aijoe muno anawae tutir miridije nde tenambe, wo masyoto rijate so raurairive tavon. ²⁵Anawae umaso awa urairije mamo wepirati wapaura rai weye onawamo wapa anene nanawije. Muno Amisyepo apa urairijo po raokaisyo wapa anene mansai omamo wapaura rai tavon. Weye Amisyepo raura nanto Abraham ai pare, "Indati nya susyo nyo mampame nawamo Syo Watane inta atayao no mai indamu Po kove raugaje watane kotaro ntuna no mine so mansai tenambe."^{*} ²⁶Weti Amisyepo apa Arikainyo panapatambe Aije, Wepirati Yesus, atutir de watano Israel wasai manasyimbe, indamu Po kove raugaje wasai. Kove umaso mamo mo wasasarirae indamu wasakinawo wapa ana wadave ti ngkakai rai."

4

Petrusa pe Yohanesa pe isyai no Anugano Akari Akokoe Yahudi mansamun

¹Arono Petrusa pe Yohanesa pe yananyaube irati watane mansai, naije syeno Yahudi nawe watano Saduki nawe ude irati yai. Muno akarijo nait

Yahudi wo Yawaro Amisyepo ramane de tavon. ²Wenanawamo uparijo Petrusa pe Yohanesa pe yai weye yo watane mansanyao yare Yesus kovakato to weti indati watano ugwenene ukovakato tavon. ³Weti syene muno Saduki muno nait akari umaso wo Petrusa pe Yohanesa pe yaijar. Arono naije kaumu kobe ti wo yaugave siso no tanoano makova rai yava nsiman. ⁴Weramu watano wo aya ananyaowe raranive umawe wanui rave wanave Yesus ai. Weti watano nanawirati wanave Yesus aije awa wanuije miridi nseo akato: akarijo yavaruga awa wanuije nanto no ribuge radani.

⁵Siman akato Anugano Akari Akokoe Yahudi wanunugambe no Yerusalem. Wenanawamo syeno akokoe nawe, akarijo Yahudi nawe, kuruno makari mbaro Ananyao Musa rai nanawije. ⁶Muno Hanas, opamo Syeno Titi piye, no no naije tavon. Muno Kayapasa pe Yohanesa pe Aleksandra pe onao tavon, muno Syeno Titi apa yavaruga tenambe. ⁷Vatan tenambe umaso wanunugambe ware wo mangke ratantona Petrusa pe Yohanesa pe yai. Weti wo yaugavere isyai no mansamun. Wo yanajo ware, "Watano tunaive so ipo aveare rui? Animaisyema vambunine mirati ipo rave ai? Indako arepa tame mirati ipo rave ai ti sauman?"

⁸Umba Anawayo Vambunine mo vambunine raugaje Petrusa ai, weti payao rasakinaw akananto mansai pare, "Injae syeno wabe akarive Yawaro Amisyepo rai muno akarijo Yahudi weap! ⁹Masyoto so wapo ririnsanajo kewabe ririma ana indave rai, weye ana ngko dave so raunanto watano tunaive so ai, omamo rimo rave. Wapo ririnsanajo wapare apa saumane mamo rimo aveare rui. ¹⁰Syare weape, kawasae Israel tenambe nawe, wapo raenamo Yesus Kristus, watano Nasaret, Apa vambunine mi mbewar watane so sauman, weti wapo aeno teti so. Wepirati wapo Yesus umaso auseo sawa inyo kapite rai weti kakai, weramu Amisyepo po aijaseo kovakato. ¹¹Yesus wepamo aurata irati orame so rai:

"Oramo watano wapo yavare ranari wapon-ayo rai, ti wapo ramauta vayave,

orame so mirati oramo manasyin dave Amisyepo po ratayao indamu yavare rausea nteto rai mo raijar matuve."^{*}

¹²Yesus obo pirati po watano mine vone so mapaya ayao kakaije rai. Amisyepo pare watano kaijinta mamaisyo po wansapaya wama ayao kakaije raije jeben bayave, yara Yesus obo pamo mamaisy."

^{*} 3:23 Ulangan 18:15, 18-19 ^{*} 3:25 Kejadian 22:18, 26:4 ^{*} 4:11 Mazmur 118:22. Raen tavon no Matius 21:42; Markus 12:10; Lukas 20:17; muno 1 Petrus 2:7.

¹³ Arono Anugano Akari Akokoe Yahudi wato wo Petrusa pe aya ayao umaso raraniv, upaparo mansai weye yo masyanive ramu yara ibambunina. Wo raen Petrus muno Yohanes onayamo isekoraveye ramu muno vatan bayave nanaya, aya tame ntiti jewen. Muno wo yaen onayamo Yesu apa arakove nanaya. ¹⁴ Weramu wo ayao inta rasakinav akananto yai kakai, weye watano uma tunaiveowe soamo tet no mansamun, sauman ivae. ¹⁵ Weti wo yatutir indamu yusya. Umba wayao rai ¹⁶ ware, “Animaisye mi wamo rave Petrusa pe Yohanes pe yai? Soamo vatano utantuna no Yerusaleme so wo anapaporainyo yo rarorone umaso raen tenambe to, muno wamamo wamo ramamarave kakaija. ¹⁷ Weramu vemo ayaowe so maneka tutir nora, yara wambeke damu raumandi kobe! Maisyare omai ti, wamare wamo yansopi indamu vemo yo tamo Yesu raura akato inya.”

¹⁸ Weti wo yawain indamu yakasisa. Umba wo yanayao soowabe ware, “Vemo ripo Yesu aura rijati akato inya muno ripo vatane manyao Apa tame so rai jakato inya!”

¹⁹ Weramu Petrusa pe Yohanes pe yayao rasakinavo mansai yare, “Ririmare Amisye apa bekere mi wamo ratantona rati. Weti wapare rui mirati mamaisy: Ririmбето Amisye apa ayao rai rako weapa me? Yara ririmamo rimare rimbeto Amisye apa ayao obo rai indati mamaisy. ²⁰ Ririmamo rimo Yesu aeno taune ririnsamije rai muno rimo Apa ayao ranauno taune ririnsamarikoame rai, weti ayaowe so indati rimo raura tutir.”

²¹ Arono naije Anugano Akari Akokoe Yahudi wo mangke mamaisy yaije rakani marudi, weye anapaporainyo yo rarorone mbewaramo vatan tenambe wo Amisye ararimbe. Wativa wo yanayao mangkebe akato vayave, yarawe wo yapaya weti yirija. Vatan tenambe wo Amisye ararimbe weye Po anapaporainye raroron. ²² Weye vatano tunaive yara saumane sopamo be vatan anuive to, apa tume mo tumo tename jirume rakivan to.

Vatano wanave Yesu aije wo Amisye anajo indamu Po vambunine raugaje mansai

²³ Petrusa pe Yohanes pe yuje tanoano makova raora, umba yakata no aya arakovo nanawirati wanave Yesu ai tavone mai jakato. Umba yo ana nande yaije raura kakavimbe mansai muno ana namirati syeno akokoe nawe akarijo Yahudi nawe wo raura nanto yaijoe raura mansai tenambe. ²⁴ Aya arakove wo aya ayao umaso raraniva jewen, umba

ube sambayambe manuga intabo. Ware, “Amisyo winy, wimbe akarive anakotere rai tenambe. Winyirati nyo naumo warae me mine so me nawanano warave me ranari, muno anakotaro ntuna no ama uga ranari tenambe. ²⁵ Wusyinoe Nya Anawayo Vambunine mo vambunine raugaje wama aneno Daud ai arono panapatambe Nai, weti po raura taiso pare:

‘Vatano wantukambe Amisye ai mamune ntipu manuga rai.

Wo kakaije ratantona Mesias ai, weramu ubea marudi.

²⁶ Akarijo titi mine so wanatayaube indamu wo marova rave.

Wanunugambe ware umarovave Amisye ai muno Apa Mesias po apatimu Ai tavon.”²⁶

²⁷ Wusyinoe Daud po raurairive maisyare wemaisy, muno reamo raen anakotare nande to mamaisyo apa urairije rai tenambe. Weye Akarijo Titi Herodes muno Gubernur Pontius Pilatus yanunugambe irati vatano Yahudi jewene muno vatano Israel matavon, wanunugambe no Yerusaleme so indamu wo kakaije ratantona Yesu ai. Weramu Yesu sopamo Nya Arikainyo anuga mamai dave panapatambe Nai, muno Wepirati Mesias Nyo apatimu wansai. ²⁸ Vatano Yerusalem umaso awa ana wo rave Yesu ai omamo Nyo rapatimu wusyimbe to. Weti ana nande Aije umaso nande tenambe mamaisy Nya bekere muno Nya vambunine obo rai.

²⁹ Amisyo winy, soamo reambeker reamare Winyo akari akokoe Yahudi wato maen, weye uparijo reansai wo raura ware wo reansave tatugadi. Weti reamo nanajo indamu Nyo vambunine raugaje Nya vatano wanapatambe Naije reansai indamu reamo Nya ayao raura vambunimbe muno vemo reanjani nora. ³⁰ Reamare Nyo vambunine raugaje reansai indamu reamo saumane raugaje vatano ugwanene mansai muno reamo anapaporainye raroron arono reamo Yesu apa tame raura. Weye Yesu, opirati Nya Arikainyo anuga mamai dave panapatambe Nai, Apa tame mi mbambunin.”

³¹ Arono ube sambayambe tai somaisy, yavaro una raije umaso mangkiki muno Anawayo Vambunine mo vambunine raugaje mai tenambe, weti wo ayao Amisye raura vambunimbe yara ujanive ramu.

Vatano wanave Yesu aije ubekobe mai tenambe

³² Vatan tenambe wanave Yesu aije wenanawamo manuga muno awa bekere mamo intabo. Vatan inta po apa ananuge

raura pare obo apave raije ramu, yara awaveo rai tenambe. Weti vatan inta wo ananuge inta ramavugo awa arakove maije ramu, yara wo ratodijo mai vayave. ³³ Amisy e apa vambunine manakoe irati Yesus apa arakovo po matutire mansai, weti wo Amisy Yesus apa kovakato ravovo tutir. Muno Amisy e po kovo manakoe raugaje mansai. ³⁴⁻³⁵ Are nawirati awaura irati mine inta rai wo ramavun, muno are nawirati awave yavare inta rai wo ramavun tavon, umba wo ama doije raugave ude no Yesus apa arakovo po matutire mansai. Umba wo ratodijo vatano rui pirati apa ananuge meweno aije ai. Weti vatan inta apa ananuge meweno aije jewen bayave, yara maito maide.

³⁶⁻³⁷ Maisyare wemaisy, Yusupa tavon po apa mine inta ramavun, umba po ama doije raugav de no Yesus apa arakovo po matutire mansai indamu wo ratodi. Yusup umaso pamo vatano Lewi,* apa munije mi no no nupatimugo Siprus. Yesus apa arakove wo awaino Barnabas, weye ama ine mare “po vatane manuga rayove ti manayanambe akato.”

5

Ananias muno Sapira yo Anawayo Vambunine raponae weti igwenen kava

¹ Vatan inta apa tame mirati Ananias, muno apa anamu ama tame mirati Sapira, yo aya mine inta ramavun tavon. ² Umba Ananias po ama doije nake inta ramavu ti ntami yamarom, muno apa ana dave somamo apa anamu mo raen kava atavon. Umba po doije ama ate raugavere Yesus apa arakovo po matutire mansai pare, “Syo sya mine ama doije raunande tenambe so.”

³ Weramu Petrus po raura nanto ai pare, “Ananias! Anakakai Akoa siso nanuga wato rai to! Mbeanimaibe nyarurijabe nyare nyo Anawayo Vambunine raponae, weye winy manino nyo doije ama nake rautan?! ⁴ Nyo nya mine ramavun dainyamo, winya mi vae, muno arono nyo ramavun to, ama doije mamo winyare nya ntavona. Weti mbeanimaibe nyo ratantona no nanuga rai nyare ama doije mi so ntenambe? Weramu ama doije mi so ntenambe ramu! Soamo winyo vatane mansaponae ramu, yara Amisy e pi wimbeker nyo aponae!”

⁵ Ananias po Petrus apa ayao umaso raraniv, naije kobe temaje umba kakai kobe. Weti vatan tenambe ujani dave.

⁶ Umba vatano mansae inta ude wo kaene rave Ananias apa kopa rakepan, umba wo raugave usya wo rantuna.

⁷ Nggwaravainy akatoe ramu, yara maisyare uma amije mandeij wemaisy, umba Sapira, omamo Ananias apa anamu mije, makare nsiso. Mantatukambe ama anap apa kakai to umaso rai. ⁸ Umba Petrus po raura nanto wanya umaso rai pare, “Sapira, syare syo nanajo mino nya anap pe ipo ramavune rai, ama doije mi so ntenambe rako?”

Umba mo raura mare, “Tugae, ama doije mije ntenambe.”

⁹ Weti Petrus po raura akananto pare, “Ripamo ibeare ruimai dave irati ipo Amisy e apa Anawayo Vambunine raponae? Nyo vatano usayai no unsanda wato maena e? Onawamo kavoe wo nya anap antuna to. Muno indati wo naugave usya tavona!”

¹⁰ Naije kobe Sapira ntemaje ntami yarawe ngkakai kobe tavon. Umba vatano mansae umawe usisa, wo raen ngkakai to. Weti wo raugave usya wo rantuna no ama anap apa antuna raije ama rani tavon. ¹¹ Weti anugano Amisy e ujani dave tenambe, muno vatano kajjinta nanawirati wo aya igwenene umaso ranaun onawamo ujani tenambe tavon.

Yesus apa arakovo po mansatutire wo anapaporainye raroron

¹² Arono naijeamo Yesus apa arakovo po mansatutire awa anapaporainyo wo rarorone manui rave. Muno vatan tenambe wanave Yesus aije nanawamo wanunugambeve no Yavaro Amisy e ama Repono Salomo. ¹³ Vatano wanave jewene nawamo ubambunin da usisa matavone jewen weye ujani dave. Weramu wo ratantona ware, “Vatano wanave Yesus aije wenawamo vatano uko dave.” ¹⁴ Muno vatano wanave Yesus aije awa wanuije miridi nseo tutir, anya muno wanya tavon. ¹⁵ Yesus apa arakovo po mansatutire wo anapaporainye raroron ti manui, weti vatane wo vatano ugwane maugave uje no unanuije rai umba wo maugaje unaki no awa tanije rai. Weye mansanaveano Petrus amen ware po unanuije umaso raideto muno apa aname nande vatano ugwane umaso mansai, weamo indati usauman. ¹⁶ Muno vatano wanuije nanawirati una no munije kotaro mararaije Yerusalem raije wo awa arakovo ugwane maugave ude usisa no Yerusalem. Wo vatano nanawirati anawayo kakaije no mansaije maugave ude usisa tavon. Umba Yesus apa arakove wo sauman raunanto mansai tenambe.

Yesus apa arakovo po mansatutire mapaya tanoano makova rai

¹⁷ Weramu Syeno Titi muno apa usayai nande atavone, wenanawirati vatano

* 4:36-37 Vatano mavaki susyo Lewi rai wenanawamo vatano wanapatambe no Yavaro Amisy e rai nanawije.

Saduki, manuga mamu mamuno Yesu apa arakovo po mansatutire mansai weye vatano wanui utavondi mai. ¹⁸ Weti syene pe wo Yesu apa arakove umaso mansaijar wo maugave usisa no tanoano makova rai. ¹⁹ Weramu ama namano, Amisye apa naite inta de po tanoano makova ama unsanda rapapaya, umba po Yesu apa arakove maugave uje. ²⁰ Po matutir pare, “Wapusya ramu wata kai! Wata wasisa no Yavaro Amisye ama uga rai, umba wapo ayao kovo wanyine so raura vatane mansai tenambe.”

²¹ Wetiva awatan ngko dave Yesu apa arakove umaso wuruta usisa no Yavaro Amisye ama uga rai, mamaisyo naito Amisye po matutiro raije rai. Umba wananyaube no naije.

Arono naije Syeno Titi muno apa usayai nande atavone wo akarijo Yahudi mawainde indamu Anugano Akari Akokoe Yahudi wanunugambe tenambe indamu wo mangke rapatimu Yesu apa arakovo po mansatutire umawe mansai. Umba wo awa naite inta matutir wuruta no tanoano makova umawe rai indamu wo Yesu apa arakove umaso maugave ude. ²² Weti naite umaso unanta tanoano makova rai, weramu wo Yesu apa arakove maene ramu weye maumandi to. Umba naite umaso wakare, wo raura kakavimbe irati akari akokoe Yahudi umawe mansai ware, ²³ “Arono reananta tanoano makova rai, ama unsanda mamu reamo raen ta noare muno ama rauguji matuve. Muno naite usayai wo unsanda ramana nene. Weramu arono reamo unsanda rausisoamo, reamo vatane inta aen akato no naije ramu.” ²⁴ Arono wo ayao umaso raurana jeben, naije syeno akokoe nawe, akarijo naito wo Yavaro Amisye ramane pe wananepebe. Wo raen kobe jeben ti ware, “Animaisye mi indati nande?”

Akari Akokoe Yahudi wo ayao mo Yesu apa arakove mansopije rapatimu

²⁵ Naije kobe vatan inta de po raura nanto akarije umawe mansai pare, “Wadanide! Yesu apa arakovo wapo maugave usisa no tanoano makova raijo wenawamo soamo una no Yavaro Amisye ama uga rai wo vatane mansanyaube!” ²⁶ Wetiva naito wo Yavaro Amisye ramane nawe, awa akarije pe wuruta no Yavaro Amisye rai indamu wo Yesu apa arakovo po matutire maijar. Weramu wo maijaro soowabe ramu weye wo vatano wanui no naije masyaniv, ware, “Vemo wo orame veano wansamaug inta!”

²⁷ Wo maugav, umba usisa wo maunanta no akari akokoe Yahudi mansamun. Umba Syeno Titi po raura nanto Petrusa pe mansai pare, ²⁸ “Reamo wasaorai mangkebe

to, reamare vemo wapo Vatano napije apa tame rave vatane mansanyao inya! Weramu wapo ananyao so ravovo Yerusalem so rai tenambe to! Muno wapo reansangkivan wapare reamirati reamo Vatano napije aubaisy. Mamaisye ramu!”

²⁹ Petrus muno arakovo kaijo Yesu po matutire wo raura akananto ware, “Amisye wepirati reambeta Ai pije, yara vatane nawamo reambeta maije jeben! ³⁰ Akarijo Yahudi, weapo Yesu aubai to weye wapo auseo sawa no inyo kapite rai. Weramu Amisye, wepirati wama anene ubeaje Ai, Po Yesu umaso aijaseo kovakato no wene rai. ³¹ Umba Amisye po aijaseo tuna anem ngkove rai no munijo ntiti, indamu Yesu opamo Akarijo Titi po vatane mapaya ayao kakaije rai. Amisye po raveare we-maisy indamu Po varore raugaje vatano Israel wansai indamu wansakinavo wama ayao kakaije rai wirati Po rapaya wansai. ³² Reamamo reamo ana nande Yesu aije raura kakavimbe weye reamo raen tenambe to. Muno Anawayo Vambunine mo raroron tavon mare anakotare somamo mamai tugae. Anawayo Vambunine mamu Amisye po raugaje irati vatano rui nawirati ubeta Aije mansai.”

³³ Petrus apa ayao nsopi no naije. Arono akari akokoe Yahudi wo ranauna jeben, upari rave. Weti ubeker ware wo Petrusa pe maubaisy. ³⁴ Weramu vatano Parisi inta no no anugano naije tavon, apa tame mirati Gamaliel. Opamo kuruno akarikuga mbaro Ananyao Musa rai muno vatan tenambe wo aura titive. Gamaliel umaso seo tet, umba po vatan inta matutir wo Yesu apa arakove maugave usya rati. ³⁵ Umba po raura anugano namije rai pare, “Sya arakovo Israel, animaisye mi wapare wandave vatane so mansai omamo syare wamo ratantona kobe wusyimbe rati. ³⁶ Syare wansamen: wusyinoe vatane inta apa tame mirati Teudas po raura pare, ‘Risiamo vatano syanakoe.’ Weti vatane mansano ratusije mambisy utavondi ai. Weramu naito Roma wo aubaisy, umba vatano utavondi aije nawamo mangkat. Maisyare omaisy, apa bekere pare be akarive raumandi kobe. ³⁷ Naije akato, arono pemerinta pare po vatane awa wanuije rator, vatano Galilea inta apa tame mirati Yudas* de po raura pare, ‘Vemo wamo pemerinta araniv inya!’ Weti po vatano wanui mawain wanugan utavondi ai. Weramu naito Roma wo aubaisy tavon, umba vatano utavondi aije nawamo mandamisy. ³⁸ Vatane umaso awa bekere manakoe weramu ubea marudi weye Amisye apa bekere mi wema jewena. Weti sya ananyao syo raurade wasai mi

* 5:37 Yudas so sasyeo Yudas napi po Yesu amavune ai.

so: Syare vemo wamo ana inta rave Yesus apa arakove wato mansai jinya, yara wamo mapaya vayave! Weye ranivara awa ana udave mammo vatan bayave awa ma, weamo indati raumandi jaje. ³⁹Yara wo Amisyé apa bekere bo rarijat, weamo wamo mansopi kakai, weye maisyare wamarovave Amisyé aije wemaisy!"

⁴⁰Gamaliel apa ayao umaso mbambunin, weti akari akokoe Yahudi utavondi rai. Weti wo Yesus apa arakovo po matutire mawain akare. Umba wo kaijo waije rave manepat. Umba wo manayao ware, "Vemo wapo Yesus apa tame raura nakato vatane mansai jinya!" Umba wo mapaya vayave.

⁴¹Weti Yesus apa arakove umaso wuje anugano Yahudi raora. Manuga mammo ranayanambe, ware, "Vatane wo wansave tatugadi muno wo wansaura tantunawi weye wantavondi Yesus ai, weramu wansananibe weye Amisyé po wansapatimu indamu wansiuri tai maisy." ⁴²Muno masyote anteter wananyaube tutir no Yavaro Amisyé rai muno vatane awa yavare raita. Wo Ayao Kovo Yesus ravov ware Yesus opamo Mesiasa piye.

6

Vatane kaururum mapatimu indamu wanapatambe wanya kavini mansai

¹Arono naije vatano wanave Yesus aije awa wanuije miridi nseo. Inta wo ayao Yahudi raura, yara inta wo ayao Yunani raura. Masyote anteter arakovo wanave Yesus aije wo doijo anaisyé ratodijo wanya kavinije mansai. Weti wo ratodi wanya kavini wo ayao Yahudi raura mansai muno kavini wo ayao Yunani raura mansai tavon. Weramu vatano wayao Yunanive wo nuge rapanan ware doije mammo ratodi mamaisyé jewen. Weti uparijo awa arakovo wayao Yahudive mai ware, "Doijo anaisyé ratodi reama wanya kavini mansai ma mamauna, yara wapa wanya kavini awa ma manakoe. Weti mamaisyé ramu!"

²Umba Yesus apa arakovo abusynara eane jirum wo ayao umaso ranaun. Weti wo vatano wanave Yesus aije mawainde wanugan tenambe, umba wo raura ware, "Reamamo reamo ayao Amisyé ranyao wasai, omamo reama anakere mije. Weti reamo anakere so rapaya indamu reamo doijo anaisyé ratodi jakato, weamo mamaisyé ramu!" ³Maisyare omaisy, reama arakove, reamare wamo arakove inta mansano kaururum matayao, nanawirati vatane wo maen ware manuga ngkov. Wamo maen dati indamu onawamo Anawayo Vambunine ama vambunine manakoe no mai muno awa ana wo ratantona mba dave. Umba wamo anakere

raugaje mai indamu wo doijo anaisyé ratodija maito maide tenambe. ⁴Yara reamamo reamo sambayane rave muno reamo ayao Amisyé ravov, omamo reama anakere mije."

⁵Awa ana wo raura umaso mammo vatano wanunugambe umaso manayanambe rai. Weti wo vatane kaururum matayao, awa tame mi som: Stepanus, wepammo vatano panave mbambunin muno Anawayo Vambunine ama vambunine manakoe no ai; muno Pilipus muno Perkores muno Nikanor muno Timon muno Permenas muno Nikolaus, vatano Antiokia piye, opamo manasyinoeyamo vatano Yahudi jewene pa, weramu umba po ananyao Yahudi raija to. ⁶Weti wo vatane kaururume umaso maugave maroron nanto Yesus apa arakovo po mansatutire mansai. Umba Yesus apa arakove umaso wo maneme rauseo ntamijo mansai umba wo sambaya raura seo Amisyé aijo mai.

⁷Arono naije vatane wo ayao Amisyé ravovo tutir weti maneka manakoe. Maisyare omai ti, vatano wanave Yesus aije awa wanuije miridi nseo rave. Muno syeno Yahudi wanui rave utavondi wanave Yesus ai.

Vatane manuga ngkakaijo Stepanus ai ti wo aijar

⁸Stepanus opamo Amisyé po kovo manakoe muno vambunine raugaje ai. Weti Stepanus po anainame muno anapaporainyo manakoe inta raroron, muno vatano wanuije nunantaive rai. ⁹Weramu vatane inta manuga ngkovo aije ramu. Vatane umaso onanawamo vatano Yahudi una no yavaro sambaya ama tame mirati "Vatano Aro Mansapaya to awa Yavaro Sambaya." Vatano nanawije awa munije mammo inta nawamo vatano Kirene muno inta nao vatano Aleksandria. Muno vatano Yahudi kaijinta utavondi mansai, onawamo unori rati propinsijo Kilikia muno Asia. Vatan tenambe umaso wayao ensembe nanto Stepanus ai. ¹⁰Weramu wo Stepanus apa ayaowe rasakinave kakai, weye Anawayo Vambunine mo ama vambunine raugasya Stepanus ai ti akarije mba dave muno payao mbambunin dave. ¹¹Weti vatano Yahudi umaso wo vatane inta manuga raugabe indamu wo anangkakivane rantuna Stepanus ai ware, "Reamo Stepanus anaun po Musa aura tantunawi muno po Amisyé aura tantunawi tavon!" ¹²Maisyare omaisy, wo vatano wanui manuga raugabe, muno akarijo Yahudi muno kuruno Yahudi matavon, indamu manuga ngkakaijo Stepanus ai. Weti wuruta wo aijar, umba wo augav ude no Anugano Akari Akokoe

Yahudi mansamun indamu akarije umaso wo mangke raugaje ai. ¹³ Umba wo vatane inta maugav ude indamu wangkarive wo angkivan. Vatano wangkariveye umaso usea usayai wo Stepanus aura ware, "Vatane wato po wama Yavaro Amisyé muno Ananyao Musa raura tantunawi tutir. ¹⁴ Reamo anaun pare, 'Yesus, vatano Nasaret, indati po Yavaro Amisyé so randamisy muno Po koano namirati Musa po raugaje wansaije ranigwan.' "

¹⁵ Umba vatan tenambe utantuna no Anugano Yahudi namije rai wo Stepanus anyanyut. Wo amune raenam mbar maisyare naito Amisyé inta amune ramaisy.

7

Stepanus payao no Anugano Akari Akokoe Yahudi mansamun

¹ Umba Syeno Titi po Stepanus anajo pare, "Ana wo naura tantunawi rai somamo tugae rako?" ² Umbawe Stepanus po raura akananto mansai pare, "Injae muno sya arakove wea tenambe, wasamarikoame rasakinav de irati sya ana syo raura so rai. Wusyinoe wama aneno Abraham pana poroto no munijo Haran dainy, yara arono ta no no munijo Mesopotamia, naije wama Amisy, opi titi rave, aroron irati Abraham ai. ³ Muno Amisyé po raura aje ai pare, 'Abraham, winyo nya munije rapaya muno nya arakove mansapaya tavon. Umba nyoronto no munijo indati Syo rarorono naije rai.' "

Stepanus po ayao aneno Abraham raura
⁴ "Weti Abraham puje apa munijo Kasdim no no Mesopotamia raora, umba poroto no munijo Haran. Arono no no Haran umaso rai, aja kakai. Umba Amisyé po Abraham atutir de no munijo wana raije so rai. ⁵ Weramu Amisyé po kopa inta ratayao indamu Abraham apave raije ramu, kav-inta raunande mamaumbe jeben tenambe. Weramu Amisyé po urairije inta rapatimu Abraham ai pare, 'Winy muno nya susyo nyo mampame indati wapave kopa so rai tenambe.' " Po raurairiveare somaisy weramu Abraham apa arikainye inta aeno aije jeben bayave. ⁶ Muno Amisyé po raura aje akato pare, 'Nya susyo nyo mampame indati uta una no munijo maran. Umba vatano una no naije wo mansajaro arove indamu wanapatambe mai, wo mansantitidi mangkebe awa anakere rai muno wo mansave tatugadi yava tume ama manuije nanto no ratusije mambisy. ⁷ Weramu indati Syo mangke raugaje vatano wo mansajaro arove so mansai. Indati nya ajavi

wuje munijo namije raora umba wakare ube sambayambe Rinai no munijo namiso rai jakato.' "

⁸ Umba Amisyé po apa urairije rapatimu Abraham ai pare, 'Syare winye, anya una no nya yavaruga tenambe nawe, utavondi koano sunat rai, no naiso ti miridije nto, indamu mbe rarorombe Sya urairije umawe rai.' " Maisyare omai ti, Abraham po Isak avaki apa masyote kaumandeij, naije be sunative to. Noa Isak po Yakob avaki, umba Yakob po wama aneno abusyin eane jirum mavaki. ⁹ Inta apa tame mirati Yusup. Wepirati apa arakove uparijo ai, weti wo amavun nanto vatano marane inta ai, naije po augavo arove wuruta no munijo Mesir: Weramu Amisyé tuna Yusup autan tutir ¹⁰ muno Po apaya apa siurije umaso rai. Amisyé po vambunine raugaje Yusup ai ti akarikuga mba dave, weti Akarijo Titi Firaon anayanambe ai. Umba Firaon po Yusup aijaseo be akarive apa yavare rai muno po vatano Mesir maijar tenambe."

Stepanus po ayao aneno wusyine ratodi

¹¹ "Arono naije maroro akoe nande no munijo Mesir muno munijo Kanaan rai tenambe, weti vatane awa siurije mangke dave. Muno wama anene nao tavon unanta anaisyé inta raije ramu. ¹² Weramu Yakob po ranaun ware anaisyé mamowes no munijo Mesir. Weti po apa arikainye matutir indamu wuruta no Mesir, wo anaisyé inta ramavun. Soa umba manasyin dave wama anene wuruta kai no Mesir. ¹³ Noa wuruta jirum akato, umba Yusup aroron irati mai weye onawamo apa arakove nanawije. Muno Akarijo Titi Firaon po ranaun Yusup apa arakove ude. ¹⁴ Umba Yusup po apa arakove matutir indamu wo ajayo Yakob muno apa yavaruga tenambe mawainde no Mesir. Wenanawamo awa wanuije nanto no abusyine kaururum eane nadani. ¹⁵ Weti Yakob poroto no Mesir. Arono una no Mesir umaso rai, Yakob kakai muno apa arikainye ugwenen tavon. ¹⁶ Awa kopa mamowes raugav akare no munijo Sikem indamu rantuna no aipapo wemirati wusyinoe aneno Abraham po doiye veano ramavuno Hemor apa arikainye mansaije rai."

Stepanus po ayao aneno una no Mesir raura

¹⁷ "Umba masyoto Amisyé po raurairive aneno Abraham aijoe nande mararai. Arono naije wama aneno Israel utantuna no Mesir umaso ubakipambea wanuije nseo rave. ¹⁸ No awa akarijo titi wanyin inta be akarive no Mesir rai jakato. Weramu akarijo titi umaso pantatukambe aneno

Yusup ai. ¹⁹Weti akarijo titi umaso po vatano Israel maponae manakoe muno po mave tatugadi. Po mansantitidi indamu awa arikainyo wo mano aje kai mapaya awa akoe mansai, maugaveta unaki mumuimbe no min indamu ugwenen. ²⁰Arono naije Musa ano, opamo arikainyo ko dave. Embae mandeij apa vatan anui yo aeranande no yavar. ²¹Umba yo Musa umaso augaveta yo apaya niki marambe, mamaisyo Akarijo Titi Firaon apa ayao maje rai. Weramu Firaon apa arikainyo wanya inta nanto irati Musa ai, naije mbekero ai kobe ti mo augav mo akum maisyare muno taune ama arikainyo. ²²Weti Musa opamo po ananyao Mesir ranyao tenambe ti daen bintabo. Panakoe umba apa ayao muno apa ana dave mamamo mbambunin dave.”

Stepanus po ayao aneno Musa ratodi jakato

²³“Arono Musa apa tume tename jirum, umba beker pare po apa arakovo Israel mapan. ²⁴Arono to po mansaen, naije vatano Mesir inta po vatano Israel inta ave tatugadi. Musa nanto yai, umba po vatano Israel apaya yara po mangke raugaje vatano Mesir ai, po aubai kobe. ²⁵Musa po rakarae pare apa arakovo Israel indati wo raen wepamo vatano Amisyse po apatimu indamu po mapaya awa siurije rai. Weramu vatano Israel unanta raije ramu. ²⁶Siman akato Musa puje po apa arakovo Israel inta yaen isyivuinyo vambinibe. Musa beker indamu yaneme rajjar, weti pare, ‘Ibeanimaibe risivuinyo? Yara taune ribui-pije pa umba!’ ²⁷Weramu vatano po apa arakova anepate umaso pari, weti po Musa avakanto marambe, po raura pare, ‘Mbeanimaibe irati ririmare insivuinyo weramu winyo ririnsansopi?! Are pirati po najaseo wimbe akarive muno nyo mangke rapatimugo ririnsai?’ ²⁸Namanawe nyo vatano Mesir aubai to, weti soamo nyare nyo inaubaisy akatoare naije mai dako?!’ ²⁹Arono Musa po apa ayao umaso ranaun, nin kobe ti to no munijo Midian. No no Midian umaso rai, baunam, apa arikainyo anya jiruma yaeno ai.

³⁰Musa no no munijo Midian tume tename jirum. Masyote inta noeve no nugo vabukane vono maninimbe mararaijo Unato Sinai rai, umba po taname inta raen mbadurur no randa uga umbuga kanen. Muno naito Amisyse inta arorono ai, nande no tanamo namije ama uga rai. ³¹Musa perananto po aen weti paparo ai. Arono piridije to mararai indamu po raen kobe, naije tavon po Amisyse anamote ranaun mare, ³²‘Risyamo nya anene awa Amisyse

pi Risy; nya aneno Abraham muno Isak muno Yakob awa Amisyse pi Risy.’ Musa po ranaun jani dave weti tutar, ponae po ranyanyut akatowi.

³³Amisyse po raura nanto ai pare, ‘Syono mino nteto raije wato ratayao ti ngkakavimbe, weti najo kokome rapaya. ³⁴Syo sya kawasae una no Mesir awa siurije raen to. Syo awa wanonae ranaun to. Ride indamu Syo mapaya awa siurije rai. Weti, Musa winde, Syo natutir nyakato no Mesir.’”*

Stepanus po ayao Musa be akarive raura

³⁵“Musa so pirati vatano Israel manasyinone wonae ai, wo awatan no marambe, ware, ‘Are pirati po najaseo mbe akarive reansai muno nyo mangke rapatimu?’ Weramu naito Amisyse arorono Musa ai no tanamo mbadurure rai, weti Amisyse taune po Musa apatimu indamu be akarive vatano Israel mai muno po mapaya irati munijo aro Mesir rai. ³⁶Musa so pirati po maugavuje Mesir raora. Po anaporainyo manui raroron no Mesir muno Mayano Nijam muno no nugo vabukane vono maninimbe arono vatano Israel wanya rajja tume tename jirum. ³⁷Musa so pirati po raura nanto vatano Israel mansai pare, ‘Masyoto rijat Amisyse indati po wapa arakove inta atayao no wapa susye rai, Po aijaseo be anawaebe wasai maisyare rinamaisy.’” ³⁸Muno Musa so pirati no wama anene mautan arono wanunugambe no nugo vabukane vono maninimbe mararaijo Unato Sinai rai. Arono naije naito Amisyse inta po raura nanto Musa ai no unate rai, muno Musa be marimbe ti po ayao umaso raura nakato no wama anene mansai. Weti Musa so po ayao njajaisy raugav no Amisyse ai indamu po raugakaje wansai jakato.”

Stepanus po ayao vatano Israel wo yare ranarije raura

³⁹“Weramu wama anene wonae ubeta Musa apa ayao rai, muno wonae Musa ai tavon. Yara ubeker ware wakata no Mesir. ⁴⁰Wo raura nanta aneno Harun ai ware, ‘Nyo yare inta ranari reansai indamu wamo rajjaro wama usye rai mo wama ananuije raroron. Musa wato pamo po wansaugavuje Mesir raora, weramu soamo veanimaije po wansapaya vayave yara poroto no unato warae? Pakare rainy, weti reamantatukambe animaisyse mirati nande ai to.’” ⁴¹Weti wama anene wo yare inta ranarijo sapijo tuvane anyi. Umba wo maere inta raotar wo rameseo yare umaso ai. Muno wo ono manakoe rave indamu wo awa yaro wo ranarije umaso rajjaseo titive. ⁴²Maisyare omai ti, Amisyse pari wama

anene mansai, weti akirive mai muno po mansapaya indamu utavondi taune awa bekere rai. Weti wama anene ubeaje irati uma pe embae me tumo ntuna no naumo warae rai tenambe. Awa anaubeare umaso mamaisy irati anawae wusyin inta po ratoo rai no taiso:

Amisye po raura pare, 'Inya, vatano Israel! Arono wapanya no nugo vabukane vono maninimbe tume tename jirum, anakotaro wapo rameseo, wemamo wapo rameseo Rinaije ramu.

43 Yara wapo yare inta yanari indamu wabeaje obo yai.

Wapo yaro Molok apa tuna rajie ranawan wapanya autan, muno yaro tumo Repan atavon, ti yare so wenanairati wasanuga nto irati yai.

Maisyare omai ti, Syo wasamauta marambe indamu wata no munijo aro Babel.⁴³ ”

Stepanus po ayao yavaro sambaya Amisy aije raura

44 “Wusyinoe arono wama anene wanya no nugo vabukane vono maninimbe, wo randume ranari indamu ube sambayambe Amisy ai, wo ranari mamaisy Amisy po rarorono Musa ai ti po raene rarijati.

45 Umba randumo namije wemirati wama anene wo raugav arono Yosua be akarive mansai, po mansaugav usen no munije so rai. Umba Amisy po vambunine raunande wama anene mansai indamu wo vatano utantuna no naije mawatambe tenambe munijo namije raora. Muno randumo Amisy umaso mamamo wama anene wo raijaro mautan ava arono Daud be akarive.

46 Daud opamo Amisy anayanambe ai muno po Amisy anajo pare, ‘Amisy winyirati reama aneno Jakob be sambayambe Nai! Koveamo syo yavare ranari Namarom indamu reambe sambayambe Naijo rai rako?’ 47 Weramu Salomo wepirati po Yavaro Amisy umaso ranari.

48 Weramu Amisy pamo titi rave, weti tuna irati yavaro vatane wo ranari rajie jeben. Maisyare muno anawae wusyin inta po ratoo no taiso:

49-50 Amisy po raura pare,

‘Naumo warae omamo Sya tuna rajie mije muno mine so mirati inajo unane nteto rai.

Risyirati syo nuge so ranari tenambe muno anakotaro ntuna no ama uga rajie ranari tavon.

Weti yavaro wapare wapo rauseo nteto Rinamarom mamaisy ramu tenambe.

Muno munije inta mamaisy rituna rajie ramu.⁴⁹ ”

Stepanus po raura nanto Anugano Akari Akokoe Yahudi mansai

51 Anugano Akari Akokoe Yahudi wo Stepanus apa ayao aneno Yahudi umaso raraniv tenambe. Umba Stepanus po raura nanto mai pare, “Weapamo vatano wasakari matu! Muno wasanuga matu weti waponae wabeta Amisy ai! Wasamarikoame mpapakiri weti wapo Amisy apa ananyaowe ranauman. Waponae wapo Anawayo Vambunine raraniv maisyare muno wapa anene mansamaisy! 52 Wapa anene wo anawae wusyine mansave tatugadi tenambe. Muno wo anawae inta maubaisy, nanawirati wo raurairive ware Mesias indati de, wepirati Vatano mamai dave pije. Soamo Mesias uma wo aurairive so de to, wepirati Yesus. Weramu weap akato wapo amavuno vatano wo Amisy aene jewene mansai, umba wapo aubaisy. 53 Wepirati wusyinoe Amisy apa naito wo Apa anayao raugaje Musa ai indamu wapo raijar. Weramu wabeta rajie jeben!”

Vatano Yahudi wo orame veano Stepanus aepar

54 Arono akari akokoe Yahudi wo Stepanus apa ayao umaso ranaun, upari rave muno manuga mamuno ai. 55 Weramu Anawayo Vambunine mo vambunine raugaje Stepanus ai, weti amun mbesoo perato no naumo warae umba po Amisy apa varo ngkovo ntiti raen muno po Yesus aen te no Amisy anem ngkove rai. 56 Naije Stepanus po raura pare, “Waperasea no warae! Weye syo naumo warae raen nsaneka muno syo Arikainyo Vatane aen te no Amisy anem ngkove rai.”

57 Akari akokoe Yahudi wonayo Stepanus apa ayao umaso rai rave, weti wo mamarikoame rakakuvu muno ugugwaimbe. Naije kobe wavave wo Stepanus aijar, 58 wo akarimu usya munijo namije raora ware indamu wo orame rave amaug. Naije vatano wo Stepanus angkivan augawe wo awa ansune rapapaya, wo raugaje ntuna vatano mansae inta arijat, apa tame mirati Saulus. 59 Arono wo orame veano Stepanus amaug, opamo be sambayambe po raura seo Amisy ai pare, “Amisy Yesus, Nyo inawayoe aijar.” 60 Umba po vukane ranteter, gwaino akoeve pare, “Amisy Yesus, vemo Nyo awa ayao kakaije so raunanto wo ranawan inya, yara Nyo rapaya mansai.” Umba anawayo karimu anasine raora, kakai kobe.

8

Saulus po arare veano vatano wanave Yesus aije mave

1-2 Vatano wo Amisyé asyaniv inta wo Stepanus apa kopa rantuna, muno woyovo ai muno manimaumbe rave. Weramu Saulus anayanambe weye vatane wo Stepanus aubai to. Masyoto naije tavon vatano Yahudi wo arare veano anugano Amisyé una no Yerusalem mansave. Weti vatano wanave Yesus aije umaso unanajibe, inta wuruta no Yudea muno inta wuruta no Samaria. Yara Yesus apa arakovo po mansatutire obo nawirati una tawan no munijo Yerusalem. ³ Saulus opamo beke dave indamu po anugano Amisyé randamisyé, weti po vatano wanave Yesus aije mave tatugadi. Siso puje awa yavare rai tetebe, po anya, wanya majjar po maugavuje indamu maugaveta mausiso nowo tanoano makova rai.

Vatano Samaria wo Ayao Kove ranaun

⁴ Vatano uma unanajibe nanao usisa wuje munije ranteter wo Ayao Kovo Yesus ravovo vatane mansai. ⁵ Muno Pilipus poroto no munije inta rai no Samaria, po Mesias aura kakavimbe vatano nanawije mansai. Pare Mesias Amisyé po aurairive wansai Opirati Yesus. ⁶ Arono vatano nanawije wo Pilipus apa ananyaowe umaso raraniv muno wo apa anapaporainyo po rarorone raen, manuga nto irati rai. ⁷ Weye Pilipus po saumane raunanto vatano tunaive wanui mansai. Muno po anawayo kakaije rawatano vatano wanui rave mansai, ti anawayo kakaije umaso wuje mansaora ugwaino akoeve. ⁸ Maisyare omai ti, vatano una no munijo namije rai manayanambe rave.

⁹ Vatan inta apa tame mirati Simon no no munije umaso rai. Opamo nugoenta po nyovara kakai raugav muno vatano Samaria unantaive ai. Simon opamo kangkamambe taune ai pare opamo vatano apa tame ntiti-tije pa. ¹⁰ Vatan tenambe wanave ai, vatano akokoeya nto vatano mamaune mansai tenambe. Wo awaino “Vambunino Manakoe” weye ware Amisyé apa vambunino manakoe no aija. ¹¹ Nugoenta rave Simon po nyovara kakai raugav, weti vatan tenambe unantaive ai muno utavono ai.

¹² Weramu arono Pilipus de siso munijo namije rai, po Ayao Kovo Yesus Kristus raura kakavimbe nanto vatano Samaria umaso mai pare Yesus Kristus opirati Mesias opije to. Muno po mansanyao indamu wanave Yesus ai muno usisa kawasaeyo Amisyé be akarive maije mai. Weti vatane wanui, anya muno wanya, wanave umba po maugasya kuvunijo mana rai. ¹³ Muno Simon panave tavon, weti Pilipus po augasyo kuvuni mana rai. Umba Simon tavono Pilipus ai po arijat tutir,

weye nantoive Pilipus apa anapaporainyo manakoe po rarorone rai.

¹⁴ Yesus apa arakovo po mansatutir nanawirati una no Yerusalem udaniv ware vatano Samaria wanave Amisyé apa ayaowe rai to. Weti wo Petrusa pe Yohanesa pe yatutir yirija no ratuije. ¹⁵ Arono nyanta Samaria rai, umba usambayambe vatano wanave nanawije mansai indamu Amisyé apa Anawayo Vambunine maje irati mansai. ¹⁶ Weye onawamo Pilipus po Yesus apa tame veano maugasyo kuvuni to, weramu Anawayo Vambunine mamoma maje mai jewena nene. ¹⁷ Weti Petrusa pe Yohanesa pe yo yaneme rajaseo ntamijo mai, umba Anawayo Vambunine maje irati mai.

¹⁸ Arono Simon po umaso raen, po ratantona pare, “Anawayo Vambunine maje vatane mai weye Yesus apa arakove so yaneme rauseo ntamijo mai.” Weti po doije raugavere Petrusa pe Yohanesa pe yai beker po rave vambunine umaso ramavun. Weti po yanajo pare, ¹⁹ “Ribeker syare ipo vambunine umaso inta raunande rinai indamu inaneme rauseo ntamijo vatane mai tavon, wea umba Anawayo Vambunine maje mai.”

²⁰ Weramu Petrus po raura nanto ai pare, “Winyamo indati ngkakaijo nya doije wato rautan! Weye nyo ratantona nyare nyo doije veano Amisyé apa vambunine ramavun! ²¹ Weramu Amisyé po varore raugaje nai indamu wintavondi Apa anakero po raugaje reansai so rajje ramu, weye nanuga mamoma mai no Amune rai jewen. ²² Wakoe! Nyo ratantona nyare nyo Amisyé apa vambunine inta ramavun! Syare nsakinav irati nya beker ngkakainoanive wato rai! Muno nyo Amisyé anajo indamu Po nya ayao kakaije wato rapaya nai. ²³ Weye syo naenamo pariye ntapekano nanuga rai muno ayao kakaije mo naijaro arove.”

²⁴ Weti Simon po raura akananto pare, “Maisyare wemaisyamo syare winsambayambe to irati Amisyé aijo rinai indamu vemo ana nyo raura umaso nande irati rinai nora!”

²⁵ Petrusa pe Yohanesa pe yo Ayao Kovo Yesus raura kakavimbe vatano nanawije mansaija jewen, umba inyajiv yakare no Yerusalem. Arono inyajive umaso yo Ayao Kove ravov, yisisa yuje munijo wanui no Samaria rai.

Pilipus nanto irati vatano apa tame ntiti no pemerinta Etiopia inta ai

²⁶ Umba naito Amisyé inta po Pilipus atutir pare, “Nseo ra nyanya nyoronto no ranijo wanampui, ntavon irati unanuijo no no Yerusalem ti masyo no Gaza rai,

wemirati nugo vabukane vono manin-imbe.”²⁷ Weti Pilipus seo panya kobe, umba nanto irati vatano apa tame ntiti no pemerinta Etiopia inta ai. Vatane umaso pirati po doiye raeranande pemerinta Etiopia rai tenambe. Opamo panapatambe Akarijo Ntiti, ama tame mirati Kandake, ama mbe akarive raije rai. Vatane umaso poroto be sambayambe no Yerusalem rai to, umba soamo pare nin no apa munijo Etiopia.²⁸ Apa unanui anya umaso mamu seo irati kereta kuda inta rai. Muno po Ayao Amisy anawae Yesaya po ratoe ama aneme inta raembeve.²⁹ Umba Anawayo Vambunine mo ayaowe raura Pilipus ai mare, “Winyoronto nyararaijo kereta kuda wato rai.”

³⁰ Naije kobe Pilipus nanto pararaijo kereta umaso rai. Daniseo vatano titi Etiopia umaso po bacave Ayao Amisy anawae Yesaya po ratoe inta rai. Weti Pilipus po anajo pare, “Winanto irati ayao nyo bacave wato raija e?”

³¹ Vatano Etiopia po raura akananto ai pare, “Jewena! Risyamo indati inanto irati ayaowe so ama ine raije ramu, maisyamo vatane inta po raura kakavimbe rinai java.” Weti po Pilipus awain sen ti tuna atavon.

³² Ayao Amisy vatano Etiopia po raen no taiso:

“Vatane sopamo maisyare domba inta amaisy.

Arono vatane ware wo domba umaso augav

indamu wo aotar dako, wo ananemane raotar dako,
domba umaso tanamanin bayave.

Maisyare wemaisyamo Vatano aurata irati domba aije so

tanamanin bayave, payaowe ramu.

³³ Vatane wo aura tantunawi muno wo ave arikaimbe,

muno wo ayao mamaisyepapatimugo
Ai jewen,

yara wo mangke raugaje Ai vayave kobe.

Weti Apa arikainyo wo Apa susye rampamo iridita meweno Ai,

weye wo aubaisyo wusyimbe.”³⁴

³⁴ Vatano Etiopia po Pilipus anajo pare, “Syonana: are pirati anawayo Yesaya po aura so, taune dako vatano kajijinta pe?”

³⁵ Naije Pilipusa po ayao Yesaya umaso ratayao indamu po Ayao Kovo Yesu raura kakavimbe ai.

³⁶ Aya unanui yanya umaso, nyanta irati mana inta rai. Wetiwa vatano Etiopia po raura nanto Pilipus ai pare, “Nyerato, mana

inta mi ratuije. Ribeker syare nyo inau-gasyo kuvuni kai. Weti nyo ratantona ma-mai dako?”

³⁷ Umba Pilipusa pare, “Nyanave tugaive, weamo indati syo naugasyo kuvuni mana rai.”

Weti vatano Etiopia po raura akananto ai pare, “Syanave syare Yesu Kristus opamo Arikainyo Amisy.”³⁸ Umba po kereta kuda umaso ransopi ti nted indamu yaje. Naije wepe Pilipusa pe yasya no mana rai muno Pilipus po augasyo kuvuni kobe.³⁹ Yakaen no mana rai, umba kavuratawe Anawayo Amisy mo Pilipus augavo vatano Etiopia umaso aora, weti po aen akatoe ramu. Weramu anayanambe rave, po apa unanui anya rave tutir.⁴⁰ Naije tavon, Pilipus opamo no akato no munijo kajijinta, ama tame mirati Asdot. Po Ayao Kovo Yesu ravovo no munijo Asdot muno munijo kajijinta raita tenambe, mansanan nanto no munijo Kaisarea.

9

Saulusa sakinav panave irati Yesu ai

¹ Arono naije Saulus anuga mamune mo antutu dave indamu po mangke raugaje vatano wanave Yesu aije mansai, pare po mansaubaisy. Weti poroto po Syeno Titi tuna no Yavaro Amisy raije apan.² Po nyovara waowe ranajo ai indamu po raugav irati vatano ube akarive Yahudi awa yavaro sambaya rai tutudi no munijo Damsiyik mansai, indamu pare nanto anya, wanya utavondi Yesu apa ananyaowe* raije inta mai no Damsiyik, weamo po maijar po maugaveta makova no Yerusalem.³ Weti Saulus po apa unanui anya rave poroto no munijo Damsiyik. Arono pare pararaijo munijo umaso rai, kavuratawe vare inta no no naumo warae maje irati ai.⁴ Naije kobe Saulus temaje no min. Umbawe daniv po anamote inta ranaun mo apa tame rawain mare, “Saulus...! Mbeanimaipe nyo arare veano rinave?!”

⁵ Saulus po anajo pare, “Injae, are pi Winy?”

Umba Po raura akaje ai pare, “Risyi Yesu, Risyirati winyo arare veano rinave.

⁶ Soamo syare winseo ramu nyanya nsiso no munije wato rai. Indati ana nyo rave akato mamu Syo raroronoi nai.”

⁷ Arono naije vatano utavondi Saulus aije upaparo mansai weye wo anamote ranaun tavon, weramu wo Vatano po raura aeno mamije raije ramu.⁸ Umba Saulus seo tet. Pare amije raveseo indamu po nuge ranyanyut, weramu amije makakave weti

* 8:33 Yesaya 53:7-8 * 9:2 Ayao Yunani mo raura mare, “utavondi Yesu apa Unanuije rai.”

perananto po ana inta raene ramu. We-tiva vatano utavondi aije umawe wo aneme rajjar wo augav usisa no munijo Damsyik.⁹ Masyote mandeij amije makakave ti perananto po nuge raene ramu. Muno masyote mandeije umaso tavon po anaisye inta raisye ramu muno po mana inta ramaname ramu.

¹⁰ Vatano panave Yesus aije inta no no munijo Damsyik, apa tame mirati Ananias. Arono nikimarive, daniv pare Amisy Yesus po apa tame rawain: "Ananias!"

Umba Ananias po rasakinav pare, "Amisyo winy, risiyi so."

¹¹ Umba Amisy Yesus po raura aje ai pare, "Winseo ramu nyanya nyoronto no Yudas apa yavar, namirati ntami no unanuijo ama tame mirati Unanuijo Nsarokir. Naije syare nyo vatano Tarsus, apa tame mirati Saulus, akani inda nanto ai. Soamo noe be sambayambeve.¹² Syo ana inta rarorono ai no apa nikimarije rai to, ama ine maisyare so: Po vatano apa tame mirati Ananias aen nande ai, po aneme rajjaseo ntamijo ai indamu amije nsauvan po ana raen akato."

¹³ Umba Ananias po raura akaseo Ai pare, "Amisyo winy, vatano wanui wo vatane wato aura ti syo anaun to. Ware po Nya kawasae nanawirati una no Yerusalem mansave tatugadi to.¹⁴ Soamo de no munije so rai, po ayaowe rauga no syeno akokoe mai indamu po vatano wanave naije majjar tenambe."

¹⁵ Weramu Amisy Yesus po raura aje ai jakato pare, "Nyoronto! Weye vatane wato pamo Risyo atayao Sya anakere rai, indamu po Sya tame ravovo vatano Yahudi jewen muno akarijo titi muno vatano Yahudi mansai tenambe.¹⁶ Indati Syo raura ai syare opamo nanto irati siurijo manakoe rai weye tavondi Rinai."

¹⁷ Naije kobe Ananias poroto siso no yavare umawe rai. Umba po aneme rajjaseo ntamijo Saulus ai, po raura pare, "Sya arakovo Saulus, Amisy Yesus wepirati aro-ro no nai no nya unanui anyai rai arono nyare nde no naiso we, muno Wepirati po inatutir indamu ide nai. Apa bekere ma pare indamu winy namijo makakave mo nuge raen akato muno Anawayo Vambunine maje nai."¹⁸ Naije kobe ana inta maisyare jiane apa wanuna we ramaisy mponan no amije rai ti ntende, umba perananto po nuge raen akato. Naije Saulus seo muno Ananias po augasyo kuvuni mana rai.¹⁹ Umba Saulus po anaisye raisy muno anasine mbambunin akato.

Saulus po Ayao Kovo Yesus raura no munijo Damsyik muno munijo Yerusalem

Saulus tuna irati vatano wanave Yesus aije matavon no munijo Damsyik masyote

inta yai.²⁰ Siso kobe no vatano Yahudi awa yavaro sambaya ama uga rai, po raura kakavimbe pare, "Tugae, Yesus opamo Arikainyo Amisy."²¹ Vatano Yahudi nanawirati wo apa ana po raura umaso ranaun, unantaive tenambe ware, "Vatane so pirati arono no no Yerusalem po arare veano vatano wanave Yesus aije mansave, wepije dako? Wamo ranaun apa deye somamo pare po vatano wanave Yesus aije makani indamu po majjar po maugaveta no syeno akokoe Yahudi mansamun no Yerusalem."²² Weramu Saulus apa ayao mamo mbambunin dave, apa vambunine umaso miridi nseo. Po Yesus aura kakavimbe pare Opamo Mesias wepije, tugaeya Amisy po atutir de wansai. Vatano Yahudi nanawirati una no munijo Damsyik wo Saulus apa ayao umaso raraniv damu mbambunin dave, weti wo apa ayaowe rasakinave kakai.

²³ Noa nugoenta umba vatano Yahudi una no Damsyik wanyinyaube ware wo Saulus aubaisy.²⁴ Weramu Saulus nanto irati awa ana wo ratantona umaso rai. Siman namane rinit Saulus apa marova usayai wo aman tutir no munije ama unsanda akokoe uje rai tetebe indamu wo aubaisy.²⁵ Weramu naman inta apa arakove wo augav no unsanda mamaune rai umba wo augasya tuna arame inta rai, wo waije rave aoporasyo no yano oram munijo namije ama akiri.

²⁶ Umba Saulus nin poroto no Yerusalem. Pare beker indamu tavondijo vatano wanave Yesus aije mansai, weramu onawamo wo Saulus asyaniv muno wanave aije ramu.²⁷ Barnabas obo pirati panave Saulus ai, weti po augave yirija no Yesus apa arakovo po mansatutire mai. Umba Barnabas po Saulus aura kakavimbe mai pare, "Arono Saulus so apa unanui anyai poroto no Damsyik, po Amisy Yesus aen muno Apa ayao maje ai to. Umba Saulus siso no Damsyik, po Ayao Kovo Yesus ravovo vambunimbe, yara janive ramu."²⁸ Weti Yesus apa arakove umaso wo Saulus augave siso tavondi kai. Umba Saulus pananave munijo Yerusalem rai, po Amisy Yesus aura vambunimbe vatane mai.²⁹ Nanto irati vatano Yahudi nanawirati wo ayao Yunani raura inta mansai, umba wepe wenawe wayao ensembe irati Yesus ai. Weramu vatano Yahudi umaso manuga ngkakaijo Saulus ai, weti ware wo aubaisy.³⁰ Arono arakovo wanave Yesus aije unanta awa bekere umaso rai, wo augav wuruta no munijo Kaisarea. Umba wo atutir indamu pakato no apa munijo Tarsus rai.

³¹ Soamo kovo saumane bo mi nowo anugano Amisy una no Yudea muno Galilea muno Samaria mai tenambe. Wo Amisy

asyani dave tenambe muno Anawayo Vambunine mo vambunine raugaje mansai ti ubambunin. Maisyare omai ti, vatano wanave Yesus ai awa wanuije miridi nseo ti manakoe.

Petrus po anapaporainye raroron no munijo Lida muno munijo Yope

³² Petrus puje no Yerusalem, pananave pare po vatano wanave Yesus aije mansapan no rui rui vayave. Muno siso no munije inta, ama tame mirati Lida, indamu po vatano wanave una no naije mansapan tavon. ³³ Naije Petrus nanto irati vatano tunaive inta ai, apa tame mirati Eneas. Tume kaumandei to, seo tete kakai yara nikive vayave tutir. ³⁴ Umba Petrus po raura nanto ai pare, "Eneas! Soamo Yesus Kristus po saumane raunande nai. Weti nseo ntet! Nyo nya niki raije ratayao kai." Naije kobe Eneas ajoe nsauman, seo tet kobe. ³⁵ Vatan tenambe nanawirati una no munijo Lida muno Saron wo aenamo sauman to, weti usakinav wanave Yesus ai.

³⁶ Munijo kaijinta ntavon ama tame mirati Yope, wanya inta no no naije omamo manave Yesus ai. Ama tame mirati Tabita (wemirati tamo Yahudi, yara raura ayao Yunani rajamo Dorkas, ama ine mare rusa). Wanya umaso mbekobe irati vatane mai tenambe muno raemeno vatano awa ananuge meweno maije mansai. ³⁷ Arono naije nggwanen dave ti ngkakai kobe. Arono wo ranasino kopa rayajama jewen, umba wo raugave sea ntami no tanoano vono warae inta rai.

³⁸ Munijo Yope umaso mararaijo munijo Lida rai. Weti vatano wanave Yesus aije nanawirati una no Yope wo Petrus anauna no no Lida. Weti wo vatane jiruma yatutir yirija no Lida indamu yo Petrus augav. Nyanta ai, umba yare, "Injae, ririmbeker soamo wintavono ririnsai, wamavave wanta no ririma munije rai!" ³⁹ Weti Petrus tavondijo yai, wuruta no Yope. Arono unanta yavare umawe rai, wo Petrus augav usea no tanoano vono warae umawe rai, namirati Dorkas ama kopa raugaje niki raije rai. Naije Petrus po wanya kavini maen woyovo Dorkas rai. Wo raura nanta Petrus ai ware, "Reama ansune somamo Dorkasa omirati no rakasyu reansamarom arono ta no reansarijatoe."

⁴⁰ Umba Petrus po wanya kavini umaso matutir pare, "Wapusya vintabo." Umba apa vukane ranteter be sambayambe Amisy ai. Be sambayambea jewen, umba seo amumbe nanto Dorkas ama niki raije rai, po rawaino ama tamo Yahudi rai pare, "Tabita, nseo!" Naije kobe ramije rave seo, merananto mo Petrus aen. Umba mbeseo ntuna. ⁴¹ Petrus po raneme rajaseo

indamu nseo ntet. Umba po vatano wanave Yesus ai muno wanya kavini umawe mawainde tenambe, po raura mansai pare, "Dorkasa mammo soamo ngkovakato to!" ⁴² Vatan tenambe una no munijo Yope wo Dorkasa ama ngkovakato umaso ranaun, weti wanui wanave irati Amisy Yesus ai. ⁴³ Petrus no munijo Yope umaso noa nugoenta, tuna no vatano Yope inta arijat, apa tame mirati Simon. Vatane umaso pamo po maere ama kea ratayao indamu po ramavun.

10

Kornelius po Petrus awainde

¹ Nait akari Roma inta apa tame mirati Kornelius, opamo pemerinta Roma po apatimu indamu be akarive Naito Italia mansai no munijo Kaisarea. ² Kornelius umaso pamo vatano po Amisy asyaniv muno apa yavaruga wo Amisy asyaniv tavon. Opamo bekobeo vatano Yahudi nanawirati awa ananuge meweno maije mansai. Muno masyote yanteter be sambayambe Amisy ai tutir. ³ Masyote inta ama uma amije mandej, Kornelius pamo noe be sambayambeve. Naije nikimarive, inda kavuratawe naito Amisy inta de arono ai, po apa tame rawain pare, "Kornelius!"

⁴ Kornelius jani dave, po naito Amisy umaso anyanyut kobe. Umba pare, "Injae, risyi so."

Umba naite po raura wakaje ai pare, "Amisy po nya sambayane raraniv muno po nya muinyo nyo rarorone raen to.

⁵ Soamo nyo vatane inta matutir indamu wuruta no munijo Yope wo vatane inta awainde, apa tame mirati Petrus, apa tamo waravainye mirati Simon Petrus. ⁶ Opamo no irati vatano Yope inta arijat, apa tame mirati Simon, wepirati po maere ama kea ratayao indamu po ramavun muno apa yavare ntami mararaijo mayane vone rai."

⁷ Naito Amisy po ayao umaso raurawa jewen, aumandi ai kobe. Umba Kornelius po vatano yanapatambe aije inta yawain muno apa naite inta awain tavon. Naito umaso pamo po Amisy asyaniv tavon.

⁸ Umba Kornelius po ayao uma naito Amisy po raura aije so raura kakavimbe mansai, muno po matutir wuruta no Yope indamu wo Petrus augav.

Amisy po ana inta rarorono Petrus ai apa nikimarije rai

⁹ Siman akato vatano Kornelius po matutire umaso ware wararaijo Yope rai. Arono naije tavon, masyote ama yasyin, Petrus pamo seo no yavare ama vone warae indamu be sambayambe. ¹⁰ Weramu marore nande ai, beker pare po anisy e inta raisy. Po apa arakove

manyuto wo anaisye rameri, muno arono naije nikimarive po raene no taiso: ¹¹ Naumo warae nsaneka umba ansune vasye manakoe inta no no naije maje no mine von, maisyare vatane inta wo ama mamarane rajjar indamu wo ranyonaje wemaisy. ¹² Anakotaro ntuna no ansune vasye umaso rai omamo maere manui rave: maere kotaro rajoe mambisy muno maere kotaro nsano no mine vone rarijat muno insani kotar tenambe. ¹³ Umba anamote inta nggwain mare, "Petrus, nseo ntet! Anakotare wato mamo nya anaisye mije. Weti nyo raubaisy umba nyo ratayao indamu nyo raisy."

¹⁴ Weramu Petrus pare, "O, Injae, jewena! Syo anakotare so raenamo wama Ananyao Musa mare ana raisyisyi mi som bintabo. Weti risyamo syo inta raibe rainy."

¹⁵ Umba anamote umawe mo raura nakato ai mare, "Vemo nyo raura nyare 'syo raisyisyi,' weye Amisy e po ratayaowa mamai to."

¹⁶ Anakotaro rarorono Petrus ai umaso rarorombe ama susye mandeiji. Po raena mewen, naije kobe ansune vasye umaso ngkarimu makaeyo no naumo warae weti nto ti raumandi kobe.

¹⁷ Petrus po anakotaro uma rarorono aije so ratantonave pare, "Ama ine noare ruimaisy?" Arono naije tavon, vatano Kornelius po matutire wo Simon apa yavare rakanija unande rai to. Soamo usayai no unsanda uje warave to. ¹⁸ Umba ugwain wo vatane inta manajo ware, "Vatano apa tame mirati Simon Petrus opamo no no yavare so rai rako?"

¹⁹⁻²⁰ Arono naije Petrus po apa nikimarije umawe ama ine ratantonave tutir, umba Anawayo Vambunine mo raura ai mare, "Nseo ramu nyasyo no waraya. Soamo vatane mandeija nanawirati wo nakani. Wenanawamo Risyi syo matutir indamu wintavondijo mai. Weti vemo winsyisyaube mai jinya, yara ntavono mai kai."

²¹ Weti Petrus seo pasyo kobe. Umba po raura nanto mansai pare, "Risyrati wapo inakani. Weti animaisy e mi mbeamu wapo inakani?"

²² Umba wo raura nanto Petrus ai ware, "Reama wandeye somamo nait akari Roma inta pi po reansatutir, apa tame mirati Kornelius. Wepamo vatano apa ana daveye ngko dave muno po Amisy e asyaniv. Apa anabeye maisyare somai ti, vatano Yahudi wanave ai muno wo aura titive. Nandijawe naito Amisy e inta arorono ai, po Kornelius umaso atutir indamu po winawainde no apa yavare rai, muno winya ana nyo raura

mamo indati po raraniv." ²³ Umba Petrus po raura nanto mansai pare, "Wanandesen no yavaruga. Indati wanaki no naiso." Weti unawo Petrus arijat no naije.

Siman awatan ngkwo Petrus seo umba tavondi mansai. Muno arakovo wanave Yesus ai una no munijo Yope inta utavondi tavon. ²⁴ Wanya masyote jirum, umba unanta no munijo Kaisarea rai. Kornelius pamo po manyube, muno po apa yavaruga muno apa arakove inta mawainde indamu una wo manyube tavon. ²⁵ Arono Petrus siso no apa yavare rai, Kornelius nande ai apa ukane ranteteraje no amun pare beaje ai. ²⁶ Weramu Petrus po aijaseo tet, pare, "Nseo ntet kai, weye Amisy e pi risya jewena, yara vatane pi risy."

Petrus po Kornelius apan no apa yavar

²⁷ Umba yayao yiridije isisa no yavare ama uga rai. Petrus po vatano wanui rave maen wanunugambe no naije, wananawamo vatano Yahudi jeben. ²⁸ Umba po raura mansai pare, "Vatano Yahudi reama koane ma wapo raen tenambe to, maisyare so: Reamare vemo vatano Yahudi tuna vatano Yahudije jeben atavon inya. Muno vemo vatano Yahudi po vatano Yahudije jeben apan inya. Weti vatano Yahudi reamo anone rave vatano Yahudi jewene mai tenambe.* Weramu nandijawe Amisy e po ana inta rarorono rinai, pare vemo syo vatane maurana syare ukakavimbe ramu rako, ukakainoanive inya. Weti syo vatano Yahudi jewene maura taije maisy o mamo mamaisy e ramu. ²⁹ Maisyare omaisyamo, sya arakovo Kornelius, arono winyo rinawain, ride yayave kobe. Syo naen winyamo vatano Yahudi jewene pi winy. Weramu soamo vatano be Yahudive rako jewena rako, syo ratantona akato taiso mamaisy e ramu. Weti syo nanajo animaisy e mi mbewar winyo rinawain ti ride so?"

³⁰ Umba Kornelius po raura akananto ai pare, "Masyoto mambisy nandijawe risambayambe no sya yavare ama uga rai. Uma amije mandeija, maisyare uma amije so wemaisy. Ribe sambayambe, umba vatane inta arorono rinai no inamun, apa ansune ngkena dave. ³¹ Umba po raura pare, 'Kornelius, Amisy e po nya sambayane raraniv muno Po nya muinyo nyo rarorono vatano awa ananuge meweno maije mansai raen to. ³² Weti nyo vatane inta matutir wuruta no Yope indamu wo Simon augav, awain tavonamo Petrus. Soamo no no yavare inta rai mararaijo mayane vone rai. Vatano apave yavare so raije pamo apa tame mirati Simon, apa anakere

* **10:28** Vatano Yahudi wo ratantona ware vatano Yahudi jeben onawamo vatano ukakavimbe ramu, yara ugwanawa.

mamo po maere kea ratayao indamu po ramavun.’³³ Naito Amisyeyo po ayao umaso raura aje rinaija jewen, naije kobe syusyo syo vatane inta matutir indamu wore wo naugav. Syo naen nanuga ngko dave wirati ndeye so. Soamo reamanangan no naiso indamu reamo Amisyeyo apa ayaowe raraniv. Weti syare nyo ana Amisyeyo po rarorono naije raura kakavimbe reansai.”

³⁴ Umba Petrus po raura mansai pare, “Soamo syo raen tugae Amisyeyo po vatane kotare inta mansamamaribe ramu, yara pare vatane wamamo wamamai tenambe. Weti Po apa kove raugaje vatano Yahudi obo maije ramu. ³⁵ Yara Po apa kove raugaje vatane kotaro rui vayave mansai, vatano are nawirati wo Amisyeyo asyaniv muno awa ana udaveye ngkov. ³⁶ Wapo raen Amisyeyo po Ayao Kove ranutu vatano Israel wansai to, pare Po kovo saumane raugaje vatane mai, wemirati Yesu Kristus po raugav. Yesu Kristus umaso wepamo vatan tenambe awa Akarijo Titi piye. ³⁷ Wapo anakotaro nande no munijo Yudea ranaun tenambe to. Arono manasyinoe Yohanes pananyaube no munijo Galilea muno po vatane maugasya kuvuni mana rai. ³⁸ Muno wapo raen Amisyeyo po Yesu vatano Nasaret apatimu, Po apa Anawayo Vambunine raugasyo Ai muno Po apa vambunine raugaje Ai. Weti Yesu pananave po ana ngkove rave tutir muno Po vatane mapaya irati Anakakai Akoe apa vambunino mo maijare rai, weye Amisyeyo tuna autan.

³⁹ Anakotaro Yesu po raijar no munijo Yerusalem muno vatano Yahudi awa munije raije wemamo reamo raeno reansamije rai tenambe to. Vatane wo Yesu auseo sawa inyo kapite rai indamu kakai. ⁴⁰ Weramu masyote mandei umba Amisyeyo po aijaseo kovakato muno Po arorono vatane mai. ⁴¹ Yesu opamo arorono vatane mai tenambeye ramu, yara arorono vatano Amisyeyo po matayao wusyimbe webo mansai. Reamirati Yesu arorono reansai arono kovakato to, de ti Pe reamisyi tenambe. ⁴² Muno Po reansatutir indamu reamo Ayao Kove ravovo vatane mai muno reamo Yesu aura kakavimbe reamare Wepirati Amisyeyo po atayao indamu Po ayao mamaisyeyo rapatimugo vatane mansai tenambe, vatano nanawirati utantunana nene muno nanawirati ugwenen to. ⁴³ Muno Wepirati reama anawae wusyine wo aurairive to ware are pirati panave Ai, indati Po apa ayao kakaije rapaya ai.”

Anawayo Vambunine maje irati vatano Yahudi jewene mansai

⁴⁴ Arono Petrus payaowa nene, naije kobe Anawayo Vambunine maje irati vatano nanawirati wo apa ayao umaso raranive mansai tenambe. ⁴⁵⁻⁴⁶ Umba wo ayao kotaro wantatukambe raije veano Amisyeyo ararimbe. Weti vatano Yahudi wanave Yesu ai nanawirati utavono Petrus ai upaparo mai, ware, “Wakoe! Vatano Yahudije jewen onawi so rako?! Weramu Anawayo Vambunine maje irati mai tavon ti wo ayao kotare ratore so!”

Umba Petrus po raura pare, ⁴⁷ “Weti soamo Anawayo Vambunine maje irati vatano Yahudi jewene so mansai to, maisyare manasyinoe maje irati reansai wemai tavon! Weti koveamo reamo maugasya kuvuni mana rai. Vemo vatan inta po raorai nora.” ⁴⁸ Naije po raura pare, “Wade wamo Yesu Kristus apa tame veano vatane so maugasya kuvuni mana rai.” Ukuvunija jewen, umba Kornelius apa yavaruga wo Petrus anajo ware, “Reambeker reamare wino reansarijat no naiso masyote inta yai jakato rati.”

11

Petrus po apa nikimari raura kakavimbe apa arakove mai no Yerusalem

¹ Yesu apa arakovo po matutir muno arakovo kaijo wanave Yesu ai no munijo Yudea udaniv ware vatano Yahudi jewen wanave ayao Amisyeyo rai tavon. ² Weti arono Petrus pakato no Yerusalem, vatano Yahudi wanave Yesu ai wo aura tantunawi, ³ ware, “Mbeanimaibe winsiso no vatano utavondi sunat rai jewene awa yavare rai? Muno nyo awa anaisyeyo rai tavon?! Mamaisyeyo ramu!”

⁴ Weti Petrus po ana rarorono ai no munijo Yope rarijato mansai tenambe pare, ⁵ “Arono rino no Yope, syare ibe sambayambe, naije inikimarive, Amisyeyo po ana inta rarorono rinai. Syo raen maisyare ansune vasye manakoe inta no no naumo warae rairidi aje no rinamun, maisyare vatane inta wo ama mamarane raijar indamu wo ranyonaje. ⁶ Syerananto ama uga rai syo maere manui raen maisyare so: maere kotaro rajo mambisy muno maere kotaro nsyisyaube muno maere kotaro nsano no mine vone rarijat muno insani kotar. ⁷ Umba anamote inta ngkin mo inawain mare, ‘Petrus, winseo! Nyo maere wato inta raubaisy indamu nyo raisyeyo.’

⁸ Weramu syo raura akaseo syare, ‘O, Injae, mamaisyeyo ramu. Ana raisyisyeyo mamo syo inta raibe rainyeyo.’

⁹ Weramu anamote no no munijo ntiti mo raura akato mare, ‘Vemo nyo anakotare raisyisyeyo akato inya, weye Amisyeyo po ratayaowa mamai to.’ ¹⁰ Ana

rarorono rinaije umaso ama susye mandeij, naije umba anakotare umaso ngkarimu, makaeyo no naumo warae akato, nto ti raumandi kobe.

¹¹ Naije kobe vatane mandeij, nanawirati matutir no Kaisarea indamu ude rinai, unande yavaro ino raije rai. ¹² Umba Anawayo Vambunine mo raura rinai mare, 'Vemo winsyisyaube mai jinya, yara ntavondi mai kai indamu wata.' Weti sya arakove kaujenta bo nanawiso utavondi rinai reanta no Kaisarea, umba reansisa no Kornelius apa yavare rai. ¹³ Kornelius umaso po naito Amisyete inta apa de ai raura kakavimbe reansai. Pare naito Amisyete po raura aijare somaisy: 'Kornelius, nyo vatane inta matutir uta no munijo Yope indamu wo vatane inta augav, apa tame mirati Simon Petrus. ¹⁴ Indati Petrus umaso po ayao raura nya yavaruga wasai tenambe indamu Amisyete po wasapaya ayao kakaije rai.'

¹⁵ Weti syoroto no Korneliusa nui no munijo Kaisarea, umba syo Ayao Kovo Yesu raura ai muno apa arakovo Yahudi jewene mansai. Naije kobe Anawayo Vambunine maje mansai tenambe, maisyare manasyinoe maje irati vatano Yahudi wansai wemaisy. ¹⁶ Umba rinaemeno Amisyete Yesu apa ayao so rai pare, 'Yohanes po vatane maugasya kuvuni mana rai, weramu masyote kavinta yai jakato, umba Anawayo Vambunine maje irati wasai.'^{*} ¹⁷ Maisyare omaisy, arono Kornelius muno apa arakovo vatano Yahudi jeben umawe wanave Amisyete Yesu Kristu ai to, Amisyete po apa Anawayo Vambunine raugaje mai maisyare muno Po raunande wansai arono wamanave Yesu aijoe. Amisyete apa bekere maisyare so, weti vemo syo Apa bekere ran-sopi jinya!"

¹⁸ Petrus apa ayao nsopi no naije. Vatano Yahudi wanave Yesu ai umawe wo ranauna mewen, umba wo raura ware, "Ngko to, wamo ranajo akatote ramu." Muno wo Amisyete ararimbe ware, "Weti Amisyete po varore raugaje vatano Yahudi jewene mansai tavon indamu usakinavo awa ayao kakaije rai, weamo Po kovo nuge nuganuije raunanto mansai!"

Ayao Kovo Yesu nsiso no munijo Antiokia

¹⁹ Arono Stepanus aubaisyoe, vatano wanave Yesu aije wanui unanajibe weye vatano Yahudi wo mave tatugadi. Unanajibe ti inta wuruta no Penisia muno inta wuruta no nupatimugo Siprus muno munijo Antiokia, wo Ayao Kovo Yesu ravovo vatano Yahudi obo mansai. ²⁰ Weramu vatano wanave kaijinta, nanawirati vatano

Siprus muno vatano Kirene, unande munijo Antiokia rai wo Ayao Kovo Yesu ravovo vatano Yahudi jewene mai tavon. ²¹ Amisyete tuna mansautan weti vatano wanui rave wanave Yesu ai, usakinav utavondi Ai.

²² Umba anugano Amisyete no Yerusalemu daniv ware vatano Yahudi jeben nanawirati una no munijo Antiokia wanave Yesu ai to. Weti wo Barnabas apatimu indamu poroto po mansapan. ²³ Arono Barnabas umaso nanto Antiokia rai, po Amisyete apa kove raen manakoe no irati vatano nanawije mansai. Weti anayanambe rave muno po manyao indamu manuga ntenami una tawan irati Amisyete ai. ²⁴ Barnabas opamo vatano anuga ngko dave, panave Amisyete ai rave muno Anawayo Vambunine ama vambunine no ai. Arono naije vatano wanave Yesu ai awa wanuije miridi nseo kobe.

²⁵ Umba Barnabas poroto no munijo Tar-susu indamu po Saulus akani. ²⁶ Barnabas nanto Saulus ai, po augav yirija no munijo Antiokia. Umba Barnabas pe Saulusa pe inya anugano Amisyete mautan no naije tume intai muno yo vatane wanui manyao. Nai Antiokia umaso wemirati manasyin dave vatano wanave Yesu ai mawaino Kristen.

²⁷ Arono naije anawae Amisyete inta wuje no Yerusalemu wuruta no Antiokia. ²⁸ Anawae inta apa tame mirati Agabus. Anawayo Vambunine mo ayaowe inta raura ai, weti seo tet po raura nanto vatano wanave Yesu aije mansai pare, "Indati maroro manakoe inta nandee munije tename so rai." (Umaso nande to arono Klaudius be akarive irati pemeinta no Roma rai). ²⁹ Weti vatano wanave umaso mansaemeno awa arakovo una no munijo Yudea mansai, muno wo rapatimu ware wo doije ranunugambe indamu wo ranutugo mai. Vatano apa doije manui po raunande manakoe, muno vatano apa doije mamaun, po raunande mamaun, weti wo raunande mamaisyoe awa vambunine rarijati. ³⁰ Wo doije umaso ranunugambea jeben, umba Barnabas pe Saulusa pe yo raugav yirija no Yerusalemu, yare yo raunanto akarijo wo anugano Amisyete maugave mansai indamu wo ratodi.

12

Herodes po vatano wanave Yesu aije mave tatugadi muno po Petrus aijar

¹ Arono naije Akarijo Titi Herodes apa ayao maje indamu vatano wanave Yesu aije inta mansaijar muno po mansave

tatugadi. ² Muno po apa naite inta matutir indamu wo Yakobus, wepirati Yohanes apa anuija piye, aubaisyo omake rai. ³⁻⁴ Umba Herodes po raen vatano Yahudi manayanambe weye po Yakobus aubai to, weti panawadi po Petrus aijar tavon. Po aijara, po auga siso no tanoano makova rai. Umba po naite inta manugande, po maporabe mambisy ti varodore ranteter ama naite mambisy. Umba po mansatutir indamu wo Petrus aman.

Arono naije masyoto akoe Ono Paska, arono vatano Yahudi wo rotijo ragije mewen daije raisy. Weti Herodes po ratantona pare, “Ono Paska so mare mewen, indati syo Petrus auguje no kakavin indamu syo anajo apa ana daveye rai no vatano wanuije mansamun.” ⁵ Weti Petrus no tawan no tanoano makova rai, weramu anugano Amisy uba sambayambe ai tutir.

Petrus auguje no tanoano makova rai

⁶ Ono akoe umaso mewen, umba Herodes pare, “Siman indati syo Petrus auguje no kakavin indamu syo anajo apa ana dave ti ngkakaije rai.” Ama namanoe Petrus niki waijo besije nsawa aneme rai rautan. Waije umaso ransawa no naite jiruma yai indamu yo aman muno naito kaijinta yo unsanda raman tavon. ⁷ Kavuratawe naito Amisy inta paje te no Petrus amun muno vare mo tanoane umaso ravar tenambe. Umba naite umaso po Petrus atukamaje no awandaredate we, pare, “Nyavave ra nseo!” Naije kobe waijo besije umawe mpapaya Petrus aneme rai, ntaoponaje ntuna. ⁸ Umba naito Amisy po raura aje ai pare, “Nyo nya ansune raugasyo nanasine rai muno najo kokome rave tavon.” Weti Petrus tavondi apa ayao umaso rai. Umba naito Amisy po raura akato pare, “Nyo ansuno mamoaane rave tavon umba wintavondi rinai.” ⁹ Naije kobe yuje tanoano makova raora, weramu Petrus pantatukambe ana so nande tugae rako jewena rako? Pare veravo ana somamo nikimari vayave ma. ¹⁰ Yuje yo unsanda ramano manasyine rapaya, muno unsanda jirume rapaya nakato, umba nyande no unsanda besijo manakoe rai. Unsanda umaso taune mpaya amave vayave, umba yusya no kakavin. Naije yanya unanuije rai weramu nggwaravain daveye ramu, kavuratawe naito Amisy aumandijo ai kobe.

¹¹ Soa umba Petrus paparo ai, pare, “Wakoe! Risyuje tanoano makova rai tugae! Amisy pi po apa naite atutir po in-augavuje Herodes anem uga raora, muno po inapaya irati akarijo akokoe Yahudi awa mangke wo ratantona rinai raora tenambe.” ¹² Petrus po anakotare umaso ratantonawa jewen, naije poroto kobe no

Maria ama yavare rai. Maria umaso mamo Yohanes, wepi awain tavonamo Markus, apa akoya miye. Arono naije vatano wanave Yesus aije wanugan no ama yavare ama uga rai, ube sambayambeve. ¹³ Umba Petrus nande unsanda sisa rai, weramu rauguji matuve. Weti po apa kawije raveano unsanda rananepat. Umba wanya manapatambe no yavare umaso rai inta muje, ama tame mirati Rode. Mare mbe ramu mo unsanda umaso rausiso. ¹⁴ Umba mo Petrus anamote ranaun ti mare, “Sopamo Petrusa pi vae!” Ranananambe rave ti mavave makare, weramu mo unsanda rausiso jewen. Umba mo raura nanto vatano una no yavar uga mansai tenambe mare, “Petrusa pi de te no unsanda sisa umu.”

¹⁵ Vatane umaso wanave raije ramu, ware, “Winyamo anaivije inta mo navea wirati nyayaoware wato maisyowe!” Weramu ranuga matu, mare, “Syo anaun tugae Petrusa pi vae.” Weramu vatane wanave rai jewena nene, ware, “Vatano nyo anaune wato pamo somaisyamo naito Amisy po Petrus aeranande inta pi de.”

¹⁶ Petrus opamo po unsanda rananepat tutir. Weti vatane wuje wo unsanda rausiso, umba wo aen ti upaparo mansai. ¹⁷ Umba ware wayao ai, weramu Petrus aneme veano makamananto, pare, “Wamanin dati!” Umba po raura pare Amisy opirati po auguje tanoano makova raora, muno po ana nande aije ratodi tenambe. Apa ayaowe mewen, umba pare, “Syare wapo raura Yakobus ai muno wama arakove mai tenambe.” Umba poroto kobe no munijo kaijinta.

¹⁸ Siman akato naito wo tanoano makova ramane umawe manuga nseo majeve, ware, “Wambeare ruimaisy akato? Umba Petrus pamo soa pujeare ruimaisy?” ¹⁹ Herodes po naito kaijinta matutir indamu wo Petrus akani. Weramu wo akanija marudi, unanta aije ramu. Umba Herodes po naito wo Petrus amane umawe mawainde inda po manajo pare, “Petrus pujeare ruimaji?” Po manajoa jewen, umba po mangke raugaje indamu naite umaso maubaisy.

Umba Akarijo Titi Herodes puje no Yudea poroto no munijo Kaisarea, no tawan no naije masyote inta yai.

Herodes kakai

²⁰ Arono naije Herodes pariyo vatano nanawirati una no munijo Tirus muno munijo Sidon mansai. Weti vatano Tirus muno Sidon inta ude ubeker ware wo ayao raura Herodes ai, weye awa anaisy wo raisye mamo nori rati apa munijo be akarive raije rai. Umba unande no Berastus ai, wepamo vatano panapatambe Herodes ai,

indamu Berastus umaso po mansaugavere no Herodesa nui, indamu wepe wenawe wo mansaneme rajjar wirati mansanuga nsauman akato.

²¹ Noa masyoto rapatimu indamu vatane umaso wanunugambe, umba Herodes po apa ansuno akoe rave, muno puje tuna no kursijo titi rai, umba payao aje vatano wanunugambe umaso mansai.

²² Umba vatane umaso wo aura titive ware, “Herodes apa ayao maisyare vatan bayave inta payao ramaisye ramu, yara maisyare Amisye pi payao aje ramaisy!”

²³ Herodes pamo vatano ararin dave, weti anayanambe po vatane awa ayao umaso raraniv. Yara po Amisye aura titive jeben, weti Amisye po apa naite inta atutir po Herodes aubaisy, muno uve ntipu mo anasine raisy. Umba Herodes kakai kobe.

²⁴ Weramu Ayao Kovo Yesus maneka manakoe tutir kobe.

²⁵ Arono naije Barnabasa pe Saulusa pe yo doiye raugavere akarijo wo anugano Amisye maugave mansai no Yerusalem. Yo raunandea jeben, umba yare yakata no munijo Antiokia. Muno yo Yohanes, awain tavonamo Markus, augav inda tavono yai.

13

Barnabasa pe Saulusa pe yapatimu yuje indamu yo Ayao Kovo Yesus raura

¹ Anawae Amisy muno kurun inta una anugano Amisye marijat no munijo Antiokia awa tame mirati: Barnabas, Simeon awain tavonamo vatano karisya, Lukius vatano Kirene, Menahem napi akumo Akarijo Titi Herodes atavono arono imamaun kava we, muno Saulus awain tavonamo Paulus. ² Masyote inta vatane umaso wo anaisye raisye ramu, yara matawandijo marore rai indamu ube sambayambe. Arono naije Amisye apa Anawayo Vambunine mo raura mansai mare, “Wapo Barnabas muno Saulus yapatimu Rinai indamu yo anakero Syo ratayao yaije rajjar.” ³ Weti ube sambayambe muno matawandijo marore rajja jeben, umba wo maneme rajjaseo ntamijo yai, umba wo yatutir yuje indamu yo Ayao Kovo Yesus ravov.

Paulusa pe Barnabasa pe yisisa no nupatumugo Siprus

⁴ Maisyare omaisy, Anawayo Vambunine mo Saulusa pe Barnabasa pe yapatimu inda yirija yo Ayao Kovo Yesus raura. Weti yanya ije no munijo Seleukia, mararaijo mayane vone rai. Isea nyomano ngkayune rai no naije, mo yaugav nto no nupatumugo Siprus. ⁵ Arono nyanta no nupatumugo Siprus umaso rai, yisisa no ama munije inta rai, ama tame mirati Salamis. Naije yisisa

no Yahudi awa yavaro sambaya rai tutudi yo Ayao Kovo Yesus raura. Muno Yohanes, awain tavonamo Markus, tavondijo yai indamu panapatambe yai.

⁶ Yanya irati nupatumugo Siprus umaso rai tenambe, yava nyande no munijo Papos. Naije nyanta vatano Yahudi inta ai, apa tame mirati Baryesus, awaino ayao Yunani rajjamo Elimas. Vatane umaso po nyovara kakai raugav muno opamo anawae angkarije pa, po vatane maponae. ⁷ Elimas umaso tavondi jirati vatano be gubernurive nupatumugo Siprus rajje ai, apa tame mirati Sergius Paulus, opamo vatano akari mba dave. Gubernur Sergius Paulus umaso po Barnabas muno Saulus yawainde weye pare beker po Ayao Kovo Yesus ranauno yai. ⁸ Weti Barnabasa pe Saulusa pe ije kobe. Weramu Elimas pare po yansopi, pare vemo akarijo Sergius Paulus panaveo Yesus ai nora. ⁹ Umba Anawayo Vambunine mo vambunine raugaje Saulus ai, wepi awain tavonamo Paulus. Weti Paulus amije ntete nanto irati Elimas ai, po raura pare,

¹⁰ “Elimas, winyamo Anakakai Akoe apa arikainye pi winy! Wimbe marovave ana ngkove rai! Winyamo angkarije ntapekano nai! Mbeanimaibe winyo Amisye apa ananyao tugae ranigwano winya arurijate rai tenambe? ¹¹ Weti soamo Amisye po mangke raugaje nai. Indati Po namije raveti makakave, weta nyo nuge raen akatoe ramu gava masyote inta yai jaje.” Naije kobe Elimas po amije ranaun maisyare kijao inta nande rai ti mpunanakambe, inda pavabakave kobe. Weti gwain pare, “Aoo! Syare koveamo inta wasaemeno rinai wapo inaugment!” ¹² Gubernur Sergius Paulus po anapaporainye umaso raen, weti nantoive ananyao Amisy Yesus rai muno panave kobe.

Paulus payao no Yahudi awa yavaro sambaya rai no Antiokia Pisidia

¹³ Paulus muno apa arakove wo munijo Papos rapaya, usea nyomano ngkayune rai wuruta no munijo Perga, wemi no no propinsijo Pampilia. Weramu naije Yohanes Markus opamo po mapaya ti pare pakato no Yerusalem. ¹⁴ Umba Paulus muno Barnabas yo munijo Perga rapaya akato, yirija no munijo Antiokia, wemi no no Pisidia. Masyoto sambaya mamaisy, weti Paulusa pe Saulusa pe yisisa Yahudi awa yavaro sambaya inta rai, umba yaje itantuna. ¹⁵ Arono vatane wo Ananyao Musa muno Ayao Anawae ranauna jeben, umbawe vatano ube akarive yavaro sambaya umaso rai wo vatane inta atutir po Paulus muno Barnabas yanajoare somaisy: “Arakove, ipare ipo ananyao inta raura rako? Weamo ipo raura kai.”

¹⁶ Weti Paulus seo tet, aneme raijaseo mai indamu umanin. Umba po raura pare, “Sya arakovo Yahudi weap! Muno vatano Yahudi jewen weapirati wapo Amisy e ararimbe tavon no naiso weap! Syare wapo rinaraniv! ¹⁷ Wusyinoe vatano Israel wama Amisy e po wama anene mansapatimu. Arono una no munijo Mesir, Amisy e tuna mansautan weti awa wanuije miridi nseo. Weramu ube arove no Mesir umaso rai, weti Amisy e po apa vambunine rarorono wama anene mai indamu Po mauguje munijo aro umaso raora. ¹⁸ Umba tume tename jirum Amisy e atawandi mai. Onawamo ubeta Amisy e aije ramu, weti Po maugav wanya waravaimbe no nugo vabukane vono maninimbe rai. ¹⁹ Arono wama anene usisa no munijo Kanaan, Amisy e po vambunine raugaje mai, weti wo vatano una no naije susye kaururum maubaisy. Umba Po awa kopa raosoro mansai indamu awa susyo wo mampame awave irati rai tutir.

²⁰ Tume rator kobe no arono wama anene wuje Kanaan raora umba maijaro arove ta no Mesir, mansanan awa wakare wo awa munijo Kanaan raijar akato, ama tume nanto no ratusije mambisy eane abusyine nadani (450).

Arono kopa Kanaan raosoro vatano Israel mai, Amisy e po akarije inta mapatimu indamu wo maeranande. Muno Po akarije umaso mapatimu tutir mansanan awa nanto irati anawae Samuel ai. ²¹ Umba vatano Israel ubeker ware akarijo titi inta aijaseo indamu be akarive mansai. Weti Amisy e po vatane inta apatimu no susyo Benyamin rai, apa tame mirati Saul, aja pirati Kisy. Weti Saul umaso pamo akarijo titi no Israel tume tename jirum. ²² Umba Amisy e po augakaje apa tame umaso rai, yara Po Isai apa kavo Daud aijaseo indamu po Saul anigwan opamo vatano Israel awa akarijo titi piye. Amisy e pare, ‘Inanayanambe Daud ai weye Syo aenamo indati po Sya bekere rarijat mavabe.’

²³ Soamo Amisy e po Vatane inta apatimu akato no Daud apa susye rai indamu Po vatano Israel mapaya awa ayao kakaije rai, mamaisy irati Apa urairije rai. Yesu opamo napije. ²⁴ Muno Yohanes Pembaptis puisyewe Yesu ai, po vatano Israel mansanyao pare, ‘Wasakinavo wapa ayao kakaije rai umba risyo wasaugasya kuvuni mana rai.’ ²⁵ Masyote inta Yohanes po vatane mansanajo taiso pare, ‘Wapo rinatantona wapare are pi risy? Wapare risyirati Mesias wapo anyube pi dako? Weramu syo raura wasai, risyamo jewena. Yara Vatano wapo anyube wepirati indati po

inarijade. Opamo apa tame ntiti rinakivan, weti Apa ajo kokome mammo risyo rapaya kakai, weye rimamaisy e ramu.’

²⁶ Inya! Sya arakovo Abraham apa ajavi muno vatano Yahudi jewen wapanawe Amisy e ai weap, syo raura wasai! Wamirati Amisy e po apa Ayao Kove so raugaje wansai indamu Po wansapaya wama ayao kakaije rai. ²⁷ Yesu wepirati anawae wo aurairive to arono wusyinoe, weramu vatano una no Yerusalem muno awa akarije wanawe Aije ramu weye wantatukambe Ai. Wo anawae Amisy e awa ayao umaso ranauno masyoto sambaya ranteter, weramu wantatukambe ama ine rai. Weti wo mangke raugaje Yesu ai, wemamo mamaisy o anawae umaso awa urairijo wusyine rai. ²⁸ Wo ayao kakaije inta raen no Yesu aije ramu, weramu wo Akarijo Titi Pilatus anajo indamu po aubai bayave. ²⁹ Awa ana wo rave Yesu ai omamo mamaisy o anawae Amisy e wo raurairive wusyimbe to rai. Weti arono urairije umaso raveti mamai tenambea jewen, umba wo Yesu augaje no inyo kapite rai umba vatane wo antuna no aipapo oramo ratotove rai. ³⁰ Weramu Amisy e po aijaseo kovakato no wene ama uga rai! ³¹ Umba masyote inta yai, Yesu arorono Apa arakove mansai, nanawirati wusyinoe utavondi Ai tutir no Galilea wuruta no Yerusalem. Wenawirati soamo wo Yesu aura kakavimbe vatano Yahudi mansai.”

Paulus pare anawae Amisy e wo Yesu apa kovakato raurairive wusyimbe to

³² Umba Paulus po raura iridi pare, “Sya arakovo Yahudi watantuna yavaro sambaya so rai, Barnabasa pe risye ririnde no so indamu ririmo Ayao Kove raura wasai: Amisy e po urairijo po raugaje wama anene mansai ³³ soamo awa ajavi wamirati wandaen Po raveti mamaisy, weye Amisy e po Yesu aijaseo kovakato. Mamaisy o Amisy e po apa Kavo Yesu aura ti Mazmur ama moto jirum mo ratoe rai no taiso:

‘Masyoto unumeso Syo raura Naijamo:
Winyirati Sya Arikainye pi Winy
muno Risyirati Nya Injaya pi Risy.’^{*}

³⁴ Amisy e po Yesu aijaseo kovakato no wene rai, weti Yesu anasine maug akato no kopa raije ramu, yara kova no tawan. Ayao umaso Amisy e po raurairive wusyimbe to no taiso:

‘Kovo ngko dave wemirati Syo raurairive Daud ai no wusyinoe, indati Syo raurande Nai jaje.’^{*}

³⁵ Muno ayao kovo Mazmur ama moto kajinta mo raura tavon mare:

‘Amisye, risyamo Nya arikainyo panapatambe pi Risy,
indati Nyo inapaya ti inanasine so ntami maugé ramu.’³⁶

³⁶ Urairije umaso mamó Daud po ratóe, weramu po taune aura jéwen. Daud po Amisye apa bekere rarijat bintabo arono tuna no mine vone so, umba kakai muno antuna maisyare muno apa anene mansamaisy tavon, umba anasino kopa maug kobe. ³⁷ Weramu Yesus pamo Amisye po aijaseo kovakato, weti anasine maugé ramu. ³⁸ Maisyare omai ti, sya arakove, ribeker syare wapo ranaun kobe weye ayao so nde wasai: Yesus wepirati po ayao kakaije rapaya. ³⁹ Weti are pirati panave Ai, Yesus po apa ayao kakaije rapaya tenambe. Yara are pirati po Ananyao Musa obo rarijat, weamo mamaisye ramu, mo ayao kakaije rapaya tenambeye ramu. ⁴⁰ Syo raura sya arakovo Yahudi weasai: Wasyisyaube indamu vemo Amisye apa mangke namirati anawae wusyine wo raurairive nande wasai jinya, no taiso:

⁴¹ ‘Inya! Vatano wapanaikebe Rinai weap, wasyisyaube!’

Weye Syo sya anakere inta raijar no arono wapa susyo naiso, weramu weapanave rai ramu.

Muno ranivara vatane inta po raura kakavimbe wasai rave kai, weramu wapanave rai tavone ramu.

Weti arono nande, indati wapaparo wasai umba wakakai kobe!’⁴²”

⁴² Paulus payaowa jéwen, umba wepe Barnabasa pe yuje no Yahudi awa yavaro sambaya umaso rai. Naije vatane inta wo raura yai ware, “Reambeker wamare indati masyoto sambaya makanande akato umu mamó ripo ananyaowe so raura reansai jakato.” ⁴³ Arono usambayambea jéwen, umba vatano wanui wo Paulus muno Barnabas yarijat, inta nanawamo vatano Yahudi muno inta nanawamo vatano Yahudi jéwen nanawirati wo ananyao Yahudi raija to. Weti Paulusa pe yo manyao indamu manuga raneka Amisye apa kove rai.

⁴⁴ Masyoto sambaya makanande akato, kavintare vatan tenambe utantuna no munijo naije wanugan indamu wo ayao Amisy wemirati Paulus muno Barnabas yo raura ranaun. ⁴⁵ Weramu arono vatano Yahudi wo vatano wanuije umaso maen, manuga mparijo Paulusa pe yai, weti wo Paulus apa ayao raura tantunawi.

⁴⁶ Weramu Paulus muno Barnabas ijanive ramu, yara yo raura akananto vambunimbe yare, “Ayao Amisye somamo vatano Yahudi wepirati urare indamu

raura wasai manasyimbe. Weramu wapo rawatambe muno taune wapare kovo nuge nuganuije omamo wamamaisyo raije ramu. Maisyare omai ti, soamo ririmo wasapaya vayave, yara ririmare ririnta no vatano Yahudi jéwene mansai. ⁴⁷ Ririmare rimo Ayao Kove raura vatano Yahudi jéwene mansai weye Amisye po ririnsatutir pare:

‘Syo wasatayao indamu wasaurata irati vare rai, wabaro vatano Yahudi jéwene mansai,

indamu Sya ayao syo vatane mapaya awa ayao kakaije rai omamo wadavovo no mine vone so raija nto nanto no ama maran.’⁴⁸”

⁴⁸ Arono vatano Yahudi jéwen una no munijo namije wo Paulus apa ayao umaso ranaun, manayanambe muno wo Amisye ararimbe weye apa ayao ngko dave. Muno are nanawirati Amisye po matayao indamu awaura kovo nuge nuganuije rai, wananawamo wanave Yesus ai. ⁴⁹ Umba Ayao Kovo Yesus maneka manakoe no munijo namije rai tenambe.

⁵⁰ Weramu vatano Yahudi manuga ngkakaijo Paulus muno Barnabas yai. Weti vatano Yahudi wayao maje irati wanya awa tame ntiti inta mai, nanawirati utavondi ananyao Yahudi rai. Muno wayao maje tavon irati anya inta mai, nanawirati ube akarive munijo namije rai. Weti wo vatane umaso manuga raugabe indamu wo arare rave irati Paulus muno Barnabas yai, ti wo yawatambe munijo namije rai.

⁵¹ Umba Paulusa pe yo kapumo nowo yajoe raije ranepataje no vatano munije umaso mansamun indamu mbe rarorombe wo taune awa mangke ranawan. Umba Paulus muno Barnabas yirija no munijo Ikonium. ⁵² Muno vatano wanave Yesus ai nanawirati una tawan no munije umawe rai manayanambe rave muno Anawayo Vambunine mo vambunine raugaje mansai.

14

Paulus muno Barnabas yo Ayao Kovo Yesus raura no Ikonium

¹ Paulus muno Barnabas ije no munijo Ikonium. Umba isisa no vatano Yahudi awa yavaro sambaya inta rai. Naije yo ayao Amisye raura vambunimbe, weti vatano Yahudi muno vatano Yahudije jéwen wanui wanave irati Yesus ai. ² Weramu vatano Yahudi inta wonayo wanave Yesus aiji. Weti wo vatano Yahudi jéwen inta manuga raugabe indamu uparijo vatano wanave Yesus aije mansai. ³ Paulus muno Barnabas inyana nugoenta no Ikonium. Ijanive ramu,

yara yo Amisy Yesus aura vambunimbe. Muno Amisy po vambunine raugaje yai indamu yo anapaporainye raroron, weti anapaporainye umaso mo raroron kakavimbe ayao yo Amisy apa kove raura omamo ayao tugae. ⁴ Weramu vatano una no munijo naije mansanuga mbe intabove ramu: inta utavondi arakovo Paulus muno Barnabas nanairati Yesus po yatutire umaso yai. Yara inta utavondi vatano Yahudi mansai. ⁵ Umba vatano Yahudi muno vatano Yahudi jeben muno awa akari wanugan indamu wo Paulus muno Barnabas yave tatugadi, ware wo orame rave yaepar. ⁶ Weramu Paulusa pe Barnabasa pe yo awa bekere umaso ranaun, weti inyanjajibe yirija no munijo Lистра muno Derbe no no Likaonia. Muno yanya isisa yuje ama varodere rai tenambe. ⁷ Naije yo Ayao Kovo Yesus ravov.

Paulus muno Barnabas yo Ayao Kove raura no munijo Lистра muno Derbe

⁸ Paulusa pe Barnabasa pe nyanta vatano tunaive inta ai no munijo Lистра. Vatane umaso arono ano aje kajioe tunaive to, weti panya kakai yara tunave vayave. ⁹ Arono Paulus pananyaube, vatane umaso mainda tuna po raraniv. Paulus amije no tawan irati ai, po vatane umaso aen apa anave Amisy ai omamo mbambunin indamu Po saumane raunanto ai. ¹⁰ Weti po awaino anamote manakoe rai pare, “Mbeseo nted indamu nyanya!” Weti atipu seo tet kobe, sasopati umba panya kobe.

¹¹ Vatano wanui una no munijo Lистра wo Paulus apa anapaporainye umaso raen ti nuntaiwe rave. Umba ugwain ware, “Wakoe! Wandaen vatane so onayamo vatan bayave nanaya jeben! Yara inyo no naumo warae yaje no mine so rai isigwar ibe vatanbe. Aya vambunine manakoe rave! Weti wade wambeaje yai!” Ugwaino awa ayao Likaonia rai, weramu Paulusa pe Barnabasa pe nyanta awa ayao rai jeben. ¹² Vatano wanui umaso wo tamo manakoe inta veano yawain, wo Barnabas awainamo Zeus muno Paulus awainamo Hermes weye wepirati apatimu indamu payao.* ¹³ Syene inta no no naije, wepamo panapatambe no yaro Zeus apa yavare rai, ntami no munije ama usye rai. Syene umaso pe, vatano wanui umawe nawe ubeker wo ana inta rameseo Paulusa pe Barnabasa pe yai indamu ubeaje yai. Weti syen umaso po inyo ama ugem rainum waije rai, po raugav to no munijo we ama unsanda akokoe rai. Po sapijo anya inta auga tavon, pare po aotar

inda po rameseo Paulusa pe Barnabasa pe yai.

¹⁴ Weramu Paulusa pe Barnabasa pe yo raen mamaisy e ramu, weti yo taune aya ansune rasajam, umba yamaugusa no awa yasyin. Igwain yare, ¹⁵ “Abo! Wabeanimaibe wapo ana so rave taiso? Indako wapare wabeaje ririnsai, maisyare vatane usambayambe Amisy ai wemai dako?! Ngkove ramu, weye ririmamo Amisy pi ririma jewena. Yara ririmamo vatan bayave nanai ririm, maisyare muno weasamai tavon. Weramu ririma inde no munije somamo ririmo Ayao Kove raugavo wasai no taiso: Wapo wapa yare rapaya ra ntami, umba wasakinav indamu wapanave irati Amisyo tugae obo ai. Amisyo tugae pamo kova no tawan. Wapa yare mamamo wapanave raija marudi vayavea, weye wo ana kove inta raunande wasaije ramu. Yara Amisy e pamo po naumo warae muno mayano warawe muno mine so muno anakotaro ntuna no ama uga raije ranari tenambe. ¹⁶ Wusyinoe Amisy e aneme mpaya vatano mine so mansai tenambe ti wanya irati taune awa bekere bo rarijati. ¹⁷ Weramu Amisy e po apa kove rarorono vatane mai tutir indamu wo raen ware, ‘Amisy e no tugae.’ Po maruge raveti maje muno Po anamuko no no mine so raveti ntubai weti wapa anaisy e mawes muno wasanuga ranayanambe.” ¹⁸ Vatano Lистра wo Paulusa pe aya ayao umaso raraniv, weramu awa bekere manakoe rave indamu wo sapije rameseo irati yai. Weti kavintare Paulusa pe yo mansopi je kakai.

¹⁹ Masyote inta yai jakato, vatano Yahudi inta una no munijo Antiokia Pisidia muno inta una no munijo Ikonium ude. Umba wo vatano wanui manuga raugabe indamu wo Paulus aubaisy. Weti wo orame rave Paulus aepar, wo aepar awa ware veravo kakai to. Umba wo akarimu indamu wo amauta tuna no munijo namije ama akiri. ²⁰ Umba vatano wanave Yesus aije maemeno Paulus ai, weti uta wanugan irati akiani. Weramu Paulus kakaije ramu, weti beseo akato, panya siso no munije so rai jakato. Siman akato Paulusa pe Barnabasa pe yuje munijo namije raora, yanya yirija no munijo Derbe.

Paulusa pe Barnabasa pe yakata no munijo Antiokia no Siria

²¹ Paulusa pe Barnabasa pe inya no munijo Derbe umaso rai, yo Ayao Kovo Yesus ravov, weti vatano wanui wanave Yesus ai. Naije akato isakinav yo kokova umawe raijakare, isisa munijo Lистра muno Ikonium muno Antiokia Pisidia rai jakato. ²² Muno

* **14:12** Vatano Lистра awa anave no taiso: Ware vatano titi rave wanui una no naumo warae. Inta apa tame mirati Zeus, opamo akarijo titi rave pi je. Muno kaijinta apa tame mirati Hermes, opamo po Zeus apa bekere raraniv umba po raura akaje vatano una no mine vone so raije mansai.

yo vatano wanave Yesu ai to manyao rijati akato no munije so rai tenambe. Yare, “Weapamo vemo wapo wapa anave Yesu aije rapaya inya, yara wapo rajjar matuve. Wano no mine vone so wansi-urati, wea umba wansisa irati munijo Amisy be akarive rajje rai.”²³ Muno Paulusa pe Barnabasa pe yo vatane inta mapatimu indamu ube akarive anugano Amisy mai tutudi. Umba matawandijo marore rai muno usambayambe akarije umaso mansai, ware, “Amisyo winy, vatane so wanave Nai muno ware wo Nya anugane mansaugav. Weti Nyo maeranande kobe. Amin.”²⁴ Paulusa pe Barnabasa pe yo anugano Amisy raen tetebea mewen, umba yanya tutir yo munijo Pisidia rapaya, yakare no munijo Pampilia rai.²⁵ Umba yisisa no munijo Perga, yo Ayao Kovo Yesu raura no naije. Umba yanya akato yirija no munijo Atalia.

²⁶ No naije isea nyomano ngkayune inta rai, mo yaugav nyajiv no munijo Antiokia Siria. Antiokia umaso wemirati munijo Paulus muno Barnabasa inya rai arono wusyinoe vatano wanave Yesu ai inta wo mansaneme rajjaseo yai wo Amisy anajo indamu Po kove raugaje yai arono yo Amisy apa anakere rajjar. Soamo yakare weye yo anakere umaso rajjara mewen to.²⁷ Weti nyanta no Antiokia rai, yo anugano Amisy mawainde wanugan indamu yo Amisy apa ana po rave arono yo ayao Yesu ravovogoe raura tenambe mansai. Muno yo raura yare Amisy po unanuije raneka vatano Yahudi jewene mansai tavon indamu wanave Yesu ai.²⁸ Umba Paulusa pe Barnabasa pe inya vatano wanave Yesu aije mautan no naijea nugoenta.

15

Vatano ube akarive Yesu apa anugane mai wanugan no Yerusalem

¹ Vatano Yahudi wanave Yesu aije inta una no Yudea ude no munijo Antiokia. Wo vatano Yahudi jewen nanawirati wanave Yesu ai to manyao ware, “Ananyao Musa mo wasatutir indamu wabe sunative! Are pirati tavondi ananyao sunat rajje jewen, opamo indati Amisy po apaya apa ayao kakaije rajje ramu.”² Weramu Paulusa pe Barnabasa pe yo awa ananyaowe umaso raorai mangkebe, wetiva wayaowi rai. Weti anugano Amisy wo Paulus muno Barnabas muno vatano kaijo wanave Yesu ai inta mapatimu wuruta no Yerusalem.

Wo matutir indamu wo Yesu apa arakovo po matutir muno akarijo wo anugano Amisy maugave mapan indamu wayao irati ananyaowe so rai.³ Weti anugano Amisy wo Paulusa pe matutir wuruta no Yerusalem. Awa unanui anyo usisa no Penisia muno Samaria rai, wo arakovo wanave Yesu ai no naije mapan. Wo raura mai ware soamo vatano Yahudi jewen inta wanave Yesu ai tavon to. Awa ayao umaso ma awa arakove wo ranaun ti manayanambe rave.

⁴ Arono Paulusa pe Barnabasa pe awa arakove nawe unanta no Yerusalem rai, anugano Amisy nawe, awa akarijo wo maugave nawe, Yesu apa arakovo po matutire nawe manayanambe tenambe weti wo maugav usisa. Umba Paulus muno Barnabas yo Amisy apa ana po raveye arono yo ayao Yesu ravovogoe ratodi mansai tenambe.⁵ Umba vatano Parisi nanawirati wanave Yesu ai inta usea usayai, wo raura ware, “Reamare wamo vatano Yahudi jewen nanawirati wanave Yesu aije mantitidi indamu utavondi sunat rai. Muno reamare utataopon irati Ananyao Musa rai inda wo rarijat tenambe.”

⁶ Umba Yesu apa arakovo po matutire nawe, akarijo wo anugano Amisy maugave nawe, wanugan indamu wo ananyao sunat ratantona.⁷ Wayaowa nugoenta, umba Petrus seo tet po raura mansai pare, “Sya arakove weap, wapo inae Amisy po inatayao no wusyinoe indamu syo Ayao Kovo Yesu raura vatano Yahudi jewene mansai indamu wanave Yesu ai tavon.”⁸ Amisy, wepirati po vatane manuga raen tenambe, Po vatano Yahudi jewene mansauga usisa to. Wamo raen Po mansauga usisa tugae weye Po Anawayo Vambunine raugaje mai maisyare muno wusyinoe Po Anawayo Vambunine raugaje wansaije wemaisy.⁹ Muno Amisy po ayao kakai manuga rarandom indamu ngkakavin weye wanave irati Yesu ai. Maisyare omaisy, Amisy pare vatano Yahudije jewen onanawamo usasye irati vatano Yahudi wansaije ramu, yara pare wamamo wamamai tenambe.¹⁰ Amisy apa bekere maisyare somaisy, weti vean-imaibe weaponaie rai? Wusyinoe wama anene nanawamo ware wo Ananyao Musa rarijat damu mangkeo mansai weye ama ananyaowe ma manui rave. Muno soamo wamare wamo rarijat akato, mangkeo

* **15:1** Arono naijeamo vatano Yahudi wanave Yesu aije inta wanepabe ware wanave Yesu ai kai, weramu wo koano sunat muno Ananyao Musa rajjar tutir. Muno ubeker wo vatano Yahudi jewen nanawirati wanave Yesu aije mantitidi inda utavondi rai tenambe tavon. Weramu Ananyao Musa ama mbekere ndea mamai tenambe no Yesu Kristusa nui, weti soamo Ananyao Musa mbe tanamamoambe vatano wanave Aije mansai jakatoo ramu, muno koano sunat mamu ubeta rai jewen kai.

wansai tavon. Weti veanimaike wamare wamo vatano Yahudi jewene mantitidi ananyaowe so rai indamu wo rarijat? Mamaisye ramu! ¹¹ Yara wamanave wamare Amisy Yesus apa kove wemi mbewar wama ayao kakaije mpaya wansai, maisyare muno vatano Yahudi jewene nawamo awa ayao kakai mpaya mansai tavon wemaisy.”

¹² Umba vatano wanugane umawe umanin bayave. Umba Barnabas muno Paulus yayao akato weti wo yaraniv. Yo raura yare arono yo ayao Yesus ravovo vatano Yahudi jewene mansaijoe, Amisy po vambunine raugaje yai indamu yo anapaporainye raroron no awa yasyine rai. Umba yo Amisy apa anapaporainye umaso raura kakavimbe tenambe.

Wo rapatimu ware vatano Yahudi jewen nanawirati wanave Yesus ai wo Ananyao Musa rarijat jewen kai

¹³ Barnabasa pe Paulusa pe yayaowa jewen, umba Yakobus po raura pare, “Sya arakove, wadanide! ¹⁴ Wama arakovo Simon Petrus umawe po raura kakavimbe wasai to pare arono manasyimbe Amisy po apa muinye raroron vatano Yahudi jewene mansai, Po inta mapatimu indamu usisa Apa kawasae matavon. ¹⁵ Amisy po maugave usisa omamo mamaisyo wusyinoe Po raurairive nanto Apa anawae mai, maisyare inta po ratoeyare somaisy:

¹⁶ ‘Amisy po raura pare,
“Syo raen sya kawasae Daud be akarive maijoe mandami to,
muno Daud apa susye mamu mbe akarive mai jakatoo ramu.

Indati syakare umba Daud apa ajavi inta be akarive Sya kawasae mai jakato,
muno Syo vambunine raunande mai jakato.

¹⁷ Wea indati vatano Yahudi jewen nanawirati Syo mawain unanta irati Rinai tenambe.”

¹⁸ Amisy po raura maisyare wemaisy.
Arono wusyinoe Po ana umaso raroron kakavimbe to.*

¹⁹ Maisyare omai ti, sya ana syo ratantona mamu syare vemo wamo vatano Yahudi jeweno nanawirati usakinav utavondi Amisy aije mansosobe inya. Weyo ranivara wamo mansantitidi indamu wo Ananyao Musa rarijat tenambe, weamo mangkeo mai rave. Weti syare wamo ananyao mamaun obo raugaje mansai indamu wo rarijat, wea umba mamaisy.

²⁰ Weti syare wamo ananyao mamaune so ratoeyo nyovara waowe inta rai inda wamo ranutu mai, maisyare so: Anaisyo rameseo irati yare raije mamu vemo wo raisy inya.

Muno vemo anaerene ugavo mansai jinya. Muno maero rakuinye raijananto indamu ngkakai, vemo wo raisy inya weye ama mavuge ntuna tawan no ranasine rai. Muno mavugo rui vayave mamu vemo wo raisy inya. ²¹ Ananyao Musa mamu vatano Yahudi wo raura kakavimbe no munijo kotaro rui vayave, arono wusyinoe mansanan ava naiso. Muno arono awa masyoto sambaya ranteter, ubacave rai no awa yavaro sambaya rai. Weti vatano Yahudi jewen inta umayar ware wo Ananyao Musa ranaun tenambe, weamo wo ranaun kai.”

Nyovara wao ratoe irati vatano Yahudi jewen nanawirati wanave Yesus aije mansai

²² Umba Yesus apa arakovo po matutire nawe, akari wo anugano Amisy maugave nawe, maijaro anugano Amisy matavon tenambe, ubeker ware wo vatane inta yatayao indamu itavondi jirati Paulus muno Barnabas yai arono yare yakata no munijo Antiokia. Weti wo Silas muno Yudas, awain tavonamo Barsabas, yatayao, wenayamo vatano ibe akarive tavon irati arakovo wanave Yesus aije mai no Yerusalem. ²³ Weti wo nyovara waowe inta ratoe indamu wo raugav, ama ine maisyare so:

“Reamirati Yesus apa arakovo po reansatutir muno akarijo wo anugano Amisy raugav no Yerusalem.

Reamo nyovara waowe so ratoeyo vatano Yahudi jewen wapanave irati Yesus ai, weapi wana no Antiokia muno Siria muno Kilikia rai tenambe. Kove ngkov irati wasai!

²⁴ Reandaniv arono nandijawe arakove inta wuje no naiso wore wasai. Reamo matutire ramu yara taune wore. Awa ananyao mo wasanuga raugabe ti nsosobe muno wapananepabe. ²⁵ Soamo reansanuga mbe intabove indamu reamo vatan inta yatayao reamo yatutir itavondi Barnabasa pe Paulusa pe yai ude wasai. Barnabasa pe Paulusa pe wenayamo reama arakovo reansanuga no yai. ²⁶ Weramu vatan inta ware wo yaubaisy weye yo Ayao Kovo Amisy Yesus Kristus ravov. ²⁷ Soamo yare yakata wasai. Weti reamo Yudas muno Silas yapatimu itavondi yai indamu yo nyovara waowe so ama ine raura kakavimbe wasai. ²⁸ Anawayo Vambunine ama mbeker wemirati reamo rarijat, weti reamo ananyao nsaeke obo raugaje wasai, maisyare so:

²⁹ Anaisyo rameseo irati yare raije mamu vemo wapo raisy inya. Muno maere ama mavuge mamu vemo wapo

* 15:18 Amos 9:11-12

raisy inya. Muno maero rakuinye rajananto indamu ngkakai, vemo wapo raisy inya weye ama mavuge ntuna tawan no ranasine rai. Muno vemo anaerere ugavo wasai jinya. Weti wapo anakotare umaso rawatambe tenambe, weamo ngkov irati wasai.

Reama ayao nsopi no naije. Amisyé tuna wansautan tenambe.

Reamirati Yesu apa arakovo po re-ansatutir muno akarijo wo anugano Amisyé raugav no Yerusalem.”

³⁰ Barnabasa pe Paulusa pe Yudasa pe Silasa pe wuje Yerusalem rai umba wuruta no Antiokia. Unanta Antiokia rai, wo vatano wanave Yesu aije mawainde wanugan tenambe, umba wo nyovara waowe umawe raunanto mansai. ³¹ Vatano wanave Yesu ai wo nyovara wao raena jewen, umba manayanambe rai muno manuga ntubai mbambunin akato. ³² Yudas muno Silas onayamo anawae Amisyé nanaya, weti yo arakove umaso manyao indamu awa anave ntindimu. ³³ Inya tutir no Antiokia masyote inta yai. Umba arakovo una no naije wo yatutir yakare no Yerusalem ware, “Ipakata no wama arakovo wo isatutiro reansaije mai. Amisyé tuna wansautan tenambe.” ³⁴ Weramu Silas po rapatimu pare no tawan no naije. ³⁵ Paulus muno Barnabas inya tavon no Antiokia. Wenanai, yaijaro vatano wanui kaijinta matavon, wo Ayao Kovo Yesu ravov muno wo vatano wanave Yesu aije manyao.

Paulus po Barnabas apaya, po Silas augav

³⁶ Masyote inta Paulus po raura nanto Barnabas ai pare, “Winde ramu rimakata no munijo namirati manasyimbe rimo Ayao Kovo Yesu ravovo raije rai jakato. Ribeker rimo wama arakovo wanave Yesu aije mapan dijati indamu rimo awa anave raen akato, wo raijar matuvea rako jewena rako?” ³⁷ Barnabas opamo beker po Yohanes Markus augav yatavon, ³⁸ weramu Paulus ponae, pare, “Mamaisyé ramu, weye nandijawe arono wana no munijo Pampila, Yohanes Markus po wama anakere rapaya yara nino ririnsaora.” ³⁹ Weti Barnabasa pe Paulusa pe yayaowi mangkebe, umba yonae yanya kava nakatowi, yara inta panya mumuimbe. Barnabas opamo po Yohanes Markus augav, isea nyomano ngkayune rai yirija no nupatimugo Siprus. ⁴⁰ Yara Paulus po Silas awainde inda tavondi ai. Umba arakovo wanave irati Yesu ai ube sambayambe yai, wo Amisyé anajo indamu Po kove raugaje

yai arono yo Apa anakere raijar. Umba yuje Antiokia raora. ⁴¹ Yanya no propinsijo Siria muno Kilikia, yo anugano Amisyé mapan dijati no naije tenambe, yo manyao indamu awa anave Yesu aije mbambunin.

16

Timotius tavondi Paulus ai

¹ Paulus muno Silas yanya ije no munijo Derbe, umba yanya akato ije no munijo Listra. Vatano panave Yesu aije inta no no naije, apa tame mirati Timotius. Apa akoya mamó vatano Yahudi wemirati manave Yesu ai to, weramu apa ajaya pamo vatano Yunani. ² Arakovo wanave Yesu aije nanawirati una no Listra muno Ikonium wo Timotius umaso aenamo vatano anuga ngko dave piye. ³ Paulus beker indamu Timotius tavondi awa unanui anya umaso rai. Weramu Paulus aemeno vatano Yahudi mansai weti po ratantona pare, “Vatan tenambe wo Timotius aen opamo be sunative jewen weye aja pamo Yunani je pa. Weti syo augav, weamo vatano Yahudi una no munijo kaijinta wonayo wo aranivi.” Maisyaré omai ti, Paulus po Timotius augav be sunative rati, umba po augav awa unanui anya rai kobe. ⁴ Muno wo nyovara wao umawe raugav, namirati Yesu apa arakovo po matutire muno akari wo anugano Amisyé maugav no Yerusalem wo awa ayao patimuge ratoe rai. Umba usisa wuje munijo we raita tetebe, wo nyovara wao ama ananyao raugaje vatane mansai indamu ubeta rai. ⁵ Maisyaré omai ti, anugano Amisyé awa anave ntubai mbambunin. Muno masyote ranteter vatano wanave Yesu ai awa wanuije miridi nseo.

Paulus nikimarive po vatano Makedonia inta aen

⁶ Anawayo Vambunine mamó mo Paulus muno apa arakove maorai indamu vemo usisa wo Ayao Kovo Yesu ravov no propinsi Asia rai jinya. Maisyaré omai ti, Paulusa pe wanya no propinsi Galatia muno Perigia obo rai. ⁷ Arono unanta mararai no Misia ama anone rai, ubeker ware usisa no propinsi Bitinia rai, weramu Anawayo Vambunine, wemirati Yesu po raugaje mai, Mo mamayaro usisa rai ramu. ⁸ Maisyaré omai ti, wo Misia raron bayave yara wanawadi kobe ti wuruta no munijo Troas. (Nai Troas umaso risyirati Lukas ritavondi arakovo Paulus ai apa unanui anya rai.)

⁹ Ama namanoe Amisyé po ana inta rarorono Paulus ai no apa nikimarije rai. Paulus po vatano Makedonia inta aen nande te no amun, panatambe nande ai pare, “Wasaemeno reansai! Wade kai no reama munijo Makedonia so rai!”

10 Paulus apa nikimarive umaso raena jewen, umba seo po raura kakavimbe reansai. Weti reamo apa nikimarije ratantona reamare ama ine mamu Amisyepo reansawain indamu reamo Ayao Kovo Yesus ravovo vatano Makedonia mansai. Weti reamanatayaube indamu reanta no Makedonia.

Lidia manave Yesus ai

11 Reamo Troas rapaya wanse a nyomano ngkayune rai, umba reamanawadi wanta no nupatimugo Samotrake. Siman akato reanta no munijo Neapolis. 12 Umba reamanyawande no munijo Pilipi. Pilipi umaso mamu pemerinta Roma mo rajar, ntami no Makedonia ama distrik manasyine rai. Reana no naije masyote inta yai.

13 Arono masyoto sambaya nande, reamunya no munije umaso ama akiri reanta no mana ama tuga rai weye reamare veravo vatano Yahudi inta wanunugambe no naije indamu ube sambayambe. Reamo wanya inta mansaen wanagan no naije, weti reamaje wantantuna reamayao nanto mansai. 14 Wanya inta no no naije ama tame mirati Lidia, ama munije mirati Tiatora. Lidia umaso mamu mo ansuno raimano nsintair ramavun no munijo Pilipi, ansune umaso ama mangke nseo rave. Muno Lidia omamo vatano mo Amisyepo asyaniv. Masyoto sambaya umaso Amisyepo Lidia ranuga rausiso indamu mo Paulus apa ayao raugasyo ntami ranuga rai ti manave rai. 15 Weti reamo Lidia muno ama yavaruga maugasya kuvuni mana rai. Ukuvunija jewen, umba Lidia mo reansawain indamu reansisa ama yavare rai. Mare, "Arakove, weapo rinaen syanave Yesus ai tugaive to. Weti syare wade watantuna reansatavon no reama yavaruga rati." Maisyare omaisy, mo reansantitidi weti reantavondi rai.

Paulus muno Silas yausiso no tanoano makovara

16 Masyote inta reanta wambe sambayambe akato no mana ama tuga umawe, naije reananta wanya inta rai. Wanya umaso mamu vatane wo rajjaro arove ti manapatambe mansai. Omamo anawayo kakaije nsiso no ranuga rai, weti ana indati nande no masyoto rijate mamu mo raen wusyimbeve. Weti vatane wo doije veano wanya umaso ravave indamu mo ana indati nande maije raura kakavimbe mansai. Umba mo doije umaso raunanto ama akarijo wo rajjaro arove mansai jakato weti awa doije manui. 17 Wanya umaso munanto Paulusa pe reansarijat mare, "Vatano nanawiso wanapatambe Amisyepo Titi Rave ai! Ude no naiso indamu wo Amisyepo apa unanuije rarorono wasai indamu wade Po wasapaya kakaije rai."

18 Masyote yanteter wanya umaso nggwain tutir. Paulus opamo po raraniv damu mamaisyepo ramu, anuga nseo majeve. Weti masyote inta arono wanya umaso nggwain akato, Paulus sakinav po raeravakare, umba po anawayo kakaijo no rai raura nanto pare, "Syoye Yesus Kristus apa tame veano nawatan. Nyusyoye wanya so raora!" Naije kobe anawayo kakaije umaso muje.

19 Weramu vatano wo wanya umaso rajjaro arove ti manapatambe mansai uparijo Paulusa pe Silasa pe yai, weye wanya umaso mo doije raugavo mai jakatoe ramu. Maisyare omai ti, wo Paulusa pe Silasa pe yaijar wo yaugaveta no munije umaso ama yasyine rai indamu vatano ube akarive munijo we rai wo mangke raugaje yai. 20-21 Arono wo yaugaveta no vatano ube akarive mansamun, wo raura ware, "Vatane so nanayamo vatano Yahudi. Yo ayao aruriate raugav ije muno yo wansanuga raugabe ti wama ana wandaene nsosobe, weti arare akoe ntipu wama munije so rai. Aya ananyao mamu mamaisyepo wama ananyao Roma rajje ramu, weti vemo wamavakananto rai jinya, yara wamo rawatambe."

22 Umba vatano wanui utavondi wanaikebe Paulus muno Silas yai. Muno vatano ube akarive munijo namije rai wo naite inta matutir inda wo aya ansuno yo rave rakanunundi yanasine raora umba wo yanepato mangkebe. 23 Wo kaipate ko yaija jewen, umba wo yatugar siso no tanoano makova rai. Umba wo naito po tanoano makova ramane atutir ware, "Nyoye yaman kobe rave yo!" 24 Naito umaso po awa ayaowe raraniv, weti po Paulus muno Silas yaugave isisa inyo no tanoano makova ama uga rai, po yajo rausiso aitamu rai.

25 Namane yasyin Paulus muno Silas ibe sambayambe muno ikinyo ransyerane rai indamu yo Amisyepo ararimbe. Vatano kai umakova tavono naije wo yanaun. 26 Kavuratawe inda mungkijo akoe inta ravari. Weti tanoano makova ama arurije ntutar bintabo. Naije kobe unsanda mpapaya taune amave muno wai besijo ransawa vatano umakova mansai mpapaya ti ntaopon. 27 Naito po tanoano makova umaso ramane pamo ami maomon ti niki. Weramu arono mungkije nande, paparo ai ti seo. Po unsanda raenamom mpapaya tenambe, weti po ratantona pare, "Aro! Somaisyepo vatano umakova unanajibe tenambe to!" Weti po apa omake rapatin pare po raveano taune aubaisy. 28 Weramu Paulusa po awaino akoeve pare, "Vemo nyoye naubaisy inya! Rean tenambe tawana so."

29 Umba naito umaso po vatane inta awain po yawainye raugavere. Umba naito umaso pavave siso no Paulusa pe Silasa

pe imakova raije rai. Beaje no yamun, jani dave ti tutar. ³⁰ Po yaugave uje umba po yanajo pare, “Injae, animaisye mirati syo rave indamu Amisye po rinapaya ayao kakaije rai?”

³¹ Umba Paulusa pe Silasa pe yo raura akananto naite umaso ai yare, “Nyanave Yesus Kristus ai, muno nya yavaruga maутan tenambe, weamo Amisye po wasapaya ayao kakaije rai tenambe.” ³² Umba yo Ayao Kovo Yesus raura kakavimbe naite umaso ai muno apa yavaruga mansai tenambe. ³³ Namane yasyino naije, naite umaso po yaugav po aya paro ranepate raomar. Muno naije kobe Paulus muno Silas yo naite umaso pe apa yavaruga nawe maugasya kuvuni mana rai tenambe. ³⁴ Umba naite umaso po yaugave usea no apa yavare rai, po anaisye raunande yo raisy. Muno wepe apa yavaruga nawe mananibe weye wanave Amisye ai to.

³⁵ Siman awatan ngkov, akarijo munije umaso wo naite inta matutir indamu wuruta wo raura naito po tanoano makova ramane umawe ai ware, “Nyo vatane jirume wato yapaya makova rai kai.” ³⁶ Weti naite umaso po raura nanto Paulus ai pare, “Soamo akarijo munije so awa ayao maje indamu risapaya. Weti ipusya ramu ita kai. Amisye tuna risautan.”

³⁷ Weramu Paulus po raura nanto naite mansai pare, “Vatane wato wo ririnsanepato vatano wanui mansamune rai muno wo ririnsatugaro soowabe siso no tanoano makova so rai! Weramu wo ririnsanajo kobe ratije ramu, yara wo mangkeye raugaje rinsai yayave! Mamaisye ramu, weye ririmamo vatano Roma nanai ririm.* Veanimaibe ware wo ririnsauguje maninimbe yayaveare somaisy? Ririmamo rimonaya! Weti taune ude rave indamu wo ririnsaneme rajjar, wea umba wo ririnsapaya!”

³⁸ Weti naite wakata, wo Paulus apa ayao umaso raura akato no akarijo munije umawe mansai. Akarije udaniv ware Paulusa pe nanayamo vatano Roma nanaya, weti ujaniv. ³⁹ Umba akarijo munije umaso ude wo Paulusa pe Silasa pe yaneme rajjar muno wo yaugave uje tanoano makova raora. Ware, “Vemo iparijo reansai jinya! Yara ita kai, ipo munije so rapaya yayave.” ⁴⁰ Weti Paulus muno Silas yo tanoano makova rapaya. Umba yirija no Lidia ama yavare rai, yo arakovo wanave Yesus aije maen no naije. Yo ayao inta raura mansai indamu manuga

mbambunin. Umba yusya munije umaso raora kobe.

17

Paulus po Ayao Kovo Yesus ravovo vatano Tesalonika mansai

¹ Paulus muno Silas yo aya unanui anya rave tutir, isisa yo munijo Ampipolis muno munijo Apolonia rapaya, umba yui kobe ti nyanta no munijo Tesalonika. Nai Tesalonika umaso vatano Yahudi awa yavaro sambaya inta no no naije. ² Paulus siso rai, weye opamo arono to no munijo rui yayave ana nsiridi ai to mammo siso no Yahudi awa yavaro sambaya rai. Masyoto sambaya mandeija mammo Paulus po Ayao Amisye veano vatane manyao no yavaro sambaya Tesalonika umaso rai tutir. ³ Pare, “Ayao Amisye mo Mesias aura mare Opamo siiri muno kakai umbawe kovakato. Syo Yesus aura kakavimbe wasai Opirati Mesias umaso.” ⁴ Vatano Yahudi inta wanave, umba utavondi Paulusa pe Silasa pe yai. Muno vatano Yunani nanawirati usambayambe vatano Yahudi mansarijat wanui inta wanave tavon. Muno wanya nanawirati awa tame nti to munije umaso wanui wanave tavon.

⁵ Weramu vatano Yahudi nanawirati wanave jewene manuga mammo mparijo Paulus muno Silas yai rave. Weti wo vatano mamun nanawirati utantuna yayave no pasari mawainde utavondi mansai. Muno wayao nsiso vatano wanui mansai weti upari rave muno warare. Umba wansansanan ti uta no Yason apa yavar, wo Paulus muno Silas yakani indamu wo yaugavuje no vatano wanui mansamun. ⁶ Weramu unanta yaije ramu, weti wo Yason muno arakovo kaijo wanave Yesus aije makarimu uje, wo maugave uta no vatano ube akarive munijo namije rai mansamun. Uparijo Paulusa pe Silasa pe yai rave weti ugwagwaimbe ware, “Vatane wato yanya yo arare raveti ntipu no mino tename so rai. Muno soamo ije no so. ⁷ Muno Yason so pirati po yaugav ti inya no apa yavar. Vatane so nanao tenambe wo Akarijo Titi Munijo Roma apa ananyao rakanyoandi weye ware akarijo titi kaijinta be akarive mai, wepirati Yesus.” ⁸ Arono vatano wanui muno akari munije umaso wo ayao umaso ranaun, manuga nseo majeve. ⁹ Umba vatano ube akarive wo Yason muno apa arakove umawe mantitidi indamu wo doije raunande. Wo raura nanto Yasona pe mai ware, “Wapare reamo doije so rasakinav akanande wasai, weamo

* **16:37** Ananyao Roma no taiso: Ranivara naite wo vatano Roma inta aijar weye wo ratantona ware po ana ngkakai rave to, weamo vemo wo anepat bayave nora, yara akarijo po ayao mamaisye rapatimu po vatano napije anajobe apa ana daveye rai wusyimbe rati.

wapo raura Paulusa pe Silasa pe yai indamu vemo yo ananyao Yesu ravovo no munije so rai jakato inya.” Umba wo Yasona pe mapaya.

Paulus po vatano Berea mansanyao

¹⁰ Arono kaumu to, umba arakovo wanave Yesu aije wavave wo Paulusa pe Silasa pe yatutir yirija no munijo Berea. Nyanta Berea umaso rai, umba ija isisa akato no vatano Yahudi awa yavaro sambaya rai. ¹¹ Vatano Yahudi una no Berea onanawamo umaya dave indamu Paulus po mansanyao. Weti usasyeo vatano Yahudi una no Tesalonika umawe mansai weye nanawije manuga matu rave, yara vatano Yahudi una no Berea manuga rausiso ti wo ananyao ranaun. Masyote anteter vatano Berea wo ananyao rakanijo Ayao Amisyae rai, ware, “Paulus apa ananyao mamaisyo Ayao Amisyae so rai tugae rako?” ¹² Vatane umaso wanui wanave Yesu ai. Muno wanya Yunani nanawirati awa tame ntiti wanui wanave, muno anaya Yunani wanui wanave tavon.

¹³ Weramu vatano Yahudi una no munijo Tesalonika wo ranaun Paulus po Amisyae apa ayao veano vatane manyao no munijo Berea. Weti wuruta no Berea, wayao nsiso vatano wanui mansai no naije. Umba vatano wanui manuga ngkakaijo Paulus ai. ¹⁴ Weti arakovo wanave Yesu aije wavave wo Paulus atutir to no mayane von, weramu Silas muno Timotius wenayamo inya tawan no Berea. ¹⁵ Arakovo nanawirati wo Paulus augave umaso wo auga tutir ava usisa no munijo Atena. Umba Paulus no no naije, yara apa arakove ware unajiv no Berea. Weti Paulus po apa ayao raura mansai pare, “Wapakata umba wapo inanamote so raura Silasa pe Timotiusa pe yai: Syare yavave ije no so.” Umba wakata kobe.

Paulus po Amisyae apa ayao raura kakavimbe no munijo Atena

¹⁶ Paulus ta no no munijo Atena po Silasa pe Timotiusa pe yanyube. Anuga nseo majewe weye po munijo we raen ama yare manui rave. ¹⁷ Weti opamo siso no vatano Yahudi awa yavaro sambaya raive, po Ayao Kovo Yesu ranyaube irati vatano Yahudi mansai, muno vatano Yunani nanawirati wo Amisyae asyanive mansai tavon. Muno masyote yanteter po raura nanto tavono vatano rui yavave mansai arono pananave no pasari. ¹⁸ Vatano Yunani varore inta awa anave rawaino Epikuros muno varoro kaijinta mawaino Estoa. Kuruno Epikuros muno kuruno Estoa nanawe, Paulusa pe wayao ensemble.

Umba kurune inta wo Paulus aura ware, “Vatane wato payao umandija! Reaman-tatukambe ai!” Muno kuruno kaijinta wo Paulus aura ware, “Wandaniv po vatan inta no no naumo warae aura pare apa vambunine manakoe rave, weti beker pamwambeaje ai. Weramu apa vatano titi rave sasyeo wama vatano titi rave mai, weti vemo wambeaje apa ai nora!” Wo raura taije maisy weye wo Paulus araniv po ayao Yesu muno Apa kovakato raura.

¹⁹ Weti vatano Yunani umaso wo Paulus auga wuruta no Anugano Areopagus awa wanunugambe raije rai. Umba wo Paulus anajo ware, “Ananyaowe so nggwanin ti reamare nyo raura kakavimbe reansai indamu reandanaun. ²⁰ Nya ananyao nyo raugave ndeye so reamo ranaun nsasye rave reama anave rai. Weti nyo raura kai indamu mbaro reansai.” ²¹ (Vatano Atena nawe, vatano marano ube munive no Atena nawe, umayaro ananyao nggwanin rai. Weti masyote yanteteramo wo raraniv muno wayao dai.)

²² Maisyare omai ti, Paulus seo tet no Anugano Areopagus umaso awa yasyine rai, pare, “Vatano Atena weap! Syo wasaen weapamo wapa bekero wasambayambe manakoe. ²³ Weye arono syananave wapa munije so rai to, syo raen wapa yaro wabeaje rai omamo manui. Syo tewa orame inta raen tavon, wemirati wapo ratoe rai maisyare so: ‘Amisyae waman-tatukambe aije apa tewa mi so.’ Weti syare syo Amisyae wapantatukambe aije aura kakavimbe wasai. ²⁴ Amisyae wepirati po mine so ranari muno anakotaro ntuna no ama uga ranari tenambe. Webo pamo Akarijo be akarive naumo warae muno mine so rai. Amisyae pamo titi rave weti tuna irati yavaro sambaya vatane wo ranari raije ramu. ²⁵ Muno Amisyae pamo apa anakotare maweso Ai, weti vatane wo anakotare inta raunanto Ai kakai. Amisyae wepi po wansanawayoe raunande ti wangkove so muno Wepi po anakotaro rui yavave raunande wansai tavon. ²⁶ Wepi po vatano manasyine anari, umba vatano manasyine umaso bo aijamo Po vatane kotaro ntuna no mine vone so mamam tenambe. Umba Amisyae po matutir indamu utantuna no mine so rai tenambe. Vatane kotare awa utantuna raije ama anone mamamo Amisyae po raosor. Muno Wepi po munije ama tume noa nggwaravain dako ntumain dako, omamo Po rapatimu tenambe. ²⁷ Amisyae po anakotare umaso ratayao tenambe tai maisy weye beker vatane wo akani in-

* 17:19 Anugano Areopagus onawamo vatano ube akarive munijo Atena rai. Arono wusyinoe anugane umaso wanunugambe no pukame inta rai ama tame mirati Areopagus.

damu unanta wanave Ai. Weramu Amisyé pamo gwaravainyo wansaije ramu, yara pararaijo wansai tenambe. ²⁸ Maisyare wapa vatane inta po ratoe ramaisy pare, ‘Wepi bewar vatane wanjaisy muno wamebe wana no mine vone so.’ Muno wapa vatano kaijinta po ratoe tavon pare, ‘Wamamo Apa arikainye nawirati wam.’

²⁹ Wamamo Amisyé apa arikainye nawirati wam, weamo vemo wamo Amisyé atantona wamare Opamo maisyare yare omai nora. Vatano mansaneme nsiridi wo emasije, perakije, orame veano yare ranari, umba ware, ‘Amisyé piye.’ Weramu yaro ratotove mamo mo Amisyé amaisyé ramu! ³⁰ Wusyino wamantatukambe muno wamananepabea nene we, wambe tai mai damu Amisyé po ratore ramu. Weramu soamo Po vatan tenambe ntuna no rui rui vayave mawainde indamu usakinavo awa ayao kakaije rai. ³¹ Weye Amisyé po masyote inta rapatimu arono indati po vatan tenambe una no mine so mansanajo awa ana udave ti ngkov muno ngkakai rai. Muno ayao mamaisyé rapatimugo mai omamo Po raugaje Vatano po apatimu Ai indamu Po raijar. Vatane umaso kakai yarawe Amisyé po aijaseo kovakato indamu vatan tenambe wo raen Wepamo Vatano Amisyé po apatimu piye.”

³² Arono Paulus po ayao umaso raura pare vatan inta kakai umba kovakato, naije vatano nanawirati wo anaun inta wugoeno ai, yara kaijinta ware, “Reamare nyo ayaowe so raura akato reansai.”

³³ Umba Paulus pusyo anugane umaso raora. ³⁴ Vatane umaso inta nao utavondi Paulus apa ayaowe rai muno wanave Yesus ai. Vatan inta pirati panave apa tame mirati Dionisius, opamo ato siso tavon no Anugano Areopagus umawe rai. Muno wanya inta manave ntavon, ama tame mirati Damaris. Muno vatano kaijinta wanave tavon.

18

Paulus po Ayao Kovo Yesus raura no munijo Korintus

¹ Umba Paulus po munijo Atena umaso rapaya, seo ti poroto no munijo Korintus. ² Naije nanto vatano Yahudi inta ai, apa tame mirati Akwila. Apa anamu ama tame mirati Prisikila. Akwila umaso pamo vatano nori Pontus, weramu wepe apa anamu me inya no munijo Roma no no Italia. Arono naije Akarijo Titi Munijo Roma, apa tame mirati Klaudius, apa ayao maje indamu vatano Yahudi wuje munijo Roma raora tenambe. Weti Akwila muno apa anamu ije no munijo Korintus umaso rai kaijoe. Umba Paulusa de po

yapan no aya yavar. ³ Aya anakero yo raijare mamaisyó Paulus apa anakere rai, wemamo wo maere ama kea rakasyu indamu wo ratumijo randume rai. Maisyare omai ti, Paulus de no irati yarijat indamu wo anakere umaso raijar tenambe. ⁴ Masyoto sambaya ranteter Paulus siso no vatano Yahudi awa yavaro sambaya rai, po vatano Yahudi muno vatano Yunani mansanyao. Beker pare indamu wanave Yesus ai.

⁵ Silas muno Timotius inya no propinsijo Makedonia umba inande no Korintus umaso rai. Umba Paulus po apa anakero maere kea rakasyu rapaya vayave indamu po Ayao Kovo Yesus raura tutir. Po raura kakavimbe irati vatano Yahudi mansai pare, “Yesus opamo Mesias, wepirati Amisyé po apatimu wansai.” ⁶ Weramu vatano Yahudi onanawamo usakinav seyambe ai, muno wo aura tantunawi. Weti Paulus po kapumo nowo apa ansune raije ranepataje no mansamun indamu wo raen taune wo awa mangke ranawan. Umba pare, “Syó Amisyé apa Ayao Kove raura wasai to. Weramu waponae rai yara wapo rawatambe vayave. Maisyare omai ti, taune weapo wapa mangkeye ranawan! Soamo syó wasapaya, yara syoroto syó Amisyé apa ayao raura vatano Yahudi jewene obo mansai.”

⁷ Umba Paulus puje yara to siso no vatane inta apa yavare rai jakato. Vatano apave raije apa tame mirati Titius Yustus, opamo vatano Yahudi jeben po Amisyé asyaniv. Apa yavare ntami mamai nande irati Yahudi awa yavaro sambaya rai. ⁸ Vatano be akarive yavaro sambaya umaso rai apa tame mirati Krispus, opamo panave irati Yesus ai muno apa yavaruga mautan tenambe. Muno vatano Korintus kaijo nanawirati wo Paulus apa ananyaowe ranaun wanui rave wanave Yesus ai, umba Paulus po maugasya kuvuni mana rai.

⁹ Namane inta Paulus nikimarive. Po nikimarije umaso raen pare Amisyé Yesus po raura nande ai pare, “Vemo njaniv inya muno manin inya, yara nyo inaura tutiro vatane mansai. ¹⁰ Weye rituna nautan, muno ana mamune ma inta nande naije ramu. Weye vatano nanawirati wanave Rinai no munije so wanui rave.” ¹¹ Maisyare omai ti, Paulus no no Korintus umaso tume intai embae kaujentabo, po Amisyé apa ayao veano vatane manyao.

¹² Arono pemerinta Roma mo Galio aijaseo be gubernurive no propinsijo Akaya, naije vatano Yahudi wayao mbe intabove ti wo Paulus aijar wo augaveta no Gubernur Galio nui indamu po mangke rapatimugo ai. ¹³ Umba vatano Yahudi umaso wo anangkakivane rantuna Paulus ai no Galio amun ware, “Vatane so po vatano wanui

manuga raugabe indamu usambayambe Amisye ai sasye wama anyayo rai. Weti ngkove ramu!”

¹⁴ Paulus pare beramu payao, weramu Gubernur Galio payao wusyimbe pare, “Vatano Yahudi weap! Paulus sopamo po ayao kakaijo manakoe inta rave ramu. Muno po wama anyayao Roma inta rakanyoandije ramu. Weti syo wasaranive ramu. ¹⁵ Weramu syo raen wapa koano Yahudi mirati wapo rator nande so, weti wapayaowi ayao omane rai muno vatane awa tame rai muno anakotaro kai vayave wapayao dai. Wapa koano Yahudi obo nti syonae syo rapatimugi. Yara taune weapo rapatimu kai!” ¹⁶ Umba Galio po vatano nanawije mawatan ti wuje, yara po Paulus apaya vayave. ¹⁷ Umba vatano wanui wo Sustenes aijar. Opamo be akarive vatano Yahudi awa yavaro sambaya rai. Umba wo anepati no Galio apa kursijo titi ama uisy. Weramu Galio po mansaen bayave, yara po mansopije ramu.

Paulus pakare no Antiokia

¹⁸ Paulus no no Korintus umaso rai masyote inta yai jakato, umba po raura nanto apa arakovo wanave Yesus aije una no naije mansai pare, “Syare syakato no Siria.” Umba po munijo Korintus rapaya, muno Prisikila muno ama anap Akwila ijavondi ai. Arono ude no munijo Kengkrea, Paulus po akarivuinye rakaka bintabo indamu po apa urairije ravera mamaisi, wemirati po raokokae Amisye aijoe. Umba Paulusa pe usea nyomano ngkayune rai. ¹⁹ Unanta no munijo Epesus umba Prisikila muno Akwila yare inya no naije yara Paulus pare panya tutir. Pana panya rainy, to no vatano Yahudi awa yavaro sambaya rai. Naije Paulusa pe vatano Yahudi nawe wayao. ²⁰ Umba wo anajo ware, “Wino kai no so.” Weramu Paulus ponae nowi, ²¹ yara pare, “Amisye beker, wea umba syakare wasai.” Umba seo nyomano ngkayune rai puje Epesus umaso raora.

²² Nyomane umaso muiive yava nto nsiso no munijo Kaisarea. Naije Paulus paje, poroto no Yerusalem indamu po kove raura anugano Amisye mansai no naije. Umba poroto no munijo Antiokia no no Siria. ²³ Paulus no no Antiokia umaso rai masyote inta yai jakato. Umba puje Antiokia raora, panya no propinsijo Galatia muno Perigia. Po vatano wanave Yesus aije mapan akato, po manyao rijati indamu awa anave ntindimu, vemo mayondi jinya.

Apolos de no munijo Epesus muno Korintus indamu pananyaube

²⁴ Arono naije vatano Yahudi inta de no munijo Epesus umawe, apa tame mirati Apolos, apa munije mirati Aleksandria. Vatane umaso pamo nanto irati Ayao Amisye ama ine rai rave muno payao awa nsiridi rave. ²⁵⁻²⁶ Wusyinoe kurune inta wo Apolos umaso anyao ayao Amisy Yesus rai to. Weti arono Apolos de Epesus rai, apa anyayao po Yesus aura omamo mamai dave muno po raura anuga ntenami rautan. Arono naije po apa ayao raura vambunimbe no vatano Yahudi awa yavaro sambaya rai. Weramu arono Prisikila muno Akwila yo araniv, yo ratantona yare, “Apa anyayao mamai dainy.” Weye Apolos opamo apa ana po raene mamam Yohanes Pembaptis po vatane maugasya kuvuni mana rai obo. Weti Prisikila muno Akwila yo Apolos awainde no aya yavar, umba yo Amisye apa Unanuije raura kakavimbe ai tenambe, wemirati Amisye po ratayao indamu Po vatane mapaya awa ayao kakaije rai.

²⁷ Masyote inta umba Apolos beker poroto no propinsijo Akaya. Weti arakovo wanave Yesus ai uma una no Epesus wo nyovara waowe inta ratoe wo raveta vatano wanave una no Akaya mansai indamu wo Apolos augave siso. Umba arono de siso no naije, apa anyayao mo kove raunande vatan tenambe mai, nanawirati wanave Yesus ai weye Amisye po kove raugaje mai. ²⁸ Muno Apolosa pe vatano Yahudi nawe wayao ensemble no vatano wanuije mansamun. Apolos apa ayaowe mbambunin dave weti vatano Yahudi umamaisyo wo apa ayaowe rasakinave kakai. Po Ayao Amisye raugav, po raura pare, “Ayao Amisye so mo raroron ti mba dave wansai mare Yesus wepirati Mesias.”

19

Paulus po vatane mansanyao no Epesus

¹ Arono Apolos no no munijo Korintus umawe, Paulus opamo po unanuijo yawa rarija ti de no Epesus rai jakato. Naije nanto vatano wanave Yesus aije inta mansai. ² Umba po manajo pare, “Arono wapanaaveamo Anawayo Vambunine maje wasai rako?”

Weramu ware, “Anawayo Vambunine mamam reamantatukambe Rai.”

³ Umba Paulus pare, “Weti arepa anyayo mi wapo rijar ti wasaugasya kuvuni mana rai?”

Wo raura akananto ai ware, “Yohanes Pembaptis apa anyayo ma.”

⁴ Paulus pare, “Yohanes po vatane manyao indamu usakinavo awa ayao kakaije rai rati, umba po maugasya kuvuni mana rai. Muno po vatane

manyao tavon indamu wanave irati Vatano po Yohanes arijade Ai, wepirati Yesus.”⁵ Arono vatano Epesus wo Paulus apa ayao umaso ranauna jewen, naije ware wo rarijat. Weti arakovo wanave Yesus ai wo tamo Yesus veano maugasya kuvuni mana rai. ⁶ Umba Paulus po aneme rauseo ntamijo mansai, naije kobe Anawayo Vambunine maje irati mansai muno wo ayao antatukambe raije raura. Muno ayao Amisyende mai ti wo raura kakavimbe tavon. ⁷ Vatane umaso awa wanuije rakaraeyamo nanto no abusynara eane jirum.

⁸ Umba Paulus siso no vatano Yahudi awa yavaro sambaya rai. Embae mandei pananyaube no naije. Payao vambunimbe yara janive ramu, beker pare indamu vatano Yahudi wanave Yesus ai. Pare, “Yesus opamo Mesias, wepirati Amisyende po apatimu be akarive Apa kawasae mai no mine vone so.” ⁹ Weramu vatano Yahudi inta manuga matu, wonae wanave aiji. Weti wo Yesus apa Unanuijo Paulus po ranyaowe umaso raura tantunawi no vatano wanuije mansamun. Maisyare omai ti, Paulus po mapaya ti una. Umba po vatano wanave Yesus aije maugav wuruta no Tiranus apa yavaro sekora rai. Masyote yanteter wanunugambe no naije muno Paulus po mansanyao. ¹⁰ Pananyaube no naije tume jirum dave. Maisyare omai ti, vatano Yahudi muno vatano Yunani nanawirati una tenambe no propinsi Asia wo Ayao Kovo Yesus ranaun.

¹¹ Amisyende po vambunine raugaje Paulus ai ti po anapaporainyo manakoe raroron. ¹² Maisyare Paulus apa ansune vasye po rave mamooane raupupaisy muno apa ansuno kaijinta po rave arono po anakere raijar omamo vatane wo raugave to ntamijo vatano ughanene mansai, weamo awa yorame nsauman kobe muno anawayo kakaije inta no mai, weamo muje maora.

¹³ Arono naije anawae angkari Yahudi inta wanave usisa wuje munije raita indamu wo anawayo kakaije mawatan wusya vatane maora. Udaniv Paulus po Amisyende Yesus apa tame raura indamu po anapaporainye raroron, weti ubeker ware wo Apa tame raura tavon indamu wo anawayo kakaije mawatan. Ware, “Syo Yesus, nampirati Paulus po aura we, Apa tame veano nawatan.” ¹⁴ Syeno akokoe Yahudi inta apa tame mirati Sekewa apa arikainyo anya kaururum ware wo anawayo kakaije rawatanare somaisy. ¹⁵ Weramu masyote inta anawayo kakaije po raura akanande

mansai pare, “Yesus apa vambunine syo raen ivae, muno Paulus apa vambunine syo raen tavon. Weramu weapamo wapa vambunine mamoru? Syantatukambe waisai ti itavondi wapa ayaowe raije ramu!”¹⁶ Naije kobe vatano anawayo kakaije no aije umaso pirakusyo ti po vatane kaururume umaso marorat. Bambunin ti po awa ansune rayajami manakea rai. Weti onawamo unanaije yavaro namije raora mansanasine no kakavimbe muno pare manuijo manakea rai.

¹⁷ Arono vatano Yahudi muno vatano Yunani nanawirati una no Epesus wo ranaun, ujani dave tenambe. Muno vatane wo Amisyende Yesus apa tame raura titive. ¹⁸ Umba vatano wanave Yesus ai wanui ude wo awa ayao kakaije raura kakavimbe no vatane mansamun. ¹⁹ Vatane inta nanawirati wo nyovara kakai raugav wo raura ware, “Reamanave nyovara kakai ama vambunine rai jakatoo ramu, yara Amisyende bo apa rai.” Weti wo awa bukugo mo ayao nyovara kakai ratoo raije ranugan raugav ude, umba wo ramer aje no vatano wanuije mansamun. Bukuge umaso ama mangke ntiti rave, ratantonanamo ama doi peraki ma ribuge tename jirum eane abusyin (50.000). ²⁰ Maisyare omai ti, Ayao Kovo Yesus maneka manakoe. Mbambunin ti vatano wanui ude wanave Yesus ai.

²¹ Anakotaro ratodi umaso nandea mewen, umbawe Paulus po apa unanui anya rapatimu ai jakato, pare pakare manasyimbe no propinsi Makedonia muno propinsi Akaya, wea jewen pare pakato no Yerusalem. Pare, “Arono syoroto no Yerusalem raitoamo, ribeker syoroto no munijo Roma tavon.” ²² Po apa unanui anya so rapatimu ti po apa arakovo yanapatambe aije, aya tame mirati Timotius muno Erastus, yatutir yuisy yirija no Makedonia indamu yo anakotare ratayao wusyimbe. Weramu taune poroto rainy, yara no masyote inta yai jakato no propinsi Asia umaso rai.

Vatane wayaowi no munijo Epesus

²³ Arono naije vatane inta manuga mparijo vatano utavondijo Yesus apa Unanui raije mansai. Maisyare omai ti, arare akoo ntipu no munijo Epesus rai. ²⁴ Vatan inta apa tame mirati Demetrius pariyo Paulus ai rave. Demetriusa pe, vatano wo anakere raijaro atavone nawe, ujaeyo wo perakije veano yare ama yavare ranari momoyaimbe indamu wo ramavun. Yavare umaso mamoru wo ranariyo vatano Epesus awa amisyende Artemis ama yavaro

* **19:24** Wusyinoe vatano Epesus wo yaro manakoe inta ranari ama tame mirati Artemisa. Muno wo ama yavaro ntuna raije ranari tavon, omamo manakoe rave. Weti vatano wanui ude indamu ubeaje yaro Artemisa umaso rai no ama yavaro sambaya ama uga rai.

sambaya ranyi.* Wo yare umaso ama yavare ramavun ti mo doije ratande mansai. ²⁵ Demetrius po vatano utavondi ai ti wo yare ranari mawainde wanunugambe tenambe. Pare, “Sya arakove, syare syo raura wasai. Wapo raen wama anakere so mirati wamo doije raijaro rai ti manui. ²⁶ Soamo wapo ranaun Paulus wato po yaro vatane wo ranari raurana pare ama vambunine meweno rai ti vatane usambayambe raija marudi. Paulus apa ananyaowe umaso ngkove ramu, weramu mo vatano wanui manuga raugabe. Weti vatano una no Epesus umaso bo raije ramu, yara kavintare propinsi Asia umaso rai tenambe wanave ai to. ²⁷ Rijaniv wama anakere somamo kakaije bo mi indati mo raronto weye vatane wao no raura tantunawi. Muno wama anakere so bo raije ramu, yara wama yaro ntiti Artemisa muno ama yavaro wansambayambe rai omamo indati wo raura tantunawi tavon. Weti rijaniv Artemisa ama vambunino wamo raura titive rakanive rai. Wemaisyamo ngkove ramu, weye wamo raen vatano una no Asia so rai muno mine so rai tenambe usambayambe Artemisa rai.”

²⁸ Vatane wo Demetrius apa ayaowe ranauna jeben, naije kobe upari rave ti ugwain ware, “Vatano Epesus wama amisyo Artemisa mammo ntiti rave!” Umba wusya ugwainare so. ²⁹ Vatano wanui utavondi mansai weti wayaowije umaso maneka manakoe no munijo namije rai tenambe. Vatane umaso upari ti wo Paulus apa arakove inta yaijar. Wenayamo vatano Makedonia aya tame mirati Gayus muno Aristarkus, ijavondi Paulus apa unanui anya rai. Vatane wo yaijar, umba wavave unande usisa no munije umaso ama yavaro akoe wanugan daive rai. ³⁰ Paulus beker siso anugane umaso rai tavon indamu po ayaowe rasakinav akananto vatano wanui mansamune rai. Weramu vatano wanave Yesu aije umayare jeben, ware, “Paulus, winsiso nora!” ³¹ Muno vatan inta nanawirati ube akarive no propinsi Asia umaso rai maemeno Paulus ai tavon weye ube arakobe ti, weti wo awa ayaowe ranutu ai ware, “Paulus, vemo winsiso no ratuije nora!”

³² Vatano wanunugambe wato inta wunanta, inta wunanta, weti manuga mbe intabove jeben. Muno vatano wanui onanawamo wanepabe vayave wantatukambe animaisye mi mbewar wanuganare so. ³³ Umba wo raen vatano Yahudi wo vatan inta apa tame mirati Aleksander atugarusyo no vatano wanuije

mansamun. Wo ananyao inta raugaje Aleksander umaso ai inda po raura. Weti po aneme raijaseo vatano wanuije umaso mai, pare, “Wamanin dati ra wapo sya ayaowe raraniv.” ³⁴ Weramu vatano wanuije umaso wonae weye wo Aleksander aenamo vatano Yahudije pa.† Weti umanine ramu yara wunanta tutir. Uma amije jirum dave wunanta tutir; manamote mammo intabo rave ware, “Vatano Epesus wama amisyo Artemisa mammo ntiti rave!”

³⁵ Wunanta ava nugoenta rave. Umba akarijo munije umaso po raura aje vatano wanuije umaso mai pare, “Koto ti, wamanin dati! Vatano Epesus weap, vatan tenambe wo raen Epesus omamo munijo mo Artemis ntitiye so ama yavaro akoe raeranande miye. Muno oramo wusyin no no naumo warae ti ntemaje no mine so, wamo raugaje ntami no Artemisa ama yavare rai ntavon, weye oramo ngkakavimbe ma. ³⁶ Maisyare omai ti, vatane inta bambunin da po raura tatugadije kakai. Weti wamanin bayave! Muno koveamo wama ana wamare wandave mammo wamo ratantona wusyimbe rati! ³⁷ Wapo Gayus muno Aristarkus wato yaija to muno wapo yaugavere no so, weramu yo ana inta rave ngkakaije ramu. Yo ana inta ranaonoambe no wama yaro Artemis ama yavare raije ramu, muno yo Artemisa raura tantunawije ramu. ³⁸ Abo! Ana wapo rave tai somaisye mammo ngkove ramu! Wama munije somamo akari inta pamo no wansarijat ivae indamu wamo wama ayaowije raugavo ai, indati po ayao mamaisye rapatimugo rai. Weti ranivara Demetriusa pe, apa arakovo wo anakere raijaro atavone nawe upari ti ware vatane inta po mave tatugadi to, kove mammo wo awa ayaowije umaso raugavere kai no akarije umaso amun. ³⁹ Muno ana kaijinta wapare mamaisye ramu, weamo wapo raugavere no pemerinta apa anugano po rave rai indamu ayao daija mamaisy. ⁴⁰ Weramu vatano wanuije weap, ana wapo rave unumeso ngkove ramu. Wasivuiny muno wapunanta tutir. Maisyare omaisy, wapo Akarijo Titi Munijo Roma apa ananyao po raugaje rakanyoandi. Weti rijaniv indati po ranaun umba pariyo wansai, wea umba po wansanajo pare, ‘Animaisye mi mbe-waramo wasivuiny tai somaisy?’ Indati wamo apa ayaowe rasakinav akananto kakai.” ⁴¹ Arono akarijo munijo Epesus payaoware so mewen, umba po vatano wanuije umaso matutir indamu unajiv.

† 19:34 Vatano Yahudi onanawamo usambayambe yare raije ramu, yara usambayambe Amisye obo ai. Yara vatano Epesus onanawamo manayanambe usambayambe yare rai, weti wonae wo ayao vatano Yahudi raranivi.

20

Paulus po vatano wanave Yesus aije mapan no Makedonia muno Yunani

¹ Wayaowi unepatare umaso mewen to, umba Paulus po vatano wanave Yesus aije mawainde indamu po anyayao inta raugaje mai indamu mansanuga mbambunin. Po manyaowa jewen, umba pare, “Amisye tuna wansautan tenambe,” umba puje poroto no propinsi Makedonia. ² Umba panya no Makedonia siso puje ama varodore raita, apa anyayao manui po raugaje irati vatano wanave Yesus aije mansai indamu manuga mbambunin. Panyanare so pui ti nanto no propinsi Yunani. ³ Embae mandeij Paulus no no naije. Pare tavondi nyomano ngkayune rai to no munijo Siria, weramu daniv vatano Yahudi inta wanyinyaube ware wo aubaisy arono seo nyomane rai. Maisyare omai ti, po unanui kajjinta rapatimu pare, “Indati syakare syanya unanuijo Makedonia raito.” ⁴ Vatano nanawirati ware utavondi aije awa tame mi som: Sopater opamo vatano Berea apa aja pirati Pirus; muno Aristarkus muno Sekundus vatano Tesalonika nanaije; muno Gayus vatano Derbe piye; muno Timotius; muno Tikikus muno Tropimus vatano Asia nanaije. ⁵ Weti vatane umaso wuisy wanawadi no munijo Troas ware wo Paulus anyut. ⁶ Weramu risyirati Lukas ritavondi Paulus ai. Ono Paska mewen to, arono vatano Yahudi wo rotijio ragije mewen daije raisy. One umaso mewen, umba ririnsea nyomano ngkayune rai no munijo Pilipi. Masyote radani umba ririnande vatano uma wo ririnsanyute mansai no Troas, umba reana no Troas raija masyote kaururum.

Paulus po arikainyo kamuram kakai aijase kovakato

⁷ Minggugo namije ama masyoto manasyine rai, arakovo reamanave Yesus aije reamanunugambe indamu reamisyi tenambe. Paulus opamo po anyayao raura reansai wusyimbe. Payao ava namane yasyin, weye simanamoo pare panya akato. ⁸ Tanoano reantantuna rai ntami no yavare ama eteto mandeije rai. Tanoane umaso mamoo yawainyo raindi manui indamu mbaro rai. ⁹ Arikainyo kamurame inta apa tame mirati Eutikus tuna no tanoane umaso ama unsanda mamaune inta rai. Paulus payao nggwaravainy ti arikainye umaso amije maomon dave. Arono niki kobe, naije temasyo no waraya. Temaje raije so nggwaravain dave ti arono vatane wo aijaseoamo kakai to. ¹⁰ Paulus pasyo no mine waraya, umba paje po akepan seo. Umba po raura pare, “Vemo wasanimaumbe inya! Weye arikainye

sopamo kovakatoa!” ¹¹ Umba Paulus pakaseo no tanoano warae akato. Muno wepe apa arakovo wanave Yesus aije nawe wo rotije raporadi umba wisyi tenambe. Wisyisyu jewen, umba payao akato ava awatan ngko dave akane ntipu. Umba Paulus seo panya ti poroto kobe. ¹² Muno vatane wo arikainyo kamurame umawe augave uta no apa yavar. Kovakato to ti vatane manayanambe rave.

Paulus po ayao inta raura irati akarijo wo anugano Amisye maugave mai no Epesus

¹³ Arono naije reamare reanta no munijo Asos. Paulus panya yawa obo rai, yara apa arakove ream reansea nyomano ngkayune rai. Paulus pare, “Arono ride no Asos, indati riseo nyomane rai wasatavon.” Maisyare omaisy, reamuisy nyomane rai umba reanta no Asos. ¹⁴ Arono Paulus nande reansai no naije, seo nyomane rai reansatavon. Umba reanta no munijo Metilene. ¹⁵ Siman akato reama nyomane mo reansaugav akato umba reande no munije inta rai mararaijo nupatimugo Kios rai. Umba siman akato reande no nupatimugo Samos rai. Umba siman akato reansisa no munijo Miletus rai. ¹⁶ Miletus umaso mamoo mararai nande Epesus rai, weramu Paulus po rapatimu pare siso no Epesus raije ramu, weye ponae no masyote nggwaravain no Asia raiji. Yara beker pavave to no Yerusalem indamu tavondi Ono Pentakosta weye one ama matam akari mararai to.

¹⁷ Arono Paulus no no Miletus, po apa ayaowe ranutu irati akarijo wo anugano Amisye maugave mai no Epesus indamu ude ai no Miletus. ¹⁸ Ude ai, umba po raura mansai pare, “Wapo rinaeno sya ana syo rave rai tenambe arono manasyin risiso propinsi Asia so rai nde ava unumeso. ¹⁹ Syanapatambe Amisye ai, inanuga mamoo mpaaje vayave yara rinararinbe ramu. Inaemembe wasai ravea inami ngkaruge ntende. Weramu vatano Yahudi nanawamo wanyinyaube ware wo kakaije raugaje rinai, weti mangkeo rinai rave. ²⁰ Syo anyayao ngkov irati wasai raugaje wasai tenambe to, yara syo anyayao inta rangkokaibe wasaije ramu. Syo ayao Yesus ravovo yavare raita muno vatano wanuije mansamun. ²¹ Syo raura kakavimbe vatano Yahudi mansai to muno vatano Yunani mai tavon indamu usakinavo ayao kakaije rai muno wanave Amisy Yesus ai.

²² Soamo Anawayo Vambunine mo inatutir indamu syoroto no Yerusalem. Weramu ana inta mare nande rinai no naijeamo syo raen kobe jewen. ²³ Syo raen bayave munije kotare raita, Anawayo Vambunine mo

rarorono rinai mare indati siurije nande rinai muno rimakova. ²⁴Weti siurije nande kai, weye inanasine somamo kopa vayave ma. Yara mbe mobe mamu syo anakero Amisy Yesus po raugaje rinaije mamu syo rajjar ava mewe to. Weti syo anakere so rajjar matuve indamu syo Amisy apa Ayao Kove ravov, wemirati mo Apa kove raugavo vatane mansai.

²⁵ Sya arakove, arono rino no wapa yasyine rajjove, syo masyoto Amisy de be akarive Apa kawasae mai no mine vone so raura wasai. Weramu soamo syo raen indati wapo inae akatoe ramu. ²⁶⁻²⁷Weti masyoto unumeso syo raura kakavimbe wasai: Amisy apa bekere mamu syo inta rangkokaije wasaije ramu, yara syo raura kakavimbe wasai tenambe to. Weti are nawirati wonayo wanavei wenawamo taune wo awa mangkeye ranawan, yara risyamo kakavimbe.

²⁸ Weapamo Anawayo Vambunine mo wasatayao indamu wabe akarive anugano Amisy mai. Weti syare wapo Amisy apa anugane umaso maeranande kobe muno taune wasanuga mamu wapo raeranande tavon. Wapo maeranande maisyare vatane po apa domba maeranande wemaisy, weye Amisy po taune apa Kavo aunanto inda kakai wirati Po apa anugane maugavo amarom. ²⁹ Weramu wasyisyaube! Weye syo raen arono indati syo wasapaya ti syorotoa, umba vatano mamun ware ude usisa irati wasai. Wenanawamo maisyare makeo usivuiny unande wo domba maubaisy wemaisy. ³⁰ Muno vatano kaijo nanawirati usambayambe no wapa yasyine rajje inta indati usea usayai umba wo ayao angkari rave wasaponae. Ubeker ware wo vatano wanave Yesus aije maugaveta utavondi mai. ³¹ Maisyare omai ti, syare wasyisyaube! Wasaemen syo wasanyaowa tume mandei to. Namane rinit syo wasanyao tutir, inaemen wasai yava inami ngkaruge ntende.

³² Indati syo wasamune raen akatoe ramu, weti soamo syo wasaunanta Amisy taune nui indamu Po wasaeranande. Muno syare wasaemen irati ayao mo Apa kove raura rai. Weye Amisy wepi bambunin po wasaijase wabambunin muno Po kove raugaje wasai, omamo kovo Po ratayao Apa kawasae mansai tenambe. ³³ Risyamo inanuga ntento vatane awa ananuge inta rajje ramu, awa perakije ndako, awa emasije ndako, awa ansuno ngko dave inta rai vayave jewen. ³⁴ Wapo inae to syo anakere rajjar inaneme so rai indamu syo anaisy ramavun indamu risye sya arakovo utavondi rinaije nawe reandaisy. ³⁵ Syo raveare so indamu ibe ananuive wasai, syare koveamo

wamo anakere rajjaro panyoambe indamu wamo vatano manasine mayondi mansaeranande. Weye wasaemen irati Amisy Yesus apa ayao so rai no taiso: "Weapamo wasanayanambe arono vatane wo wapa ana wabekedaije raunande wasai, weramu Amisy anayanambe wasai arono wapo vatano kaijinta awa ana ubekedaije raunanto mai." "

³⁶ Arono Paulus payaoware soa mewe, umba wepe vatano una tenambe no nanawije wo vukane ranteter usambayambe. ³⁷ Wo Paulus aneme rajjar umba mansamune ranyinyaibe ai. Muno woyovo ai rave, ³⁸ weye po raura to pare indati wo amune raen akatoe ramu. Umba wo auga ti uta no mayane vone rai indamu Paulus seo nyomane rai.

21

Paulus poroto no Yerusalem

¹ Reamo kove raura vatane umaso mai, umba reansea nyomano ngkayune rai reamanawadi wanta no nupatimugo Kos. Umba siman akato reanta no nupatimugo Rodos, umba reamanya iridi kobe ti wananta no munijo Patara. ² No Patara umaso reamo nyomane umaso rapaya, umba reamo nyomano mare manawadi nto no munijo Penisia rakani. Reanande inta rai, weti reamakaeya rai umba reanta. ³ Nyomane mo reansaugav ava reamo nupatimugo Siprus raerasisa mararai no no ranijo reansanem ngkakai. Weramu nyomane mo reansaugav evadi ranijo wanampui raron indamu nto no Siria. Umba nyomane nande no munijo Tirus weye ananugo mo raugave mamu mare mo raveaje no naije. Weti reamamo wamaje tavon. ⁴ Umba reanta wamo vatano wanave Yesus aije mapan no naije ti reano matavon masyote kaururum. Anawayo Vambunine mo ama ayao raugaje arakove umaso mansai mare indati siurije nande Paulus ai no Yerusalem. Weti arakove umaso ware wo Paulus amavug, ware, "Wisyisyaube! Vemo nyoronto no Yerusalem inya!" ⁵ Arono masyoto reamo nyomane umawe ranyute mamai to, reamare wamanya akato. Weti arakove umaso muno awa wanya muno awa arikainy wo reansaugav tenambe wamusa no munije ama akiri wanta no mayane von. Reamui yava mayane vone rai, rean tenambe wamo vukane ranteter wansambayambe. ⁶ Reansambayambea jewen, reamo wama arakove maneme rajjar, umba reansea nyomane rai jakato muno arakove umaso unajiv no awa yavar.

⁷ Reamuje reamo munijo Tirus rapaya, umba reanande no munijo Pitolemais. Reansisa no munije wato rai, reanta wamo kove raura arakovo wanave Yesu aije mansai nanawirati una no naije. Umba reano marijat masyote intabo. ⁸ Siman akato reamanya akato wanande no munijo Kaisarea. Umba reana no Pilipus apa yavar. Pilipusa umaso pamo kuruno po Ayao Kovo Yesu ravov. Muno opamo ato siso vatane kaururum nanawirati wusyinoe anugano Amisy no no Yerusalem mo mapatimu indamu wanapatambe rai.* ⁹ Pilipus umaso apa arikainyo wanya mansano mambisy, ubaunam dainy. Wanya mambisy umaso nawamo Amisy po kovo vambunine raugaje mai indamu wo Apa ayao nde maije ravov.

¹⁰ Reana no naije masyote inta yai, umba anawae Amisy inta no no Yudea ti de no Kaisarea umaso, apa tame mirati Agabus. ¹¹ Anawae umaso de no reanui, po Paulus apa tarandine raugav. Umba po raveano taune aneme, ajoe raokokaisy, umba pare, “Wapo rinaen inajoe inaneme raokokaisy so. Maisyare so, Anawayo Vambunine mo raura mare, ‘Vatano apave tarandine so rai wepirati vatano Yahudi una no Yerusalem indati wo aokokaisy tavon, umba wo au-nanto vatano Yahudi jewene mansai.’ ”

¹² Arono reamo Amisy apa ayao Agabus po raura umaso ranaun, reansanuga mamaun. Weti reame arakovo una no Kaisarea nanawe rean tenambe reamare wamo Paulus ansopi. Weti reamare, “Arakovo Paulus, vemo nyoronto no Yerusalem inya!” ¹³ Weramu Paulus po apa ayaowe rasakinav akanande reansai pare, “Aro! Vemo wapoyovare somai nora! Mo inanuga rantaun dave ti! Yara risyamo inaneme raneka indamu siurijo nandere rina no Yerusalem wemamo syo raugav tenambe. Vatane ware wo inaijar wo inaokokaisy muno ware wo inaubaisy weye ritavondi Amisy Yesu apa tame rai, wea indati syo rawatambe jewen.” ¹⁴ Maisyare omaisy, reamo raen Paulus apa bekere matu indamu to no Yerusalem. Ponae po reama ayao rarijati, weti reamanin kobe reamare, “Koto ti, Amisy apa bekere obo mamaisy.”

¹⁵ Reana no Kaisarea umaso masyote inta yai, umba reamanatatayaube indamu reanta no Yerusalem. ¹⁶ Vatano wanave Yesu ai no Kaisarea umaso inta utavondi reansai ti wanta, umba wo reansaugav no Manason apa yavar, weye wepirati reano arijate piye. Manason umaso pamo vatano Siprus panave Yesu ai nugoenta to. ¹⁷ Reansisa no Yerusalem, arakovo wanave Yesu ai una

no naije manayanambe rave arono wo reansaen.

Paulus po Yakobus apan no Yerusalem

¹⁸ Siman akato Paulus poroto po Yakobus apan muno reantavondi ai. Akarijo wo anugano Amisy maugav una no naije tenambe tavon. ¹⁹ Paulus po kove raura mansai, umba po raura pare, “Arono syo Ayao Kovo Yesu ravovo vatano Yahudi jewene mansai, Amisy po kovo manakoe raugaje mai.” Umba po raura kakavimbe mansai tenambe.

²⁰ Akarije umaso wo Paulus apa ayao ranaun, umba wo Amisy ararimbe. Umba wo raura nanto Paulus ai ware, “Reama arakovo Paulus, nyo raen vatano Yahudi nanawirati wanave Yesu aije soamo awa wanuije nanto no ribuge manui rave. Muno wenanawamo manuga ntenami ubeta Ananyao Musa rai mavabe. ²¹ Weramu udaraniv ware nyo ananyao kaijinta raugaje vatano Yahudi una no vatano Yahudi jewene awa munije rai. Ware nyo manyao indamu wo Ananyao Musa rapaya. Muno ware nyo manyao indamu utavondi wama koano Yahudi rai jakato nora, muno nyare vemo awa arikainye utavondi sunat rai jinya. ²² Arono indati vatano nanawije wo ranaun winde no Yerusaleme so rai to, wea umba upari nai. Weti animaisy mi wamo rave indamu vemo wo nave tatugadi jinta?

²³ Reamare koveamo wintavondi reama ana wandatantona so obo rai: Soamo vatane mambisy nanawirati wo urairi raokokaisy Amisy ai to. ²⁴ Awa masyote mararai arono ware wo makarivuinye rakakar indamu wo awa urairije umaso raveti mamaisy. Weti reamare wintavondi mai wata no Yavaro Amisy rai indamu wapo wasanasine rarandom mamaisy wama Ananyao Musa rai. Muno nyo nya doije inta veano ravae indamu wo anakotare rameseo Amisy ai umba wo makarivuinye rakakar.* Maisyare somaisyamo indati vatan tenambe wo naenamo taune wintavondi Ananyao Musa rai tavon, umba ware, ‘Weti ana wamo ranauno Paulus apa ananyaowe rai omamo tugae ma jewen.’ ²⁵ Muno vatano Yahudi jeweno nanawirati nyo manyao ti wanave Yesu ai to onanawamo reamo nyovara waowe inta ratoe mai to no taiso: Reamare anaaisy rameseo irati yare rajje mamo vemo wo raisy inya. Muno maere ama mavuge mamo vemo wo raisy inya. Muno maero rakuinye rajjananto indamu ngkakai, vemo wo raisy inya weye ama mavuge ta no irati rai. Muno vemo anaerere ugavo mansai jinya.”

* 21:8 Arakov 6:1-5 * 21:24 Bilangan 6:13-21

²⁶Weti Paulus tavondi akarijo anugano Amisyé awa ayaowe umaso rai. Siman akato po vatane mambisya umawe mansaugav uta no Yavaro Amisyé rai, umba wepe wenawe wo manasine rarandom mamaisyó Ananyáo Musa rai. Umba po raura nanto syeno utantuna no Yavaro Amisyé raije mai pare, “Masyote kaururum akato umba reama masyoto reansarondome so mare mewen to ije. Indati masyoto naije reamamo nanentabo reamo maere inta raugav indamu wapo raotar wapo rameseo Amisyé ai tenambe.”

Vatano Yahudi wo Paulus aijar

²⁷Masyote kaururume kavintare nanta ama marane rai kobe. Arono naije vatano Yahudi una no propinsi Asia nanawirati ude no Yerusalem inta wo Paulus aen no no Yavaro Amisyé rai. Umba upari, weti wo vatano wanui manuga raugabe indamu wo Paulus aijar. ²⁸Ugwain ware, “Vatano Israel, wade! Vatano napiso pirati po vatano una no rui vayave mansanyáo tatugadi. Po wama Ananyáo Musa raura tantunawi muno po Yavaro Amisyé so raura tantunawi muno po vatano Israel wansaura tantunawi tavon. Soamo po vatano Yahudi jewen inta maugav ude usisa Yavaro Amisyé so rai, weti po yavaro ngkakavimbe so raveti nggwambe no Amisyé amun.” ²⁹Wo rauranare so weye umawe wo vatano Epesus inta apa tame mirati Tropimus aeno wepe Paulusa pe yanya kava no Yerusalem. Weti ware veravo Paulus po Tropimus auga ti isisa no Yavaro Amisyé ama uga rai to.

³⁰Weti umba vatano wanui una no munijo Yerusalem upari rave, ti wansansanambe ude no Yavaro Amisyé rai. Wo Paulus aijar wo akarimu usya Yavaro Amisyé raora, naije kobe vatane wo ama unsanda rauguji akanande. ³¹Vatano wanui umaso ware wo Paulus aubaisy. Arono naije ayao inta nande no naito Roma awa akarijo akoe ai mare, “Yerusalem soamo ntanamanine ramu yara ntavaea no.” ³²Naije kobe nait akari akoe umaso po naite inta maugav, awa akari matavon. Umba naite umaso wavave wansanan no vatano wanui usivuinye mansai. Arono vatano nanawirati wo Paulus anepate wo naite maeno udei, mansaneme rapaya ai.

³³Umba nait akari akoe umawe nanto po Paulus aijar. Muno po apa naite inta yatutir indamu yo waijo besije jiruma ransawa Paulus aneme rai. Umba nait akari akoe umaso po vatano wanuije umawe manajo pare, “Vatane sopamo are piye? Animaisyé mi po rave?” ³⁴Weti vatano wanui wato inta wunanta, inta wunanta muno awa ana wo raura nsasyeo kaijinta

awa rai. Unepatare so vayave ti nait akari akoe umawe nanto ayao tugae raije ramu. Maisyare omai ti, po naite inta matutir indamu wo Paulus augaveta no naite awa yavare rai vayave. ³⁵Weti naite umaso wo augav umba unande ware wo tentene raiseo. Weramu vatano wanuije ware udodorabe ubeker wo Paulus aubaisy. Weti naite wo Paulus aijaseo wo anawan bayave. ³⁶Vatano wanui wo marijat, wunanta ware, “Aubai bayave ra kakai!”

Paulus po taune aura kakavimbe

³⁷Naite umararai ware wo Paulus augave siso kobe no awa yavare rai. Weramu arono naije Paulus po raura nanto nait akari akoe umawe ai pare, “Injae, syo ana inta raura nai rako?”

Umba nait akari akoe umaso po raura akanande ai pare, “O, weti winanto ayao Yunani raija rako?! ³⁸Syo ratantona syare veravo winyamo vatano Mesir inta pirati winy, wepirati masyoto nandijawe po vatane mansano ribuge mambisya manuga raugabe indamu uta no nugo vabukane vono maninimbe, wo anaiyu ratayao wo marova rave pemerinta Roma ai. Weti vatano wepamo wepi win dako?”

³⁹Umba Paulus po raura pare, “Risya jewen. Yara risyamo vatano Yahudi pi risy. Sya munije mi Tarsus no no Kilikia. Sya munijo Tarsus omamo ama tame manakoe no mine so rai. Injae, syare winyo inamayar kai indamu syo ayao inta raura kakavimbe nanto vatano wanuije so mansai.”

⁴⁰Umba nait akari akoe umaso pare, “Nyayao kai.” Weti Paulus tet no tentene umawe rai, umba aneme raijaseo vatane mansai indamu umanin. Arono umanin, umba po raura mansaijo taune awa ayao Yahudi rai.

22

Paulus payao no vatano wanui mansamun no Yerusalem

¹Paulus pare, “Injae muno sya arakove weap tenambe, wadanide, syare syo inaura kakavimbe wasai.”

²Arono vatano wanui wo Paulus araniv po awa ayao Yahudi raura mansai, umba utanamanin bintabo.

³Paulus pare, “Risyo vatano Yahudi pi risy. Inavaki no munijo Tarsus no no Kilikia, weramu inaugavere inakum no Yerusalem so. Kuruno akoe Gamaliel po inanyao irati wama aneno wusyine awa ananyao rai indamu syo rarijat mavabe tenambe. Muno ribeke dave itavondi Amisyé ai tutir, maisyare muno sya arakove weasamai tavon no so. ⁴Arono naije syo arare veano vatano utavondijo Yesu

apa Unanui raije mave ava inta ugwenen. Muno syo anya, wanya inta mansaijar maugaveta mausisa no tanoano makova rai. ⁵ Syeno Titi muno Anugano Akari Akokoe Yahudi wo raenamo sya ana syo raura wasaije somamo tugae. Weye wewawirati wo nyovara waowe inta raunande rinai indamu syo rauga da syo raunanto arakovo Yahudi una no munijo Damsyik mansai. Nyovara wao umasae mo ayao raugaje indamu vatano wanave Yesus aije maunande rinai indamu syo mansaijar syo waije veano maokaisy syo maugavere no Yerusaleme so indamu mangke raugaje mansai.

⁶ Arono syusyo syoroto no Damsyik, masyote pa yasyin, kavuratawe varo akoe inta no no naumo warae maje mo rinaakuvi. ⁷ Naije kobe ritemaje no min, umba syo anamote inta ranaun mo rinawain mare, 'Saulus! Mbeanimaibe nyo arare veano rinave?!'

⁸ Naije syo anamote umawe rasakinav akato syare, 'Injae, are pi Winy?'

Umba anamote umawe mo raura aje akato mare, 'Risiamo Yesus, vatano Nasaret. Nyo arare veano inave wepi Risy.'

⁹ Arono naije vatano utavondi rinaije umawe wo vare umaso raen tavon, weramu wo anamote ranaune ramu.

¹⁰ Umba syo ranajo akato syare, 'Injae, animaisye mi indati syo rave?'

Umba Amisy Yesus po raura aje rinai jakato pare, 'Winseo indamu nyoronto nsiso no Damsyik. Naije indati anakero Syo ratayao da nyo raijare mamu vatan inta po raura nai.' ¹¹ Varo manakoe umawe mo inamije raveti syakakave, weti syo nuge raene ramu. Maisyare omai ti, sya arakove wo inaneme raijar wo inauga ti wansisa no Damsyik.

¹² Naije vatan inta apa tame mirati Ananias. Opamo vatano po Ananyao Musa rar-ijjat mavabe. Muno opamo vatano Yahudi una no Damsyik tenambe wo aura titive.

¹³ Ananias umaso de tet no sya awananeme rani. Umba po raura rinai pare, 'Sya arakovo Saulus, nyeraseo rati!' Naije kobe risyeraseo syo nuge raen akato muno syo Ananias aen kakavimbe. ¹⁴ Umba po raura rinai pare, 'Saulus, wama anene awa Amisy po natayao indamu nyo Apa bekere raen muno nyo Yesus aeno namije rai muno nyo anamote ranauno namarikoame rai. Yesus umaso opirati Vatano Mamai Dave piye. ¹⁵ Amisy pare indati nyo Yesus apa ayaowe ravovo vatane mansai tenambe, muno nyo ana nyo raen to muno ana nyo ranaun to raura kakavimbe mansai. ¹⁶ Maisyare omai ti, vemo winoa nugenta inya, yara soamo winseo ramu nanasine raunanto naugasyo kuvuni mana rai, muno

nyo Yesus awain indamu Po nya ayao kakaije rapaya nai.'

¹⁷ Masyote inta rai jakato syakato no Yerusalem, umba risiso no Yavaro Amisy rai indamu risambayambe. Arono risambayambe ama yasyin, maisyare rinikimarive wemaisy, syeraseo syo Amisy Yesus aen kakavimbe. ¹⁸ Muno Yesus po raura aje rinai pare, 'Nyavave nyo Yerusalem rapaya yara nyoronto! Weye vatano nanawiso ware wo Sya ayaowo nyo raura we ravakambe.'

¹⁹ Umba syo raura akananto ai syare, 'Amisy Yesus, vatane so wo raen sya bekere mo inantutu dave ti risiso syuje yavaro sambaya rai tenambe inda syo vatano wanave Yesus winaije maijar syo manepat muno syo maugaveta mausiso no tanoano makova rai. ²⁰ Muno arono vatane wo Stepanus aubai ti kakaije weye po Yesus winaura vatane mai, risiamo ritet no naije tavon, inanayanambe ana wo rave Stepanus aije rai. Muno risyi syo vatano wo aubaisye awa ansuno wo raugaje raeranande.'

²¹ Weramu Amisy Yesus po raura aje rinai jakato pare, 'Paulus, nyoronto! Weye Risyi syo natutir ti nyoronto no vatano Yahudi jeven una no gwaravainye mansai.' "

²² Vatano Yahudi wanui umaso wo Paulus apa ayaowe ranauna nsodi naije. Weramu arono pare Amisy po atutir to no vatano Yahudi jewene mansai, vatano Yahudi umaso upari rave. Weti ugwain akoeve ware, "Vemo Paulus apaya inya, weye apa kove inta inda nove ramu. Ti aubai da akanive no mine vone so." ²³ Vatano Yahudi wanui wato wunanta tutir: Wo awa ansuno raveo manakea ratatuve raugaje wo raijasea wo randadaribe. Muno wo kapume raijasea wo raavar sea no kakavin, weye manuga mparijo Paulus ai rave.

²⁴ Umba nait akari akoe umawe po ratantona pare, "Animaisye mi Paulus po raveti ngkakainoanive wirati vatano wanuije so wunantanare somaisy?" Weti po naite inta matutir wo Paulus augave sisso no awa yavar indamu wo anajobe. Pare, "Indati wapo kaijo waije veano anepat indamu wapo antitidi soowabe ra po apa ana dave ti ngkakaije raura." ²⁵ Naije kobe naite wo Paulus aneme raokokaisy umba ware ubera wo kaijo waije rave anepat, weramu Paulus payao wusyimbe. Po raura nanto nait akari no no ratuije ai pare, "Ee! Animaisye mi wapare wapo rave so?! Akarije pana po mangke inta rapatimu rinai rainy. Yara wapare wapo rinanepat wusyimbe! Mamaisy ramu! Weye risiamo vatano Roma pi risyi!"

²⁶ Nait akari nanto Paulus apa ayao so rai ti po anepate ramu, yara to po raura

akarijo akoe umawe ai pare, “Animaisye mi indati nyare nyo rave vatane wato ai? Weye wepamo vatano Roma inta piye!”

²⁷ Weti nait akari akoe umaso poroto no Paulus ai, umba po anajo pare, “Nyo raura kakavimbe: Winyamo vatano nsiso vatano Roma maije inta pi win dako?”

Muno Paulus pare, “Tugae. Vatano Roma pi risy.”

²⁸ Umba nait akari akoe po raura pare, “Syo doijo manui rave veano ravae indamu pemerinta Roma mo nyovara waowe inta raugaje rinai ti mare risiso vatano Roma mai.”

Muno Paulus pare, “Weramu risiyamo syo ravae jeben, yara ritavono vatano Roma mai arono rinano aje kai we.”

²⁹ Weti naije kobe naito uma ware wo Paulus anajobe, wansuk akiri akare ti wuje, weye wo anaun pare opamo vatano Roma pa. Muno nait akari akoe opamo jani tavon, weye Paulus opamo vatano Roma inta piye yara po aneme raokokaisyo waijo besije rai to.

Paulus tet no Anugano Akari Akokoe Yahudi mansamun

³⁰ Siman akato nait akari akoe umaso beker po raen animaisye mirati mbewar vatano Yahudi uparijo Paulus ai. Weti po syeno akokoe muno Anugano Akari Akokoe Yahudi tenambe mawainde wanunugambe. Umba po Paulus augavere tet no mansamun.

23

¹ Paulus tet no akari akokoe Yahudi mansamun po manyanyut tenambe. Umba po raura nanto mansai pare, “Sya arakove weap! Ndea unumeso risiyamo inanuga mo sya ana idave raen mare inta ngkakain-oanive no Amisye amune raije ramu.”

² Arono po raura taije maisy, Syeno Titi, apa tame mirati Ananias, po vatano usayai ti umararai Paulus ai matutir wo awa rapoam. ³ Umba Paulus po raura akananto Syeno Titi umaso ai pare, “Winyamo maisyare inyowo ama kea vone raena nyare ngko dave, weramu ama uga mamu puso nsanan dai to. Weti indati Amisye po mangke raugaje nai! Weye winyi nyare nyo mangke rapatimugo rinai mamaisyo Ananyao Musa rai, weramu taune nyo Ananyao Musa umaso rakanyoandi arono nyo vatane matutir wo rinapoam!”

⁴ Umba vatano usayai nanto Paulus atavone ware, “Wakoe! Vemo nyo Syeno Titi aura tantunawi nora!”

⁵ Umba Paulus po rasakinav akananto mai pare, “Weti opamo Syeno Titi piye dako? O, arakove, risiyamo syantukambe. Weti

vemo waparajo rinai jinya! Tugae, sya ayao umawe mamaisye ramu, weye Ananyao Musa mare, ‘Vemo vatane wo awa akar-ijo po awa munije raugave aura tantunawi nora!’”

⁶⁻⁸ Umba Paulus po anugane umaso raenamano manuga mbe intabowe jeben, weye inta usisa varoro Saduki rai yara inta nao usisa varoro Parisi rai. Vatano Saduki awa anave nsasye vatano Parisi awa rai, weye Saduki ware vatano ugwenene nawamo ukovakatoe ramu, yara Parisi ware indati ukovakato aje. Muno Saduki ware naito Amisye inta noe ramu muno anawayoe mamu mewe tavon, yara Parisi ware omamo no tenambe. Weti anugane umaso manuga mbe intabowe jeben. Naije Paulus gwain pare, “Sya arakove wai! Risiyamo vatano Parisi pi risy, muno sya injaya pamo vatano Parisi tavon. Ritet no wasamun weye inta wapare mangke raugaje rinai weye syanave syare vatano ugwenene nanawamo indati ukovakato, mamaisyo vatano Parisi awa anave rai.”

Arono Paulus po rauranare somaisy, vatano Parisi muno vatano Saduki wayaowi. Weti anugane mandamisy. ⁹ Vatane umaso warare akoeve. Kurune inta usisa varoro Parisi rai usayai, wayao panyoambe ware, “Reamamo reamo vatane so aen ana inta kakai aije jeben dave. Indako naito Amisye inta dako, anawayo inta arorono ai to rako?” ¹⁰ Ivuinye umaso manakoe iridi, weti nait akari akoe umawe janiv, pare, “Vemo vatane so wo Paulus aijare wo antantaumba siraki inta!” Weti po apa naite matutir inda waje wo Paulus aijar augave uje vatane umaso mansaora, umba wo augavere no naite awa yavare ama uga.

¹¹ Ama namanoe akato, umba Amisy Yesu de teto ararave Paulus arijat. Umba po raura aje ai pare, “Syare nanuga mbambunin! Tugae indati nyo inaura kakavimbe no munijo Roma rai, maisyare muno nyo inaura kakavimbe no Yerusalemme so rai to wemaisy.”

Vatano Yahudi wanyinyaube ware wo Paulus aubaisy

¹² Siman akato vatano Yahudi inta wanyinyaube ware wo Paulus aubaisy. Weti wo raurairive patimuve ware, “Vemo wamo anaisye raisy inya muno mana ramanam inya nao wamo Paulus aijar wamo aubai dave.” ¹³ Vatano wanyinyaube umaso awa wanuije nanto no vatane tename jirume rakivan. ¹⁴ Umba vatane umaso wuruta no syeno akokoe muno akarijo Yahudi mansai, ware, “Reamo raurairive patimuve to reamare reamo anaisye

raisye ramu muno mana ramaname ramu yava reamo Paulus aubaisy. ¹⁵ Reama Injae, reamare weape Anugano Akari Akokoe Yahudi tenambe watawondi reama bekere so rai indamu wamo Paulus aijar. Weti reamare wapo ayao ranutu irati naito Roma awa akari akoe ai indamu po Paulus augavere no wasamun akato, indati wabe ponaibe maisyare wapare wapo akani apa ana daveye rai tenambe akato. Yara reamamo reangkaokaibe reamo aman no apa unanui po raide rai. Indati pana de wasai rainyana nene yara reamo aubai no unanui omano yasyin.”

¹⁶ Weramu Paulus apa anama ama kavo po awa wanyinyaube ra wo aubaisy umaso ranaun. Weti arikainyo kamurame umaso poroto no naito awa yavar, umba siso po raura kakavimbe nanto Paulus ai. ¹⁷ Umba Paulus po nait akari inta awainde po raura ai pare, “Syare nyo arikainyo kamurame so augave to no wapa akarijo akoe ai, weye pare bekero po ana inta raura ai.”

¹⁸ Weti nait akari umaso po augave to. Umba po raura nanto apa akarijo akoe ai pare, “Paulus wepirati wamo aija ti makova umaso po inawain pare syo arikainyo kamurame so augavere no winui. Pare po ana inta raura nai.”

¹⁹ Umba nait akari akoe umaso po arikainyo kamurame umawe aneme raijar po augav. Umba po anajo mumuimbe pare, “Animaisye mi nyare nyo raura rinai?”

²⁰ Umba arikainyo kamurame umaso po raura kakavimbe nanto ai pare, “Vatano Yahudi manuga mbe intabovare ware wo nanajo indamu siman nyo Paulus augaveta no winui no awa akari akokoe mansamun, ube ponaibe ware wo akani apa ana daveye rai jakato. ²¹ Weramu vemo wintavondijo awa ana wo ranajo naije so rai jinya, weye ware wo naponae. Vatano Yahudi wanyinyaube umaso awa wanuije nanto no vatane tename jirume rakivan. Muno soamo ukaokaibe no unanuije ama tuga wo anyanyuti. Weye wo raurairive patimuve ware wo anaisye raisye ramu muno mana ramaname ramu gava wo Paulus aubai dave. Muno naisoamo wanatatayaube to, wo nanyut bayave indamu nyo Paulus augave to.”

²² Umba nait akari akoe umaso po raura aje arikainyo kamurame umaso ai pare, “Ngko to. Yara ana ndaura rinaije umaso mammo vemo nyo raura vatano kaijinta mai jinya. Winyamo manin dave!”

Naito wo Paulus augave to no Gubernur Peliks ai

²³ Umba nait akari akoe umaso po nait akarije jiruma yawainde. Umba po yatutir

pare, “Soamo ripo naito mansano ratusije rurum matayao. Muno naito usea kura rai mansano tename mandeije eane abusyir ripo matayao. Muno naito wo weyame raugav mansano ratusije rurum ripo matayao tavon. Umba wea bintabo wata no munijo Kaisarea no uma ami kaimambisy namane so. ²⁴ Syare ripo kura inta yatayao indamu yo Paulus augav. Vemo ana inta nande Paulus ai jinya, yara ripo augaveta kove bo rai to no Gubernur Peliksa nui.”

²⁵ Umba nait akari akoe umaso po nyovara waowe inta ratoe, ama ine maisyare somaisye:

²⁶ “Risyrati Klaudius Lisias, syo nyovara waowe so ratoeyo akarijo titi rave Gubernur Peliks nai. Masyote ngkov irati nai!

²⁷ Masyoto nandijawe vatano Yahudi wo vatane so, apa tame mirati Paulus, aijar kavintare wo aubaisy. Muno risye sya naito nawe reande jeven datire, wo aubaisy. Weramu syo apaya irati mansai weye syo ranaun opamo vatano Roma pa. ²⁸ Syare beker indamu syo raen animaisye mirati mbewar vatano Yahudi wanaikebe Paulus ai ware apa ana daveye ngkove ramu. Maisyare omai ti, nandijawe syo augave to no Anugano Akari Akokoe Yahudi mansamun. ²⁹ Vatano Yahudi onawamo uparijo Paulus ai weye apa ana daveye mamaisyo awa koane raije ramu. Weramu syo ana ngkakaije inta raen no aije jeven, weti syo ratantona wamo ausiso tuna no tanoano makova rai rako, wamo aubai dako, omamo mamaisye ramu. ³⁰ Naije akato umba syo ranaun vatano Yahudi wanyinyaube indamu wo Paulus aubaisy. Weti naije kobe syo atutir indamu pore no winui. Muno syo vatano wo aura tantunawi matutir indamu wo anangkakivane rantuna ai no namun.

Sya ayao nsopi no naije.

Risy,
Klaudius Lisias
no Yerusalem.”

³¹ Weti ama namanoe naito umaso wuje Yerusalem raora. Wo Paulus augav unande no munijo Antipatris, mamaisyo awa akarijo akoe apa bekere rai. ³² Siman akato naito nanawirati wanya vayave majoe rai wakare no awa yavaro naito rai no no Yerusalem, yara naito usea kura raije nanawamo wanya tutir. ³³ Unanta no munijo Kaisarea, umba wuruta no Gubernur nui. Umba wo nyovara wao umawe raunanto Gubernur ai, muno wo Paulus aunanto anem uga rai tavon. ³⁴ Arono Gubernur po nyovara wao umaso raena jeven, umba po Paulus anajo pare, “Winyamo nya munije nori ro?” Umba

Paulus po raura akananto ai pare, “Risiamo inavaki ri munijo Kilikia.”³⁵ Umba Gubernur pare, “Kova! Indati syo nakani nya ana so rai arono vatano wo naura tantunawi ude rati.” Umba po naite inta matutir indamu wo Paulus augave siso no no yavaro manakoe wemirati wusyinoe Herodes po ranarijoe ama uga rai indamu wo aman no naije.

24

Vatano Yahudi wo anangkakivane rantuna Paulus ai no Gubernur Peliks amun

¹ Masyote radani jakato umba Ananias, Syeno Titi piye, de no munijo Kaisarea, muno akarijo Yahudi inta utavondi. Muno vatano payao papirabe inta apa tame mi Tertulus de tavon. Vatan tenambe umaso wuruta no Gubernur Peliksa nui indamu wo anangkakivane rantuna Paulus ai no amun. ² Weti Gubernur Peliks po Paulus awain siso. Umba Tertulus umaso po Paulus aura tantunawijare somaisy:

“Akoee Gubernur, nya tame ntiti rave! Nya munijo nyo raijare so nsaumana nugonta rave to. Muno nakarikuga mba dave ti nyo anakotaro ngkakainoanive no wama munije so ranigwan ti ngkov akato vintabo. ³ Maisyare omai ti, reamo kove bo raura akarijo titi rave Gubernur Peliks nai, no arono naisoa ntoa rui vayave muno miridi nto. ⁴ Weramu reamayao nggwaravainy weamo mangkeo akarijo ntiti winai. Weti reamare nyo reama ana wamo raura tumaimbe so raraniv.

⁵ Reamo Paulus wato aenamopo ana nsosobe raugavere wama munije rai tenambe, muno payao nsiso vatano Yahudi mansai nanawirati una no rui rui vayave no mine tename so indamu umarovave pmerinta ai. Wepamo be akarive vatano utavondi anyanyo wanyin ntipu no Nasaret rai. ⁶ Muno pare beramu po reama Yavaro Amisy ndandinit raveti nggwambe no Amisy amune rai, weti reamo aijar kobe. Reambeker reamare wamo apa mangke rapatimu mamaisyo vatano Yahudi reama anyanyo rai. ⁷ Weramu nait akari akoe Lisias de siso, po Paulus antaunuje soowabe reansaora. ⁸ Muno Lisias umaso po vatano reamparijo Paulus aije reansatutir wande no winamun. Weti, Gubernur, taune nyo Paulus anajo dati, wea indati winanto ana reamanaikebe ai rai umba nyare tugae rave.” ⁹ Umba vatano Yahudi nanawirati una no naije utavondi Tertulus apa ayao umaso rai wo raura ware, “Tugae.”

Paulus po vatano Yahudi awa ana wanaikebe ai rasakinav akananto Gubernur Peliks ai

¹⁰ Umba Gubernur Peliks po aneme veano Paulus angki indamu payao kai. Weti Paulus po raura nanto Gubernur ai pare, “Syo raen winyirati wimbe akarive muno nyo ayao mamaisyere rapatimu wama munije so rai nugonta to. Maisyare omai ti, rinanayanambe rave syo vatane wato awa ana wo rangkivano rinaije rasakinav no Gubernur namun. ¹¹ Ranivara nyare nyo vatane inta manajo, indati nyo raen sya ayao syo raura somamo tugae: Masyoto abusyin eane rurum nandijawe, risyamo syoroto no Yerusalem indamu ribe sambayambe. ¹² Muno vatano Yahudi wato wo raen risye vatane inta nawe reamayaowi no Yavaro Amisy ama uga raije ramu. Muno syo vatano wanui manugan inda syo manuga raugabe ramu, no yavaro sambaya rai rako, no rui rui vayave no Yerusalem raije ramu. ¹³ Muno ana wanaikebe rinai no winamune so ama ine inta raene ramu.

¹⁴ Weramu syo raura kakavimbe: tugae rave ribeaje reama anene awa Amisy aije mamaisyere Yesus apa Unanuije rai, wemirati vatane so wo raura ware omamo mamaisyere ramu. Muno syanave irati ayao ratoe no Ananyao Musa muno Ayao Anawae rai tenambe, maisyere vatano Yahudi no naiso mansamaisy. ¹⁵ Muno ri tavon inanave Amisy amen wepi indati Po vatano ugwenene maijasea ukovakato —vatano manuga ngkov muno vatano manuga ngkakai nao tenambe. Sya anave so mamaisyere vatano Yahudi so awa anave ramaisy, yara nsasye jewen. ¹⁶ Ribekedave indamu ibeto ana ngkove rai tutir indamu inanuga so ngkakavimbe no Amisy amun muno ngkakavimbe no vatane mansamun tavon.

¹⁷ Tume inta yai rino no Yerusaleme ramu, weramu nandijawe syakato no ratuije. Syakato weye syare syo doijo ranugane raugaveto syo raunanto sya arakovo awa ananuge meweno maije mansai, muno syare syo ana inta rameseo Amisy ai. ¹⁸ Maisyare omaisy, risiso no Yavaro Amisy rai muno syo inanasine so rarandom mamaisyere Ananyao Musa rai, naije vatano nanawiso wo inae no ratuije. Weramu vatano utavondi rinai no arono naije wanuije ramu, muno syo ana inta raveti mbe ayaube ramu, arare ntipu ma mewen davea. ¹⁹ Weramu naije vatano Yahudi una no propinsi Asia inta nao, wo sya ana syo rave no ratuije raen to. Veanimaibe irati ude no so jewen? Ranivara ware wanaikebe rinai, weamo syare ude wo raura kakavimbe naiso kai. ²⁰ Yara jewen, weamo syare vatano una no so obo nao wo raura kakavimbe kai. Weye wenanawirati utavondi Anugano Akari

Akokoe Yahudi rai no masyoto nandijawe arono ritet no mansamunoe. Weti sya ana idaveye ti ngkakaijo rui mirati wo raen no rinai? ²¹ Syo ratantona sya ayaowe intabo obo mirati wonayo wo ranauni, arono ritet no mansamunoe igwain syo raura taiso: ‘Unumeso wapare wapo mangke rapatimugo rinai weye syanave syare vatano ugwenene nawamo indati ukovakato.’”

²² Gubernur Peliks umaso pamo po ayao vatano utavondi Yesus apa Unanuije rai raen tavon to. Weti po raura nanto Paulus ai pare, “Ngkoto. Yara arono nait akari akoe Lisias indati de no so, wea umba syo nya ana no naije ranaun akato ti syo ayao mamaisye rapatimugo nai.” ²³ Umba po naite matutir indamu wo Paulus aman, muno po ananyao so raugaje naite umaso awa akarije ai pare, “Syare wapo Paulus ausiso no vayave, yara makova rave nora. Apa arakove inta ware ude wo apan wo apa ana bekedaije inta raugavere ai, weamo ude kai.”

Paulus tet no Gubernur Peliks muno apa anamu Drusila yamun

²⁴ Masyote inta yai jakato Gubernur Peliks de, apa anamu ntavondijo ai. Ama tame mirati Drusila, omamo vatano Yahudi ma. Umba Peliks po naite inta matutir wo Paulus augave uje, umba Peliks pe Drusila me yo Paulus anauno po anave Yesus Kristus aije raura kakavimbe nanto yai. ²⁵ Paulus po raura pare, “Amisye beker pare vatane wama ana wandave omamo mamai no Amune rai. Weti kove mamamo wamo taune wansaeranande wama ana wandaura rai muno wama ana wandave rai indamu vemo wamo ayao kakaije inta rave nora. Weye arono munije ama akari, Amisye indati po mangke rapatimu vatano mine so mansai.” Arono Peliks po Paulus apa ayao umaso ranaunare wemaisy, jani dave. Weti pare, “Soamo nyoronto kai. Masyoto kaijinta rako umba syo nawain akato.”

²⁶ Weti Paulus opamo ta no vayave no yavaro makovana nene. Peliks opamo beker pare Paulus po doiye inta raunanto veano avae indamu po apaya vayave. Weti susye manui po naite matutir wo Paulus augavere indamu wepe Paulusa pe yayao.

²⁷ Arono tume rumur akato, Perkius Pestus po Peliks umaso anigwan indamu po gubernur raijar akato. Arono Peliks pujeamo po Paulus auguje makova rai ramu, yara po apaya ti makova kobe tutir indamu vatano Yahudi manayanambe.

25

Paulus po ranajo indamu Akarijo Titi Munijo Roma po apa ana no aije ranaun

¹ Gubernur Pestus nande propinsi umaso rai umba masyote mandei jakato, po munijo Kaisarea rapaya poroto no munijo Yerusalem. ² Naije syeno akokoe muno akarijo Yahudi ude no Pestusa nui, wo anangkakivano no rave Paulus ai raugav wo raura nanto ai. Muno wo Pestus antitidi tutir ware, ³ “Reamare wimbekobe reansai ti nyo naite inta matutir wo Paulus augavere no Yerusaleme so.” Vatano Yahudi wo Pestus anajoare so weye wanyinyaube ra wo Paulus aubaisy no apa unanui anya ama yasyine rai. ⁴ Weramu Pestus po ayao rasakinav akananto mansai pare, “Soamo Paulus makova no munijo Kaisarea. Muno taune risyamo rino no soa nugoenta ramu yara kavintana umba syare syakato no Kaisarea umaso rai. ⁵ Weti wapare Paulus apa ana dave ti ngkakaije inta no ai, weamo wapo wapa akarije inta matutir utavondi rinai indamu wanta no Kaisarea umba syo wapa ana weapanaikebe ai ranaun no naije.”

⁶ Gubernur Pestus umaso no no Yerusalem masyote maisyare kaumandei rako abusyın akato wemaisy, umba pakare no Kaisarea. Sansiman akato Pestus seo tuna no apa kursijo titi rai, umba po naite inta matutir inda wo Paulus augavere. ⁷ Paulus siso, umba vatano Yahudi umawe, nanawirati una no Yerusalem ude, usaiyo akiani. Umba wanaikebe Paulus ai ware apa ana dave ti ngkakaije manui rave. Weramu ana wo raura umaso ama ine inta raene jeben bayave.

⁸ Umba Paulus po ayaowe rasakinav akananto pare, “Risyamo syo ana inta rave nsasyeo vatano Yahudi wama Ananyao Musa raije ramu, muno syo ana inta raveti ngkakaijo Yavaro Amisye raije ramu muno wama Akarijo Titi Munijo Roma ai tavone ramu.”

⁹ Weramu Pestus beker pare po vatano Yahudi manuga ravera ranayanambe, weti payao aje Paulus ai taiso pare, “Wimayara rako indamu nyoronto no Yerusalem indamu syo ana wanaikebe nai ranaun akato no naije rako, wirati syo ayao mamaisye rapatimu?”

¹⁰ Weramu Paulus ponae, weti po raura akananto Pestus ai pare, “Soamo ritet no namun weye winyamo vatano Akarijo Titi Munijo Roma po natayao indamu nyo ayao mamaisye rapatimugo vatane mai. Weti ritet no naiso omi mamaisy. Syo ana inta raveti ngkakaijo vatano Yahudi maije ramu, maisyare muno taune nyo raen dave to. ¹¹ Weramu ranivara winyi nyo ana

inta raen no rinai nyare syo ana ngkakaije manakoe inta rave to, weamo nyo inaubai kai. Yara ranivara vatano Yahudi nanawiso awa ana wanaikebe rinai omamo tugae ma jewen, weamo vemo vatane inta po rin-aunanto maneme uga rai jinta! Risiyamo sya bekere mamo syare syoroto no munijo Roma indamu Kaisar, wepirati Akarijo Titi Munijo Roma so rai tenambe, webo po sya ana idave ranajo. Syo raura kakavimbe wasai: ribeker riseo no Kaisar taune amun!”

¹² Weti Pestusa pe vatano utavondijo aije nawe wanugan wayao vambinibe. Wayaowa jewen, umba Pestus po raura aje Paulus ai pare, “Kova. Nyare wimbeker nseo no Kaisar, wama Akarijo Titi Munijo Roma amun, weti winto kai. Indati syo natutir nto no munijo Roma rai.”

Gubernur Pestusa pe Akarijo Titi Agripa pe yayao irati Paulus ai

¹³ Masyote inta yai jakato, umba Akarijo Titi Agripa muno Bernike ije no munijo Kaisarea umaso. Yare yo Pestus aneme rajjar weye seo gubernur rai to ti. ¹⁴ Noa masyote inta yai vavai, weti Pestus po raura nanto Akarijo Titi Agripa ai pare, “Soamo vatan inta makova arono Peliks po gubernur rajjaroe. ¹⁵ Arono rino no Yerusalem, syeno akokoe muno akarijo Yahudi wo ayao kakai udangkakivambe ma udantuna vatane umaso ai kobe, umba wo rinanajo indamu syo mangke raugaje ai. ¹⁶ Weramu syo raura nanto mai syare, ‘Maneai! Wapare syo vatane so aunande wasaneme uga rai vayave, weramu mamaisyo ananyao Roma rajje ramu. Yara vatano Roma reamamo reamo varore raugaje vatane ai wusyimbe rati indamu tet no vatano wanaikebe aije mansamun indamu po ayao weasakinavo mansai.’ ¹⁷ Weti arono ride no Kaisarea so rituna nakato ra nugoenta ramu yara siman akato riseo ituna no sya kursijo titi rai. Umba syo naite inta matutir wo vatano makova umawe augavere no rinamun. ¹⁸ Umba vatano Yahudi inta usayai indamu wanaikebe vatano makova umaso ai. Syare veravo apa ana dave mamo ngkakai rave, weramu awa ana wo raura umaso nsasyeo sya ana syo ratantona rai. ¹⁹ Yara ana mbeti uparijo Paulus ai omamo anave ama ayao wemirati awa ana udatantona nsasivu rai ti wayaowi rai muno wayaowi jirati vatane inta apa tame mirati Yesus ai. Vatane umaso wo raura ware Yesus umaso pamo kakai to, yara Paulus po raura pare Yesus opamo kovakatoa. ²⁰ Weti awa wayaowije umaso rapatimugare rui? Risiyamo rinanto ama ine rai kobe jewen. Weti syo Paulus anajo syare, ‘Wimayara rako indamu nyoronto no Yerusalem indamu wintet no

inamun syo ana wanaikebe naije ranaun akato?” ²¹ Weramu Paulus po raura pare, ‘Jewena! Yara syare rimakova tawan ava riseo ritet no Kaisar, wama Akarijo Titi Munijo Roma, taune amun indamu webo pi po ayao mamaisye rapatimugo rinai.’ Maisyare omai ti, syo naite matutir indamu wo aman ava syo augaveta no Kaisar nui.”

²² Umba Agripa po raura nanto Pestus ai pare, “Taune risy ribeker syo vatane wato anaun bayave.” Weti Pestus po raura akananto ai pare, “Siman dati umba nyo anaun aje.”

Paulus tet no Akarijo Titi Agripa muno Bernike yamun

²³ Siman akato vatano titi ware wanunugambe, weti wo awa ansuno akoe rave, umba Akarijo Titi Agripa muno Bernike isisa tanoano anugane rai. Naite awa akari ude tavon muno vatano awa tame ntiti no munijo Kaisarea umaso ude tenambe. Umba Gubernur Pestus po naite inta matutir inda wo Paulus augave siso tavon. ²⁴ Umba Pestus po raura nanto vatano wanugane umaso mansai pare, “Akarijo Titi Agripa winy muno vatano nanawiso wea tenambe, syare wapo vatane so aen! Paulus sopamo vatano Yahudi wonayo ai, nanawi una no Yerusalem muno nanawi una no so matavon tenambe. Uberaveti wunantave ware vemo apaya no vayave mo kov inta, yara aota da akanive. ²⁵ Weramu rinanto irati apa ana po raveti ngkakaije inta rajje ramu. Weti wamo mangke raugaje ai indamu kakai weamo mamaisye ramu. Muno taune po apa ayao we ranajo pare beker seo tet no wama Akarijo Titi Munijo Roma amun indamu webo po ayao mamaisye rapatimugo ai. Maisyare omai ti, syo ayao rapatimu to syare syo Paulus atutir to no munijo Roma. ²⁶ Weramu animaisye mi indati syo ratoe sya nyovara wao syare syo ranutugo Akarijo Titi Munijo Roma aije rai? Animaisye mi Paulus po raveti ngkakai indamu syo ratoe rai? Weye syo ayao kakaije inta raen no ai rainya nene. Weti syo Paulus augavere tet no akokoe weasamun tenambe, manasyin dave Akarijo Titi Agripa winy, indamu wapo apa ana daveye ranaun. Syare wamo anajobe rave indamu maweso ana syo ratoe rai. ²⁷ Weye syo ratantona syo vatano makova inta atutir to no Akarijo Titi Munijo Roma ai vayave weramu syo apa ana dave ti ngkakaije inta ratoe ramu, weaveti mamaisye ramu.”

26

Paulus po taune aura kakavimbe no Akarijo Titi Agripa amun

¹ Umba Akarijo Titi Agripa po raura aje Paulus ai pare, “Syo varore raugaje nai ti syare nyo taune naura kakavimbe kai.” Weti Paulus po aneme rajjaseo po kove raura. Umba po taune aura kakavimbe tai somaisy:

² “Akarijo Titi Agripa, risyamo rinanayanambe weye ritet no namun masyoto unumeso indamu syo vatano Yahudi awa ana wo rangkivano rinaije rasakinav tenambe. ³ Inanayanambe rave weye winyamo nyo wama koano Yahudi raen kobe tenambe. Muno arono reamayaowi jirati ananyao Yahudi inta rai, winanto ama ine rai tenambe tavon. Maisyare omai ti, mbaya rati vavai inda syo ana so raura nai.

⁴ Vatano Yahudi wo sya ana idave raen tenambe to, arono rimamaunoe rino sya munije rai yava syanakoe rino no Jerusalem. ⁵ Maisyare omai ti, wo inaena nugenta to, weti wo raen sya ana syo raura wasaije somamo tugae. Wo raenam ritavondijo ananyao Parisije rai mavabe to. Parisi awa ananyaowe mamano manui rave, mo wama varoro Yahudi kajijinta awa ananyaowe rakivan. ⁶ Akarijo Titi winy, masyoto unumeso ritet no so weye syanave Amisyepa urairije rai. Apa urairijo syo raura somamo wusyinoe Po raurairive irati wama anene mansai to, purairive pare arono munije ama akari indati Po vatano ugwenene maijasea ukovakato. ⁷ Muno Amisyepa urairije umaso omirati wama susyo Israel abusynara eane jirum wanave rai tavon. Wirati ube sambayambeve Amisyepa aijo namane rinit, weye mansanaveano Amen wepi indati Po urairije umaso ravera mamaisy. Akarijo Titi winy, risyamo syanave Amisyepa urairije umaso rai omi mbewar vatano Yahudi wo inaura tantunawi so. ⁸ Syanave syare Amisyepa indati po vatano ugwenene maijasea ukovakato. Wabeanimaibe wapare wapanave ana umaso rai kakai?

⁹ Wusyinoe ri tavon sya bekere manakoe indamu syo vatane mansopi indamu vemo wanave Yesu vatano Nasaret ai jakato inya. ¹⁰ Weti syo maorai mangkebe no Yerusalemo. Syo ayaowe rauga no syeno akokoe mai indamu syo Yesu apa kawasae wanui maugave usisa no tanoano makova rai. Muno ritavondi arono vatano Yahudi wo rapatimu ware wo mangke raugaje mai indamu ukakai. ¹¹ Masyote anteter risiso syuje yavaro sambaya raita tetebe, syo mangke raugaje vatano wanave Yesu aije mansai. Muno ribeker syare syo mansantitidi indamu wo Yesu aura tantunawi. Inanuga mamuno mansai rave, weti syoroto no munijo marane inta rai tavon indamu syo arare veano mansave no naije.”

Ayao Paulus sakinav tavondi Yesu ai

¹² “Sya bekero namije mi mbe tavonomo arono syoroto no munijo Damsyik. Arono naije syo ayaowe rauga no syeno akokoe mai indamu syo arare veano Yesu apa kawasae mansave no Damsyik. ¹³ Weramu, Akarijo Titi ko dave winy, syare syo raura kakavimbe nai, weye arono masyoto namije ama yasyin dave, syanyana unanuije ama yasyin. Arono naije risyo vare inta raen no naumo warae, ama vare manakoe ti mo uma apa vare rakivan. Maje mbaro rinakiani muno ama vare umaso mo vatano utavondi inatavone umaso makiani tavon. ¹⁴ Weti reantatayaje wantavai no mine von. Syo anamote ranaun mayao aje rinai jirati ayao Yahudi rai mare, ‘Saulus! Saulus! Mbeanimaibe irati nyo rinave tatugadi?’

¹⁵ Umba syo anamote umaso raura nakananto syare, ‘Injae, are pi Winy?’

Muno Po raura aje akato pare, ‘Risyrati Yesu nyo rinave tatugadije wepi Risy. ¹⁶ Weramu soamo winseo ntet! Ride rinaronono nai weye syare Syo napatimu indamu nyanapatambe Rinai. Syare ana nyo raen no Rinaije unumeso wemamo nyo raura kakavimbe irati vatano kajijinta mansai. Muno ana indati Syo rarorono nai jakato no masyoto rijat wemamo nyo ravovo vatane mansai tavon. ¹⁷ Risy indati syo naorai jirati ana ngkakaijo nya vatano Yahudi ware wo rave naije rai, muno vatano Yahudi jeven ware wo rave tavono naije rai. Soamo Syo natutir inda nyoronto no vatano Yahudi jewene mansai. ¹⁸ Syare nyo mansamije rausiso inda mbara wuje irati kaumure rai yara usisa vare rai. Wemirati syare nyo mansanyao indamu usakinavo Anakakai Akoe apa vambunine rai yara utavondijo Amisyepa bo ai. Wea indati Syo awa ayao kakaije rapaya mansai umba Syo maugave usisa Sya kawasae mai weye wanave Rinai.’

¹⁹ Maisyare omai ti, Akarijo Titi Agripa, syo ana rarorono rinai no naumo warae rawatambe ramu, yara ribeto rai kobe.

²⁰ Maisyare omaisy, syo vatane mansanyao indamu usakinav irati awa ayao kakaije rai muno wakare utavondijo Amisyepa ai, umba ubeta ana ngkove bo rai indamu mo maroron kakavimbe usakinavo awa ayao kakaije rai to. Syo ayao ravovo taije maisy no Damsyik raijo wusyin, umba Jerusalem rai jakato, umba munijo Yudea raita tenambe, nto no vatano Yahudi mansai muno vatano Yahudi jewene mansai tenambe. ²¹ Ana umaso mi mbeamo vatano Yahudi wo rinaijar no Yavaro Amisyepa ama uga muno ware ubera wo rinaubaisy. ²² Weramu ndea unumeso Amisyepa tuna rinautan tutir, wirati ritet no

naiso indamu syo ayao so raura kakavimbe vatane mansai tenambe —vatano awa tame ntiti muno vatano awa tame maje mansai tenambe. Ana syo raura somamo anakotaro Amisyé apa anawae wusyín muno Musa wo raurairive ware indati nande, yara ana kaijinta me ramu. ²³ Weye anawae muno Musa wo raurairive ware Amisyé po Mesias apatimu indamu siuri umba wepirati Vatano manasyin dave kakai yara kovakato. Wemirati Ayao Kovo raurata irati vare rai. Po vare so raugaje vatano Yahudi wansai muno raugaje vatano Yahudi jewene mansai tavon.”

²⁴ Paulus payaowa nene, naije Gubernur Pestus po rawain akoeve pare, “Wakoe! Paulus, winyamo anaivije mo navea! Nya bukugo nyo ranyaube omi ndaugabe ti ama akoeve mi anaivije mo navea!”

²⁵ Weramu Paulus po raura nakananto ai pare, “Gubernur Pestus ko dave winy, risyamo anaivije inta mo rinave ramu. Ana syo raura somamo tugae muno mamaisy. ²⁶ Akarijo Titi Agripa winy, risyamo ibambunino idaura kakavimbe nai weye nyo anakotare umaso ranaun to. Syo raen winanto rai tenambe, weye ana nande Yesus aije umaso mamó inta rangkokaiibe jewan yara vatan tenambe wo raen to. ²⁷ Akarijo Titi Agripa, winyamo nyanave tugae irati Amisyé apa anawae wusyine mansai rako? Ridatantona nyanave ivae!”

²⁸ Umba Akarijo Titi Agripa po raura aje Paulus ai pare, “Wakoe! Nyare nyavave nyo inanuga raugabe indamu syanave Yesus ai je?!”

²⁹ Paulus po raura nakananto ai pare, “Risambayambe seo Amisyé aijo wibuin naije ramu, yara vatano soamo wapo rinaranive wasai tenambe, indamu weapamo masyote mararai rako masyote nggwaravain dako weatavondi rinai inda wamanave Yesus ai kava. Tugae, syare watawondi sya anave rai, yara siurijo makova ma vemo wananta rai maisyare rinamaisy inta!”

³⁰ Umba akarijo titi umaso seo tet, muno gubernur muno Bernike muno kaijo wenaó tenambe usea usayai. ³¹ Arono wujea jewan, wo raura vambinibe mansai ware, “Paulus opamo po ana ngkakai inta rave ramu. Weti mangke manakoe maisyare aubai dako, ausiso tanoano makova rai rako, weaveti mamaisyé ramu.”

³² Muno Akarijo Titi Agripa po raura nanto Gubernur Pestus ai pare, “Vatane sopamo po ranajo indamu seo tet no Kaisar* amune rai wije, weramu jewan datire wamo apaya vayave. Weti kova to, seo no amun kai.”

27

Paulus seo nyomane rai poroto no munijo Roma

¹ Arono naije Gubernur Pestus po rapatimu pare Paulus seo nyomane rai ti poroto no munijo Roma no no propinsijo Italia rai. Weti po Paulus muno vatano kai nanawirati umakova no tanoano makova raije maunanta no nait akari Roma inta ai indamu po mansamano awa unanui anya wuruta no Roma rai. Nait akari umaso apa tame mi Yulius, opamo be akarive naito nanawirati wanapatambe Kaisar aije mai. ² Muno risyirati Lukas ritavondi awa unanui anya rai. Muno Aristarkus, vatano Makedonia apa munije mi Tesalonika, po reansarijat tavon. Umba rean tenambe wansea nyomano manakoe inta rai oma no no munijo Adramitium umba nde. Nyomane umaso mare nsiso muje munijo ntuna no propinsi Asia raita tenambe. Umba reamuje wangkayun kobe.

³ Sansimambe akato reande wansisa no munijo Sidon. Nait akari Yulius umaso anuga ngkovo Paulus ai, weti pare, “Paulus, nyoronto kai, nyo nya arakovo una no munije so mapan dati indamu wo anaisyé muno nya ana mbekedaije inta raunande nai inda nyo raugavo unanui anya so rai.” ⁴ Reana no munijo we raija jewan, umba reangkayun akato. Weramu ovaro asoneme ti reansisa gaugwambe nupatimugo Siprus ama ranijo ntanamanine rai. ⁵ Arono reanande mararaijo munijo Kilikia muno munijo Pampilia raija jewan, reamo mayane raotar bayave umba reanande no munijo Mira no no Likia. ⁶ No naije nait akari umaso po nyomano manakoe inta no no Aleksandria raen mare ngkayun da moronto no Italia. Weti po reansaugav wamakananta wantavondijo rai jakato.

⁷ Umba reangkayun akato, weramu masyote inta yai reamaneai rave. Muno reansiuri rave yava reande mararaijo munijo Kanidus rai. Reamare wamanawadi kobe, weramu ovaro panyoana nene ti reanta kakai. Weti reamo Salmone ama atume rakivanoé, wananta kobe wamo nupatimugo Kreta ama nayave ruke ransarer, weye wemirati ovaro tanamanin dai. ⁸ Umba reamampayaro raugangan. Reanta wansiuri rave, umba reansisa mampayar no raone inta rai, ama tame mirati Raono Ngko Dave, nggwaravainyo munijo Lasea raije ramu yara mararai rai.

⁹ Reamanyawa masyote manui rave ndento to muno vatano Yahudi reama masyote akoe arono reansatawandijo marore raije mewen to. Umba embayo ovarobe nande kobe. Maisyare omai ti,

* 26:32 Kaisar opamo Akarijo Titi Munijo Roma pije.

Paulus po ananyao inta raugaje pare, ¹⁰ “Sya arakove weap, wabekobe paep! Syo raen ranivara wamare wangkayun tutir, indati wananta irati ana ngkakai manakoe inta rajjaje, muno nyomane muno ananugo nyomane mo raugave indati masyo ti rakanive. Weramu weba mirati rakanive ramu, yara vatane inta wansai tavona.” ¹¹ Weramu nait akari umawe ponayo Paulus apa ananyaowe umaso rai. Yara panave vatano po nyomane umaso raparae ai muno vatano apave nyomane umaso rajje ai, weti tavondi aya ayao obo rai. ¹² Muno vatano wanui wonayo umampayar no weyi, weye arono ovare nande, raone umaso mamaisye ramu. Weti wo rapatimu ware, “Wamare wangkayun tutir damu wansisa no Peniks indamu wana no we embayo ovare so aen da deto rati.” Peniks umaso mamamo raono kaijinta mije no no nupatimugo Kreta, wemirati ovare nande siso rajje ramu yara ntanamanin bayave.

Rarene mo nyomane ranepate manakoe rave

¹³ Noa ovaro wambiraowe pakauje weramu nsansomo vayave. Weti vatano wo nyomane rajjare wo ratantona ware, “O, wama bekero wanta no Peniks omamo ma-maisy aje, weti wade ra wanta kai.” Naije wo oramo kamintuge rakarimu sea nakato inda reangkayuno nupatimugo Kreta ama nayave ruke ransarer. ¹⁴ Weramu wanta ra gwaravain dainya nene, yara ovaro akoe rave de no ranijo wanansai tetuje. ¹⁵ Weti rarene mo warea rajjakaue ti mo nyomane ranepat. Weti reambambunin inda reamanawadije ramu, yara ovare po nyomane raugav. Weti reamampayar wangki vayave ovare ai. ¹⁶ Reangkivea reanande nupatimugo mamaune inta rai, ama tame mirati Kauda. Arono reansisa mararai nupatimuge umaso ama nayave ruke rai no ranijo wanampui, umba ovare manin mamaumbe. Weti wamo nyomano tuvan uma nyomano manakoe umaso mo rakarimuge rajjaseo ntami no nyomano akoe rai indamu vemo ovare po rangkakati jinta. Weramu reamo rajjaseo wansiuri rave weye ovare bambunin ti. ¹⁷ Arono nyomano tuvane umaso rajjasea jewen, umba vatane wo waije raveano nyomano manakoe taune raokae tenambe indamu matu. Ujaniv ware, “Ovare po reansaugave wansisa Mayano Sirtis ama ruke rai, weaveti wangkikaisy nayave ruke rai. Wea indati nyomane so mangkakati aneae rai!” Maisyare omai ti, wo ayune rakapan umba ovare po nyomane raugav maneai. ¹⁸ Rarene manya tutir kobe, wetiva sansimambe ananugo nyomane mo raugave inta raepa

bayave no mayan. ¹⁹ Masyoto mandeije vatano wanapatambe anakero nyomane rajje taune wo anakotaro veano ayune rajjare raepar akato no mayan. ²⁰ Masyote anteter reamo uma aene ramu muno tume raene jewen tavon muno ovare tami tutir ti rarene akokoe. Weti reama anave wangkove rajje mamamo meweno reansai to.

²¹ Masyote inta yai raveamo vatane umaso wo anaisye inta raisye ramu, weti Paulus te no awa yasyin umba po raura pare, “Sya arakove weap! Arono manasyinoo, syo ananyao inta raura wasai syare vemo wangkayun wamuje Kreta raora inya. Weti watawondijo sya ananyao umaso rai ratire, wananta irati ana mo wansauga ti kavintare wangkakajare so muno ananuge rakaniveare so inta rajje ramu. ²² Weramu soamo syare syo raura wasai inda wasanuga mbambunin, weye wamamo indati inta kakaije ramu, yara nyomane so bo ma indati ngkakai. ²³ Weye namanoe naito Amisye inta de arorono rinai. Amisyo ribeaje aive muno apaura irati rinai, Wepirati po apa naite inta atutir de rinai. ²⁴ Umba naito Amisye umaso po raura rinai pare, ‘Paulus, mbemo njaniv inya! Weye indati winyamo ntoa nto ntet no Kaisar amun! Muno Amisye anuga ngkovo nai, weti pare vatano utavondijo nai ti wakayun wenawamo uko tenambe yara inta kakai jewen, mamaisyo nya bekere rai.’ ²⁵ Maisyare omai ti, arakove weap, syare wasanuga mbambunin! Weye risyanave Amisye ai ti ana Po raura rinaije indati nande aje. ²⁶ Weramu indati wangkikaisy nupatimuge inta ama ruke rai.”

²⁷ Masyote manui reamampapayar wangkive tutir no mayano Adria. Umba namano abusyinara eane mambisy ama namane yasyin dave vatano wo anakero nyomane rajjare inta wo raraniv ware, “O, nyomane mararai kobe ruke rai to!” ²⁸ Weti wo waije ratavukijo orame rai inda wo raugasya wo rave waro ama waravainye rataun. Muno waro ama waravainyo masyoe ama taune nanto no meterije tename jirum. Nugoenta rainya nene wo rataun akato, waro ama tauno waravainyo masyo ma meterije tenamara eane abusyin. ²⁹ Weti ujaniv ware vemo nyomane ngkikaisyo orame inta rai jinta. Weti wo oramo kamintuge mambisy raugasya no nyomane ama parae inda mo rajjar matuve. Umba ubeker ware mbabadi vavai.

³⁰ Umba vatano wo anakero nyomane rajjare wo nyomano tuvane raugasya no mayan, ware indamu wo oramo kamintuge inta raugasya no nyomano akoe ama raware warave rai tavon. Weramu wangkarive, weye awa bekero

tugae mamu ware wo nyomano tuvane raugusya inda wasya usea rai ra unanajibe vayave. ³¹ Weramu Paulus po raura nanto naite nawe awa akarije pe mansai pare, “Vemo vatane so unanajibe inya! Weye una nyomane raije jeben, indati arakove weapamo wakove ramu.” ³² Weti naite wo nyomano tuvane umaso ama waije raotar wusyin ti temasyo vayave ti ngki. Muno vatan tenambe una tawan no nyomano akoe rai.

³³ Arono akane mararaijo mare ntipugi, Paulus po ana inta raura vatane mansai ramu wisyi tenambe, pare, “Masyote abusyine eane mambisy wapo anaisye inta raisye ramu. Weye yanive no wasai ti wanove vayave, wapisisyewen. ³⁴ Weti syare soamo wapo anaisye kavinta raisy inda wabambunin akato muno vemo wajaniv akato nora. Weye Amisye pare indati wakow tenambe yara inta kakai jeben, maisyare muno wasakarivuinnye inta aumandije ramuge wemaisy.” ³⁵ Weti po rauranare wemaisya jeben, Paulus po rotije raijade umba po kove raura seo Amisye ai no mansamun tenambe. Wea jeben, umba po ratodijo mansai jakato muno wo raisy. ³⁶ Weti vatane manuga mbambunin akato muno wisyi tenambe. ³⁷ Vatano una no nyomane umaso awa wanuije nanto no ratusije jirum, abusyine kaururumara eane kaujentabo (276). ³⁸ Arono wisyisy mamai bintaboa jeben, umba wo anaisyo gandumo wo raugav no nyomane umaso raepar no mayan indamu nyomane ndaradam.

Nyomane ngkikaisyo nayave rai

³⁹ Arono uma seowa mba to, umba wera-sisa wo ruke warea raen, weramu wantatukambe muni umaso nori rui muno ama tame rui. Wo raone inta raen no warea muno ama nayave ruke ratavon. Weti wo ratantona ware, “Wamo nyomane rausisa no we rako?” ⁴⁰ Weti wo oramo kamintuge ama waije rataotar tutudi inda oramo kamintuge umaso manutu no waro. Maisyare wemai tavon, wo waijo wusyinoeara wo raveo remese raokokae da matugoe soamo wo raniku ramu ngkakavin. Umba wo ayuno ntet no raware rausea nsawa indamu ovare po ramawisy no nyomane raugave nsiso no ruke warea. ⁴¹ Weramu anyane inta no no naije weti nyomane nsiso ngkikaisyo rai. Ama raware ntami matuve nayave rai, yara ama parae mamu aneae mo ranepat akoeve ti mangkakati.

⁴² Naito una no nyomane umaso ware ubera wo vatano umakova nanawirati wo mansamane maubai wusyimbe, weye ware, “Vemo vatano umakova ujai usisa no ruke warea ti unanajibe inta!” ⁴³ Weramu

nait akari po naite umaso mansopi jirati awa bekere so rai weye aemeno Paulus ai ti. Weti po vatano ujai kobe matutir inda usasopato wusyimbe no mayan ujai usisa no ruke warea. ⁴⁴ Umba vatano kaijo udijat wenanawamo wo nyomane umaso ama vasyesyewo poradije umaso inta raijar ranyi umba upondiaro rai usisa no ruke warea. Maisyare omai ti, rean bintabo wangkov ti wansisa no ruke warea.

28

Paulusa pe ude no Malta

¹ Reangkov tenambe arono reansisa no ruko warea. Umba reamo ranaun vatane ware nupatimuge so ama tame mirati Malta. ² Vatano una no nupatimuge umaso manuga ngko dave reansai rave, weti wo reansaugave sisa no awa munije rai. Muno wo taname inta raon weye maruge maje muno nuge nanayao ti reambavat. ³ Paulus opamo po nuja inta ranunugambere. Arono pare po nuja umaso rave nanto daon no taname rai rati, tawae mamune inta no rai, mo taname ama mamooe ranaun ti muje kobe, naije mo Paulus aneme ratao. ⁴ Vatano una no nupatimuge umaso wo tawae umaso raen mo Paulus aneme ratao ti nsawa matuve rai rave. Wo raura nanto mai vambinibe ware, “Wakoe! Tawae mamune mo vatano napije ataowa weti wandaen opamo po vatane inta aubai to! Pare veravo nino apa mangke raija mamaisy aje re? Omamo avara mansyan da kakai no mayane ramu ti. Weramu wama amisyo nupatimuge so mo mangke raugaje ai indamu kakai.” ⁵ Weramu Paulus po tawae umaso randarit ti ntemasyo ntami no taname ama uga, weramu anasine nJORAME ramu. ⁶ Vatano una no nupatimu umaso rai wo ratantona ware, “Tawae mamune mo vatane wato atao, weti kavinta nakato indati anasine mbambana, pare tende kakai kobe.” Weti vatane umaso wo Paulus anyanyut tutira nugote, weramu jeben, ana inta nande aije ramu. Weti awa ana wo ratantona nsasye akato, soamo wo Paulus aura ware, “Wakoe! Sopamo apa vambunine manakoe rave! Weti wandaen opamo vatan bayave pa jeben, yara vatano titi rave no no naumo warae paje no mine so rai pije.”

⁷ Mino manakoe inta mararai no re-anorijoe. Vatano apave rai apa tame mirati Pubelius. Wepirati be akarive nupatimuge umaso rai tenambe pije. Anuga ngko dave reansai weti po reansaugav ti reano arijata masyote mandei. ⁸ Arono naije Pubelius apa aja gwanen, anakea mamooe muno ate monanto po mavuge rangkarave. Weti Paulus poroto siso po aen

niki no apa tanoane uga, umba be sam-bayambe ai muno aneme rajaseo tamijo ai. Naije kobe anasino nJORAME umaso nsauman. ⁹ Anapaporainye umaso mbe-waramo vatano ugwanen ti una no nupatimuge umaso ude tenambe no Paulusa nui, umba Amisye po saumane raugaje mai tenambe. ¹⁰ Umba vatane umaso ubekobe irati reansai. Muno wo ana reambekedaije inta raugavere indamu reandaugavo wama unanui anyai rai.

¹¹ Embae mandei reano no nupatimuge Malta umaso rajia jewen, umba reamare wangkayun akato, weti reansea nyomano kaijinta no no Aleksandria rai jakato. Nyomane umaso mammo arono embayo ovarebeyoe, mampaya tutir no nupatimuge umaso rai. Reamo yaro ratotove inta raen ntami no nyomane ama raware rai. Yare umaso ratotov maisyare irati vatano ijpume inta yamaisi, inta apa tame mirati Kastor muno inta apa tame mirati Poluksa.

Paulusa pe awa unanuijo wuje no Malta wuruta no Roma

¹² Reamo nupatimuge umaso rapaya, umba reangkayuna wanande no munijo Sirakusa. Reana no we masyote mandeij. ¹³ Umba reamuje akato reangkayun wananta no munijo Regium. Sansiman akato ovaro wambirao paje, weti re-angkayun avave ti masyote rurum umba reansisa no munijo Putioli. ¹⁴ Umba reamaje wamo nyomane rapaya. Umba reananta irati arakovo wanave Yesus ai inta mansai no munijo namije rai. Wo reansawain indamu wansisa wano mansarijat no we masyote kaururum. Umba reamanya akato ti wanta no munijo Roma. ¹⁵ Reama wansisa rainy yara ta reamanya nene, weramu reama arakovo una no Roma wo reansanauno wande so rai to. Weti arakove inta wuje wo reansorave de indamu wo reansaugav wansisa, weti inta ude wo reansanyut no munije inta ama tame mirati Wisma Mandej, muno kaijinta wo reansanyut tavon no munije ama tame mirati Pasar Apus. Arono Paulus po arakove umaso mansaen, po kove raura seo Amisye ai muno anuga mbambunin akato.

Paulus no no Roma

¹⁶ Arono reananta kobe no Roma, nait akari Roma po Paulusa auga siso no tanoano makova rajje ramu yara po apaya no vayave no yavare inta rai. Weramu po naite inta atutir po aman tutir.

¹⁷ Masyote mandei, umba Paulus po akar-ijo Yahudi una no Roma mansawainde. Wanunugambea jewen, umba Paulus po raura nanto mansai pare, "Sya arakove weap, risyo ana inta raveti ngkakaijo wama

vatano Yahudi mansaije ramu. Muno syo wama koane inta rakanyoandije ramu, namirati wamo raugav no wama aneno wusyinoe mansai. Weramu vatane wo rinaijar wo rinaunanto no akarijo Roma inta mansai no Yerusalem. ¹⁸ Umba akar-ije umaso wo inanjobe, weramu unanta ana ngkakaije inta rajio rinai ra wo in-aubaisye ma jewen. Weti ware ubeker wo rinapaya vayave. ¹⁹ Weramu vatano Yahudi onanawamo wonae, ware vemo wo rinapaya inya. Weti syare rinantu-tuabe ramu syo ranajo ra ride no so indamu rinaronon no Akarijo Titi Munijo Roma amun indamu po anaikero vatano Yahudi wo rave rinai ranaun. Weramu taune risyamo syanaikembe sya kawasae Yahudi mansaije ramu. ²⁰ Wemi mbe-war syo ranajo ramu wade rinai inda wa-mayao. Wapo waijo besije raena nsawa rinaneme rai. Syare syo raura kakavimbe wasai: rimakova so weye syanave Mesias ai, wepirati kawasae Yahudi wan tenambe wansanaveano Amembe pije."

²¹ Umba akarijo Yahudi wo raura nanto Paulus ai ware, "Reamamo wa-mantatukambe animaisye mi mbewa ti wimakovave, weye nyovara wao mo ana no naije ratoe inta no no Yudea ti nde jewen. Muno reama arakovo una no Yudea inta ude wo nya ana ndave ti ngkakai inta raura ramu. ²² Weramu reambeke dave wamare wamo nya anyayao ranaun weye reamantatukambe rai. Reamo ranaun vatano una no rui vayave wo anyayoewe umaso raura tantunawi."

²³ Weti vatane umaso nanawe Paulusa pe wo masyote inta rapatimu indamu wanunugambe akato. Masyote naije vatano wanui rave ude no Paulusa nui no apa norije rai, umba po mansanyao awata-noe yava namandi rave. Apa anyayao po raugaje mai pare Amisye de be akarive Apa kawasae mai no mine vone so rai, muno Yesus opirati Ananyao Musa muno Ayao Anawae wo aurairive no wusyinoe. Weye Paulus beker indamu vatane umawe wanave irati Yesus ai. ²⁴ Weti inta nawirati wanave Paulus apa ayaowe rai, yara inta nao wanave jewen. ²⁵ Umba vatano Yahudi wanugande umaso wayaowi, manuga mbe intabove jewen. Ware wuje aora wer-amu Paulus po anyayao inta raugaje mai wusyimbe pare, "Sya arakovo Yahudi weap, wapo rinaranide! Anawayo Vambunine mo raura tugae arono wusyinoe Mo raura ti anawae Yesaya po ratoe irati vatano Yahudi wama anene mansai maisyare somaisy:

²⁶ Amisye pare,

'Nyoronto nyo raura nanto Sya vatane man-sai taiso:

Wapo Sya ana idaura raraniv, weramu
wananta raije ramu,
muno wasami mo Sya ana idave raen,
weramu wananta raije ramu.

²⁷ Weye vatane sonawamo manuga matu,
muno mamarikoame mpapakiri,
muno mamije ntatuvi.

Wonayo wo raeno mamije raiji,
wonayo wo raranivo mamarikoame
raiji,
muno wonayo manuga nanto raiji.

Wemi mbewar usakinav wakare Rinai
jewen,
weti saumane mamu Syo raunande
mansaije ramu.* ”

²⁸ Umba Paulus po raura pare, “Sya arakovo Yahudi, syo raen wapo Amisye apa Ayao Kove rawatambe, maisyare muno wapa aneno wusyine wo rawatambe obo maisy akato. Weti syare wapo idaura so ranaun: Amisye po apa kove raugaje irati vatano Yahudi jewene mansai indamu Po mapaya ayao kakaije rai, muno onawamo manayanambe wo raraniv!” ²⁹ Paulus po ayao umaso raurana jewen, umba vatano Yahudi umaso wakauje yavaro namije raora, yara wayaowi vambinibe akoeve.

³⁰ Paulus no no munijo Roma tume rorum, nowo yavaro taune po ravaibe rai. Anayanambeo vatano ude wo apane mansai rave. ³¹ Pananyaube po ananyao Amisy Yesus Kristus raura muno masyoto Amisy de be akarive Apa kawasae mai no mine vone so raije raura vatane mai tenambe. Payao vambunimbe yara janive ramu, muno vatane inta wo ansopije kakai.

Nyovara Wao Paulus Po Ratoe Anugano Amisyé Mai No ROMA

Paulus po kove raura

¹ Risyirati Paulus, syanapatambe Yesus Kristus ai, risyamo Amisyé po inapatimu muno Po inatutir indamu syo Ayao Kovo Amisyé ravov. Syo nyovara waowe so ratoe anugano Amisyé wana no Roma wasai.

² Ayao Kovo namije mamó arono wusyinoe Amisyé po raurairive ti Apa anawae wo ratoe no Ayao Amisyé rai. ³⁻⁴ Ayao Kove so mo Arikainyo Amisyé aura kakavimbe Opirati wama Amisyé Yesus Kristus. Opamo aeno anasino vatane rai weamo avaki no aneno Daud apa susyè rai. Weramu aeno Apa ana no aije rai opamo Arikainyo Amisyé piye, weye anuga ndandinit maisyare Amisyé amaisy. Muno Amisyé po aroron kakavimbe opamo Arikainyo Amisyé apa vambunine no Ai arono Po aijaseo kovakato no wene ama uga rai. ⁵ Yesus Kristus bewaramo Amisyé po kove raugaje rinai muno Po inatutir apa anakere rai. Po inatutir indamu syo vatano Yahudi jewene mawainde tenambe indamu wanave muno ubeta Kristus ai indamu Apa tame manakoe no mine so rai. ⁶ Muno vatano wana no munijo Roma weap, Amisyé po wasawainde tavon to, weti wasisa kawasae yo Kristus apaura maije mai.

⁷ Weti syo nyovara waowe so ratoe vatano Roma wasai tenambe, wepirati Amisyé muinyo wasai muno Po wasawainde to indamu weapamo Apa kawasae nawirati weap. Syare kove muno saumane no no wama Injajo Amisyé muno Amisyé Yesus Kristus no wasautan tenambe.

Paulus beker to no munijo Roma

⁸ Manasyimbe syo kove raura seo risya Amisyé aijo wasai tenambe. Risambayambe Yesus Kristus apa tame rai, syo kove raura seo weye ridaniv vatane wo ayao wapa anave Kristus aije raura pampambe no rui vayave mine tename so rai. ⁹ Amisyé po raen risyamo inaemeno wasai rave, weye namane rinit isambayambe wasai. Amisyé opirati inanuga ntenami syanapatambe Ai, syo Apa Kavo Yesus Kristus apa Ayao Kove ravov. ¹⁰ Weti risambayambe tutir, syo Amisyé anajo indamu Po varore raugaje rinai syore syo wasapan. ¹¹ Ribekero syore syo wasaen indamu syo kove inta raunande wasai: Syare syo Anawayo

Vambunin ama kove inta ratodi wasai indamu weabambunin. ¹² Wetiwa wamo wansaijasea wambambunin kava, weye wasanuga ntubai mbambunin arono wapo sya anave raen, muno syo wapa anave raen, ribambunin.

¹³ Sya arakovo Roma weap, syare wapo sya bekero syo wasapan raen kakavimbe, weye nugoenta rave syo sya unanuijo syore wasai rapatimu, weramu ana inta mo rinaoraive ti.* Syare syo anakere rajjar no wapa yasyine rai indamu syo vatane inta maugav utavondi Kristus ai, maisyare muno syo rave no munijo kaijinta raive to. ¹⁴ Amisyé po inatutiro syo Ayao Kove ravovo vatano Yahudi jewene mansai tenambe —vatano una no kota rai muno vatano una no unate rai; vatano ube sekorave muno vatano ube sekorave jewen. ¹⁵ Wemirati mbewar ribeke dave syo Ayao Kove ravovo vatano wana no Roma wasai tavon.

Ayao Kove mamó Amisyé apa vambunine miye

¹⁶ Risyamo risamane Ayao Kove rajje ramu, weye Ayao Kove mamó Amisyé apa vambunine miye. Ayao Kove mbambunin indamu mo vatane mapaya ayao kakai rai, vatan tenambe nanawirati wanave Yesus Kristus ai —manasyimbe vatano Yahudi, weramu vatano Yahudi jewene nao tavon. ¹⁷ Weye Ayao Kove mo Amisyé apa unanuije raroron, wemi mo vatane mauga ti uma-mai no Amisyé amune rai. Apa unanuijo po ratayao wansai omirati wama anave obo ma, no manasyimbe ntoa ama marane rai. Weye wama anave obo mirati mo wansauga ti wamamai no Amisyé amune rai. Maisyare Ayao Amisyé mo ratoe mare: “Vatano nanawirati umamai no Amisyé amune rai indati ukova nuge nuganui weye wanave.”*

Amisyé po apa pari mangke raugaje vatano wo ayao kakai rave mansai

¹⁸⁻¹⁹ Amisyé po apa pari mangke raugaje irati vatano wo ayao kakai rave mansai muno vatano awa ana udave mamune mansai. Vatane umaso wo Amisyé apa ana no aije raen kakavimbe, weye Amisyé po rarorono mansai to. Weramu awa ana udave ngkakai mbewaramo wo Apa ayao tugae rawatambe. ²⁰ Vatane inta wo Amisyé aeno mansamije rai jewen, weramu arono Amisyé po nuge so ranari kaijoe ndea unumeso, Apa ana no aije mamó vatane wo raen kakavimbe no anakotaro ntuna no mine vone so muno anakotaro ntuna no naumo warae rai. Weti mawes vatane unanta Amisyé apa anabe muno

* 1:13 Arakov 19:21 * 1:17 Habakuk 2:4; Galatia 3:11

Apa vambunino noa nuge nuganuije rai no anakotar tenambe Po ranari so rai. Weti verno vatane inta po raura pare, "Amisyé no tugae rako jewena rako, syantatukambe rai," wemai nora!

²¹ Vatane wo Amisyé aen no ivae, weramu wonae wo aura Opamo Amisyó tugae pije. Wo ararimbe ramu muno wo kove raura seo Ai tavone ramu. Onawamo wantatukambe rave weye awa ana wo ratantona mamó ama ine meweno rai muno manuga mamó ngkaumudi kobe. ✧

²² Wo taune mansaura ware wenawamo vatano makarikuga mba dave, weramu onawamo vatano wantatukambe vayave nawa. ²³ Wenawamo ubeaje Amisyé opi titi rave Aije ramu, yara ubeaje awa yaro wo ranarije obo rai. Weramu awa yare no tawane ramu, yara Amisyé pamo kova nuge nuganui. Muno Amisyé pamo apa kovo ntiti no Ai, yara yare mamó ratotovo vatane mansanyi, muno ratotovo insani, tawae, maere kotar ranyi vayave.

²⁴ Wemi mbewar ti Amisyé aneme mpaya mai indamu utavondi taune awa bekero ngkakainoanive rai kai. Umba awa bekero anaerere mo mauga ti ugwambe taune manasine rai vambinibe. ²⁵ Makirive Amisyé ai ti wo Apa ayao tugae rawatambe, yara usakinav wanave ayao arurijate obo rai. Wonaé ube sambayambe muno ubeaje irati Amisyé opi po anakotar tenambe ranari Aiji, yara ubeaje irati Apa anakotaro po ranari obo rai.* Weramu Amisyé obo pi mamaisyé, ti wangkangkamambe Aija nuge nuganui. Amin.

²⁶ Maisyare wemai ti, Amisyé aneme mpaya vatane wato mai indamu utavondi awa ana manuga ntento rai raronto ti mbe samaneve mai. Wanya inta nawamo ubekero anyá maije ramu, yara manuga ntento taune awa wanya bo mansai, ti utitarive mansai. ²⁷ Muno anyá inta nawamo unaki awa wanya marijate ramu, yara anyá utitarive anyá taune mansai. Aya ana yo rave so nggwambe yai. Weti taune wo awa mangke ranawan, mamaisyó awa ana udave ngkakainoanive so rarijati.

²⁸ Wonaé wo Amisyé atantona akatowi, weti Amisyé aneme mpaya mai indamu utatayaje irati awa ana wo ratantona nggwambe raron. Maisyare wemaisyé, anakotaro rui wo rave mamó anakotaro mamaisyé ramu muno ngkove ramu. ²⁹ Vatane umaso nawamo manuga ntairijo ayao kakai kotaro rui vayave rai, maisyare so: ukakainoanive muno mamun, manuga ntantunaube muno ngkakai. Upari muno

warare, ubekero wo vatane maubaisyé, wo vatane maponae muno wo mave tatugadi. Wayao ampambe ³⁰ muno wo vatane maura tantunawi. Manuga mamuno Amisyé ai. Mansararin muno ukangkamambe taune mansai. Wo unanuije rakani tutir indamu wo anakotaro ngkakainoanive rave. Muno ubeta awa vatan anui mansai jewen. ³¹ Ana ratantona ngkov meweno mai muno ubeta awa urairi rai jewen. Muinye meweno mai muno maemeno vatane mansai mamó mewen tavon. ³² Wo Amisyé apa ayao raen ivae, wemirati mare vatano rui pi po ayao kakai umaso rave, indati Amisyé po mangke raugaje ai indamu kakai. Weramu vatane wato wo ayao kakai umaso rave tutir kobe, muno manayanambe arono vatano kaijinta wo rave tavon.

2

Amisyé po mangke rapatimu vatan tenambe mansai

¹⁻² Wamo raen Amisyé apa mangke mamó mamai dave, wemi Po rapatimugo vatano wo anakotaro ngkakai rave maisyare ratodi umawe rai. Inya, vatane weap! Win dako, are bayave inta nyare nyo vatane inta apa kakai muno apa kove rakani ai indamu nyo mangke rapatimugo ai, weamo winyamo nya nteto rai mangkiki! Weye nyo mangke rapatimu nya vatane inta ai, weamo taune winyo mangke rapatimu taune nai to ije. Weye winyo vatane wato amai tavon; anakotaro ngkakainoanive po rave mamó winyamo vatan nyo rave tavon.* ³ Weti inya, vatane winyó, winyare nyo mangke rapatimu vatane ai apa ana po rave rai, weramu winya ana nyo rave mo apa ramai tavon! Winyo rakarae nyare indati winyó mangke Amisyé rai rako? ⁴ Nya ana nyo ratantona so mamaisyé ramu! Abo, vemo wamanatatukambe nora! Amisyé atawandi wama ayao kakaije rai weye Apa kove manakoe wansai. Weramu vemo wamo Apa kovo manakoe so rawatambe nora, weye Apa kove ma daugaje indamu mo wansaugav wansakinavo wama ayao kakaije rai.

⁵ Wakoe! Weasanuga matu, waponae wasakinavo wapa ayao kakai raiji! Maisyare omaisyamo weapo mangke Amisyé ratutumbe taune wasai, weti Apa mangke indati manakoe wasai arono Apa masyoto po vatane manajo awa udave rai. Masyoto naije Amisyé apa pari mangke mamó Po raroron kakavimbe. ⁶ Indati Po mangke rapatimugo vatane nanentabo mansai mamaisyó awa ana

✧ 1:21 Epeus 4:17-18 * 1:25 Ubeaje Amisyé apa anakotaro po ranari, maisyare orame, inyoe, unate, tume ramaisyé. Muno ubeaje taune awa yaro wo ranari rai tavon. ✧ 2:1-2 Matius 7:1-2 ✧ 2:6 Mazmur 62:12; Amsal 24:12

wo rave rarijati.* 7 Vatan inta wo ana ngkove obo rave tutir, weye ubeker Amisyeye anayanambe mai muno ubeker Po maijasea titive indamu ukwa no tawan. Vatano nanawiso indati Amisyeye po kovo nuge nuganui raunande mai. 8 Weramu Amisyeye apa mangke muno Apa pariye maje irati vatano kaijinta mai, nanawirati wo taune awa mayar dai bo rakani mansai, muno wo Amisyeye apa ayao mamaisyeye rawatambe yara utavondi ayao mamun mine so obo rai tutir. 9 Vatano are nawirati wo ayao kakainoanive rave, weamo siurije indati mo mansakap muno anakotaro ngkakai nande mai—manasyimbe nande vatano Yahudi umba vatano Yahudi jewene mai tavon. 10 Yara vatano are nawirati wo ana ngkove raijar tutir, indati Amisyeye anayanambe mai ti Po maijasea titive muno Po apa kovo saumane raugaje manuga rai—manasyimbe vatano Yahudi umba vatano Yahudi jewene mai tavon. 11 Weye Amisyeye po vatane kotare inta mansamamaribe ramu,* yara Po vatano Yahudi muno vatano Yahudi jewene mansaen mamai tenambe.

12 Vatan tenambe wo ayao kakai rave, weti indati awa mangke maje mai. Vatano Yahudi onawamo Amisyeye indati po awa ayao kakai ama mangke rapatimugo mai mamaisyeye Ananyao Musa rai. Weramu vatano Yahudi jewene nawamo wo Ananyao Musa raene ramu, weti awa mangke mamamo Amisyeye po rapatimu mamaisyeye Ananyao Musa raije ramu. Yara Po mangke raugaje mai mamaisyeye awa ayao kakai rarijati. 13 Weye vatano wo Ananyao Musa raraniv bayave onawamo umamai no Amisyeye amune raije ramu. Yara vatano nanawirati ubeta Ananyao Musa rai masyote rinit wenawirati umamai no Amune rai. 14-15 Vatano Yahudi jewene wo Ananyao Musa raene jeben, weramu ranivara wo ana ngkove raen ti ubeta rai, weamo ananyao Amisyeye ntuna manuga rai to ije. Wo Ananyao Musa raene jeben bayave, weramu ranivara awa ana udave mamamo mamaisyeye Ananyao Musa mo ranyao rai, omamo mo raroron kakavimbe ananyao ntuna manuga rai to. Weye taune manuga mo awa ana udave raen inta mi ngkov, inta mi ngkakai. 16 Amisyeye apa masyoto makare umu indati Po Yesu Kristu atutir indamu Po vatane manaja awa ana udave rai. Arono naije Po mangke rapatimugo awa anakotaro ngkokaibe no manuga rai tenambe. Wemamo mamaisyeye Ayao Kovo syo ravove rai.

Vatano Yahudi wo Ananyao Musa raen dave, weramu mo maveti umamai no Amisyeye

amune raije jeben

17 Inya, sya arakovo Yahudi weap! Wakangkamambe wapare, “Reamamo vatano Yahudi, weti reamamo Amisyeye taune apa kawasae nawirati ream.” Wapanave Ananyao Musa rai weye wapo rakarae omi mo wasauga ti wamamai no Amisyeye amune rai. 18 Muno wapare wapo Apa bekere raen dave. Wapo Ananyao Musa ranyao tutir, weti anakotaro rui mi ngkov, rui mi ngkakai, wananta rai. 19 Wapo ratantona wapare weapamo wabe unanuive vatano wantatukambe Amisyeye aije mansai, onawamo maisyeye vatano mansamije ntuba mansamaisyeye weye una no kaumure rai. Wapo rakarae wasaurata irati varo mbaro mansai. 20 Muno wapo raura wapare weapamo kuruno wapo ananyao raugaje vatano nanawirati wantatukambe muno awa ana wo ratantona matu rainyeye mansai. Wapo rakarae wapo mansanyao weye wapaura Ananyao Musa rai, wemirati ayao tugae muno mamaisyeye ratoe rai tenambe.

21 Sya arakovo Yahudi weap, vemo wasararin tai mai nora! Weapamo wapare wapo vatano kaije mansanyao, yara wapo taune wasanyao ramu! Wapo ananyao raugaje wapare, “Vemo nyanaonoambe inya,” weramu wabeanimaibe taune weapanaonoambe?! 22 Muno wapo raura wapare, “Vemo wapo anaerere rave inya,” weramu wabeanimaibe taune wapo anaerere rave?! Muno wapare, “Vemo wabeaje yare rai jinya,” weramu wabeanimaibe wasisa yare ama yavare rai wapo ama ananuge raugav?! 23 Wasanuga rararin weye Ananyao Musa omamo Amisyeye po raugaje wasai to, weramu wabeanimaibe wapo Apa ananyaowe so rakanyoandi?! Wapa ana wadawe mo Amisyeye ave arikaimbe rave! 24 Maisyeye Ayao Amisyeye mo ratoe so ramaisyeye: “Vatano Yahudi weapirati wabewaramo vatano mine so wo tamo Amisyeye raura tantunawi.”*

25 Vatano Yahudi weap, wadaen koano sunat mbe rarorombe wasato sisa Amisyeye apa kawasae mai. Weti ranivara wabeta Ananyao Musa rai mavabe, weamo koano sunat omamo ngkovo wasai. Weramu ranivara wapo Ananyao Musa rakanyoandi, weamo koane umaso ama ine meweno rai. 26 Vatano Yahudi jewene nawamo utavondi sunat rai jeben. Weramu ranivara vatano Yahudi jewene inta apa ana dave ngkov mamaisyeye Ananyao Musa mo ratoe rai, wea umba Amisyeye po vatano napije aen pare opamo ato siso Apa kawasae matavon. 27 Indati vatano Yahudi jewene wato po

* 2:11 Ulangan 10:17; Arakovo 10:34 * 2:24 Yesaya 52:5; Yehezkiel 36:21-22

vatano Yahudi wapa ayao kakai raroron ti wasamane. Weye weapamo watavondi sunat rai muno Ananyao Musa omamo raugaje wasai to, weramu wapo rakanyoandi tutir. Yara vatano Yahudi jewene umawe apaura Ananyao Musa raije jeben, yara beto ama ananyao rai.

²⁸ Vatano Yahudi tugae pamo apa be Yahudive raen no anakea vone rai jeben. Weti vatano avaki susyo Yahudi rai dako, be sunativea rako, omamo Amisye po inta ratore ramu. ²⁹ Yara vatano Yahudi tugae pamo apa be Yahudive no no anuga bo rai, arono anuga mamoi mamai no Amisye amun. Muno Anawayo Vambunin wemi mo anuga raveti mamaisye, yara Ananyao Musa po ratoe wemi mo aveti mamaisya jewena. Vatano napije pamo Amisye anayanambe ai ti kangkamambe ai, weramu vatane ukangkamambe ai mi po rakanija jewena.

3

Amisye teto Apa urairije rai

¹ Maisyare omaisy, vatano Yahudi inta umamaundive rai, wo ratantona ware, “Weti wambe Yahudive ama ngkove inta no rai rako? Muno wama sunat omamo ama ngkove noare rui?” ² Umba sya ayao syo rasakinave no taiso: Tugae rave, reambe Yahudive ama ngkove manakoe rave muno nde anakotare rai tenambe. Manasyimbeamo vatano Yahudi reamirati Amisye panave reansai indamu Po apa ayao raugaje reansai.

³ Vatano Yahudi reamo urairije raokokaisyo Amisye ai to reamare reambeta Apa ayaowe rai tutir. Weramu Yahudi inta nawamo una tawan no awa urairije umaso rai jeben. Indako Amisye pamo no tawan no Apa urairi rai jeben tavon dako? ⁴ Jewen bayave! Amisye pamo no tawan no Apa urairije rai tutir. Vatan tenambe wayarurijabe, weramu Amisye pamo payarurijabe ramu muno Apa ayao mamoi no rai tugae kobe. Mamaisyo Ayao Amisye mo ratoe so rai:

“Amisyo winy, reandaen Nya ana nyo raura omamo ayao mamaisye.

Weti ranivara vatane wo nangkivan ware Nya ana ndave inta ngkove ramu, weamo Nyo mapinde tenambe, weye Nyo ayao mamaisye mi ndaura.”^{*}

⁵ Wakoe! Vatano wantatukambe ware Amisye po ayao mamaisye rapatimu jeben, wo ratantona ware, “Wama ayao kakai mamoi ama kove inta no rai. Weye ranivara wamo ayao kakai rave, weamo vatane wo Amisye apa mamaisye raen kakavimbe.

Weti ranivara wama ayao kakai mo Amisye anuga mamaisye raroron, weamo veanimaibe pariyo reansai? Apa mangke po raugaje reansai mamoi mamaisye ramu!”

⁶ Abo! Ranivara Amisye pamo po ayao mamaisye rapatimu jeben datire, indati Po mangke rapatimugo vatano mine so mansai kakai. Weramu Amisye apa ayao po rapatimu mamoi mamaisye! ⁷ Muno vatano wantatukambe wo raura tavonare so: “Wama ayao aarurijate ama kove inta no rai. Weye arono wamayarurijabe, vatane wo Amisye ararimbe ware opamo payarurijabe jeben. Weti vatane wo Amisye ararimbe tai maisy, weamo vemo Amisye pariyo wama ayao kakai rai nora!” ⁸ Ayao mamaisye jewene namije mamaisyo ayao omame so rai mare, “Wade ramu wamo ayao ngkakai rajaro wansai indamu Amisye apa kove ntipu!” Ee! Ayao umaso ngkove ramu, weramu vatan inta wo inaura tantunawi ware risyi syo ravov. Kove mamoi Amisye po mangke raugaje vatano nanawije mai!

Vatan inta mamoi no Amisye amune rai jeben bintabo

⁹ Weti sya ayao idaura maisyare so: vatano Yahudi wo vatano Yahudi jewene makivane ramu. Weye ayao kakai ama vambunine mbe akarive irati vatano Yahudi mai muno vatano Yahudi jewene mai kava, maisyare syo raura umawe rai. ¹⁰ Maisyare Ayao Amisye mo ratoe somaisy mare:

“Vatan inta mamoi no Amisye amune rai jeben bayave, intabo dako, jeben bintabo.

¹¹ Vatan inta po ana ngkove raene jeben, muno inta po Amisye akani jeben tavon.

¹² Vatan tenambe makirive Amisye ai, utavondi unanuijo ngkakai rai.

Vatan inta po ana ngkove rave ramu, vatan inta mamaisy jeben bayave.^{*}

¹³ Awa ayao muje manuga rai mamoi ngkakai, raurata irati vatane anasino kopa mandami ti mbaug no aipapo rai.

Aarurijate ntairi mansawa rai, awa ayao mamoi mamun maisyare tawae mamune ramaisy.^{*}

¹⁴ Anaamatane kapainyo mansai ntairi mawa rai.^{*}

¹⁵ Wavave wo vatane maotar wo maubaisy.^{*}

¹⁶ Uta no rui rui vayave wo siurije muno ana nsosobe raugavere.

^{*} 3:4 Mazmur 51:4 ^{*} 3:12 Mazmur 14:1-3, 53:1-3; Pengkotba 7:20 ^{*} 3:13 Mazmur 5:9, 140:3 ^{*} 3:14 Mazmur 10:7 ^{*} 3:15 Yesaya 59:7; Amsal 1:16 ^{*} 3:17 Yesaya 59:8 ^{*} 3:18 Mazmur 36:1

¹⁷ Weramu wo ayao saumane rarijate jewen weye wantatukambe rai.*

¹⁸ Muno wo Amisyey asyaniv omamo meweno mai.**

¹⁹ Ananyao Musa mamoo raugaje irati vatano Yahudi mansai, weti wandaen ama anakotar tenambe mo ratoe rai mbe akarive Yahudi mai indamu ubeta rai. Weti vemo vatan inta po raura pare, "Risiyamo ayao kakai meweno rinai," weinya! Weye vatan tenambe no mine so wo ayao kakai rave, weti indati Amisyey po mangke rapatimugo mai. ²⁰ Ananyao Musa mo vatane mauga ti umamai no Amisyey amune raije ramu, weye vatan inta po rarijat tenambe jewen bayave. Yara Ananyao Musa raugaje indamu mo wansanyao ti wamo wama ayao kakai raen kakavimbe.

Vatane umamai no Amisyey amune rai weye wanave Yesu ai

²¹⁻²² Amisyey apa unanuijo po ratayao indamu wamamai no amune rai omamo Ayao Musa muno Ayao Anawae yo raurairive to, muno soamo raroron kakavimbe no taiso: Wamanave Yesu Kristus ai, weamo Amisyey pare wamamai no Amune rai. Weramu wambeta Ananyao Musa rai omirati mo wansaveti wamamaisy oma jewen. Amisyey apa unanuije umaso mamoo Po ratayao vatan tenambe mansai. Weti vatano are nawirati wanave Yesu Kristus ai, weamo Amisyey pare umamai no Amune rai. Vatane inta sasyey ramu: Amisyey po vatan inta aena amuinyo vatano kajjinta aije ramu. ²³ Weye vatan tenambe wo ayao kakai rajjar mansai, weti ugwaravainy irati Amisyey ai muno Apa kovo nnti rai. ²⁴ Amisyey apa kove maweso vatane mai indamu Po maveti umamai no Amune rai. Po maveti umamaisy weye Yesu Kristus po mapaya ayao kakaije rai to. ²⁵ Amisyey po Kristus atutir de kakai indamu Po vatane awa ayao kakaije ama mangke ranawan, Apa mavu nsororop indamu Po awa ayao kakai rapaya mai arono wanave Ai, wirati Po maugav wakare Amisyey ai. Maisyare wemaisy, wandaen Amisyey pamo mamaisy muno Po ayao mamaisy obo rapatimu. Weye arono wusyinoe vatane wo ayao kakai rave, weamo Amisyey pavave po mangke raugaje mai jewen, yara atawandi mai. ²⁶ Weramu Amisyey animari ayao kakai umaso raije jewen, yara Po ama mangke raugaje ntuna Kristus ai indamu Po ranawan vatane mansamarom no inyo kapite rai. Weti naisoamo wandaen Amisyey pamo mamaisy weye Po mangke rapatimuga mamai dave, muno Po raura pare vatano wanave Yesu aije umamai no Amune rai.

²⁷ Maisyare omai ti, vemo wansararin nora muno wansanuga manakoeyo Ananyao Musa rai nora! Weye wambeta ama ananyaowe rai omi mbewar wamamai no Amisyey amune raije jewen. Yara wama anave Yesu Kristus aije mbewaramo wamamai no Amisyey amune rai. ²⁸ Maisyare omai ti, wamo raen: Vatane apa anave obo mi mbewar ti mamai no Amisyey amune rai, yara po Ananyao Musa rarijat weamo mamaisyey ramu.

²⁹ Indako Amisyey pamo vatano Yahudi obo awaura Ai rako? Muno Opamo muinyo Yahudi obo mansai rako? Jewena! Yara Amisyey muinyo vatano susyey kaijo mine so mai tenambe muno Opamo awa Amisyey piye tavon. ³⁰ Weye Amisyey pamo intabo. Wepirati po vatano Yahudi maveti umamai no Amune rai arono wanave Kristus ai, muno Wepirati po vatano susyey kajjinta maveti umamai tavon wanave. ³¹ Weti wama anave omi mbewar wamamaisy, yara Ananyao Musa ma jewen. Weramu vemo wamo ananyao umaso ramauta nora! Yara arono wamanave, naije umba wamo ananyao ama kove raen kakavimbe ti wambeta rai.

4

Abraham mamai no Amisyey amune rai weye panave Amisyey ai

¹ Soamo syare wamo Abraham atantona rati, weye opamo vatano Yahudi reama anena piye. Animaisyey mi Abraham po rave indamu mamai no Amisyey amune rai? ²⁻³ Ayao Amisyey mo raura mare, "Abraham panave kobe Amisyey ai. Amisyey po apa anave so raen, weti Po aveti mamaisyoy Amune rai."* Weti Abraham apa ana daijaro aneme rai wemi mo aveti mamaisyoy Amisyey amune rai oma jewen, maisyare omai ti vemo Abraham ararin dai nora. Weramu ranivara apa ana daijaro aneme rai wemi mo aveti mamai datire, wea ararino rai kai.

⁴ Arono vatane po anakere rajjar, weamo apa akari po apa doiye ravae. Weramu akari po doiye raunanto vayave jewen, yara po ravae mamaisyoy apa anakere rarijati. ⁵ Weramu Amisyey pamo sasyey weye wama ana wandaijare omi Po ratore jewen. Yara vatano rui pi panave pare Amisyey obo pi po vatane awa ayao kakai rapaya mai, weamo Amisyey po apa anave umaso raen pare vatano napije pamo mamai no Amune rai. ⁶ Wusyinoe Daud payao maisyare wemai tavon pare kove ngkov irati vatano are nawirati Amisyey po maveti umamai no Amune rai, Po awa ana udaijare ratore ramu. Daud apa ayao mi so:

* 4:2-3 Kejadian 15:6

⁷ “Vatano are nawirati awa ayao kakaije mamu Amisyepo rapapaya tirakanive, onawamo manayanambe.

⁸ Tugae, vatano awa ayao kakai mamu Amisyepo ratore ramu, onawamo manayanambe rave.”[✠]

⁹ Indako Amisyepa kovo namijepo mamu Po raugajepo iratipatano Yahudi obo mansairako? Jewena! Yara Amisyepa kove somamupo raugajepo iratipatano Yahudijewene mansaitavon. Maisyare syo rauraumawerai: Abraham panave kobe Amisyepai, weti Amisyepo apa anave so raen ti Po aveti mamai no Amunepo rai. ¹⁰ Weti aronorui rati Amisyepo Abraham apa anave so raen? Indako arono Abraham besunative to we rako? Wea jewena! Yara Amisyepo Abraham apa anave raen ti pare opamomamaisy arono besunative rainy. ¹¹ Umba Abraham besunative rijabe, omamomberarorombe Amisyepo aveti mamai no Amunepo rai weyepanave Ai to. Weti wamoraen kakavimberonon Abraham besunative rainyamopo Amisyepo Abraham aveti mamai no Amunepo rai to. Maisyare omaiti, Abraham be ajaive vatano nanawirati wanave Amisyepai yara ube sunative jewene mansai. Wenanawamopo awaanave raen ti Po maveti umamai no Amunepo rai. ¹² Munopo Abraham be ajaive iratipatano ube sunative mansaitavon, nanawirati wanave Amisyepai maisyare munopo Abraham panave arono besunative rainy.

Amisyepo apa urairi raugajepo vatano wanave Aijepo mansai

¹³ Wusyinoe Amisyepurairive Abraham munopo awa susyomiridijepo ntono mansaipare indati awaura mine so raitenambe.[✠] Abraham beto Amisyepo awaananyo rai omi mbewar ti Amisyepurairive tai maisyomamopo jewen. Yara Amisyepo urairijepo umasopo raugajepo weyepo Abraham panave Ai ti Po aveti mamaisyopo Amunepo rai. ¹⁴ Ranivara Amisyepo apa urairijepo raugajepo iratipatano ubeta Ananyo Musa rai obo mansai, weamopo anave mamopo ama ine mewenopo rai munopo urairijepo Amisyepo mamopo ana tamoenema. ¹⁵ Ananyo Musa mamopo vatane worakanyoandi, weamopo Amisyepo apa parimangke raugajepo mai. (Weramopo ranivara awaananyo raugajepo jewen datire, weamopo vatane worakanyoandi ramu.)

¹⁶ Weti anave omi mbewar Amisyepo apa urairijepo raugajepo wansai, indamopo mamaisyopo Apa kove rai. Maisyare wemaisy, Apaurairijepo amarukeno no Apakove rai. Munopo wandaen Po apa urairi raugajepo Abraham apa arikainyepo wansaitenambe aje. Weti Po apa urairi raugajepo vatano ubeta

Ananyo Musa rai obo mansai jewen, yara Po raugajepo tavon iratipatano awaanave mamaisyopo Abraham apa rai mansai. Weti Abraham pamopo wanenambe wama injayepije.[✠] ¹⁷ Amisyepo awaurairijepo umasopo mamopo Ayao Amisyepo ratore taiso: “Abraham, Risyoponatayapopatimuve wimbe ajaivesusyepo manui no mine so rai.”[✠] Maisyare wemaisy, Abraham be ajaive wansaitenambe no Amisyepo amun weyepanave kobe Ai. Amisyopo Abraham panave Aijepo so Wepirati po vatano ugwenene maijasepoko ukovakatonowenerai. Munopo Amisyepo so wepipayaowaanakotaro raen dainyepo no.

¹⁸ Arononaijepo Abraham awa akoe matu to munopo awa arikainyepo inta aenopo rai rainy, weramopo panave no tawan no Amisyepo ai munopo anaveamopo Amen tutir. Wemimbewar opamopo be ajaive po susyepo manui mampam, mamaisyopo urairijepo Amisyepo po raokaisyopo ai rai: “Abraham, nya susyoponyo mampame indati manui rave.”[✠] ¹⁹ Arononaijepo Abraham po raen opamopo be vatano anuive to, apa tume nantono tename nadani, munopo awaanamopo omamopo wanya nte bayave ma. Weramopo Abraham apa anave mayondipamopu. ²⁰ Munopo anugopo mamamunopo urairijepo Amisyepo rai jewen, yara apa anave miridiposeo ti po kove rauraseo Amisyepo ai. ²¹ Anugopo ntindimopo Amisyepo ai ti po raurapare, “Amisyepo bambunin po apa urairijepo ravetipamaisy.” ²² Wemimbewar Amisyepo po Abraham apa anave so raen, umba Po aveti mamai no Amunepo rai. ²³ Ayao so, “Amisyepo aveti mamai no Amunepo rai,” omamopo nsopipos Abraham obo ai ramu, ²⁴ yara ratopowansamarom tavon. Weyepo Amisyepo indati po wansavetipamamamaino Amunepo rai tavon, weyepo wamanave Injayepo Amisyepo opo po wama Amisyepo Yesus aijasepoko kovakatonowenera amauge raijepo Ai. ²⁵ Yesus po anasine raunantopo indamopo kakaijepo wansai weyepo wama ayao kakai ntapekanopo wansai, umba Amisyepo po aijasepoko kovakatonowenera rai indamopo Po wansavetipamamaino no Amunepo rai.

5

Kristus po wansaugav wamakare Amisyepo ai

¹ Maisyare wemaiti, soamopo wamamaino Amisyepo amunepo rai weyepo wamanave Ai. Wetiwa Amisyepo anugopo nsaumano wansai munopo wansanugopo nsaumano Ai, weyepo wama Amisyepo Yesus Kristus depo saumane so raugavopo wansai. ² Munopo Kristus po Amisyepo apa kove raugavopo wansaitavon indamopo no wansautan tutir, weyepo wamanave Ai. Weti wansananibe rave

✠ 4:8 Mazmur 32:1-2

✠ 4:13 Kejadian 13:14-17, 17:4-6, 22:17-18; Galatia 3:29

✠ 4:16 Galatia 3:7

✠ 4:17

Kejadian 17:5 ✠ 4:18 Kejadian 15:5-6

weye wansanave ramene mamu Amisyere apa kovo nnti indati wantavondi wamaura rai. ³ Muno wansananibe Amisyere apa kove umaso obo raije ramu, yara wansananibe tavon arono wansiuri. Weye wandaen arono siurije nande wansai, umba wansatawandi raije ntubai ti mbambunin. ⁴ Muno ranivara wambambunin wansatawandi, weamo anakotaro mo wansatopane mamu wamo ransui. Muno ranivara wamo ransui, weamo wansanave Amisyere amene mamu miridi nseo. ⁵ Muno wansanave Amisyere amene mbea marudi jeben, weye wandaen Apa ana po raurairive wansai omamo indati Po raunande aje, weye Opamo muinyo wansai rave. Apa Anawayo Vambunino po raugaje wansai Wemi mo Amisyere apa muinye so raugasyo ntuna wansanuga rai.

⁶ Amisyere apa muinye maisyare so: Arono wamayondi ti wamo wama ayao kakai rapaya wansai kakai, naije Kristus kakaijo wansai, arono masyoto Amisyere po rapatimu. ⁷ Vatano mine so nawamo awa muinye mamaun, weye vatano mine so ukakaijo awa arakove inta ai omamo mawese ramu. Weramu ranivara vatane inta pamo anuga ngko dave rave, weamo vatane intabo rako jirum dako umayar ukakaijo vatano kovo napije ai. ⁸ Weramu Amisyere pamo po apa muinyo manakoe rarorono wansai weye Po Kristus atutir indamu kakaijo wansai arono wama ayao kakai ta no wansaija nene.

⁹ Amisyere po wansaveti wamamai no Amune rai weye Kristus kakaijo wansai, weti tugae indati Kristus po wansapaya Amisyere apa pari mangke rai jaje arono Apa masyoto po mangke rapatimu nde nande. ¹⁰ Arono wambe marovave Amisyere ai no wusyinoe, apa Kavoy Kristus kakai indamu Po wansaugav wamakare Amisyere ai. Weti tugae indati Kristus po wansapaya Amisyere apa pari mangke rai jaje, weye Kristus kova no tawan. ¹¹ Muno obo rai jeben! Yara wansananibe tavon weye Amisyere po wama Amisyere Yesu Kristus atutir Po saumane raugavo wansai. Kristus opi bewar soamo Amisyere anuga nsaumano wansai muno wansanuga nsaumano Ai.

Adam po wene rauga to, yara Kristus po kove raugav

¹² Arono Adam po ayao kakai rave no wusyinoe, naije ayao kakai nsiso mine so rai. Weti vatan intabo umaso po ayao kakai raugavo mine so rai tenambe, muno apa ayao kakaije mo wene raugav tavon. Umba wene manya vatan tenambe mansai vintabo weye vatan tenambe wo ayao kakai rave vintabo. ¹³ Arono Ananyao Musa raugaje rainy, ayao kakai ntami mine so rai to.

Weramu ayao kakai namije mamu Amisyere po ratore ramu weye Po Ananyao Musa raugaje rainy. ¹⁴ Maisyare wemai damu arono masyoto Adam aijoe mansanan ava masyoto Musa ai, wene mo vatan tenambe maugav. Awa ayao kakai maisyere Adam apa ayao kakai raije ramu, weramu wene mo maugav weye onawamo vatano awa ayao kakai no mai.

Adam aurata irati Vatano de rijabe akato Ai, opamo Yesusa piye. ¹⁵ Weramu vatane jirume so aya ana yo rave inta apa nsasyere inta Apa rai, weye Adam po ayao kakai rave, yara Yesu Kristus po kove raunande. Muno Adam apa ayao kakai mo wene raugavo vatan tenambe mansai. Yara Yesu Kristus po kovo manakoe raugaje ti maweso vatan tenambe mansai. Weti Amisyere apa kove mo Adam apa ayao kakai rakivan. ¹⁶ Adam apa ayao kakai intabo mo Amisyere apa mangke raugavo vatan tenambe mansai. Weramu Amisyere apa kove nsasyere irati ayao kakai intabo umaso rai. Weye Apa kove mawes, weti Po ayao kakai manui rave rapaya vatane mai muno Po vatane maveti umamai no Amune rai. ¹⁷ Vatan intabo apa ayao kakai omirati mo wene raugavo vatano mine so mansai tenambe. Weramu Yesu Kristus apa ana po rave mo Adam apa ana po rave rakivan. Weye vatane intabo so, Kristus, bewar ti Amisyere po apa kovo manakoe raugaje mawebe vatano wanave Kristus aije mai muno Po maveti umamai no Amune rai. Vatano nanawiso indati ukova nuge nuganui muno utavondi Kristus apa be akarive rai.

¹⁸ Weti Adam apa ayao kakai intabo mo Amisyere apa mangke raugavo vatan tenambe mansai, yara Kristus apa kovo intabo mo vatan tenambe mapaya awa ayao kakaije ama mangke rai indamu ukova nuge nuganui. ¹⁹ Vatan intabo umaso, opirati Adam, beto Amisyere aije ramu, wirati vatane wanui rave onawamo vatano ayao kakai no mansai. Weramu Vatan intabo akato, Opirati Kristus, beto Amisyere ai rave, wirati vatane wanui maveti umamai no Amisyere amune rai.

²⁰ Amisyere po Ananyao Musa raugaje indamu mo vatane manyao wo awa ayao kakai raen kakavimbe, weye wo ananyao umaso rakanyoandi ti manui rave to. Ayao kakai merere nseo manakoe, weramu Amisyere apa kove nseo ti mo ayao kakai umaso rakivan. ²¹ Wusyinoe ayao kakai mbambunin ti mbe akarive vatano mine so mansai wirati wene mo maugav tenambe. Weramu soamo Amisyere apa kove wemirati mbambunin dave ti mbe akarive wansai. Amisyere apa kove mbe akarive indamu Po wansaveti wamamai no Amune rai, wirati wamaura kovo nuge nuganuije rai, omamo

wama Amisy Yesus Kristus po raugaje wansai.

6

Kristus po wansapaya ayao kakai ama vambunine rai, weti vemo wamo ayao kakai rave tutir nora

¹ Amisy po wama ayao kakaije rapaya weye Opamo bekobe rave, Apa kove manakoe. Weti wamo ayao kakai rave tutir dako indamu Amisy apa kove miridi nseowa manakoe kobe rako? ² Wakoe! Vemo wamo ratantonanare wemaisy inya! Ranivara wamo ayao kakai rave tutir, weamo mamaisy ramu. Weye soamo ayao kakai mbe akarive wansai jakatoo ramu, yara wamamo maisyare wantavondi Kristus ai arono kakai to wemaisy. ³ Syare wasaemen: arono wansaugasya kuvuni mana rajoe indamu wambe intabove Ai, omamo maisyare wangkakai Kristus atavon to. ⁴ Tugae, arono wansaugasya kuvuni mana rai, omamo maisyare wangkakai Kristus atavon muno wansantuna atavon no aipapo rai. Weti maisyare Kristus kovakato no wene rai weye wama Injayo Amisy po apa vambunino ntiti raugaje Ai, maisyare wemaisy wangkovo wanyimbe weye Po kovo wanyine raugaje wansanuga rai.*

⁵ Wambe intabove Kristus apa kakai rai, weti tugae rave indati wambe intabove Apa kovakato rai tavon. ⁶ Syare wansae-men: Wama ana wamo rave no wusyinoe mamowen to, weye wamamo maisyare wantavondi Kristus ai arono auseo sawa inyo kapite rai wemaisy. Weti wamamo maisyare wangkakai Kristus atavon indamu wansanasine so ama ayao kakai ama vambunine raubaisy, indamu vemo ayao kakai mo wansaijaro arove rai jakato nora. ⁷ Weye are pirati kakai to, opamo Amisy po apaya ayao kakai ama vambunine rai to.

⁸ Wangkakaijo Kristus atavon to, weti wamanave wamare indati wangkovo atavon. ⁹ Wamo raen Kristus kovakato no wene ama uga rai to, weti indati kakai jakatoo ramu, weye wene ama vambunine mo ajar akatoo ramu. ¹⁰ Kristus kakai intabo obo kobe indamu Po ayao kakai ama vambunine rapinde. Soamo Opamo kova no tawan indamu Po Amisy apa bekere rarijat tutir. ¹¹ Syare wapa bekere maisyare Kristus apa bekere umaso ramai tavon, indamu wapo raura patimuve wapare, "Risiamo maisyare rikakaijo Kristus atavon, weti ayao kakai mo inaijar akatoo ramu. Soamo rijaisy akato no Yesus Kristus ai weye ibe intabove Ai, ti ribeker syo Amisy apa bekere obo rarijat."

¹² Maisyare wemai ti, vemo ayao kakai mbe akarive wasanasine rai jakato nora, muno vemo watawondi ama bekero ngkakainoanive rai nora. ¹³ Wasanasine ama kotar, maisyare wasaneme ndako wasami ndako muno kotaro rui, vemo wapo raunanto ayao kakai rai nora. Vemo wapo wasaneme ndako veano anakotaro mamune raija nora. Yara wapo wasanasine raunanto Amisy ai indamu wapo wasanasine ama kotar veano Apa bekero ngkove obo raijar. Weye weapamo maisyare vatano wakovakato no wene ama uga rai to, weti syare wapa ana wadave ngkov bintabo. ¹⁴ Weapamo ayao kakai mbe akarive wasai jakato ramu, weye soamo wana Amisy apa kove rai ti omirati mbe akarive wasai. Weti wana Anyaayo Musa ranem ate rai jakatoo ramu.

Wamo taune wansaunanta Amisy ai indamu wambeta Ai

¹⁵ Soamo Amisy apa kove no wansautan ti wana Anyaayo Musa ranem ate rai jakatoo ramu, weti ayao kakai mamowen rui? Wamo rave kai rako? Weramu indati wamo rave nora! ¹⁶ Wandaen ranivara vatan inta po taune aunanto vatano kaijinta ai inda beto ai, weamo opamo awaino vatano aro pa. Ayao kakai mamowen maisyare wemaisy, weye ranivara wamo taune wansaunanto indamu wamo ayao kakai rave, weamo ayao kakai mo wansaijaro arove. Umba ayao kakai mo wansauga ti wangkakai. Weramu ranivara wamo taune wansaunanto Amisy ai inda wambeta Ai, weamo Po wansauga ti wamamaisyo Amune rai. ¹⁷ Wusyinoe weapamo ayao kakai mbe akarive wasai ti mo wasaijaro arove. Weramu kove raura seo Amisy ai! Weye soamo wansanuga ntenami wabeto anyayao tugae rai, wemirati vatane wo ravovo wasai to. ¹⁸ Amisy po wasapaya ayao kakai ama vambunine rai indamu vemo mo wasaijaro arove akato inya. Yara soamo weapamo vatano wapanapatambe Amisy ai indamu wabeta ana ngkove obo rai.

¹⁹ Ananeneae arove umaso mamowen raura wasai indamu maweso wananta sya ananyaowe rai. Wusyinoe wapo wasanasine raunanto ayao kakai rai indamu watawondi ama bekero ngkakainoanive rai, weti wapa ana wadave mamowen nggwambe muno mamun dave. Weramu soamo syare wapo wasanasine raunanto wapanapatambe Amisy obo ai, indamu wapa ana wadave mamowen mamaisy muno ngkakavimbe.

²⁰ Arono ayao kakai mo wasaijaro arove no wusyinoe, watawondi wapa bekero

* 6:4 Kolose 2:12

rui vayave rai weye Amisyé apa bekere naije akarive wasai jewen. ²¹ Wabeare naije ama kovo mo raunande wasai mamó maisyare rui? Mewen bayave, yara soamo weasamane wapa ana wadave wusyinoe rai! Ayao kakai ama marane mamó mo wene raugavo wasai. ²² Weramu Amisyé po wasapaya ayao kakai ama vambunine rai to, muno Opamo be akarive wasai. Apa be akarive wasai omamo mo kove raugavo wasai weye Po wasanuga ratayao da ngkakavimbe, muno ama marane mamó wangkova nuge nugalui. ²³ Ayao kakai ama mano mo raunande mamó wenenem. Weramu Amisyé apa po raunande mamó kovo nuge nugalui, weye wambe intabove wama Amisyé Yesus Kristus ai.

7

Ananyao Musa mo wansaokaisiy akatoe ramu weye Yesus apa kakaije mo wansapaya rai to

¹ Sya arakove weap, wapo ananyao ama parenta raen omamo mbe tanamamoambe vatane ai arono wene nde ai rainy. Weramu ranivara kakai to, naije ananyao parenta ama vambunine mo aijar akatoe ramu. ² Maisyare ananyao vauname no tai somaisy: wanya mbauname mamó ama vauname so mo ama anap pe yaokae ti matu. Weramu ranivara ama anya kakai, weamo ananyao umaso mo wanya so raokaisiy akatoe ramu, yara mpaya rai to. ³ Ranivara ama anya ta no yara nikijo anya kaijinta arijat, weamo wanya umaso rawainamo wanya anaerere ma. Weramu ranivara ama anap kakai to, weamo ananyao mo raokaisiy akatoe ramu. Weti mo anya kaijinta aovan akato, weamo mo aovan kai, omamo rawainamo wanya anaerere ma jewen.

⁴ Sya arakove, weapamo maisyare wemai tavon, weye wakakai Kristus atavon no inyo kapite rai, weti Ananyao Musa mo wasaokaisiy akatoe ramu. Yara soamo Kristus apaura wasai, Opi kovakato no wene rai to. Kristus apaura wasai indamu wapanapatambe Amisyé ai. ⁵ Weramu arono wusyinoe Kristus apaura wansai rainyamo, wantavondi wansanasine ama bekero ngkakainoanive rai. Arono naije anakotaro rui Ananyao Musa mo raorai indamu vemo wamo rave inya, wemirati wamo rave kobe. Weti ananyao umaso mi mbewar wama bekero ngkakainoanive ntubai ti nseowa manakoe. Naije wamo wansanasine veano ayao kakai rave, weti ama marane mamó mo wene raugavo wansai. ⁶ Weramu soamo Ananyao Musa

mpaya wansai to ti mo wansaokaisiy akatoe ramu, weye wamamo maisyare wangkakai Kristus atavon. Arono wusyinoe Ananyao Musa mamó wamo rarijat mavabe, weramu unanuijo wanyine inta raneka wansai, omamo Anawayo Vambunin mo wansaugav indamu wamo Amisyé arijat.

Ananyao Musa mbewar ti syo sya ayao kakai raen kakavimbe

⁷ Maisyare so, weamo Ananyao Musa mamó wamo rauranare rui? Indako Ananyao Musa mamó ngkove ramu rako? Indati jewen! Weramu Ananyao Musa wemirati mo ayao kakai raura ti syo raen kakavimbe. Maisyare so: Musa apa ananyao inta mare, “Vemo nanuga ntento vatano kaijinta apa anakotaro apaura rai jinya.”* Weramu ranivara ananyao umaso mamó mewen datire, indati inanto taune sya bekero ngkakainoanive raije ramu. Weti ananyao so mo sya ayao kakaije raroron indamu syo raen. ⁸ Weye arono syo ananyao so raraniv mare, “Vemo nanuga ntento anakotare rai jinya,” naije ayao kakai ntipu inanuga so rai ti inanuga ntento anakotare rai kobe. Weramu ranivara ananyao mewen, weamo ayao kakai ama vambunine mewen tavon. ⁹ Arono wusyinoe syo Ananyao Musa ama ine raen kobe jewen, syo rakarae syare inanuga somamo nsauaman. Weramu arono inanto Ananyao Musa rai tugaive, naije ayao kakai ntipu inanuga so rai kobe,* ¹⁰ muno ama marane mamó mo wene raugavo rinai. Amisyé po apa ananyao raugaje indamu mo kovo ngko dave raunande. Weramu syo rakanyoandi ti Apa ananyao mo kove raunande ramu, yara wene obo mirati mo raunande. ¹¹ Arono syo Ananyao Musa raraniv, ayao kakai mo varore rakani indamu mo inaponae, mo inaubaisy.

¹² Ananyao Musa mamó Amisyé opi po raugaje, weti ama ananyao mamó ngko dave muno mamai dave. ¹³ Indako Amisyé apa ananyao ngkove umaso mo wene raugavo rinai rako? Jewena! Yara taune risya ayao kakai omi mo wene raugav. Weye arono syo ananyao ngkove umaso ranaun, taune sya ayao kakai mo inaponae indamu mo inaubaisy. Weti ayao kakai ama mamune raen kakavimbe, muno Amisyé apa ananyao ngkove mbewaramo wandan ayao kakai mamó ngkakainoanive muno mamun dave!

Ribeker kove rai weramu kakai mbambunin tavon

* 7:7 Keluaran 20:17; Ulangan 5:21 * 7:9 Paulus po taune obo aura no so ramu, yara vatano mine vone so mansai tenambe.

¹⁴ Sya arakove, wamo raen Ananyao Musa omamo ngkov weye nori rati Anawayo Vambunine rai. Weramu risyamo vatano mayondi vayave pi risy, weye ayao kakai mo rinaijaro arove. ¹⁵ Syantatukambe animaisye mi mbewaro rinai ti ribeare so: Ribeker ribeto ana ngkove rai, weramu syo rave ramu; yara ana syo raura tantunawi wemirati syo rave kobe. ¹⁶ Weti ranivara sya ana syo raura tantunawi wemirati syo rave, indati syo raen syare, “O, tugae! Ananyao Musa ama ayaowe mammo ngko dave.” ¹⁷ Weti taune risyirati syo rave ramu, yara ayao kakai wemirati mo rave, ayao kakai namije ntuna inanuga so rai. ¹⁸ Weye syo raen ana ngkove inta no no rinai ramu; no no inanuga ngkakainoanive so rai ramu. Ribeker syo ana ngkove rave, weramu rimamaisye ramu. ¹⁹ Ranivara ribeker ibeto ana ngkove rai, weamo syo rave ramu. Muno ranivara syonae syo ana ngkakai ravei, omirati syo rave kobe. ²⁰ Ranivara anakotaro ngkakaijo syonae rai wemirati syo rave, weamo risyirati syo ravea jewen, yara ayao kakai no no rinanuga rai wemi mo rave.

²¹ Maisyare wemai ti, anakotare so nande rinai tutir: Arono rui ribekero kove rai, weamo bekero ngkakainoanive ntipu no inanuga rai, ti kakaije omirati syo rave kobe. ²² Rinanuga rajiamo inanayanambe Amisye apa ananyao rai. ²³ Weramu ana inta mbe marovave inanasine so rai, mo inauga ti ibeto ama bekero ngkakainoanive rai. Weti sya ana syo ratantona rajiamo syare ibeto Amisye apa ananyao rai rave, weramu ayao kakai mo inanasine so rai-jaro arove mare ibeto ama bekere rai. ²⁴⁻²⁵ Maisyare omaisy, ibeto Amisye apa ananyao rai no sya ana syo ratantona rai, weramu ibeto ayao kakai rai no inanasine so rai. Abo! Risyamo vatano kakai mo rinakepe pi risy! Are pirati indati de po inapaya inanasino mo inaananto wene rajie so rajjo? Kove raura seo Amisye ai weye wama Amisy Yesus Kristus po inapaya rai to!

8

Vatano nanawirati Anawayo Vambunine mbe akarive mai

¹ Maisyare omai ti, soamo vatano wambe intabove Yesus Kristus ai wamamo Amisye po mangke raugaje wansai jakatoo ramu. ² Muno wambe intabove Yesus Kristus ai ti Anawayo Vambunine mo kove raunande indamu wansanuga nggwanyin, muno Ama vambunine mo wansapaya irati ayao kakai ama vambunine rai muno wene ama vambunine rai tavon. ³ Weramu Ananyao Musa mammo mo wansapaya irati ayao kakai

ama vambunine rai kakai. Weye vatano mine so wansanuga mayondi ti wantavondi Ananyao Musa rai kobe jewen. Weti ayao kakai ama vambunine mammo Ananyao Musa mo rapinde kakai, weramu Amisye po rapinde tenambe to. ⁴ Amisye po rave tai maisy indamu wamamo wamamai no Amune rai mamaisyo Ananyao Musa mo wansatuti dai rai. Weti soamo wantavondi wansanasine ama bekero ngkakai rai jakatoo ramu, yara wantavondi Anawayo Vambunine ama bekere obo rai.

⁵ Vatano utavondi mansanasine ama bekere rai, weamo bekere umaso obo mirati wo ratantona. Yara vatano utavondi Anawayo Vambunine ama bekere rai, weamo awa ana wo ratantona mammo ntuna irati Ama mbekere rai. ⁶ Vatano wo manasine ama bekero ngkakai obo ratantona onawamo indati mangke raugaje mai indamu ukakai. Yara vatano wo Anawayo Vambunine ama mbekere ratantona onawamo indati ujaisyo kovo sauman Amisye rai tawan. ⁷ Vatano utavondi manasine ama bekero ngkakai obo rai onawamo ube marovave Amisye ai. Wonayo Amisye apa ananyao rai muno ubeta rai kakai. ⁸ Maisyare omai ti, Amisye anayanambe mai jewen.

⁹ Weramu, sya arakove, weapamo wasanasine ama bekero ngkakai mbe akarive wasai jakatoo ramu, yara Amisye apa Anawayo Vambunine omi mbe akarive wasai, weye Omamo ntuna wasanuga rai. (Weramu wasaemen: vatano are pirati Anawayo Vambunin namirati Kristus po raunande ntuna anuga rai jewen, vatano napije ato siso Kristus apa kawasae matavone jewen.) ¹⁰ Ranivara Kristus tuna wansanuga rai tugaive, weamo wansanasine so indati ngkakai weye ayao kakai no irati rai, yara wansanawayo pamo kova nuge nuganui weye Amisye po wansaveti wamamai no Amune rai. ¹¹ Amisye wepi po Yesus Kristus aijaseo kovakato no wene rai, weti ranivara Apa Anawayo Vambunine ntuna wansanuga rai, indati Opamo po kove raunande wansanasino kopa rai indamu wangkovakato no wene rai tavon, mamaisyo Apa Anawayo Vambunin no irati wansai Ama vambunine rai.

¹² Maisyare omai ti, sya arakove, kove mammo wambeta Amisye apa bekere obo rai, yara vemo wantavondi wansanasine ama bekero ngkakai rai jinya. ¹³ Weye ranivara wantavondi wansanasine ama bekero ngkakai rai, wea indati mo weno nuge

nuganui raugavo wansai. Weramu ranivara wamo Anawayo Vambunine rawain mo vambunine raugaje indamu wansakinavo wama ana wandave ti ngkakaije rai, wea indati wangkova nuge nuganui.

¹⁴ Vatan tenambe nanawirati Anawayo Amisy mbe akarive mansai onawamo Amisy apa arikainye waino mansai. ¹⁵ Arono Ananyao Musa mo wansaokaisy no wusyinoe, wamo Amisy apa mangke rasyaniv. Weramu Anawayo Vambunin wemirati Amisy po raunande wansai Omamo mo wansave arove jewen, weti wanjaniv akatoe ramu, weye Mo wansaijasea wamamo Amisy apa arikainye waino wansai. Weti wamo Amisy awain wamare: “Injae! Reama Injaya pi Winy!”* ¹⁶ Muno Anawayo Vambunine mo raura wansai no wansanuga rai mare wamamo arikainyo Amisy nawirati wam. ¹⁷ Maisyare wemaisy indati wamaura irati kovo Amisy po ratayao Apa arikainye mansai rai, weti kovo Kristus apaura rai mamo wamaura rai tavon. Ranivara wantavondi wansiuri Kristus atavon, wea indati wantavondi wamaura Apa kovo ntiti rai tavon.

Wamo Amisy apa kovo makare ranyut weye mo siurijo mine so rakivan

¹⁸ Arono syo Amisy apa kovo ntiti ratan-tona, syo rataun syare siurijo nande wansai no mine somamo mangke ramu. Kovo ntiti namije mamo Amisy po rarorono wansai no nugo indati makare rai. ¹⁹ Soamo anakotaro Amisy po ranari tenambe no mine so mo masyoto namije ranyuto ndei, weye mbeke dave indamu Amisy po raroron kakavimbe are nawirati Apa arikainye waino mai. ²⁰ Weye mine so muno ama anakotaro ntuna ama uga rai tenambe mamo patimu Amisy ntami rai to, patimu unaso mare indati ama kove ntoa raumandi. Weramu anakotaro mine so taune ama mbekere ma jewen, yara Amisye dapatimu tai mai to.† Weramu anakotaro ranari no mine so ranave Amisy amen, ²¹ muno mo Amisy apa masyote ranyut arono indati Po rapaya indamu ntami maug akatoe ramu. Masyoto naije indati anakotaro ranari tenambe ntavondi kovo ntiti Amisy po raugaje Apa arikainye maije matavon. ²² Arono wusyinoe mansanan ava unumeso wandaen mine so muno ama maere, ama inyoe, ama anakotaro ranari tenambe mamo maisyare moyov muno manonae weye ama siuri umawe mangke

dave, maisyare wanya inta nsiuri arono ntuna ama arikainye ai.

²³ Muno Amisy apa kawasae wamamo wamoyov muno wamanonae tavon arono wana no mine so rai. Wamo Amisy apa kovo po raurairive ranyut. Soamo Po apa Anawayo Vambunine raugaje ntuna wansanuga rai, Omamo Amisy apa kovo manasyino po raugaje wansai mije, weti wamo Apa kovo makanande ranyut. Muno wamo Amisy apa masyote ranyut arono indati Po wansaijasea wamamo Apa arikainye waino wansai muno Po wansanasinge so ranigwan nggwanyin. ²⁴ Amisy po wansapaya wama ayao kakai rai to, ti soamo wansanave Amen wepi indati Po apa ana po raurairive tenambe raugaje wansai. Ranivara ana wansanave ramen omamo nandea wandaeno wansami rai to, weamo wansanave ramen akatoe ramu. Weye anakotaro wansanave ramembe mara nde nande wansaneme rai to, umba wamare wansanave animaisy ramen akato? ²⁵ Weramu ranivara wansanave ana wamo raeno wansamije rai rainye inta rai, indati wansatawandi mavabe wamo ranyut.

Anawayo Vambunine nsambayambe Amisy ai wansamarom

²⁶ Anawayo Vambunine mo wansaeranande arono wamayondi. Arono wamantatukambe wamare wansambayambe rui, weamo Anawayo Vambunine taune nsambayambe to irati Amisy ai wansamarom. Weye Anawayo Vambunine raemeno wansai ti Mo raura nanto Amisy ai, Ama ayao mamo vatane wamo raura kakai. ²⁷ Muno Amisy nanto Anawayo Vambunine ama mbekere rai kobe, weye Ama sambaya mo rave Amisy apa kawasae wansai omamo mamasio Amisy apa bekere rai vintabo. Muno Amisy po vatane wansanuga raen tenambe.

²⁸ Wandaen anakotaro nande wansai omamo Amisy wepi po ratayao tenambe. Po anakotaro ngkakai muno ngkove ratayao indamu mo kove raugavere vatano wamuinyo Aije wansai. Wamirati Po wansawainde mamasio Apa bekere rai. ²⁹ Weye wamamo Amisy po wansaeno wusyimbe to muno Po wansapatimu indamu wamo Apa Kavoyesus amaisy, wirati indamu wambe arakobe Yesus ai. Weti Yesus wepirati wama anui pije yara wamamo Apa rijat. ³⁰ Vatan tenambe nanawirati Amisy po mapatimu arono manasyinoe nawamo Po mawain utavondi

* **8:15** Ayao “Injae” raura ayao Yahudi rajjamo Abba, ama ine mamai kava. Yesus po Injaya Amisy awainamo Abba arono be sambayambe Ai (Markus 14:36). Raen tavon no Galatia 4:6. † **8:20** Kejadian 3:17-19. Amisy dapatimu pare mine so ama kove raumandi weye aneno Adam muno Hawa yo ayao kakaije rave.

Ai. Muno vatano nanawirati Po mawain utavondi Ai onawamo Po mansaveti umamai no Amune rai. Muno vatano nanawirati Po maveti umamai no Amune rai onawamo Po kovo ntiti raunande mai.

Anakotaro nsosobe nande wansai, wambambunin weye Kristus muinyo wansai

³¹ Inya! Syare wamo anakotare umaso ratantona kobe! Amisy tuna wansautan, weti vatan inta po wansapinde kakai. ³² Amisy po taune apa Kavoye Yesu amavuge ramu, yara Po aunande inda kakaijio wansai tenambe. Weti Amisy po apa Kavoye aunande tai maisy, wea indati Po anakotaro rui vayave raunande wansai jaje. ³³ Wamirati Amisy apa vatano po wansatayao, weti vatan inta bambunin da po ayao kakai rantutibe wansai no Amisy amune rai jeben. Weye Amisy taune po raura pare wamamo wamamai to. ³⁴ Muno vatan inta bambunin da po mangke rapatimugo wansai jeben. Weye Yesu Kristus opi kakaijio wansai muno kovakato no wene rai soamo tuna no Ajayo Amisy anem ngkove rai Apa kovo ntiti rautan indamu be marimbe payao wansai no Injayo Amisy amune rai.

³⁵ Kristus muinyo wansai rave weti ana inta mo Apa muinye so ransopi kakai. Weti anakotaro rui vayave nande wansai, weamo Kristus muinyo wansai tutir. Weti ana nsosobe nande rako, wansiuri rako, vatane wo wansave tatugadi, marore po wansave, ananuge meweno wansai, anaiyu ndako kakai ndako nande wansai— anakotaro rui nande wansai, Kristus muinyo irati wansai tutir. ³⁶ Weti mamaisy Ayao Amisy mo ratoe so rai, mare:

“Amisy winy! Vatane manuga mamuno reansai weye reantavondi Nai.

Namane rinit ubeker wo reansaubaisy.

Reamaisyare maero domba auga da apa isyisyare raotare amaisy.”^{*}

³⁷ Weramu anakotaro rui vayave nande wansai, wamo rapinde tenambe irati Kristus apa vambunine rai, Opi muinyo wansai. ³⁸⁻³⁹ Weye risyanave syare Amisy apa muinye mamamo ana inta mo ransopi kakai. Weti wangkakai rako, wano tawan no mine so rai rako, naito Amisy dako, anawayo kakai ndako, vambunino rui vayave ndako, ana nande arono naiso muno ana nande arono nugo makare umu ndako, vambunino no no naumo warae muno vambunino no no min ate waraya ndako, anakotaro ranari rui vayave, indati inta mbambunin mo Amisy apa muinyo wansai ransopi kakai. Apa muinye somamo

wama Amisy Yesu Kristus opi po rarorono wansai.

9

Paulus animaumbe apa arakovo Yahudi mansai weye wanui wanave Yesu aije ramu

¹ Sya ana syare syo raura naiso omamo ayao tugae. Weye risyamo Kristus apaura rinai, weti syayarurijabe ramu. Muno syo raura tugave somamo Anawayo Vambunine no no inanuga rai mo raen. ² Abo! Risyamo inanimaumbe ntapekano rinanuga so rai rave! Weye syoyovo taune sya arakovo Yahudi mansai weye wonayo wanave Kristus aiji. ³ Ribeker indamu syo sya arakovo Yahudi mansaugav ude Kristus ai. Weti ranivara awa ayao kakai ama mangke mamoye raugaje rinai ratire, weamo syo ranawan kai. Muno ranivara Kristus po inatugaro marambe indamu syo sya arakove so manigwan datire, weamo syo ranawan kai. Weye ribeke dave indamu sya arakovo Yahudi wanave Kristus ai. ⁴ Kawasae Yahudi wenawamo Amisy po apa kove raugaje mansai manui, no taiso: Wenawirati Amisy po maijasea indamu onawamo Apa arikainye waino mai. Wenawirati Amisy po apa kovo ntiti rarorono mai. Muno wenawirati Po urairije raokokaisyoye mai muno Ananyao Musa raugaje mai. Po mansanyao indamu ube sambayambe Ai ti mamaisy, muno Apa urairijo po raurairive mai mamoye manui. ⁵ Kawasae Yahudi wenawamo reama aneno wusyino Abraham muno Isak muno Yakob awa ajavi nanawije. Muno Kristus opamo avaki no awa susyeyo rai arono be vatanbe de no mine so rai. Kristus opamo Amisy, opirati be akarive anakotare rai tenambe, weti wangkangkamambe Aija nuge nuganu. Amin!

Vatano mavaki Abraham apa susyeyo rai onawamo Amisy apaura mai tenambe jeben

⁶ Vatano Yahudi mavaki no susyeyo Israel onawamo Amisy apaura mansai tenambe jeben. Weramu Amisy po apa urairijo po raurairive mansai omamo Po rapaya ramu. ⁷ Vatano mavaki Abraham apa susyeyo rai onawamo Amisy po mansaen tenambe jeben, pare inta nawamo Abraham apa arikainyoye tugae jeben. Maisyare Amisy po raura nanto irati Abraham ai no wusyino pare, “Indati nya kavoye Isak napiso Syo atayao indamu winanto irati susyeyo idaurairive nai we rai.”^{*} ⁸ Ayao raura umaso ama ine no taiso: Abraham apa arikainyoye po mavaki onawamo mato siso Amisy apa

^{*} 8:36 Mazmur 44:22 ^{*} 9:7 Kejadian 21:12 ^{*} 9:8 Abraham apa kavoye Ismael muno apa kavoye kaijinta (Kejadian 25:1) onawamo Amisy po raura pare mato siso Abraham apa susyeyo tugae rai jeben (Kejadian 21:9-12).

arikainyo tugae mai tenambe jewen.* Yara apa arikainyo mavaki mamaisyo Amisye apa urairi rai obo nawirati apa arikainyo tugae nanawije. ⁹ Weye Amisye apa urairi po raugaje Abraham ai no taiso: “Indati tumo makanande so syakare, weaveti nya anamu Sara mo arikainyo anya inta avaki.”[✠]

¹⁰ Amisye po vatane inta mapatimu indamu apaura mai, maisyare wandaen kakavimbe no taiso: Arono Ripka mo ama arikainyo tapume yavaki, Esau muno Yakob, aya aja pamo intabo, opirati Isak, reama aneno wusyine pije. ¹¹⁻¹² Weramu arono arikainyo tapume so yavaki rainy ti yo ayao kakai muno kove inta rave rainy, arono naije Amisye po arikainye so inta atayao to pare Po apa kove raugaje ai. Po raura nanto Ripka rai wusyimbe to arono mo ama arikainye yavaki rainy, pare, “Nya arikainyo avaki rijabe indati be akarive apa anuija ai.”[✠] Amisye apa ayao umaso mo raroron kakavimbe Amisye po anakotare ratayao mamaisyo taune Apa bekere obo rai. Weti mbaro wansai no taiso: Amisye po vatane mawain mamaisyo awa ana udave ngkove rajje ramu, yara Po mawain mamaisyo taune Apa bekere obo rai. ¹³ Maisyare Ayao Amisye mo ratoe mare: “Risiamo rimuinyo Yakob ai, yara syonayo Esau ai.”[✠]

¹⁴ Maisyare somais, vatane inta wo ratantona ware, “Amisye pamo apa ana po rapatimu mamaisye ramu.” Indati jewen! Yara Amisye apa ana dapatimu mamai dave. ¹⁵ Weye Amisye po raura Musa ai pare:

“Risiamo syo muinye raroron irati vatano rui pi ribeker syare rimuinyo ai.

Muno ribekobeo vatano rui pi ribeker syare ribekobeo ai.”[✠]

¹⁶ Weti Amisye po vatane inta mapatimu indamu Po apa kove raugaje mai. Muno vatane awa vambunine muno awa bekero wo ana rajjare mamo Amisye po ratore ramu, yara Po mapatimu mamaisyo taune anuga ngkovo mai rai. ¹⁷ Wansaemen tavon irati Amisye apa ayao po raura Firaon aije so rai pare: “Inya, Firaon! Risyrati syo najjaseo wimbe akarive indamu winaijamo Risyo sya vambunine raroron ti Sya tame manakoe no mine tename so rai.”[✠]

¹⁸ Maisyare omaisy, Amisye po rapatimu pare Po apa muinye raroron irati vatane inta mai, yara Po rapatimu pare Po vatano kajijinta manuga rakeke ti matu.

¹⁹ Weramu weapamo inta wapantatukambe ti wapare, “Ranivara Amisye po vatane inta wansanuga rakeke ti

matu maisyare Firaon amaisy, weamo wamamo wambambunin wamo Apa bekere rawatambe kakai. Weti veanimaibe Po wama ayao kakai rantutibe?!”

²⁰ Wakoe! Are nawirati weap?! Inya, vatan bayave weap, wapare wapo Amisye anyao rako? Amisye wepi po wansanari to, indati vemo wapo raura tai somai nora: “Amisye, mbeanimaibe Nyo reansanari tai somaisy?”[✠] ²¹ Vatano po kopa ranari vabi- uve, opamo apaura kopa rai weti po ranari taune apa bekere rai. Muno po kopa ranepate tavon mamai tenambe, umba po rapatimu pare po vabiu inta ranari ngko dave yara inta ranari mamai kobe jewen, omamo mamaisyo taune apa bekere rai.

²² Muno Amisye maisyare omai tavon: Po anakotare rapatimu mamaisyo Apa bekere rai. Ranivara beker pare Po apa vambunine muno Apa mangke raroron vatano ukakainoanive mai indamu Po maubaisy, weamo Apa varore mije. Weye onawamo mangke nuge nuganui mamaisyo awa ana udave ngkakai rai. Weramu soamo Amisye atawandi mai vayave, Po apa mangke raugaje rainy. ²³ Amisye atawandi weye beker pare Po apa kovo manakoe raroron vatano nanawirati aemeno maije mai. Onawamo Amisye po matayao wusyimbe to indamu awaura Apa kovo ntiti mo mansanyut no munijo ntiti rai. ²⁴ Muno wamirati vatano Amisye po wansawain indamu Po apa kovo namije raugaje wansai. Po vatano Yahudi nake inta reansawain, muno Po vatano Yahudi jewene nake inta wasawain. ²⁵ Maisyare Amisye po raura wusyinoe ti anawae Hosea po ratoe no taiso:

“Kawasaeyo nanawirati risyaura mai jewen,

indati Syo mawaino Sya kawasae.

Muno vatano inanuga no mai jewen, indati Syo mawainamo Sya kawasae inanuga no mai rave.”[✠]

²⁶ “Wusyinoe Amisye po raura pare,

‘Weapamo Sya kawasaeयो risyaura wasai jewen.’

Weramu indati Amisye pare,

‘Soamo Syo wasawainamo Amisyo noa pitawabe Sya arikainye nawirati weap.’[✠]

Ayao umaso mamo mo vatano Yahudi jewene mansaura.

Vatano Yahudi wonae wanave Yesus Kristus aiji

²⁷ Muno anawae Yesaya po vatano Yahudi mansaura pare:

✠ 9:9 Kejadian 18:10, 14 ✠ 9:11-12 Kejadian 25:23 ✠ 9:13 Maleaki 1:2-3 ✠ 9:15 Keluaran 33:19 ✠ 9:17 Keluaran 9:16 ✠ 9:20 Yesaya 29:16, 45:9 ✠ 9:25 Hosea 2:23 ✠ 9:26 Hosea 1:10

“Vatano mavaki susyo Israel rai onanawamo awa wanui ratore kakai, maisyare nayavo ntuna no mayano warave ramaisy.

Onawamo wanui, weramu nake inta obo nawirati Amisyre indati po mapaya awa mangke rai.

²⁸ Weye Amisyre indati pavave Po mangke rapatimu, Po raugaje vatano mine so mansai kobe.”*

²⁹ Maisyare anawae Yesaya po Yahudi maura nakato arono po ayao so raurairive wusyimbe to pare:

“Abo! Wama susye randamisy bintabo, maisyare munijo Sodom muno Gomora raumandi kobe,

ranivara Amisyre, opi apa vambunine ntiti, aemeno wansai java.

Weramu Amisyre po wansamayari ti wama nake inta ta no.”*

³⁰ Weti sya ana syare syo raura mi som: Vatano Yahudi jewene nawamo wo Amisyre akanije ramu muno wantatukambe indamu umamai no Amune rai. Weramu onawamo Amisyre po maveti umamai no Amune rai weye wanave Ai. ³¹ Yara Yahudi onawamo ware wo Ananyao Musa rarija dave inda umamai no Amisyre amune rai. Weramu wo raitoa marudi.

³² Wo raitoa marudi weye wanave kobe jeben. Yara wo rakarae ware awa ana udajaro maneme rai wemirati mo maveti umamaisy Amisyre amune rai. Wonayo Kristus ai, wepirati aurata irati oramo manakoe vatane awa kawi rantukamo rai. ³³ Maisyare Ayao Amisyre mo ratoo no wusyinoe rai, Amisyre pare:

“Inya! Risyamo syo Vatan inta aijaseo be akarive no munijo Yerusalem rai.

Opamo aurata irati orame inta rai, wemirati vatane awa kawi rantukamo rai ti utatayaje no min.

Weramu vatano are nawirati wanave Ai onawamo manimaumbe jeben, yara manayanambe Apa kove rai.”†

10

¹ Sya arakove, inaemeno sya kawasae Yahudi mansai rave, sya bekero rinanuga somamo indamu Amisyre po mansapaya awa ayao kakaije rai, weti ribe sambayambe Aijo mansai. ² Syo raen onawamo ubeke dave wo Amisyre arijat. Weramu wo arijato tugaive omamo wo raen kobe ramu. ³ Ware ubeker utavondi taune awa

unanuije so rai: ware wo Ananyao Musa rarijat indamu umamai no Amisyre amune rai. Weramu wantatukambe Amisyre apa unanuijo tugae Po ratayao indamu vatane umamai no Amune rai. Muno wonae utavondi Apa unanuije so raiji. ⁴ Weramu Ananyao Musa ama mbekere ndea mamai no Kristus a nui. Wirati vatan tenambe nanawirati wanave Kristus ai onawamo umamaisy Amisyre amune rai.

Vatano wanave Kristus ai awa ayao kakai rapaya

⁵ Wusyinoe Musa po unanuije raroron indamu vatane umamai no Amisyre amune rai, no taiso: “Vatano rui pirati po Ananyao Musa ama ayao rarijat tenambe tutir, opamo indati kova nuge nuganui.”*

⁶⁻⁷ Weramu Musa apa ayao kaijinta mo raura mare vatane maveti umamaisy Amisyre amune rai weye wanave Ai. Apa ayao mi so:

“Vemo nyo raura nanuga rai maisyare somai nora nyare:

‘Are pirati indati seo no munijo ntiti?’

Are pirati indati pasyo no munijo wene ama uga rai?’**

Musa apa ayao umaso ama ine no taiso: Wamare wamo Amisyre apa kove rakani indamu Po wansapaya kakaije rai, weamo vemo wansea no munijo ntiti indamu wamo rakani nora, weye Kristus pamo paje wansai no mine so rai to. Muno vemo wamasya no wene ama uga rai nora, weye Kristus pamo kovakato no wene rai to indamu Po wansapaya ayao kakaije rai. ⁸ Weti Amisyre apa kove mamom mararaijo wansai, maisyare Ayao Amisyre mo raura nakato, mare:

“Amisyre apa ayao mamom nde mararai wasai to.

Omamo no no wasawa rai muno no no wasanuga rai.”**

Ayao anave so mirati ayao reamo ravovo vatan tenambe mansai: ⁹ Ranivara nyo Yesus aura kakavimbe nawa rai nyare Opirati Amisy, muno nyanave no no nanuga nyare Amisyre po Yesus aijaseo kovakato no wene rai to, wea indati Amisyre po napaya nya ayao kakaije ama mangke rai. ¹⁰ Weye wamanave Yesus ai no wansanuga rai, weti Amisyre pare wamamai no Amune rai. Muno wamanave Ai ti wamo aura kakavimbe wansawa rai, naije Amisyre po wansapaya wama ayao kakai ama mangke rai.

¹¹ Maisyare Ayao Amisyre mo raura mare, “Vatano are nawirati wanave Ai onawamo manimaumbe jeben, yara manayanambe

* 9:28 Yesaya 10:22-23 * 9:29 Yesaya 1:9 † 9:33 Yesaya 8:14, 28:16. Raen tavon no 1 Petrus 2:6-8. Yerusalem mamom vatano Yahudi awa munijo akoe mije, ama tame rawain tavonamo “Sion” weye ntami no Unato Sion rai. * 10:5 Imamat 18:5; Galatia 3:12 * 10:6-7 Ulangan 30:12-13 * 10:8 Ulangan 30:14 * 10:11 Yesaya 28:16

Apa kove rai.”¹² Muno Amisy e apa kove umaso Po raugaje vatano Yahudi mansai muno vatano Yahudi jewene mansai kava, weye vatano Yahudi mansamuinyo vatano Yahudi jewene mansaije ramu. Amisy e pamo intabo, Opamo vatan tenambe awa Amisy. Muno Opamo po apa kovo manakoe raugaje mawebe irati vatan tenambe nanawirati ube sambayambe wo awaine mansai. ¹³ Weye Ayao Amisy e mo raura mare, “Are pirati po Amisy awain, opamo Amisy e po apaya kakaije rai.”¹⁴

¹⁴ Weti ranivara vatan inta po Ayao Kove ravovo mai rainy, weamo ana wo raranive ma mewena. Muno ranivara wo raranive ma mewena, weamo wanave Amisy e ai kakai. Muno ranivara wanave Amisy e ai rainy, weamo wo awaine kakai. ¹⁵ Wakoe! Ranivara vatane inta de po Ayao Kove ravovo mai jeben, wea umba indati? Kove mamu Amisy e po vatan inta matutir indamu wo Ayao Kove ravov. Maisyare Ayao Amisy e mo ratoe, mare, “Kove ngkov irati vatano ude wo Ayao Kovo Amisy e raugave mansai!”¹⁶

¹⁶ Weramu vatano Yahudi manuga rausiso Ayao Kove so rai ramu. Maisyare anawae Yesaya po raura no wusyinoe pare, “Amisy e winy! Vatan inta panave ayao reamo raugave so rai jeben!”¹⁷ Maisyare omai ti, wandaen: Vatane wanave arono wo Ayao Kove raraniv, muno wo raraniv arono vatane inta po Ayao Kovo Kristus ravovo mansai. ¹⁸ Weramu vemo wamo ratantona maisyare somai nora: “Vatano Yahudi wo Ayao Kove rarani dainy.” Yara syo raura syare wo ranaun to! Maisyare Ayao Amisy e mo raura no taiso:

“Ayao wo ravove maneka manakoe no mine so rai tenambe to,
nto nanto no munije ama ruduke raito tenambe to.”¹⁹

¹⁹ Muno vemo wamo ratantona maisyare somai nora: “Yahudi unanta ana wo raranive rai ramu.” Yara syo raura syare unanta rai to! Weye Musa po Amisy e apa ayaowe so raura:

“Vatano Yahudi weap, indati Syo wasaveti wapananyanyube weye Syo sya muinye rarorono vatano Yahudi jewene mansai.

Muno Syo wasaveti wapari rave weye Syo kove raugaje vatano wantatukambe Rinai nanawije mansai.”²⁰

²⁰ Umba Yesaya po raura vambunimbe akato, po vatano Yahudi jewene maura pare:

“Amisy e apa ayao mi so:

‘Vatano wo rinakani jewene wenanawamo soamo unande Rinai to.

Wo rinawaine jeben, weramu taune rinarorono mansai to.’”²¹

²¹ Weramu kawasaeyo Yahudi wonayo Amisy ai, weti Amisy e po mansaura pare:

“Nugoenta rave Syo vatane wato mawain ude Rinai,
weramu makari matu muno ubeta Rinaije ramu.”¹¹

11

Amisy e po vatano Yahudi inta matayao indamu apaura mansai

¹ Umba syo ranajo: “Indako Amisy e po taune apa kawasae Yahudi mansamaugo marambe taune Ai to rako?” Weramu indati jeben! Weye wasaemen: taune risyamo vatano Yahudi inta pi risy. Abraham pamo sya anena piye, muno rinavaki no Benyamin apa susye rai. ² Syo raura nakato syare: Amisy e pamo po apa kawasae mansamaugo marambe Aije ramu, nanawirati Po matayao amarom arono wusyinoe.”³ Inya! Wasaemen irati Ayao Amisy e rai, wemi mo Elia aura arono Elia pariyo vatano Israel mansai weti po awa ana udave rantutibe seo Amisy ai pare, ³ “Amisy e winy, vatane wato wo Nya anawae maotar ti makanive to. Muno tewa oramo anakotare rameseo Naije rai mamu vatane wato wo randami to. Soamo ribuisy ibeto Nai, weramu indati ubeker indamu wo inaubai tavon!”⁴ Amisy e apa ayao po rasakinav akare Elia ai pare, “Winyamo ntuna mumuimbe jeben. Yara Sya vatane awa wanuije nseo no ribuge kaururum nanawirati risyaura mansai. Vatano nanawije ubeaje yaro titi Baal rai ramu.”⁵ Maisyare wemai tavon no nugo naiso: vatano Yahudi mamaun kavinta nanawirati Amisy e apaura mansai. Wenawamo Amisy e po matayao mamaisyo Apa kove rai. ⁶ Weramu Po matayao mamaisyo taune awa ana udaijare raije ramu. Weye ranivara awa ana udave ngkove mbewar ti Amisy e po matayao ratire, wea indati mamaisyo Apa kove rai ramu. Yara tugae mamu Amisy e taune apa kove omi mbewar ti Po matayao indamu apaura mansai.

⁷ Weti noare rui? Maisyare so: Vatano Yahudi wo unanuije rakani indamu manuga mamu mamai no Amisy e amune rai, weramu wo rakanija marudi, unanta rai jeben. Vatano Amisy e po matayao obo nawirati unanta rai, yara vatano kaijinta

✧ 10:13 Yoel 2:32 ✧ 10:15 Yesaya 52:7 ✧ 10:16 Yesaya 53:1 ✧ 10:18 Mazmur 19:4 ✧ 10:19 Ulangan 32:21

✧ 10:20 Yesaya 65:1 ✧ 10:21 Yesaya 65:2 ✧ 11:2 Mazmur 94:14 ✧ 11:3 1 Raja-raja 19:10, 14 ✧ 11:4 1

onawamo makari matu Apa waine rai.

⁸ Maisyare Ayao Amisyé mo raura mare:

“Amisyé po awa ana wo ratantona raveti
ngkaumudi,
mansamije ntuba, muno mansamarikoam
mpapakiri.

Weti ndea unumeso unanta ayao tugae raije
ramu.”[✧]

⁹ Muno Daud po raura tavon pare:

“Amisyó winy, syare Nyo mangke raugaje
irati

vatano ukakainoanive mansai!

Syare awa mangke nande mai papabe
aronó mananibe

awa romane muno awa anaisyó kove
rautan.

Indati awa mangke raurata irati aviri
ntende mo makep;

muno raurata irati syeane nsawa mai.

¹⁰ Syare Nyo awa ana wo ratantona ravera
ngkaumudi

indamu wantatukambe ayao tugae rai.

Syare awa siuri mangke mpaya mansaije
jewen,

yara awa mona ngkapapo raija nuge
nuganui.”[✧]

*Vatano Yahudi wonae ti Amisyé po
varore raugaje vatano Yahudi jewene mai*

¹¹ Vatano Yahudi wanui wonae wanave
Kristus aiji, weti Amisyé ponae mai kobe
rako? Weramu indati jewen! Arono
vatano Yahudi makirive Kristus ai, weamo
Amisyé po varore raugaje vatano Yahudi
jewene mansai indamu wanave Kristus ai
ti Po mapaya awa ayao kakai rai, wirati
indamu vatano Yahudi wananyanyube
vatano Yahudi jewene mansai. ¹² Maisyare
omaisy, arono vatano Yahudi wo Kristus
awatambe, weamo mo Amisyé apa kove
raugavo vatano Yahudi jewene mansai.
Wakoe! Ranivara vatano Yahudi taune
usakinav ti wanave Kristus ai, wea indati
Amisyé apa kove nseo ti manakoe rave!

¹³ Vatano Yahudi jewene weap, soamo
syare syo raura wasai. Risyamó Amisyé
po inatutir indamu syo ayao Yesus Kristus
ravovo vatano Yahudi jewene wasai. Apa
anakero po raugaje rinai somamo syo
raura titive. ¹⁴ Weye ribeker syare sya
anakero no no vatano Yahudi jewene
wapa yasyine rai mo sya arakovo Yahudi
maveti wananyanyube wasai. Wirati
syo sya arakovo Yahudi inta maugavere
no Kristusa nui indamu Po mapaya awa
ayao kakaije rai. ¹⁵ Arono Amisyé po
kawasae Yahudi matugaro marambe weye
wanave jewen, omamo mo unsanda rausiso
vatano kaijinta una no mine so mansai

indamu Amisyé po maugav wakare taune
Ai. Maisyare omaisy, Amisyé po Yahudi
matugaro marambe so ama kove inta no
rai, weti arono indati Amisyé po Yahudi
maugave ude usisa Ai jakato, naije ama
kove miridi nseo. Wakoe! Amisyé po
Yahudi maugave usisa akato wemamo
raurata irati vatane inta kovakato no wene
ama uga rai!

¹⁶ Syare syo ananeneae inta raura: arono
inyoe ama mane makauje rai,* mane inta
mamo raunande Amisyé ai indamu mbe
rarorombe inyoe umaso mamo Amisyé
apaura ama mane rai tenambe. Muno
kaijinta mo ramai tavon: ranivara inyoe
ama ruke mamo Amisyé apaura rai, weamo
ama aneneme mamo apaura rai tavon.
Maisyare wemaisy, kawasae Yahudi awa
aneno Abrahama pe Isaka pe Yakoba pe
onawamo Amisyé apaura mansai, weti awa
ajavi wo mampame wenanawamo Amisyé
apaura mansai tavon.

*Inyo saitun nawaisyé me anate me yau-
rata irati vatano Yahudi muno Yahudi jew-
ene mansai*

¹⁷ Soamo syo ananeneae kaijinta raura:
Inyo saitun ntubai no nawaisy omamo rau-
rata irati vatano Yahudi mansai. Amisyé
po inyo saitun umaso ama aneneme inta
rataota to, umba inyo saitun kaije, omi
ntubai no anate rai, ama aneneme inta
rataotar ti rantitiki inyo saitun umawe ama
tuture rai jakato, umba ntubai kobe. Anen-
emo rantitiki omamo raurata irati vatano
Yahudi jewene wasai, weye weatavondi
wapaura kovo namirati Amisyé po raugaje
aneno Yahudi mansaije rai.

¹⁸ Weramu, vatano Yahudi jewene weap,
vemo wasararin nora! Muno vemo wapo
vatano Yahudi nanawirati Amisyé po
mamaugo marambe maisyare anenemo
rataotare umawe mansaura tatugadi nora.
Wasaemen: weapamo anenem bayave,
muno aneme omirati mo anaisyé raunanto
wantainye mo raisye ramu, yara wantainye
mo anaisyé raunanto aneme mo raisy.
¹⁹ Weramu vatano Yahudi jewene inta
wasararin dave, wapo ratantona wapare,
“Reamirati Amisyé anuga no reansai!
Weye Po Yahudi inta mamauta maisyare
anenemo ramauta wemaisy indamu reamo
manigwan.” ²⁰ Arakove, wapa ayao wato
no rai tugae, weramu wasaemen: Vatano
Yahudi umaso mamauta weye wanave
jewen, yara arakove weasugav akato weye
wapanave. Weti vemo wasararin nora,
yara wapo Amisyé asyaniv, Opi po vatane
inta maugav yara Po kaijinta mamauta.

✧ 11:8 Ulangan 29:4; Yesaya 29:10; Matusi 13:14-15 ✧ 11:10 Mazmur 69:22-23, 35:8 * 11:16 Ayao Yunani naiso
ama ananeneae mo roti raura, ama ine mamaisyó ananeneae inyoe ama mane makauje raije rai.

21 Wasaemen: Amisye aemeno taune Apa kawasae Yahudi mansai jewen yara Po inta mamauta, maisyare inyo saitun ama anenemo kakui umawe rataotar ti ramauta ramaisy. Weti ranivara Amisye po taune apa kawasae inta mamauta weye wanave jewen, indati ranivara vatano marane wapanave kobe jewen, weamo Po wasamauta tavon.

22 Weti wamo raen kakavimbe: Amisye pamo apa kove manakoe muno Apa mangke mpanyoan tavon. Amisye po mangke raugaje vatano Yahudi wonayo Aije mansai, yara Po apa kove raugaje irati vatano Yahudi jewene wasai. Muno ranivara wano tawan no Apa kove rai, Amisye anuga ngkovo wasai tutir. Weramu ranivara wano tawan rai jewen, wea indati Po wasamaugo marambe tavon! 23 Muno ranivara vatano Yahudi usakinav indamu wanave kobe, indati Amisye po maugav akato. Weye Amisye bambunin po maugav akare. 24 Vatano Yahudi jewene weap, Amisye po wasaugave wasisa Apa kawasae matavon, raurata irati inyo saitun no anate ama aneneme inta rataotar ti raugav rantitiki inyo saitun namirati ntubai no nawaisye rai jakato. Weapamo vatano Yahudi kakui jewen, weramu Amisye po wasaugave wasisa Apa kawasae matavon. Ranivara Amisye po Yahudi jewene wasaugave wasisa, weamo maweso Ai po taune apa kawasae Yahudi maugav akare. Omamo raurata irati aneneme raugav akare taune ama mote rai jakato.

Amisye bekobe vatan tenambe mine so mansai

25 Sya arakovo Yahudi jewene weap, Amisye po wasaugav wasisa Apa kawasae matavon, weramu vemo wasararin wapare wapo anakotare raen tenambe wenora! Tugaeyamo, vatano Yahudi nake inta makari matu ti wonae wanave Kristus aiji, weramu syare wapo Amisye apa bekero ngkokaibe so raen: Yahudi awa makari matu so indati no tawane ramu. Yara manya nava vatano Yahudi jewen nanawirati ude wanave Kristus aije awa wanuije ndea mamai to, naije umba Yahudi awa makari matu namije nsopi. 26 Arono naije indati Amisye po vatano Israel tenam mapaya awa ayao kakaije rai, mamaisyo Ayao Amisye mo ratoe no wusyinoe rai, Amisye pare:

“Akarijo po ayao kakai rapaya indati tipu no Unato Sion,†

Po Israel‡ maugav ti utavondi ayao mamun mine so rai jakatoe ramu.

27 Weye Sya urairi syo raokaisyo mai nami so:

Syo awa ayao kakaije rapaya mai.”§

28 Vatano Yahudi ube marovave Amisye ai weye wonayo Ayao Kovo Kristus rai. Wemirati ngkovo vatano Yahudi jewene wasai, weye soamo Amisye po Ayao Kove so raugaje wasai. Weramu Amisye anuga no Apa kawasae Yahudi po mapatimu mansai tutir, weye aemen Apa urairijo po raokaisyo awa aneno Abraham, Isak muno Jakob mansai rai. 29 Weye arono Amisye po vatane mawainde muno Po kove raugaje mai, weamo Apa waine muno Apa kove umaso mamo no tawan tutir, yara Po raugavo mansaora ramu.

30 Vatano Yahudi jewene weap, arono wusyinoe weapamo vatano wabeta Amisye aije jewen. Weramu arono Amisye apa kawasae Yahudi wonae ubeta Aiji, naije Po apa muinye raugaje wasai. 31 Soamo vatano Yahudi ubeta Amisye aije ramu, weti Apa muinye mamo Po rarorono Yahudi jewene wasai indamu masyoto makareye indati Po apa muinye raugaje Yahudi mansai jakato tavon. 32 Weye Amisye aneme mpaya vatan tenambe mansai indamu taune awa ayao kakai mo maokokae kobe, wirati indamu Po apa muinye rarorono mansai tenambe.

Kangkamambe Amisye ai

33 Tugae, Amisye apa kove manakoe rave! Muno akari mba dave muno Apa ana po raene ntapekan dave! Amisye apa ana po rapatimu mamo ntiti rave, vatane unanta rai kakai. Muno Apa ana po rave mamo vatane ware wo ranyanyuti indamu wo raen, mamaisye ramu. 34 Maisyare Ayao Amisye mo ratoe, mare:

“Vatan inta nanto Amisye apa ana po ratan-tona rai jewen,

Muno vatan inta po ananyao raugaje Ai jewen.*

35 Amisye apaura anakotare rai tenambe, weti vatane wo ana inta raunanto Ai ti ware Po awa ranijane, omamo mamaisye ramu.”*†

36 Weye anakotar tenambe mamo Amisye wepi po ranari vintabo, muno Po rai-janande vintabo, muno ama marane mamo makato Ai vintabo. Kangkamambe Aija nuge nuganui! Amin!

12

Weapo taune wasaunanta no Amisye ai

† 11:26 Munijo Yerusalem rawain tavonamo Unato Sion.

‡ 11:26 Ayao Yunani no naiso mare “Yakob.” Yakob apa tamo kaijinta mamo Israel, weti apa susyo po mampame mawainamo Israel, muno mawain tavonamo Yahudi.

§ 11:27 Yesaya 59:20-21 * 11:34 Yesaya 40:13 * 11:35 Ayub 41:11

¹ Inya, sya arakove! Amisyey apa muinye manakoe rave, weti risyare ibeker indamu weapo taune wasaunanta no Amisyey ai, omamo raurata irati wapa anakotaro wapo rameseo Ai. Weti wapo wasanasine muno wasanuga ratayao terawe Amisyey ai indamu ana ngkakainoanive inta raen no wasai jewen weti Amisyey anayanambe wasai. Wapa ana wapo rave so mirati wapa sambaya mamaisyoy Ai. ² Vemo weatavondi mine so ama ananyao rai nora, muno vemo weataobombe vatano mine so awa ana wo rave rai nora. Yara wapo wasakari raneka Amisyey ai indamu Po wapa ana wadatantona ranigwan nggwanyin indamu weapamo maisyare vatano gwanyin. Wea umba wapo Amisyey apa bekere raen kakavimbe: Apa bekero ngko dave muno mamaisyoy omi mo anuga raveti ranayanambe.

³ Amisyey po kove raugaje rinai indamu syo Apa ayao ravov, weti syo wasanyao taiso: Vemo wapo taune wasajaseo titive taune wapa ana wapo ratantona rai nora. Yara syare vatane nanentabo wapa ana wapo ratantona mamaisyoy, wapo taune wasanuga rataun mamaisyoy wapa anave Amisyey po ratodi wasai to rai. ⁴ Syo ananeneae inta raura taiso: Wansanasine mamoyo ama anakotare manui, maisyare wansakari, wansajoy, wansaneme we-maisyoy. Muno kotare inta ama anakere ramuinyoy inta ama rai, maisyare wansajoy ama anakere ramuinyoy wansaneme ama anakere rai. Weti wansanasine ama kotare manui, weramu wansanasine mamoyo intabo. ⁵ Weti vatano wamanave Kristus aije wamamo wansaurata irati wansanasine umasoy rai: Wamanui rave weramu wambe intaboy no Kristus ai. Muno wamo wansaeranande vambinibe weye Kristus po wansanugande tenambe intaboy irati anasine rai.

⁶ Wama anakere mbe kotabe, mamaisyoy kovo vambunino Amisyey po raugaje vatan nanentabo wansai tutudiy rai. Weti sya arakove, ranivara weapamo inta nya kovo vambunino Amisyey po raugaje nai mamoyo nyo Apa ayao nde nai ravov, weamo syare nyo rajjar mamaisyoy nya anave Amisyey ai rarijati. ⁷ Muno ranivara nya anakero Amisyey po raugaje nai mamoyo nyo vatane maeranande, weamo nyo maeranande kobe. Ranivara Amisyey po anakero kurune raugaje nai indamu nyo Apa kawasae mansanyao, weamo nyo mansanyao mavabe. ⁸ Ranivara Amisyey po kovo vambunine raugaje nai indamu nyananyaube, weamo nyananyaube kobe. Ranivara Amisyey po nawain indamu nyo

nya ananuge muno nya dojje ratodijyo vatano awa ananuge meweno majje mai, weamo nyo raunande manakoeve mai. Ranivara Amisyey po vambunine raugaje nai indamu wimbe akarive vatane mai, weamo nyo mansaugav kobe. Muno ranivara Amisyey po anakere raugaje nai indamu nyo muinyey raroron irati vatano kajijinta mai, weamo nyo rajjaro nanuga ranayanambe rautan.

Muinyey

⁹ Arakove, syare wapo muinyey rarorono vatane mai tugaive, yara vemo wamuinyoy mai ndaradambe nora. Wapo anakotaro ngkakainoanive ratugaro marambe, yara wapo ana ngkove rajjaro matuve. ¹⁰ Weapamo wabe arakobe no Kristus ai, weti syare wamuinyoy wasai vambinibe maisyare anui, rijate umuinyoy taune mansai no awa yavaruga ramaisyoy. Muno wapo wapa arakove mansaura titive. ¹¹ Wapo Amisyey apa anakere rajjaro panyoambe, yara vemo wapononae nora! Syare wapa mayare tapetakan muno wasanuga ntenami wapanapatambe Ai. ¹² Wasananibe weye wasanave Amisyey amen. Wasatawandi siurijey rai. Wapo sambaya raura seoy Amisyey ai tutir. ¹³ Syare wasaemeno wapa arakovo wanave Kristus aije mai nanawirati awa ananuge meweno mai ti wapo maeranande awa bekedaijey rai. Arono vatano marane ude, wapo maugav usen no wapa yavar.

¹⁴ Syare wapo Amisyey anajoy indamu Po kove raugaje vatano wanakakaive wasai mansai. Tugae, wapo Apa kove ranajoy indamu nde mansai, yara vemo wapanaa-matambe mai nora.* ¹⁵ Arono vatane manuga ranayanambe, syare weatavondi wasanayanambe matavon. Arono vatane woyov, wapoyov matavon. ¹⁶ Syare wasaumano wasai vambinibe. Vemo wapare weapi titi rave vatano kajijinta makivan nora, yara syare watantuna vatano awa tame ntiti jewene matavon. Vemo wasararin nora!

¹⁷ Arono vatane mansanuga mamunoy wasai, vemo wapo mamune rasakinavoy mai nora.* Yara wapo ana ngkove oby rave indamu mamai no vatan tenambe mansamuney rai. ¹⁸ Vemo wapayaoowi nora, yara wapo unanuijey rakani indamu wasanuga nsaumano vatan tenambe mansai. ¹⁹ Sya arakovo rimuinyoy wasai, vemo wapo mamune rasakinavoy vatano wo wasave tatugadi mansai nora, yara wapo varore raugaje indamu Amisyey apa pari jey ntendey mai. Maisyare Ayao Amisyey mo ratoy no taiso: Amisyey pare, "Risiyoy syo

* 12:14 Matius 5:44; Lukas 6:28; 1 Korintus 4:12-13 ✧ 12:17 Matius 5:39-44; 1 Tesalonika 5:15; 1 Petrus 3:9 ✧ 12:19 Ulangan 32:35

kakai rasakinavo vatano wo kakai rave mansai. Taune Sya varore mije, indati Syo awa mangke raugaje mai.”²⁰ Syare wapa ana wapo rave mamu maisyare Ayao Amisy ama ananyao so rai:

“Ranivara nyo marova maror; nyo anaisyeraunanto po raisy,
muno awa ngkangkamandi, nyo mana
raunanto po ramanam.

Nyo rave tai maisy, weamo nyo marova so indati samane apa ana po nave tatugadi rai.”²¹

²¹ Weti vemo wapo mamune rasakinavo vatano manuga mamuno wasajje mai nora! Weye ranivara wapo mamune rasakinavo mai, weamo mamune omi mo wasapinde to. Yara wapo kove rajjaro wasai indamu wapo mamune rapinde.

13

Wabeta akari pemerinta mansai

¹ Syare vatane nanentabo beto akarijo pemerinta mansai tutudi. Weye pemerinta awa ube akarive omamo wo raugav bintabo no Amisy ai. Muno Amisy opirati po vatane mapatimu ube akarive.

² Wepirati po pemerinta atayao indamu be akarive wansai, weti vatano are nawirati wonae ubeta pemerinta ai, onawamo maisyare vatano wonae ubeta Amisy ai mansamaisy. Indati awa mangke maje mai.

³ Ranivara vatane apa ana dave mamu mamaisy, weamo pemerinta pa po asyaniv nora. Yara vatano awa udave ngkakainoanive onawirati wo asyaniv. Weti sya arakove, ranivara wabeke damu wapo pemerinta asyanive jewen, weamo wapo anakotaro ngkove bo rave, wea indati pemerinta kangkamambe wasai.

⁴ Weye akarijo pemerinta pamo Amisy po atutir indamu po wasaeranande. Weramu ranivara wapa ana wadave ngkakai, weamo wapo pemerinta asyaniv weye apa vambunine no irati ai indamu po mangke raugaje wasai. Muno tugaeyamo Amisy po pemerinta atutir indamu po mangke Amisy raugaje vatano wo anakotaro ngkakai rave mansai.

⁵ Maisyare omai ti, wabeta pemerinta ai indamu vemo mangke Amisy ntende wasai jinta. Muno wabeta ai indamu mamaisy Amisy apa bekere rai.

⁶ Muno wemi mbewar ti wapo pajak ravae nanto pemerinta ai tavon. Wapo ravae indamu vatano pemerinta wo awa anakere rajjar, namirati Amisy po raugaje indamu wo ranawan.

⁷ Maisyare omai ti, pajak dako, romano doi rako, ana rui pemerinta po ranajo indamu wapo ravae, weamo wapo ravae kobe.⁸ Muno vatano

rui vayave ube akarive wasai, syare wabeta mai muno wapo mansaura titive.

Wamuiny irati vatan tenambe mansai, weye Kristus pakare mararai to

⁸ Arono wapo doi je inta ranajo wapo rauga no vatane inta ai, weamo wapavave wapo apa ravae akananto. Weramu syare wapo rajjar tutiro wasai mi som: muinye, wemirati syare wapo rarorono wasai vambinibe. Weye are pirati po muinye rarorono vatan tenambe mai, opamo beto Ananyao Musa rai vintabo to.⁹ Ananyao Musa mare: vemo nyo anaerere rave inya, vemo nyo vatane mao inya, vemo nyanaonoambe inya, vemo nanuga ntento vatano kajinta apa anakotaro apaura rajje rai jinya. Ananyao tenambe so muno ananyao Amisy kai rui tavon ranugande rateo intabove so mare: “Muiny irati nyo arakove mansai maisyare muno taune wimuinyo taune nai wemaisy.”¹⁰ Vatano are pirati muinyo apa arakova ai opamo po kakai rave ai ramu. Weti vatano muinyo opamo beto Amisy apa ananyao rai tenambe to.

¹¹ Arakove, syare wapo muinye raroron arono naiso weye ama varore indati mare nsopi. Arono wusyiny wamanawe Kristus aijoe, Apa masyoto pakare rajje mamu nggwaravainy, yara naiso Apa pakare mamu mararai kobe to. Weti wade wambe sea indamu wamo ana ngkove rarijat.

¹² Namane ndentoa kavinta raumandi, sansimane mare ntipu kobe. Weti wamo wama ana wandave ngkakai ravea nsopi, weye anakotaro ngkakai mamu namane amaura rai. Yara wana varo sansimane rai weti wade wamanatatayaube, maisyare naito wo awa anaiyu ratayao indamu usisa marova rai.

¹³ Syare wamo ana ngkove obo rajjar, indamu mamaisyo vatano wanya varo sansimane rai mansamaisy. Arono wapo one rave, vemo wamaeno awije rai nora. Vemo wapo anaerere rave nora muno wapo anakotaro nggwambe rave nora. Vemo wapayaowi nora muno wasanuga mparijo vatane mansai nora.

¹⁴ Syare wapa ana wadave mo Amisy Yesus Kristus apa ramaisy. Muno vemo wapo unai rakani indamu watavondi wapa bekere ngkakainoanive rai nora.

14

Ranivara nyo arakova apa koano po rarijate nsasye irati nyo ana nyo rarijate rai, vemo nyo aura tatugadi nora

¹ Ranivara wapa arakove inta apa anawe mayondi, weamo syare wapo augave siso wasatavon, vemo wapo awatamabe nora.

²⁰ 12:20 Amsal 25:21-22

²¹ 13:7 Matius 22:17-21; Markus 12:14-17; Lukas 20:22-25

¹³ 13:8 Matius 22:37-40

¹³ 13:9 Keluaran 20:13-17; Imamat 19:18; Ulangan 5:17-21; Matius 22:39

Muno vemo wapayaowi ai nora, vemo wapa-
pare, “Nya ana nyo ratantona mamaise
ramu,” wenora. ² Vatano nanawirati awa
anave ntindimu wo raura ware, “Anaise
kotaro rui yayave wamo rai kai.” Weramu
vatano nanawirati awa anave mayondi
ware, “Maere ama ine mamu raisyisi, weti
syo anawao obo raisy.” ³ Vemo vatano
po maere ama ine raisy po vatano po
raisye ramu aura tatugadi nora. Muno
vemo vatano po maere ama ine raisye
ramu po vatano po raisye aura tantunawi
nora. Weye Amisye anuga rausiso Po ya-
gav tenambe to. ⁴ Onayamo vatano yanap-
atambe Ai kava. Weti are nawirati weap?!
Wabeanimaibe wapo Amisye apa vatano
panapatambe Aije inta aura tantunawi?
Amisye wepi be akarive ai, weti Po apa
ana po rave raen pare mamai dako jeben
dako. Taune Apa varore miye, yara wapa
ma jewena! Weti ranivara wapa arakove
inta apa anave mayondi, indati Amisye po
vambunine raugaje ai indamu po ana ma-
maise rave.

⁵ Vatan inta wo masyote inta rapatimu
ware omamo masyoto akoe ma, yara
vatano kajinta ware masyote inta ra-
muinyo masyoto kajinta rajje ramu, yara
mamai tenambe. Syo anyao so raugaje
wasai: Ngko to! Vatan nanentabo nyo
rapatimu nanuga rai! ⁶ Weye vatano napi
po masyote inta rapatimu pare masyoto
akoe ma, po rave indamu po Amisye
aura titive rai. Vatano po maere ama ine
raisy, opamo po rave Amisye ai tavon,
weye po kove raura seo Amisye aijo rai
wusyimbe to. Muno vatano po maere ama
ine raisye jeben, opamo po rave Amisye ai
tavon muno po kove raura seo Amisye ai
wusyimbe tavon to.

⁷⁻⁸ Arakove, wangkov no mine somamo
indamu wamo taune wama bekere obo
rarijat omamo jeben. Yara wangkov
no mine so indamu wamo anayanambe
raugavo Amisye ai. Muno wangkakai
mamo maisyare wemai tavon. Weti
wangko dako wangkakai rako, wamamo
Amisye apaura wansai vintabo. ⁹ Wemi
mbewar Kristus kakai muno kovakato no
wene rai to, indamu Opirati Amisyo be
akarive vatano nanawirati ugwenen to
muno vatano nanawirati ujai ti utantunana
nene mansai tenambe.

¹⁰ Weti sya arakove, weapamo wapanave
Kristus ai kava, weti wabeanimaibe inta
wapo wapa arakove maura tantunawi
muno wapo awa ana udave rapatimu
wapare ngkove ramu? Wabeanimaibe
wabeare so? Wasaemen: masyoto
makareye wan tenambe wansyai no

Amisye amun indamu Po wansanajo wama
ana wandave ngkakai muno ngkove rai.
¹¹ Maisyare Ayao Amisye mo ratoe mi som:
Amisye pare,

“Tugae rave, Sya ana syo raurairive so mare
nande:

Indati vatan nanentabo ubeaje no Ri-
namun,
wo raura kakavimbe ware Ribui syirati
Amisy.”¹²

¹² Indati wamamo nanentabo po taune apa
ana po rave ranawan po raura kakavimbe
no Amisye amune rai.

*Vemo ana wapo rave inta mo arakove
augavo ayao kakai raron nora*

¹³ Maisyare omai ti, vemo wapo wasaura
tantunawi vambinibe akato inya, yara
wapo wasaurana nsopi! Syare wapo raura
patimuve no wasanuga rai indamu vemo
ana wapo rave inta mo wapa arakove inta
augavo ayao kakai raron nora. ¹⁴ Risyo
ibe intabove Amisy Yesus ai, weti syo raen
anaisye inta raisyisi jeben. Weramu
ranivara vatan inta po ratantona no anuga
rai pare, “Anaisye inta mamu raisyisi,”
weamo vemo po rai nora. Anakotaro
rui mirati po rakarae pare anaonae ma,
weamo anakotaro namije po raisyisi ai.

¹⁵ Weramu syare naemeno nya arakove
wato ai. Weye ranivara nya arakove po
naen nyo apa anaisyo po raisyisi raisy,
weamo anuga nsosobe. Nya arakove
umaso pamo Kristus kakai ai to, weti vemo
nya ana nyo raisye mo nya arakova apa
anave randami nora! Yara syare naemeno
ai, ti kove mamu nyo anaisye wato rai
nora. ¹⁶ Ranivara nya ana ndaura nyare
kovo mamaise inta mo nya arakove anuga
ransosobe, weamo kove mamu nyo rapaya
vayave indamu vemo nyo arakove po naura
tantunawi nora. ¹⁷ Weye arono Amisye
be akarive wansai, weamo koano anaisye
muno koano mana mbe mobe jeben.
Yara ana mbe mobe mamu wamamai no
Amisye amune rai, wansaumano wansai
vambinibe, muno wansanibe weye
Anawayo Vambunine no no wansanuga
rai. ¹⁸ Weye are pirati tavondi Kristus ai
tai maisy, opamo po anayanambe raugavo
Amisye anuga rai muno vatane wo aura
titive.

¹⁹ Weti wade wamo unanuije rakani
indamu wansanuga nsaumano wansai
vambinibe. Muno wamo wansaeranande
vambinibe indamu wansanuga mbam-
bunin. ²⁰ Tugae, anaisye mamu inta
mbe anaonaeve akatoe ramu. Weramu
syare wasaemeno wapa arakovo wepi
po anaisye inta raisyisiye ai. Ranivara
wapa arakovo napije po wasaen wapo apa

anaonaе raisy umba mo auga ti po ayao kakai rave, weamo ngkove ramu. Vemo wapo anaisye wato rai nora! Indamu vemo wapo Amisye apa anakerо ngkove no wapa arakove anuga rai rangkat nora! ²¹ Weti ranivara wapa arakova apa anave mayondi tai maisy, kove mamо wapo maere ama ine raisye jewen kai muno wapo angguri ramaname jewen kai. Muno anakotaro rui vayave mo wapa arakove augavo ayao kakai raron, vemo wapo rave nora.

²² Sya arakovo wapanave Kristus aije weap, syare syo raura kakavimbe wasaije so: Anakotaro maisyare maere ama ine rai dako jewen ndako, omamo anakotaro mamaun bayave. Syare vatan nanentabo nya ana nyanave anakotare so rai mamо nyo raokaisyo Amisye obo ai. Weti ranivara vatan inta panave pare apa ana po rave mamо ayao kakai ma jewen, weamo anayanambe. Anayanambe weye apa ana dave ntavondi apa anave rai. ²³ Weramu ranivara vatane inta anuga mamaun ti po rakaraebe pare, “Anaisye somamo raisyisyi rako? Syo rai kai rako?” umba po rai kobe, weamo ngkove ramu. Omamo ayao kakaije ma, weye apa ana po rave mo apa anave rarijate ramu. Muno anakotaro rui vayave no no anave rai jewen omamo ayao kakaije ma.

15

Vemo wapo taune wapa anayanambe rakani nora, yara wapo wapa arakove maer-anande

¹ Inya, sya arakove! Ranivara wama anave mbambunin, koveamo wamo vatano apa anave mayondi aeranande, muno wansatawandi ai mavabe. Vemo wamo taune wama wansanayanambe obo rakani nora. ² Syare vatan nanentabo wamo wama arakove aveti anayanambe, muno wamo aeranande indamu apa anave mbambunin. ³ Syare wama ana wandave mo Kristus apa ramaisy. Opamo po taune apa anayanambe rakanije ramu. Maisyare Ayao Amisye mo Kristus aura no wusyinoe no taiso: “Vatano wo Amisye aura tantunawi, onawamo wo rinaura tantunawi tavon.” ⁴ Ayao Amisye ama mo ratoe tenambe mamо indamu mo wansanyao. Apa Ayao mo wansanyao indamu wansatawandi muno wasanuga mbambunin, wirati wansanaveano Amisye amen. ⁵ Wepirati po kove raugaje indamu wansatawandi muno wansanuga mbambunin. Ribe sambayambe Ai indamu Po wasauga ti wasaumano wasai vambinibe, mamaisyo Yesus Kristus apa bekere rai.

⁶ Wirati wea tenambe wasanuga intabowe wakangkamambe Amisye ai, wepirati wama Amisy Yesus Kristus apa Aja piје.

Amisye po Ayao Kove raugaje vatano Yahudi jewene mansai

⁷ Syare wasanuga rausiso indamu wapo wapa arakove maugav usisa wasatavon, maisyare muno Kristus anuga rausiso wasai ti Po wasauga wasisa to. Syare wasanuga rausiso wasai vambinibe indamu vatane wo wasaen ti wo Amisye ararimbe. ⁸ Syare wasaemen Kristus de po vatano Yahudi mansaeranande indamu Po raroron kakavimbe: Amisye pamo teto Apa urairije rai. Apa urairije mamо Po raokokaisyo Yahudi awa anene mansai no wusyinoe. ⁹ Muno Kristus de tavon indamu vatano Yahudi jewene nao wo Amisye ararimbe weye Po kove rarorono mai. Maisyare Ayao Amisye mo ratoe mare: “Amisyo winy, risy kangkamambe Nai no vatano Yahudi jewene awa yasyine rai.

Rikinyo ansyerane rai indamu syo Nya tame rararimbe.”^{*}

¹⁰ Muno Ayao Amisye mo raura nakato mare:

“Vatano Yahudi jewene wade!

Wasananibe Amisye apa kawasae matavon.”^{**}

¹¹ Muno Ayao Amisye ama anemo kaijinta mare:

“Vatano Yahudi jewene wade tenambe, wakangkamambe Amisye ai!

Vatan tenambe wade wapo Amisye ararimbe!”^{**}

¹² Muno anawae Yesaya po ratoe tavon pare:

“Indati Vatane inta tipu no Isai apa susye rai.”^{*}

indamu be akarive vatano Yahudi jewene mansai,

muno Webo ai, mansanaveano Amen.”^{**}

¹³ Amisye pamo wansanaveano Amen. Risambayambe Ai syare Po wasauga ti wasananibe rave muno Apa saumane ntair-ijo wasanuga rai weye wapanave Ai. Muno syare Anawayo Vambunine mo vambunine raugaje wasai indamu wasanaveano Amisye amene manakoe nseo kobe.

Paulus apa anakerо po rajaro Amisye ai

¹⁴ Sya arakove, syo wasaen wapa ana wadave ngkove mamо manui rave. Muno syo wasaen wananta Amisye apa ayao rai ntapekan, weti wapo wasanyao rai

^{*} 15:3 Mazmur 69:9 ^{*} 15:9 2 Samuel 22:50; Mazmur 18:49 ^{*} 15:10 Ulangan 32:43 ^{*} 15:11 Mazmur 117:1

^{*} 15:12 Isai opamo Daud apa ajaya piје. Vatano tipu no susyo Isai rajje so pirati Yesus Kristus. ^{*} 15:12 Yesaya 11:10

vambinibe indamu wasanuga mbambunin. ¹⁵ Nyovara wao somamo syo ratoe tindimuve wasai weye ribeker wasaemen sya ayaowe rai. Weye Amisyeyo po kove raugaje rinai, ¹⁶ Po inatutiro Yesus Kristus apa anakere rai indamu syo Ayao Kovo Amisyeyo ravovo vatano Yahudijewene wasai. Sya anakere somamoraaurata syene awa anakere rai. Syene wo anakotare rameseo Amisyeyo ai, yara risyo weasaugav syo wasaunanta Amisyeyo ai. Weti Amisyeyo anayanambe wasai weye Anawayo Vambunine mo wasanugaratayao ngkakavimbe to.

¹⁷ Risyamo ibe intabovye Yesus Kristus ai, weti inanayanambe rikangkamambe sya anakero syo raijaro Amisyeyo aije rai. ¹⁸ Apa anakero syo raijaro no vatano Yahudijewene awa yasyine obo mirati syo rauratitive. Weye Kristus po vambunine raugajeyo rinai indamu syo vatano Yahudijewene maugavere ubeta Ai. Ubeta Ai weye wo sya ayaowe raraniv muno wo sya ana idave raen. ¹⁹ Weye Anawayo Vambunine mo vambunine raugajeyo rinai indamu syo anapaporainyeyo muno anainame rarorono mai. Weti syo Ayao Kovo Yesus Kristus ravovo tenambe to, syo raija kobe no munijoyerusalem mansanan nanto no propinsijoyerusalem. ²⁰ Sya bekere mamosyoroto no munijoyerusalem indamu syo Ayao Kove ravovo vatano nanawirati wo ranaundainyeyo mansai. Weramu ranivara kurunoyo kaijinta wo Ayao Kove ravovo no munijeyo inta rai to, weamo risyamo syare syo ravovo no naijeyo akatoye ramu, weye syonaesyoyo anakere rampamo vatano kai awa ma vone raiji. ²¹ Weti syo Ayao Kove ravovoyo vatano wo rarani dainyeyo mansai indamumamaisyoyo Ayao Amisyeyo mo ratoye so rai, mare:

“Vatano nanawirati Apa ayao ravovoyo mai rainy,

indati wo raen kakavimbe.

Muno vatano wo Apa ayao rarani dainy,

indati unanta rai kobe.”²²

Paulus pare beker po arakovo una no munijoyerusalem mapan

²² Nugoenta rave syare syoroto syo wasapan no munijoyerusalem, weramu sya anakere mo rinaoraive syoroto rai.²³

²³ Weramu soamo sya anakero no no munijeyo so mewen to. Tume kakai ribeker syo wasapan, weti ²⁴ syare syo raijore mi wato syo wasapan. Syo wasapana jewen, umba syoroto no propinsijoyerusalem. Syare wansanayanambe tenambe masoyote kavinta yai, umbaweyo syare wapo inaeranande sya unanui anyarai tutir ito

no Spanyol. ²⁵ Weramu wabayarati vavai, weye soamo syare syoroto no Yerusalem indamu syo Amisyeyo apa kawasae una no naijeyo maeranande rati. ²⁶ Soamo syo doijeyo inta raugav syo raunantoyo arakovoyerusalem nanawirati awa ananugemeweno maijeyo mai. Doijoyo syo raugayosomamoyo vatano Yahudijewene una no Anugano Amisyeyo Makedonia muno Akaya onawirati wo raunande, weye maemeno awa arakovoyerusalem mansai, ti wo raurapatimuve indamu wo doijeyo ranunugambe mai.²⁷ Muno wo raunande manugaranayanambe rautan. Wo awa arakove umaso maeranande omamoyo mamaisyoye, weye arono manasyinoye vatano Yahudijewenawirati wo Ayao Kovo Kristus rauranantoyo vatano Yahudijewene mansai. Weti ranivara vatano Yahudijewene wo awa arakovoyahudijewene maeranande akato, weamo mamaisyoye, raurata irati wo kove raugakare mai. Weye soamo vatano Yahudijeweneyo usisa Amisyeyo apa kovo po raugajeyo Yahudijewenarai tavon to. ²⁸ Weti manasyimbesyare syo doijoyo ranugane so raunantoyo arakovoyerusalem mansai. Arono syo raijara mewen to, indati syare syo wasapan no Roma, umba sya unanui anyarave ito kobe no Spanyol. ²⁹ Arono syore wasai, syoraen Kristus indati po kovo manakoye inta raugajeyo indamu syo raunandeyo wasai jakato.

³⁰ Sya arakove, Yesus Kristus no no wansanuga rai muno apa Anawayo Vambunine mo wansauga ti wamuinoyo vambinibe, weti ribekedave indamuwatavondiyorinai kobe ti wamo sambayarave Amisyeyo aijoyorinai. ³¹ Syare wapo Amisyeyo anajoyo indamu Po rinaoraivirati vatano wanave jewen una no Yudea mansai. Muno wapo Amisyeyo anajoyo indamuyorono syo doijoyo ranugane so raunantoyo arakovoyerusalem mansai, onawamoyo raugav manayanambe rautan. ³² Muno wapo sambayaurauraseo Amisyeyo ai indamuranivara Po rinamayar, indati syore wasai, inanugaranayanambe rautan. Muno arono rino wasarijat, indati rinanugaraijaseo mbambunin akato. ³³ Syare Amisyeyo tuna wasautan tenambe, Wepirati po kovo saumane raugajeyo wasanuga rai. Amin!

16

Paulus po kove ranutu terave apa arakovo una no Roma mansai

¹ Arakove, syare syo wama arakovoyanya inta raroronyo wasai, ama tame mirati Febe. Omamoyo mo anugano Amisyeyo no munijoyengkrea maeranande. ² Wanya somamoyo wama arakovoyamanave Amisyeyo

Yesus ai kava, weti syare wasanuga rausiso rai mamaisyo vatano wanave Yesus ai awa anaube ramaisy. Ranivara ama ana inta meweno rai ti mo ranajo wasai, syare wapo raunanto rai, weye wanya so mo vatane wanui maeranande muno ri tavon mo rinaeranande to.

³ Syo sya kove ranutugore Prisikila muno Akwila yai, ✧ onayamo sya arakovo wamo anakero Yesus Kristus rajia kava. ⁴ Sya arakove sonayamo kavintare igweneno inai indamu yo inavijuri kakaije rai. Weti syo kove raura nanto yai weye yo inapaya kakai rai to, muno vatan tenambe una no anugano Amisy no munijo Yahudi jewene utavondi wo kove raura nanto yai tavon. ⁵ Muno syo kove ranutu tavon irati Amisy apa kawasae nanawirati wanugan ube sambayambe no aya yavare rai.

Syo kove ranutu Epenetus ai, opirati sya arakovo inanuga no ai rave. Opamo vatano manasyin dave panave Yesus Kristus ai no propinsi Asia. ⁶ Syo kove ranutu tavono Maria rai, omamo mo anakere rajia panyoambe wasai to. ⁷ Muno syo kove ranutu irati Andronikus muno Yunias yai, onayamo sya arakovo Yahudi inta nanaije. Onayamo arono wusyinoe reamakova tenambe tanoano makova inta rai. Onayamo arakovo Yesus po matutire inta nanaije, aya anakere mamo vatan tenambe wo raura titive. Arono risya syanave Kristus ai rainy, onayamo yanave wusyimbe to.

⁸ Syo kove raura tavono Ampiliatus ai, risyamo muinyo ai rave weye ririmbe intabove Amisy Yesus ai. ⁹ Muno syo kove raura Urbanus ai, opamo wama arakovo wamo anakero Kristus rajia kava. Muno kove raura tavon irati Estakis ai, opamo inanuga no ai rave. ¹⁰ Kove raura Apeles ai, opamo vatano apa beto Kristus aije raen kakavimbe. Kove raura tavono Aristobulus apa yavaruga mansai tenambe. ¹¹ Kove raura Herodion ai, opamo sya arakovo Yahudi inta piye. Kove raura tavon irati arakovo wanave Kristus ai no Narkisus apa yavaruga mansai.

¹² Risyo kove raura Tripena me Triposa me yai. Wanya jirume so yo anakero Amisy Yesus rajiaro panyoambe. Muno kove raura tavon irati Persisa rai, wemirati sya arakovo inanuga no rai muno omamo mo anakero Amisy Yesus rajiaro panyoambe tavon. ¹³ Kove raura Rupusa pe^o apa akoya me yai. Rupusa pamo vatano Amisy Yesus po atayao terave Ai. Muno akoya mamo maisyare taune risya ingkoa mije weye mo rinaeranande rave. ¹⁴ Kove raura tavon irati arakovo Asingkiritus, Peregon, Ermes,

Paterobas, Ermas, muno arakovo utan-tuna matavon tenambe mansai. ¹⁵ Kove raura arakovo Pirorogus muno Yulia muno Orimpas, Nereus muno apa anama, muno Amisy apa kawasae utantuna matavon tenambe mansai.

¹⁶ Wapo kove raura wasai vambinibe weye wabe arakobe no Yesus Kristus ai. Anugano Amisy Kristus tenambe wo kove ranutugore wasai.

Ananyao maran

¹⁷ Sya arakove, syo ananyao so raugaje wasai: Wasyisyaube vatano wayaowi ti wapa anugane mporadi mansai! Wo wasaveti wapananepabe wapa anave rai, weye awa ananyao nsasye irati ananyao tugae wapo raugav nsiso wasanuga rai to rai. Weti wagwaravainyo vatane wato mansai! ¹⁸ Weye vatano maisyare so wo wama Amisy Kristus apa anakere rajiare jeben, yara taune manasine ama bekere omirati wo rarijat. Mansawa nsiridi ayao rai muno awa ayao man-avan, weti wo vatano wantatukambe maponae. ¹⁹ Weramu vatan tenambe wo wasaen weapamo wabeto Kristus ai, weti inanayanambe wasai. Ribeker wasakarikuga mbaro anakotaro ngkove rai, weramu anakotaro ngkakainoanive mamo syare meweno wasai. ²⁰ Amisy, opi po kovo saumane raugaje vatane mai, indati pavave Po Anakakai Akoe apinde muno apa vambunino mo wasajare randamisy indamu wapo atekar asyo no wasajo ate rai.

Syare wama Amisy Yesus apa kove no wasautan tenambe.

²¹ Timotius, wepirati sya arakovo irimo anakero Kristus rajia kava, po kove ranutugore wasai. Umba Lukiusa pe Yasona pe Sosipatera pe wo kove raura wasai tavon, onawamo sya arakovo Yahudi inta nanaw-ije.

²² Muno risy Tertius syare syo sya kove raura wasai tavon, weye wambe arakobe no Amisy Yesus ai. Risyirati syo Paulus apa ayaowe ratoe nyovara waowe so rai.

²³ Gayus po kove ranutugore wasai, opirati po Paulus rinaugav rinikijo arijat no apa yavar, muno apa yavare mi anugano Amisy ube sambayambe rai. Erastus, wepirati po munijo Korintus so ama doije randi, po kove ranutu wasai. Muno arakovo Kwartus tavondi po kove raura wasai tavon.

²⁴ Syare wama Amisy Yesus Kristus apa kove no wasautan tenambe. Amin!

Nyovara waowe ama maran

✧ 16:3 Arakov 18:2, 18, 26; 2 Timotius 4:19; 1 Korintus 16:19

✧ 16:13 Markus 15:21

²⁵ Kangkamambe Amisye ai! Wepirati po vambunine raugaje indamu wapa anave mbambunin mamaisyo Ayao Kovo Yesus Kristus syo ravovo wasai to rai. Ayao umaso mamamo rangkokaibeve nugoenta rave.

²⁶ Weramu soamo ayao umaso raroron kakavimbe, mamaisyo Amisy, wepi no pitawabe, Apa bekere rai. Weye Po apa anawae wusyin matutir wo ayao umaso ratoe muno Po vatane matutir indamu wo ravovo vatan tenambe no mine so mansai indamu wanave muno ubeta Ai.

²⁷ Kangkamambe Amisye ai, webo pirati Amisyo apa ana po ratantona ntiti rave! Wamo ararimbe Yesus Kristus apa tame rai ntoa nuge nuganui! Amin!

*Risy,
Paulus*

Nyovara Wao Manasyin Paulus Po Ratoe Anugano Amisye Mai No Korintus 1 KORINTUS

Paulus po kove raura

¹ Risyirati Paulus, risiyamo Amisye po inatutir indamu syo Ayao Kovo Yesus Kristus ravov, mamaisyo Apa bekere rai. Risye wama arakovo Sustenesa pe ² irimo nyovara waowe so ratoe anugano Amisy wana no Korintus wasai, wepirati Amisye apaura terave wasai weye wabe intabove Yesus Kristus ai. Po wasawain indamu weapamo Apa anugano wadandinit waino wasai, maisyare muno vatan tenambe usa no rui rui vayave are nawirati usambayambe Amisy Yesus Kristus ai. Wepirati be akarive vatano nanawije mansai muno be akarive wansai tavon. ³ Ririmare kove muno saumane no no wama Injayo Amisy muno wama Amisy Yesus Kristus no wasautan tenambe.

Paulus po kove raura seo Amisye ai

⁴ Anugano Korintus weap, risyo kove raura seo Amisye aijo wasai tutir. Syo kove raura weye Apa kove mammo Po raugaje wasai weye wabe intabove Yesus Kristus ai. ⁵ Wabe intabove Ai ti Apa kove maweso wasai, anakotare rai tenambe: Po vambunine raugaje wasai indamu wapo Apa ayao raura papirabe muno Po wasakarikuga raneka inda mbar ti wananta ananyao kotare rai. ⁶ Maisyare omaisy, syo wasaen reamo Kristus aura kakavimbe soamo no matuve wasanuga rai to. ⁷ Muno Amisye apa kovo vambunine inta meweno wasai jeben, yara Po raugaje wasai tenambe to indamu wapanapatambe Apa anakere rai. Muno naije tavon, weana Yesus Kristus apa de raije ranyut. ⁸ Kristus po vambunine raugaje wasai ti wabambunin ava nto ama marane rai, indamu arono pakare weapamo ayao kakai ama wame inta no wasai jakato nora. ⁹ Amisye opamo beto Apa urairije rai. Wepirati po wasawainde to indamu wabe intabove Apa Kavo ai, wepirati wama Amisy Yesus Kristus.

Anugano Korintus soamo mporadi ti manu

¹⁰ Sya arakove weap, wama Amisy Yesus Kristus apa vambunine no rinai weti syo wasawain indamu watavondi sya ayao so rai: Vemo wapayaowi nora, yara syare wapa ayao intabo indamu vemo wapa anugane mporadi nora. Syare weapamo wabe intabove, wasanuga intabo, muno

wapa ana wapo ratantona intabo. ¹¹ Sya arakove weap, vatano una no yavaruga Kloe inta ude rinai to, wo raura ware weaparare wasai vambinibe. ¹² Ayao mbeti syo wasaura mammo no taiso: Inta weapo wasaura wapare, “Risyamo Paulus wepi itavono ai,” yara vatano kaijinta wo raura ware, “Risyamo Apolos wepi itavono ai,” muno vatan inta ware, “Risyamo Petrus wepi itavono ai,” muno inta wo raura ware, “Risyamo Kristus wepi itavono Ai.”

¹³ Abo! Wabeanimaibe wapare wapo Kristus aporadi ti panui?! Vemo watavondi rinai jinya weye risiyamo vatan bayave pi risy. Risyamo inauseo sawa inyo kapite rajjo wasai jeben. Muno wasaugasya kuvuni mana rai indamu watavondijo rinai ma jeben. ¹⁴⁻¹⁶ Arono rino wasautan no wusyinoe, Gayus muno Krispus obo nairati syo yaugasya kuvuni mana rai. Muno rinaemene syo Stepanus muno apa yavaruga maugasya kuvuni mana rai tavon. Obo nao. Yara syo ratantona vatano kaijinta onawamo syo maugasya kuvuni mana rai jeben. Weti syo kove raura seo Amisye ai weye syo vatano kaijinta wasaugasya kuvuni mana rai jeben, weye syona vatane inta wo raura ware syo maugasya kuvuni mana rai indamu utavondi rinai. ¹⁷ Weye Kristus po rinatutir indamu syo vatane maugasya kuvuni omamo jeben. Yara Po rinatutir indamu syo Apa Ayao Kove ravovo vatano wanui mansai. Weti syayao papirabe mine so ama ana ratantona ntiti raije ramu, weye syona vatane wanave sya ayao ntiti raiji, weaveti Kristus apa kakai no inyo kapite rai ama vambunine meweno rai. Yara syare vatane wanave Kristus obo ai.

Amisye apa ana ratantona ntiti nsasye vatane awa rai

¹⁸ Vatano wantatukambe Amisye ai ti mangke nuge nuganuije mare nande mai onanawamo wo raura ware, “Ayao Kristus kakai no inyo kapite rai ama ine meweno rai.” Yara vatano wampirati Amisye po wansapaya wama ayao kakaije rai wamamo wamo raura wamare, “Ayao umaso mo Amisye apa vambunine raroron.” ¹⁹ Weye Ayao Amisye mo ratoe mi som: Amisye pare,

“Vatano ware awa ana wo ratantona ntiti rave nanawamo indati Syo sosobe raugasyo mansai indamu wantatukambe,

muno vatano ware awa ana wo ratantona mba dave nanawamo indati Syo awa ramauta indamu rakanive mansai.”^{*}

²⁰ Weti vatano makarikuga mba dave nawe, vatano unanta Ananyao Musa rai

^{*} 1:19 Yesaya 29:14

rave nawe, vatano awa ana ratantona ntiti rave nanawamo mine vone so ama nawa. Muno Amisyepo raroronpare mine so ama ana ratantona ntiti ama ine meweno rai. ²¹ Amisyepo ana ana ratantona ntiti no taiso: Po rapatimu pare vatano mine so wo aeno makarikuga mbare raije ramu, yara Apa bekere mamovatanowanave obo nawirati usisa Apamuni kove rai. Muno Po rapatimu pare reama Ayao Kovo Kristus reandavove omi mbewarvatano nanawije wanave, weramu reama ayao wato mamovatanomine so wo raura ware ama ine meweno rai. ²² Vatano Yahudi onawamo wonaewanave Kristus aiji weye ware wo anapaporainye raen dati. Muno vatano Yahudi jewenonawamowonaewanave Kristus aiji weye ubekero mine so ama ana ratantona ntiti obo rai. ²³ Weramu reamamo Kristus apakakai no inyo kapite rai webo mirati reamo ravov. Ayao Kovo namije mamovatanoyahudi wonayo rai muno vatano Yahudi jewene ware ama ine meweno rai. ²⁴ Weramu vatano are nawirati Amisyepo mawainde, vatano Yahudi muno vatano Yahudi jewen, onawamo manayanambe Ayao Kovo Kristus rai weye wo raen Kristus po Amisyepo vambunine muno Apa ana ratantona ntiti raroron. ²⁵ Kristus apakakai no inyo kapite rai omamovatanomine so wo raura ware ama ine meweno rai, weramutugae mamomo Amisyepo ana ratantona ntiti raroron, omi ntitive irati vatano mine so awa rakivan. Muno wo raura ware Amisyepo vambunine meweno Ai weye Apa Kavokristus kakai no inyo kapite rai, weramutugaeyamo Amisyepo vambunine manakoe vatane awa rakivan bintabo.

²⁶ Arakove, syare wasaemen arono manasyin Amisyepo wasawain wasisa Apakawasae mansaijoe. Arono naije weapamovatanowasakarikuga mbare wanui ramu, muno vatano wabe akarive wanui jewen, muno vatano wapa tame ntiti wanui jewen tavon. ²⁷ Weye Amisyepo vatano makarikuga mbare jewen mawainde indamu Po vatano awa ana woratantona ntiti no mine so mave samaneve. Muno Po vatano mayondi mawainde indamu Po vatano ubambunin no mine so mave samaneve tavon. ²⁸ Muno Po vatano mamaun no mine so muno vatano awa tame maje mawainde. Muno vatano nawirati vatano kaijinta wo mansaura tantunawi onawamo Po mawainde tavon. Maisyare omaisy, Amisyepare mine so ama anakotaro manakoe muno ntiti ama ine meweno rai. ²⁹ Wirati indamu vemo vatane inta ararin no Amune rai nora. ³⁰ Weye Amisyepo obo pi bewar ti wabe

intabove Yesus Kristus ai. Muno no Kristus ai, Amisyepo apa ana ratantona ntiti rarorono wansai no taiso: Kristus po wansaveti wamamai no Amisyepo amune rai muno wangkakavimbe, muno Po wama ayao kakai rapaya weti mpaya wansai so. ³¹ Maisyare Ayao Amisyepo ratoe mare, "Are pirati bekerpare ararin, weamo ararino Amisyepo ana po rave obo rai."²

2

Kristus apa kakai no inyo kapite raura

¹ Risya arakove weap! Arono ride wasai syo Amisyepo ayao ravovo wasai no wusyinoe, syayao papirabe rave jewen muno syo mine so ama ana ratantona ntiti raura ramu. ² Weye syo raija matuve no inanuga mamoyo anakotaro mine so inta raura ramu arono rino wasarijat. Yara Yesus Kristus webo pi no inakari rai, ti syo raura terave mamoyo syare Opamo kakai no inyo kapite rai to. ³ Arono rino wasarijat, rino sya mayondi rautan muno rijaniv ti itutar dave. ⁴ Muno sya ayao syo raura wasai mamoyayao papirabe mine so ama ana ratantona ntiti raije ramu. Yara arono syo raura wasai, Amisyepo ana Anawayo Vambunine mo ama vambunine raroron. ⁵ Wirati wapa anave mamovemo nsawa vatane awa woratantona ntiti rai nora, yara Amisyepo vambunin obo rai.

Amisyepo ana po ratantona ntiti

⁶ Maisyare wemai damu arono syananyube no vatano wo Amisyepo aene matu to awa yasyine rai, weamo syo ana ratantona ntiti inta ranyao mai. Weramu sya ananyao syo raugaje mamonsasye irati mine so ama ana ratantona ntiti rai, muno nsasyepo akarijo mine so awa ana woratantona ntiti rai tavon, weye akarijo nanawiso awa vambunine indati rakanive. ⁷ Reamo ravovo wasai mamoyo Amisyepo ana po ratantona ntiti mije. No taiso: arono nuge so ranari rainy, Amisyepo rapatimu indamu Po kovo ntiti raunande wansai, weramu Apa ana po rapatimu so rangkokambeve, weti vatano mine so wantatukambeve rai vintabo. ⁸ Muno akarijo mine so wo raen tavone ramu. Weramu ranivara wo raen datire ma, indati wo Amisyepo Yesus auseo sawa inyo kapite raije ramu, Wepi apa kove ntiti rave. ⁹ Maisyare Ayao Amisyepo ratoe mare: "Anakotaro Amisyepo ratayao tenambe irati vatano umuinyo Ai mansai omamo ntiti rave. Anakotaro namije mamovatanemansami mo raen dainy, mansamarikoame mo ranaun dainy,

muno ntipu no manuga rai rainy.”*¹⁰

Weramu Amisyé apa Anawayo Vambunine mo anakotaro namije rarorono wansai to. Weye Anawayo Vambunine nanto anakotare rai tenambe muno mo ayao ngkokaibe no Amisyé anuga rai raen tavon.¹¹ Vatane wamamo inta taune pirati po taune apa ana po ratantona raen, yara indati vatano kajinta wo apa raene jeben. Maisyare omaisy, vatane wamamo inta po Amisyé apa ana no aije raene jeben, yara Anawayo Amisy obo mirati mo raen.¹² Ana ratantona mine somamo Amisyé po raunande wansai jeben, yara Po taune apa Anawayo Vambunine raunande wansai. Apa Anawayo Vambunine raunande indamu wananta Amisyé apa kovo po raugaje wansai rai.

¹³Weti arono reamo vatane mansanyao, reama ayao mamó nori rati vatano mine so awa ana wo ratantona ntiti rai ramu. Yara Anawayo Vambunine ama ayao mo raugaje omirati reamo veano vatane mansanyao, nanawirati Anawayo Vambunine no mansanuga rai.¹⁴ Weramu vatano nanawirati Amisyé apa Anawayo Vambunine no maije jeben onawamo umayar wavakananto Ama anyanyao rai ramu, weye ware ama ine meweno rai. Unanta Ama anyanyao rai kakai, weye Anawayo Amisyé obo mirati mo vatane mauga ti unanta rai.¹⁵⁻¹⁶ Yara vatano Anawayo Amisyé no wansai wamamo wananta anakotar tenambe rai rui ngkov, rui ngkakai. Wananta anakotare so rai weye Kristus apa ana po ratantona no wansai. Weramu vatano mine so unanta irati vatano wamanave wama ana no wansai raije ramu. Ayao Amisyé mo ratoe mare:

“Vatane unanta Amisyé apa ana po ratantona rai jeben bintabo,

weti vatane wo Amisyé anyanyao kakai.”*¹⁰

Weramu wamamo Yesus Kristus apa ana po ratantona no wansai.

3

Anugano Korintus wayaowi

¹Arakovo Korintus weap, arono ride wasaijoe, weapamo maisyare vatano Amisyé apa Anawayo Vambunine no maije jebeno, yara weapamo maisyare vatano mine so mansamaisy. Weti syo anyanyao ntiti inta raura nande wasaije jeben, weye wapa anave Kristus aije mbambunine ramu, maisyare arikainyo tuvane mansamaisy.² Arono naije syo wasanyao maisyare arikainyo tuvan, weti sya anyanyao mamó raurata irati anaisyó nsaumane rai wemi arikainyo tuvane wo

raisy. Yara syo anyanyao ntiti inta raura wasaije ramu weye arono naije weamamai dainy. Muno naisoamo wamamai dainya nene tavon weye wananta anyanyao ntiti rai kobe rainy.³ Mine so ama vambunine no wasaija nene: Weaparijo vatano kajinta mai muno waparare vambinibe, weti weapamo maisyare vatano wantatukambe Amisyé ai mansamaisy. Mine so ama vambunine mo wasaijar ti wabeare wemaisy.⁴ Vatane inta una no wapa yasyine wo raura ware, “Reantavono Paulus ai.” Yara kajinta una no wapa yasyine wo raura ware, “Reantavono Apolos ai.” Arono wapo rauranare so, weapamo maisyare vatano wantatukambe Amisyé ai wemaisy.

⁵Weramu risyamo are pi risy? Muno Apolos opamo are pi je tavon? Syo raura kakavimbe wasai: Ririmamo vatano ririmanapatambe vayave Amisyé ai muno ririmo wasanyao indamu wapanave Amisyé Yesus ai. Ririmo anakero Amisyé Yesus po raunande reansai tetebe raijar.⁶ Reama anakere maisyare ananeneae so ramaisy: Rean tenambe reamo nawaisyé ranari: risyirati syo anare rayanyum, muno Apolos wepirati po mana rauvaro rai, weramu Amisyé wepi po anare ama tuba rakarimu.⁷ Weti ama mbe mobe mamó Amisyé, weye Wepirati po ama tuba rakarimu ti ntubai. Yara vatano po rayanyum muno vatano kai po mana rauvaro rai onayamo ibe mobe anakere so rai ramu.⁸ Risyé Apolosa pe ririma bekere intabo, muno Amisyé po rima anakere ama ine raunande vatane nanentabo ririnsai mamaisyó ririma anakere rarijati.⁹ Risyé Apolosa pe ririmbe arakobe ririmo Amisyé apa anakere raijar. Muno weapamo wasaurata irati Amisyé apa nawaisyé umaso rai.

Ananeneae kajinta mo ramaisy: Weapamo wasaurata Amisyé apa yavare rai tavon.¹⁰ Amisyé po apa vambunine raugaje rinai, ti syo anakero Amisyé ama ruke raugasya maisyare vatano akarije mbar po yavare ama aije raugasya nteto matuve wemaisy. Mewen, umba vatano kajinta po yavare ama kaipite ama sare rauseo ntuna aije umawe ama vone rai. Ananeneae so ama ine no taiso: Risyamo syuisyá syo wasanyao to indamu wapanave Yesus Kristus ai, umba kuruno kajinta ude wasai wo wasanyao akato. Weramu syare reamamo nanentabo reamo Amisyé apa anakere raijar mavabe indamu wapa anave ntindimu, maisyare vatane wo yavare rauseo ntet mavabe indamu ntindimu wemaisy.¹¹ Yesus Kristus taune aurata irati yavare so ama aije rai. Opamo

* 2:15-16 Yesaya 40:13

intabo dave Amisye po atayao pije, weti Wepirati wapa anave ama ruke pije.

¹²⁻¹³ Kuruno wo anugano Amisye manyao nawamo awa ananyao raurata irati anakotaro rave yavare ranari rai. Vatan inta nawamo awa ananyao mamai dave, omamo raurata irati emasije, perakije, oramo mamani rave yavare ranari. Orame so matu rave ti taname mo ranene kakai. Weramu vatano kaijinta awa ananyao mamaisye ramu, omamo raurata irati inyoe, insumai ngkanene, vuvije rave yavare ranari. Anakotare so mamaisye ramu weye taname mo ranena mo mangkur. Weti anakotaro rave yavare ranarije so ama matu raen kakavimbe arono taname nande rai. Maisyare wemai tavon arono Yesus Kristus pakare mine so rai, naije tanamo akoe nande ti mo vatan nanentabo awa anakero udaijar no mine so raroron kakavimbe rui mi ngkov, rui mi ngkakai. ¹⁴ Weti vatano rui pi apa anakere mamaisy weti taname mo ranen weramu mangkure jewen, vatano napije pamo Amisye po apa anakere ravae arono munije ama akari. ¹⁵ Yara vatano rui pi apa anakere mamaisye ramu ti taname mo ranen, indati vatano napije animambe weye Amisye po apa anakere ravae ramu arono munije ama akari. Apa anakere rakanive weye mamaisye ramu, weramu taune akanive jewen weye panave Kristus ai. Weti opamo Amisye po apaya weno nuge nuganuije rai, weramu maisyare vatano po taname raukir ti to pusyo amaisy.

¹⁶ Syare wananta sya ayao so rai: weapamo wasawaino Yavaro Amisye weye Anawayo Amisye ntuna irati wasanuga rai. ¹⁷ Are pirati po Yavaro Amisye randamisy weti wapa anugane mbe intabove akatoo ramu, weamo indati Amisye po vatane wato andami tavon. Weye Yavaro Amisy omamo Amisye taune apave rai, muno wepirati Amisye apa Yavar.

¹⁸ Vemo wapo taune wasaponae inya! Ranivara vatan inta po ratantona pare opamo akarikuga mba dave mine so ama ananyaowe rai, weamo mamaisye ramu. Syare po mine so ama ananyao ntiti wato rapaya, yara kove mamo pare opamo pantatukambe no mine so indamu apa ana po ratantona ntiti no Amisye ai. ¹⁹ Weye mine so ama ana ratantona ntiti mamo Amisye pare ama ine meweno rai. Ayao Amisye mo ratoo taiso: "Vatano nanawirati makarikuga mbaro mine so ama ana ratantona ntiti rai onawamo Amisye po awa ana wo ratantona ntiti raveano matopan."*
²⁰ Muno Ayao Amisye ama anemo kaijinta

mo ratoo tavon taiso: "Amisye po vatano makarikuga mba dave mansaen tenambe pare awa ana wo ratantona ntiti ama ine meweno rai."* ²¹ Maisyare omai ti, vemo vatane mansararino awa kurune mai nora, weye Amisye po anakotar tenambe ruanande wasai to: ²² Risye Apolosa pe Petrusa pe wapaura reansai tenambe, weye Amisye po reansatutir indamu reamanapatambe wasai. Muno mine som, masyoto naiso muno masyoto makanande omamo wapaura rai weye Amisye po ratayao tenambe indamu mo kove raugaje wasai. Muno wapa kova muno wapa wene mamo Amisye po ratayao indamu Po kove raugaje wasai. Weti wapaura rai tenambe. ²³ Muno weapamo Kristus apaura wasai muno Kristus opamo Injayo Amisye apaura Ai.

4

Paulus po anakero Kristus po atutiro rai raura kakavimbe weye vatano Korintus inta wanave Ai jewen

¹ Maisyare omai ti, ribeker syare vatane wo reansatantona reamamo vatano wanapatambe Kristus ai nawirati ream. Amisye po anakere raugaje reansai indamu reamo Apa bekeru ngkokaibe raura kakavimbe vatano mine so mai. ² Arono anakere raugaje vatano panapatambe inta ai, kove mamo po apa anakere wato rajaro matuve muno beto apa akari apa bekeru rai vintabo indamu apa akari panave ai. ³ Weramu ranivara weapamo inta wapare wapo sya anakere raura tantunawi, weamo wadaurakai. Muno ranivara akarijo po mangke rapatimu inta po sya anakere raura tantunawi, weamo po raura kai. Weramu taune risyo taune sya ana idave rapatimu jewen: rui mi ngkov, rui mi ngkakai. ⁴ Inanuga mo sya ana idave raen mare inta ngkakainoanive ramu, weramu risyamo mamai dako jewen dako, syantatukambe rai. Amisy Yesus obo pirati po inae Po ayao mamaisye rapatimugo rinai. ⁵ Maisyare omai ti, vemo weapamo wapo vatane awa ana udave raura tantunawi nora, weye Amisy Yesus apa masyoto de raije mamai dainy. Wepirati indati Po anakotaro ngkokaibe no kaumure ama uga raneka vintabo, muno Po vatane awa bekeru no manuga rai raniku indamu raen kakavimbe. Arono naije indati Amisye kangkamambe vatan nanentabo mansai mamaisyawa ana wo rave rarijati.

⁶ Risya arakowe, sya ana syo raura umawe mo Apolosa pe ririnsaura. Ririmbe unanuive wasai indamu wabeta ayao so rai: "Ananyao ratoo no Ayao Amisye rai omamo watavondi obo rai." Weti

* 3:19 Ayub 5:13

* 3:20 Mazmur 94:11

*

4:6 Paulus po ayaowe so ratoo weye vatano Korintus inta

ukangkamambe Apolos ai yara wonayo Paulus ai. Raen no 1:12.

vemo wakangkamambe vatan inta ai yara waponayo vatano kaijinta ai, wemai nora! *
 7 Wabeanimaibe wapare weapamo wapo vatano kaijinta makivan? Anakotaro rui wapaura rai omamo Amisye wepi po raunande wasai! Amisye po raunande wasai, weti wabeanimaibe wasararino rai? Wapare Amisye pamo po inta raunande wasai jewene obo wava! Weti mamaisye ramu!

8 Soamo wasararin wapare ana inta meweno wasai jewen! Wapare kovo vambunino Anawayo Vambunine mo raugaje mamamo wapaura rai tenambe to! Muno wapare weapamo wabe akari titive yara reamamo jewen! Abo! Ranivara wabe akari titive omamo tugae ratire ma, weamo reamarinsimbe weye indati weape wambe akari titive tenambe! 9 Weramu mamaisyo risya ana syo ratantona rajamo, vatano Yesus po reansatutire reamamo reambe akarive jewen, yara Amisye po reansaugusya reansayai dijabe. Weti somaisyamo Apa kawasae kaijinta wuisy, yara reamamo reandija dave. Reamaisyare vatano nanawirati mangke raugaje mai indamu ukakai no vatano wanui mansamume wemaisy, ti vatano mine so muno naito Amisye wo reama siuri raen tenambe.

10 Vatano Korintus, wapo reansaura wapare reamamo vatano reamantatukambe weye reantavondi Kristus ai, yara wapo taune wasaura wapare weapi wapa ana wadatantona ntiti weye watawondi Kristus ai! Wapare reamamo mayondi, yara weapi wabambunin! Vatane wo wasararimbe, yara wo reansaura tantunawi! 11 Mui yava unumeso reananta irati marore rai, reansawa ngkangkamandi, ansune meweno reansai weti intabo no reansanasine rai obo kobe. Muno vatane wo reansanepat, reama munije mewen ti reanajiva wanta no we, wanta no we, wana tawan no intai jewen. 12 Reamo anakere rajjar reansaneme rai indamu wamo anaisye inta ranijan. Arono vatane wanaamatambe reansai, reamo kove rasakinavo mansai. Arono wo reansanepat, reansatawandi rai. 13 Ranivara vatane wo reansaura tantunawi, reamo ayao kove rasakinav akananto mansai. Ndea unumeso vatan tenambe wo reansave tatugadi maisyare anaingkainyo wo ramauta ramaisy.

14 Risy ayao umaso ratoe more wasai indamu mbe samaneve wasai omamo jewen, yara indamu syo wasanyao maisyare weapamo taune sya arikainye nawirati weap. 15 Weye wapaura kuruno wo wasanyao Kristus aije mai wanui rave. Weramu vatano wo wasanyao dave ti wapa ajae waino mai onawamo wanui

rave jewen. Risyirati manasyin dave syo Yesus Kristus apa Ayao Kove ravovo wasai to, weti risyirati be ajaive wasaijo rai muno syo wasawaino sya arikainye nawirati weap. 16 Maisyare omai ti, ribeker syare watawondi sya ana idave rai weye ribe unanuive wasai. 17 Wemi mbewar syo Timotius atutiro wasai to. Timotius opirati sya arikainyo inanuga no ai rave weye syo anyao ti tavondi Amisy Yesus ai. Muno opirati beto irati Yesus ai tutir. Indati Timotius po wasanyao indamu ananyao itavondi rai weye ibe intabove Yesus Kristus ai omamo wasaemen dai. Wemirati mamaisyo ananyao syo raugaje anugano Amisye mansai no rui rui vayave rai.

18 Vatano una no wapa yasyine inta nawirati mansararin, weye wo rakarae ware vemo indati syakaore wasai ramu. 19 Weramu ranivara Amisye po rinamayari, indati syavave syakaore wasai. Arono naije indati sya ana syo raene mamamo vatano mansararine umaso awa vambunino wo wasaugave mamamo no rai tugae rako, wayao manakoe vayave rako? 20 Weye arono Amisye be akarive Apa kawasae wansai, wamamo wamayao bayave jewen yara wamo Amisye apa vambunino manakoe raroron. 21 Maisyare omai ti, arono indati risyore weasai, ana rui mirati weabeke dai: Wapare wasararina nene, indati syo wasanyao soowabe. Yara wapare wasakinavo wasararine wato rai, indati inaemeno wasai ti syo wasanyao saumambe.

5

Ayao kakai no anugano Amisye ama uga rai

1 Abo! Syo ranaun inta ware weapo ayao anaerere so rave taune wasaija: Anya inta pakaseo nikijo apa aja apa wanya rarijat. Yara vatano wantatukambe Amisye ai wo ayao anaerere umaso rave ramu, weye ayao kakai manakoe rave ti! 2 Abo! Wabeanimaibe wasamane rai ramu, yara weasararin dave rai?! Syare ngko dave mamamo wasakinav wasanimaumbe rai, muno wapo vatano napi po ayao kakaije so rave awatan pusyo anugano Amisye raora. 3-4 Soamo risyamo rigwaravainyo wasai, weramu inanuga mamamo no wasai tutir weti syo raura wasai maisyare risyamo rituna wasatavon no wato: Amisy Yesus apa vambunine no irati rinai, weti syo vatano serere wato apa mangke rapatimu to. Syare wapanugan, wasaemen risyamo inanuga no wasai muno Amisy Yesus apa vambunine no irati wasai, weti wapo mangke raugaje vatane wato ai: 5 Wapo awatambe anugano Amisye raora muno

wapo aunanta no Anakakai Akoe ai indamu anasine randamisy. Maisyare omaisy indamu arono munije ama akari Amisy Yesus po anawayoe augav po apaya kakaije rai.

⁶ Wasararine mamomo ngkove ramu. Syare weapamo wasaemen irati ananeneae so rai no taiso: “Ragi ama kamiye mamaun dave, weramu mo tepuno manakoe ratipu vintabo.”[✠] Ragi wato raurata irati ayao kakaije rai. Weti vemo vatane wato apa ayao kakai maneka ti mo wapa anugane rangkat nora! ⁷ Yara wapo vatane wato awatambe wasaora indamu weapamo anugano wadandinit, maisyare vatano Israel wo ragi ramauta arono wo Ono Paska rave indamu awa rotije nggwanin, ama ragije meweno rai. Tugae, syo raen weapamo wadandinit weye Yesus Kristus aunanto ti kakai indamu wasanuga ndandinit. Opamo aurata irati wama maero domba aotar arono Ono Paska rai. ⁸ Maisyare omai ti, wade wansambayambe, wamo wama anakotaro ngkakainoanive muno wama ayao kakai rapaya ntami, maisyare ragi wusyine ramauta, indamu wantavondi ananyao tugae rai, wansanuga kakuiwe rautan.

⁹ Arono nandijawe syo nyovara wao inta ratoe more wasai, syare vemo weatavobombe vatano anaerere ugavo marijat matavon nora. ¹⁰ Vatano syo mansaura umaso wenawamo vatano mine so nawa jewena. Tugae, vatano mine so awa ayao kakai ntapekano mansai, wo anaerere ugavo marijat, manuga ntantunaube, wo vatane maponae, muno ubeaje yare rai. Weramu vatano mine so una no rui rui vayave, weti wagwaravainyo mai kakai. ¹¹ Yara sya bekere mi som: vatano po taune aura pare opamo arakovo panave Kristus ai yara anaerere ugavo arija dako, anuga ntantunaube rako, beaje yare rai rako, po vatane maura tantunawi rako, maeno awije rai rako, po vatane maponae rako, weamo vemo weatavobombe irati ai jinya. Muno vemo watantuna wapisisyo vatano maisyare so matavon inya. ¹²⁻¹³ Mangke rapatimu vatano mine so mansai omamo risya syo rapatimuge ramu, yara Amisy taune pirati po mangke rapatimugo mai. Yara vatano una no wapa anugane ama uga rai onawamo taune weapirati wapo awa mangke rapatimugo mai. Weye Ayao Amisy mo ratoe taiso: “Vatano mamun opamo wapo awatano anugano Amisy raora.”[✠]

6

Vemo vatano wantatukambe Amisy ai wo wapa ayaowije rapatimu nora

¹ Arono rui weapayaowi, wabeanimabe wata wapo akarijo pemerinta po mangke rapatimu akani indamu po wapa ayaowije rapatimu wasai? Opamo pantatukambe Amisy ai! Yara weapamo Amisy apa kawasae nawirati weap, weti wabeanimabe taune wapo anakotare wato rapatimu jewen? ² Syo raura tugaive: Arono munije ama akari, indati Amisy apa kawasae wamamo wamo vatan tenambe mine so awa mangke rapatimu. Maisyare omai ti, wapare wapo anakotaro mamaun rapatimu, weamo wamamaisy aje! ³ Arono munije ama akari indati wamo naito Amisy awa mangke rapatimu tavon. Weti syo rakarae ana nsosobe mamaun wemi nande masyote yanteter vatano mine wansai, weapamo wamamaisy wapo rapatimu kai. ⁴ Weramu vatano mato sisa anugano Amisy wasai jewene nao wo anakotare so rapatimu, weamo mamaisy ramu. Weti arono wapayaowi, vemo wata wapo vatano maran maisyare so inta anajo indamu po rapatimu nora. ⁵ Syo ayao umaso raura indamu mbe samaneve wasai! Inya! Arono arakovo yanave Kristus ai inta yayaowi, syare wapo vatano no no wapa yasyin inta apatimu indamu po aya ayaowije rapatimu. Wapo vatano napirati akarikuga mbar anajo indamu po rapatimu. ⁶ Abo, anugane weap! Syo ranaun arakov inta pariyo apa arakov inta ai ti po augav yirija no akarijo pemerinta po mangke rapatimu obo amun. Akari wato pantatukambe Amisy ai, weti wata ai indamu po wapa ayaowi rapatimu omamo mamaisy ramu.

⁷ Arono wapayaowi wapa arakove inta ai ti wata wasyai no akarijo po mangke rapatimu amun, omamo mare Anakakai Akoe po wasapinde to. Yara ribeker syare ranivara vatane wo wasave tatugadi rako, wo wasaponae rako, weamo wasatawandi rai vayave kai. ⁸ Weramu taune weapamo wapo vatane mave tatugadi muno wapo maponae. Abo! Wapo rave taune wapa arakovo wanave mansai tavon. Mamaisy ramu!

⁹ Vemo vatane wo wasaponae nora, yara syare wananta sya ayao so rai: Vatano ukakainoanive indati mato sisa kawasaeyo Amisy be akarive mai matavone ramu, maisyare vatano anaerere uga vo marijat, vatano ubeaje yare rai, anya utitarive anya taune mansai, ¹⁰ vatano wanaonoambe, vatano manuga ntantunaube, vatano umaeno awije rai, vatano wo vatano kai maura tatugadi, muno vatano wo vatane

maponae. Vatano nanawiso indati mato sisa kawasaeyo Amisy be akarive mai matavone ramu. ¹¹ Wusyinoe weapamo inta wapa ana wapo rave maisyare uma ratodi we ramaisy. Weramu soamo Amisy po wapa ayao kakai wasanuga rarondom indamu ndandinit, muno apaura terave wasai, muno Po wasaveti wamamai no Amune rai, weye wapanave Amisy Yesus Kristus ai muno Amisy apa Anawayo Vambunine ntuna wasanuga rai.

Wasanasine mamō vemo anaerere ugavo wasarijat inya, weye Amisy apaura wasai

¹² Syo ranaun wapare, “Ana rui vayave wambeke dai, wamo rave kai.” Tugae, wapo rave kai, weramu wapa bekere inta mamō mo kove raugavo wasaije ramu. Wapare, “Ana rui vayave wambeke dai, wamo rave kai,” weramu syo raura syare vemo sya bekere inta mbe akarive rinai nora. ¹³ Muno syo ranaun wapo ayao kajinta raura taiso: “Vatane inta maror, indati pisyi kai. Weye anabone no indamu anaisy raisyo rai.” Weramu syo raura wasai: arono munije ama akari, indati Amisy po anabone muno anaisy yaupai ti yakanive tenambe. Vatane anasine mamō ratayao indamu manapatambe Amisy ai, muno Wepirati po anasine raeranande. Weti anaerere rave anasine rai omamo mamaisy ramu. ¹⁴ Weye wasanasine mamō arono munije ama akari indati Amisy po rajaseo ngkovakato, maisyare Po apa vambunine rave Yesu aijaseo kokvakato no wene ama uga rai.

¹⁵ Arakove weap, wasanasine mamō rato siso Kristus atavon to. Maisyare omai ti, vemo wapo Kristus anasine umaso raugav akasiso irati wanya anaerere rai jakato nora. Jewen dave! ¹⁶ Weye wandaen vatano are pirati nikijo wanya anaerere rarijat, weamo yanasine mbe intabove. Weye Ayao Amisy mo ratoe mare: “Anyā to apa wanya rai, yanasine mbe intabove.”* ¹⁷ Weramu are pirati aokae intabove Amisy Yesus Kristus ai, opamo apa anuga me Kristus anuga me ibe intabove.

¹⁸ Nanasine raugav nggwaravainy irati anaerere rai! Vatano anaerere ugavo mansarijat onawamo wo taune manasine raveti nggwambe. Ayao kakai kotar rui vayave vatane wo rave mamō nsasye, mo manasine raveti nggwambe tai maisyare ramu. ¹⁹ Wasanasine mamō Anawayo Vambunine ama yavare ma. Omamo ntuna no wasanuga rai muno Amisy wepirati po raugaje wasai. Weti weapamo taune wapaura wasai ramu, yara Amisy wepi apaura wasai. ²⁰ Amisy apaura wasai

weye Po wasavaeya mpatimu to. Maisyare omai ti, wapo wasanasine ratayao mamai dave indamu wapo Amisy aijaseo titive.

7

Vauname ama ayao

¹ Soamo syare syo ayao namirati wapo inanao rai no wapa nyovara waowe umawe rai raura akanande wasai. Ranivara anyā inta pare baunam ramu, weamo baunam jewen kai. Omamo ngkov. ² Weramu syo raenamo vatane wanui userer. Weti kove mamō anyā ubaunam, anyā nanentabo awaura wanya mai tutudi, muno wanya awaura anyā mansai. ³ Weti koveamo anyā pamo nikijo apa wanya rarijat muno wanya mamō nikijo ama anyā arijat. ⁴ Wanya amaura taune ranasine raije ramu, yara ama anyā apaura rai tavon. Muno anyā pamo apaura taune anasine raije ramu, yara apa wanya amaura rai tavon. Weti vemo yo yanasine ramavugo yai vambinibe nora. ⁵ Weramu anyā muno wanya inta wuribaunam to ripamo ranivara inta winyare wino mumuimbe indamu wimbe sambayambe Amisy ai masyote inta yai, weamo syare ripayao wusyimbe rati umba wimbe sambayambe kai. Yara vemo rigwaravainyo risai nugoenta rave nora. Wimbe sambayambea mewen, umba ripakare ripanya kava maisyare vatano ibaunam indamu vemo Anakakai Akeo po risatopan. Weye ripa bekero vauname ntapekano risai weti risatawandi rai mamaisy ramu. ⁶ Ayao neso mamō mbe ananyaube wasai, yara syo wasantitidi rai omamo jewen. ⁷ Risyamo Amisy po kovo vambunine raunande rinai ti ibaunam ramu. Weti ngko dave tavon ranivara vatan tenambe ubaunam jewen tavon maisyare rinamaisy. Weramu Amisy po kovo vambunine raunande vatane mai mamaisy Apa bekere rai. Po kovo vambunine raunande inta ai inda baunam nora, weramu Po kovo vambunine raunande vatano kajinta ai indamu baunam.

⁸ Vatano ubaunam jewen muno wanya kavini wenawamo vemo ubaunam nora, yara ibeker syare una vayave maisyare rinamaisy. ⁹ Weramu ranivara awa bekero vauname mamō mbambunin ti matawandi rai kakai, weamo syare ubaunam kai. Weye kove mamō ubaunam, vemo awa bekero vauname neso manakoeve ti matawandi rai kakai nora.

¹⁰ Yara nde irati vatano ubaunam to mansai, sya ananyao syo raugaje wasai mi so: (Ananyao somamo taune risya ananyao ma

jewen, yara Amisy Yesus apa ma.) Wanya mo ama anya aovan to, vemo mo auguje akato nora. ¹¹ Weramu ranivara mo auguje, kove mamo mo ama anya umawe aneme raijar umba makare mo aovan akato. Yara monae, weamo no vayave kai, weramu vemo mbaunam akato nora. Muno sya ananyao syo raugaje anya baunam to ai mamaisyo ananyao syo raugaje wanya raije ramai tavon.

¹²⁻¹⁶ Soamo syo ananyao inta raugaje wasai jakato (muno taune sya ananyao mi so, Amisy Yesus apa ma jewen). Ananyao so syo raugaje anya, wanya weapirati wabaunam to wasai. Ranivara anya inta pamo panave Kristus ai weramu apa wanya manave rainy, sya ananyao syo raugaje yai no taiso: Anya, ranivara nya wanya manave Kristus ai rainy weramu mbekero no tawano nai, weamo syare vemo nyo rauguje nora. Indati Amisy po nya wanya raeranande weye winyamo nyanave Kristus ai. Muno ripa arikainye wenawamo Amisy po maeranande weye nyanave Kristus ai, weti wo vatano wantatukambe Kristus ai awa arikainye mansamaisy jewen. Indako nya wanya mo nya anave raen, wea indati ntavondi manave Kristus ai tavon dako? Weramu ranivara monae manave muno monae no tawano nai, weamo moronto kai. Weye Amisy po wansawain indamu wangkovo saumane ama uga rai. Ranivara nya wanya nin kobe muno nyare wimbaunam akato, weamo wimbaunam kai.

Muno nde irati arakovo wanya wapanave weapirati wabaunam to wasai, sya ananyao mamaisyo umawe rai: Ranivara nya anya wepi panave Kristus ai rainy bekero no tawano nai, weamo syare vemo nyo auguje nora. Indati Amisy po nya anya aeranande weye winyamo nyanave Kristus ai. Indako nya anya po nya anave raen, wea indati tavondi panave Kristus ai tavon dako? Weramu ranivara ponae panave muno ponae no tawano nai, weamo poroto kai. Indati nyare wimbaunam akato, weamo wimbaunam kai.

¹⁷ Ananyao syo raugaje anugano Amisy mansai no rui rui vayave no taiso: Syare vatan nanentabo no tawan no apa varoro rui mirati Amisy Yesus po rapatimugo ai arono manasyin Amisy po awainoe. ¹⁸ Maisyare so: vatano Yahudi wo koano sunat rarijat, weramu vatano Yahudi jewen wo rarijate ramu. Weti arono vatano Yahudi inta panave Yesus ai, weamo po koano Yahudi wato rarijat kai. Muno arono vatano Yahudi jewene inta panave Yesus ai, weamo vemo be sunative inya. ¹⁹ Weye vatane ube sunative rako jewen dako, omamo ama ine meweno rai kava. Yara

mbe mobe mamo wambeto Amisy apa ananyaoewe rai.

²⁰ Syare vatan nanentabo po apa varore raijar maisyare arono manasyinoe Amisy po awain ti panave Yesus ai. ²¹ Weti syo raura vatano aro wasai: Arono Yesus po wasawainde ti wapanave Aijoe, wapa wabe arove mo wasaijar tutir, weramu vemo no wasanuga ransosobe nora, yara wapanapatambe wapa akari ai kobe rave. Weramu ranivara wapa akari anuga ngkovo wasai ti po wasapaya wapa wabe arove wato rai, weamo wata kai, wasanuga ranayanambe rautan. ²² Wasaemen: arono Amisy po vatano aro inta awain ti panave Amisy Yesus ai, weamo vatano napije soamo maisyare apaya to, weye Amisy Yesus po apaya apa ayao kakaije rai. Weramu arono Amisy po vatano aro jewen inta awain, wea soamo Kristus apave ai ti opamo maisyare Kristus apa vatano panapatambe Ai pije. ²³ Amisy apaura wasai weye Po wasavaeya mpatimu to. Maisyare omai ti, vemo wabe arove irati vatane mansai jakato nora. ²⁴ Weti risya arakove weap, syare vatan nanentabo no tawan no apa varore rai maisyare arono manasyinoe Amisy po awain ti panave Yesus Kristus ai wemaisy. Muno no tawan irati Amisy ai.

Vatano ubaunam dainy muno wanya kavini

²⁵ Soamo syare syo ayao vatano ubaunam jewene raura kakavimbe. Anakotare somamo Amisy Yesus po ananyao inta raugaje jewen, weramu syare syo sya ana syo ratantona raura. Risyo vatano Amisy po apa muinye rarorono rinai, weti wapanave sya ayao rai omamo mamaisyo. ²⁶ Anakotaro nsosobe nande wansai manui no mine vone so. Maisyare omai ti, syo ratantona syare vatan tenambe una tawan no awa varoro Amisy po raugaje mai rai. ²⁷ Weti nde irati nya baunam to ai, sya ananyao mamo vemo po apa wanya rauguje nora. Yara nde irati vatano baunam jewene ai, syare vemo po wanya raovan nora. ²⁸ Weramu nya napirati po wanya raovan, po raovane somamo ayao kakai ma jewen. Muno wanya namirati mbaunam, omamo ayao kakai ma jewen tavon. Vatano ubaunam, indati anakotaro nsosobe manui nande mansai jaje. Weti sya ananyao umawe syare, "Vemo wimbaunam nora," omamo syo raugaje indamu vemo ana nsosobe nande wasai nora.

²⁹ Risya arakove weap, wama masyote no mine vone so manui akatoe ramu. Maisyare omai ti, arono naiso kobe syare watavondi ananyao so rai: Anya wo wanya raovan to, syare vemo wo awa

wanya obo ratantona inya, yara wo Amisy e apa anakotare ratantona tavon. ³⁰ Vatano woyov wenawamo, syare vemo wo awa anakotaro manimaumbe rai obo ratantona nora. Muno vatano wugoen wenawamo, syare vemo wo awa anakotaro manayanambe rai obo ratantona nora. Muno vatano wo ananuge ramavun ti awaura rai wenawamo, vemo wo awa ananuge umaso bo ratantona nora, weye awa ananuge indati raumandi jaje. ³¹ Raura tumaimbe, anakotaro rui vayave no mine somamo vemo wamo obo ratantona tutir inya, weye mine so muno ama anakotar tenambe indati raumandi vintabo.

³² Ribeker syare vemo wasanuga ma-mauno anakotaro mine so rai nora. Vatano baunage jewen, weamo anuga no irati Amisy e obo ai. Po atantona tutir pare, “Animaisy e mirati syo rave indamu Amisy e anayanambe?” ³³ Weramu anya po wanya raovan to pamo anuga no irati anakotaro mine so rai. Po ratantona tutir pare, “Animaisy e mi syo rave indamu sya wanya ranayanambe?” ³⁴ Maisyare wemaisy, weti apa ana po ratantona manui, nanto nande anakotaro mine so rai.

Wanya mbaunage jewen muno wanya ngkamuramo mansae wenawamo manuga no irati anakotaro Amisy e rai. Weti ubeker tutir indamu awa ana udave muno awa ana wo ratantona mo anayanambe raugavo Amisy e ai. Yara wanya mbaunam to omamo ranuga no irati anakotaro mine so rai. Muno ama ana mo ratantona mamomare, “Animaisy e mi syo rave indamu sya anya anayanambe?”

³⁵ Weti vaunage mamomamo syo wasaoraive mamomamo jewen, yara anakotare umaso syo raura indamu ngkovo wasai tutudi. Sya bekere mamomamo wapo ana mamaisy obo rave, muno wasanuga ntenami wapanapatambe Amisy e ai, wapo Apa bekere obo ratantona yara wapo anakotaro kajijinta ratantona nora.

³⁶⁻³⁷ Arono nandijawe wapo inanajo anakotaro kajijinta rai tavon, no taiso: Anya inta po apa vainye rave wanya inta rai, weramu po raura patimuve to pare, “Maneai rati,”* weti animaisy e mi po rave arono apa bekere pare niki wanya so rarijate mamomamo po ransopi kakai? Anya wato pare, “Abo! Sya ana syo ratantona wanya so rai mamai kobe ramu. Weti indako kove mamomamo ririmbaunam kai rako?” Sya ananyao syo raugaje ai mamomamo po raovan kai, weye vaunage mamomamo ayao kakai ma jewen. Weti syare anya tavondi taune apa ana po ratantona rai. Ranivara pare

atawandi apa bekere manakoe irati apa wanya po vainye rave rajje rai jewen, weamo baunam kai. Weramu ranivara po rapatimu anuga rai pare atawandi rai, weamo maneai kai. Apa ana po rave somamo ngkov. ³⁸ Maisyare omai ti, vatane po apa wanya raovan omamo ngkov. Weramu vatane baunage jewen omamo ama ngkov ntiti rave kobe.

³⁹ Wanya mbaunam to mamomamo ama vaunage so mo ama anap pe yaokaisy ti matu. Vemo mo auguje inya. Weramu ranivara ama anya umaso kakai, weamo ananyao vaunage mo wanya so raokaisy akatoe ramu yara mpaya rai to. Weti are pirati ranuga no ai, weamo po raovan akato kai. Weramu syare anya wato pamo vatano panave Amisy e Yesu ai. ⁴⁰ Weramu no irati risya syo ratantona rai, syare wanya umaso mbaunam akato jewen kai omamo ama ngkove manakoe rai.† Taune risyo ananyao raugaje tai maisy, weramu syo ratantona Anawayo Amisy e no rinautan arono syo raura so.

8

Maero rameseo irati yare rai

¹ Arono nandijawe weapo anakotaro anaisy o rameseo yare rai ranajo rinai. Weti syare syo ananyao raugaje wasaijo rai. Syo raen vatane inta una no wapa yasyine rai ware, “Wan tenambe ana wamo raene mamomamo manui rave to.” Tugae, wamo anakotaro manui raen, weramu vemo wansararino rai nora. Yara muinye mamomamo ama ngkove mo ana raene umawe rakivan, weye arono wamuinyo wama arakove mai, weamo wamo manuga rajjasea mbambunin. ² Are pirati ararin pare apa ana po raene mamomamo to, opamo po raen dainya nene muno nanto rai rainy. ³ Yara vatano muinyo Amisy e ai, opamo Amisy e po aen.

⁴ Wapa ana wapo inanajo rai no taiso: Wapare maero rameseo yare rai mamomamo ama ine rai dako jewena e? Syare syo raura kakavimbe wasai. Wamo raenamomamo yare omamo Amisy e tugae jewen. Amisy e pamo intabo pa, muno kajijinta no intai ramu. ⁵ Vatano wantatukambe Amisy e ai onawamo wanave ware awa “amisy e” wanui una no naumo warae muno una no mine so rai. Muno anakotaro vatano mine so usambayambe rai muno ubeta rajje manui. ⁶ Weramu wamomamo wamanave Amisy e pamo intabo pa, Wepirati Injajo Amisy e. Wepirati po anakotare ranari

* 7:36-37 Ibaunam dainy weye yare yanapatambe Amisy e ai wusyimbe rati. † 7:40 Ama ngkove manakoe rai weye ranivara mbaunam akato jewen, indati manapatambe Amisy e obo ai tutir.

vintabo, muno Po vatane wansanari indamu wamanapatambe Ai muno wansambayambe Ai. Muno wama Akarijo Titi pamo intabo, Wepirati Amisy Yesus Kristus. Wusyinoe Injayo Amisy po Yesus Kristus atutir indamu Po anakotaro mine so muno anakotaro naumo warae ranari tenambe. Muno Amisy Yesus opirati po kovo wanyine raugaje wansanuga rai.⁶

⁷ Weramu wama arakove inta unanta anakotare umaso raije ramu weye awa anave ntindimu rainy. Wusyinoe usambayambe yare raive, weti soamo ranivara wo maere ama ine inta raisy, wo ratantona ware, “Abo, maere ama ine somamo vatan inta po raunanto yare rai to!” Weti arono wo raisy, wo rakarae wo ayao kakai rave, weti mo manuga ransosobe weye awa anave mayondi. ⁸ Weramu wo anaisy e umaso rai dako jewena rako, mamai bayave, weye anaisy e mammo mo mansaugav mararajo Amisy e aije ramu. Wamo anaisy e raisy omamo mo Amisy e aveti anayanambe wansai jewen. Nsakinav akareamo wamo anaisy e raisy e jewen omamo mo Amisy e aveti pariyo wansai tavone ramu.

⁹ Weti anakotare so wapo rave mamaisy o taune wapa bekere rai. Weramu wasyisyaube! Vemo wapa ana wadave inta mo vatano awa anave mayondi maugavo ayao kakai raron nora. ¹⁰ Maisyare so: Weapamo inta watantuna wapisyi no yavaro sambayambe yare rai weye wapo raen anaisy e mammo anakotaro Amisy e po ratore ramu. Weramu ranivara wapa arakove inta napirati apa anave mayondi po wasaen, indati pare tavondi po anaisy o rameseo yare rai raisy. Po raisy, weramu po yare wato bo ratantona weti ngkakai jirati ai. ¹¹ Weapamo wapo anakotaro anaisy e umaso raen omamo Amisy e po ratore ramu, weramu wapa arakove wato apa anave mayondi ai ti po raen kobe jewen, weti mo augabe ti apa anave mandamisy. Kristus kakai indamu Po wapa arakovo napije apaya apa ayao kakaije rai, weti wabemo wapo apa anave randamisy inya! ¹² Ranivara wapo apa anave mayondi randamisy, weamo ayao kakai ma. Maisyare omaisy, wapo ayao kakai rave irati Kristus taune ai tavon to ije. ¹³ Maisyare omai ti, risyamo syare ranivara syo maere ama ine raisy e mi mbewaramo sya arakove inta po ayao kakai rave, wea indati syo inta raisy akato jewen kai. Wirati inda vemo syo sya arakove augavo ayao kakaije raron nora.

9

Paulus pare opamo arakovo Yesus po atutir Apa anakere rai inta pi je

¹⁻² Anakotaro rui vayave syare syo rave, weamo syo rave kai. Risyamo vatano Amisy Yesus po inatutiro Apa anakere rai pi risy. Muno risyamo syo wama Amisy Yesus aeno taune inamije rai to. Weramu syo ranaun vatane inta wonayo rinai ware risyamo Yesus po inatutire jewen. Ranivara vatano kaije wo raura tai maisy, weamo wo raura kai. Weramu weapo raura tai maisy omamo mamaisy e ramu, weye sya anakere ama ine mammo anugano Amisy weap, weye wapanave Ayao Kovo Yesus rai arono manasyinoe syo ravovo wasai to. Weti wapanave Amisy Yesus aije mo rarooron kakavimbe risyamo vatano Po inatutiro Apa anakere rai pi risy!

³ Inya, vatano wepirati waponayo sya anakere rai weap! Wapare wapo sya anakere ranyanyuti vayave, weamo syo inaura kakavimbe no taiso: ⁴ Risyamo vatano Amisy Yesus po inatutiro Apa anakere rai, weti sya anaisy e, sya mana idamaname mammo vatano syo mansanyao wo raunande omamo mamaisy. ⁵ Arakovo kaijo Amisy Yesus po matutire newawamo wo awa wanya maugav tavono awa unanui anya rai. Muno arakovo Petrusa pe Yesus apa rijate nawe wo awa wanya maugav tavon. Risyamo ibaunam dainy, weramu syo ratantona ranivara syare syo wanya manave Yesus aije inta raovan datire, indati syo raugav ntavono sya unanui anya rai omamo mamaisy. ⁶ Indako risye Barnabasa pe riribuim irati irima anaisy e mammo taune ririmo rakani terave rako? Syo ratantona mamaisy e ramu, weye arakovo kaijo Amisy Yesus po matutire nawamo awa anaisy e raunande mansai.

⁷ Wamo raen vatane wo anakere raijar, weamo wo ama ine raugavo taune mansamarom. Wandaen tavon naite pamo po anakere raijar, weamo doije rave avae. Vatano po angguriye rayanyum apa nawaisy e rai pamo po ama mane raisy. Muno vatano po maero kambine rakum pamo po ama ukame ramanam. ⁸ Anakotare umaso mammo vatane awa ana uaura obo ma jewen, yara Ananyao Musa mo raura tavon. ⁹ Weye Ananyao Musa ama ayao inta mo ratoe mare: “Winyare nyo sapije inta auga damu po anakero nawaisy e raijar, vemo nyo aoraijo po kasyambo no no nawaisy o namije inta raisy inya. Yara po rai kai, weye po anakere raijaro panyoambe.”^{*} Weramu sapi obo pirati Amisy e po aeranande jewen. ¹⁰ Yara wamirati Amisy e po wansaura ayao umaso rai. Weye vatano wo nawaisy e rayare

muno vatano wo anare rayanyum, wo rave weye wanave indati wo ama ine raugav.

¹¹ Arakove weap, syo raura ananeneaebe umaso indamu wapo ranaun. Arono reamo Amisy apa ayao ravovo wapa yasyine rai, omamo raurata irati vatano wo iru kamije rangkiki no nawaisy. Weti maisyare muno vatane wato ubeker wo nawaisy ama ine raugav wo raisy, maisyare omai tavon reambeker wapo ana inta raugavere reansai. Muno syo ratantona wapo raunande reansai omamo mangkeo wasai jewen. ¹² Ranivara arakovo kaijo Yesus po matutire manave wasamen indamu wapo awa ana ubekedaije raunande mai, weamo reamamo reansanave wasamen wapo rave reansai mammo mo arakovo kaije so awa rakivan bintabo, weye reamirati vatano reamo wasanyao indamu wapanave.

Weramu mansanan ava naiso reamo wasanajo ana reambekedaije inta rai rainy, weye reamonae. Yara reamo anakotare ranawan tenambe indamu Ayao Kovo Yesus maneka manakoe, vemo nanto ana sosobe inta rai nora.

¹³ Wapo raen vatano wo anakere raijar no Yavaro Amisy ama uga rai wenawamo awa anaisy raunande. Muno arono maero rameseo Amisy ai no tewa orame mammo ratodi, vatano wanapatambe Yavaro Amisy ama uga rai wo maere umaso ama nake inta raugav inda wo raisy. ¹⁴ Amisy po rapatimu tavon to pare arakovo wo Ayao Kovo Yesus Kristus ravov irati vatano wanui mansai wenanawamo, vatano wanui nanawije wo doije ndako anaisy raunande mansai.*

¹⁵ Risyamo syo Ayao Kovo Yesus ravovo wasai to, weramu syo ana inta ranajo wasai jewen bayave. Muno syo ratoe no so indamu weapo ana inta raunande rinai mammo jewen tavon. Weti ranivara marore po rinaubaisy, weamo rikakai kai, weramu vemo vatane inta wo inaorai rikangkamambe anakotare so rai nora: syo wasanajo ana inta raije ramu arono syo wasanyaube. ¹⁶ Risyamo syo Ayao Kovo Yesus Kristus ravovo vatano wanui mansai, weramu rinararin dai ramu, weye anakere somamo risya ma jewena, yara Yesus Kristus wepi po rinatutir patimuve rai to. Weti ranivara syo Ayao Kove so ravove jewen, wea indati Amisy pariyo rinai. ¹⁷ Ranivara anakere somamo taune risya bekere ma umba syo raijar, indati syo doije ratande rinai kai. Weramu syo raijaro taune risya bekere rai ma jewena, yara anakero Ayao Kove ravove somamo Amisy wepi po raugaje inda syo raijar. ¹⁸ Anakere somamo syo doije ratande taune

rinai jewen, weti ama ine no tai rui? No taiso: Inanayanambe weye syo Ayao Kove raugaje mawebe vatano wanui mansai. Muno syo vatane wato manajo indamu wo sya doije, sya anaisy raunande weye syo mansanyao oma jewen.

¹⁹ Risyamo vatano aro pi risya jewena, muno vatan inta po inantitidi indamu syanapatambe ai jewen tavon. Weramu inaparari syo vatane kotar rui vayave mansamaisy indamu syanapatambe mai, wirati syo vatano wanui rave inta maugava ude Yesus Kristus ai. Weti syo rave taiso: ²⁰ Arono rui rituna vatano Yahudi matavon, weamo ribeare vatano Yahudi mansamaisy indamu syo vatano Yahudi maugav ude Yesus Kristus ai. Vatano Yahudi onawamo wo Ananyao Musa raijaro matuve, weti rituna matavon, weamo syo Ananyao Musa raijar tavon indamu syo vatano nanawije maugav ude Kristus ai. ²¹ Yara arono rui rituna vatano Yahudi jewene matavon, weamo sya anabe mo awa ramaisy. Vatano Yahudi jewene onawamo wo Ananyao Musa raijare ramu, weti rituna matavon, weamo itavondi Ananyao Musa rai jakatoe ramu, yara itavondi vatano Yahudi jewene awa anaube rai indamu syo maugav ude Kristus ai. (Weramu rino akirive Amisy apa ananyao raije ramu weye ribeto Kristus apa ananyaowe rai tenambe tutir.) ²² Nde irati vatano awa anave matu rainy yara mayondi mansai, risyamo ritavondi awa mayondi rai, indamu syo vatano mayondi so maugavo awa anave rai inda mbambunin. Maisyare omai ti, nde irati vatane kotaro rui vayave, risyamo sya anabe mo mansamai bintabo indamu syo vatano wanui inta maugav ude Kristus ai wirati Po mansapaya awa ayao kakaije rai. ²³ Anakotar tenambe so syo rave indamu Ayao Kovo Yesus Kristus maneka manakoe muno ama kove mammo ritavondi risyaura rai tavon.

Ananeneae vatano wansanan

²⁴ Syo ananeneae inta raura so: Wapo raen ranivara unanui inta ratayao vatane wansanan dai indamu awa vambunine raen dai, vatan tenambe so wansanan weramu vatane intabo pui dave indati apaura ama ine rai. Maisyare wemaisy, syare wantavondi Yesus Kristus ai kobe rave maisyare vatano wansanan umawe mansamaisy indamu masyoto rijat indati wamaura ama kovo Amisy po ratayao wansanarome rai. ²⁵ Vatano ware utavondi ansanane so rai wenawamo wo mansanasine raeranande muno matawandi anakotare rai indamu mansanasine mbambunin. Wo raveare somaisy weye arono vatane

* 9:14 Matius 10:10; Lukas 10:7

wanugan wansanan, ubeker indamu wo ama ine raugav. Weramu ansanane umaso ama ino namije omamo no tawane ramu.* Yara wamamo wansatawandi anakotare rai muno wamo Amisyeye apa anakere rajaro panyoambe indamu indati wamaura ama ine rai, wemi no pitawabe. ²⁶ Maisyare omai ti, risyamo maisyare vatano pansanan panawadi apa bekero to raije rai omamo po raen dave to. Ananeneae kajjinta mo ramaisy: vatano yare itatukambe, weamo itatukambe tutir indamu inta po inta apinde. Weti risyamo maisyare vatano itatukambe so inta pi risy. ²⁷ Risy syo vatano kajjinta mansanyaube indamu awaura irati Amisyeye apa kovo no pitawabe rai, weramu vemo riparande taune rinai nora! Weti ibe akarive inanasine so rai muno syo raeranande indamu vemo bekero ngkakainoanive mo inatopan nora. Wirati indamu arono syo vatano kajjinta mansanyaubea mewen, weamo ri tavon risyaura Amisyeye apa kovo no pitawabe rai, yara vemo Amisyeye po rinaura pare rimamaisyeye ramu wenora.

10

Vemo watawondi aneno wusyine awa ayao kakaije rai nora

¹ Risy arakov weap, ribeker syare wasaemen wama aneno wusyine mansai, animaisyeye mirati nande mansai arono utavono Musa ai. Weye Amisyeye po kamayo inta ratutir indamu mo mansaugav arono wanya. Muno Mayano Nijam mammo wo roatar wanya majoe rai yara umanutu no waro ramu. ² Kamayo muno wayan umaso mammo mbe rarorombe wama anene onawamo utavondi awa akari Musa ai, maisyare muno vatane maugasya kuvuni mana rai mammo mbe rarorombe onawamo utavondi awa akarijo Kristus ai. ³ Wama anene onawamo Amisyeye po anaisyeye raunande indamu wo raisy. ⁴ Muno wo mana ramanam tavon, namirati Amisyeye po raveti muje orame rai. Oramo namije raurata irati Kristus taune ai, Opamo tavondi wama anene mansai arono wanya. ⁵ Weramu wama anene wanui nawamo Amisyeye pariyo mai awa ana wo rave rai, weti Po mangke raugaje mai ti ugwenen no nugo vabukane vono maninimbe raita. ⁶ Anakotare umaso nande wama anene mansai indamu mbe anyanyaube wansai. Kove mammo wansaemen awa ayao kakaije rai indamu vemo wambekero anakotare ngkakainoanive rai jinya, maisyare anene

wo rave wusyinoe ramaisy. ⁷ Weti vemo wabeaje yare rai maisyare wama aneno nanawije inta mansamaisyeye inya. Weye Ayao Amisyeye mo ratoe taiso: "Vatano Israel nao utantuna wisyisyeye muno wo awije ramanam indamu wo one rave ubeaje irati awa yare rai. Umba ubesea usarer bovambe muno wo anakotaro kakai rave."* ⁸ Vemo wamo anaerere rave maisyare anene nake inta wo rave wemaisyeye inya, weye arono wo rave umba vatane mansano ribuge tenamara eane mandeij wene nande mansai masyote intabo ai (23.000). ⁹ Muno vemo wamo Amisyeye* atopan nora, maisyare wama anene inta wo rave wemaisyeye, weti tawae mamune mo maubaisyeye.* ¹⁰ Muno vemo weapanonae wapo nuge rapanan nora, maisyare wama anene inta wo rave to wemaisyeye, weti Amisyeye po apa naito wene atutir de po maubai bintabo.*

¹¹ Anakotare so nande wama aneno wusyine mansai indamu mbe anyanyaube wansai indamu wansaemen Amisyeye po mangke raugaje vatano wo ayao kakai rave mansai. Muno Ayao Amisyeye mo ana umaso ratoe indamu mo wansanyao vemo wamo anakotaro ngkakainoanive rave tai mai nora. Weye munije ama akari nande mararai.

¹² Weti weapirati wapo rakarae wapare wapa anave mbambunin to weap, syare wasyisyaye indamu vemo wapo ayao kakai rave nora! ¹³ Anakotaro mo wasatopane mammo nde weabo wasaije ramu. Yara ana mo wasatopane mammo mamaisyeye irati anakotaro mo vatan tenambe matopan no mine so ramaisyeye. Weramu Amisyeye indati Po vambunine raugaje indamu wasatawandi rai. Weye Amisyeye teto Apa urairije rai: weti aneme mpaya wasaije ramu ti anakotaro mo wasatopane indati mo wapa vambunine rakivane ramu. Arono mo wasatopan, weamo Amisyeye po unanui ratayao indamu weabambunin wasatawandi rai.

Vemo watawondi ono yare rai jinya

¹⁴ Maisyare omai ti, sya arakovo inanagan no wasai, syare vemo wabeaje irati yare rai jinya, yara wasakirive rai tenambe. ¹⁵ Syo raen weapamo vatano wasakarikuga mbar, weti syare wapo sya ana syo raura so ratantona rati. ¹⁶ Vatano wamanave Kristus ai wamamo wamanunugambe indamu Kristus apa kakaije mammo wansaemen dai. Weti wamo mokijo anggurije raijaseo muno wamo kove raura seo Amisyeye ai, umba

* 9:25 Arono nugo wusyinoe vatano pansanan wepi pui dave, apa ino po raugav mammo inyo ugo ratayao po rangkion. Weramu apa ino namije no tawane ramu, yara mayon ti ngkanen kobe. * 10:7 Keluaran 32:6 * 10:9 Ayao Yunani naiso mare "Kristus." * 10:9 Bilangan 21:4-7 * 10:10 Bilangan 16:41-49

wamo ramanam. Arono wamo ramanam, wambe intabove Kristus ai weye Apa mavu nsororopo wansamarom no inyo kapite rai. Muno arono wamo rotije raporadi muno wamo raisy, omamo wambe intabove Kristus ai weye Po anasine raunande kakaijo wansai. ¹⁷ Rotije omamo intabo muno wan tenambe wamo raisy. Weti wamamo wamanui rave, weramu arono wantavondi wamo rotije intabo umaso raisy, wamamo maisyare wansanasine intabo.

¹⁸ Syare wamo vatano Yahudi awa ana udave ranyanyuti ra wandaen maisyare so: Arono anaisye rameseo Amisy e ai no tewa orame rai umba vatane wo raisy, maisyare naije ube intabove usambayambe Amisy e ai. Maisyare wemai tavon, ranivara anaisyo rameseo yare rai mamo vatane wo raisy, weamo utavondi ube sambayambe yare umaso rai to ije. ¹⁹ Weti syo raura kakavimbe wasai: Anaisyo rameseo yare rai omamo ama kove inta no rai jewen, muno yare taune mamo ama kove inta no rai jewen tavon. ²⁰ Ana rui mirati rameseo irati yare rai, omamo rameseo Amisy e aije ramu yara anawayo kakaije rai. Muno arono wapo anaisyo rameseo yare raije raisy, omamo wabe intabove anawayo kakai rai to ije. Syona e weape anawayo kakai me weabe intabove! ²¹ Yara weapamo vatano wapanave Kristus ai weti watavondi wapo rotijo raurata Kristus anasine raije raisy muno wapo angguri raurata Kristus apa mavu raije ramanam indamu wasaemen Apa kakaije rai. Weti wata watavondi ono yare rai tavon, mamaisy e ramu! Weye ranivara watavondi ono yare rai muno wapo ama anaisye raisy muno ama mana ramanam, wemirati rameseo yare rai, weamo watavondi wabe sambayambe anawayo kakaije rai. ²² Ee! Vatano wepirati wapanave Kristus ai weape, wabeanimaibe wabeker watavondi ono yare rai? Arono watavondi ono yare rai, indati Amisy e pariyo wasai! Muno weapamo wabambunin wapo Amisy e akivane ramu!

Ananyao mo anaisye raura

²³ Syo ranaun wapare, “Ana rui vayave wambeke dai, wamo rave kai.” Tugae, wapo rave kai, weramu wapa bekere inta mamo mo kove raugavo wasaije ramu. Wapare, “Ana rui vayave wambeke dai, wamo rave kai,” weramu anakotaro wabekedaije inta mi ngkakai, mo wapa arakove awa anave raijasea mbambunine jewen. ²⁴ Vemo vatane nanentabo po anakotaro mo kove raugavere taune bo ai ratantona nora, yara syare po ana ngkovo vatano kai mansai ratantona tavon.

²⁵ Maere ama ine rui vayave vatane wo rambayan no pasari omamo wapo rai kai, yara vemo wapo ranajo wusyimbe nora wapare, “Maere somamo raunande yare rai rako?” muno vemo anakotare so mo wasanuga ransosobe nora. ²⁶ Weye Ayao Amisy e mare, “Munije tename so muno ama anakotaro ntuna ama uga rai omamo Amisy e apaura rai vintabo.”²⁶

²⁷ Arono rui vatano panave Kristus ai jewen inta po nawainde nyisi no apa yavar muno wimayar, weamo nyoronto kai. Anaisyo rui vayave po ratayao nai, omamo nyo rai bayave. Weramu anaisye umaso mamo raunande yare rai rako, wemamo vemo nyo nya arakove anajo rai nora. Vemo anakotare so mo nanuga ransosobe nora.

²⁸ Weramu ranivara vatane inta po raura nai pare, “Anaisye somamo raunande yare rai,” weaveti syare winyamo naemeno vatano napije ai, weti vemo nyo anaisye wato rai nora weye anakotare so mo vatano napije anuga ransosobe. ²⁹ Taune winyo raen anaisye wato raisy omamo ayao kakaije ma jewen, weramu syare naemeno nya arakovo apa anave mayondi so ai.

Weramu vatane inta wo ayaowe rasakinav ware, “Veanimaibe vatane wato po inaorai tai maisy? Weye Amisy e po rinapaya ti syo anaisyo rui vayave syo raisy. ³⁰ Syo kove raura seo Amisy e aijo sya anaisye rai, weti veanimaibe vatano kaijinta po inaura tantunawi pare syo ayao kakai rave weye syo anaisye so raisy? Abo! Apa ana po inaura so mamaisy e ramu weye risyamo syo kove raura seo Amisy e aijo sya anaisye rai to.”

³¹ Maisyare omai ti, arono wapo anaisye raisy muno wapo mana ramanam muno anakotaro rui vayave wapo rave, weamo wapo rave indamu wapo Amisy e ararimbe. ³² Wabekobe rave tutir indamu vemo wapa ana wadave mo vatano kai mauga ti wo ayao kakai rave nora —vatano Yahudi rako, vatano Yahudi jewen dako, vatano una no anugano Amisy rai rako. ³³ Syare watavondi sya ana syo rave so rai: anakotaro rui vayave syo rave, ribeker syo vatan tenambe maveti manayanambe. Weti anakotaro mo kove raugavere taune rinai mamo syo ratantona jewen, yara anakotaro mo kove raugavo vatano wanui mansai, wirati indamu Amisy e po mapaya awa ayao kakaije rai.

11

Wanya wo makari ratavun arono ube sambayambe

¹ Ribe unanuive wasai indamu watavondi sya ana idave rai, maisyare muno Kristus be unanuive rinai indamu ritavondi Apa ana dave rai.

² Rinanayanambe wasai, weye anakotaro rui vayave rai wasaemeno rinai tutir, muno ananyao syo raugav ore wasai mammo wapo rajjar matuve.

³ Weramu ribeker syare indamu weananto ana syo raura akato so rai syare: Vatano anya awa akari pamo Kristus, muno vatano wanya awa akari nawamo awa anya wo maovan tutudi. Muno Kristus apa akari pamo Injayo Amisy. ⁴ Ranivara vatano anya po ansune vasye rave akari ratavun arono be sambayambe rako, po ayao Amisy nde ai raura irati anugano Amisy mansai rako, weamo po apa akari Kristus ave arikaimbe. ⁵ Yara ranivara wanya mo ansune vasye rave rakarije ratavune jewen arono mbe sambayambe rako, mo ayao Amisy nde rai raura irati anugano Amisy mansai rako, weamo mo ama anya mo aovane ave arikaimbe, weye ama anya wepirati ama akari piye. Ama ana mo rave so mbe samaneve rai, maisyare muno wanya rakarivui nye rakakar ti mparar wemaisy. ⁶ Weramu ranivara wanya inta monae rakari ratavuni arono mbe sambayambe no anugano Amisy ama uga rai, syare mo rakarivui nye raotar bayave, maisyare anya akarivui nye ramaisy. Weramu wanya nsamane ti monayo mo rakarivui nye raotar maisyare anya apa ramaisy muno monayo mo rakaka hintabo, indati kove mammo mo rakari ratavun bayave.

⁷ Anya pamo po ansune vasye rave akari ratavun, weamo mamaisy ramu, weye anya pamo aurata Amisy taune ai muno aurata Amisy apa titije rai. Yara wanya mammo raurata ama anya apa titije rai. ⁸ Weye arono munije ama manasyinoe Amisy po vatane manarijamo, Amisy po anya anari, umba Po wanya raugav no anya umaso anasine rai. Yara anya pamo Amisy po augav no wanya ransine rajje jewen. ⁹ Muno anya pamo anari wanya ramarome ramu, yara wanya mirati ranari anya amarom. ¹⁰ Wemi mbe waramo wanya mo ansune vasye rave rakari ratavun arono mbe sambayambe rako, mo ayao Amisy nde rai raura rako. Mo rakari ratavun indamu mbe rarorombe ama anya be akarive rai. Muno wirati naito Amisy manayanambe ama ana mo rave so rai.

¹¹ Wanya mammo nteto mumuimbe anya ai ramu, muno anya pamo teto mumuimbe wanya mai ramu, weye wanya muno anya ibe intabove Kristus ai. ¹² Anakotaro mine

somamo Amisy po ranari vintabo. Wanya mammo Amisy po raugav no anya ansine rai arono wusyinoe Po nuge so ranari. Maisyare muno omaisy soamo anya pamo augav no wanya rai weye mo avaki. ¹³ Weti syare wapo ratantona rati: wanya mare mbe sambayambe Amisy ai weramu rakarije mammo mo ansune rave ratavune jewen, wemamo mamaisy ramu. ¹⁴ Anya akarivui nye rapaya ti nggwaravainy, wandaen omamo mamaisy ramu. ¹⁵ Yara wanya mammo rakarivui nye rapaya ti nggwaravainy omamo mamaisy mije. Weye Amisy po rakarivui nye raugaje rai indamu no rakari raora, mo raveti ngko dave. ¹⁶ Ranivara ananyao wanya rakari ratavun omirati syo raugaje somamo vatane inta no no wapa yasyin ponayo rai, weamo syo raura akanande ai taiso: Omamo ananyao reantavondi rai muno omamo ananyao anugano Amisy utavondi rai tenambe. Weti ngko to.

Ananyao anaisy raurata Kristus ansine rai muno Apa mavu rai

¹⁷ Sya ana syare syo raura somamo anakotaro rikangkamambe wasaijo rai jewen wemi syare idaura. Weye arono anugano Amisy wapanugambe, wapa ana wapo rave mo kove inta raunande vatane mai ramu, yara ngkakai mi mo raunande. ¹⁸ Weye idaraniv arono wapanugambe, weamo wapyayo intabo ramu, yara vatane inta awa wo ratantona nsasye inta awa rai, weti mo wasaporadi. Muno syo ratantona syanave ayao idaranive so rai. ¹⁹ Weti wapa wabe intabove jewene mi mo wasaroron kakavimbe are nawirati una no wapa yasyin utavondi Amisy ai tugaive, muno are nawirati jewen. ²⁰ Idaraniv tavon arono wapanugambe indamu wapisiy tenambe, ana wapo rave mammo mamaisy ramu. Weye wapo anaisy raisy raurata Yesus ansine rai muno Apa mavu rai, omamo wapo rave mo ramaisy ramu. ²¹ Weye arono wapo anaisy umaso raisy, wasasokabe weti inta wapo raisy inta maora muno inta nawirati umaen. ²² Ee! Wabeanimaibe wabeare so? Syare taune wapa yavare raen ivae rako? Indati taune wapisiy no taune wapa yavare rai! Vemo wapo anugano Amisy rave arikaimbe inya! Muno vemo wapo vatano awa ananuge meweno mansai mave samaneve inya! Weti animaisy syo raura wasai? Risy kangkamambe wasai rako? Jewen! Risyamo kangkamambe irati wasai ramu!

²³ Ananyao risyo ravovo ti nde wasai omamo syo raugav no wama Amisy Yesus ai no taiso: Wusyinoe arono Yudas po Amisy Yesus amavun, namano napije Yesus a pe

apa arakove nawe wanunugambe muno Yesus po rotije raijade.²⁴ Muno Po kove raura seo Amisyey ai, umba Po rotije umaso raporadi muno Po raura taiso: “Somamo inanasine mi so, omamo Syo raunande wasai. Wapo rotije so raisy indamu wasaemen irati Rinai.”²⁵ Maisyare wemai tavon, arono wo anaisyey raisya mewen, umba Po mokijo angguriye raijade akato, muno Po raura akaje pare, “Somamo Sya mavugo nsororopo wasaije mi som, mo Amisyey apa urairiyo wanyine raokaisy. Arono rui wapo ramanam, wasaemen irati Rinai.”²⁶ Weyey arono rui weapanunugambe weapo rotije so raisy muno weapo angguriye so ramanam, weamo weapo Amisyey Yesus apa kakai raura tutira pakare no mine so rai jakato.

²⁷ Maisyare omai ti, are pirati po rotije rai tatugadi muno angguriye ramanam tatugadi tavon, weamo po ayao kakai rave irati Amisyey Yesus anasine rai muno Apa mavu rai. ²⁸ Syare vatane nanentabo po taune anuga raen dati, po ratayao da mamai dave. Naije umba po rotije raisy muno po angguriye ramanam. ²⁹ Weyey are pirati aemen irati Amisyey Yesus anasine raije jewen, yara po rotije so raisy muno angguriye ramanam tatugadi vayave, weamo taune po mangke Amisyey ratande taune ai. ³⁰ Wabeare so wemi mbewaramo inta weapirati wananta mayondi rai muno wagwanen. Muno wene mo inta wasaugav. ³¹ Weramu wamo taune wansanuga ratayao da ngkakavimbe, weamo mangke mo wansakepe ramu. ³² Ranivara Amisyey po mangke mamaun raugaje wansai, weamo naije Po wansanyao. Maisyare omaisy indamu vemo mangke manakoe nande wansai nora, namirati Amisyey pare po raugaje vatano mine so mai arono munije ama akari.

³³ Maisyare omai ti, sya arakov weap, arono wapanunugambe indamu wapo anaisyey raisy raurata Yesus anasine rai muno Apa mavu rai, weamo vemo wapavave wapo rai bayave nora, yara wapo wapa arakove mansanyut tenambe rati. ³⁴ Ranivara vatane inta maror, koveamo pisyisy no apa yavar dati, indamu arono wade wapanugan, vemo mangke nande wasai jinya.

Muno sya ananyao kaijinta mamoi indati syo raura arono syore wasai.

12

Anawayo Vambunin ama kovo vambunin Mo raugaje vatano wanave Kristus aije mansai

¹ Sya arakove weap, soamo syare syo wasanyao irati Amisyey apa Anawayo

Vambunine ama kovo vambunin Mo raugaje vatane mansai rai. Ribeker indamu wananta ama ayao tugae rai. ² Wasaemen arono wusyinoe wapantatukambe Amisyey ai, wapanave irati yaro ranawayoye mewen dai rai. Weti yare umaso mo wasaponae. ³ Maisyare omai ti, syare syo raura wasai indamu wapo Anawayo Amisyey ama vambunine raen kakavimbe taiso: Vatano are pirati po Yesus aura pare, “Yesus opamo Amisyey,” Anawayo Amisyey wemirati mo vambunine raugaje vatano napije ai indamu po Yesus aura tai maisyey. Yara vatano rui pirati panaamatambe Yesus ai, vatano napije pamo Amisyey apa Anawayo Vambunine no anuga raije jewen.

⁴ Kovo vambunin raugaje vatane mansai ama kotare manui, weramu Anawayo Amisyey wemi mo raugaje omamo intabom.

⁵ Anakeroy vatane wo raijaro Amisyey Yesus ai mamoi ama kotare manui, weramu Amisyey Yesus wepamo intabo obo pije. ⁶ Anakeroy Amisyey ama kotare manui, weramu Injayo Amisyey wepi po vambunine raugasyo vatan tenambe mai indamu wo Apa anakere umaso raijarijari, Wepamo intabo pa.

⁷ Anawayo Vambunine mo ama kovo vambunine raugaje wansai tutudi indamu ngkov irati anugano Amisyey mansai vintabo. Weti Ama kovo vambunine kotare no taiso:

⁸ Nde irati vatan inta ai, Anawayo Vambunine mo kovo vambunine raugaje ai indamu payao mamaisyoy Amisyey apa ana po ratantona ntiti rai.

Muno nde irati vatano kaijinta ai, Anawayo Vambuninoy namije mo akarikuga raneka inda mbar ti po ananyao kotare raura kakavimbe.

⁹ Kaijinta pamo Anawayo Vambuninoy namije mo kovo vambunine raugaje indamu apa anave Amisyey ai manakoe.

Muno kaijinta pamo Mo kovo vambunine raugaje ai indamu po saumane raugavo vatano ugwanene mansai.

¹⁰ Vatan inta tavon Anawayo Vambunin mo vambunine raugaje ai indamu po anapaporainyey raroron.

Muno kaijinta pamo Mo kovo vambunine raugaje ai indamu po ayao Amisyey nde ai ravov, maisyare muno Amisyey apa anawae wusyine wo rave wemaisyey.

Muno vatane inta pamo Anawayo Vambunin mo akarikuga raneka indamu po anawayo mo vatane mausuro raen kakavimbe: rui mirati Anawayo Vambunine ma, yara rui mirati anawayo kakai.

Muno vatane inta pamo Anawayo Vambunine mo vambunine raugaje ai indamu po ayao pantatukambe raije raura vayave.

Muno Mo vambunine raugaje kaijinta ai indamu po ayao pantatukambe raije umaso ama ntunato raije raura kakavimbe.

¹¹ Kovo vambunin kotare so tenambe, Anawayo Vambunin intabo mo raugaje vatane mansai tutudi. Mo raugaje vatane mansai terave mamaisyo taune Ama bekere rai.

Wansanasine somamo intabo, weramu ama anakotaro no raije manui

¹² Kristus apa anugane maurata irati vatane manasine inta rai. Vatane anasine mamamo intabo, weramu ama anakotaro no raije manui. Ama anakotaro no raije manui, weramu anasine mamamo intabo rave. ¹³ Arono vatano wamanave Kristus ai wansaugasya kuvuni mana rai, naije Anawayo Vambunin intabo namije mo wansauga ti wansisa Kristus anasine intabo so rai. Weti wan tenambe wansisa rai—vatano Yahudi muno vatano Yahudi jewene nao, vatano aro muno vatano arove jewene nao. Anawayo Vambunin intabo namije mamamo Amisye po raunande wansai tutudi.

¹⁴ Syare syo ananeneae inta raura: Wansanasine ama anakotaro no raije intabo ramu, yara ama anakotare manui. Maisyare omaisy tavon, Kristus anasine ama anakotar no raije manui. Kristus anasine raurata irati anugano Amisye wansai, weti vatano wamanave wamamo Kristus anasine ama anakotare nawirati wam. ¹⁵ Ranivara wansajo mayao mare, “Rinajo mamamo mo rinaneme winamaisye ramu. Weti risyamo siso inanasine raije ramu,” weramu rinajoe ama ayaowe somamo mamaisye ramu. ¹⁶ Muno ranivara wansamarikoame mayao mare, “Rinamarikoame mamamo mo rinami winamaisye ramu. Weti risyamo siso inanasine raije ramu,” weramu rinamarikoame ama ayao so mamaisye jewen. ¹⁷ Ranivara wansanasine tenambe omamo mbe wansamive vintabo, weamo wamo ana raranive kakai. Muno ranivara wansanasine omamo wansamarikoame mbintabo, weamo wamo ana ranu kakai. ¹⁸ Weramu Amisye po wansanasine ama anakotare raunande tenambe indamu nantabo mo ama anakere raija terave, mamaisyo Amisye apa bekere rai. ¹⁹ Ranivara wansanasine ama anakotare mamamo mbe wansamive vintabo, weamo wansanasino mbe taije tugae ma jewena. Muno ranivara ama anakotare mamamo mbe wansamarikoambe vintabo, weamo anasino tugae ma jewena. ²⁰ Weti tugae, wama anakotaro no wansanasine rai manui, weramu wansanasine mamamo intabo.

²¹ Anasine ama anakotare inta ntoto mumuimbe jewen. Ranivara ami mo raura aneme rai mare, “Risya mamai to, weti inta nyo inaeranande akato nora,” weamo mamaisye ramu. Muno ranivara akari mo raura ajoe rai mare, “Risya mamai to,” weamo mamai tavone ramu. ²² Muno wansanasine ama anakotaro wamare “mamaisye jewen muno mayondi,” wemirati manakoeve, mo wansaeranande. ²³ Wansanasine

ama kotaro wamo ranyanyuta “mpaaje,” wemamo wamo ramarandin indamu raen ti ngko dave. Muno wansanasine ama kotaro wamare “nsamane,” wemamo wamo ratavuno ansune rai inda vatane wo raene jewen. ²⁴ Weramu wansanasine ama kotaro wamare “ngko dave to,” wemamo wamo ramarandin akato nora. Maisyare omai ti, Amisye po wansanasine ratayao kotabe indamu ama kotaro mamaisye jewene mamamo kove raunanto rai. ²⁵ Indamu vemo wansanasine ama kotare wayaowi taune mansai nora, yara wo mansaeranande tutudi. ²⁶ Maisyare omai ti, wansanasine kotare inta nsiuri, weamo wansanasine tename nsiuri rautan. Muno vatane ukangkamambe wansanasine ama kotare inta rai, weamo wansanasine tename so ranayanambe tenambe.

²⁷ Ananeneae anasine umawe no taiso: Kristus anasine raurata irati anugano Amisye rai. Weti wea tenambe sawainamo Kristus anasin muno weapamo nantabo wasato siso anasine umaso rai. ²⁸ Amisye po vatane matayao indamu wo apa anakere raijar no anugano Amisye ama uga rai, no taiso:

Manasyin, arakovo Yesu po matutir indamu wo Ayao Kovo Yesu ravov, jirum mamamo anawae Amisy, mandeij, kuruno wo Amisye apa kawasae manyao, umba vatan inta nawirati kovo vambunin raugaje mansai ti wo anapaporainye raroron, kaijinta wo saumane raunanto vatano uganene mansai, inta nawirati wo vatane maeranande, kaijinta ube akarive wo anugano Amisye maugav, inta nawirati Anawayo Vambunine mo kovo vambunin raugaje mansai indamu wo ayao wantatukambe raije raura.

²⁹ Weti Amisye po anakere kotare intabo raugaje anugano Amisye mansai jewen, maisyare so: vatane onawamo anawae tenambe jewen, muno kurun tenambe jewen. Muno Yesu apa arakovo po matutire obo nao jewen. Muno Po vambunine raugaje mai indamu wo anapaporainye

raroron tenambe jeben. ³⁰ Muno saumane raunanto vatano ugwane mansai mamama vambunine raugaje vatan tenambe maije jeben. Muno vatan tenambe wo ayao wantatukambe rajje raura jeben. Muno ayao wantatukambe rai ama tunato rajje mamama vatan tenambe wo raura kakavimbe jeben. ³¹ Weramu syare weapamo wabeke dave indamu wapo kovo vambunino manakoe mbe mobe raugav.

Weramu ana kove inta manakoe rave, mo kovo kajjinta rakivan tenambe. Weti indati soamo syare syo kovo namije raura kakavimbe wasai.

13

Muinye

¹ Ranivara risyo vatano mine so awa ayao kotare raura muno naito Amisyewa awa ayao raura tavon, weramu muinye no inanuga rai jeben, rinamaisyare tavuna ngkin ti ranauni ntami vayave. ² Ranivara risyaura irati kovo vambunine rai weti ayao Amisy nde rinai syo ravov, weramu rimuinyo vatane mansai jeben, weamo sya ana syo ravov ama ine mewen dai tenambe. Muno ranivara inanto Amisyewa apa ayao ngkokaibe rai tenambe muno ananyao kotare rui vayave rai, weramu rimuinyo vatane mansai jeben, weamo sya ana syo raen ama ine mewen dai tenambe. Muno ranivara sya anave Amisyewa ai mamambunin dave, weti syo unate inta ratutir ti mansop, weramu rimuinyo vatane mansai jeben, weamo sya anave ama ine mewen dai tenambe. ³ Ranivara risyo sya ananuge ratodi vatane majja mewen dave kai, weramu muinye no rinanuga rai jeben, weamo syo sya ananuge ratodija marudi. Muno syo inanasine so raunanto indamu inamero taname rai weye syanave Yesu ai, weramu muinye no inanuga rai jeben, weamo sya ana syo rave so maimaisyewa ramu.

⁴ Vatano muinye opamo atawandi manakoe anakotaro ngkakai nande aije rai. Opamo bekobe vatane mai tutir, yara anuga mparijo maije ramu. Opamo ararine ramu, yara anuga mpaaje. ⁵ Vatano muinye opamo soowate ramu, muno bekobe taune bo ai ramu. Opamo maweso pari jeben muno vatane awa ana wo raveti ngkakajjo ai omamo po ratantona no anuga rai nugoenta jeben. ⁶ Vatano muinye opamo anayanambe ayao kakai rajje ramu, yara anayanambe ayao tugae obo rai. ⁷ Vatano muinye opamo pari jeben arono apa arakove po kakajje rave ai. Opamo po apa arakove awa ana udave raura tatugadi jeben, yara panave mai tutir. Opamo anaveano Amisyewa ameno anakotare rai

tenambe, muno atawandi anakotaro rui vayave nande aije rai.

⁸ Muinye mamama ama pame raeno intai jeben, yara no pitawabe. Weramu kovo vambunin kajjinta mamama ama pame raen ivae, weye ntoa munije ama akari umba nsopi kobe. Weti munije ama akari, anawae indati wo ayao Amisyewa nde mai ravov akatoo ramu. Muno ayao vatane wantatukambe rai ti wo raura irati Anawayo Amisyewa ama vambunine rai, wemamo indati ntoa nsopi tavon. Muno ananyao kotaro vatane wo raen, indati raumandi kobe. ⁹ Anakotare wamo raen tenambe jeben. Muno Amisyewa apa ayao nde wansai ti wamo raura omamo mbar tenambe vintabo rainy. Weye wana no mine vone so rai, anakotare mamai dainya nene. ¹⁰ Weramu arono munije ama akari indati Amisyewa apa anakotaro mamai dave nde nande. Arono najje indati ana mamai kobe jewene mamama raumandi vintabo.

¹¹ Arono ribe arikaimbeowe, syayao maisyare arikainy, muno sya ana syo ranaune maisyare arikainy, muno sya ana syo ratantona maisyare arikainy tavon. Soamo sya akoo matu to, weti sya ana syo rave maisyare arikainy syo rapaya. ¹² Weye soamo ana wamo raene maisyare aname vayave raen no kansina rai weti wandaen kobe ramu. Weramu arono munije ama akari indati wamo raen anawadive weti wandaen mba dave. Soamo inanto anakotare rai mamai tenambe rainy. Weramu arono najje indati inanto rai rave ti syo raen tenambe, maisyare muno Amisyewa po inanuga raen kakavimbe tenambe.

¹³ Maisyare omai ti, anakotaro wamo rajja matuve mamama mandeije so: anave, anaveano Amisyewa amen, muno muinye. Weramu ana mandeije somamo manakoe ti mbe mobe rave mamama muinyem.

14

Ananyao kovo vambunin

¹ Syare weabeke damu wamuinyo vatano kajjo rui vayave mansai. Muno syare wabeker tavon indamu wapo Anawayo Vambunin ama kovo vambunine rajjar, manasyin dave indamu wapo ayao Amisyewa nde wasajje ravov, maisyare Amisyewa apa anawae wusyine mansamaisy. ² Are pirati po ayao antatukambe rajje obo raura, opamo payao nanto vatane mansai ramu weye vatane wo ranaune kakai, yara payao nanto Amisyewa ai weye Obo pi po ranaun. Vatane wato pamo Anawayo Vambunine mo vambunine raugaje ai indamu po Amisyewa apa ayao ngkokaibe raura, weramu vatane inta nanto rai jeben bayave.

³ Weramu are pirati po Amisy e apa ayao nde ai ravov, opamo payao nanto vatane mansai. Po ayao umaso raugaje vatane mansai indamu awa anave mbambunin, muno mo vambunine muno saumane raunanto manuga rai. ⁴ Are pirati Anawayo Vambunin mo vambunine raugaje ai ti po ayao antatukambe raije raura, opamo po taune anuga obo rajjasea mbambunin. Weramu are pirati po ayao Amisy nde aije ravov, wepamo po anugano Amisy e manuga rajjasea mbambunin tenambe.

⁵ Ribeker indamu vatan tenambe wo Anawayo Vambunin ama ayao antatukambe raije raura, weramu sya bekero manakoe mammo wapo Amisy e apa ayao nde wasai ravov. Weye vatane wo ayao Amisy nde mai ravov, ama kovo mo raugaje anugano Amisy e mai mammo manakoe rave. Yara vatane wo ayao antatukambe raije obo raura, ama kovo mo raugaje anugano Amisy e mai mammo mamaun bayave. Weramu ranivara vatane inta po ayao antatukambe raije ama ine raura kakavimbe, weamo mamaisy weye indati mo kove raugaje anugano Amisy e mansai vintabo.

⁶ Weti sya arakove, ranivara ride wasai muno syo ayao antatukambe raije obo raura, indati ama ngkovo wasai mewen bayave. Weramu ranivara syo wasanyao irati ana Amisy e po rarorono rinai, omamo ngkov irati wasai. Muno ranivara syo ana no Amisy e aije raura kakavimbe indamu wapo raen, omamo ngkov tavon. Muno syo ayao Amisy nde rinai ravove rako, syo wasanyaube rako, weamo ngkov irati wasai.

⁷ Maisyare so: ranivara vatane inta po sulin dako itari rambaon tatugadi vayave, weamo vatano wo raraniv wananepebe ti ware, "Ransyerano rui mi rambaon dai so?" ⁸ Indako ranivara tavuna ama kine rauguje weramu mba kobe jewen, indati vatane wanatayaube indamu wo marova rave ramu. ⁹ Maisyare omai tavon, vatane wo ayao antatukambe raije raura, weamo awa ayao omame mba kobe jewen. Abo! Maisyare ruimaisy indamu vatane unanta ama ine rai? Yara ayao umaso maisyare ovare po raugaveto ti raumandi vayave!

¹⁰ Tugae, mino tename so rai ayao kotare manui muno ama ine no rai tenambe. ¹¹ Ranivara ayao namije inta mammo syo ranaune jewen, weamo syo rakarae syare vatano po raura opamo vatano marane piye. Muno vatano napije po inatantona pare risyamo vatano marane pi risy weye taune apa ayao nsasye risya ayaowe rai. ¹² Syo raen weapamo wabeke dave indamu wapo Anawayo Vambunin ama kovo vambunine rajjar. Weti syare wapo Amisy e anajo indamu wapaura kovo vambunino namirati

mo anugano Amisy e awa anave rajjasea mbambunin we rai.

¹³ Wemi mbewar ti syare are pirati po ayao antatukambe raije raura, opamo po Amisy e anajo indamu Po kovo vambunin raugaje ai wirati po ayao antatukambe raije umaso ama ine raura kakavimbe tavon.

¹⁴ Arono risyi Paulus syo ayao antatukambe raije rave risambayambe, taune ri tavon inanto ama ine raije jewen. Rinanawayo vambunin obo mbe sambayambe Amisy ai, yara sya ana syo ratantona ntavondi jewen ti inanto rai kakai. ¹⁵ Weti kove mammo ribe sambayambe maisyare so: Intanamo ribe sambayambe ayao syantatukambe rai rarijati weti rinanawayo vambunin obo mbe sambayambe rai, yara intanamo ribe sambayambe ayao inanto rai ti sya ana syo ratantona ntavondi rai. Muno rikinyo ransyerane rai tai mai tavon: intanamo rikinyo mamaisy ayao syantatukambe rai rarijati weti inawayo vambunin obo mbe sambayambe ndaura seo rai, yara intanamo rikinyo ayao inanto rai ti sya ana syo ratantona ntavondi.

¹⁶ Weramu ranivara weapamo vatane inta wingkangkamambe Amisy e ai ti nyo ayao antatukambe raije obo raura nanawayo vambunine rai, weamo vatano kaijinta tuna no naije nanto rai tai rui? Win-yare nyo kove raura seo Amisy e ai, weramu vatane wato pantukambe nya ana nyo raura wato rai ti tavondi be sambayambe natavone kakai. ¹⁷ Arono winsambayambe ayao nyantatukambe rai rarijati, nya sambaya nyo kove raura seo Amisy e ai ngko dave kai, weramu mo vatano kaijinta awa anave rajjasea mbambunine ramu.

¹⁸ Risyo kove raura seo Amisy e ai weye risyi Paulus ribe sambayambe syo ayao antatukambe rai raura. Weapamo wapo ayao antatukambe raura kavinta vayave, weramu risyamo syo raura mo wepa rakivan. ¹⁹ Weramu anugano Amisy e ama uga rai, kove mammo syo ayao vatane unanta rai obo raura. Akoe! Syo ratantona ranivara syo ayao antatukambe raije rave syayao nggwaravaimbe, weamo mamaisy e ramu. Yara syayao tumaimbe vayave syo ayao vatane unanta rai obo raura, weamo syo vatane manyao kobe to ije.

²⁰ Sya arakove weap! Syare wapa ana ratantona vatan anuive, vemo wapa ana wadatantona mbe arikaimbe nora! Yara ana ngkakai obo mirati wapa ana wadatantona mbe arikaimbe rai, weye arikainy tuvane pamo pantatukambe ayao kakai rai.

²¹ Ayao Amisy e mo ratoe nde irati kawasae Israel mansai mare:

"Risyirati Amisy, Sya ayao mi so: Indati Syo vatano maran inta matutir ude wasai,

onawamo wo ayao wapantatukambe raije raura.

Wo Sya ayaowe raugaje wasai, weramu wapo inaranive ramu.”*

²² Maisyare omai ti, ayao antatukambe rai raugaje omamo indamu mo Amisy e apa vambunine raroron irati vatano wantatukambe Amisy e ai obo mansai. Yara Amisy e apa ayao nde vatane mai omamo mo Amisy e apa vambunine raroron irati vatano wanave to mansai. ²³ Arono anugano Amisy e wapanunugambe, umba vatan nanentabo wo ayao antatukambe raije raura, weamo nsosobe rave. Weti vatano kajjinta dako, vatano wanave Amisy e ai jewen dako, ude usisa wapa anugane rai, indati animaisye mi wo ratantona? Wo raura ware weapamo anaivi mo wasavea! ²⁴ Weramu ranivara Amisy e apa ayao nde wasai ti wapo raura kakavimbe irati anugano Amisy e mansai, umba vatano kajjinta dako, vatano panave Amisy e ai jewen dako, de siso, indati ana wapo raura ti po raranive mamo mamai dave. Vatano napije po raraniv, naije anuga raneka ti po taune apa ayao kakai raen kakavimbe. ²⁵ Muno Anawayo Vambunine mo apa ana ngkokaibe no anuga raije raroron kakavimbe ai. Weti indati sakinavo apa ayao kakaije rai muno po Amisy e ararimbe pare, “Syo wasaen Amisy e tuna wasautan!”

Wapanugan wabe sambayambe, wapo anakotare ratayao indamu manya mamai dave

²⁶ Maisyare omai ti, sya arakove, sya ayao syo raugaje wasai mi som: Arono rui wapanugan, weapamo nanentabo wabe sambayambe Amisy e ai mamaisyo wapa kovo vambunin Anawayo Vambunine mo raugaje wasai tetebe rai. Weti koveamo vatane inta ukinyo ransyerano Mazmur rai, inta wananyaube, inta wo Amisy e apa ayao nde mai wo ravov, inta wo ayao antatukambe raije raura, muno inta wo ayao antatukambe raije umaso ama ine raura kakavimbe irati anugane mansai. Anakotar tenambe somamo wapo rave indamu anugano Amisy e maijasea ubambunin. ²⁷ Ranivara vatane inta ubeker wo ayao antatukambe raije raura, weamo wapo vatane mapatimu jirum dako mandeija nsopi, indamu wayao tetebe. Inta payao wusyimbe, umba inta payao akato. Muno ayao antatukambe raije somamo syare vatane inta po ama ine raura kakavimbe wasai tenambe. ²⁸ Weramu ranivara vatan inta po ayao antatukambe raije umaso ama ine raura jewen bayave,

weamo syare vatane umawe umanin bayave, wo ayao antatukambe raije raura akasyo no taune manuga rai muno wayao nanto Amisy e obo ai kai.

²⁹ Umba nde irati anawae nanawirati Amisy e apa ayao nde mansai, wenawamo wo raura kai, weramu jirum dako mandeij obo nao. Muno arono vatano kajjinta wo ayao umaso raraniv, syare wo ratantona mavabe rati: omamo Amisy e apa ayao ma rako jewena e?³⁰ ³⁰ Ranivara vatan inta teta payaube muno arono naije ayao Amisy e nde vatano utantuna inta ai, weamo syare vatano napi payao umawe manin dati, vemo payao tutir nora. Umba varore raugaje vatano tuna umaso ai indamu payao mamaisyo ayao Amisy e nde aije umawe rai rati. ³¹ Wea tenambe weapirati ayao Amisy e nde wasai wapo ravovo tetebe kai, maisyare so: vatan inta po apa ayao Amisy e nde ai raura wusyimbe, umba vatano kaije po apa raura nakato. Wapo rave maisyare wemaisy indamu wapo anugano Amisy e mansanyao muno vatan tenambe awa anave rajjasea mbambunin. ³² Anawae nawamo arono ayao Amisy e inta nde mai, wo taune mawa raeranande. Umanin bayave yava ama varore mamaisy, umba wo ayao Amisy e nde mai raura kai. ³³ Weye Amisy e ponae anakotaro nsosobe rai, yara Apa bekere no irati kovo saumane rai. Muno maisyare wemaisy no anugano Amisy e mai tenambe.

³⁴ Wanya onanawamo syare umanin bayave no anugane ama uga rai. Mansamaryaro wayao ramu, muno ube akarive anugane rai ramu, indamu mamaisyo anyanyao Musa rai. ³⁵ Wanya onawamo ubeker indamu unanta anakotare inta rai, weamo wo awa anya manajo rai no awa yavaruga bo rai. Weye wanya mayao no anugano Amisy e rai omamo mamaisye ramu.

³⁶ Arakove, vemo waponayo anyanyao so rai nora! Ayao Amisy e mamono nori rati wasai jewen, muno ayao Amisy e nde weabo wasaije ramu! ³⁷ Yara Amisy e Yesu wepi po wansatuti dai, muno Apa anyanyao mamono syo ratoo wasai ma. Weti vatano rui pi no no wapa yasyine rai po taune aura pare opamo anawae ayao Amisy e nde ai rako, pare opamo Anawayo Vambunin mo kovo vambunin raugaje ai rako, syare vatano napije nanto rai kobe: Anyanyao somamo Amisy e Yesu apa anyanyao mije. ³⁸ Weramu ranivara vatano napije ponae sya anyanyao so rai, weamo vemo watavondi ai nora.

³⁹ Maisyare omai ti, sya arakove, syare wabeker indamu ayao Amisy e nde wasai wadavovo anugano Amisy e rai. Muno ayao

* 14:21 Yesaya 28:11-12 * 14:29 1 Korintus 12:10; 1 Tesalonika 5:20-21; 1 Yohanes 4:1

antatukambe raije mamu vemo weapo raurai nora. ⁴⁰ Yara anakotare mamu wapo ratayao tenambe indamu manya mamai tenambe.

15

Yesus Kristus apa kovakato

¹ Arakovo weap, soamo syare wasaemen Ayao Kovo Yesus syo ravovo wasai wusyimbe rai. Ayao Kove umaso mamu weapo raugasyo ntami wasanuga rai to ti wapanave rai vambunimbe. ² Ayao Kovo Yesus syo ravovo wasai umaso mamu wapo raijaro matuve, wea indati mo wasapaya irati wapa ayao kakai rai. Weramu wapo Ayao Kove so raija matuve jewen, yara wapo rapaya vayave, weamo wapa anave ama ine meweno rai.

³ Anyayao Amisyé po raugaje rinai wemirati syo raugaje wasai jakato ama moto ngkovo wasai mamu no taiso: Kristus opamo kakai indamu Po wansapaya irati wama ayao kakai rai, mamaisyé irati Ayao Amisyé mo ratoe rai. ⁴ Opamo antuna no aipapo rai, umba kovakato no wene rai arono masyote mandei, mamaisyé irati Ayao Amisyé mo ratoe rai. ⁵ Umba Po taune aroron kakavimbe Petrus ai. Umba aroron kakavimbe irati Apa arakovo abusyinarana eane jirume mansai tenambe. ⁶ Yesus arorono Apa arakove so mansaija jewen, naije aroron irati vatane awa wanui nanto no ratusije radani mansai masyote intabo ai. Vatan tenambe nanawije wanui inta nawamo ta unawa unumeso, yara inta nawirati ugwenen to. ⁷ Naije akato Yesus aroron kakavimbe irati Yakobus ai, umba aroron akato irati Apa arakovo po matutire mansai. ⁸ Muno maran dave mamu risyirati arorono rinai, ⁹ maisyare arikainyo ano arono apa embae avaki mamai dainy we-maisy.

⁹ Weye risyamo inawainamo Yesus apa arakovo po matutire inta pi risy, weramu Apa arakovo kaije nawamo awa tame manakoe, yara risyamo sya tame maje rave. Muno inawaino Yesus apa arakove omamo rimamaisyé ramu, weye wusyinoe syo taune Apa anugane mave tatugadi muno syo inta maubaisy. ¹⁰ Weramu Amisyé apa kove mbewar ti risyamo Yesus apa arakovo po inatutire inta pi risy. Muno Apa kovo po raugaje rinai so ama ine meweno dai ramu. Weye risyamo syo Apa anakere raija panyoambe irati arakovo kaije mansakivan. Weramu syo anakere wato raijaro taune sya vambunine raije ramu, yara Amisyé apa kove no inautan wemi mo raijar. ¹¹ Maisyare omai ti, vatano

rui vayave weapo Ayao Kovo Yesus raugavo arijat—ri dako, Yesus apa arakovo po matutire kaijinta nao dako—reama ayao mamai tenambe. Ana mbe mobe mamu reamo Ayao Kove so ravovo wasai muno wapanave rai.

Vatane wama ngkovakato no wene rai

¹² Ayao Kovo reamo ravov omamo Kristus kovakato no wene ama uga rai. Weti wabeanimaibe inta wapo raura wapare vatane onawamo indati ukovakato no wene rai jewen? Ana wapo raura umaso mamaisyé ramu! ¹³ Ranivara kovakato no wene rai omamo mamaisyé jewen datire, weamo Kristus opamo kovakato no wene rai mamaisyé jewen tavon. ¹⁴ Muno ranivara Kristus kovakato no wene rai omamo mamaisyé jewen, weamo reamo Ayao Kove ravova marudi, ama ine meweno dai muno weapanave Kristus ai ama ine meweno dai tavon. ¹⁵⁻¹⁶ Ranivara Kristus kovakato no wene rai omamo mamaisyé jewen, weamo Amisyé apa ayao reamo raura so aarurijate ma, muno reamo Amisyé aura reamare Opamo po Kristus aijaseo kovakato no wene ama uga rai omamo aarurijat akoe ma. Ranivara vatane onawamo ukovakato no wene raije jewen, weamo Kristus pamo kovakato no wene rai jewen tavon. ¹⁷ Muno ranivara Kristus pamo kovakato no wene rai jewen, weamo wapa wapanave Ai omamo ama ine meweno dai, muno weano tawan no wapa ayao kakai raija nene. ¹⁸ Maisyare omai tavon, vatano wanave Kristus ai nanawirati ugwenen to, indati ukovakatoe ramu, yara maumandi kobe tenambe. ¹⁹ Ranivara wansanave Kristus amembe mamu nsopi jirati kovo wana no mine so bo rai yara munije ama akari man to rai jewen, weamo wamamo vatano wansanimaumbe tugae rave nawirati wam, wama wansanimaumbe mo vatan tenambe una no mine so awa rakivan tenambe.

²⁰ Weramu tugae ivae Kristus opamo kovakato no wene ama uga rai to. Kristus po usye raugav, ti mbe unanuive indati vatano ugwenen nawirati wanave Ai udijat. ²¹ Wene nde siso mine so rai weye vatane intabo po wene raugav, wepirati Adam. Maisyare omai tavon, kovakato no wene rai nde mine so rai weye vatane intabo kovakato, Wepirati Yesus Kristus. ²² Vatan tenambe ugwenen weye aneno Adam po wene raugavo mai tenambe. Maisyare omai tavon, vatan tenambe indati Kristus po kovakato raugavo mai, nanawirati ube intabove Ai. ²³ Weramu vatane maijasea

✧ 15:3 Yesaya 53:4-6

✧ 15:4 Mazmur 16:10; Matius 12:40

✧ 15:8 Arakov 9:3-6

✧ 15:21 Roma 5:12-21

ukovakato no wene rai mamaisyo Amisyepo ratayao rai: Weti vatano manasyin dave kovakato pamo Kristus. Umba arono Kristus pakare mine so rai, indati Apa kawasae apaura mansai onawamo Po kovakato rau-nanto mai rijabe.

²⁴ Arono namije mewen to, munije ama akari nde nande. Indati Kristus po apa marova mapinde tenambe, omamo Po awa vambunine muno awa ube akarive randamisyi vintabo. Po apa marova wato mataopona mewen, umba Po apa be akarive raije raunanto no Injayo Amisyepo ai vintabo. ²⁵ Weye Kristus opirati be akarive mansanan ava Amisyepo apa marova maveaje una no Kristus ajo ate rai vintabo. ²⁶ Apa marova maran dave pare Po apinde pamo Wene. ²⁷ Weye Ayao Amisyepo mo ratoo mare: “Po anakotar tenambe raveaje no ajo ate rai indamu be akarive rai vintabo.” ²⁸ Weramu wandaen Injayo Amisyepo taune pamo paje ti Kristus be akarive Ai jeben. Yara Amisyepo wepirati po anakotar tenambe raveaje indamu Kristus be akarive rai. ²⁹ Arono ana umaso nde nande to, indati Kristus, wepirati Arikainyo Amisyepo pije, taune paje indamu Injayo Amisyepo be akarive Ai. Weti Injayo Amisyepo, wepirati po anakotare raveaje no Kristus ajo ate rai, indati be akarive Kristus akivan. Maisyare omai ti, Injayo Amisyepo pamo anakotar tenambe awa Amisyepo muno be akarive anakotare rai tenambe.

²⁹ Syo ranaun ware weapamo inta wasaemeno wapa arakovo ugwenen to mansai, ti inta wasaugasya kuvuni mana rai mansamarom. Weti syo wasanajo: Ranivara vatano ugwenen to maijasea ukovakato no wene rai jeben, weaveti wapa wasaemen ti wasaugasya kuvuni mana rai umawe mamo ama tunato raije noare ruimaisy? Vatano ugwenen to nawamo ranivara maijasea ukovakato jeben, weamo wasaugasya kuvuni mana raijo mansamarom wemamo ama ine mewen dai. ³⁰ Muno rean tavon, ranivara vatane ukovakato no wene raije jeben, weamo reama siurijo mine so ama ine mewen dai. Weye masyote yanteter Amisyepo marova ubeke dave wo reansaubaisy, weramu reansatawandi rai weye reanave arono munije ama akari indati Amisyepo reansaijaseo reangkovakato no wene ama uga rai. ³¹ Sya arakove weap, syo raura tugaive so: wene nande mo rinamune raotar de masyote yanteter tutir. Muno syo raura tugaive so rai tavon: wapo anayanambe raugavo rinai weye weaponave wama Amisyepo Yesus Kristus ai to. ³² Sya marova una no munijo Epesus

onawamo ube marovave rinai maisyare make mamun mansamaisy. Weramu inatawandi rai tutir weye inanave Amisyepo amen Wepi indati po kove ratayao rinai arono munije ama akari. Weramu ranivara vatano ugwenen to maijasea ukovakato jeben, wea indati sya siurije umaso ama ine meweno rai vintabo. Vatano wanave ayao kovakato raije jeben onawamo utavondi ayao vari so rai:

“Wade ra wamisyisy muno wamo mana ranamanam,
muno wansananibe wana no mine so rai,
weye simane pamo indati wamunen.”³³

³³ Vemo vatane wo wasaponae nora! “Vatano manuga ngkov utavobombe vatano ukakainoanive matavon, mo mauga ti ukakainoanive tenambe.” ³⁴ Arakove, syare naiso kobe wapaparo wasaijo wapa ayao kakai rai indamu vemo wapo rave akato nora yara wadansopi. Ayao mbe samaneve wasai ma idaurana: weapamo inta wapantatukambe Amisyepo ai raveal!

Vatano ukovakato no wene ama uga rai, manasine maisyare rui?

³⁵ Weramu vatane inta wo ranajo ware, “Vatano wene nde mai to nawamo maijasea ukovakato tai rui? Muno manasino raijasea ngkovakato mamo maisyare rui?” ³⁶ Inya, vatano wapantatukambe weap! Arono wapo kasyambere kami ravaya no kopa rai, kami namije ngkakai rati, umba ntubai akato. ³⁷ Weti wapo kasyambere ama omane, ama waowe mamo wapo ravaya jeben, yara ama kami omirati wapo ravaya. Muno anare kotare rui vayave maisyare omaisy. ³⁸ Kamije mamo Amisyepo po ama moto ntubai rapatimugo rai. Po kamije ama moto ntubai raunande mamaisyepo anare kotaro namije rarijati. ³⁹ Anakotare ranasine maito maide jeben tenambe, yara nanentabo mamaisyepo taune ama kotare rarijati taiso: vatane manasine, maere kotar manasine, insani manasine, muno jiane manasine. ⁴⁰ Anakotaro no no naumo warae ama ranasine nsasyepo anakotaro no no mine vone so ama rai. Amisyepo ranari tenambe muno ama kotare ngko dave tenambe. Weramu anakotaro naumo warae ama ngkove nsasyepo anakotaro mine vone so ama ngkove rai. ⁴¹ Uma apa ngkove nsasyepo embae ama rai muno nsasyepo tume apa ngkove rai tavon. Muno tume inta apa ngkove nsasyepo tumo kaijinta awa ngkove rai.

⁴² Ananeneae kami omi ntubai raurata irati vatano Amisyepo po maijasea ukovakato

no wene ama uga rai. Manasino rantuna no aipapo omamo mangkati no kopa rai, weramu manasino rajjasea ngkovakato indati mangkati jakatoo ramu. ⁴³ Manasino kopa rantuna mamoo ngkakainoanive muno mayondi. Weramu manasino rauseo ngkovakato mamoo ngkoo dave muno mbambunin. ⁴⁴ Manasino kopa rantuna mamoo manasino mamaisyo mine vone so ama rai. Weramu manasino rajjasea ngkovakato no wene rai omamo Amisye apa Anawayo Vambunine mo kovo wanyine raunande rai indamu vatane umaso umamaisyo ukova una no munijo ntiti rai.

Weti vatane wansanasino mine so no muno wansanasino munijo ntiti no tavon. ⁴⁵ Weye Ayao Amisye mo ratoo taiso: "Adam, vatano manasyin, wepamoo Amisye po anawayo raunande ti kov."⁴⁵ Weramu "Adam marane" wepamoo Kristus, wepirati apa Anawayo mo kovo nuge nuganuije raunande. ⁴⁶ Manasyin dave nde mamoo wansanasino mine so. Umba nde jirum akato mo ranigwan mamoo wansanasino munijo ntiti. ⁴⁷ Vatano manasyin, wepirati Adam, opamoo anasine raugav no kopa mine so rai. Yara vatano de rijabe akato, wepirati Kristus, nori rati munijo ntiti. ⁴⁸ Vatan tenambe mine so maisyare Adam amaisy, opirati anasine raugav no kopa mine so rai. Yara vatano una no munijo ntiti wo Kristus apa ramaisy, Opirati nori rati munijo ntiti. ⁴⁹ Soamoo wansanasine mo Adam apa ramaisy, wepirati Amisye po anari kopa mine so rai. Maisyare wemai tavon, arono munije ama akari indati wansanasine mo Kristus apa ramaisy, Opirati nori munijo ntiti.

⁵⁰ Sya arakove weap, syare syo raura kakavimbe: wansanasine so ama ine muno ama mavu omamo indati nsiso munijo Amisye be akarive rajje rai ramu. Muno wansanasino ngkakaija mandamaisye so omamo no tawane ramu. ⁵¹ Wadanide! Soamoo syo ayao ngkokaibe inta raura wasai: Vatane wamamoo inta nawirati unanta wene rai, yara inta nawamoo unanta wene rai jeben yara ta utantunana masyoto munije ama akari nde nande rai. Weramu wan tenambe indati wansanasine so ranigwanoo wansanasino wanyine rai vintabo. ⁵² Wansanasine ranigwano papabe. Arono Amisye apa tavuna maran ngkin, vatano ugwenen to indati maijasea ukovakato muno manasine maug akato jeben. Muno wan tenambe wansanasine ranigwan. ⁵³ Weye wansanasino ngkakaija mandamaisye somamoo ranigwan indamoo mandamaisye akato jeben, yara noa nuge nuganui. ⁵⁴ Arono naije ayao anawae po

ratoo so indati mamaisy:

"Weno akoo raumandi kobe weye Amisye po rapinde to."⁵⁴

⁵⁵ Muno ayao so mamai tavon:

"Wen akoo winy, Amisye po napinde to!

Winyamoo reamoo nya mamunee rasyaniv akatoo ramu."⁵⁵

⁵⁶ Wama ayao kakai wemirati mo wene raugavo wansai. Muno Amisye apa ananyao wemirati mo wama ayao kakai rarorono wansai. ⁵⁷ Weramu kove raura seo Amisye ai! Wepi po wama ayao kakai rapinde to, weye Amisy Yesus Kristus po rapaya wansai vintabo. Weti wamoo wene rasyaniv akatoo ramu.

⁵⁸ Maisyare omai ti, sya arakovo inanuga no wasai, syare wasyai tindimuve muno wana tawan watawondi Amisy Yesus ai. Syare wapo Apa anakere rajjaro panyoambe tutir, weye wadaen wadajjara marudi jeben yara ama ine mamoo Po raunande aje.

16

Doije inta ratayao vatano awa ananuge meweno mai mansamarom

¹ Soamoo wapare wapo doije ranugan indamoo wapo raunantoo Amisye apa kawasae una no Yerusalem mansai, weye onawamoo awa ananuge meweno mansai. Syare wapo ranugan mamaisyo ananyao syo raunantoo anugano Amisy nanawirati una no munijo Galatia mansai rajijati. ² Mingguge yanteter apa masyoto manasyin, syare weapamoo nantabo wapo doije inta ratayao vatano awa ananuge meweno mai mansamarom. Wapa doijo wapo rajjaro wapa anakere rai wemamoo wapo nake inta raosoro mumuimbe indamoo wapo randi. Wapo doijo namije ratavuna arono risyore wasai to, weamoo inta panya po ranugan akato jebenara ntami to. ³ Arono ride nande to, risyo vatane inta matutir nanawirati wapanave mansai, indamoo wo doije umawe raugav uta no Yerusalem. Muno syo nyovara waowe inta ratoo indamoo wo rarorono kawasae una no Yerusalem mansai. ⁴ Muno ranivara syoroto tavon omamoo mamaisy, weamoo risye wenawe reanta tenambe.

Paulus po apa unanui anya rapatimu

⁵ Syare syanya propinsi Makedonia raide rati, umba arono syanya raidea mewen, indati syore syo wasapan. ⁶ Syore wasajje mamoo rino wasarijat masyote inta yai rako, embayo ovarebe poen dati rako, syo raen dati. Naijea umba weapo rinaeranande sya unanui anya rai inda syanya tutir. ⁷ Naisoamoo syore wasai rainy, weye syonae

syo wasapan mamaumbe vayavei. Yara Amisy po rinamayar, weamo syare rino wasarijata nugoenta. ⁸ Weramu manasyimbe syare rino tawan no munijo Epesus so rai java Ono Pentakosta nande. ⁹ Weye naisoamo varoro kove raugaje rinai indamu syo anakero Amisyeraijar no Epesus so rai muno vatane wanui manuga rausiso sya ananyao rai. Weramu vatano manuga kantetoaro rinai onawamo wanui tavon.

¹⁰ Ranivara Timotius de wasai, wabekobe indamu wapo augav de siso wasatavon. Yara vemo po wasasyaniv nora, weye opamo po anakero Amisyeraijar maisyare muno rinamai tavon. ¹¹ Weti vemo wapo Timotius atantona wapare opamo vatano mamaisye jewene pa, wenora! Yara wapo aeranande kobe indamu po apa unanui anya rave tutir, wirati pakare rinai kovo saumane rautan. Soamo syo anyuto dei muno wama arakovo kajjinta matavon tenambe.

¹² Wama arakovo Apolos pamo syo raura aive to syare ibeke dave indamu wepe arakove inta nawe wore wo wasapan. Weramu opamo po rapatimu pare soamo ponae pore. Ranivara masyote inta kovo ai, indati de wasai.

Nyovara waowe ama maran

¹³ Syare weapamo wana tawan irati wapa anave rai muno wasyisyaube! Weramu vemo wanjaniv inya, yara syare wasanuga mbambunin. ¹⁴ Ana rui vayave wapo rave, syare nyo muinye raroron.

¹⁵ Risyararakove, weapo raen Stepanus muno apa yavaruga wenawamo vatano manasyin dave no propinsi Akaya nanawirati wanave Yesus Kristus ai. Wenawamo manuga ntenami wo Amisyeraijar apa kawasae maeranande. ¹⁶ Maisyare wemai ti, syare wabeto irati vatano maisyare somaisye mansai muno vatano kaijo utavondi wo Amisyeraijar apa anakere raijare mansai tenambe. ¹⁷ Risyamo inananibe weye wapo Stepanus muno Portunatus muno Akaikus matutir ude wo inapan. Weapamo wano rinatavon no naiso jewen weti wo wasanigwan. ¹⁸ Muno wo inanuga raveti ranayanambe muno wo wasanuga raveti ranayanambe tavon. Vatano maisyare sonawamo syare wabekobe mansai.

¹⁹ Anugano Amisy nanawirati una no Asia wo kove raura wasai. Akwila muno Priskila yo kove ranutu terave wasai weye wabe arakobe no Amisy Yesus ai. Muno anugano Amisy nanawirati wanugan no aya yavare wo kove ranutugore wasai tavon. ²⁰ Wama arakove nao tenambe wo kove ranutugore wasai. Syare wapo kove

raura wasai vambinibe weye wabe arakobe no Yesus Kristus ai.

²¹ *Risyirati Paulus, taune inaneme veano nyovara waowe ama marane so ratoe: syo kove raura wasai.*

²² Are pirati muinyo Amisy Yesus ai jewen, weamo syare Amisyeraijar po mangke raugaje ai! Amisy Yesus, nyavave nyakare reansai!

²³ Amisy Yesus apa kove no wasautan tenambe.

²⁴ Rimuinyo wasai tenambe weye wambe arakobe no Yesus Kristus ai.

*Risy,
Paulus*

Nyovara Wao Jirum Paulus Po Ratoe Anugano Amisye Mai No Korintus 2 KORINTUS

Paulus po kove raura

¹ Risyirati Paulus, risyamo Yesus Kristus po inatutir indamu syo Apa Ayao Kove raura, mamaisyo Amisye apa bekere rai. Risyera wama arakovo Timotiusa pe ririmo nyovara waowe so ratoe ririmo ranutugore anugano Amisy wana no munijo Korintus wasai muno more tavon irati Amisye apa kawasae wasai tenambe wana no propinsi Akaya rai.* ² Kove muno saumane no no wama Injayo Amisy muno no no Amisy Yesus Kristus no wasautan.

Kangkamambe Amisye ai weye Po wansayove wama siurije rai

³ Kangkamambe irati Amisye ai, opirati wama Amisy Yesus Kristus apa Aja piye! Wepirati wama Injayo aemeno wansai rave muno Wepirati po wansanuga rayove. ⁴ Muno reamamo Po reansayove reama siuri kotaro rui vayave rai. Amisye po reansayove indamu arono vatano kajjinta una irati siuri kotare rai, reamo mayove irati vambunino reamo rajia no Amisye ai rai. Maisyare muno Amisye po vambunine raugaje reansanuga rai arono reansiuri, maisyare omai tavon reamo vatano kajjinta manuga ravera mbambunin arono siuri nande mai. ⁵ Weye siuri wemirati Kristus po raron omamo manui, ti manui reamo raron tavon. Muno Kristus po reansaer-anande reama siurijo namije rai tenambe mamaisyo Apa vambunino manakoe rarijati. ⁶ Reansatawandi siurije rai indamu weapamo wasanuga mbambunin muno indamu wasisa kove rai. Amisye po reansaer-anande muno Po reansayove arono reansiuri, maisyare omaisy indati Po weasaer-anande tavon. Weaveti arono siurije kotare nande wasai maisyare muno nande reansai to wemaisy, indati wea tavon wabambunin wasatawandi rai. ⁷ Weti arono wasiuri, reansanuga mamauno wasai jeben weye reansanave Amisye amen matuve. Arono watawondi wasiuri maisyare reansiuri ramaisy, reandaen Amisye po wasaer-anande maisyare muno Po reansaer-anande wemaisy.

⁸ Sya arakove, ibeker indamu sya siurijo manakoe nande rinai† no propinsi Asia omamo wapo raen. Siurijo namije mangke

dave, weti syo ranawane kakai weye sya vambunine mamaisyere ramu. Rijaniv syare vemo wene mo inaugav. ⁹ Tugae, syo ranaune mamamo maisyare wene mo inaman. Anakotare so nande rinai indamu vemo risyamo risawa taune sya vambunine rai nora, yara Amisye apa vambunine obo rai. Wandaen Amisye apa vambunine manakoe rave weye Wepirati po vatano nanawirati ugwenen to mavera ukovakato. ¹⁰ Arono siurijo manakoe namije nande rinai, Amisye wepirati po rinapaya wene rai to. Muno rinanave Amen wepirati indati po rinapaya wene rai jakato. ¹¹ Weti syare weapamo watawondi wasambayambe rinai. Weye ranivara vatane wanui ube sambayambe rinai, weamo Amisye indati po kove raugaje rinai, umba vatane wanui ware wo kove raura seo Amisye ai.

Animaisyere mi mbewar Paulus pakare no Korintus rai jeben

¹² Inanayanambe weye inanuga mo sya ana idave no mine vone so raen omamo inta ngkakainoanive ramu, yara mamaisy muno nsarokir. Muno sya ana idave irati sya arakove wasai maisyare wemai tavon weye Amisye po vambunine raugaje rinai. Muno ritavondi mine so ama ana ratantona ntiti rajije jeben, yara Amisye apa kove obo rai, wemi mo vambunine raunande rinai. ¹³⁻¹⁴ Syo ayao sarokir obo ratoyo wasai sya nyovara wao rai indamu ama ine inta ngkokaibe jeben yara wananta rai arono wabacave rai. Weye ribeker indamu wapo kovo Amisy no rinai wema wadaen dave. Nandijawe wapo raene rinai ma ntairi kobe jeben, weramu soamo ibeker indamu wadaen bintabo indamu wapare, "Tugae, Paulus apa ana dave mamaisy ivae." Maisyare omaisy, arono masyoto Amisy Yesus pakare, indati weapamo wasanuga manakoeyo rinai, muno masyoto naije inanuga manakoeyo wasai tavon.

¹⁵ Wemi mbewar syanave wasai weapamo wananta sya bekere rai, weti syo sya unanui anya rapatimu to syare ide wasai ama susye jirum. Weye syo rakarae ide wasai ama susye jirum, weamo Amisye apa kove nde wasaive jirum tavon. ¹⁶ Weti sya ana syo ratantona mamamo syo wasapan manasyimbe arono syo sya unanui anya rave syoroto no Makedonia rai, umba syo wasapan jirum akato arono risakinav syakare, muno naije wapo inaer-anande indamu syo unanui anya rave tutir ito no propinsijo Yudea rai.

¹⁷ Weramu sya ana syo ratantona wusyino namije mamamo mamaisyere ramu,

* 1:1 Korintus mamamo munije inta no no propinsi Akaya rai. † 1:8 Ayao Yunani rajiamo, Paulus po ratoe pare, "reamo, reama, reansai...", weramu ama ine mare po taune aura. Anemo 9-14 mo ramaisy.

weti indati syore wasai intabo vayave. Abo! Vemo wapare inanuga nanto nande maisyare vatano mine so mansamai nora! Vatano mine so wayao ware, “Yombe, re-anta,” umba kavinta nakato ware, “Jewena, reana akato kai.”¹⁸ Weramu risyamo syo raura tai wemaisye ramu; syare “Yombe” umba “jewena,” omamo syo raura ramu. Weye Amisye po vatane wansaponae ramu, weti risya syo wasaponae tavone ramu.¹⁹ Muno Arikainyo Amisy, Yesus Kristus so, Apa ayao mbe jirumbe jewen yara Apa ayao mbe intabowe tutir. Wepirati risye Silasa pe Timotiusa pe reamo aura kakavimbe wasai.²⁰ Muno Kristus opi po Amisye apa urairije raveti mamai tenambe. Maisyare omai ti, Kristus wepi bewar ti arono wansambayambe wamo Amisye ararimbe wamare, “Amin.”²¹ Amisye po vambunine raugaje indamu weape risye wana tawan irati Kristus ai. Muno Po wansatayao indamu taune apaura wansai.²² Anawayo Vambunino ntuna wansanuga rai omamo Amisye apa kamano musyewe mare apaura wansai to. Weti anakotaro ngko dave wemirati Po raurairive Apa kawasae wansai indati Po raunande aje no munije ama akari.

²³ Soamo waparijo rinai, wapare, “Veanimaibe irati Paulus pakare po reansapan akato jewen?” Weti syare syo raura kakavimbe wasai: Arono nandijawe syakaore ramu weye ayao kakaije no wasaija nene muno syonae syo wasanyao soowabei. Amisye po raen sya ayao syo raura so no rai tugae; syangkarive ramu.²⁴ Weramu syonae syo wasantitidi wapa anave rajji, weye syo wasaan wapa anave mamu ntindimu to. Sya bekere mamu wambe arakobe wamo unanuije rakani indamu weapamo wasananibe.

2

¹ Risyo ayao raura patimuve no rinanuga rai to syare risyamo indati syakare syo animaumbe raugavo wasai jakatoe ramu.² Weye ranivara syo animaumbe raugavo wasai, wea umba indati are pirati po anayanambe raugavo rinai?³ Wemi mbe-war ti syo sya nyovara wao manasyin ratoe wasai to. Weye ranivara ride syo wapa ana wadave ngkakaije raen datire, weamo wapo inaveti inanayanambe ramu, yara wapo inaveti inanimaumbe rave. Weramu syo raen ranivara risyamo inanayanambe, weamo weapamo wasanayanambe tavon.⁴ Syo nyovara wao namije ratoe inanuga ranimaumbe rautan, inami ngkaruge ntende manui weye mangkeo rinai. Weramu sya bekere mamu indamu syo animaumbe raugavo wasai oma jewen,

yara ribeker weapo sya muinyo manakoe ranaun no wasanuga rai.

Wapa arakovo po ayao kakai rave pamo wapo aneme rajjar indamu wasanuga nsauman akato

⁵ Wapo raen vatan inta no wapa yasyine po ayao kakai manakoe rave to. Apa ana po rave mbewar ribui inanimaumbe jewen, yara mbeti weapamo wasanimaumbe tenambe tavon. (Weramu vemo syayao soowabe nora, weye syantatukambe weapamo wea tenambe wasanimaumbe rako, nako mamaune inta manimaumbe rako?)⁶ Kavintare wea tenambe watavondi wapo mangke raugaje vatano napije ai to. Apa mangke mamai to, ti syare ngko to.⁷ Naisoamo syare wapo vatano napije aneme rajjar indamu wasanuga nsauman akato. Weye opamo animaumbe, ti vemo animaumbe ntoa manakoeve nora, yara syare wabekobeo ai indamu anuga mbambunin akato.⁸ Syo ananyao raugaje wasai indamu wapo wapa muinye rarorono ai jakato.⁹ Arono syo sya nyovara wao manasyin ratoe wasaije, syare syo raen: Wapare wabeto sya ananyao syo raugaje wasai rai tenambe rako jewena e?¹⁰ Ranivara wapo vatano napije aneme rajjar indamu wasanuga nsauman, weamo inanuga nsaumano ai tavon. Ayao kakai rui no ai, risyamo riparijo aije ramu yara inanuga nsaumano ai no Kristus amun indamu ngkovo wasai ti wasanuga nsauman tenambe.¹¹ Wirati indamu vemo Anakakai Akoe po wasatawanaje nora. Weye wandaan Anakakai Akoe beker pare po wansaponae.

Arono Paulus no no Troas, anuga ma-maun

¹² Arono rinanto no munijo Troas indamu syo Ayao Kovo Kristus ravov, syo raen Amisye po unsanda rausiso rinai no munijo namije rai indamu syo Apa anakere rajjar.¹³ Weramu inanuga mamu ntanamane kakai, yara mamaun dave, weye rinanto sya arakovo Titus ai no naije jewen. Maisyare omai ti, syo arakovo una no Troas maneme rajjar umba syuje indamu syanya tutir ride no munijo Makedonia so rai.

Ayao Kovo Kristus mo kove raunande vatano wanave mai, yara kakaije nde irati vatano wonayo rajje mai

¹⁴ Kove raura seo Amisye ai! Weye Po reansaugav indamu reantavondi reama akarijo Kristus ai arono Po apa vambunine raroron no vatano wanui mansamun. Muno Amisye po reansaugav indamu reamo Ayao Kovo Kristus ravov no rui rui vayave maisyare inyo ugo ranavane mbovove ntami nuge raito tenambe.

¹⁵ Arono reamo Ayao Kove so ravov, omamo raurata irati ana mbovove rameseo Amisyae aije rai. Ayao so nande irati vatano Amisyae po mapaya awa ayao kakai rajje mansai, muno nande tavon irati vatano Amisyae po mangke nuge nuganuije raugaje maije mai. ¹⁶ Vatano Amisyae po mapaya awa ayao kakaije rai manayanambe Ayao Kovo Kristus rai, weye mo kovo nuge nuganuije raunande mai. Weti ware ayao somamo maisyare ranavane mbovove ramaisy. Weramu vatano nanawirati Amisyae po mangke nuge nuganuije raugaje mai wonayo Ayao Kovo Kristus rai, ware omamo maisyare ana mbaugae wemaisy. Wakoe! Amisyae apa anakere so mangke dave! Are pirati bambunin po rajjaro taune apa vambunine rai? ¹⁷ Vatane wanui wo ayao Amisyae ravov weye ubekero wo romane ratande mai, maisyare vatano wanamavumbe no pasari wemaisy. Weramu reamamo reamo vatane wato mansamaisyae ramu. Yara reamanapatambe Kristus ai muno reamo Apa ayao ravovo tugaive weye Amisyae opi po reansatutir muno Po reansanyanyuto rai.

3

Amisyae po reansatutir indamu reamo Apa urairijo wanyine ranyao vatane mai

¹ Wabeanimaiibe wapare reamo taune reansarin akato?! Abo! Syo ratan-tona wapanave reansai jeben, yara wapanave kuruno kajjinta maija! Onawamo wo nyovara wao inta raugav, wemirati mo awa ananyao raura titive, weti wapanave obo mai. Muno arono wuje akato, wo wasanajo indamu wapo nyovara wao ratoe mansamarom indamu wo raugav wo rarorono vatano munijo kajjinta mansai. Indako wabeker reamo nyovara wao maisyare namije raugav indamu wapanave reansai rako? Weramu reamo kurune wato mansamaisyae ramu. ² Muno reamo nyovara wao inta raugave ramu, yara taune weapi wasaurata irati reama nyovara wao ratoe no reansanuga rajje rai! Weye wapa ana wadawe ngkove mo reama anakero no no wapa yasyine raroron kakavimbe indamu vatan tenambe wo raen. ³ Wapo raroron kakavimbe weapamo Kristus taune apa nyovara wao nawi weap, weye Opirati po reansatutiro wasai indamu wapanave Ai. Weti nyovara wao syo raura somamo dawatiye inta veano ratoe jeben, yara Amisyae noa pitawabe Apa Anawayo Vambunine mo ratoe. Muno mo ratoe

orame vasye rai jeben, yara mo ratoe vatane wasanuga rai.*

⁴ Reansanuga ntindimu reama ayao reamo raura so rai no Amisyae amun weye reambe intabov Kristus ai. ⁵ Weramu taune reamamo reambambunin reamo anakere so rajjare ramu, yara reama vambunine mamo Amisyae wepi po raunande reansai. ⁶ Po vambunine raunande reansai indamu reamo Apa urairijo wanyine ranyao vatane mai. Urairijo wanyine so nsasyeoe ananyao wusyino Musa po ratoe rai, weye Amisyae apa Anawayo Vambunine mo urairijo wanyine raugasya manawadi vatane manuga rai. Ananyao ratoe wusyinoe mo wene obo raugav weye vatane wo rarijat tenambeye ramu, weramu Anawayo Vambunine mo kovo nuge nuganuije raunande.

Urairijo wanyine mo Ananyao Musa rakivan

⁷ Arono wusyinoe Amisyae po apa ananyao raugaje vatano Israel mansai, ananyao umaso ratotov no orame rai muno Amisyae apa varo ngkovo ntiti raroron no Musa amune rai. Arono naije, Musa amune mba dave ama vare mpanyoan dave, weti vatano Israel mansami ngkasyuri, wo Musa amune ranyanyut ubambunine ramu. (Weramu kavinta umba kovo ntiti umaso raumandi Musa amune rai kobe.) Weti wandaen ananyao wusyini, wemi mo wene obo raugavo vatane mansai, nde irati Amisyae apa kovo ntiti rautan. ⁸ Ananyao wusyini maisyare omaisy, weti tugae rave urairijo wanyini, wemi mo Anawayo Vambunine raunande vatane mai, ama kovo ntiti manakoe rave mo ananyao wusyini ama rakivan! ⁹ Weti Ananyao Musa, wemi mo mangke raugavo vatane mai, ama kovo ntiti no rai, weramu urairijo wanyine ama kovo ntiti mo rakivan dave, weye wemirati mo vatane mavera umamai no Amisyae amune rai. ¹⁰ Ananyao Musa ama kovo ntiti mamaun bayave, yara urairijo wanyine ama kovo ntiti manakoe akato ti mo rakivan. ¹¹ Weye Ananyao Musa no tawane ramu, yara urairijo wanyine noa nuge nuganui. Maisyare omai ti, Ananyao Musa ama kovo ntiti no rai, weramu urairijo wanyine ama kovo ntiti manakoe mo rakivan.

¹² Reansanaveano Amisyae apa urairijo wanyine umaso ramen tai maisy, weti reamo Apa Ayao Kove ravovo vambunimbe. ¹³ Muno reamo ana inta rangkokaibe wasai jeben. Weti reamo Musa amaisyae ramu, wepamo po amune

* **3:3** Arono aneno Musa aijoe, Amisyae po Ananyao Abusyini ratoe orame vasye rai (Keluaran 31:18). Weramu arono Amisyae apa Anawayo Vambunine ndeamo Mo Amisyae apa ananyao ratoe vatano wanave manuga rai (Yeremia 31:33; Ibrani 8:10).

rangkokaike watano Israel mansai. Musa po ansune vasye ransawa amune raora indamu vemo vatane wo Amisyeye apa varo ntiti raen nora,^{*} muno indamu vemo wo vare ama ngkarimu ti raumandi no amune rajje raen nora.¹⁴⁻¹⁵ Vatano Yahudi wato awa ana wo ratantona ngkaumudi, maisyare ansune vasye inta no mansaora wemaisy. Mui yava unumeso, arono rui vatano Yahudi wo Ananyao Musa raraniv, unanta rai jeben. Muno arono ubacave Amisyeye apa urairijo wusyine rai, wo raen kakavimbe jeben, weye manuga mamu ngkaumudi, maisyare ansune vasye mo ratatuv wemaisy. Kristus obo pirati bambunin Po awa ana mo manuga ratatuve raneka mai.¹⁶ Weti ranivara vatane inta sakinav ti panave Amisyeye Yesus ai, weamo apa ana mo anuga ratatuv namije raneka ai, weti po Ayao Amisyeye ranaun mba dave.¹⁷ Arono reamo Amisyeye Yesus aura so, reamare Apa Anawayo Vambunine mije. Anawayo Vambunine no no wansanuga rai, weamo Mo wansapaya Ananyao Musa ama mo wansajaro arove rai.¹⁸ Weti soamo vatano wamanave Kristus ai wamamo wambaro Amisyeye apa kovo ntiti rai anawadive, muno Apa kovo ntiti ratatuv akato jeben. Muno Amisyeye apa kovo ntiti no wansai indati miridi nseo tutir, weye Anawayo Amisyeye mo wansanuga ranari wanyimbe indamu wamo Kristus amaisy.

4

Wansaurata irati kavino kopa wemirati romane raveasyo ama uga rai

¹ Reama anakere somamo Amisyeye bekobe reansai ti Po raugaje indamu reamo rajjar. Amisyeye wepi po raugaje reansai, weti reansanuga mamaun jeben yara mbambunin.² Anakotaro mbe samaneve ti ngkokaike wemamo reamo rave ramu. Muno reamo vatane mansaponae ramu, muno reamo ayao Amisyeye ranyao sasyeve ramu. Yara reamo ayao tugae obo raura muno reamo anakotare so rave no Amisyeye amun indamu vatan tenambe wanave reansai.

³ Weramu vatane inta unanta Ayao Kove reamo ravove rai jeben weye manuga ngkaumudi, maisyare ansune vasye mo ratatuv wemaisy. Wenanawirati vatano Amisyeye po mangke nuge nuganuije raugaje mai weye wonae wanavei.⁴ Anakakai Akoe be akarive mine so rai, ti po vatane awa ana wo ratantona rauguji ti ngkaumudi indamu vemo wanave Ayao Kove rai jinya, muno po manuga ratatuv indamu Ayao Kove mbaro mansanuga rai jinya. Ayao Kove mi raurata vare rai, mo

Kristus apa kovo ntiti raroron, weye Kristus opamo po Amisyeye amaisy.⁵ Reamo taune reansaura vatane maije ramu, yara Yesus Kristus opirati reamo aura kakavimbe reamare Opamo be akarive reansai, muno reamamo vatano Yesus po reansatur indamu reamanapatambe wasai vayave.⁶ Arono mine so ranari, Amisyeye payaoware somaisy pare, "Syare mino ngkaumure somamo vare ntipu rai!"^{*} Muno arono wusyinoe wamantatukambe Amisyeye ai ti wana no kaumure rai, weamo Apa vare ntipu wansanuga rai. Po apa vare ruanande indamu wama ana wandatantona mbar indamu wananta irati Amisyeye apa varo ngkovo ntiti rai, wemirati raroron no Kristus amune rai.

⁷ Reansaurata irati kavino kopa inta rai, wemirati romane raveasyo ntuna ama uga rai. Weye reansanasine somamo mayondi maisyare kavino kopa umawe ramaisy, weramu Ayao Kove Kristus omamo maisyare romano nsiso ama uga rai. Amisyeye po apa Ayao Kove raugaje vatano mayondi reansai indamu reamo ravov, wirati indamu vatan tenambe wo raen reama vambunino manakoe omamo no no Injayo Amisyeye ai, yara no no reansanasino mayondi so rai jeben.⁸ Siurije nande reansai tutir, weramu mo reanskupi jeben. Muno ana nsosobe mo reansaurai ti reamananepabe animaisyeye mi reamare reamo rave, weramu reama reansanave Amisyeye amene mamu raumandije ramu yara ntindimu tutir.⁹ Reama marova wo reansawatambe, weramu Amisyeye aneme mpaya reansaije ramu. Wo reansanepat, weramu reangkakai ramu.¹⁰⁻¹¹ Arono reana no mine so rai, kavintare reananta wene rai weye reantavondi Yesus ai. Reama marova ubeker tutir ware wo reansaubaisy, maisyare muno wo Yesus aubaisy no wusyinoe wemaisy. Omamo nande reansai indamu Yesus apa kovo no no reansanasino mayondi so raroron vatan tenambe mai.¹² Weti wene nande mo reansamune raotar tutir indamu kovo nuge nuganuije nande irati wasai.

¹³ Arono wusyinoe Ayao Amisyeye mo ratoe taiso:

"Risyanave Amisyeye ai, weti syo raura."^{*} Muno reamamo reamanave Amisyeye ai tavon, weti reamo reama anave Amisyeye ai raura kakavimbe vatane mai.¹⁴ Weye reamo raen Injayo Amisyeye opi po Amisyeye Yesus aveti kovakato no wene rai, Wepirati po wansavera wangkovakato no wene rai tavon, weye wambe intabove no Yesusa nui. Indati Amisyeye po reame weape wansaugav indamu wansayai tenambe

* 3:13 Keluaran 34:33

* 4:6 Kejadian 1:3

* 4:13 Mazmur 116:10

no Amun. ¹⁵ Reamamo reansatawandi anakotaro ngkakai umawe rai indamu Amisyé apa kove nande wasai, muno nande vatano wanui mansai tavon. Weye arono Amisyé apa kove nande vatano wanui mai, indati vatano wanuije so wo Amisyé ararimbe ti awa kovo wo raura seo Ai indati manakoe rave.

Anakotaro ngkakai nande no mine so noa nugoenta ramu, yara anakotaro ngkove no no munijo ntiti noa nuge nuganui

¹⁶ Maisyare omai ti, reamamo re-ansanuga mamaune ramu, muno reamo anakotaro ngkakai nande reansaije rantotobe ramu. Weye wansanasine somamo ama vambunine miridi makaje, weramu kovo mo wansanuga ranari wanyimbe omamo nandeo masyote yanteter. ¹⁷ Anakotaro ngkakai omamo nande reansai indamu mo reansatayao indamu reamaura Amisyé apa kovo ntiti rai. Anakotaro ngkakai nande no mine vone somamo mamaun, noa nugoenta ramu, yara kovo ntiti makanande mamano manakoe, noa nuge nuganui, weti mo anakotaro ngkakai mine so rakivan dave. ¹⁸ Weti anakotaro reamo raeno wansami rai no mine somamo reamo ratantona ramu. Yara ana reamo ratantona mamano anakotaro reamo raeno wansami raije jeben, wemi no no munijo ntiti rai. Weye ana reamo raeno wansami rai omamo no tawane ramu, yara ana reamo raeno wansami rai jeben wemirati noa nuge nuganui.

5

Wansanasino wanyin no munijo ntiti

¹ Weye wamo raen wansanasine so raurata irati randume inta rai, wemirati wana rai no mine so. Arono wansanasine so ngkakai kobe, maisyare randume umawe rangkat, indati Amisyé po wansanasino wanyine raunande wansai. Wansanasino wanyine maisyare yavaro wamare wana rai no munijo ntiti ramaisy, wemamo mangkat akatoo ramu, yara noa nuge nuganui. Muno wemamo vatane wo ranarije jeben, yara Amisyé taune pi po ranari. ² Soamo wamanonae muno wamoyov weye wana no mine vone somamo mangkeo wansai. Weti wambeke dave indamu wansanasino no no munijo ntiti raugaje wansai. ³ Wansanasino wanyine raurata irati ansuno wamo rave indamu vemo wansarokanive nora. ⁴ Tugaeyamo wana no wansanasino mine so rai, wamoyov muno wamanonae anakotaro nsosobe nande wansaije rai. Weramu wansanasino kopa somamo wamare wamo rapaya

jewena nene, yara wama bekere mamano no naiso kobe Amisyé po wansanasino wanyino munijo ntiti raunande wansai, indamu wansanasino ngkakaija mandamisyé so ranigwano wansanasino kova no tawane rai. ⁵ Amisyé pirati po wansatayao indamu wansanasine ranigwan. Muno Po apa Anawayo Vambunine raugaje ntuna wansanuga rai indamu mbe rarorombe indati Po ana umaso ravera mamaisy.

⁶ Maisyare omai ti, wansanuga ntindimu tutir. Wandaen wana irati wansanasino mine so rai omamo mare wanggwara-vainyo munijo Kristus tuna raije rai. ⁷ Wemi mbewar arono wana no mine so rai, wamtavondi wama anave Kristus ai obo rai, yara ana wamo raeno wansamije rai ma jeben. ⁸ Tugae, wansanuga ntindimu tutir. Wama bekere mamano wamo wansanasine so rapaya ntami vayave indamu wanta wano Kristus arijat. ⁹ Weramu wana tawan no mine so rai rako, wanta wano Kristus arija dako, wama bekere mamano intabo, omamo Kristus anayanambe wansai. ¹⁰ Weye wan tenambe indati wansayai no Kristus amun indamu Po wansanajo wama ana wandave no mine vone so rai indamu ama ine raugaje wansai. Muno ama ine raugaje mamaisy wama ana wandave rarijati, ngkova rako ngkakaija rako.

Paulus po vatane mansanyao indamu wakare Amisyé ai

¹¹ Weti syo Kristus asyaniv weye syo raen Wepi pare po vatan tenambe mansanajo awa ana udave rai. Wemi mbewar syo vatane mansanyao indamu usakinav ude Ai. Amisyé po inanuga raen, muno ribeker indamu weapamo wapo inanuga raen tavon ti wapo raen syo wansanyo tugaive. ¹² Arono syo raura tai maisy, weamo wapare syo taune inararimbe akato rako? Weinya! Yara syo taune rinaura indamu weapamo wansayanambe sya anakere rai, wirati arono sya marova wo rinaura tantunawi, weamo wapo ayaowe rasakinavo mai. Onawamo wo vatane awa tame ntiti obo ratantona, yara wo manuga raene ramu. ¹³ Ranivara vatane inta ware risyamo anaivi mo inavea, weamo wo raura kai, weye syanapatambe Amisyé ai vayave ma. Weramu ranivara risyamo anaivi mo inave jeben yara sya ana syo ratantona nsarokir dave, omamo ngkovo wasai ma. ¹⁴ Kristus apa muinye mbe akarive rinai sya ana syo rave rai tenambe. Weye syo raen Vatan intabo so Po anasine raunande kakai indamu Po vatan tenambe manigwan, weti vatan tenambe maisyare ukakai to wemaisy. ¹⁵ Kristus opamo kakaijo vatan tenambe mansai, indamu

vemo vatano Apa kovo wanyine no manuga rai to utavondi taune awa bekere rai jakato nora, yara utavondi Kristus apa bekere obo rai, weye Opamo kakaijo mansai muno kovakato no wene rai mansamarom.

¹⁶ Soamo syo vatane matantona maimaisyo vatano mine so awa ana wo ratantona rajje jeben. Wusyinoe syo Kristus atantona maimaisyo vatane awa ana wo ratantona rai, weramu soamo syo atantona tai maisy akatoe ramu. ¹⁷ Vatano rui pirati be intabove no Kristusa nui, opamo anuga nggwanyin bintabo. Apa anakotaro po rave no wusyinoe muno apa ana po ratantona wusyine raumandi to. Soamo nggwanyin tenambe! ¹⁸ Anakotaro nggwanyine umaso mamu Amisy pi po raugavo wansai tenambe, weye Po Kristus atutir indamu Po wansaugav wamakare Amisy ai. Muno Amisy po anakere raugaje reansai indamu reamo vatane maugav wakare Amisy ai. ¹⁹ Po reansatutir indamu reamo Apa ayao saumane ravov no taiso: Amisy po Kristus atutir de mine so rai indamu Po vatane maugav wakare Amisy ai. Weye Kristus kakaijo vatane mai indamu awa ayao kakaije mamu Amisy po rator akato nora yara soamo anuga nsaumano mai. ²⁰ Maisyare omai ti, reamamo vatano Kristus po reansatutir reamo Apa ayao raura vatane mansai. Weti arono reamo Apa ayao raura, omamo maisyare Amisy taune po raura Po vatane mawain wakare Ai. Reamo vatane mansawain maimaisyo Kristus apa bekere rai reamare, “Wade, wapakare Amisy ai indamu Amisy anuga nsaumano wasai muno wasanuga nsaumano Ai!” ²¹ Kristus opamo ayao kakaije inta no Ai jeben bayave, weramu Amisy po wama ayao kakai raugaje ntuna Kristus ai indamu Po ranawan tenambe. Maisyare wemaisy, Kristus po wansaveti wamamai no Amisy amune rai.

6

¹ Reamirati reambe arakobe Amisy atavon wamo Apa anakere rajjar, weti reamo ananyao so raugaje wasai: Apa kovo Po raunande wasai to mamu vemo wapo rawatambe nora. ² Weye Amisy payao pare:

“Arono masyoto Syo rapatimu ndea mamai to,

omamo masyoto Syo vatane mapaya awa ayao kakaije rai,

arono najje Syo nya sambaya rarani to muno Syo naeranande kobe.”[✠]

Wadanide! Masyoto Amisy po ratayao umaso ndea mamai to. Masyoto unumeso

wade Amisy ai indamu Po wasapaya wapa ayao kakaije rai!

Paulus opamo atawandi siurije muno ana nsosobe rai

³ Reamonae vatane wo reama anakere raura tantunawi, muno vemo ana reamo rave inta mo vatane maveti wonayo ude Amisy aiji nora. ⁴ Yara ribeker indamu sya ana syo rave mo raroron kakavimbe risyamo vatano syanapatambe Amisy ai pi risy. Rinatawandi siurije muno anakotaro nsosobe manui rai to, maisyare so: ⁵ Vatane wo inanepato mangkebe, muno wo inaugave siso no tanoano makova rai, muno wo vatano wanui managan indamu wo arare veano rinave. Syo anakere rajjar panyoambe rave, namane inta yai riniki kakai, muno masyote inta yai sya anaisyeweweno rinai. ⁶ Muno anakotaro kajijinta wemi mo raroron kakavimbe risyamo vatano syanapatambe Amisy ai omamo no taiso: Risyamo inanuga ngkakavimbe, inanto Ayao Amisy rai, inatawandi vatane mai awa ana udave mamai dainye rai, ribekobeo vatane mai muno syo muinye rarorono mai, inanuga tugae rautan. Anawayo Vambunine mo inaugav, ⁷ syo Amisy apa ayao tugae ravov, muno Apa vambunine no inai. Muno sya ana idave mamai no Amune rai, omamo raurata irati anaiyu muno omako syo rajjar imarovave vatano manuga mamuno rinai mansai.

⁸ Vatane inta wo inajaseo titive, weramu kajijinta nanawamo wanaikobe rinai. Inta ukangkamambe rinai, weramu kajijinta wo inaura tantunawi. Syo ayao tugae obo raura, weramu vatane inta wo inawainamo vatano arurijate pa. ⁹ Vatane inta ware, “Reamantatukambe Paulus ai.” Weramu tugaeyamo vatano wanui wo rinaane. Kavintare wene mo inaugav, weramu ritunana nene. Vatane wo rinanepato mangkebe, weramu rikakai rainy. ¹⁰ Masyote intanam rinanimaumbe, weramu rinanayanambe tutir. Risyamo ananuge meweno rinai, weramu syo vatane wanui mansaugav awave kovo manakoe rai. Risyaura ananugo no no mine so inta rajje ramu, yara syaura anakotaro ngko dave rai tenambe.

¹¹ Sya arakovo Korintus, syo raura kakavimbe wasai to weye rimuinyo wasai rave. Anakotaro no no inanuga rai omamo syo raura wasai vintabo to. ¹² Inanuga mamu syo rauguji wasai ramu, weramu wepirati wasanuga rauguji rinai. ¹³ Weapamo maisyare taune sya arikainye nawi weap, weti syayao aje wasai: Syo muinye rarorono wasai, ti syare wapo muinye raroron akare rinai tavon.

*Vemo wambe intabove vatano wanave
Yesus ai jewene mai nora*

¹⁴ Sya arakove, vemo wabe intabove vatano nanawirati wanave Yesus Kristus ai jewene matavon nora, weye mamaisye ramu.* Indati vatano awa ana udave ngkove nawe, vatano awa ana udave mamune ube intabove kakaija. Vare me kaumure me nayamo indati ibe intabove kakai tavon. ¹⁵ Muno Kristusa pe Anakakai Akoe pe[†] yanuga mbe intabove jewen. Maisyare wemaisye, vatano wanave Kristus aije nawe, vatano wanave jewen nawe, manuga mbe intabove jewen tavon. ¹⁶ Yavaro Amisy mamomo yavaro wansambayambe Amisy aije mije, ti yare raugav siso rajie omamo mamaisye ramu. Muno vatano wamanave Kristus ai wansaurata irati Yavaro Amisy umaso rai,[☆] weye Amisy noa pitawabe pamo tuna wansanuga rai. Maisyare Amisy po raura pare:

“Indati Risyamo ino no Sya kawasae awa
yasyine rai
muno ituna mansarijat.

Risyirati awa Amisy,
muno wenanawamo Sya kawasae.”[☆]

¹⁷ Muno Amisy po raura akato pare:

“Sya kawasae weap,
wapuje vatano wantatukambe Rinai
mansaora!

Wade wapansopo mumuimbe!
Vemo wapantukamo anakotaro ngkakain-
oanive rai nora!

Indati Risyamo inanuga rausiso Syo
wasaugav.[☆]

¹⁸ Risyamo wapa Injaya pi Risy,
muno weapamo Sya arikainyo wanya
muno anya nanawi weap.”

Amisy opirati apa wambunine ntiti rave,
Apa ayao mije.[☆]

7

¹ Sya arakovo inanuga no wasai, ayao umaso mamomo Amisy apa urairijo po raugaje wansai. Weti wade wamo anakotaro ngkakainoanive rapaya tenambe, wemirati mo wansanuga muno wansanasine raveti nggwambe. Syare wambeke dave indamu wama ana wandave muno wansanuga ngkakavin bintabo no Amisy amun weye wamo asyaniv.

Ana mbewar ti Paulus anayanambe

* **6:14** Paulus apa ayao ama tunato rajie no taiso: anya panave Yesus ai pamo vemo po wanya manave jewene raovan inya, muno wanya manave Yesus ai mamomo vemo mo anya panave jewene aovan tavon inya. Muno nyare nyaura mine inta rai rako toko rai rako nyomane rai rako, wemo nyo nya doije ranugan irati vatano panave Yesus ai jewene apa doije ratavon indamu nyo anakotare wato ramavun wena. Yara wimbe intabove vatano wanave Yesus aije obo mansai.

† **6:15** Ayao Yunani mo tamo Belial ratoe, ama ine mare Anakakai Akoe pije. ☆ **6:16** 1 Korintus 3:16 ☆ **6:16** Imamat 26:11-12; Yehezkiel 37:27; Muni Akari 21:3 ☆ **6:17** Yesaya 52:11 ☆ **6:18** 2 Samuel 7:14 ☆ **7:6** 2 Korintus 2:13

² Syare wasanuga rausiso indamu wapo reansaugav. Reamamo reamo ayao kakai inta rave nande vatane inta wasaije ramu. Reamo vatane inta wasanuga raugabe indamu wapo ayao kakaije rave ramu. Muno reamo vatane inta wasaponae inda reamo romane raugavo wasaije ramu. ³ Weramu sya ayao somamo syonae syo wasaura tatugadiji, weye inanuga no wasai rave, maisyare umawe syo raura to. Weti ranivara ikakai rako, iko tutir dako, sya muinye mamomo manakoe irati wasai. ⁴ Syanave wasai muno syo wasabumbundi irati vatano kajjinta mai. Weapamo wapo rinayove sya siurije rai ti inanuga mbambunin akato muno inanayanambe rave.

⁵ Arono ride nande Makedonia so rai to, inanasine mayondi rave. Weramu rituna inanuga ntanamane jewen weye anakotare mo rinamboraibe no rui rui vayave. Vatane wayaowi rinai muno yanive ntipu rinanuga rai. ⁶ Weramu Amisy pamo po vatano are nawirati manuga ranimaumbe mayove. Muno Po inanuga so rayove arono Po Titus atutir de rinai.[☆] ⁷ Inanayanambe Titus apa deye so rai obo ma jewen, yara inanayanambe apa ayao po raugavere rai tavon. Weye pare weapamo wapo anayanambe raugavo anuga rai to, muno pare wasaemeno rinai tavon ti wabeke dave indamu wapo rinaen akato. Muno pare wasanimaumbe wapa ana wapo rave ngkakai rai, muno wabeke dave indamu wapo sya bekere rarijat. Wakoe! Inanayanambe ntiti rave syo Titus apa ayao po wasaura umaso raraniv.

⁸ Arono masyoto nandijawe syo sya nyovara wao manasyine ranutu more wasai, sya ayao syo ratoe mangkeo wasai, weramu syo ratantona syo ranutugo wasai omamo ngkov. Weramu umba inanimaumbe arono ridaniv sya nyovara wao umaso mo wasaveti wasanimaumbe (yara wasanimaumbe noa nggwaravainye ramu, yara kavinta vayave). ⁹ Soamo inanayanambe weye syo nyovara wao umaso ratoe wasai to. Weramu inanayanambe weye wasanimaumbe omamo jewen, yara inanayanambe weye wasanimaumbe mo wasaugabe indamu wasakinavo wapa ayao kakaije rai. Wasanimaumbe namije mamaisyo Amisy apa bekere rai, indamu wasakinav wapakare Ai. Weti sya ayao syo ratoe wasai no nyovara wao umawe

rai mamu inta ngkakai wasai ramu, yara ngkov irati wasai. ¹⁰ Ranivara vatane animaumbe mamaisyo Amisye apa bekere rai, weamo mo augabe indamu sakinavo apa ayao kakaije rai, wirati Amisye po apaya ama mangke rai. Weti vatano napije po ratantona animaumbe umaso ngkakai jeben weye mo kove raugav. Weramu mine so ama animaumbe nsasye rave, weye mo vatane maugabe indamu usakinavo awa ayao kakaije raije ramu, yara wene mirati mo raugav.

¹¹ Wadanide! Wasanimaumbe wato ama ine manui rave, weye wasanimaumbe mamaisyo Amisye apa bekere rai. Ama ine no taiso: wabeke dave indamu wapo raroron wasisa watavondi vatane wato apa ayao kakai raije ramu. Wapari arono wapo apa ayao kakai namije raen muno wajaniw, weti wapavave wapo mangke raugaje ai. Muno wasaemeno rinai ti wapare wabeker wapo rinaen akato. Anakotar tenambe umaso mo raroron weapamo wapo ayao kakai inta rave ramu arono ana umaso nande.

¹² Arono syo nyovara wao namije ratoe wasai, sya bekere mamu indamu syo vatano po ayao kakai rave napije aura tantunawi omamo jeben, muno indamu apa vatano po ave tatugadi syo aura omamo jeben tavon. Yara syo ratoe wasai omamo indamu ngkovo wasai, indamu wapa muinyo rinai mamu Amisye po rarorono wasai ti wapo raen kakavimbe.

¹³ Ana umaso wemi mbewar inanuga mbambunin. Muno obo ma jeben, yara inananambe weye syo raen Titus anayanambe tavon weye wapo augave siso to weti anuga nsauman. ¹⁴ Arono Titus poroto po wasapan dainyoe, syo wasabumbundi irati ai to. Muno weapamo wapo inave samaneve jeben, weye wapa ana wadave arono Titus de wasai omamo mamaisyo syo raura ai wusyimbe rai.

Risyamo syo raura tugaive wasai tutir, weti sya ana syo wasabumbundi irati Titus ai namije omamo no rai tugaive tavon.

¹⁵ Titus opamo apa muinyo wasai nseo ti manakoe weye aemen arono de wasai, weapamo wabeto apa ana daura rai muno wapo augave siso muno wapo asyaniv.

¹⁶ Rinananambe weye risyanave wasai anakotare rai tenambe.

8

Wapo doije raunande manakoeve wapa arakovo awa ananuge meweno maije mansai

¹ Syare wapo Amisye apa kove raen, wemi Po raugaje anugano Amisye mansai tenambe una no munijo Makedonia rai. ² Anugano Makedonia unanta siuri mangke rai to, weramu onawamo manayanambe

rave. Awa ananuge meweno mai, weramu wo awa doije raunande manakoeve vatano kaijinta mansai. ³ Syo ana umaso raen ti syo raura kakavimbe: Arakove so wo doije raunande mamaisyo awa vambunine rarijati, muno wo raunande manakoeve ti mo awa vambunine rakivan tavon. Muno wo raunande mawebe; vatane inta po mantitidi jeben. ⁴ Wo raura ware, “Reambeke dave indamu varore raugaje reansai indamu reantavondi reamo Amisye apa kawasae maeranande, nanawirati una no Yudea.”

⁵ Umba wo raunande manakoeve, ti mo syo rakarae rakivan. Manasyin daveamo wo taune manuga raunanto Amisy ai indamu ubeta Ai, umbawe wakare ubeta reansai tavon, mamaisyo Amisye apa bekere rai.

⁶ Sya arakovo Korintus, soamo syo Titus atutir pakare wasai, weye wepirati po wasanyao arono wusyinoe indamu wapo doije ranunugambe arakovo Yudea mansai. Weti soamo syare po wasanyao indamu anakero ngkove umaso mamu wapo raija da mewen to. ⁷ Weapamo Amisye apa kove ntairi wasai, maisyare so: wapa anave mamu mbambunin, wapa ayao mbambunin tavon, wapo ananyao tugaive raene ntapekan, wapa bekero watavondi Amisye ai manakoe, muno wapa muinyo reansai manakoe tavon. Weti risyare kove intabo ntairi wasai jakato mi so: Syare wapo doije raunande manakoeve arakovo una no Yudea mansai.

⁸ Weramu syo wasantitidi jeben, yara syare syo wapa muinye raen. Wemi mbewar syo anugano Makedonia maura wasai to syare onawamo wo doije raunande manakoeve arakove umaso mansai, weye syare wapo raroron weapamo wamuinyo arakove umaso mai tugaive tavon. ⁹ Syare wasaemen wama Amisy Yesus Kristus apa kove manakoe rai. Opamo apaura anakotare rai tenambe arono tuna no munijo ntiti rai, weramu Po rapaya vintabo indamu paje no mine so rai be vatanbe weye Apa muinye manakoe wasai ti. Opamo no no mine so rai maisyare vatano apa ananuge meweno aije wemaisy, wirati inda weapamo wapaura anakotaro ngko dave rai tenambe.

¹⁰ Sya ana syo ratantona anakotaro doije ranunugambe rai mamu koveamo wapo raija da mewen to. Tumo nandijawe wepirati manasyin dave wapo doije ranunugambe arakovo una no Yudea mansai, muno wepirati manasyin dave wabeker indamu wapo arakove umaso maeranande. ¹¹ Weti soamo wapo raija da mewen! Maisyare wusyinoe wabeke dave indamu wapo anakere so raijar, maisyare omaisy syare soamo wabeke dave tutir indamu wapo raija da mewen. Wapo doije

raunande mamaisyo wapa vambunine rarijati. ¹² Ranivara wapa bekere manakoe indamu wapo raunande, weamo Amisye anayanambe wasai. Amisye pare wapo raunande mamaisyo wapa ananugo wapaura raije rai. Weramu ana wapaura raije jewene mamamaisye po ratore ramu.

¹³ Arakove, sya bekere mamamaisyo wapo raunande manakoeve ava taune wapa ananuge meweno wasai ti wasiuri oma jewen. Yara syare wapo wapa arakove maeranande indamu maito maide wasai kava. ¹⁴ Soamo wapa doije muno wapa ananuge manui, weti kove mamamaisyo wapo inta raunande irati wapa arakovo awa ananuge meweno maije mai. Wea umba masyoto rijat, ranivara taune weapamo wapa ananuge meweno wasai, indati arakove umaso wo inta raunande wasai jakato. Maisyare omaisy, wapo maeranande vambinibe indamu maito maide tenambe. ¹⁵ Maisyare Ayao Amisye mo ratoe somaisyo mare:

“Vatano po apa anaisye ranunugambe ti manui,
opamo apa anaisye nseo ti mo rakivan dave jewen.
Muno vatano po apa anaisye ranunugambe ti mamaun,
opamo apa anaisye mewen dave jewen.”[✧]

Paulus po Titusa pe apa arakove naye matutir uta no Korintus

¹⁶ Kove raura seo Amisye ai! Weye Po bekere manakoe raugaje Titus ai indamu po wasaeranande, omamo mamaisyo risya bekere wasai ramai tavon. ¹⁷ Arono reamo Titus anajo indamu pore wasai, opamo mayar weye taune apa bekere manakoe indamu po wasapan. ¹⁸ Muno reamo reama arakove inta atutir tavondi Titus ai. Arakove so pirati anugano Amisye wo ararimbe tenambe weye po Ayao Kovo Kristus ravova ngko dave. ¹⁹ Muno arakovo napije pamo anugano Amisye nao wo apatimu indamu tavondi reansai arono indati reama nanuui anya reanta no Yudea indamu reamo wapa doije raugav raunanto arakovo una no naije mansai. Reamo anakero ngkove umaso rajar indamu vatane wo Amisye ararimbe muno wo raen reambeker reamo maeranande.

²⁰ Reamo anakere umaso rajaro mavabe weye reamo doijo manui raugav. Reamare vemo vatan inta wo reansaura tantunawi ware, “Paulus pamo po doije nake inta ramavu amarom,” wenora. ²¹ Weye reambeker reamo ana mamaisye rave, omamo no no Amisye obo amune rai jewen, yara no no vatane mansamune rai tavon.

²² Weti reamare reamo Titusa pe apa arakove umawe pe yatutiro wasai, muno wama arakovo kaijinta tavon. Arakovo kaijinta so apa ana dave ngkove reamo raen to, opamo apa bekere manakoe indamu po vatane maeranande. Muno soamo apa bekere manakoe rave indamu pore wasai weye panave manakoe wasai. ²³ Weti sya arakovo Korintus weap, reamo arakove mandei so matayao wasai: Titus opamo sya arakovo tavondi rinai rimo Amisye apa anakere rajaro wapa yasyine rai. Muno reama arakovo javondi Titus ai nayamo anugano Amisye nao wo yatutiro wasai. Aya ana yo rave mo Kristus aijaseo tive. ²⁴ Maisyare omai ti, syare wabekobeo arakove umaso mai indamu anugano Amisy kaijinta nao wo wapa muinye raen kakavimbe ti wo raura ware, “Paulusa apa ayao po anugano Korintus mansabumbundi mamamaisyo tugae.”

9

Doije ranunugambe Amisye apa kawasae una no Yudea mansai

¹ Wapa anakero doije ranunugambe Amisye apa kawasae una no Yudea mansai mamamaisyo syona syo inta ratoe wasai jakatowi. ² Weye wapa bekere wapo maeranande mamamaisyo raen to. Muno syo wasabumbundi irati vatano Makedonia mai to syare, “Arakovo Korintus* wo doije ranunugambeve tume intai to.” Weti wapa bekere manakoe namije mo vatano Makedonia wanui manuga raugabe indamu utavondi wo doije ranunugambe tavon. ³ Soamo syo Titus muno arakovo jirum umawe matutir wasai indamu wapo doije umaso ratayao da ntuna wusyimbe. Indamu vemo syo wasararimbe anakotare so rai mamamaisyo ama ine meweno rai nora, yara weapamo tugae rave wapanatatayaube, maisyare syo raura to wemaisyo. ⁴ Ranivara vatano Makedonia inta utavondi reansai arono indati reande wasai, syona wo wasaeranande weapamo wapanatatayaube rainy. Weye ranivara wapo doije ranunugambe rainy, indati mbe samaneve rinai weye syanave wasai to, muno weapamo wasamane tavon weye syo wasabumbundi mai to. ⁵ Maisyare omai ti, syo ratantona kove mamamaisyo syo Titusa pe matutir wuisyo ude wasai indamu wo doijo manui wapo raurairive umaso ratayao wusyimbe, wirati arono indati risyore, doije mamamaisyo ratayaowa ntuna to. Wea umba mo raroron wapo doije raunande irati wasanuga mamaisyo rautan, yara vatane inta wo wasantitidi rai jewen.

✧ 8:15 Keluaran 16:18 * 9:2 Munijo Korintus no no propinsijo Akaya rai.

⁶Wasaemen ayao varije so rai: “Are pirati po anare rayanyum mamaumbe, indati po ama ine ranugan mamaun. Yara are pirati po anare rayanyum manuive, indati po ama ine ranugan manui.” ⁷Syare vatane nantentabo po raunande maisaisyo apa ana po rapatimu anuga rarijati. Weramu rani-
vara anuga muinye jewen, weamo vemo po raunande nora. Muno vemo po raunande weye vatane inta po antitidi rai jinya. Weye Amisyey muinye irati vatano po raunande anuga ranayanambe rautane ai. ⁸Amisyey pamo bambunin indamu Po kove raugaje wasai ti manui, indamu anakotare mamai tenambe wasai tutir, muno mawes indamu wapo kove umaso inta raugaje vatano kai-
jinta mai tavon. ⁹Maisyare Ayao Amisyey mo ratoe mare:

“Amisyey po apa kove raugaje mawebe irati vatano awa ananuge meweno maije mansai.

Apa bekobe noa nuge nuganui.”*

¹⁰Amisyey wepi po anare raugaje indamu wamo rayanyum, muno Po wama anaisyey raunande indamu wamo raisy. Muno Wepirati indati Po wapa anakotare raugaje tenambe muno Po raveti nseowa manui indamu wapa kovo wapo raugaje vatane mai nseowa manui tavon. ¹¹Po anakotaro ngkove raugaje wasai ti manui wirati indamu wapo doiye, ananuge raunande manakoeve vatano kaijinta mansai. Weti wapo doiye raunande manakoeve arakovo Yudea awa ananuge meweno maije mai, indati ama ine mamu vatano wanui wo kove raura seo Amisyey ai arono reamo ratodijo mai. ¹²Maisyare omai ti, wapa anakero ngkove umaso ama ine jirum: manasyin, wapo Amisyey apa kawasae nanawirati awa ananuge meweno mai maeranande, muno jirume mamu vatano wanui wo kove raura seo Amisyey ai. ¹³Wapa anakero ngkove umaso mo raroron kakavimbe wapa anave mamu tugae. Indati arakovo Yudea wanui wo Amisyey ararimbe weye wo raen weapamo wabeta Ayao Kovo Kristus rai, muno wo ararimbe weye wapo raunande manakoeve mai muno manakoeve vatano kaijinta mansai tenambe. ¹⁴Indati ube sambayambe wasai muno manuga no wasai weye Amisyey apa kove manakoeve wasai.

¹⁵Kove raura seo Amisyey ai weye Po taune apa Kavoy aunande wansai! Amisyey apa kovo namije mamu manakoeve rave, reamo ratore kakai.

10

Paulus po apa anakere raura kakavimbe

¹Risyirati Paulus, syare syo ayao inta ratoe wasai. Ayao syare syo ratoe somamo

syayao saumambe muno ridaura inanuga mpaaje rautan, maisyare muno Kristus amaisy. Idaniv vatane inta wo inaura ware, “Paulus opamo payao saumambe arono de po reansapan, yara payao soowabe arono tuna gwaravaimbe po nyovara wao ratoe reansai.” ²Syo anyayao so raugaje wasai: Wapo wapa ana wadave ravera mamaisy indamu arono indati risyore, vemo syo wasanyao soowabe nora. Weramu indati vatane inta nawamo syo mansanyao soowabe ivae, weye wo reansaura tantunawi ware, “Paulusa pe nawamo utavondi mine so ama mbekere rai maisyare muno vatano wantatukambe Amisyey aije mansamaisy.” ³⁻⁴Tugae, rino no mine so rai, weramu sya ana idave mamu maisyare vatano mine so awa ramaisyey ramu. Arono reamarovave Amisyey apa marova mansai, reamo anaiyu mine so raijare ramu. Yara Amisyey apa anaiyu mbambunin omirati reamo veano Anakakai Akoe apa vambunine randamisy. ⁵Muno Amisyey apa anaiyu mbambunine mamu reamo veano vatano umarovave Amisyey ai mapinde. Weti vatane awa ayaowije muno awa ana wo ratantona rararin dave mamu reamo radaut, weye wemirati mo vatane maorai ti wo Amisyey aene jewen. Umba reamo awa ana wo ratantona ngkakai ransopi indamu reamo mansanyao indamu ubeta Kristus ai. ⁶Syare weapamo wabeta Kristus ai kobe, weramu ranivara vatane inta ponae Ai muno ponae reama anyayao rai, indati syanatatayaube indamu syo mangke raugaje vatano napije ai.

⁷Syare wapo anakotare raen kakavimbe! Weapamo vatane inta mararin wo raura ware Kristus apaura mai. Kova! Weti syare vatane wato maemen: Risyamo Kristus apaura rinai tavon! ⁸Ranivara rikangkamambe manakoeve irati vambunino Kristus po raugaje rinai rai, weamo isamane ramu. Weye Po vambunine raugaje rinai indamu syo wapa anave ratekar asyo jewen, yara indamu syo wapa anave raijasea inda mbambunin. ⁹Weramu syonae wapo ratantona wapare syo sya nyovara waowe ratoe indamu mo wasavea wajanibe oma jewena. ¹⁰Weye vatane inta wo inaura ware, “Paulus apa nyovara waowe mpanyoan dave. Weramu taune de te no reansamuna, reamo aeno vatano mayondi vayave pa, muno apa ayao papirabe jewen.” ¹¹Syare vatano nanawije wo raen: Ayao panyoan omi syo ratoe sya nyovara waowe rai arono rituna gwaravaimbe wemamo syo rave mamaisyoy rai jaje arono indati ride syo wasapan.

* 9:9 Mazmur 112:9

¹² Kuruno kajjinta nanawirati ude wasai wo taune mansararin. Wo mansaen vambinibe umba inta pare we damu, inta pare we damu. Taune wo taune awa ana udave obo raen, umba nanentabo pare po vatano kajjinta makivan! Onawamo vatano wantatukambe rave! Veanimaibe umambirive tai maisy? Yara risyamo syonae, weti ritavondi syo rave tai maisye ramu. ¹³⁻¹⁵ Weramu ranivara syare rikangkamambeo taune rinai, weamo mamaisy weye risyirati Amisy po varore raugaje rinai indamu syo Ayao Kovo Kristus ravov. Amisy wepi po anone rapatimugo Apa anakero po raugaje rinai so rai, pare ama anone mui yava nanto wapa munijo Korintus rai. Weti arono ride wasai, syo anone umaso rakivane ramu, weye Amisy po varore raosoro rinai indamu risyirati manasyin dave syo Ayao Kovo Kristus ravovo wasai. Weti ranivara rikangkamambe sya anakere so rai, omamo mamaisy. Weramu ranivara rinararino vatano kaije awa anakere rai, omamo mamaisy ramu. Rinanave Amisy amen Wepi po wapa anave raveti ntubai mbambunin, indamu sya anakero no no wapa yasyine miridi nseowa manakoe. ¹⁶ Umba syare syoroto syo Ayao Kovo Kristus ravovo vatano una no munijo nggwaradavainye rai, omirati kuruno kajjinta usisa rai rainy. Weramu ranivara kuruno kajjinta wo anakere rajia no munije inta rai, weamo risya anakere ma jewena, weti vemo rinararino rai nora.

¹⁷ Maisyare Ayao Amisy me ratoe mare, "Are pirati beker pare ararin, weamo ararino Amisy apa ana Po rave obo rai."*

¹⁸ Weye vatano po taune ararimbe pamo Amisy anayanambe aije jeben. Yara vatano Amisy po ararimbe opirati Amisy anayanambe ai.

11

Paulusa opi Kristus po atutir, yara kuruno kajjinta ude Korintus rai onawamo jewena

¹ Sya arakove, syare wasatawandi jirati risya syo taune inaura so rai. Abo! Vemo wapare syo inaura mamaisyare vatano pantatukambe payao wemai nora! Yara syare wasatawandi rinai. ² Weye risyamo inanuga no wasai rave, mamaisy Amisy taune anuga no wasai rai. Syo raurairive Kristus ai syo weapa anugane raunande Ai, weti syo wasaeranande indamu Kristus obo apaura wasai. Wemamo raurata irati aja po apa arikainyo wanya raeranande indamu ngkakavin arono po ama vainye rave. ³ Weramu inanuga mamauno wasai:

vemo kuruno angkari wo wasaponae nora, maisyare muno wusyinoe tawae, wemirati Anakakai Akoe, mo wama aneno Hawa raponae wemaisy. Vemo wo wasanuga raugabe indamu wapa muinyo Kristus ai mamapo rapaya ntami nora! ⁴ Arono manasyinoe, syo wasanyao indamu wapanave Yesus ai, muno wapo Apa Ayao Kove raugave nsiso muno Anawayo Vambunine nde siso wasanuga rai. Weramu arono kuruno wo ananyao nsasye raugav ude wasai, weamo wasanayanambe watavondi mai. Awa ananyao wo Yesus aura nsasye, muno awa "ayao kove" nsasye muno anawayo nsasye, weramu weapamo wasanuga rausiso wapo raugav. Wabeani-maibe wapanave kurune wato mai? ⁵ Wo taune maura ware awa ananyao mamato inta mivae muno ware onawamo Kristus po matutir, weramu jeben. Syo ratantona wo rinakivane ramu. ⁶ Risyamo inawa nsiridi kobe jeben ti sya ayao mamamo kandi kurune wato awa ayaowe rai. Weramu sya ana syo raene kandi jeben, yara mo kurune wato awa rakivan. Wemamo wadaen to, weye sya ananyao syo raugaje tenambe mo rarorono wasai tutir.

⁷ Arono syo Ayao Kovo Amisy ravovo wasai no wusyinoe, syo doije inta ranajo wasai sya anakere umaso rajie ramu. Yara syo anakero kajjinta rajiaro inaneme so rai indamu taune syo sya anaisy ramavun. Indako wapare omamo ngkove ramu rako? Jewena! Yara syo inanasine raveti mpaaje taije indamu syo wasajaseo titive. ⁸ Arono syo anakero Amisy umaso rajiar no wapa yasyine rai, anugano Amisy kajjinta wewawirati wo sya ana bekedaije raunande. Wemamo maisyare syo awa doije raugavo maora indamu syo Ayao Kove raugavo wasai wemaisy! ⁹ Arono rino wasarijatoe, syo ana inta ranajo wasai jeben indamu vemo mangkeo wasai nora. Weye sya ana bekedaije mamako arakovo Makedonia inta ude wo raunande rinai. Tugae, arono wusyinoe syo ana inta ranajo wasaije ramu, muno naiso ti miridije ntoa indati syo ana inta ranajo wasaije mamamo jeben koba. ¹⁰ Muno rikangkamambe anakotare so rai: syo sya bekedaije inta ranajo wapa anugane rajie ramu, muno anugano kai una no propinsi Akaya mai tenambe tavone ramu. Syangkarive ramu, yara sya ayao syo raura so no rai tugae, weye Kristus tuna inanuga rai. ¹¹ Weramu inta wapo rinaura wapare, "Paulusa pamo muinyo reansai jeben. Wemi mbewar ti po apa ana bekedaije inta ranajo reansai jeben." Abo! Amisy po raen risyamo rimuinyo wasai rave!

* 10:17 Yeremia 9:24

¹² Kuruno kaijinta nawamo wapo awa anakere ravae. Yara risiyamo sya anakero syo wasanyao omamo wapo ravae ramu, muno miridije nto wapo ravae nora, indamu vemo varore raugaje kurune wato mai indamu mararin ware awa anakere mamaisyo risya rai, wenora.

¹³ Kurune wato ube ponaike ware onawamo Kristus po matutir, weramu wangkarive. Ware wo Apa anakere rajar, weramu wo vatane maponae. ¹⁴ Awa ana wo rave umaso mammo vemo wapaparo wasai nora. Weye Anakakai Akoe be ponaike tavon, opamo awera maisyare Amisye apa naito vare amaisy. ¹⁵ Kurune wato wanapatambe Anakakai Akoe ai, weti awa ana udave mo apa ramaisy. Weti arono wo awa ana udave ngkakainoanive rangkokaibe yara ube ponaike wo ana mamaisye obo rave, vemo wapaparo wasai nora. Wo wasaponae, weti ama marane mammo Amisye indati po mangke raugaje mai mamaisyo awa ana udave rarijati.

Paulus po apa anakere rararimbe indamu vatano Korintus wo raen kakavimbe Kristus po atutir

¹⁶ Ribeker syare syo taune inararimbe mamaambe so indamu wapo raen risiyamo vatano Kristus po inatutire pi risy. Weramu arono syo taune inaura, vemo vatan inta po inatantona syayao maisyare vatano pantatukambe amaisy, wenora! Weramu ranivara weapo inatantona tai maisy, syare wasatawandi wapo inaraniv bayave. ¹⁷ Arono rikangkamambe taune rinai so, Amisy Yesus po rinamayaro rai jeben. Tugae, syo rinaura somamo maisyare vatano pantatukambe apa ayao wemaisy. ¹⁸ Syo raen vatane wanui ukangkamambe taune maijo awa ana wo rave no mine so rai. Weti syare syo rave tavon indamu wapo raen risiyamo Kristus po inatutiro Apa anakere so rai. ¹⁹ Wapare weapamo wasakarikuga mba dave, weti wabeanimaibe wasanayanambe wapo kuruno wantatukambe wato mansaraniv? ²⁰ Muno wabeanimaibe wasatawandi awa ana wo rave no wapa yasyine rai vayave? Weye onawamo manayanambe ube akarive wo wasatutir. Muno wo wasaponae indamu wo wapa doije, wapa ananuge raugavo wasaora. Muno wo wasatekar asyo mararin dave muno wo wasapoam! Wabeanimaibe wasatawandi mai?! ²¹ Weramu risiyamo sya ana idave wasai mammo no tai wemaisy jeben. Indako wemamo anakotaro mbe samaneve rinai rako? Jeben bayave!

Kurune uma wato umambirive ukangkamambe taune mansai awa anakere rai, weti

risiyamo rimambirive rikangkamambe taune rinai tavon, indamu wapo raen risiyarati Kristus po inatutiro Apa anakere so rai. (Abo! Syonae rikangkamambe taune rinaija, weye omamo maisyare vatano wantatukambe awa ana udave mije.) ²² Kuruno nanawije ukangkamambe taune mansai ware onawamo vatano Yahudi nanawije. Weramu risiyamo vatano Yahudi tavon! Muno ware onawamo usisa kawasae yo Israel mansai. Weramu risiyamo vatano Israel pi ri tavon! Muno ware onawamo mavaki Abraham apa susye rai. Weramu ri tavon! ²³ Onawamo ukangkamambe taune mansai ware wanapatambe Kristus ai. Weramu syo anakero Kristus rajaro panyoambe ti mo awa rakivan. (Abo! Sya ayao onawamo maisyare vatano pantatukambe po taune ararimbe wemaisy.) Muno reansaeno siurije rajia risya mi mo kurune wato awa rakivan dave maisyare so: Sya marova wo rinausiso makova ama susye manui, muno wo rinanepato kaijo waije rai ama susye manui, muno masyote inta yai kavintare rikakai. ²⁴ Vatano Yahudi wo rinanepato kaijo waije rai ama susye radani, muno susye nanentabo wo rinanepata nanto no tename intabo eane abusyine eane kaimambisy.* ²⁵ Vatano Roma wo kaije veano rinanepabe mandei. Vatane wo orame veano rinaepabe ama susye intabo tavon. Nyomane mansyano rinautan no mayan ama susye mandei. Muno arono nyomano namije inta mansyan, rimampayaro mayane ama vone rai masyote intabo, namane intabo. ²⁶ Arono syo sya unanui anya rave tutir indamu syo Ayao Kovo Kristus ravov, anakotaro ngkakai manui nande rinai, maisyare so: Syo mana yame raron muno rinino vatano mamune maora, nanawirati ukaokaibe unanuije ama tuga rai indamu wo rinatondobe wo sya doije ranaonoambe. Sya kawasae Yahudi wo inave tatugadi muno vatano Yahudi jewene wo inave tatugadi tavon. Anakotaro ngkakai nande rinai arono siso munije inta ama uga rai, arono syanya no nugo vabukane rai, muno arono syanya no mayane rai. Muno nande rinai tavon no anugano Amisy ama uga rai, weye arakovo wanave tugae jewene wo inave tatugadi. ²⁷ Syo anakere rajaro panyoambe rave awa sya vambunine mewen kobe. Namane inta yai rinikije ramu, muno masyote inta yai rimaror dave muno inawa ngkangkamandi. Masyote manui sya anaisyewen rinai, muno sya ansuno mamokane mewen tavon ti ibavat. ²⁸ Muno anakotaro kaijinta mo

* 11:24 Ulangan 25:1-3

inaveti inanuga mamaun, omirati masyote yanteter ridantotobe anugano Amisy mai tenambe. ²⁹ Weye inaemeno sya arakovo wanave Kristus aije mai rave, weti arono rui arakove inta apa anave mayondi, weamo risyamo maisyare mayondi atavon. Muno arono rui arakove inta anuga raugabe ti po ayao kakai rave, weamo rinanimaumbe rave.

³⁰ Syonae rikangkamambe taune rinai, weti sya mayondi obo mirati rikangkamambe rai. ³¹ Sya ana syo raura umawe omamo tugae tenambe. Amisy, opirati Amisy Yesus Kristus apa Aja, po rinaen risyamo syangkarive ramu. Kangkamambe Aija nuge nuganui! ³² Arono wusyinoo rino no munijo Damsyik rai, Akarijo Titi Aretas apa gubernur po aijaseo be akarive opamo po naite matutir wo rinaman no munijo namije ama unsanda uje rai indamu wo rinaijar. ³³ Weramu sya arakove wo inaugav no unsanda mamaune inta rai, umba wo inaugasya tuna arame inta rai, wo waije raveano inaoporasyo no yano oram munijo namije ama akiri. Maisyare wemaisy, rinino sya marova mansaora.

12

Paulus apa mayondi mo Amisy apa vambunine raroron

¹ Ranivara syo taune inararimbe, omamo mo kove raunande jeben. Weramu syare wapo raen risyamo Kristus po rinatutir, weti Apa ana po rarorono rinai muno nikimarijo Po raunande rinai mammo syare syo raura kakavimbe wasai. ² Tume abusyin eane mambisy wusyinoe, Amisy po inauga seo* no munijo ntiti, wemirati Amisy taune tuna rai. Risyamo inanasino kopa so rauga seo rako, rinikimarive vayave ma rako, syantatukambe rai, yara Amisy obo pirati Po raen. ³ Sya ana syo raen mammo Amisy po inauga seo no Firdaus no munijo ntiti namije rai. Weramu Po inanasino kopa so rauga seo rako, rinikimarive vayave rako, syantatukambe rai, yara Amisy pi po raen. ⁴ Naije syo anakotare raraniv wemirati ntiti rave ti syo raura kakai, muno Amisy po vatane inta amayaro po raura jeben. ⁵ Ana rarorono rinai umaso ntiti rave weti syare rikangkamambe rai, weamo mamaisy. Weramu syare rikangkamambe taune rinai jeben, yara sya mayondi obo mirati rikangkamambe rai, weye sya mayondi mo Amisy apa vambunine raroron. ⁶ Ranivara syare

rikangkamambe ana rarorono rinai umaso rai, weamo syo rave kai, weye ayao somamo no rai tugae, yara maisyare vatano pantatukambe apa ayao ramaisy jeben. Weramu indati rikangkamambe rai ramu, weye syonae ana rarorone umaso mbewar ti vatane wo inaura titive. Yara ranivara vatane ware wo rinaura titive, kove mammo sya ana idave wo raen muno sya ana idaura wo raraniv.

⁷ Amisy apa ana po rarorono rinai umaso ngko dave rave muno ntiti rave, weramu Amisy ponae risyamo rinararino rai. Weti Po Anakakai Akoe amayar po siurije inta ratutiro rinai, omamo maisyare anansinao inta impatoto sya ine rai ti ngkantebe wemaisy. Umba siurije so mo rinanebat tutir indamu vemo rinararinora.† ⁸ Weti risambayambe seo Amisy Yesus ai mandei to syo anajo indamu siurijo mo rinatamo so ngkarimu rinanasine raora. ⁹ Weramu Po raura akare rinai pare, “Jewena, Syo rapaya nai ramu. Yara Sya vambunino Syo raugaje nai mamaisy indamu natawandi rai. Weye arono winyamo mayondi, naije Sya vambunine manakoe rave nai.” Maisyare omai ti, soamo inanayanambe rikangkamambe sya mayondi rai wirati indamu Kristus apa vambunine ntuna rinautan. ¹⁰ Wemi mbewar ti ranivara risyamo mayondi weye syo Kristus apa anakere rajjar, weamo inanayanambe. Muno inanayanambe arono vatane wo inaura tantunawi muno wo inave tatugadi, muno arono siurije muno anakotaro nsosobe nande rinai. Inanayanambe inatawandi anakotaro ngkakai umaso rai tenambe weye syo Kristus apa anakere rajjar. Weye arono risyamo mayondi, naije ribambunin.

Paulus anuga mamauno arakovo Korintus mansai

¹¹ Abo! Syo taune inararimbe somamo maisyare vatano pantatukambe po rave wemaisy, weramu weapamo wapo inantitidi rai. Kove mammo weapirati wapo inararimbe irati vatano kajjinta mai. Risyamo sya tame maje rave, weramu risyamo vatano Kristus po inatutire inta pi risy, weti kuruno wo taune mansararin umawe wo rinakivane ramu. Ube ponaije onawamo vatano Kristus po matutir muno awa ananyao mammo inta mivae, weramu jeben. ¹² Arono rino wasarijatoo, syo raroron kakavimbe risyamo vatano Kristus po inatutire inta pi risy no taiso: syo

* **12:2** Ayao Yunani naiso mare, “Syo vatano panave Kristus aije inta aen wepirati Amisy po auga seo no munijo ntiti rai.” Paulus po taune aura so, weti “vatano panave Kristus aije” opamo Paulus taune piye. † **12:7** Paulus apa siurije mammo Ayao Amisy mo raura kakavimbe jeben, weti wantatukambe rai: Opamo gwanen dako? Opamo siuri weye apa marova wo ave tatugadi tutir dako? Opamo ana mo atopane mo ave rako?

anapaporainye muno anainame rarorono wasai muno inatawandi tutir. ¹³ Sya anakero syo raijar no wapa yasyine rai mamaisyo sya anakero syo raijar no Amisy e apa anugano kaijinta mai tenambe rai. Anakotare intabo vayave nsasye, omamo anugano kaijinta nao wo sya ana bekedaije raunande, yara weapamo jewena weye syonae mangkeo wasai. Weti vemo waparijo rinai nora!

¹⁴ Inya! Soamo syanatatayaube syo wasapan mandei je mi som, † muno syona e mangkeo wasai, weti syare syo sya ana bekedai je inta ranajo wasai jewen. Weye ribekero wapa ananuge muno wapa doije raije ramu, yara vatane weapirati ibekero wasai. Weye arikainye po anaisy e rakanijo vatan anui ai jewen, yara vatan anui po anaisy e rakanijo arikainye ai. Risyamo maisyare wapa aja pi risy, weti syo ana inta ranajo wasai jewen. ¹⁵ Rinanuga no wasai rave, weti inananambe syo sya ananuge raunande tenambe muno syo taune inaunande indamu syo wasaeranande. Sya muinye manakoe wasai rave, weramu wapa muinyo rinai mamaun bayave rako?

¹⁶ Weapamo inta wapare, “Tugae, Paulusa pamo po doije inta ranajo wansai ramu. Weramu opamo akari nsansinao rave, ti po wansaponae indamu wamo doije ratayaude ai, pare indamu po raugav po raunanto arakovo Yudea mansai. Weramu apa bekere mamo po doije so rave taune amarom.” ¹⁷ Sya arakove, indako wapo ratantona wapare syo wasaponae?! Indako wapare syo vatan inta atutir wasai to indamu po wapa doije raugavo taune inamarom dako?! Oma jewena! ¹⁸ Syo Titus atutir wasai to, muno syo wama arakove inta atutir atavon. Weramu Titus opamo po wasaponae ramu. Wepe risy e ririma bekere intabo muno ririma anakero rimo raijare mamai tenambe.

¹⁹ Indako wapo rakarae wapare syayao nggwaravaimbe somamo indamu syo taune reansaura kakavimbe wasai dako? Omamo jewena! Yara sya ayao umaso mamo syo raura no Amisy e amune rai weye ibe intabove Kristus ai. Sya arakovo inanuga no wasai, reama ana reamo rave tenambe mamo indamu reamo wapa anave Kristus ai raijasea inda mbambunin. ²⁰ Weramu inanuga mamauno wasai weye arono indati syore wasai, syo ratantona syo wasaen wapa ana wapo rave inta mamo mamaisy e ramu. Syo ratantona syo wasaen inta wapayaowi muno waparijo vatan kaijinta mai, wapa pari mamo ntatupami

wasanuga rai muno wabeker wasea tame rai, wapo vatano kaije maura tantunawi muno wapayao ampambe, wasararin dave muno wasasivuiny. Weaveti arono indati syore, inananambe wasai jewen, muno weapamo wasananambe rinai jewen tavon weye syare syo wasanyao soowabe. ²¹ Maisyare omai ti, risyamo ide wasaijo inanuga mamaune rautan, weye wapa ayao ngkakainoanive umaso mo inave saman-eve no Amisy amun. Muno inanimaumbe weye vatano wanui nanawirati wo ayao kakai rave no wusyinoe onawamo maneme mpaya rai rainy, yara wo rave tutir. Weti awa ana udave nggwambe rave, anaerere ugavo mansai, muno utavondi manasine ama bekero ngkakainoanive obo rai, yara usakinavo ayao kakai namije raije ramu.

13

Paulus apa ananyao po raugaje marane rai

¹ Arakovo Korintus, soamo syare syo wasapan mandei je mi som. Syare wasaemen irati Ayao Amisy ama ananyao so rai: “Ranivara ayao kakai rantutibe vatane inta ai, weamo vatane intabo po raura kakavimbe pare po vatane umawe apa ayao kakai raen to omamo mamai dainy, yara vatane jirum muno mandei wo raura ware wo raen tavon, wea umba mamaisy.”*

² Arono wusyinoe ide syo wasapan ama susyo jirum, naije syo raura wasai to syare, “Wapo ayao kakai ravea nsopi indamu vemo mangke nde wasai nora!” Weramu wapo rave tutir, muno vatano kaijinta utavondi ti wo ayao kakai rave tavon. Naisoamo rituna gwaravainyo wasai, weramu sya ananyao syo raugaje mo uma syo raura we ramaisy syare, “Wapo ayao kakai ravea nsopi! Yara jewen, indati arono ride wasai jakato, syo wasanyao saumambe ramu yara syayao nsoowato wasai! Muno vatan inta nino sya pari je raora jewen!”

³ Weramu wapo ranajo wapare, “Paulus apa ayao mamo Kristus po atutiro rai rako? Reamare po rarorono kakavimbe wansai indamu reamanave ai.” Umba arono ride syo wasanyao soowabe, indati weapo raen tugae Kristus taune payao no rinawa rai. Muno Apa vambunine meweno Ai jewen, yara bambunin dave Po apa bekere raijar no wapa yasyine rai. ⁴ Arono auseo sawa inyo kapite rai, anasine mamo mayondi, weramu kovakato weye Amisy e po apa vambunine raunande Ai. Muno reamamo reamayondi tavon, maisyare Kristus arono sawa inyo kapite rai wemaisy. Weramu

† **12:14** Paulus poroto no munijo Korintus manasyimbe omamo arono po Ayao Kovo Yesu ravovo mai ti vatane wanui wanave (Arakov 18:1-18). Umba Paulus po anugano Korintus mapan jirumbe akato arono daniv awa ana wo rave mamo ngkakai (2 Korintus 2:1). * **13:1** Ulangan 19:15; Matius 18:15-16

soamo reambe intabove Ai, weti Amisye po apa vambunine raugaje reansai tavon. Indati arono ride wasai, Amisye apa vambunino Po raugaje rinai mamu wapo raen dave.

⁵ Syare weapamo vatan nanentabo nyo taune nanuga raen dati: nyanave Kristus ai tugaive rako? Ribeker wapo raen Yesus Kristus no wasanuga rai jivae. Weramu ranivara vatane inta po taune anuga rakani yara Yesus Kristus no rai jewen, weamo vatano napije apa anave tugae ma jewen yara angkarije ma. ⁶ Rinanave ramene mamu wapo raen risyamo vatano angkarije pi risya jewen, yara Kristus po rinatutir tugae pi risy.

⁷ Ribe sambayambe Amisye ai indamu wabemo wapo ayao kakainoanive inta rave nora. Weramu ribe sambayambe tai maisy indamu wapa ana wadave ngko dave mo raroron risyamo vatano Kristus po inatutir oma jewen. Weye ranivara vatane inta una no wapa yasyine wo Kristus apa vambunino no rinaije raene ramu, weamo jewen kai. Yara ribe sambayambe wasai tai maisy weye ribeker wapo ana mamaisye obo rave. ⁸ Weye ranivara watawondi ayao tugae rai, weamo reamo wasaorai jewen. Reama bekere mamu wapo ayao tugae rarijat tutir. ⁹ Rinanayanambe arono weapamo wabambunin no Amisye ai, yara risyamo rimayondi kai. Munu ribe sambayambe indamu wapa ana wadave mamu mamai dave. ¹⁰ Syo nyovara waowe so ratoo syare syo ranutu muisy more wasai weye syonae syo wasanyao soowabe arono indati syore wasai. Weye sya vambunino Kristus po raugaje rinai mamu ribeker syo rave indamu syo wasandamisyi jewen, yara indamu syo wasaijasea inda wabambunin.

Ayao maran

¹¹ Sya arakove, marane somamo syare wasananibe! Munu wabeke dave indamu wapa ana wadave mamai dave tenambe. Wasanuga rausiso sya ananyao rai tenambe. Syare wasanuga mamu intabo munu wasaumano wasai vambinibe. Indati Amisy opi po muinye munu saumane raugaje tuna wasautan.

¹² Wapo kove raura wasai vambinibe weye wabe arakobe no Yesus Kristus ai. ¹³ Vatan tenambe wanave Yesus ai nanawirati una no naiso wo kove ranutugore wasai.

¹⁴ Syare Amisy Yesus Kristus apa kove no wasautan tenambe, munu Amisye po apa muinye raugaje wasai, munu Anawayo Vambunine mo wasanugande wabe intabove.

*Risy,
Paulus*

Nyovara Wao Paulus Po Ratoe Anugano Amisyé Mai No GALATIA

Ayao manasyin

¹ Risyirati Paulus, risiyamo inatutir indamu syo Ayao Kove raura vatane mai. Rinatutire somamo vatane inta po inajaseo raije ramu, muno vatane inta po inatutiro anakere so raije ramu. Yara Po rinatutire pamo Yesus Kristus muno Injayo Amisy, opirati po Yesus aveti kovakato no wene ama uga rai.

² Syo nyovara waowe so ratoe arakovo weana anugano Amisyé rai tetebe no propinsijo Galatia rai. Sya arakovo utantuna rinatavon no naiso wo kove ranutu wasai.

³ Syare kove muno saumane no no wama Injayo Amisy muno wama Amisy Yesus Kristus no wasautan tenambe. ⁴ Kristus po anasine raunande kakai indamu Po wasapaya wama ayao kakaije rai, mamaisyo wama Injayo Amisyé apa bekere rai. Kristus po ana umaso rave indamu Po wasapaya mine vone so ama vambunino ngkakainoanive rai, wemirati mo vatane mansaijar matuve. ⁵ Kangkamambe Amisyé aija nuge nuganui! Amin.

Ayao Kovo Amisyé obo mi mamaisy, weti vemo wapavave ayao kaijinta rai nora

⁶ Abo! Ripaparo rinai weye syo wasanaun wapavave wasakirive Amisyé ai, wepirati po wasawain wade Ai weye Kristus po apa kove raugaje wasai. Soamo wapo Amisyé apa Ayao Kove rapaya ntami, yara wapo ayao kaijinta raijar akato. ⁷ Weramu ayao kaijinta umaso mamoo ayao kove ma jewena, yara vatane wo Ayao Kovo Kristus ranyao sasyeve ti wapananepabe. ⁸ Awa “ayao kove” nsasyeo Ayao Kovo Kristus reamo ravovo wasai to rai. Are nawirati wo ayao mamaisyé jewene ravov, koveamo Amisyé po mangke raugaje mai ti usuri no tanamo mbadururo nuge nuganuije rai! Maisyare wemai tavon, ranivara rean dako, naito Amisyé no no munijo ntiti nao dako reamo ayao mamaisyé jewene raugaje ratire, indati Amisyé po mangke raugaje reansai tavon. ⁹ Wusyinoe reandauro to, soamo ridaura rijati: ranivara vatane inta po ayao kaijinta ravovo wasai, wemi nsasye irati nami wapo raugav no reansai rai, weamo syare Amisyé po mangke nuge nuganuije raugaje ai.

¹⁰ Vemo wapo rinaura wapare, “Paulus beker vatano wanui ukangkamambe ai,” wemaisy inya! Yara ibeker syare Amisyé opi anayanambe rinai, yara

vatane nawamo manayanambe rinai jeben kai. Weramu ranivara sya beker syare syo vatane manuga raugabe indamu manayanambe rinai ratire, indati syanapatambe Kristus ai ma mamaisyé ramu.

*Amisyé po Paulus awain panapatambe
Apa anakere rai*

¹¹ Sya arakove weap, ibeker syare wadaen Ayao Kovo Yesus idavovo wasai wato ama nori rati vatane awa ana udatantona rai jewena. ¹² Muno Ayao Kove mamoo syo raugav no vatane mai jewena, muno vatane inta po ranyao rinaije jeben tavon. Yara Yesus Kristus taune po rarorono rinai to.

¹³ Wapo ranaun arono wusyinoe itavondijo Yahudi awa ananyao rai mavabe rave. Syo anugano Amisyé mave tatugadi muno syanakakaive vatano wanave Kristus aije mai indamu makanive. ¹⁴ Arono naije risiyamo ibeto ananyao Yahudi rai rave weti sya arakovo reama tume mamai tenambe reamamo risyi syo makivon tenambe. Muno inanuga ntenami syo sya aneno Yahudi awa koane rarija dave.

¹⁵ Ibeare naije, weramu Amisyé bekobe rinai ti arono syana inano rainy, Po inatayao to, Po inawaino Apa anakere rai. ¹⁶ Muno Po apa Kavoyesus arorono rinai indamu syo Apa Ayao Kove ravov to irati vatano Yahudi jewene mansai. Arono naije syo vatane inta anajo indamu po ananyao raugaje rinaije ramu, muno syare, “Animaisyé mirati indati syo rave?” omamo syo ranajoe ramu. ¹⁷ Muno syoroto no Yerusalem indamu syo arakovo Yesus po mansatutiro manasyimbe mapane ramu. Yara ibeseo kobe, ito no kopa Arab. Ino no naije rati umba syakare no munijo Damsyik rai jakato. ¹⁸ Tume mandeij ino no Damsyik, umba rito no Yerusalem syo Petrus apan. Rino Petrus arijat no naijea masyote abusyinaro eane radani yai. ¹⁹ Yesus apa arakovo po matutiro kaijinta nawamo inanto mansaije ramu, yara Yesus apa rijato Yakobusa obo ai. ²⁰ Sya ana syo ratoe so tugae, Amisyé po inae dai, syayarurijabe inta rai jeben.

²¹ Naije akato syoroto no propinsi Siria muno Kilikia. ²² Arono naijeamo anugano Amisyé una no Yudea tenambe wo inae dainy. ²³ Wenanawamo udaniv bayave vatane wo inaura ware, “Paulus opirati vatano wusyina pare po wansave tatugadi muno pare po wama anave Yesus aije rapamo indamu rakanive, weramu naisoamo po anave wato ravovo vatano wanui mansai.” ²⁴ Weti wo Amisyé ararimbe weye itavondi syanave Yesus ai tavon.

2

Paulus aijaro arakovo Yesus po matutire inta matavon

¹ Tume abusylin eane mambisy umba syakare no Yerusalem, Barnabas tavondi muno Titus augavi tavon. ² Syoroto no Yerusalem mamaisy irati Amisy apa ana po rarorono rinai rai pare syoroto. Umba risye akarijo wo anugano Amisy mansaugav no Yerusalem nawe reamanugan indamu reamayao mumuimbe. Ribeker syo raura kakavimbe mai indamu akarije umaso manayanambe sya ananyao syo ravovo vatano Yahudi jewene mansaije rai, yara vemo wo sya ananyao rawatambe nora, wea indati sya anakero syo rajar no wusyinoe muno naiso tavon mbea marudi.

³ Syo sya ananyao raura kakavimbea mewen, umba vatano ube akarive umaso mamune ranseyai, ware, “Ngko to. Nya ananyao mamaisy ivae. Muno Titus, opirati nya arakovo nyo augavo natavon, be sunative jeven kai.” Titus umaso opamo vatano Yunanije pa, weramu wo antitidi tavondi koane umaso rajije ramu.

⁴ Weramu naije tavon vatano kaijinta usisa maninimbe no reama anugane umaso rai, wenawamo ubeker indamu Titus be sunative. Vatane wato ube ponaije ware onawamo ube arakobe. Wo ranaun vatano wambe intabove Yesus Kristus aije wampaya Ananyao Musa rai to, weti ware ubeker wo wansantitidi indamu wantavondi rai jakato, maisyare vatano aro mansamaisy. ⁵ Weramu reambeto awa bekere rajije ramu, weye reambeker reamo Ayao Kovo tugae raugaje wasai, vemo ayao angkari inta nande mo ransosobe inya.

⁶ Arono syo sya ananyao raura kakavimbe akarije umawe maija jeven, naije wo raura ware, “Paulus, nya ananyao mamamaisy, weti wamare wamo inta ranigwane jeven.” Akarije umaso nawamo vatan tenambe wo mansaura ware awa tame ntiti no anugano Amisy rai. Weramu awa tame ntiti rako jewena rako, syo ratantona mamai kava, weye Amisy pamo po vatane awa tame ratore ramu yara manuga mi Po raen. ⁷ Akarije umawe wo raen Amisy po risyi Paulus inatutir inda syo Ayao Kovo Yesus ravovo vatano Yahudi jewene mansai, maisyare muno Po Petrus atutir po ravovo vatano Yahudi maije wemaisy.

⁸ Weye Amisy wepi po vambunine raugaje Petrus ai muno Po atutir indamu po Apa ayao raura vatano Yahudi mansai, muno Wepi po vambunine raugaje rinai muno Po inatutir indamu syo Apa ayao raura vatano Yahudi jewene mansai.

⁹ Weti Yakobusa pe Petrusa pe Yohanesa pe, wenawirati mansaenamobe ube akarive wo anugano Amisy maugav, wo inaan ware tugae Amisy po kove raugaje rinai to ti Po inatutir anakere so rai. Weti wo inaneme rajjar muno sya arakovo Barnabas atavon, inda wambe arakobe anakere so rai. Umba ware, “Paulus muno Barnabas, ipo anakere rajjaro vatano Yahudi jewene mansai, yara reamamo wamo anakere rajjaro vatano Yahudi mansai.” ¹⁰ Awa ananyao wo raugaje reansai mamointabovayave ma: ware wamo vatano awa ananuge meweno maije mansaeranande. Muno risyamo ri tavon syare omirati inananibe syo rajjar. Umba syuje, syakato no munijo Antiokia rai.

Paulus po Petrus anayao weye apa ana datantona nsarokire ramu

¹¹ Umba masyote inta Petrus de no Antiokia, umba syo raura nanto ai syare, “Nya ana ndave inta mo ramaisy ramu!”

¹² Weye arono manasyimbe Petrus de, opamo pisyisyo arakovo Yahudi jewene matavon, weramu arono vatano Yahudi inta ude, nanawirati Yakobus po matutire, naije Petrus po masyaniv. Vatano Yahudi wato ubeker wo vatane mantitidi sunati rai indamu mamaisy Ananyao Musa rai. Weti naije Petrus akirive arakovo Yahudi jewene mai muno tuna marambe yara pisyisyo matavon akatoe ramu.* ¹³ Umba vatano Yahudi nanawirati wanave Yesus ai kaijinta utavondi Petrus apa be angkarive umaso rai tavon ti wisyisyo vatano Yahudi jewene matavon akatoe ramu. Muno Barnabas we tavon nanto sawa awa angkarije umaso rai.

¹⁴ Arono syo vatano Yahudi umaso maen wo Ayao Kove ama ananyao tugae rarijat akatoe ramu, syo raura nanto Petrus ai no vatane mansamun tenambe syare, “Petrus, winyamo vatano Yahudi pi winy. Weramu nyanave Yesus ai to, weti nyo koano Yahudi rapaya ntami to, yara soamo ntavondi vatano Yahudi jewene awa rai. Weti mbeanimaibe nyare nyo vatano Yahudi jewene mansantitidi inda utavondi koano Yahudi rai?”

Wama anave Yesus Kristus aije omirati mo wansaveti wamamai no Amisy amune rai

¹⁵ Reamamo vatano Yahudi weye reansavaki no susyo Yahudi rai, reamo vatano Yahudi jewene mansamaisy ramu, weye onawamo wantatukambe ananyao Amisy rai ti awa ayao kakaije no mansai. ¹⁶ Weramu reandaen vatane ubeto Ananyao Musa rai omamo mo maveti

* 2:12 Ananyao Yahudi mo raura mare vemo vatano Yahudi utantuna vatano Yahudi jewene matavon inya. Raen no Arakov 10:28.

umamaisyo Amisye amune rai ramu, yara vatane awa anave Yesus Kristus aije omirati mo maveti umamai no Amune rai. Weti vatano Yahudi inta reamanave Yesus Kristus ai to, indamu Amisye po reansaveti reamamai no Amune rai weye reamanave Kristus ai. Weye vatane inta po Ananyao Musa rarijat ti mamaisyo Amisye amune rai jeben bayave.

¹⁷ Reamanave Kristus ai to indamu Amisye po reansavera wamamaisyo Amisye amune rai, weramu vatano Yahudi kajijinta wo reansaen wo rakarae ware reamamo vatano reama ayao kakaije no reansaija nene, maisyare vatano Yahudi jewene mansamaisy, weye reamo Ananyao Musa rapaya to. Weti umba wo ratantona ware Kristus opi po reansaugav reamo ayao kakaije rave rako? Abo! Oma jewena! Vemo wo Kristus aura tantunawi tai maisy inya! ¹⁸ Wo raura ware sya ayao kakaije no rinai weye syo Ananyao Musa rapaya ntami arono syanave Kristus ai to. Weramu syo ayaowe rasakinavo mansai no taiso: ranivara syakare syo Ananyao Musa rarijat akato, naije umba sya ayao kakaije no rinai weye ana tugae mamamo syo Ananyao Musa rakanyoandi to. ¹⁹ Wusyinoe ibeto Ananyao Musa rai, weramu umba idaen omamo mo inaveti rimamai no Amisye amune raije ramu. Weti syo Ananyao Musa rapaya ntami to indamu mbe akarive rinai jakatoo ramu to, wirati itavondi Amisy ai tugaiwe. Risyamo maisyare rikakaijo Kristus atavon no inyo kapite rai to wemaisy. ²⁰ Weti soamo ribe akarive inanuga so rai jakatoo ramu, yara Kristus opi tuna be akarive inanuga so rai. Arono ta ino no mine vone so, syare syanave Arikainyo Amisye obo ai tutir, Wepirati muinyo rinai ti Po anasine raunande ti kakaijo rinai. ²¹ Amisye apa kove mamamo syo rawatambe jeben. Weramu vatano kajijinta wo ratantona ware, “Wambeta Ananyao Musa rai rave, indati Amisye po wansaen pare wamamaisyo Amune rai.” Weramu ranivara awa ayao wato tugae ratire, weamo Kristus apa kakaije ma ama ine meweno rai vayavea.

3

Anave Kristus aije mo Ananyao Musa rakivan

¹ Wakoe! Sya arakovo Galatia weap! Weapamo wapantatukambe ravea! Are pirati po wasanyaubeare so? Yesus Kristus apa auseo sawa inyo kapite rai ti kakai omamo idarijato wasaija mbaro wasai rave

to! ² Syare wapo ratantona rati: wabeta Ananyao Musa raije omi mbewar ti Anawayo Vambunine maje wasai rako? Oma jewena! Yara arono wapo Ayao Kove raraniv ti wapanave Kristus aijoe, naije umba Anawayo Vambunine maje wasai. ³ Arono manasyin wapanaveowe, Anawayo Vambunine mi mo kovo wanyine raugaje wasai, weti soamo wabeanimaibe wapare wapo taune wapa vambunine bo raijar? Wapo ratantona wapare wapa ana wadajjare indati mo wasaveti weapamo wamamai dave? Wabe ti, wapantukambe ravea! ⁴ Ana kovo manakoo nande wasai to, weti soamo vemo meweno wasai jinta! ⁵ Wadaen Amisye po Anawayo Vambunine raugaje wasai muno Po anaporainye rarorono wapa yasyine rai. Syare wapo ratantona rati: Amisye po apa kove umaso raugaje wasai weye wabeta Ananyao Musa rai rako? Oma jewena! Yara Amisye apa kove umaso nande wasai weye wapo Ayao Kove raraniv ti wapanave Kristus ai to.

⁶ Ayao Amisye mo raura mare, “Abraham panave kobe Amisye ai. Amisye po apa anave so raen, weti Po aveti mamaisyo Amune rai.”* ⁷ Weti syare wapo raen: vatano wanave onawirati Abraham apa ajavi tugae nanawije. ⁸ Ayao Amisye mo raura wusyimbe to mare Amisye po unanui raraeyo vatano Yahudi jewene mansai tavon indamu Po mansaveti umamai no Amune rai weye wanave Ai. Weye arono wusyinoe Amisye po Ayao Kove umaso raurairive Abraham ai no taiso: “Abraham, nyanave Rinai ti, indati Syo kove raugaje irati vatane kotaro ntuna no mine so mansai tenambe.”* ⁹ Ayao umaso mare vatano are nawirati wanave, onawamo Amisye po kove raugaje mai maisyare Po raugaje Abraham ai weye panave Aije ramaisy.

¹⁰ Weramu vatano nanawirati ware wo Ananyao Musa rarijat indamu mo maveti umamaisy, onawamo indati Amisye po mangke raugaje mai weye wo Ananyao Musa rarijat tenambeye ramu. Maisyare Ayao Amisye mo ratoo mare: “Vatano rui pirati po Ananyao Musa po ratoo rarijat tenambe tutire jeben, weamo Amisye po mangke raugaje ai.”* ¹¹ Weti wamo raen kakavimbe: Vatane inta po Ananyao Musa rarijat ti mamai no Amisye amune rai jeben bayave. Weye Ayao Amisye mare: “Vatano nanawirati umamai no Amisye amune rai indati ukova nuge nugani weye wanave.”* ¹² Weramu ranivara wamo Ananyao Musa rarijat, omamo nsasye irati wama anave rai. Weye Ananyao

* 3:6 Kejadian 15:6 * 3:8 Kejadian 12:3 * 3:10 Ulangan 27:26 * 3:11 Habakuk 2:4; Roma 1:17 * 3:12 Imam 18:5

Musa maisyare so: “Vatano rui pirati po Ananyao Musa ama ayao rarijat tenambe tutir, opamo indati kova nuge nuganui.”^{*} Weramu wandaen vatane inta po Ananyao Musa rarijat tenambe jewen.^{*}

¹³ Wan tenambe wamo Ananyao Musa rakanyoandi to, weramu ama mangke mammo raugaje wansai jewena, yara ama mangke mammo raugaje Kristus ai. Weye Ayao Amisye mo ratoe mare, “Amisye apa mangke maje irati vatano auseo sawa inyoe rai.”^{*} Maisyare omaisy, Kristus po mangke umaso rapaya wansai weye taune Po wama ranawan. ¹⁴ Yesus Kristus po anasine raunande kakai indamu kovo namirati Amisye po raurairive Abraham aije mammo Po raugaje vatano Yahudi jewene mansai. Weti wamanave Yesus Kristus ai, indati Amisye po Anawayo Vambunine raugaje wansai, maisyare Po raurairive to wemaisy.

Ananyao Musa mo Amisye apa urairije ransopi kakai

¹⁵ Arakove weap! Syo sya ana idaen to inta raura: Ranivara vatane inta yo urairi inta rapatimu, aya urairi so yaneme raija dai. Weti vatan inta pare po urairije umaso ransopi jakato ma jewen muno po rairidi jakaeyo ma jewen. ¹⁶ Amisye apa urairije mammo maisyare wemai tavon. Po apa urairije raurairive Abraham muno apa ajavi po rampame inta ai pare, “Syo raurairive so nto nya ajavi nyo ampame inta ai.”^{*} Apa ayao mare vatane wanuije jewen, yara mare Vatane intabo pa, Opirati Yesus Kristus. ¹⁷ Ana mbeti syare idaura no somamo Amisye apa urairijo Po raugaje Abraham aije ma Po rapatimu wusyimbe to, yara Ananyao Musa ma Po raugaje tumo ratusije mambisy eane abusyine mandej (430) dijabe. Weramu Ananyao Musa mo Amisye apa urairi umawe ransopi ramu muno mo raupaisye kakai. ¹⁸ Indako wapare wambeta Ananyao Musa rai, indati wamaura Amisye apa kove rai rako? Weamo indati urairijo Amisye ama ine meweno rai! Weye ranivara wambeta Ananyao Musa rai wemi mbewar wamaura Amisye apa kove umaso rai, wea indati urairijo Amisye omi mbewar wamaura rai oma jewena. Weramu Amisye apa urairije mi mbewar Po kove raugaje Abraham ai no wusyinoe.

¹⁹ Maisyare omai ti, Ananyao Musa mammo ama ngkove noare rui? Amisye po Ananyao Musa raugaje indamu vatane wo awa ana wo rakanyoandije raen kobe. Ananyao Musa umaso manya tutir ava nde nsopi jirati Vatano Amisye po aurairive no susyo Abraham ai to rai. Ananyao wato mammo Amisye po apa naite inta matutir inda wo raugaw wo raunande Musa ai, wepirati be

marimbe po raura akananto vatano Israel mansai. ²⁰ Weramu arono Amisye po raurairive Abraham ai, vatan inta be marimbe de po raugaje Abraham aije ramu. Yara Amisye taune po raura Abraham ai, Po apa urairije raugaje ai anawadive. Maisyare omai ti, wandaen Amisye apa urairije ntiti rave mo Ananyao Musa rakivan.

Ananyao Musa mammo Amisye po raugaje ava Kristus de umba Po wansaveti wamamai no Amisye amune rai

²¹ Vemo wandaura wamare urairijo Amisye omi ngkov, yara Ananyao Musa omamo mamaisye jewene inta! Ranivara Ananyao Musa ama ananyao mo kovo nuge nuganui raugavo wansai inta no ratire, indati wambeker wambeta rai indamu ananyao umaso mo wansavera wamamai no Amisye amune rai. Weramu ananyao inta maisyare wemaisye ramu. Weye Ananyao Musa mo kovo nuge nuganui raugavo wansaije ramu. ²² Weramu Ayao Amisye mo raura mare vatan tenambe wamamo ayao kakaije mo wansaijaro arove. Mo wansaijaro arove, weti wama anave obo mi mo wansaveti wamamaisy. Maisyare omaisy indamu Amisye apa kovo Po raurairive mammo Po raunande vatano wanave Yesus Kristus aije obo mansai.

²³ Arono Yesus Kristus de rainy ti vatane wanave Ai rainyoe, wambeaje Ananyao Musa rai, omamo raurata irati vatano po wansaman no tanoano makova rai. Weti Ananyao Musa mo wansaman ava Amisye po apa bekere raroron kakavimbe to pare vatane wanave Kristus ai. ²⁴ Weti Ananyao Musa mbe tanamamoambe wansai yava Yesus Kristus de umba Po vatane wansaveti wamamai no Amisye amune rai weye wamanave Kristus ai. ²⁵ Soamo Yesus Kristus de to muno wamanave Ai to, weti Ananyao Musa mbe tanamamoambe wansai jakatoo ramu.

²⁶ Weapamo wapanave Yesus Kristus ai, weti wea tenambe Amisye apa arikainye waino wasai. ²⁷ Muno wea tenambe wasaugasya kuvuni mana rai to, weti wabe intabove Kristus ai muno wapa ana wadave mo Apa ramaisy. ²⁸ Amisye po vatane mansaen inta mansamuinyo inta mansaije ramu, maisyare vatano Yahudi muno vatano Yahudi jewene nao, vatano aro muno vatano aro jewene nao, anya muno wanya nao. Inta usasye inta mansai jewen, yara wana intabove no Yesus Kristus ai. ²⁹ Ranivara Kristus apaura wasai, weamo Abraham po rampam ti nde nawirati wea to muno ana Amisye po raurairive ai indati Po raunande wasai.

4

Wamamo Amisyee apa arikainye waino wansai

¹ Syo ananeneae inta raura taiso: Arikainye inta apa aja kakaijo aora. Umba apa ananugo aja po raunande mamu vatane wo randi amarom ava panakoe. Noa panakoe, indati apaveo ananuge umaso rai tenambe. Weramu arono ta mamauna nene, opamo po vatano wanapatambe no yavare mansamaisy weye vatane inta ube akarive ai. ² Muno arikainye umaso beto vatano wo akume mansai yava matamo aja po rapatimu aije mamaisy, naije umba apa ananugo umawe raunande ai tenambe. ³ Ananeneae umaso ama ine maisyare so: Arono wamanave Kristus ai rainyoe, wansaurata irati arikainye tuvane umawe ai. Arono naije anawayo kakaijo wo mine so raijar wo wansaijaro arove. ⁴ Weramu arono Amisyee apa masyote mamaisy, Po apa Kavoy atutir paje no mine so. Apa Kavoy umaso pamo wanya inta mo avaki muno Opamo beto Ananyao Musa rai. ⁵ Amisyee apa Kavoy de indamu Po vatano Ananyao Musa mbe tanamamoambe wansaijoe wansapaya rai indamu Amisyee po wansaijasea wamamo Apa arikainye waino wansai.

⁶ Wamamo Amisyee apa arikainye nao wam, weti Amisyee po Anawayo no Apa Kavoy ai we ratutir masyo wansanuga rai. Anawayo umawe nggwain nto Amisyee ai mare, "Injae, sya Injaya pi Winy!"* ⁷ Weti naisoamo wamamo wansawaino vatano arove akato ramu,† yara Amisyee apa arikainye nao wam. Wamamo Amisyee apa arikainye nao wam, weti indati Apa anakotaro po ratayao wansanyute Po raunande wansai.

Paulus anuga mamauno apa arakovo Galatia mansai

⁸ Wusyinoe wapantatukambe Amisyee ai ti wapa yaro wapanave rai mo wasaijaro arove. Yare wato mo Amisyee amaisyee ramu. ⁹ Weramu soamo wapo Amisyee aen to muno Amisyee po wasaen tavon. Weti wabeanimaibe wabeker wapakare wabeaje anawayo kakaijo mine so mansai jakato? Anawayo kakai wato maindi, awa vambunine meweno mai. Wabeanimaibe wapare wo wasaija da wabe arove akato? ¹⁰ Muno wapo Yahudi awa masyoto akokoe ama one rave, muno embae, tume ama one rave tavon. Wabeanimaibe wabeker wapo

koano Yahudi wato rarijat? Yara mo wasavera wamamai no Amisyee amune rai jewen! ¹¹ Risyamo inanuga mamauno wasai rave. Syo wasanyaowa risiuri, weramu vemo sya anakere so ama ine meweno rai jinya!

¹² Sya arakove weap! Ibeke dave syare wapo rinamaisy, weye risyamo syo wasamai tavon to. Weti syare wapo koano Yahudi rapaya ra ntami, maisyare muno syo rapaya indamu syo Yahudi jewene wasamaisy. Arono ride wasaijoe, weapamo wapo ana ngkakai inta rave rinaije ramu, yara wabekobe rinai. ¹³ Wasaemen risyamo rigwanen dave arono naije, wemi mbewar rino wasarijat ti manasyin syo Ayao Kovo Yesus ravovo wasai. ¹⁴ Sya wanene umaso mangkeo wasai rave, weramu wapo inaura tantunawije ramu muno wapo rinawatambe ramu. Yara wapo inaugave siso no wapa yasyin, maisyare muno risyamo Amisyee apa naite inta pi risi, maisyare risyamo Yesus Kristus taune pi risi wemaisy. ¹⁵ Arono manasyin syo ananyao raugaje wasaijoe, wabekobeo rinai. Arono naije syo sya bekedaije inta ranajo wasai, weamo wapo raunande ti mamai kobe. Ranivara syo wasami atu ranajo rako, wapo raunande tavon, weye wapa muinye manakoeyo rinai ti! Tugae, arono naije wasanayanambe, weramu soamo wasanayanambe omamo makato ri rui? ¹⁶ Syo ayao tugae raura wasai to, weti wabeanimaibe soamo wapo rinaen akato maisyare wapa marova pi risyee?!

¹⁷ Kuruno angkari wato ubeke dave ware watavondi awa ananyaowe rai. Weramu awa bekero wasai umaso ngkove ramu, weye ware wo wasaponae inda wapo inapaya yara wabekero awa ananyao obo rai. ¹⁸ Arono vatane awa bekere manakoe muno awa ana ubekedaije mamaisy, omamo ngko dave. Syare weapamo wabekere manakoe risya ananyaowe rai tai maisy arono rino wasarijat obo rai jewen, yara arono igwaravainyo wasai tavon. ¹⁹ Sya arikainye weap! Inanuga no wasai rave. Soamo inanuga so nsiuri maisyare muno akoe inta mara njorama nsiuri ama arikainye autan wemaisy. Weye ibeke dave syare wasanuga mamu ratayao da mo Kristus apa ramaisy. ²⁰ Ribeker indamu risyee wana tenambe inda syayao wasai saumambe. Weramu rituna gwaravaimbe, weti syantatukambe animaisyee mi syo ratoe wasai, weye inanuga mamauno wasai.

Hagar raurata irati vatano utataaje

* 4:6 Ayao "Injae" raura ayao Yahudi raijamo Abba, ama ine mamai kava. Yesus po Injayo Amisyee awainamo Abba arono be sambayambe Ai (Markus 14:36). Raen tavon no Roma 8:15. † 4:7 Vatano wamanave Yesus ai wamamo Ananyao Musa mo wansaijaro arove jewen, muno anawayo kakaije (anemo 3 muno 9) mo wansaijaro arove jewen tavon.

Ananyao Musa raije mai, yara Sara raurata irati vatano wanave Kristus aije mansai

²¹ Sya arakovo wapare watataaje irati Ananyao Musa rai weap, syare wapo inaraniniv! Syare wapo ananyao umaso ratantona rati. ²² Weye mo ratoeya mare: Abraham apa arikainye jirum, arikainye inta apa akoya ma Hagar, omamo Abraham po raugavo arove ti manapatambe ai. Arikainye inta apa akoya ma Sara, omamo Abraham apa anamu tugae mije, ti po raugavo arove ma jewen. ²³ Hagar mo ama kavo avaki mamaisyo bekero vatanbe rai, yara Abraham apa anamu Sara mo ama kavo avaki mamaisyo urairijo Amisyey po raura wusymbe rai.

²⁴ Somamo wandave ananeneaebe: Wanya jirume umaso nayamo yaurata irati urairije jirumo Amisyey po raugaje Apa kawasae mansaije rai. Hagar raurata irati Amisyey apa urairi po raugaje Musa ai no Unato Sinai raijoe. Hagar, wanya aro umaso, ama arikainye onawamo ube arove tavon, raurata irati Ananyao Musa mo vatane maugavo arove rai. ²⁵ Hagar raurata irati Unato Sinai no no kopa Arab rai muno raurata irati Yahudi awa munijo Yerusalem rai tavon. Hagar muno ama arikainye onawamo vatano aro nao tenambe, weti maisyare omai tavon vatano Yahudi ubeta Ananyao Musa rai onawamo ayao wato mo mansaijaro arove tenambe. ²⁶ Yara Sara raurata irati Yerusalem no no munijo ntiti. Omamo wanya aro ma jewena, weti wemirati vatano wamanave Kristus ai wama akoya mijem, weye wamamo wansapaya Ananyao Musa mo wansaijaro arove rai to. ²⁷ Ayao Amisyey mo ratoe no taiso:

“Winyirati wanya nte bayave, nya arikainye inta avaki ramu, muno nyo ama yorame raene ramu, weramu syare nanayanambe muno nananibe rave, weye nya arikainye indati wanui! Muno wanya nte mumuimbe ama anya jewen bayave mammo indati rananibe tavon weye ama arikainye wanui, mo wanya ama anap pe inya kava ama rakivan.”[✧]

²⁸ Sya arakove, wamamo Amisyey apa arikainyo wansavaki mamaisyo Apa urairi rai, maisyare muno Sara ama kavo Isak avaki mamaisyo Amisyey apa urairije rai wemaisy. ²⁹ Isak umaso avaki weye Anawayo Amisyey mo vambunine raunande akoya rai. Umba Ismael, wepirati arikainyo Hagar mo avaki mamaisyo bekero vatanbe rai, po arare veano Isak ave. Maisyare

omaisy naiso tavon. Vatano nanawirati ubeta Ananyao Musa rai ti mo mansaijaro arove onanawamo wo arare veano vatano Anawayo Amisyey no wansaije wansave. ³⁰ Weramu Ayao Amisyey mo raura mare: “Abraham, nyo nya wanya aro me ama arikainye pe yawatambe ra yusya! Nya ananugo nyare nyo randije omamo vemo arikainyo wanya aro mo avaki wato apave inta rai jinya! Yara indati arikainyo nya anamu tugae mo avaki opi apave rai tenambe.”[✧] ³¹ Weti sya arakove, wamamo wanya aro ama arikainye nawirati wama jewena. Yara wamamo Abraham apa anamu tugae ama arikainye nanawirati wam. Weti Ananyao Musa mo wansaijaro arove jewen, maisyare muno Sara mammo wanya aro jewene ramaisy.

5

Kristus po wansapaya irati Ananyao Musa rai

¹ Kristus po wansapaya irati Ananyao Musa rai indamu vemo mo wansaijaro arove akato inya. Maisyare omai ti, syare weapamo wapo wasanuga raeranande inda vemo vatan inta po wasaugavo arove Ananyao Musa rai jakato inya.

² Risyi Paulus syo ayaowe so raura kakavimbe wasai taiso: Wapare sunat wemi watavon dai ti wamamai no Amisyey amune rai, weamo Kristus apa kakaije ama ine meweno wasai. ³ Ranivara vatane inta tavondi ananyao sunat rai ti mamaisyo Ananyao Musa rai, kove mammo po Ananyao Musa ama ananyao rarijat tenambe inda mamaisy. ⁴ Weramu are pirati pare po Ananyao Musa rarijat indamu mamaisyo Amisyey amune rai, opamo ponayo Kristus ai muno akirive Amisyey apa kove rai. ⁵ Yara wamamo wansanaveano Amisyey amen Wepi po wansavera wamamai no Amune rai weye wamanave Yesus Kristus ai, muno Anawayo Vambunine no wansai ti wansanuga ntenami wamo ana umaso ranyuta. ⁶ Weye ranivara wambe intabove Yesus Kristus ai, weamo wamo sunative rako jewen dako, mamai bayave. Ana mbe mobe mammo wamanave Kristus ai ti wamuninyo vatane mansai.

⁷ Arakove, wusyinoe weapamo watawondi Amisyey ai mamai kobe, weramu soamo wabeanimaibe watawono Apa ananyao tugae rai jakato jewen?! Are pirati po wasanuga raugabeare so? ⁸ Amisyey pa jewena! Yara Amisyey opirati po wasawain indamu watawondi Ai. ⁹ Vatane ware, “Ragi ama kamije momoyainy, mo tepuno manakoe ratipu vintabo.” Maisyare wemai tavon, kuruno angkarije wanui

jewen, weramu awa anyanyao mo vatano wanui awa anave randamisye. ¹⁰ Weramu syanave wasai weye wambe intabove Amisy Yesus ai, weti syanave wapare watawondi anyanyao angkari rai jewen, yara wana tawan irati anyanyao tugae obo rai. Weramu are bayave po wasaveti wapananepabe, indati Amisy po mangke raugaje ai.

¹¹ Arakove, risyamo syo anyanyao sunat ravove jewen, wemi mbewar vatano Yahudi umarovave rinai. Weramu ranivara syo anyanyao sunat ravov datire, indati Yahudi uparijo rinai jewen. Weramu tugae mamu uparijo rinai weye syo vatane mansanyao syare Kristus kakai no inyo kapite rai obo mi mo vatane maveti umamai no Amisy amune rai. ¹² Ee! Vatane wato wo wapa ana wadatantona raveti nsosobe! Syare wuje wasaora inda mansaene jewen no anugano Amisy ama uga rai!

¹³ Arakove, Amisy po wasawainde indamu Po wasapaya irati Anyanyao Musa rai. Weramu Po wasapaya rai indamu watawondi wasanuga ama bekero ngkakainoanive rai oma jewena! Yara pare wapanapatambe wasai vambinibe muno wamuinyo wasai vambinibe. ¹⁴ Anyanyao Musa ranugan tenambe ama tunato raije mamu anyanyao intabo no taiso: “Muiny irati nya arakove mansai maisyare muno taune wimuinyo taune nai wemaisy.”^o ¹⁵ Weramu syo ranaun weapamo wapo ivuinye raugavo wasai vambinibe, maisyare make sivuinye mansamaisy. Wabe taije maisy, weamo indati wapo wapa wabe intabove Amisy Yesus aije randamisye.

Vatano Anawayo Vambunine mo mau-gave onawamo awa ana udave ngkov

¹⁶ Risy syare idaura mamu no taiso: Koveamo Anawayo Vambunine mi mo wasaugav, indamu vemo watawondi wasanasine ama bekero ngkakainoanive rai jinya. ¹⁷ Weye wasanasine ama bekere omamo kantetoaro Anawayo Vambunine ama bekere rai. Muno Anawayo Vambunine ama bekere kantetoaro wasanasine ama bekere rai. Jirume sonayamo imarovave yai no wasanuga rai, weti wamare wambeta ana ngkove rai, wamamaisy ramu. ¹⁸ Are pirati Anawayo Vambunine mo augav, opamo po Anyanyao Musa rarijate jewen kai.

¹⁹ Vatano utawondi mansanasine ama bekere rai awa ana udave mamu wamo raen tenambe, maisyare so: wo anaerere raugavo mansai, awa ana wo ratantona nggwambe, muno manuga ntairi awa

bekero anaerere rai. ²⁰ Wanave yare rai muno nyovara kakai ama vambunine rai. Manuga mamuno vatano kajinta mai muno usivuiny. Upari rave muno ubeker usea tame rai. Wayaowi muno wo anugane raporar be rurumbe. ²¹ Uparijo awa arakove mai. Umaeno awije rai, wo one rave umba wo awije ramanam ti waumandi, muno wo ayao kakai kajinta rave. Wusyinoe syo raura wasai to muno soamo syo raura rijati: are nawirati wo rave tai mai maisy indati usisa munijo Amisy be akarive raije rai jewen.

²² Yara vatano Anawayo Vambunine mo maugave awa ana udave mamu ngko dave, maisyare so: Umuinyo vatane mai, man-anibe, manuga nsauman. Matawandijo vatano awa ana udave mamu daine mansai. Manuga ngkov, ubekobe irati vatano kajinta mai, muno vatane wanave mai. ²³ Wayao saumambe vatane mai, muno wo taune awa ana udaura muno awa ana udave raeranande indamu vemo wo ayao kakaije rave nora. Ana ratodi umaso mamu anyanyo inta mo raorai ramu. ²⁴ Vatano Yesus Kristus apaura wansai wamamo maisyare wantavondi Ai arono auseo sawa inyo kapite rai wemaisy. Weti wamamo maisyare wangkakai Kristus atavon indamu wamo wasanasine so ama bekero ngkakainoanive raubaisy, indamu vemo wantavondi rai jakato inya. ²⁵ Anawayo Vambunine omi mo kovo wanyine raunande wansai to, weti kove mamu wantavondi Ama bekere rai kobe. ²⁶ Vemo wansararin nora. Vemo wama ana wamo rave mbeti wama arakove manuga njoramo wansai nora muno vemo wampari wansai vambinibe nora.

6

Wapo wasaeranande vambinibe

¹ Sya arakove weap, ranivara wananta vatane inta ai po ayao kakai inta rave, weamo syare vatano weapirati Anawayo Vambunine mo wasaugav wapo vatano napije aneme raijar inda wapo augavakare unanui tugae rai. Wapo augavakare wasanuga nsaumane rai. Weramu wapo taune wasaeranande rai inda vemo apa ayao kakai wato mo wasatopan ti wapo ayao kakai rave tavon nora. ² Syare wapo wasaeranande vambinibe muno wapo wapa anakotaro mangkeo wasai raijasea tutudi. Wabeare naije, Kristus apa anyanyo Po wasatuti dai mo ramaisy. ³ Ranivara vatane inta po raura pare, “Risyamo vatano panakoe pi risy,” vatano napije pangkarive taune ai. ⁴ Vatane nanentabo nawamo syare wo taune awa ana udave raende,

kova rako ngkakaija rako? Ranivara ngkov, weamo anseyai rai weramu vemo po rave vatano kaije awa rakarae nora. ⁵ Weye vatane nantabo taune awa ana udave mammo taune wo awa ranawan kobe.

⁶ Vatano po ananyao Kristus raugav no apa kurune ai, weamo syare apa ananuge, apa anaisye, apa anakotaro kove rui vayave mammo po inta raunande apa kurune ai inda po aeranande.

⁷ Vemo nyangkarive taune nai nora: nyare nyo Amisye aponae, wimamaisye ramu. Syo raura ananeneaebe so: Ana rui mirati nyo ravaya omirati nyo ama mane ranugan. ⁸ Vatane tavondi anasine ama bekero ngkakainoanive obo rai, indati ama mano po ranugane mammo weno nuge nuganuije ma. Yara vatane tavondi Anawayo Vambunine ama bekere rai, indati mano mo raunande ai omamo kovo nuge nuganuije ma. ⁹ Wade wantavondi ana ngkove rai tutir! Vemo wamare wamananai ti wamonae nora. Weye ana ngkove ma wandave tutir, indati wamo ama mano ngkove raen aje. ¹⁰ Maisyare omai ti, arono varore ntami wansaija neneyamo wambekobeo vatane mansai tenambe, nde terave wama arakovo wanave Yesus aije mansai.

Nyovara waowe ama maran

¹¹ *Sya arakove weap, syare waperavaje nyovara wao ama marane so rai. Wapo urupi manakokoeye so raen e? Somamo taune syo ratoe inaneme rai.*

¹² Vatano nanawirati ware wo wasantitidi indamu watavondi sunat rai awa bekere mammo vatano Yahudi wo mansararimbe. Muno ujaniv tavon, wo ratantona ware, “Ranivara reamananyaube reamare Kristus apa kakaijo no inyo kapite raije omi mo vatane mansaveti umamai no Amisye amune rai, weamo vatano Yahudi upari ti wo reansave tatugadi.” ¹³ Weramu syo raen vatano utavondi sunat rai wato wo Ananyao Musa rarijat tenambeye ramu, yara ubeker ware weapamo wabe sunative indamu mansararino rai. ¹⁴ Weramu risyamo syare inararino anakotare inta rai jewen, yara Amisy Yesus Kristus obo inararino Ai, wepirati kakai no inyo kapite rai. Yesus kakai wansai, weti mine so ama bekere mo inajaro arove jewen muno inanuga ntento ana mine so raije jewen. ¹⁵ Sunative rako jewen dako, omamo Amisye po ratore ramu. Yara anakotaro Amisye po ratore mi so: Po wansanuga ranari wanyimbe no Yesus Kristus ai. ¹⁶ Vatano are nawirati utavondi sya ananyao syo raura umaso rai, syare Amisye apa saumane muno muinye

no mansautan, muno no Apa kawasae mansautan tenambe.

¹⁷ Syo raura marane so rai syare vemo vatane inta po inamune ransosobe anakotare umawe rai jakato inya. Weye Yesus apa marova wo inanepat to ti ama pute no no inanasine so rai, mo raroron kakavimbe risyamo vatano syanapatambe Yesus aije pi risy.

¹⁸ Sya arakove, wama Amisy Yesus Kristus tuna wasautan tenambe. Amin.

*Risy,
Paulus*

Nyovara Wao Paulus Po Ratoe Anugano Amisyé Mai No EPESUS

Paulus po kove raura

¹ Risyirati Paulus, risyamo Yesus Kristus po inatutir indamu syo Apa Ayao Kove raura, mamaisyo Amisyé apa bekere rai. Syo nyovara waowe so ratoe more irati Amisyé apa kawasae wasai tenambe wana no munijo Epesus, wepirati wana tawan watavondi Yesus Kristus ai. ² Syare kove muno saumane no no wama Injayo Amisyé muno Amisyé Yesus Kristus no wasautan tenambe.

Kangkamambe Amisyé ai weye Po kove raugaje wansai ti manui

³ Kangkamambe irati Amisyé ai, opirati wama Amisyé Yesus Kristus apa Aja piye! Weye Wepi po anakotaro kove rui vayave no no munijo ntiti raugaje wansai weye wambe intabove Kristus ai. ⁴ Arono mine so ranari rainyoe, Amisyé po wansapatimu wusyimbe to indamu Yesus Kristus pe wambe intabove, indamu wansanuga ndandinit ti Po ayao kakaije inta raen no wansai jeben. ⁵ Amisyé apa muinye mbewar Po wansapatimu indamu Po wansajjasea wamamo Apa arikainye waino wansai. Yesus Kristus opi Po wansaugavere Amisyé ai, mamaisyo Amisyé apa bekere muno Apa ana po rapatimuge rai. ⁶ Maisyare omai ti, wangkangkamambe Amisyé ai weye Apa kove ntiti rave, muno Po apa kovo manakoe umaso raugaje mawebe wansai weye Apa Arikainyo anuga no Ai apaura wansai.

⁷ Yesus Kristus po anasine raunande ti kakai muno Apa mavu nsororop indamu Po wansapaya irati wama ayao kakaije rai. Po wama ayao kakaije rapaya wansai weye Amisyé apa kove manakoeyo wansai. ⁸ Amisyé po apa kovo namije raugaje nde manakoeve wansai muno Po vambunine raugaje wansai indamu wananta ayao tugae rai muno wama ana wandatantona ntiti raugaje. ⁹⁻¹⁰ Amisyé apa bekere mamo arono Apa masyote mamaisy, indati Po anakotaro nami no no mine so muno nami no no munijo ntiti ranugan bintabo indamu Yesus Kristus be akarive rai tenambe. Wusyinoe Amisyé apa bekere umaso mamo Po rangkokaibeve, weramu soamo Po raroron kakavimbe wansai, mamaisyo taune Apa bekere rai. Muno Amisyé po rapatimu indamu Kristus opi po Apa bekere umaso ravea mamaisy.

¹¹ Amisyé po anakotare ratayao tenambe mamaisyo Apa bekere muno Apa ana

po rapatimuge rai. Muno wamirati Po wansapatimu arono munije so ama manasyinoe, weye beker indamu wamamo taune Apa kawasae weye Kristusa pe wambe intabove. ¹² Reamamo vatano manasyin dave reansanave Kristus amen, Amisyé po reansapatimu indamu reangkangkamambe Ai muno reamo ararimbe.

¹³ Muno weapamo wasisa tavon wabe intabove Kristus ai arono wapo Amisyé apa ayao tugae raraniv, omamo Ayao Kove, wemi mare Amisyé po wasapaya wapa ayao kakaije rai. Arono wapanave Kristus ai to, Amisyé po pake raugaje wasai indamu mbe rarorombe weapamo Amisyé apaura wasai. Pako Amisyé po raugaje wasai somamo Anawayo Vambunin wemirati Po raugasyo ntuna wasanuga rai, Omamo Po raurairive no wusyinoe. ¹⁴ Anawayo Vambunino namije ntuna wansanuga rai omamo Amisyé apa kamano musyewe, weti wamo raen tugae anakotaro so dave Po raurairive indati Po raunande wansai jaje no masyoto rijat arono de Po wasapaya kakaije rai weye wamamo Apa vatano apaura terave wansai. Kangkamambe Amisyé ai weye Apa kovo ntiti manakoe rave!

Paulus be sambayambe vatano wanave mansai

¹⁵ Arakove, arono ridaniv weapanave Amisyé Yesus ai muno weamuiny irati Amisyé apa kawasae mansai tenambe, ¹⁶ weamo syo kove raura seo Amisyé aijo wasai. Muno syo rapaya intai jeben, yara ribe sambayambe wasai tutir. ¹⁷ Risambayambe Amisyé ai, wepirati wama Amisyé Yesus Kristus apa Ajayo titi rave. Syo Amisyé anajo indamu Po apa Anawayo Vambunine raugaje wasai, indamu Mo ana ratantona ntiti raugasyo wasai muno Mo Amisyé arorono wasai indamu wapo aen tugaive. ¹⁸ Muno ribe sambayambe indamu Amisyé po apa vare raunande ti wasanuga mbar indamu wananta irati ana wasanave ramen no masyoto makanande rai, wemirati Amisyé po raurairive vatano po mawaiinde mansai. Muno syo anajo indamu wapo raenamamo Apa kovo po ratayao Apa kawasae mansai no munijo ntiti omamo manakoe rave muno ntiti rave. ¹⁹ Ribes sambayambe indamu weananta Amisyé apa vambunino manakokoe rai, wemirati Po raugaje irati vatano wamanave wansai. Apa vambunine umaso mo vambunino kaijo rui rakivan bintabo. Wemirati Apa vambunino po rajjar ²⁰ arono Po Yesus Kristus aijaseo kovakato no wene rai muno Po aijaseo tuna no anem ngkove rai no munijo ntiti. ²¹ Yesus

Kristus apa tuna rai umaso ntiti rave, weti Po akarijo titi rui vayave mansakivan tenambe. Weti akari wo vambunine rajjar no mine vone so muno akari wo vambunine rajjar no naumo warae muno are nawirati awa tame ntiti rave nanawamo Kristus po mansakivan tenambe. Muno akari arono naiso muno akari arono nugo makare umu onawamo Kristus po mansakivan tenambe tavon. ²² Amisyé po vambunine raunande Yesus Kristus ai indamu be akarive anakotare rai tenambe,* muno Po Kristus apatimu be akarive anugano Amisyé mai tavon. ²³ Anugano Amisyé nawamo Kristus anasine mije. Kristus apa ana no Ai vintabo ntairi tenambe anugano Amisyé mansai. Opamo no no rui rui vayave no mine so muno munijo ntiti, muno Apa ana no Ai ntairi anakotare rai tenambe.

2

Amisyé apa kove mbewar Po wasapaya wama ayao kakaije rai

¹ Wusyinoe weapamo wapo Amisyé apa ananyao rakanyoandi muno wapo ayao kakai rave. Arono naije wagwaravainyo Amisyé ai ti wamaisyare wagwenen to. ² Arono naije wapa ana wadave mamo ngkakainoanive mamaisyó vatano mine so awa ana udave rarijati. Watavondi Anakakai Akoe apa ayao bo rai, wepirati be akarive anawayo kakai mai no naumo warae. Muno wepirati be akarive tavon irati vatano wonae ubeta Amisyé aiji. ³ Wusyinoe wan tenambe wamo vatane umaso mansamaisy, wama ana wandave ngkakai weye wantavondi wansanasine ama bekeró ngkakai muno wama ana wandatantona ngkakainoanive rai. Maisyare omai ti, Amisyé pariyo wansai ti pare Po apa mangke raugaje wansai maisyare muno Po raugaje vatano ukakainoanive mansai tenambe.

⁴ Weramu Amisyé apa muinye manakoeve wansai muno aemeno wansai rave. ⁵ Po wansaen wangwaravainyo Ai ti wamaisyare wangkakai weye wamo Apa ananyao rakanyoandi. Aemeno wansai weti Po kovo wanyine raugaje wansai indamu wangkovakato Kristus atavon. Amisyé apa kove mi mbewar Po wasapaya wama ayao kakaije rai. ⁶ Muno Po wansaijasea titive indamu wambe akarive atavon no munijo ntiti weye wambe intabove Yesus Kristus ai. ⁷ Amisyé po ana umaso rajjaro wansai indamu vatano susyo miridije nto wo raenamó Amisyé apa kove muno Apa muinye manakoe rave,

ama manakoe rataune kakai, weye wo raen Amisyé bekobe wansai ti Po Yesus Kristus aunande kakaijo wansai.

⁸ Amisyé apa kove mbewar ti Po wasapaya wapa ayao kakaije rai arono wapanave Yesus Kristus ai. Wapo taune wasapaya rai jewen, yara Amisyé pi po kove umaso raugaje wasai. ⁹ Weti vemo vatane inta po taune ararimbe nora, weye wapa ana wadajare muno wapa ana wadave ngkove wemi mbewar Amisyé po wasapaya wapa ayao kakaije rai jewen. ¹⁰ Wamamo Amisyé po wansanuga ranari wanyimbe no Yesus Kristus ai indamu wamo ana ngkove obo rarijat, wemirati Amisyé po ratgavo wusyimbe to indamu wamo rarijat.

Yahudi nawe Yahudi jewene nawe wambe intabove no Kristus ai

¹¹ Arakovo Epesus wapanave Yesus ai weap, syare wasaemen arono wusyinoe weapamo maisyare vatano maran weye weapamo wasavaki no susyo Yahudi rajje ramu. Vatano Yahudi wo wasakaajian wo wasawaino "vatano utavondi sunat rai jewen," yara ukangkamambe taune mansai weye utavondi sunat rai. Weramu koano sunat wato omamo nande manasine obo rai, yara ama kove nsiso manuga rai jewen. ¹² Arono wusyinoe wapantatukambe Kristus ai muno wasato siso Amisyé apa kawasae Israel matavone ramu, yara wana marambe. Muno wapantatukambe Amisyé apa urairije rai, wemirati Po raokaisyó Apa kawasae mai to. Arono naije weana no mine somamo wasanave Amisyé amene meweno wasai muno Amisyé pamo peweno wasai tavon. ¹³ Weramu soamo Yesus Kristus apaura wasai. Wusyinoe weagwaravainyo Amisyé ai, weramu Kristus po anasine raunande kakai indamu Po wasaugavere wapararai Amisyé ai.

¹⁴ Weye Kristus opi po kovo saumane raunande wansai. Arono Kristus po anasine raunande kakai, Po vatano Yahudi nawe vatano Yahudi jewene nawe manugan ube intabove, muno Po ana mo maporabe jirume randamisyé wirati ube marovave akatoe ramu. ¹⁵ Weye arono kakai no inyo kapite rai, weamo Po Ananyao Musa muno ama koano manui rapaya wansai tenambe. Apa bekeró mamo Po kovo saumane raugav, indamu vatano Yahudi muno vatano Yahudi jewen maporabe jirum akato nora, yara ube kawasae intabove no Kristusa nui. ¹⁶ Arono Kristus kakai no inyo kapite rai, Po vatano susye jirume so maugave wakare vintabo no Amisyé ai, Po aya imarovave ransopi, muno Po yanugan ibe intabove. ¹⁷ Kristus

* 1:22 Ayao Yunani mare, "Amisyé po anakotar tenambe raveaje no Kristus ajo ate rai indamu be akarive rai vintabo."

de indamu Po ayao kovo saumane umaso ravovo vatano Yahudi jewen weapirati wagwaravainyo Amisyeye aije wasai, muno vatano Yahudi reamirati reamangkepano Amisyeye aije reansai. ¹⁸ Kristus kakaijo wansai indamu Yahudi muno Yahudi jewen wan tenambe Anawayo Vambunine intabo mo wansaugave wande wamararai Injajo Amisyeye ai.

¹⁹ Weti vatano Yahudi jewen weapamo vatano marane jewen akato muno vatano wanisene jewen, yara soamo weapamo vatano weano intabowe irati Amisyeye apa kawasae mansai muno wasato siso Apa yavaruga matavon. ²⁰ Vatano wamanave wamamo wansaurata irati yavare rai. Yesu apa arakovo po matutire muno anawae Amisyeye wenanawamo maurata irati yavare ama ajiye rai. Muno ajiye umaso rauseo nteto oramo manakoe ama vone rai, omamo raurata Yesu Kristus taune ai. ²¹ Kristus opi po yavare umaso rajar matuve ti ntet ntindimu. Muno vatano wamanave wansaurata irati anakotaro veano yavare umaso ranari. Yavare umaso ranari manakoeve ava omamo rawainamo Yavaro Amisyeye, weye ratayao terave Amisyeye ai. ²² Vatano Yahudi jewen weapamo wabe intabowe Kristus ai tavon, weti Po wasaugav watawondi vatano kaijo wanave matavon, indamu veano yavaro ngko dave umaso ranari. Maisyare omaisy indamu vatano wamanave wan tenambe wansanarijo Yavaro Amisyeye apa Anawayo Vambunine ntuna rajie rai.

3

Paulus apa anakere mamu po Ayao Kove ravovo vatano Yahudi jewene mansai

¹ Soamo rinausiso tanoano makova rai weye syo Yesu Kristus apa tame ravov irati vatano Yahudi jewene wasai. ² Amisyeye bekobe rinai ti Po anakere raugaje rinai indamu syo Apa kove raura vatano Yahudi jewene wasai. ³ Apa bekero ngkokaiibe mamu Po raroron irati rinai to, ti umawe syo ratoo tumaimbe no sya nyovara wao so rai. ⁴ Weti ranivara weapo bacave rai, indati weananta Apa bekero ngkokaiibe no Kristus aije rai mamaisyo inanto rajie rai. ⁵ Wusyinoe Amisyeye apa bekero ngkokaiibe umaso mamu vatane wantatukambe rai. Weramu soamo Anawayo Amisyeye mo raroron irati Yesu apa arakovo po matutire muno anawae Amisyeye mansai. ⁶ Apa ana ngkokaiibe mi so: vatano Yahudi jewen nanawirati wanave Ayao Kove rai indati utavondi awaura kovo Amisyeye po ratayao Apa kawasae majie rai. Weti vatano Yahudi nawe Yahudi jewene nawe awaura Apa

kovo ngko dave rai kava. Muno vatano Yahudi jewen utavondi Yahudi matavon indamu onawamo kawasae intabo, omamo Kristus anasine mije. Muno Amisyeye apa ana po raurairive mamu Po raugaje mansai kava, weye ube intabowe Yesu Kristus ai.

⁷ Risyamo syo Ayao Kove umaso ravovo vatane mai, weye Amisyeye bekobe irati rinai ti Po apa vambunine raugaje indamu syo Apa anakere rajiar. ⁸ Weramu risyamo imamaisyo syo Apa anakere rajiare jewen, weye risyamo vatano mamaun dave no Apa kawasae awa yasyine rai. ⁹ Weramu Amisyeye bekobe rinai ti Po anakere so raugaje rinai pare syo Kristus apa kovo manakoe ravovo vatano Yahudi jewen mansai, Apa kove umaso ama marane ntami intai jewen. ⁹ Amisyeye po anakere raugaje rinai indamu syo Apa bekero ngkokaiibe umawe raura kakavimbe vatan tenambe mansai. Weye Amisyeye, Opirati po mine so ranari, Po apa ana ngkokaiibe no anuga rai arono wusyinoe mamu soamo raroron kakavimbe. ¹⁰ Soamo Po raroron kakavimbe weye Apa bekere mamu anugano Amisyeye nawirati wo Apa ana datantona ntiti raroron kakavimbe indamu naito Amisyeye nawe, akarijo kaijo wo vambunine rajiar no naumo warae nawe, wo raenamo Apa ana datantona ntiti ama kotare manui. ¹¹ Wemirati Injajo Amisyeye apa bekero Po rapatimu arono mine so ranari rainyoe, muno Po raveti mamaisy arono Po wama Amisyeye Yesu Kristus atutir de no mine vone so. ¹² Wamanave Yesu Kristus ai muno wambe intabowe Ai, weti wambambunin wanta wamararai Amisyeye ai, wanjanive jewen. ¹³ Weti sya arakove, vemo weasanuga mamaun nora arono risya siuri nande rinai weye syo Ayao Kove raura wasai to, weye risya siurije somamo ngkov irati wasai.

Paulus be sambayambe vatano Epesus mansai

¹⁴ Maisyare omai ti, risya vukane ranteter no Injajo Amisyeye amun ribe sambayambe Ai. ¹⁵ Wepirati po apa arikainyo una no munijo ntiti muno Apa arikainyo una no mine so mawain tenambe pare, "Sya yavaruga nanawije." ¹⁶ Ribe sambayambe Amisyeye ai, Opi titi rave, indamu Apa Anawayo Vambunine mo wasanuga raugaje wasai mamaisyo Apa vambunino manakoe muno ntiti rave rarijati, indamu wasanuga mbambunin dave. ¹⁷ Wirati indamu Kristus tuna tawan no wasanuga rai weye wapanave Ai, muno Apa muinye masyo matu no wasanuga rai. ¹⁸ Ribe sambayambe indamu weape, vatan tenambe Amisyeye apaura mansai nawe, weananta

irati muinyo Kristus ama titije me ama ngwaravainye me ama ntapekane me rai. ¹⁹Ribe sambayambe indamu wananta irati Apa muinyo manakoe umaso rai, wemirati vatane wamare wamo raen kobe tenambe weamo wambea marudi. Muno syo Amisy anajo indamu Apa ana no aije mamu Po raugaje ti ntairi wasai.

²⁰Kangkamambe Amisy ai! Opamo bambunin dave, muno Po apa vambunino manakoe raugasyo wansanuga rai, weti Apa anakero po rajare manakoe rave mo wama ana wandanajo Ai muno wama ana wandatantona rakivan tenambe. ²¹Anugano Amisy wamamo wamo Amisy ararimbe weye wambe intabove Yesus Kristus ai! Wame wama susyo miridije nto nawe wamare wangkangkamambe Amisy aija ntoa nuge nuganui. Amin.

4

Anugano Amisy omamo Kristus anasine mije, weye Kristusa pe una intabove

¹Risyamo vatano inausiso tanoano makova rai weye syo Amisy Yesus apa anakere rajjar. Weti syo ananyao raugaje wasai indamu wapa ana wadave ngko dave, ti mamaisyo vatano Amisy po mawainde utavondi Ai awa ramaisy, weye Po wasawainde to. ²Syare weapamo wasanuga mpaaje muno nsaumano vatane mai. Muno wasatawandijo vatane mai arono awa ana udave mamai dainy weye wamuinyo mai. ³Anawayo Vambunine mo wasanugan wabe intabove, weti syare wasaumano wasai vambinibe indamu wabe intabove tutir.

⁴Vatano wamanave Kristus aije wamamo anugane intabo, maisyare anasine intabo, muno Amisy apa Anawayo Vambunine mamu intabom. Muno ana wansanaveano ramene mamu intabo, wamanave wamare Amisy po wansawain indamu wamaura Apa kovo makanande rai. ⁵Wama akarijo titi pamo intabop, wepirati Amisy Yesus Kristus. Muno wama anave mamu intabo, weye wamanave Obo ai. Muno wansaugasya kuvuni jirati Vatan intabo umaso Apa tame rai. ⁶Muno Amisy pamo intabo pa, Opirati vatan tenambe wama Injae pije. Opirati be akarive wansai tenambe, Po wansauga tenambe mamaisyo Apa bekere rai, muno Opamo tuna wansautan tenambe.

⁷Kristus po kovo vambunine raugaje vatan nantabovo wansai tutudi, Po ratodi mamaisyo Apa bekere rai. ⁸Wemi mbewar Ayao Amisy mo raura taiso: "Arono seo no munijo ntiti,

Po vatano aro wanui rave maugav,

muno Po anakotaro kove raunande Apa vatane mansai."*

⁹Ayao oman "seo" umaso ama ntunato rajje mare Opamo paje no mine vono maje rave so rai wusyimbe to. ¹⁰Muno Napi paje to pamo Kristus, wepirati pakaseo ti to no munijo ntiti rai. Apa tuna rajje mamu ntiti rave mo naumo warae ama titije rakivan tenambe indamu Opamo be akarive no rui rui vayave no munije tename so rai.

¹¹Wepirati Po kovo vambunine kotare raugaje Apa vatane mansai no taiso: vatane inta nawirati Apa arakovo po matutire nanawije, inta nawirati anawae Amisy nanawije, inta nawirati vatano wo Ayao Kove ravovo vatano wanuije mansai, muno inta nawirati akari muno kuruno wo anugano Amisy mansaeranande muno wo mansanyao Ayao Amisy rai. ¹²Kovo vambunine umaso raugaje indamu Amisy apa kawasae wanatatayaube tenambe inda wo Apa anakere rajjar indamu anugano Amisy, wemirati Kristus anasine mije, ntubai ti mbambunin. ¹³Wirati wan tenambe wambe intabove, wansanuga intabo weye wamanave Arikainyo Amisy ai muno wamo aeno tugaive. Indati wama anave ntubai ti matu muno wamamo wantubai yava wamo Kristus amaisy, Wepirati mamai dave.

¹⁴Weti vemo wamamo maisyare arikainyo tuvane mansamai nora, muno maisyare nyomano ovare po ramawisy muno aneae mo ranepat ramai nora. Ranivara wamamo maisyare wemaisy, weamo wama anave nanto nande ti wamanave ananyao kotaro rui vayave rai, muno vatano angkarije wo wansaponae muno wo wasanuga raugabe indamu wamanave ayao aruriate rai. ¹⁵Weinya! Yara syare wamo ayao tugae obo raura wama arakove mai, wansanuga ntairi muinye rautan. Wirati indamu wantubai ti wansanuga muno wama ana wandave mamaisyo Kristus apa rai. Wepirati wama Akari pije, ¹⁶muno Anugano Amisy wamamo Kristus anasine mije. Wepi po anasine so rajjanande intabove muno Po anasine ama kotare ratayao tenambe. Weti ama kotare nantabovo mo ama anakere rajja terave muno mo ama kotaro kajjinta raeranande, weamo wansanasine ntubai ti mbambunin. Anugano Amisy wamamo maisyare wemai favon, weye arono vatan nantabovo wamo anakero Kristus po raugaje wansai rajjar muno wamuinyo wansai vambinibe, wea indati anugano Amisy wamamo wantubai wambambunin.

Wansanuga nggwanin no Yesus Kristus

ai

¹⁷ Amisye apa vambunine no irati rina indamu syo ananyao so raugaje wasai: Vemo wapa ana wadave mo vatano wantatukambe Amisye aije awa ana udave ramai nora. Vatane wato awa ana udatantona nsarokire jewen, ama ine meweno rai. ¹⁸ Onawamo wantatukambe rave muno manuga matu, weti ugwaravainy irati kovo wanyino Amisye po raunande rai. Awa ana wo ratantona ngkaumudi. ¹⁹ Wo kakai, kove raen kobe ramu, ti utatayasya manuga ama mbekero kakainoanive obo rai. Wo anakotaro kakai rui yayave ravea nggwambe mansai rave, weramu usamane rai jewen dave. Weti awa ubekero kakainoanive umaso miridi nseo tutir.

²⁰ Weramu, arakove, ananyao Kristus ravovo wasaije mo wasanyao da wabe tai wemaisye jewen! ²¹ Tugae, weapo Yesu anaun to muno ayao tugae no Ai mamu vatane wo wasanyao rai to. ²² Weti syare wapa anakotaro ngkakainoanive wapo raeve wusyimbe mamu wapo ramauta wasaora tenambe, weye bekero ngkakai mine so mo wasaponae ti ayao kakai ntairijo wasai muno mo wasauga ti wata wapananepabe. ²³ Yara syare wasanuga muno wapa ana wapo ratantona ranigwan nggwanyin bintabo. ²⁴ Wirati weapamo vatano wagwanyin, weye Amisye po wasanari indamu wapo amaisy: wasanuga ndandinit muno wapa ana wapo rave mamaisy muno tugae.

²⁵ Maisyare omai ti, arakove weap, vemo wapayarurijabe akato inya. Yara wapo ayao tugae obo raura wasai vambinibe, weye wan tenambe wansato sisa anugano Amisye mai, omamo Kristus anasine mije. ²⁶ Ranivara weapamo wapari, vemo wapa parijo namije mo wasagavo ayao kakai raron nora. Vemo wapo pari rantamija uma pasyo nora, ²⁷ indamu vemo varore raugaje Anakakai Akoe ai mo po wasatopan nora.

²⁸ Are pirati panaonoambeve, vemo panaonoambe akato inya. Yara ngkovo ai omamo po anakere rajaro taune aneme rai indamu po apa anaisye rakani, muno indamu maweso ai po ana inta raunande vatano awa ananuge meweno majje mai.

²⁹ Wapo ayao kakai raura wasawa rajia nsopi, vemo inta makauje wasawa rai jakato inya. Yara wapo ayao kove rator, wemirati mo vatane manuga rajjasea mbambunin, indamu wapa ayao wapo raura we mo kove raugavere vatano wo raranive mansai. ³⁰ Weramu ranivara wapo ayao kakai raura, weamo Amisye apa Anawayo Vambunine ranimaumbe. Anawayo Vambunine ntuna wasanuga rai omamo pako Amisye po raugaje wasai indamu mbe rarorombe weapamo Amisye

apaura wasai, weti tugae rave arono Apa masyoto makare umu indati Po wasapaya kakaije rai. ³¹ Vemo waparijo vatane mai nora, yara syare wasanuga mpari muno mamun mamu wapo ravea nsopi. Vemo wapunanta nora muno wapo vatano kajinta mansaura tantunawi nora. Muno vemo wasanuga ngkakaijo vatane mai nora. ³² Yara syare wabekobe muno wasanuga ngkovo wasai vambinibe, muno arono vatane wo ayao kakai rave wasai, weamo syare wapo maneme rajjar indamu wasanuga nsauman akato. Weye wasaemen arono wapana Kristus ai, Amisye po wapa ayao kakaije rapaya wasai.

5

Wamanya Amisye apa vare rai

¹ Weapamo Amisye apa arikainyo anuga no wasai, weti syare wabeke damu wapa ana wadave mo Amisye apa ramaisy.

² Muno syare wapo muinye rarorono vatane mai, maisyare muno Kristus muinyo wansai ti Po anasine raunande indamu kakaijo wansai. Kristus kakaijo wansai omamo raurata irati anakotaro ranavane nsainy rameseo Amisye aije ramaisy.

³ Vemo anaerere ugavo wasai rako, wapo anakotaro nggwambe rave rako, wasanuga nsasokabe nora. Ranivara wapo anakotaro ngkakainoanive umaso rave, weamo mamaisy ramu, weye weapamo Amisye apa kawasae waino wasai, weti vemo ayao kakai umaso inta raen no wapa yasyine rai nora. ⁴ Vemo wapo ayao titarive raura nora, muno vemo wapo anaerere raura ti wapugoeno rai nora, weye omamo mamaisy ramu. Yara ngkovo wasai omamo wapo kove raura seo Amisye ai. ⁵ Inya! Wapo ayao so raraniv mavabe: vatano anaerere ugavo marijat, vatano wo anakotaro nggwambe rave, muno vatano manuga nsasokabe onawamo indati mato sisa kawasae Amisye muno Kristus ibe akarive mai matavone ramu. ⁶ Ranivara vatane inta wo raura ware wapo anakotaro ngkakainoanive umaso rave kai, weamo wo wasaponae, weti vemo wapo maraniv inya. Anakotaro ngkakainoanive umaso mbewar ti Amisye apa pari mangke maje irati vatano ubeta Ai jewene mansai. ⁷ Weti syare vemo weatavobombe mansai jinya.

⁸ Wusyinoe weapamo wana no ayao kakaije ama kaumure rai, weramu soamo wapana Amisy Yesu ai to, weti wana no Apa vare ama uga rai. ⁹ Vatano una no Apa vare ama uga rai onawamo awa ana udave ngkov muno mamaisy muno wo ayao tugae obo raura. ¹⁰ Syare wabekobe

indamu wananta irati ana mo Amisy aveti anayanambe rai.

¹¹⁻¹² Weramu anakotaro vatano una no kaumure ama uga wo rave mamu vemo weatavondi rai nora, weye mo kove inta raude wasai jewan. Munu ranivara wapayao awa ana wo rave maninimbe umaso rai, weamo mbe samaneve wasai tavon. Awa ana udave ngkakai mamu wo rangkokaibe, weramu syare erananta raen kakavimbe indamu wapo rawatambe. ¹³ Weye arono vare mbaro anakotaro ngkokaibe no kaumure ama uga raije rai, weamo raen kakavimbe. ¹⁴ Weye vare mo anakotore raroron kakavimbe. Wemi mbewar ransyerane inta mo vatano wantukambe Amisy aije maura no taiso: “Inya! Mbeseo winyirati nikive winy, ngkovakato no wene ama uga rai! Indati Kristus baro nai.”

¹⁵ Maisyare omai ti, vemo wapa ana wadave maisyare vatano wantukambe awa ramai nora, yara wabekobe indamu wapa ana wapo rave mo vatano awa ana wo ratantona mbar awa ramaisy. ¹⁶ Syare wapo ana ngkove rave arono rui varore raugaje wasai, weye nugo naiso vatano wanui wo anakotaro ngkakai rave. ¹⁷ Vemo wapantatukambe nora, yara wapo Amisy apa bekere rakani indamu wapo rarijat.

¹⁸ Vemo weamaeno awije rai nora, weye omamo ama vambunine mo wasangkati. Yara syare wasanuga raneka indamu Anawayo Vambunin mo ama vambunine raugaje wasai. ¹⁹ Arono wapanugan wabe sambayambe, syare ayao omano no no ransyerano mazmur, ansyerano ngkangkaman, munu ansyerano Anawayo Vambunine mo raugaje omamo wapo raura wasai vambinibe. Wakino ransyerane rai, wasanuga ntenami wapo Amisy ararimbe. ²⁰ Anakotaro rui vayave nande wasai, syare wapo kove raura seo wama Injayo Amisy ai tutir, munu wapo wama Amisy Yesus Kristus apa tame veano wapa sambaya raokae.

Ananyao raugaje vatano ubauname mansai

¹ Syare wabeaje wasai vambinibe weye wapo Kristus asyaniv.

² Syo ananyao raugaje wanya ubauname mansai no taiso: Wanya mbaunam, wimbeaje nya anya ai maisyare munu wimbeaje Amisy Yesus ai wemaisy. ³ Weye anya opamo be akarive apa wanya rai maisyare munu Kristus be akarive anugano Amisy mai, wenawirati maparari anasine rai, munu wenawirati Po mapaya awa ayao kakaije rai. ⁴ Weti maisyare anugano Amisy ubeaje Kristus ai, maisyare wemai

tavon syare wanya ubeaje awa anya mansai anakotore rai tenambe.

⁵ Ananyao raugaje anya ubauname mansai no taiso: Anya wimbaunam, syare wimuiny irati nya wanya rai maisyare Kristus muiny irati anugano Amisy wansai ti Po anasine raunande kakaijo wansai. ⁶ Kristus kakaijo wansai indamu wamamo Apa anugano wandandinit, weye Po wama ayao kakai wansanuga rarondom arono wansaugasya kuvuni mana rai munu Po apa ayao raugaje wansai. ⁷ Kristus po ana umaso rave indamu Po apa anugane maen udadini dave ti pupute munu wame meweno mai munu ayao kakai no mai tavone ramu, yara uko dave tenambe, maisyare munu wanya rayanyave ti ngko dave indamu raunanta ama anya po raovane ai. Umba Kristus po apa anugane maugavo taune Ai. ⁸ Maisyare omaisy, syare anya muiny irati apa wanya rai maisyare taune muiny irati taune anasine rai wemaisy. Anya muiny irati apa wanya rai, weamo bekobe irati taune ai to ije. ⁹ Weye vatane inta po anasine ransewabe intai jewan, yara po apa anaisye raisy munu po anasine raeranande. Omamo maisyare Yesus Kristus po anugano Amisy wansaeranande. ¹⁰ Po wansaeranande weye wamamo wansisa irati anasine rai.

¹¹ Ayao Amisy mo ratoe mare, “Anya po akoya me aja pe yapaya ti inya, yara to apa wanya rai, yanasine mbe intabove.”*

¹² Ayao umaso mamu ananyao ntiti. Sya ana syo ratantona mamu ama ine mare Kristusa pe anugano Amisy nawe ube intabove.

¹³ Soamo syo ananyao anya munu wanya ubauname ranugan taiso: vatano anya muiny irati apa wanya rai maisyare taune muiny irati taune ai, munu wanya mo ama anya aijaseo titive.

6

Ananyao raugaje arikainye munu awa vatan anui mansai

¹ Syo ananyao raugaje arikainye mansai no taiso: Arikainye, Amisy Yesus apaura nai weti wimbeto nya vatan anui mansai, weye wemirati mamaisy. ² Amisy po wasanyao pare: “Mbeaje irati inya pe nangkoya me yai.” Ananyao so manakoe rave, weye wemirati Amisy apa ananyao manasyino mo urairije inta ranugan. Urairijo namije mo raurairive taiso: ³ “Mbeaje irati inya pe nangkoya me yai, wea umba kove raugaje nai munu nya tume nggwaravain no mine so.”*

⁴ Ananyao raugaje ajae mansai no taiso: Ajae, mbemo nyo nya arikainye mansimbe namandi awatan nora, weye wemirati mo

mauga ti upari nai. Yara syare nyo maerande muno nyo manyao irati Amisyé apa ananyaowe rai.

Ananyao raugaje vatano wanapatambe muno awa akari mansai

⁵ Ananyao raugaje vatano wanapatambe awa akari maije mai no taiso: Vatano nyanapatambe winy, syare wimbeto nya akari mine so ai apa anakere rai. Nyo asyaniv muno mbeaje ai, nyo anakere raijaro nanuga kakuive rautan, maisyare muno wimbeaje Kristus ai wemaisy.
⁶ Muno wimbeto nya akari ai tutir. Ranivara nyo anakere raijar arono nya akari po nanyanyut, yara arono puje, nyo nya anakere rapaya ntami, weamo mamaisye ramu. Kristus wepirati nya Akari nyanapatambe Ai piye, weti nanuga ntenami wintavondi Amisyé apa bekere so rai.
⁷ Anakero rui wapo raijar, weamo wapo raijaro wasanuga ranayanambe rautan, maisyare wapanapatambe Amisyé Yesu ai yara vatan bayave mai ma jewen.
⁸ Weye nyo raenamo Kristus po vatan nanentabo awa ana ngkovo wo raijare ama ine raunande, Po ama ine raunande vatano aro mai muno vatano aro jewene mai kava.

⁹ Umba ananyao raugaje akarije mansai no taiso: Akarijo winy, syare nanuga ngkovo vatano wanapatambe nya anakere raije mai. Vemo nyo mansanyao soowabe nora. Weye naemen: winye nya vatano wanapatambe naije nawe, wea tenambe wapa Akari opamo intabo, Napi tuna no munijo ntiti. Muno Opamo po vatane kotare inta mansamamaribe ramu.

Wamo Amisyé apa anaiyu rave indamu wamarovave Anakakai Akoe ai

¹⁰ Sya ananyao syo raura marane so rai mi som: Syare weabambunin irati vambunino manakoe Amisyé Yesu raugaje wasai rai, weye wepe wabe intabove.
¹¹ Syare weapo Amisyé apa anaiyu po raunande wasaije raija tenambe, weabambunino rautan, indamu weapo Anakakai Akoe aorai ti vemo po wasaponae inya.
¹² Weye wama marova onawamo vatano kaije nawa jewena. Yara wama marova onawamo anawayo kakai vambunin muno awa akari ukakainoanive; muno akari mamun wamo aeno wansamije rai jewen, nanawirati ube akarive vatano mine so una no kaumure ama uga raije mansai; muno anawayo kakai manui rave wo naumo warae raijanande.
¹³ Maisyare omai ti, syare wapo Amisyé apa anaiyu raija tenambe indamu arono rui Anakakai Akoe muno apa anawayo kakai ude umarovave wasai, weamo wapo maorai. Weti wapo maorai tutira ntoa marova ama marane

rai, umba arono mewen to, indati wasayai vambunimbe weye wo wasapinde kakai.

¹⁴ Syare wapanatatayaube indamu wamarovave, maisyare naite wanatatayaube ti wo awa ansuno marova rave muno wo anaiyu raijar wemaisy. Weti wana tawan no Amisyé apa ayao tugae rai, omamo raurata irati wapa tarandino wapo rave rai. Muno syare wapa ana wadave mamai no Amisyé amune rai, raurata irati ansuno besijo wapo rave wapa popane rai indamu vemo wapa marova apa anaiyu nteto wasai nora.
¹⁵ Muno wapanatatayaube indamu wapo Ayao Kove ravov, wemirati mo Amisyé apa kovo saumane raugavo vatano wanave mai. Omamo raurata irati wapa ajo kokome rai.
¹⁶ Wapo wapa anave Amisyé aije raijar matuve, omamo raurata irati inyo vasye manakoe wapo raijar wasaora arono Anakakai Akoe de aroyaro wasai muno po wasatopan. Apa ana po wasatopane omamo maisyare weyamo mbadururo po ramaugo wasaije ramaisy, weti wapo wapa anave veano ransopi.
¹⁷ Wasaemen Amisyé po wasapaya wapa ayao kakaije rai to, omamo raurata irati sapeo besije veano wasakari rai. Muno wapa omako wapo raijar omamo Ayao Amisyé, wemirati Anawayo Vambunine mo raugaje wasai.
¹⁸ Wabe marovave tai maisy, weti syare wabe sambayambe Amisyé ai tutir. Wapo anajo muno wapo sambaya rave mamaisyo Anawayo Vambunine mo wasaugave rarijati. Wasyisyaube muno wapanatatayaube! Vemo wapo sambaya rapaya nora, yara wapo sambaya rave tutiro vatano wanave Kristus ai una no rui rui vyave mansai tutir.

¹⁹ Muno syare wabe sambayambe rinai tavon, indamu Amisyé po ayaowe raunande rinai inda ridaura vambunimbe. Wirati Ayao Kove, wemirati ngkokaiibe arono wusyinoe, syo raura kakavimbe vatane mai.
²⁰ Kristus po inatutir syo Ayao Kove umaso ravov wemi mbewaramo rituna no tanoano makova so rai. Weti syare wabe sambayambe rinai indamu rijanive ramu, yara ribambunin syo Kristus avovo tutir indamu mamaisy.

Paulus apa ayao po raura marane rai

²¹ Arono Tikikus pore wasai, indati po sya anakotaro no rinai raura tenambe. Opamo atawandi ngko dave indamu po anakero Kristus raijar, muno opamo sya arakovo inanuga no ai, reamanapatambe Kristus ai kava.
²² Soamo syo Tikikus so atutir pore wasai indamu weapo reama anakotaro nande reansai ranaun, muno indamu po wasanuga raijaseo mbambunin.

²³ Syare saumane muno muinye no no Injajo Amisyé muno Amisyé Yesu Kristus

no arakove wasautan tenambe, muno syare wapa anave ntindimu. ²⁴ Muno syare Amisye apa kove no wasautan tenambe, weapirati wapa muinyo wama Amisy Yesus Kristus aije mamu mpamo jwen yara no tawan tutir.

*Risy,
Paulus*

Nyovara Wao Paulus Po Ratoe Anugano Amisyae Mai No PILIPI

Ayao manasyin

¹ Risyirati Paulus, umba Timotius tavondi tavon. Irimamo vatano irimanapatambe Yesus Kristus ai. Nyovara waowe so more irati Amisyae apa kawasae wasai tenambe wana no munijo Pilipli, weapirati wabe intabove no Yesus Kristus nui. Muno more tavon irati wapa akarijo wo wasaugave mansai muno wapa vatano wo anugano Amisyae wasaeranande mansai tenambe.

² Kove muno saumane no no wama Injajo Amisy muno Amisy Yesus Kristus no wasautan tenambe.

Paulus apa sambaya po kove raura seo Amisyae ai

³ Risy kove raura seo Amisy ai arono rui vayave syo weasantantona. ⁴ Syo sambaya rave wasai tenambe tutir, ribe sambayambe inanuga ranayanambe rautan. ⁵ Inanayanambe syo kove raura seo Amisy ai, weye arono manasyin ride wasai kobeyoe ndea unumeso wea tavon wapo Ayao Kovo Yesus ravovo rinatavon. ⁶ Amisyae opirati po anakero ngkove rausiso no wasanuga rai arono manasyinoe, muno syanave Ai opamo po apa anakero no wasanuga rai umaso rajjar tutira ntoa mewen no masyoto Yesus Kristus pakare rai.

⁷ Risy weasantantona somamo mamaisy weye inanuga no wasai rave. Muno weapamo watavondi Amisyae apa kovo po rautan nande rinai rai, weye wapo inaeranande arono syo Ayao Kove ravov, muno wapo inaeranande tavon arono syo ayaowe rasakinao vatano wo Ayao Kove so raura tantunawije mansai, muno arono rimakova no tanoano makova so rai tavon. ⁸ Weye Amisyae po raen risyamo inaemeno wasai rave, sya muinyo wasai maisyare Yesus Kristus taune muinyo wasai wemaisy.

⁹ Risy sambaya syo rave wasai mi so: syare indamu wapa muinye miridi nseo muno wapo Amisyae aene miridi nseo tavon. Muno anakotaro rui nande wasai, syare Amisyae po wasakarikuga raniku ramu mbar, ¹⁰ indamu wananta ana ngkove rai muno wabeta rai. Wirati wasanuga ngkakavimbe muno ayao kakai inta raen no wasai jewen arono masyoto Kristus pakare. ¹¹ Muno ribe sambayambe indamu wapa ana wadave ti ngkove mamoi manui rave, weye Yesus Kristus po vambunine raugaje wasai. Wirati vatane wo wasaen

umba ukangkamambe Amisyae ai muno wo ararimbe.

Paulus opamo makova, weramu Ayao Kovo Yesus makova ramu

¹² Sya arakove, syare wapo raen: Siurijo nande rinai somamo ama ngkove no rai. Weye wemi mbewar Ayao Kovo Yesus maneka manakoe, weti vatane wanui wo raraniv. ¹³ Maisyare omai ti, naito nanawirati wo akarijo titi apa yavare raman muno vatano kaijo rui vayave una no naiso wo raen tenambe risyamo syanapatambe Kristus ai omi mbewar inausiso makova. ¹⁴ Muno risya inausiso makova so mbewar arakove wanui awa anave Amisyae ai miridi nseo ti wo ayao Amisyae raura vambunimbe yara ujanive ramu.

¹⁵ Weramu tugae, vatane inta nawirati wo ayao Kristus ravov weye uparijo rinai muno ware wo inakivan. Yara kajinta nawamo wo ayao Kristus ravovo manuga ngkove rautan. ¹⁶ Vatano manuga ngkove umaso wo ayao Kristus ravov weye umuiny irati Amisyae ai muno umuinyo rinai tavon. Weye wo raen risyamo Amisyae po inatayao indamu syo Ayao Kove raura kakavimbe syare omamo ayao tugae ma. ¹⁷ Weramu vatane umawe onawamo manuga ngkove jewen yara ubeker usea tame rai. Weti wo ayao Kristus ravovo tugaive jewen, yara wo ravov indamu vatane wanui utavondi mai. Weye ubeker indamu risya siuri no tanoano makova so rai miridi nseo.

¹⁸ Weramu wo ravovo kai, weye ama ngkove inta no rai. Awa bekere ngkakai rako ngko ndako, ana mbe mobe mamoi wo ayao Kristus ravovo vatane mai. Weti inananibe, muno indati inananibe so no tawan tutir. ¹⁹ Weye syo raen wapa sambaya wapo rave rinai mamoi Amisyae po raraniv, weti indati Yesus Kristus apa Anawayo Vambunine mo rinaeranande indamu syuje tanoano makova so raora. ²⁰ Ana ribekero rai muno rinanave ramen dave mamoi syare syo Kristus apa anakere so rajjaro matuve, vemo ana inta mo inave samaneve nora. Weti ribeker indamu inanuga so mbambunin tutir arono naiso muno miridi nto, indamu ranivara wene nande rinai rako jewena rako, weamo Kristus aijaseo tive tutir no rinai. ²¹ Weye risyamo rino no mine vone somamo indamu ritavondi Kristus ai. Weramu kove mamoi wene nande rinai indamu syoroto rituna Kristus atavon no munijo ntiti rai. ²²⁻²³ Maisyare wemai ti, rui mirati syare syo ratayao rinamarom dave, syantatukambe rai: riko da rino kai no mine so rati rako, ikakai vayave rako? Ana jirume so yo rinawabe. Ribeker dave syo mine so ama

rapaya indamu rituna Kristus atavon, weye wemirati ngko dave mije. Weramu ngko dave mamo riko da ino kai no mine so rati, indamu syo anakero Amisy po raugaje rinai ama ine raen dati. ²⁴ Muno ngkovo wasai omamo rino tutiro wasarijat no mine so. ²⁵ Wemi mbewar inanuga ntindimu anakotare so rai: Syo raen indati rino tawan tutiro wasarijat tenambe indamu wapa anave ntubai mbambunin dave, muno wasananibe miridi nseo weye wapanave Kristus ai. ²⁶ Weti ranivara risyakaore wasai ti wapo inaen akato, indati wapo Yesus Kristus ararimbe miridi nseo.

²⁷ Sya arakove, mbe mobe mamo wapa ana wadaveye ngko dave tenambe, mamaisy Ayao Kovo Kristus mo wasanyao rai. Syare wapo raveare wemaisy indamu ranivara syakaore inande wasai jakatoa rako jewena rako, indati syo ranaun weapamo wabe intabove, muno wapa bekere intabo indamu wapo anakere rajaro panyoambe indamu vatano wanui wanave Ayao Kove rai. ²⁸ Vemo wapo wapa marova wo wasave tatugadi masyaniv inya, yara syare wasanuga mbambunin. Ranivara wapo masyanive jewen, omamo mbe raroombe mai wenanawamo indati Amisy po mangke raugaje mai, yara weapamo Po kovo nuge nuganuije raunande wasai. ²⁹ Weye Amisy po wasatayao indamu wapanave Kristus ai, muno obo ma jewen, yara Po wasatayao indamu wasiuri weye wapanave Ai. ³⁰ Soamo wasatawandi siurije rai maisyare muno rinamaisy. Wapo inaen risiuri no wusyinoe weye vatane wo inave tatugadi,* muno wapo ranaun risiuri namije soamo ta no rinai.

2

Wansanuga mpaaje maisyare Kristus amaisy

¹ Sya arakove, syo wasaen wasanuga mbambunin weye wabe intabove no Kristusa nui. Muno Apa muinyo wasai mo wasayove arono wasanimaumbe. Wabe intabove wasai vambinibe weye Anawayo Vambunine mo wasagav, muno wabekobe wasai vambinibe muno wasaemeno wapa arakove mai. ² Weti syare wapo anayanambe raugavo inanuga so rai maisyare so: syare wapa ana wapo ratantona intabo, wapa muinye intabo, wasanuga intabo, muno wapa bekere intabo. ³ Vemo watavondi taune wapa bekero wasea tame rajje rai nora! Vemo wasararin nora! Syare wasanuga mpaaje,

yara wapo wapa arakovo rui vayave maijasea wapare onawamo ube mobe wasakivan. ⁴ Vemo vatane nanentabo nyo taune nya bekere bo ratantona inya, yara syare nyo vatano kajijinta awa ratantona tavon. ⁵ Syare wapa ana wapo ratantona muno wasanuga mamo mo Yesus Kristus apa ramaisy no taiso:

⁶ Yesus Kristus aeno Apa ana no aije rai Opamo po Amisy amaisy, weramu pare Po Amisy apa titije muno Apa vambunine rajaro taune Amarome ramu.

⁷ Yara Po apa titije rapaya ti ntuna nara de ti maisyare vatano panapatambe inta amaisy.

Apa anakea mbe vatanbe rai indamu Po vatane mansamaisy.

⁸ Po taune anuga raveti mpaaje rave muno beto Amisy apa bekere rai ti Po anasine raunande kakai; beto Amisy ai tutir ava nto Apa kakaije no inyo kapite rai.

⁹ Wemi mbewar Amisy po aijaseo titive muno

Po tamo manakoe rave mo tamo kai rakivan tenambe raunande Ai,

¹⁰ indamu anakotar tenambe no no naumo warae

muno mine so muno mine ama ate waraya, ubeaje irati Yesus ai.

¹¹ Muno anakotar tenambe umaso wo Yesus Kristus aura kakavimbe ware Opirati Amisy, wirati Ajayo Amisy apa kovo ntiti rararimbe!

Wabe unanuve vatane mai

¹² Maisyare omai ti, sya arakovo inanuga no wasai, maisyare muno wabeta sya ananyaowe raive arono ino wasarijat no wusyinoe, maisyare wemai tavon syare wabeta sya ananyao rai tutir arono naiso rituna igwaravainyo wasai. Syare wabekobe indamu wapa ana wadave mamai dave, mamaisyo vatano Amisy po mapaya ayao kakai rai we mansamaisy, muno wapo Amisy asyaniv muno wabeaje Ai. ¹³ Weye Amisy taune wepirati po vambunine raugaje wasanuga rai, wirati indamu weapamo wabekero wabeta Ai muno wabambunin wabeta Ai mamaisyo Apa bekere rai.

¹⁴ Anakotaro rui wapo rajar, vemo wapayaowi rai nora muno wapo nuge rapanan nora, ¹⁵ indamu ayao kakai inta raen no wasaije jewen yara wasanuga ngkakavimbe vintabo. Weapamo arikainyo Amisy nawirati weap, weramu wana no

* **1:30** Arono wusyinoe Paulus de po Ayao Kove ravon no munijo Pilipi, akarijo munije wato wo Paulus muno apa arakovo Silas yaugave isisa tanoano makova rai (Arakov 16:19-24).

vatano ukakainoanive awa yasyine rai no mine so. Weti syare wabe unanuive mai, maisyare tumo mbaro kaumuro mine so rai. ¹⁶ Muno wapo ayaowe ravovo mai, ayao wemirati mo kovo nuge nuganuije raunande. Ranivara wapo rave tai maisy, weamo arono masyoto Kristus pakare, indati inanayanambe wasai weye sya anakero syo rajaro panyoambe no wapa yasyine rai omamo idaijara marudi jewen, yara ama ine raen no wasai.

¹⁷ Weapamo wapanave Amisy ai ti wapanapatambe Ai omamo raurata irati anakotaro wapo rameseo Ai. Muno risyamo ranivara vatane wo inaubaisy ti sya mavu nsororop weye syo Ayao Kove ravov, wemamo maisyare ritavondi wasai syo anakotare rameseo Amisy ai. Weti ikakai kai, weramu inanayanambe muno inananibe wasatavon. ¹⁸ Muno syare wasanayanambe muno wasananibe rinatavon.

Timotius muno Epaproditus

¹⁹ Ranivara Amisy Yesus po rinamayar, weamo indati syavave syo Timotius atutir pore wasai, indamu arono pakare, po wapa anakotar wadave ratodi ti inanuga so ranayanambe. ²⁰ Syo vatane inta aen po Timotius amaisy syo ramu. Timotius wepirati irinsanuga intabo, muno wepirati wapa anakotar ngkovo wasai mamu po ratantona tutir. ²¹ Vatano kaijinta nawamo wo taune awa bekere bo ratantona, yara Yesus Kristus apa ma wo ratantona ramu. ²² Wapo raenam Timotius po anakero Ayao Kove ravove rajaro rinatavon, maisyare arikainye po anakere rajaro ajaya atavon wemaisy. Muno wadaen opamo tindimu Amisy apa anakere rai. ²³ Maisyare omai ti, syare syo Timotius atutir pore wasai arono anakotaro mare nande rinai mamu syo raen to.* ²⁴ Muno risyanave Amisy Yesus ai wepi po rinamayar syore vave wasai tavon.

²⁵ Risyo ratantona kove mamu syo wama arakovo Epaproditus atutir pakaore wasai, wepirati wapo atutir de rinai indamu po rinaeranande. Opamo sya arakovo tavondi rinai ririmo Amisy apa anakere rajar kava muno ririmo Amisy apa marova mansopi tavon. ²⁶ Epaproditus pamo aemeno wasai rave, pare beker po wasaen akato. Opamo tuna kakai weye daniv weapo apa wanene ranaun ti wasanimaumbe ai. ²⁷ Tugae, nandijawe Epaproditus gwanen dave, kavintare wene mo augav. Weramu opamo sauman akato, weye Amisy aemeno ai. Muno Amisy aemeno rinai tavon,

weye ranivara sya arakove so kakai ratire, wea indati inanimaumbe ntapekano rinai rave. ²⁸ Weti sya bekere manakoe indamu syo atutir pakaore wasai, indamu weapamo wasanayanambe arono wapo aen muno risyamo syo wasantotobe akatoe ramu. ²⁹ Weti syare wapo augave siso, wasanuga ranayanambe rautan, weye wepamo wapa arakov panave Kristus ai tavone piye. Syare wapo vatano maisyare arakovo Epaproditus so aije maura titive tenambe. ³⁰ Weye opamo kavintare wene mo augav weye po Kristus apa anakere rajar. Opirati de po rinaeranande, weye weapamo wagwaravainyo rinai ti taune wapo inaanande kakai. Weramu wanene nande ai no naiso ti kavintare kakai rai.

3

Wamamai no Amisy amune rai weye wamanave Kristus ai

¹ Sya arakove weap, syare wasananibe weye wabe intabowe no Amisy Yesus a nui. Ranivara ana syo raura wasai no wusyinoe ma idaura rijati akatoa, mangke rinai ramu, weye wemirati ngkovo wasai indamu vemo vatane inta wo wasaponae inya.

² Syare wasyisyauwe irati vatano awa ana udave mamune mansai. Vatano nanawije mansaurata irati makeo sivuinye mai. Wo vatane mantitidi indamu utavondi sunat rai, weye ware are pirati beker siso Amisy apa kawasae mai, opamo tavondi sunat rai rati. ³ Weramu vatane wato nawamo Amisy apa kawasae tugae nawa jewena, yara wamirati Apa kawasae tugae. Weye wamamo Anawayo Amisy ntuna wansanuga rai indamu Mo wansaugav wansambayambe Amisy ai. Muno Yesus Kristus apaura wansai ti wansanuga manakoeve Obo ai. Muno wamanave Yahudi awa koano maisyare sunat rai ramu, weye mo wansaugava wamamaisyo Amisy amune rajie ramu.

⁴ Weramu arono wusyinoe risyamo syanave koano namije rai tavon. Weti ranivara vatane inta pare opamo tavondi mavabe koano Yahudi rai wirati mamai no Amisy amune rajioe, wepamo risyi indati syo akivan! Weye risyi itavono rai mavabe rave. ⁵ Weye risyamo ritavondi sunat rai arono rinano aje kobe we, sya masyote ratora kaumandei sunative rinai. Muno risyamo vatano Israel, rinavaki no susyo Benyamin, muno risyamo vatano Yahudi vatan dave. Arono wusyinoe ibeto Ananyao Musa rai rave weye risiso no varoro Parisi rai.* ⁶ Muno arono najie ribekero ananyao Yahudi obo rai, weti syo arare veano vatano

* 2:23 Paulus tuna no tanoano makova rai po akarijo pemerinta po ayao mamaisy rapatimugo aije ranyuta. ✧ 3:5

wanave Yesus Kristus aije mansave. Muno Ananyao Musa mamu syo inta rakanyoandi ramu, yara ribeto rai vintabo.

⁷ Arono wusyinoe syo anakotar tenambe umaso ratantona omamo ngkovo rinai to mije. Weramu soamo syo raen syo rar-ijata marudi, weye syanave Kristus obo ai. ⁸ Naisoamo syaura kovo mo kajinta rakivane rai tenambe, wemirati syo Yesus Kristus aen, Wepirati sya Amisy. Maisyare omai ti, anakotaro wusyino syo ratantona ngkov irati rinai mamu syo rapaya vintabo to, maisyare muno vatane wo anaingkainye ramauti wemaisy. Syo rapaya ti ntami tenambe indamu ritavondi Kristus obo ai, ⁹ muno indamu ibe intabove no Wenui. Weramu ibeto Ananyao Musa rai omi mo inaveti mamai no Amisy amune rai oma jewen, yara syanave Kristus ai obo mi mo inaveti mamai no Amisy amune rai. Weye Amisy po wansaveti wamamai no Amune rai weye wamanave Kristus ai. ¹⁰ Risya bekere mamu indamu syo Kristus aen muno inanto Apa vambunino kovakato no wene ama uga raije rai. Ribeker syare itavondi Apa siurije rai muno Apa kakaije rai indamu syo amaisy. ¹¹ Weye risyamo inanave Amisy amen wepi indati Po inaijaseo kovakato no wene rai.

Wansatawandi tutir indamu wananta Amisy apa kovo no no usye rai

¹² Weramu anakotaro syo raura umawe mamu syo raija dainy, muno risyamo mamai dave rainy. Weramu Kristus po rinaugave siso apave rinai, weti inatawandi tutir indamu syo kovo manakoe no no usye raijar. ¹³ Tugae, sya arakove, syo raen risyamo mamai dainya nene. Weramu sya ana syo rave mi som: syo anakotaro no no wusyinoe ratantona akatoo ramu, yara ribeke dave indamu inanto irati ana no no sya usye obo rai. ¹⁴ Weti risyamo maisyare syansanan panyoambe iridi to no ama marane rai indamu syo ama ine raugav,* omamo kovo nuge nuganui. Amisy po inawainde no munijo ntiti indamu Po kove umaso raudande rinai weye ibe intabove no Yesus Kristus nui.

¹⁵ Arakove, syare vatano wama anave matu to wamamo wansanuga intabove wamo anakotaro syo raura umawe ratantona. Weramu ranivara vatane inta nya ana nyo ratantona nsasye, indati Amisy po raroron kakavimbe nai. ¹⁶ Weramu ngkove mamu ananyao wandaen to ti wantavondi rai tawan ava unumeso, wemamo wantavondi rai tutir.

¹⁷ Arakove weap, syare sya ana syo rave mamu wea tenambe wapo rave tavon.

Muno vatano awa ana wo rave mamaisyo reamo rave rai onawamo ube unanuive wasai tavon indamu watawondi awa ana udave ti ngko dave rai. ¹⁸ Wusyinoe syo raurave wasaive to muno soamo syo raura rijati syare: Vatano wanui awa ana wo rave mamaisy ramu, ti mo raroron kakavimbe onawamo ube marovave Kristus ai, ware Apa kakai no inyo kapite rai ama ine meweno rai. Aro! Mo inaveti syoyov. ¹⁹ Vatano nanawije awa marane mamu Amisy indati po mangke raugaje maija nto nuge nuganui. Ubekero Amisy aije ramu, yara ubekero manasine ama marinsene obo rai. Awa ana udave mbe samaneve, weramu usamane rai ramu, yara mararin dave rai. Muno wo anakotaro mine so bo ratantona.

²⁰ Weramu wamamo wansato siso yavaruga munijo ntiti rai. Muno Amisy Yesus Kristus, wepi no no munijo ntiti naije, Apa pakare mamu wana ranyut. Wepirati po wansapaya wama ayao kakaije rai. ²¹ Muno Wepirati indati po wansanasino mayondi muno ngkakaije so ranigwan indamu mo taune anasine ramaisy, wemi ngkovakato ti ntiti rave. Vambunino manakoe no Kristus ai indamu be akarive anakotare rai tenambe, weti indati Po apa vambunino manakoe veano wansanasine so ranigwan ti wanggwanyin.

4

Ananyao maran

¹ Maisyare wemai ti, syare wana tawan irati Amisy ai. Weapamo sya arakovo rimuinyo wasai muno rinaemeno wasai rave! Wapo inanuga raveti ranayanambe rave weye sya anakero no no wapa yasyine ama ine raen no wasai.

² Inya, arakovo Eudia muno Sintike! Syare ibeke dave indamu vemo ipayaowi nora! Ripamo ibe arakobe weye nantabo ipanave Kristus ai, weti syare isanuga nsaumano vambinibe. ³ Muno syo raura tavon irati sya arakovo tugae winai,* winyirati nyo Amisy apa anakere rajaro inatavon: Syare nyo wanya umawe yaeranande indamu yo yaneme rajara yanuga nsauaman akato. Weye onayamo arono wusyinoe javondi rinai, reansatawandi kobe indamu reamo Ayao Kovo Yesus ravov. Muno Klemens wepe sya arakovo kaije nawe utavondi rinaijo anakere so rai tavon. Vatan tenambe sonawamo awa tame ratoo Bukugo Kovo Nuge Nuganuije rai to.

⁴ Syare wasananibe tutir weye wabe intabove no Amisy Yesusa nui. Syo raura

* 3:14 1 Korintus 9:24-27

* 4:3 Ayao Yunani no naiso mare Sunsgos, ama ine mare "arakova."

* 4:3 Muni

intabo akato: Wasananibe! ⁵ Muno syare wabekobe irati vatane mai tenambe. Weye Amisy Yesus pakare mararai to. ⁶ Vemo wasanuga mamauno ana inta rai nora, yara anakotaro rui vayave wadantotobe, syare wapo raura to no Amisy ai wapa sambaya rai. Wapo wapa bekedaije ranajo Ai, muno wapo kove raura seo Ai. ⁷ Wea umba Amisy apa kovo saumane mo wasanuga muno wapa ana wapo ratantona raeranande weye wabe intabove no Yesus Kristusa nui. Apa kovo saumane mammo Po raugaje manakoeve weti mo vatane wama ana wandatantona rakivan.

⁸ Maisyare wemai ti, sya arakove, syare anakotaro rui mi ngkov ti mamaisy wangkangkamambe rai omirati wapo ratantona tutir, no taiso: Ana tugae muno ana kovo ntiti, ana mamaisy muno ana ndandinit, muno ana manavan muno ana wamo raura titive—anakotaro syo ratodi umaso syare wapo ratantona tenambe. ⁹ Ananyao syo raugaje wasai ti wapo raugav, syare watavondi rai. Sya ayao wapo raraniv muno sya ana idave wapo raen to mbe ananuive indamu wapo anakotaro namije rave tavon. Maisyare wemaisy, indati Amisy apa kovo saumane no wasautan.

Paulus po kove raura anugano Pilipi mansai weye wo aeranande apa bekedaije rai

¹⁰ Ribe intabove Amisy Yesus ai ti inananibe rave, syo kove raura seo Ai weye weapamo wasaemeno rinai ti soamo wapo inaeranande sya bekedaije rai jakato. Tugae, weapo rinatantona nugoenta to, weramu varoro wapo rinaeranande meweno wasai. ¹¹ Syo sya bekedaijo mine so ratantona jeben, weye Amisy po rinanyao indamu inanayanambe no anakotaro rui vayave rai. ¹² Anakotare mewene mammo rinanto rai, muno anakotare mawese mammo rinanto rai tavon. Amisy apa bekere mammo mba dave rinai so, beker pare risyamo inanayanambe no anakotaro rui vayave rai. Weti arono marore nande rako, anaisy maweso rinai rako, inanayanambe vayave. Muno sya ananuge manui rako, sya ananuge mewen dako, weamo inanayanambe. ¹³ Anakotaro rui vayave inatawandi rai, weye Kristus wepirati po vambunine raunande rinai.

¹⁴ Weapa ana wapo rave rinai mammo ngko dave, weye weapo inaeranande risya siurije so rai. ¹⁵ Sya arakovo Pilipi, arono manasyinoe syo Ayao Kovo Yesus ravovo wasai umba syuje wapa propinsijo Makedonia raora indamu syoroto munijo kaijinta rai, wapo raenamo anugano Amisy kaijinta wo doiye raunande rinaije

jeben bayave, yara weabop. Tugae, wapa anugane obo mirati mo rinaeranande. ¹⁶ Arono rino no munijo Tesalonika rajioje, weapo sya bekedaije ranuture rinai to, muno wapo ranutu somamo ama susye intabo ramu yara jiruma nto mandeije rai. ¹⁷ Weramu ana wapo raunande rinai omirati ribekero rajie ramu, yara ana ribekero rai mammo Amisy po kove raugaje wasai weye wabekobeo rinai.

¹⁸ Sya anakotare mamai tenambe rinai, weye wapa ana wapo ranutu ti arakovo Epaproditus po raugave mammo po raunande rinai to. Weti soamo sya doiye, sya anaisy mammo mawes. Wapa ana wapo raude so mo Amisy aveti anayanambe, raurata irati anakotaro ranavane nsainy rameseo Aije rai. ¹⁹ Muno Amisy ibeaje ai indati Po wasaeranande tavon indamu ana inta meweno wasai jeben, yara mamai tenambe. Opirati apaura mine so rai tenambe, weti tugae rave Po kovo manakoe raunande wasai weye weapamo wabe intabove no Yesus Kristusa nui.

²⁰ Kangkamambe wama Injayo Amisy aija nuge nuganui! Amin.

Kovo Paulus po raura marane rai

²¹ Syo sya kove ranutugore Amisy apa kawasae wasai, wabe intabove no Yesus Kristusa nui. Wama arakovo utantuna rinatavone so wo kove ranutugo wasai tavon. ²² Amisy apa kawasae una tenambe no naiso wo kove ranutugore wasai. Muno arakovo wo anakere rajiar no Akarijo Titi Kaiser apa yavare rai wo kove raura wasai tavon.

²³ Wama Amisy Yesus Kristus apa kove no wasautan tenambe.

*Risy,
Paulus*

Nyovara Wao Paulus Po Ratoe Anugano Amisye Mai No KOLOSE

Paulus po kove raura

¹ Risyirati Paulus, risiyamo Yesus Kristus po inatutir indamu syo Apa Ayao Kove raura, mamaisyo Amisye apa bekere rai. Risye wama arakovo Timotiusa pe ririmo nyovara waowe so ratoe. ² Ririmo ranutugore Amisye apa kawasae wana no munijo Kolose wasai, wepirati wama arakovo wabe intabove tawan irati Kristus ai. Kove muno saumane no no wama Injayo Amisye no wasautan tenambe.

Paulus apa sambaya po kove raura seo Amisy ai

³ Arono rui vayave reambe sambayambe wasai, reamo kove raura seo Amisye ai, opirati wama Amisy Yesus Kristus apa Aja pije. ⁴ Reandaniv weapamo wapanave Yesus Kristus ai muno weamuiny irati Amisye apa kawasae mansai tenambe, ⁵ weye wasanaveano Amisye amen wepi po kove ratayao wasanyut no munijo ntiti. Apa kovo namije mammo wapo ranaun to arono manasyinoe vatane ude wo wasanyao Apa ayao tugae rai, omirati Ayao Kovo Kristus. ⁶ Soamo Ayao Kove so maneka manakoe no mine so rai tenambe, weti ama mane mammo vatane wanui wanave Kristus ai to, ti wo awa ana udave raveti ngko dave. Muno weapamo maisyare wemai tavon arono manasyinoe wapo Ayao Kove raraniv muno wapo Amisye apa kove raen tugaive. ⁷ Epaprasa opirati vatano pore po Ayao Kove ravovo wasai to. Opamo wama arakovo reansanuga no ai rave, reamanapatambe Kristus ai kava, muno opamo atawandi kobe indamu po anakero Kristus rajjaro wasai. ⁸ Epaprasa po raura kakavimbe reansai to pare wapa muinye manakoe, wemirati Anawayo Vambunine mo raugaje wasai.

⁹ Maisyare omaisy, arono manasyin reamo Epaprasa apa ayao po wasaura umaso ranaunoe ndea unumeso, reansambayambe wasai tutir. Reamo Amisye anajo indamu Po wasakarikuga raneka inda mbar, muno indamu Anawayo Vambunine mo ana ratantona ntiti raugasyo wasai, wirati wapo Amisye apa bekere raen. ¹⁰ Muno reansambayambe indamu anakotaro rui vayave wapo rave mammo mamaisyo Amisye apa bekere rai ti mo aveti anayanambe. Reamare wapo anakere kotaro kove rave tutir, muno wapo

Amisye aene ntepekane miridi nseo tavon. ¹¹ Reansambayambe Amisye ai indamu Po apa vambunino manakoe muno ntiti raugaje wasanuga rai, indamu weabambunin wasatawandi siurije rai. Wirati indamu wasatawandi siurije rai, wasanuga ranayanambe rautan. ¹² Reamare wapo kove raura seo wama Injayo Amisye ai, weye Wepirati po wasaveti wamamaisyo watavondi wapaura Apa kove rai, namirati Po ratayao Apa kawasae mansai no Apa munijo vare rai.* ¹³ Weye Amisye po wansaugavuje munijo kaumure raora to, wemirati Anakakai Akoe be akarive rai, umba Po wansaugave wansisa Apa munijo vare rai, wemirati Apa Kavoy Yesus be akarive rai. Amisye anuga no irati Apa Kavoy so ai, ¹⁴ Wepi po wansapaya irati Anakakai Akoe apa vambunine rai muno Po wama ayao kakai rapaya wansai vintabo.

Kristus opamo po Amisye amaisy

¹⁵ Amisye pamo vatane wo aeno mansamije rai jewen, weramu Apa Kavoy po aroron kakavimbe weye Po amaisy. Arono nuge so ranari rainyamo, Kristus opa no to, muno Opamo po anakotaro ranari tutudi rakivan vintabo, ¹⁶ weye Wepirati Amisye po atutir indamu Po anakotare ranari tenambe:† anakotaro mine so muno anakotaro munijo ntiti vintabo. Ana wamo raeno wansamije rai, Kristus po ranari; muno ana wamo raene jewen, Po ranari tavon: maisyare akarijo mine so muno akarijo naumo warae, muno naito Amisye muno vambunino akoe kotaro rui vayave. Anakotar tenambe mammo Kristus wepi po ranari, muno Po ranari taune Amarom. ¹⁷ Arono anakotare mana inta no rainy, Kristus opamo tapa no wusyin to, muno Wepi po anakotar tenambe rajjanande anem uga rai tutir. ¹⁸ Opamo be akarive Apa kawasae anugano Amisye mansai; onawamo Kristus anasine mije. Wepirati be anuive anugano Amisye mansai, muno Opi manasyin dave kovakato no wene ama uga rai, indamu Opamo titi anakotar tenambe rakivan.

* 1:12 Vare raurata irati kove rai, yara kaumure raurata irati kakaije rai. † 1:16 Ibrani 1:2; Yohanes 1:3

¹⁹ Amisye apa ana no ai vintabo ntairi tenambe Apa Kavó ai tavon, mamaisyo Apa bekere rai.

²⁰ Muno Amisye apa bekere mamo

Apa Kavó po saumane raugav arono kakai ti Apa mavu nsororop no inyo kapite rai,

wirati Po anakotar tenambe maugav wakare Amisye ai:

anakotaro ntuna no mine so muno anakotaro ntuna no munijo ntiti.

²¹ Sya arakove, wusyinoo weapamo wagwaravainyo Amisy ai muno wabe marovave Ai, weye wapa ana wapo ratantona muno wapa ana wapo rave mamo mamun dave. ²² Weramu soamo Amisye po wasaugav wapakare Ai to, weye Kristus be vatanbe, Po asinine raunande kakai indamu Amisye anuga nsaumano wasai. Wirati arono masyoto rijat, weapamo indati wasanuga ndandinit no Amisye amun muno ayao kakai meweno wasai. ²³ Maisyare omai ti, syare weapamo wana tawan no wapa anave rai, wasayai tindimuve rai. Vemo watundumu nora muno wapanderer usya marambe Ayao Kovo Yesus Kristus raora inya, yara wasanaveano Kristus amen tutir. Apa Ayao Kovo wapo ranaun to mamo vatane wo ravovo mine vone so rai tenambe to. Muno Amisye po risyi Paulus rinatutir indamu syo Ayao Kove so ravov tavon.

Paulus po anakere raijaro Amisye apa kawasae mansai

²⁴ Inanayanambe syo siurije ranawan indamu mo kove raugavo wasai. Weye Kristus apa siurijo apa kawasae mansamarom omamo nake inta ntamija nene indamu ritavondi syo ranawan. Weti inanasine so nsiuri rai indamu mo kove raugavo Kristus apa kawasae mansai, onawirati maurata taune anasine rai. ²⁵ Risyamo vatano Amisye po inatutir indamu syo Apa anakere raijaro Apa kawasae mansai. Apa anakero po raugaje rinai mamo syo Apa ayao ravovo tenambe irati vatano Yahudi jewene wasai. ²⁶ Ayao syo ravove so mamo ngkokaibe no Amisye anuga obo rai arono wusyinoo, ti ngkokaibeve nugoenta rave weti susyo mine so wantatukambe rai vintabo. Weramu soamo Amisye po apa bekero ngkokaibe so raroron kakavimbe Apa kawasae mansai. ²⁷ Amisye po rarorono mai pare Apa bekero ngkokaibe mo kovo manakoe raugavere vatano Yahudi jewene wasai. Muno Apa ana ngkokaibe mi som: Kristus tuna no wansanuga rai. Tugae! Kristus tuna no wansanuga rai, weaveti wandaen Apa kovo ngko dave no no munijo ntiti omamo wamaura rai tavon aje. ²⁸ Weti reamo Kristus avovo vatan

tenambe mansai muno reamo mansanyao mamaisyo Amisye apa ana datantona ntiti rai. Reamo ananyao raugaje vatan nantabo mansai indamu arono reamo maugavere no Amisye amun, indati onawamo mamai dave no Kristus nui. ²⁹ Wemi mbe-war syo Amisye apa anakere so raijaro panyoambe. Syo raijar mamaisyo vambunino Kristus po raugaje manakoeve rinai rarijati.

2

¹ Ribeker wapo raen syo Amisye apa anakere raijaro panyoambe, syo raijaro arakovo Kolose wasai muno arakovo una no munijo Laodikia mansai muno arakovo kaijinta nanawirati wo rinaen dainya nene mansai tenambe. ² Sya bekere mamo indamu wea tenambe wasanuga mbambunin muno wabe intabove wamuinyo wasai vambinibe. Muno ribeker indamu wananta Amisye apa bekero ngkokaibe rai, inda vemo wamamaundive rai nora. Apa ana ngkokaibe soamo raroron kakavimbe, opirati Kristus. ³ Weti Amisye apa ana po ratantona ntiti ntuna Kristus obo ai vintabo. ⁴ Ayao umaso mamo syo ratoe indamu vemo vatane wo wasanuga raugabe awa ayao manavane rai nora, weye wayao angkarive indamu wo wasaponae. ⁵ Risyamo rigwaravainyo wasai, weramu inanuga no wasai tutir. Muno inanayanambe weye syo ranaun weapamo wabe intabove muno wano tawan no wapa anave Kristus aije rai.

Wambe intabove Kristus ai, weamo Apa kovo wanyine ntuna tenambe wansai

⁶ Weapamo wapo raura wapare Yesus Kristus opamo Amisy, muno wapo augav siso wasanuga rai to. Maisyare omaisyamo syare weatavono Obo ai tutir. ⁷ Syare wano tawan no Kristus ai, maisyare inyo ama wantainye musyo rai wemaisy. Muno wasanuga ntubai mbambunin irati Ai. Syare wapa anave ntindimu ananyao tugae rai, wemirati vatane wo ranyao wasai to wem. Muno wapo kove raura akaseo Amisye ai tutir.

⁸ Wasyisyaube! Vemo vatane inta wo wasaponae irati mine so ama ananyao ntiti rai jinya! Ananyao umaso mamo ama ine meweno rai weye nori rati vatan bayave awa ana udatantona rai, muno nori rati awayo kakai ube akarive no mine so mansai. Yara mamaisyo Kristus apa ananyao raije jenen. Weti vemo ana pamponae mo wasanuga raugabe inya! ⁹ Amisye no irati Kristus anasine rai vintabo arono be vatanbe no mine so. ¹⁰ Weapamo wabe intabove Kristus ai, weti Po apa kove raugaje ti ntairi wasai. Kristus sopamo titi rave,

Po akarijo titi muno vambunino akoe no rui rui vayave mansakivan tenambe.

¹¹ Vatano Yahudi wo sunative awa vatano anya mansai indamu mbe rarorombe onawamo mato sisa kawasaeयो Yahudi mansai. Weramu weapamo vatano Yahudi nawirati weapa jewena, weti animaisye mi mbe rarorombe weapamo Kristus apa kawasae waino wasai? Weapa sunati omamo vatan bayave wo rave wasai jewen, yara weapa mirati Kristus po wasanasine ama mbekero kakai rapaya wasai to wem, omirati mbe rarorombe weapamo wabe intabove Ai. ¹² Arono wasaugasya kuvuni mana rai, omamo maisyare wakakai Kristus atavon muno wasantuna atavon no aipapo rai. Muno arono wasaugasya kuvunija wabe akasen, omamo maisyare wakovakato Kristus atavon. Wakovakato Kristus atavon weye wapanave wapare Amisyepi bambunin po aijaseo kovakato no wene ama uga rai.

¹³ Wusyinoe arono wapanave Kristus ai rainy, weapamo wapa ayao kakaije ntapekano wasai muno wasisa Amisyepi apa kawasae mansai jewen.* Arono naije weapamo wagwaravainyo Amisyepi ai, weti wamaisyare vatano ugwenen to mansamaisy. Weramu umba Amisyepi po wasaijasea wakovakato Kristus atavon, muno Po wapa ayao kakaije rapaya tenambe to. ¹⁴ Wan tenambe wamo Amisyepi apa ananyao rakanyoandi to, weti Amisyepi po mangke raugaje wasai omamo mamaisy. Weramu Po wama mangke rapaya wansai,† weye Kristus kakai inyo kapite rai indamu Po wama mangke umawe ranawan. ¹⁵ Arono Kristus kakaije inyo kapite rai, Po akarijo ukakainoanive naumo warae muno vambunino kakai una no rui rui vayave mapinde tenambe. Po awa vambunine raugaje mansaora muno Po maugavo arove indamu vatan tenambe wo mansaen awa vambunine raumandi to.

¹⁶ Sya arakove, vatane inta ubeker wo wasantitidi indamu watavondi vatano Yahudi awa koane rai tenambe. Weti wo wasaura tatugadi weye wapo anaisyepi raisy muno wapo mana ramanam, namirati ware ana raisyisyi. Muno wo wasaura tatugadi weye wapo awa one rarijate ramu arono wo masyoto akokoe ama one rave muno masyoto sisa embae wanyine ama one rave. Muno wo wasaura tatugadi weye wapo awa koano masyoto sambaya rarijate tavone ramu.☆ ¹⁷ Koano Yahudi namije mammo maisyare raname vayave ma, mbe rarorombe ana nande no masyoto rijat.

Weramu vatano nanawije wantatukambe anakotare umaso ama ine mammo Kristus napije. ¹⁸ Weti arono vatane wato wo wasaura tatugadi, vemo wapo mansaraniv inya! Wo vatane mansanyao indamu wo awa sambaya rave naito Amisyepi mansai. Muno manayanambe ube ponaipe ware onawamo vatano manuga mpaaje nawa. Weramu wangkarive, weye onawamo mansararin dave, ukangkamambe awa ana wo raene rai muno awa nikimarije rai. Mbeanimaibe mansararin dave rai?! Yara awa ananyao somamo vatano mine so awa ana wo ratantona vayave ma! ¹⁹ Wakoe! Vatano nanawije wo Kristus aija matuve jewen, muno wonae Wepi be akarive mansaiji. Weramu syo raura wasai: Kristus opamo aurata irati akari rai muno Apa kawasae wamamo wansaurata irati anasine rai. Weti maisyare muno wansakari mo wasanasine ama kotare raeranande tenambe muno mo rajaro intabove, maisyare wemai tavon ranivara Kristus be akarive wansai, weamo Po wansaijar wambe intabove indamu wantubai wambambunin, mamaisyepi Amisyepi apa bekere rai.

²⁰ Sya arakove, weapamo maisyare wakakai Kristus atavon, weti Po wasaugavuje anawayo kakaije wo mine so rajanande awa vambunine raora to. Soamo mine so amaura wasai jakatote ramu, weti wabeanimaibe wabeta mine so ama ananyao we rai jakato? ²¹ Mine so ama ananyao mare: “Vemo wapavakananto ana namije rai nora!”, “Vemo wapo anaisyepi wato rai nora!”, “Vemo wapantukamo ana namije rai nora!” ²² Anakotaro wo ranayo tenambe wato no tawane ramu. Maisyare arono wamo anaisyepi raisy, wandaunto raumandi kobe. Ananyao somamo vatane wo ranarijo awa ana udatantona obo rai umba wo raugaje, yara Amisyepi wepi po raugaje ma jewen. ²³ Vatano wanui wo ratantona ware ananyao umaso mammo ana ratantona ntiti no rai. Ware ranivara utavondi rai, wea indati manasine ama bekero ngkakainoanive raumandi kobe. Wo rakarae ware, “Ranivara wamo taune wansantitidi indamu wamo wama sambaya rarija dave, muno ranivara wansanuga mpaaje muno wamo taune wasanasine ransewabe mamaisyepi vatane wo wansanyao namije rai, wea indati wantavondi wansanasine ama bekero ngkakai rai jakatote ramu.” Weramu ananyao so mbea marudi, mo vatane manasine ama bekero ngkakainoanive

* **2:13** Ayao Yunani naiso mare, “Weapamo wabe sunative jewen,” ama ine mare, “Weapamo wasisa Amisyepi apa kawasae mansai jewen.” † **2:14** Ayao Yunani no naiso mo ratote mare, “nyovara wao mo wama ayao kakai ratodi mammo Po raupaisy.” ☆ **2:16** Roma 14:1-6; Galatia 4:10

ransopi kakai.

3

Kristus po wansanuga ranigwan ngg-wanyin to

¹ Amisyere po wansajisea wangkovakato Kristus atavon to. Maisyare omai ti, kove mamu wambekero anakotaro munijo ntiti obo rai, wemirati Kristus tuna no Amisyere anem ngkove rai ti be akarive Amisyere atavon. ² Syare wamo anakotaro munijo ntiti ratantona tutir, yara vemo wamo anakotaro mine vone so ratantona tutir inya, ³ weye wamamo maisyere wangkakai Kristus atavon to. Munu wama kovo wanyine mamu watano mine so wo raen kakavimbe jeben, weye wama kovo wanyine ntami no Kristus ai, wepirati tuna Injayo Amisyere atavon no munijo ntiti. ⁴ Wama kovo wanyine somamo nori rati Kristus ai. Munu arono pakare akato no mine vone so rai, indati wan tavon wano ariyat ti wantavondi Apa kovo ntiti rai.

⁵ Sya arakove, weapamo maisyere wakakai Kristus atavon to, weti wasanasine ama bekero ngkakainoanive mamu wapo rapaya ra ntami, maisyere so: wapa ayao kakai nggwambe wasai, anaerere ugavo wasariyat, wasanuga ntento wanya wanui mansai, munu wasanuga ntento ananuge rai. Ranivara wasanuga ntento ananuge rai, omamo mamaisyo wabeaje yare rai ramaisy. ⁶ Anakotaro ratodi umaso mbewar ti Amisyere apa pari mangke indati Po raugaje watano ubeta Ai jebene mansai. ⁷ Weapamo wapo anakotare umaso raewe no wusyinoe arono watavondi mine so ama bekere rai. ⁸ Weramu soamo syare wapo anakotaro ngkakainoanive ramauta wasaora tenambe, maisyere so: Vemo waparira nora, vemo wasanuga mamun nora munu wapo watane makekebe nora. Vemo wapo watano kai maura tantunawi nora, munu wapo ayao nggwambe raura nora. ⁹ Vemo wapo wasaponae vambinibe nora, weye wapa ana wadave arono wusyinoe mamu wapo rapayawa ntami to. ¹⁰ Soamo weapamo watano wagwanyin to, weye Amisyere po wasanuga ranigwan nggwanyin. Munu Amisyere, wepi po wasanari, Po wapa wagwanyine so ranari iridi sea tutir indamu weapamo wapo amaisy, wirati wapo aen tugaive. ¹¹ Amisyere apa kawasae wamamo inta mansamuinyo inta mansai ramu: Weti watano Yahudi nanawirati wanave mato siso Amisyere apa kawasae mansai, munu watano Yahudi jeben nanawirati wanave mato siso tavon. Munu watano sunative munu sunative jeben; watano ube sekorave munu ube

sekorave jeben; watano aro munu watano arove jeben. Inta sasye jeben, yara wansisa tenambe. Weye Kristus obo pirati titi, munu Opamo tuna no watano wanave Aije manuga rai tutudi.

¹² Sya arakove, Amisyere muinyo wasai rave munu Po wasatayao indamu weapamo Apa kawasae apaura wasai. Maisyere omai ti, syare weapamo maisyere so: Wasaemeno vatan tenambe mansai munu wabekobeo mai. Syare weapamo wasanuga mpaaje, wapa ayao nsauman, munu wasatawandi anakotaro ngkakai nande wasaije rai. ¹³ Arono rui weapamo inta nya arakove po kakaije rave nai, vemo mpariyo ai jinya. Yara nyo aneme rajar indamu isanuga nsauman, maisyere munu Amisyere Yesu po winya ayao kakaije rapaya nai wemaisy. ¹⁴ Munu mbe mobe mamu weamuinyo wasai vambinibe, weye muinye mirati mo wasanugan nande indamu wapa wabe intabove mamu mamai dave.

¹⁵ Syare kovo saumane no no Kristus mbe akarive wasanuga rai. Weye Amisyere po wasawain po wasanugan wabe intabove no Kristus ai, maisyere anasine intabo rai, wirati wasanuga nsaumano wasai vambinibe. Munu syare wapo kove raura seo Amisyere ai. ¹⁶ Munu wapo Kristus apa ayaowe raugasyo ntami tenambe wasanuga rai indamu wasaemen dai tutir. Syare Amisyere po wasakarikuga raneka inda mbar indamu wapo wasanyao vambinibe munu wapo wasanuga rajisea mbambunin. Munu wakino ransyerane rai: ansyerano mazmur, ansyerano ngkangkaman, munu ansyerano namirati Anawayo Vambunine mo raugaje wasai rai. Wakino wasanuga ntenami rautan, wapo kove raura seo Amisyere ai. ¹⁷ Munu wapa ayao rui wapo raura munu wapa anakotaro rui wapo rave, syare wapo rave mamaisyo Amisyere Yesu apa bekere rai. Munu wapo Apa tame veano wapa sambaya raokaisy arono wapo kove raura seo Injayo Amisyere ai.

Ananyao yavaruga raugaje

¹⁸ Ananyao raugaje wanya ubauname mansai no taiso: Wanya mbaunam, wimbeto nya anyai, weye wemirati mamaisyo Kristus apa bekere rai.* ¹⁹ Ananyao raugaje anyai ubauname mansai no taiso: Anyai wimbaunam, wimuiny irati nya wanya rai. Vemo nyayao soowabe rai nora munu nyo rave tatugadi nora, yara wimbekobeo rai tutir. ²⁰ Ananyao raugaje arikainye mansai no taiso: Arikainye, wimbeto nya vatan anui mansai anakotare rai tenambe. Weye wimbeto mai, weamo Amisyere anayanambe

* 3:18 Ephesus 5:21-33; 1 Petrus 3:1; Titus 2:5

nai. ²¹ Ananyao raugaje ajae mansai no taiso: Ajae, mbemo nyo nya arikainye mansimbe namandi awatan nora, weye wemirati mo maveti manuga njoramo nai ti wonae ubeta naiji.*

²² Ananyao raugaje vatano wanapatambe awa akari maije mai no taiso: Vatano nyanapatambe winy, syare wimbeto nya akari mine so ai apa anakere kotaro po raugaje nai rai. Ranivara nyo anakere rajjar arono nya akari po nanyanyut, yara arono puje, nyo nya anakere rapaya ntami, weamo mamaisye ramu. Vemo nyo apa kangkamambe nai rakani nora! Yara nyo anakere rajjaro nanuga kakuive rautan, weye Amisy Yesus pi nyo asyaniv. ²³ Anakotaro rui nyo rajjar, weamo nanuga ntenami nyo rajjar, maisyare Amisy Yesus taune pi nyanapatambe Ai, yara vatan bayave mai ma jeben. ²⁴ Nyo raenamo Amisy Yesus indati po nya anakero nyo rajjare ama ine raunande, omamo Po ratayao vatan tenambe nanawirati Apa arikainye waino maije mai. Weye Kristus wepirati nya Akari nyanapatambe Ai piye. ²⁵ Vatano are pirati po ayao kakaije rave, indati po ama mangke ranawan. Weye Amisy po vatane mansamamaribe ramu, yara Po vatane awa mangke rapatimu mamaisyo awa ana udave rarijati.

4

¹ Umba ananyao raugaje akato akarije mansai no taiso: Akari winy, syare nanuga ngkov irati nya vatano panapatambe naije ai, muno ana mamaisyo obo mi nyo rave ai. Weye naemen: taune winya Akari inta no tavon, Napi tuna no munijo ntiti.

Ananyao kaijinta raugaje

² Arakove, syare wapo sambaya rave Amisy ai tutir muno wapo kove raura seo Ai. Muno wasyisyaube, wapo wapa ana wadatantona raeranande arono wapo sambaya rave. ³ Syare wasambayambe reansai tavon indamu Amisy po varore raugaje reansai reamo Amisy apa ayaowe muno Apa bekero ngkokaibe no Kristus aije* raura kakavimbe. Syo ayao umaso ravove wemi mbewar inausiso makova tanoano makova rai. ⁴ Weti syare wasambayambe rinai indamu syo Ayao Kovo Kristus raura kakavimbe, maisyare muno Amisy beker pare syo raura.

⁵ Muno weapamo arono watantuna vatano wantatukambe Kristus aije matavon, syare wapo ratantona mavabe rati indamu wapa ana wapo rave mansai mamamo mamaisyo. Muno wapo varore

rakani indamu wapo ayao Amisy raura mansai. ⁶ Syare anakotaro rui wapo raura mai mamamo nanto mantukamo manuga rai muno mo kove raugavere mai. Muno ranivara wo ana inta ranajo wasai, syare wapo ratantona kobe indamu wapa ayao wapo rasakinavo mai mamamo mamaisyo.

Nyovara waowe ama maran muno kove raura

⁷ Arono Tikikus pore wasai, indati po sya anakotaro no rinai raura tenambe. Opamo atawandi ngko dave indamu po anakero Kristus rajjar, muno opamo sya arakovo inanuga no ai, reamanapatambe Kristus ai kava. ⁸ Soamo syo Tikikus so atutir pore wasai indamu wepo ririma anakotaro nande ririnsai ranau, muno indamu po wasanuga rajjasea mbambunin. ⁹ Muno arakovo Onesimus* indati tavondi Tikikus ai. Onesimus sopamo vatano nori rati wapa munijo Kolose inta piye. Opirati wama arakovo inanuga no ai muno opamo panave no tawan no Kristus ai. Indati wepe Tikikusa pe yo anakotaro nande ririnsaije raura wasai.

¹⁰ Aristarkus po kove ranutu wasai. Opirati soamo makova rinatavon no tanoano makova rai. Muno Markus, opirati Barnabas apa rijata, po kove ranutu wasai tavon. Syare wasaemen sya ayao syo ranutu umawe rai: ranivara Markus de wasai, syare wapo augave siso wapa yavar. ¹¹ Muno Yesus Yustus po kove ranutu tavon. Arakove mandei umaso nawamo vatano Yahudi wanave Kristus ai to nawa. Vatano Yahudi wanui wanave to, weramu mandeije so bo nawirati wo anakere rajjaro rinatavon. Awa anakero wo rajjare mo inanuga raveti ranayanambe. Risyewenawe reamo vatane mansanyao, reamo Amisy apa munijo be akarive rajje raura kakavimbe mai.

¹² Epapras po kove ranutu wasai tavon. Opamo vatano nori rati wapa munije inta piye, muno panapatambe Yesus Kristus ai. Opamo anuga ntenami be sambayambe wasai tutir, po Amisy anajo indamu wapa anave matu, wasanuga ntindimu Amisy ai, muno wapo Apa bekere raen dave indamu wabeta rai. ¹³ Risyo Epapras so aeno inami rai tugae: Opamo po anakere rajjaro panyoambe arakovo Kolose wasai, muno arakovo una no munijo Laodikia muno Irapolis mansai tavon. ¹⁴ Dokter Lukas, opirati reama arakovo reansanuga no ai, muno arakovo Demasa yo kove ranutugo wasai.

¹⁵ Syare wapo reama kove raura irati arakovo wanave Kristus ai no munijo

* 3:21 Epesus 6:1-4 * 4:3 Amisy apa bekero ngkokaibe no taiso: Po kovo no no Kristus raugaje vatano Yahudi jewene mansai tavon (Kolose 1:26-27, 2:2). * 4:9 Pilemon 1:10-20

Laodikia mansai, muno wapo kove raura tavon irati arakovo Nimpa muno anugano Amisy usambayambe no ama yavare rai mansai tutudi. ¹⁶ Syare nyovara waowe somamo wapo bacave rai no anugano Kolose wasamun. Arono wapo raena jewen, umba wapo ranutugo anugano Laodikia mansai indamu wo bacave rai tavon. Umba sya nyovara wao kajinta namirati syo ratoe anugano Laodikia mansai mammo syare wapo bacave rai tavon. ¹⁷ Muno wapo raura tavono Arkipus ai indamu po anakero Amisy po raugaje aije raija tenambe ra mewen.

¹⁸ *Risyirati Paulus, taune inaneme veano nyovara wao ama marane so ratoe: syo kove raura wasai.* Syare vemo wasanimari nora: risyamo ta rimakovana nene, weti syare wasambayambe rinai.

Amisy apa kove no wasautan tenambe.

*Risy,
Paulus*

Nyovara Wao Manasyin Paulus Po Ratoe Anugano Amisye Mai No Tesalonika 1 TESALONIKA

Ayao manasyin

¹ Risyrati Paulus, umba Silas* muno Timotius javondi tavon. Reamo nyovara waowe so ratoe, reamo ranutugo anugano Amisy wana no munijo Tesalonika wasai, weapamo kawasaeyo watawondijo Injajo Amisye ai muno Amisy Yesus Kristus ai. Reamare kove muno saumane no no Amisye no wasautan tenambe.

Tesalonika wanave no tawan no Amisy ai weti Paulus po kove raura seo Ai

² Reansambayambe wasai tenambe muno reamo kove raura seo Amisye aijo wasai tutir. ³ Arono reamo sambaya rave Injajo Amisye ai, reamo weasatantona weye wapa ana wadaveye ngko dave weye wapanave Yesus ai, muno wapo anakere rajaro panyoambe weye wamuinyo Ai, muno wasatawandi kobe weye wasanaveano wama Amisy Yesus Kristus amen.

⁴ Reama arakove weap, reandaen Amisye apa muinye manakoeyo wasai muno Po wasapatimu indamu wasisa Apa kawasae matavon. ⁵ Arono wusyin reamo Ayao Kovo Yesus raugaje wasaijoe, reamo raura vayave ramu, yara Anawayo Vambunine mo ama vambunine raroron tavon. Ayao Kove umaso mamoreamanave tindimuve rai, reamare omamo ayao tugae mijem. Muno wapo reansaen arono reana no wapa yasyine rajoe, reama ana wandave ngko dave indamu ngkov irati wasai. ⁶ Arono naije watawondi reama ana wandave ti ngkove rai muno Amisy Yesus apa ana dave ti ngkove rai, wirati wapa ana wadave ngko dave tavon. Siurijo manakoe nande wasai to, weramu wapo Ayao Kove umawe raugav nsiso wasanuga rai, wasanayanambe rautan. Anawayo Vambunine mi mo anayanambe raugavo wasanuga rai. ⁷ Maisyare omai ti, weapamo wabe unanuive vatano wanave Yesus ai nanawirati una no propinsijo Makedonia muno Akaya mansai tenambe indamu utavondi wapa ana wapo rave rai. ⁸ Soamo Amisy Yesus apa Ayao Kovo wapo ravov miridije nto no munijo Makedonia muno Akaya obo yaije ramu, yara mine vone so rui rui vayave vatane wo wapa anaveo Amisye aije ranaun to. Weti reamo wapa

anave raura irati mai jeben kai, ⁹ weye vatane umaso taune wo raura irati reansai. Wo raura ware wapo reama ayao raugav nsiso wasanuga rai to, muno wapo wapa yaro wabeaje rajie rapaya ntuna, yara wasakinav indamu wabeaje Amisyo tugae obo ai, Opamo noa pitawabe. ¹⁰ Muno ware wapo Apa Kavo no no munijo ntiti anyuta pakare no mine vone so rai. Wepirati Yesus, opi kakai yara Amisye po aveti kovakato no wene rai. Muno Yesus umaso pi po wansapaya irati Amisye apa pariyo makare akatoe rai, wemi Po raugaje vatane mansai weye wo ayao kakaije rave.

2

Paulus apa anakero daija no Tesalonika

¹ Reama arakove, wadaen reande wasai ra reamo Ayao Kovo Yesus ravova marudi jeben, yara ama ine raen no wasai. ² Wasaemen arono reamana wande wasai rainyamo, vatano una no munijo Pilipi wo reansave tatugadi muno wo reansauro tantunawi. Muno arono reande no wapa munijo we, vatan inta wo reansaurai mangkebe. Weramu reamo masyanive ramu, yara Amisye po vambunine raugaje reansai ti reamo Apa Ayao Kove raura wasai to.*

³ Arono reamo wasawain indamu watawondi ayao umaso rai, reama bekere mamorengkakainoanive jeben muno reamo wasaponae ramu. ⁴ Weye reamirati Amisye panave reansai indamu reamo Apa Ayao Kove ravov. Weti reama bekere mamore vatane manayanambe reansai ma jeben, yara indamu Amisye pirati anayanambe reansai. Weye Opirati po vatane manuga ngkove ndako ngkove jeben ndako raen tenambe. ⁵ Weti reangkangkamambe vatane inta wasaije ramu, yara wadaen reamo ayao mamaisya obo raura wasai. Muno reamo wasaponae inda wapo romane raunande reansai omamo jeben tavon. Amisye pi po reama ana wandave umaso raen tugae. ⁶ Reambeker wamare indamu wea dako kaijinta nao rako wakangkamambe reansai omamo jeben. Weramu ranivara reamo doiye, anaisye ranajo wasai weratire ma, reandanajo kai weye Kristus apa arakovo Po reansatutir reamije. Weramu naiso reamo wasanajo rai jeben kai, weye reamonayo mangkeo wasaiji. ⁷ Yara reama ana reandaveye nsauman dave no wapa yasyine rai, maisyare muno wanya inta mo ama arikainye maerandande wemaisy. ⁸ Reansaemeno wasai rave weti reamo Ayao Kovo Amisy obo raugaje wasaije

* 1:1 Silas apa tame rawain tavonamo Silvanus. ✧ 2:2 Arakov 16:19-24, 17:1-9

ramu, yara reamo taune reansanuga ruanande wasai tavon, weye reama muinye manakoeyo wasai ti! ⁹ Arakove weap, wasaemen arono reamo Ayao Kovo Amisy umaso raura wasaijoe, reamo anakero kaijinta raijaro taune reansaneme rai tavon. Reamo anakere raijaro panyoambe namane rinit indamu reamo reama anaisy ravae, weti mangkeo vatan inta wasaije ramu.

¹⁰ Arono reana no vatano wapanave Amisy Yesus aije wapa yasyinoe, reansanuga mamongo ngkakavin muno reama ana wandaveye mamongo ngko tenambe, yara inta ngkakainoanive ramu, indamu vemo vatane wo reansaura tatugadi nora. Wapo ana umaso raen tugae muno Amisy daen tavon. ¹¹ Wapo raen tavon reamo wasanyao maisyare muno ajae inta po ananyaowe raugajeo apa arikainye mai we ramaisy. ¹² Maisyare omaisy, reamo anyayao raugaje wasai tutir indamu wapa ana wadave ngkov bintabo ti mo Amisy anuga raveti ranayanambe. Wepi po wasawain indamu wasisa Apa kovo ntitije rai no Apa munijo be akarive raije rai.

¹³ Reamo kove raura seo Amisy ai tutir weye arono reamo ayao Amisy raugaje wasaijoe, wapo ranaun muno wapo raugav nsiso wasanuga rai. Wapo ratantona wapare ayao umaso mamongo ayao vatan bayave wema jewen, yara ayao tugae de no Amisy aije ma. Amisy apa ayao umaso mo vambunine raugaje vatano wapanave Aije wasanuga rai.

¹⁴ Reama arakove weap, ana nande wasai mamongo maisyare ana nande anugano Amisy una no Yudea mansaije ramaisy. Weye vatano una no taune wapa munije rai wo wasave tatugadi ti wasiuri, maisyare muno vatano Yahudi wo anugano Amisy una no Yudea mansave tatugadije wemaisy. ¹⁵ Vatano Yahudi umaso wo Amisy Yesus aubai to, wo Amisy apa anawae wusyine maubai to, muno wo reansave tatugadi tavon.* Ube marovave vatan tenambe mansai ti Amisy pariyo mai rave! ¹⁶ Ware wo reansansopi indamu vemo reamo Apa ayao raura nanto vatano Yahudije jewene mansai nora, weaveti Amisy po mapaya ayao kakaije rai jinta. Maisyare omai ti, vatano Yahudi wato wo awa ayao kakaije ratutembe ti manui rave. Soamo Amisy apa pariyo majo mansai kobe.

Paulus beke dave pare po vatano Tesalonika mansaen akato

¹⁷ Reama arakove weap, reamamongo reansaemeno wasai rave. Soamo reangwaravainyo wasai vavai, yara reansanuga mamongo mararaijo wasai tutir. Reama bekere

manakoe indamu reamo wasaen akato. ¹⁸ Reamaya dave reamo wasapan, muno risyirati Paulus ibeker tutir indamu syore syo wasapan. Weramu Anakakai Akoe po reansansopi.

¹⁹ Weapi bewar reansanayanambe, weye watawondi Amisy Yesus ai tutir mamaisy reamo wasanyaowe rai. Muno weapi bewar reansanave ramene mamongo arono wama Amisy Yesus pakare no mine vone so muno wansayai no Amun, indati reansanayanambe weye reama anakero no no wapa yasyine ama ine raen no wasai. ²⁰ Tugae, weapi bewar reansanuga ranayanambe rave muno manakoeyo wasai.

3

Paulus po Timotius atutir to po vatano Tesalonika mapan

¹ Reama bekere manakoe indamu reamo wasaen akato, ti reansatawandi rai jakato kakai. Weti reamo rapatimu to reamare koveamo reamo arakove inta atutir pore po wasapan, wepirati Timotius. Yara Silasa perisyeririna munuimbe no munijo Atena so rai. ² Timotius opamo wama arakovo tavondi ririnsai reamo Amisy apa anakere raijar indamu reamo Ayao Kovo Yesus Kristus ravov. Weti reamo Timotius atutir de wasai to indamu po wasanyao ramu wapa anave ntindimu. ³ Indamu vemo wapa siurije mo vatane inta wapa anave raveti mamaun inta. Wasiuri weye vatane wo arare veano wasave muno wo wasave tatugadi, weramu wapo raen siurije nande vatan tenambe wanave Yesus aije mai. ⁴ Omamo reamo raura wasai tutir arono reame wana tenambeowe reamare, "Indati vatane wo wasave tatugadi." Muno wapo raen soamo nande wasai to. ⁵ Maisyare omai ti, syo wasantotobe rave, ti syo Timotius atutir de wasai to indamu po wapa anave raen: mbambunina nene rako? Syo wasantotobe weye vemo Anakakai Akoe po wasaponae ti wasakirive Amisy Yesus aije inta, weaveti reama anyayao reamo raugaje wasaije mbea marudi jinta.

⁶ Soamo Timotius po wasapana pakare to, po wapa anakotar wadave ratodi ririnsai. Weti reansanayanambe weye po raura pare wapa anave Yesus aije mamongo mbambunin muno wapa muinyo wapo rarorono vatane mansai mamongo manakoe. Pare wasaemeno reansai tutir muno wapa bekero wapare wapo reansaen akato manakoe, maisyare muno reama bekere manakoe tavon indamu reamo wasaen akato. ⁷ Reama arakove, weapamongo wapo reansayove reama siuriyo uma nande reansai so rai.

* 2:15 Arakov 17:5-10

Vatane wo arare veano reansave, weramu reansanuga mbambunin weye reandaniv wapa anave ntindimu.⁸ Tugae, reansanuga mbambunin weye wano tawan no Amisy ai.⁹ Maisyare omai ti, reamo kove raura seo Amisy aijo wasai tutir; reansanayanambe wasai no Amun.¹⁰ Namane rinit reamo Amisy anajo tutir indamu reamo wasaen akato. Indamu ranivara wapa anave inta mamai dainy, weamo reamare wamo wasanyaowa mamai kobe.

¹¹ Reansambayambe wama Injayo Amisy ai muno wama Amisy Yesus ai indamu unanuije raneka reansai ramu reamore wasai.¹² Reansambayambe Amisy ai indamu wapa muinye miridi nseowa manakoe ti wabekobeo wasai vambinibe muno vatano kaije mansai tenambe tavon, maisyare muno reambekobeo wasaije wemaisy.¹³ Muno reansambayambe indamu Amisy po vambunine raugaje wasanuga rai ti wabambunin indamu vemo ana ngkakainoanive inta raen no wasai nora, yara wasanuga ngkakavin bintabo no wama Injayo Amisy amun arono indati Amisy Yesus pakare Apa kawasae mautan tenambe.

4

Ana wandave ramu Amisy anayanambe wansai

¹ Reama arakove weap, wusyinoe reamo unanuije rarorono wasai indamu wapa ana wadaveye ngko dave, mo Amisy aveti anayanambe. Tugae, wapa ana wadave maisyare omai to, weramu soamo reambeker wapo ravera miridi nseo.² Wapo reama ananyao raen to, wemirati reamo raugaje wasai mamaisy vambunino Amisy Yesus po raunande reansaije rai.³ Somamo Amisy apa beker mi som: beker indamu wasanuga ngkakavimbe, weti vemo wapo anaerere inta rave nora.⁴ Muno anya nanentabo po apa ana dave ti ngkov irati apa anamu raije bo raen indamu mamai no Amisy amun muno mamai no vatane mansamun.⁵ Muno vemo watavondi wapa beker anasine rai maisyare vatano wantukambe Amisy ai wo rave wemai nora.⁶ Vemo vatan inta po apa arakovo panave Amisy Yesus aije aponae mo nikijo apa anamu rarijat inya. Vemo po apa arakova ave tatugadijare wemaisy inya! Amisy indati po mangke raugaje vatano wo rave mai, maisyare reamo raura wasai to wemaisy.⁷ Arono Amisy po wansawain ti wande Ai, beker pare wama ana wandave ngkakavin, yara vemo anaerere ugavo wansai nora.⁸ Are pirati ponayo ananyaowe so rai, opamo ponayo Amisy ai. Weye ananyaowe somamo

vatane awa ma jewena, yara Amisy apa ma, Wepi po Anawayo Vambunine raugaje wasai.

⁹ Arakove, ananyao wabekobeo wapa arakovo wanave maije omamo reamo wasanyao rai jakato jewan kai, weye Amisy taune pi po wasanyao rai to.¹⁰ Tugae, wapo muinye rarorono wapa arakovo wanave Yesus aije mansai no propinsijo Makedonia raita tenambe to. Weramu, arakove, reamare wapa muinye umaso ravera merere nseo.¹¹ Koveamo wapa bekere mi som: wasanuga nsaumano vatane mansai tenambe, yara vemo wapo taname raon nanto vatano kaijinta awa ayaowe rai nora. Wapo taune wapa anakotare raeranande muno wapo anakere raijar inda wapo wapa anaisy rakani, maisyao reama ananyao reamo raura wasai to we rai.¹² Wapa ana wapo rave maisyare wemaisy, wea indati wapa bekedaije mamo wasaroro vatano kai mansai ramu. Muno indati vatano wantatukambe Yesus Kristus aije wo wasaura titive.

Arono Yesus pakare no mine vone so

¹³ Reama arakove weap, reambeker wapo raen ana indati nande vatano ugwenen mansai. Are pirati kakai no wapa yasyin opamo vemo wasaemembe aijare vatano kaijo wanave Amisy Yesus ai jewan mansamai nora. Weye vatano kaije nawamo mansanave Amisy amene mamo meweno mai ti wo kovo makare akato umu ranyute ramu.¹⁴ Wamanave wamare Yesus opamo kakai to muno kovakato to. Weti wamanave wamare Amisy indati po vatano nanawirati wanave Yesus ai yara ugwenen to mavera ukovakato tavon indamu wenanawe Yesusa pe una tenambe.¹⁵ Reamare reamo Amisy Yesus taune apa ananyaowe raura irati wasai no taiso: Arono pakare no mine vone so, indati vatano ta wangkova nene wamamo wamare wansea wananta Yesus ai, weramu wamo vatano ugwenen to mansakivane jewan. Onawirati wuisy umba wandijat.¹⁶ Arono naije Amisy apa naito titi inta de gwain akoeve, muno tavuna Amisy ngkin. Indati Amisy Yesus no no munijo ntititi paje, umba Amisy po vatano wanave Ai yara ugwenen to we mawainde ukovakato, umba wenanawe Yesusa pe wanunugambe tenambe.¹⁷ Naijea jewan, umba Po vatano wangkova nene wansanugan vatano ukovakato no wene rai umawe matavon, Po wansaijasea no kamuro kakavine warae indamu wame Amisy Yesusa pe wamanugan tenambe. Weti indati wantantuna atavona nuge nuganui.¹⁸ Weti reamare weapo ayao umaso veano wasataaan vambinibe indamu wabambunin.

5

Wapanatatayaube indamu wapo Yesus apa pakare ranyut

¹ Reama arakove weap, Amisy Yesus apa pakare mamu ama masyote muno ama uma amije mamu reamo ratoe wasai jakato nora weye reamo wasanyao anakotare so rai to. ² Weye taune wapo raen Amisy Yesus apa masyoto pakare raije indati de papabe. Vatano panaonoambe inta pare de sisu yavare inta rai, weamo vatane wantukambe apa de raije rai. Amisy Yesus apa de raije maisyare wemai tavon: vatane wantukambe Apa masyoto de raije rai. ³ Arono naije vatano mine vone so wo raura ware, “Wangkovo saumane ama uga rai ti yanive mamu meweno wansaija.” Weramu kavuratawe Amisy apa pariye nande mai ti awa siurije manakoe, maisyare wanya inta njorama nsiuri ama arikainye autan wemaisy. Umba vatano mine so onawamo unajivo Amisy apa mangke raora kakai.

⁴⁻⁵ Weramu, arakove, weapamo wapaparo wasaije jewen arono Yesus apa masyoto de raije nande, weye weapamo vatano wano no varo masyote yasyine rai, weye Yesus apaura wasai. Vatano panaonoambe de no namano kaumure rai ti vatane upaparo mai. Weramu wamamo wano irati namane yasyine raije ramu, weti arono Yesus apa masyoto de raije nande, indati wampaparo wansaije jewen.* ⁶ Maisyare omai ti, vemo wanaki mariraave inya, maisyare vatano kaijinta mansamaisy inya, weye wo Amisy Yesus apa de raije ranyute jewen. Weramu wansisyaube muno wamanatatayaube. ⁷ Are pirati pare niki, opamo niki no namane yasyin. Are pirati maeno awije rai, opamo maeno namane yasyin. ⁸ Weramu wamamo wano no varo masyote yasyine rai, weti wamanatatayaube. Maisyare naije po apa ansuno marova rave muno po apa anaiyu raijar,✱ maisyare omai tavon wapo wama anave muno muinye raijar matuve, muno wansanaveano Amisy amen Wepi indati po wama ayao kakaije rapaya wansai. ⁹ Weye Amisy ponae po apa pari mangke raugaje wansaiji, yara Po wansatayao indamu wama Amisy Yesus Kristus po wansapaya irati kakaije rai. ¹⁰ Yesus kakaije wansai indamu wantantuna atavona nuge nuganui. Weti ta wangkova nene rako, wamuenen to rako, arono Yesus pakare, weamo wantantuna atavon. ¹¹ Maisyare omai ti, reamare wapo wasanyao vambinibe indamu wapa anave Amisy aije mbambunin, maisyare muno soamo wapo rave wemaisy.

Ananyao raugaje vatano wanave Yesus aije wansai

¹² Arakove weap, reambeker indamu wabeaje vatano wo anakero Amisy raijar no wapa yasyine mai. Onanawamo ube akarive wasai muno wo wasanyao indamu watavondi Amisy ai. ¹³ Reamare wabeaje mai muno wabekobeo mai weye wo Amisy apa anakere raijar no wapa yasyine rai. Muno wasanuga nsaumano wasai vambinibe tavon.

¹⁴ Arakove, reama ananyao no taiso: Are nawirati wononae wo anakere raijari, onawamo wapo manyao indamu wo anakere raijar. Are nawirati ujaniv, onawamo wapo maugav indamu manuga mbambunin. Are nawirati mayondi, onawamo wapo maeranande. Muno wasatawandi vatan tenambe mai arono awa ana udave mamai dainy. ¹⁵ Arono vatan inta po wasave tatugadi, vemo wasakinav akato wapo ave tatugadi jinya. Yara reamare wabekobeo wasai vambinibe muno wabekobeo vatano kaijinta mansai tavon.

¹⁶ Reamare wasananibe tutir. ¹⁷ Wapo sambaya rave Amisy ai tutir. ¹⁸ Muno anakotaro rui yayave nande wasai, wapo kove raura seo Ai, weye omirati Amisy beker indamu wapo rave weye wabe intabove Yesus Kristus ai. ¹⁹ Vemo wapo Anawayo Vambunine ama anakero no wasanuga raije ransopi jinya. ²⁰ Arono Amisy apa ayao nde vatane inta ai ti po raura wasai, wabemo wapo ayao umaso rawatambe inya. ²¹ Ranivara vatan inta pare Amisy apa ayao nde ai to, weamo wapo ayaowe wato ratantona mavabe rati: omamo ayao Amisy tugae rako jewena rako? Indati ana ngkove obo mirati watavondi rai. ²² Vemo wapo anakotaro kakai rui yayave inta rave inya.

Nyovara waowe ama maran

²³ Reamo Amisy, opi po kovo saumane raugaje, anajo indamu Po wasanuga ratayao da ngkakavin bintabo, muno Po wasaeranande indamu ayao kakai meweno wasai no wapa ana wadatantona rai muno wasanuga rai muno wasanase rai, weti ngkakavimbe tenambe arono wama Amisy Yesus Kristus pakare. ²⁴ Amisy wepi po wasawain indamu watavondi Ai, weti indati Po anakotare umaso rave aije, weti Opamo po apa urairije raveti mamaisy.

²⁵ Arakove, reamare wabe sambayambe reansai. ²⁶ Wapo reama kove raura wama arakove mansai tenambe no wato. ²⁷ Amisy apa vambunin no rinai ti syo raura wasai indamu wabacave nyovara waowe so rai no arakovo wanave Yesus aije

* 5:4-5 Varo masyote yasyine raurata irati kove rai, yara namano kaumure raurata irati ayao kakaije rai. ✱ 5:8

mansamun tenambe, ²⁸Wama Amisy Yesus
Kristus apa kove no wasautan.

*Risy,
Paulus*

Nyovara Wao Jirum Paulus Po Ratoo Anugano Amisyete Mai No Tesalonika 2 TESALONIKA

Ayao manasyin

¹ Risyirati Paulus, umba Silas* muno Timotius javondi tavon. Reamo nyovara waowe so ratoo, reamo ranutugo anugano Amisy wana no munijo Tesalonika wasai, weapamo kawasaeyo watavondijo wama Injayo Amisyete ai muno Amisyete Yesu Kristus ai. ² Reamare kove muno saumane no no Injayo Amisy muno Amisyete Yesu Kristus no wasautan tenambe.

Paulusa pe usambayambe vatano Tesalonika mai tutir

³ Reama arakove, reamo kove raura seo Amisyete aijo wasai tutir. Reansambayambeare so mamaisy weye weapamo wapa anave miridi nseo muno wabekobe wasai vambinibe miridi nseo tavon. ⁴ Vatane wo wasave tatugadi ti wapa siurije manakoe, weramu wasatawandi rai tutir muno wapanaave tawan no Yesu ai. Wemi mbewar arono reansisa anugano Amisyete rai janyi, wapa kovo reangkangkamambe wasai wemi reandaura tutir.

Masyoto Amisyete Yesu pakare no mine vone so rai

⁵ Anakotare umaso mo raroron kakavimbe: Amisyete apa ana po rapatimuge mamama dave. Weye wapa anave Ai wemi mbewar ti siurije nande wasai, Amisyete po wasaen ti pare weapamo wamamaisyo wasisa Apa munijo be akarive raije rai. ⁶ Amisyete apa ana po rave mamama tenambe, weti indati Po siurije rasakinav akananto vatano wo wasaveti wasiurije mansai. ⁷ Muno Po siurije rapaya wasai, muno reansai tavon. Oma nande no arono Amisyete Yesu no no munijo nti paje no mine vone so, Po anasine raroron kakavimbe. De irati Apa naito vambunine mansautan. ⁸ Muno de irati tanamo mbadurure rautan indamu Po mangke raugajeo vatano wantukambe Amisyete aije mansai muno vatano ubeta irati wama Amisyete Yesu apa Ayao Kove raije jewene mansai tavon. ⁹ Indati Amisyete Yesu po mangkeo nuge nuanuije raugaje mansai, Po maeparusya marambe indamu ugwaravainyo taune Ai muno Apa vambunino nti raije rai. ¹⁰ Oma nande no masyoto Amisyete Yesu pakare akato no mine vone so. Pakare indamu Apa kawasaeyo manuga

ndandinit wo ararimbe muno ukangkamambe Ai —vatan tenambe nanawirati wanave Ai to. Indati weapamo wasisa vatane umaso awa yasyine rai tavon weye wapanaave ayao reamo raura wasaije rai to.

¹¹ Maisyare omai ti, reansambayambe wasai tutir. Reamo Amisyete anajo indamu Po wasaen ti pare weapamo wamamaisyo watavondi Apa waine rai. Muno reansambayambe indamu Po vambunine raunande indamu wapa bekeri wapo ana ngkove rarijat muno wapa anakero rui yayave wapo raijar weye wapanaave Amisyete ai, omamo Po ravera nande mamaisy. ¹² Reansambayambe tai maisy indamu wapo Amisyete Yesu aijaseo titive muno Yesu po wasaijasea titive tavon, mamaisyo kovo no no wama Injayo Amisyete muno Amisyete Yesu Kristus rai.

2

Arono Kristus pakare mararai to, indati ana pamponae Anakakai Akoe masyo vatane mansai

¹ Arakove, reamare reamo wasanyao irati anakotaro nande arono wama Amisyete Yesu Kristus pakare rai, arono indati Po wansanugan wame Wepe wano tenambe. ² Reamare wasyisyauwe weye vatan inta ubeker wo wasaponae ware Yesu apa masyoto pakare raije nde to. Wabemo wapanaave mai jinta! Wo raura ware Apa de to mamama Anawayo Vambunine mo raroron mai rako, ayao inta mo raura rako. Indako inta ware reama nyovara wao inta mo ratoo rako? Awa ayao mamaisyete ramu, weti vemo wasanuga nseo majeve muno wapananepabe rai nora. ³⁻⁴ Vemo vatane inta po wasaponae inya. Weye arono masyoto Amisyete Yesu pakare rainyamo, indati anakotare so nande wusyimbe no taizo: Vatane wanui indati usakangkinav ti makirive Amisyete ai. Muno vatane inta apa tame mi Akarijo Mamun indati po anasine raroron irati vatano wanui mansai. Opamo marovave Amisyete ai, muno po taune aijaseo titive anakotaro rui yayave vatane usambayambe raije rakivan. Opamo ararin dave ti siso tuna Yavaro Amisyete ama uga rai pare, “Risyirati Amisyete pi risy.” Weramu Akarijo Mamun wato pamo Amisyete pare Po amaugo tanamo mbadururo nuge nuanuije rai.

⁵ Arakove, syare wasaemen arono risyete wana tenambeowe, syo Akarijo Mamun umaso aura kakavimbe wasai to. ⁶ Muno wapo raen animaisyete mirati mo apa deye

* 1:1 Silas apa tame rawain tavonamo Silvanus.

ransopi.* Apa masyote deye mamu ma-maisyo Amisy apa bekere obo rai, wea indati Akarijo Mamun wato de po anasine rarorono vatane mai. ⁷ Naisoamo apa vambunino ngkakai nsiso maninimbe mine so rai to, weramu ana inta mo ansopi ti po anasine rarorono kakavimbe rainy. Arono indati ana mo ansopije umaso mamu Amisy po rapaya ai, ⁸ wea indati Akarijo Mamun umaso po anasine rarorono kakavimbe. Weramu arono Amisy Yesu pakare irati Apa varo kovo ntiti rautan, indati Po anawayoe veano Akarijo Mamun umaso amaisy indamu Po aubaisy.

⁹ Akarijo Mamun opamo de irati Anakakai Akoe apa vambunine rautan. Weti po ananame inta rarorono muno po anaporainye kotaro rui vayave veano vatane maponae. ¹⁰ Muno po anakotaro kakainoanive rui vayave veano vatane maponae. Vatane umaso wenawirati weno nuge nuganuije nde mai weye wonae wanave ayao tugae rai, wemirati mo vatane mansapaya kakaije rai. ¹¹ Maisyare omai ti, Amisy po mapaya ti wanave ayao aruriate bo rai. ¹² Indati Po mangke raugaje mai weye wanave Apa ayao tugae raije jewan yara mananibe awa ayao kakaije bo rai.

Ananyao indamu wansanuga mbambunin

¹³ Reama arakove, weapamo Amisy apa muinye manakoeyo wasai, weti reamo kove raura seo Ai tutir, weye arono manasyin dave Po wasapatimu indamu Po wasapaya irati wapa ayao kakaije ama mangke rai. Po wasapaya kakaije rai weye wapanave ayao tugae rai muno Anawayo Vambunine mo wasanuga raveti ngkakavimbe. ¹⁴ Arono reamo Ayao Kovo Yesu raugaje wasai, Amisy po wasawain wade irati Ai, indamu wasisa wapave irati wama Amisy Yesu Kristus apa kovo ntiti rai. ¹⁵ Weti, arakove, reamare wano tawan no Amisy ai. Muno ananyao reandaura wasaije muno ananyao reamo ratoeyo nyovara waowe rai, omamo wapo raijar matuve tavon.

¹⁶ Amisy po muinye rarorono wansai to muno Apa kove manakoe ti Po vambunine raugaje indamu wansanuga mbambunin no tawan muno wansanave Amen tutir. Wemi mbewar reamo sambaya rave wama Amisy Yesu Kristus ai muno wama Injayo Amisy ai, ¹⁷ reamo ranajo indamu Amisy po wasanuga raijasea mbambunin muno Po vambunine raugaje wasai indamu wapa ana wadave muno wapa ana wadaura mamu ngkov bintabo.

3

Paulusa pe ubeker ware vatano Tesalonika usambayambe mai

¹ Reama arakove weap, reamare wapo sambaya rave reansai tavon. Wasambayambe indamu ayao Amisy mavave maneka muno vatano wanui wo raugave nsiso manuga rai, maisyare muno wapo raugave nsiso arono wusyinoe. ² Muno wasambayambe indamu Amisy po reansapaya irati vatano mamun muno ukakainoanive mai, weye vatan inta wonae wanave ayao Amisy so raiji.

³ Amisy pamo no tawan no wansautan tenambe. Indati Po vambunine raugaje wasai ti wambunin muno Po wasavijuri jirati Anakakai Akoe ai. ⁴ Reandaen Amisy po wasaeranande, weti reamanave wasai weapamo watawondi ananyao reamo raugaje wasai rai no naiso muno miridinto. ⁵ Reamo sambaya rave indamu Amisy Yesu po wasaugav wananta Amisy apa muinye rai muno wasatawandi maisyare Yesu Kristus atawandi wemaisy.

Vemo vatan inta pononae po anakere raijari nora

⁶ Reama arakove, Amisy Yesu Kristus apa vambunine no reansai, ti reamo ananyao so raugaje wasai: wagwaravainyo arakovo wononae mansai, nanawirati wo awa anakere raijare ramu muno utawondi ananyao reamo raugaje wasai raije jewan. Vemo weape wenawe watantuna tenambe inya. ⁷ Reamo reamononae ramu arono reano no wapa yasyine raijoe, yara reamo anakere raijar tutir. Maisyare wemaisy reambe unanuive wasai, ti wadaen kove mamu watawondi reama ana reamo rave rai. ⁸ Namane rinit reamo anakere raijaro panyoambe indamu reamo doije inta ijaro reansai. Weye reamonayo mangke irati vatan inta wasai jinta. Weti wapa anaisyo wapo raunande reandaisy, wemamo reamo ravae. ⁹ Weramu ranivara reamare reamo wasanajo indamu wapo reansaeranande reama bekedaije rai weratire, weamo reamo ranajo kai. Weramu reamo ranajo wasai jewan, indamu reambe unanuive wasai indamu wapo wapa anakere raijar tavon. ¹⁰ Arono reano wasarijatae, reamo ananyao so raugaje wasai taiso: "Vatano ponae po anakere raijari, weamo vemo wapo anaisyere raunande po raisi inya."

¹¹ Reamo ananyao umaso raugaje wasai weye reamo ranaun ware arakove inta una no wapa yasyin wononae vayave. Wo

* 2:6 Anakotaro mo Akarijo Mamun ansopi omamo Ayao Amisy mo raura kakavimbe jewan. Omamo vatane inta dako, anawayo vambunin inta rako, anakotaro kaijinta rako, wamantatukambe rai, weramu somaida Paulus po raura kakavimbe vatano Tesalonika mansai wusyimbe to.

taune awa anakere raijare ramu, yara uta ude wo vatano kaijinta awa anakere ransosobe. ¹² Amisy Yesus Kristus apa vambunine no reansai, ti reamo anyao so raugaje vatane umaso mansai no taiso: “Wapo taune wapa anakotare raeranande maninimbe muno wapo anakere raijar indamu wapo ama ine raisy.” ¹³ Muno reama arakove weapamo, vemo wamayondi nora, yara wasatawandi wapo ana ngkove rave.

¹⁴ Muno wasyisyaube! Ranivara vatane inta ponae beto anyao reamo ratoe nyovara waowe so rai, weamo vemo wapanya atavon inya muno watantuna arijat inya. Wea inda opamo mamaya dave, pare sakinav apa ayao kakaije rai. ¹⁵ Weramu vemo wapo atantona maisyare wapa marova we amaisy inya. Yara wapo anyao vayave weye wepamo wapa arakova pije.

Nyovara waowe ama maran

¹⁶ Reansambayambe Amisye ai, Opi po kovo saumane raugaje vatane mai, indamu arono anakotaro rui vayave nande wasai, Po saumane raugaje wasanuga rai tutir. Amisy tuna wasautan tenambe.

¹⁷ *Risyirati Paulus, taune inaneme veano nyovara wao ama marane so ratoe: syo kove raura wasai. Syo ratoe sya nyovara wao ama marane rai tenambe indamu vatane wo raen ware, “Tugae, Paulus apa nyovara waowe mi so.”*

¹⁸ Wama Amisy Yesus Kristus apa kove no wasautan tenambe.

*Risy,
Paulus*

Nyovara Wao Manasyin Paulus Po Ratoe Timotius Ai 1 TIMOTIUS

Paulus po kove ranutu to irati Timotius ai

¹ Risyrati Paulus, syo nyovara waowe so ratoe irati sya arikainyo Timotius winai. Risyamo Yesus Kristus po inatutir indamu syo Apa ayaowe raura. Amisy, wepirati po wansapaya irati ayao kakaije rai, Po inapatimu indamu syo anakere so rajjar, muno Yesus Kristus, wepirati wansanaveano amen, Po inapatimu tavon. ² Timotius, winyamo maisyare taune sya arikainye pi winy, weye wusyinoe syo nanyao indamu nyanave Yesus ai. Syare muinye muno kove muno saumane no no Injayo Amisy muno wama Amisy Yesus Kristus no wasautan tenambe.

Wasyisyaube kuruno angkari mansai

³ Timotius, ribeker indamu wino tawan no munijo Epesus. Omamo syo raura nai tavon to arono nandijawe syuje indamu syanya ride no propinsijo Makedonia so rai. Weye vatano nanawi ratuije inta wo ananyao angkari raugaje, weti syare nyo mansopi. ⁴ Muno vemo wo ayao umano mbe tugaive jewene muno ayao aneno wusyine ratantona tutir inya, weye vatane wo ayao namije ratantona vayave, weamo wayaowi vayave. Weti anakotare umaso mo mauga ti wo Amisy apa bekere rajjate ramu, yara wama anave wemi mo wansauga ti wamo Apa bekere raen ti wandarijat.

⁵ Ananyao somamo syo raugaje indamu wamuinyo wasai vambinibe. Muinye mamu ntipu no wansanuga rai arono wamanave Yesus ai tugaive, muno ntipu arono wansanuga ngkakavimbe yara ana ngkakainoanive inta raen no rai ramu. ⁶ Weramu kurune inta wo ananyao so rapaya ti ntami to, yara soamo utavondijo ayao ama ine meweno rajje obo rai. ⁷ Ubeker ube kurumbe wo Ananyao Musa ranyao vatane mai, weramu unanta taune awa ayaowe rai jewen. Wo raura ware wo Ananyao Musa raen dave, weramu wo raene ramu.

⁸ Wandaen ranivara vatane utavondi Ananyao Musa rai mamaisyo Amisy apa bekere rai, weamo ananyao wato ngko dave. ⁹ Wandaen tavon Ananyao Musa mamu raugaje irati vatano awa ana udave mamai no Amisy amune rai maije ramu. Yara Ananyao Musa mamu raugaje irati vatano maisyare so mansai: vatano nanawirati wo ananyao rakanyoandi muno

wonayo rai; vatano ubeta Amisy aije jewen muno wo ayao kakaije rave; vatano usambayambe jewen, yara utavondi ayao mine so bo rai; vatano wo awa ajae awa akoe maubaisy, muno vatano wo vatano kajjinta maubai tavon; ¹⁰ vatano anaerere ugavo mansai; anya utitarive anya taune mansai; vatano wo vatano kajjinta maijaro arove wo mansamavun; vatano aarurijate ntapekano mai muno wo vatane maponae; muno vatano wo ayao kakai kaijo rui vayave rave ti mo ananyao nsarokire ramaisye jewen. ¹¹ Ananyao nsarokire mamu mo Ayao Kovo Yesus Kristus ramaisy. Amisy, opi titi rave ti wamo ararimbe, Po Ayao Kove so raugaje rinai indamu syo ravov.

Paulus po kove raura seo Amisy aijo Apa muinye rai

¹² Risy kove raura seo wama Amisy Yesus Kristus ai, weye panave rinai ti Po inapatimugo Apa anakere so rai. Wepirati po vambunine raunande rinai indamu syo Apa anakere rajjar. ¹³ Weramu arono wusyinoe syo Yesus Kristus aura tantunawi muno risivuin dave, syo arare veano vatano wanave Aije mansave. Sya ana dave umaso ngkakai tenambe, weramu syantukambe weye syanave Yesus ai rainy, weti Amisy aemeno rinai. ¹⁴ Wakoe, wama Amisy bekobe rave rinaija! Po apa kove raugaje rinai ti manakoe, muno anave muno muinye tavon, omamo nori rati Yesus Kristus ai. ¹⁵ Ayao wamanave rajje no taiso: Yesus Kristus de no mine vone so rai indamu Po vatano wo ayao kakai rave mapaya awa ayao kakaije ama mangke rai. Muno risyamo sya ayao kakaije ntapekan dave, mo vatano kai awa rakivan hintabo. ¹⁶ Weramu wemi mbewar Amisy bekobe rave rinai, wirati vatane wo raen ware, "Paulus apa ayao kakaije ntapekan dave, mo vatano kajjinta awa rakivan, weramu Yesus Kristus atawandi rai rave." Maisyare omaisy, ribe unanuive vatane nanawije mansai indamu unande wanave Yesus Kristus ai ti awaveo kovo nuge nuganuije rai.

¹⁷ Weti wamo Amisy ararimbe muno wamo aura titive weye Opirati wama Akar-ijo Titi be akarive nto nuge nuganui. Opamo wene nde Ai jewen, muno vatane wo aeno mansamije rai jewen tavon. Obo pirati Amisy piye, ti wamo ararimbe nuge nuganui. Amin.

¹⁸ Sya arikainyo Timotius, anakero syo raugaje somamo Amisy apa anawae inta wo raurairive winai arono tumo nandijawe. Syare Amisy apa urairijo namije mo vambunine raunande nai indamu nyo Amisy apa marova mansopi tenambe. ¹⁹ Nyare nyo mansopi, weamo

nyo nya anave Kristus aije raijar matuve muno wimbeto ana ngkove obo rai indamu nanuga ngkakavimbe ti ana ngkakainoanive inta raen no nai ramu. Weye vatane inta nawirati wo ana ngkove raen no manuga rai, weramu wonae ti wo rarijate ramu. Maisyare omai ti, awa anave randamisy. ²⁰ Imeneus muno Aleksander maisyare wemaisy. Weti syo mangke raugaje yai, syo yaunanta no Anakakai Akoe ai indamu yo raen vemo yo Amisyre aura tantunawi jakato inya.

2

Ananyao raugaje arono vatane wanugan ube sambayambe

¹ Soamo syare syo ananyao raugaje irati anugano Amisyre wasai. Manasyimbe, syare wasambayambe vatan tenambe mansai, wapo Amisyre anajo indamu Po kove raugaje mai, muno wapo kove raura seo Amisyre ai. ² Syare wabe sambayambe akarijo titi muno akari kaijo rui vayave mansai tenambe no mine vone so indamu saumane bo mi nowo wama munije rai tenambe, wirati wantavondi Amisyre ai ngkov muno wamo ana mamaisyre rave. ³ Wansambayambe tai maisy omamo ngkov, mo Amisyre anuga raveti ranayanambe. Wepirati po wansapaya ayao kakaije rai, ⁴ muno beker indamu vatan tenambe nawamo Po mansapaya irati ayao kakaije rai muno unanta irati Apa ananyao tugae rai.

⁵ Amisyre pamo intabo pa. Muno Po Vatan intabo apatimu indamu be marimbe Amisyre ai muno vatane mansai. Vatane sopamo Yesus Kristusa pije. ⁶ Wepirati po anasine raunandea kakai indamu Po vatan tenambe mapaya irati ayao kakaije rai. Apa kakaije umaso nande arono masyoto Amisyre po rapatimu rai, indamu Amisyre po raroron kakavimbe beker Po vatan tenambe mapaya irati ayao kakaije rai. ⁷ Wemi mbewar ti Yesus Kristus po inapatimu Po inatutir indamu syo Apa Ayao Kove ravov muno syo vatano Yahudi jewene mansanyao indamu wanave Ai muno unanta Apa ananyao tugae rai. Sya ana syo raura umaso mamu tugae, syangkarive ramu.

⁸ Arono vatano wanave Yesus aije wanunugambe no rui rui vayave, ribeker syare vatano anya wo maneme rajaseo ti usambayambe, manuga ngkakavimbe

rautan. Weramu vemo wayaowi nora muno parije inta ntami no mansanuga rai nora.

⁹ Muno vatano wanya nanawamo syare vemo wo manakea ramarandine obo ratantona nora,^{*} maisyare makarivuinnye rairi ti ngko dave wemaisy. Muno vemo wo anakotaro raonijo ama mangke nseo rave inta rangkion nora, maisyare emasije, mutiara wemaisy. Vemo wo ansuno ama mangke nseo ti ngko dave inta rave nora, yara syare wo awa ansuno mamaisyri vayave bo rave. Weye wanya ubekero vatano kaijinta mami ntami mansai, weamo ngkove ramu. ¹⁰ Yara syare awa ana udave ngkov wemirati vatane mami ntami mansai, indamu mamaisyri wanya wo Amisyre asyanive mansamaisy. ¹¹ Arono kurune po ananyao raugaje irati anugano Amisyre wasai, syare wanya umanin bayave wo raraniv, manuga mpaaje rautan. ¹² Syo wanya mansamayaro wo ananyao raugaje irati anya mansai jewen muno vemo ube akarive anya mai jinya, yara syare umanin bayave. ¹³ Weye arono wusyinoe Amisyre po Adam anarijo wusyyn, umba Po Hawa ranarijo rijabe. ¹⁴ Muno tawae mo Adam aponae jewen, yara Hawa omi tawae mo raponae, weti wanya omirati mo Amisyre apa ananyaowe rakanyoandi ti. ¹⁵ Weramu indati Amisyre po wanya mapaya irati awa ayao kakaije rai weye wo arikainye mavaki. Weti ranivara wanya wanave Yesus ai tutir muno ubekobeo vatane mai, manuga ngkakavimbe muno mpaaje rautan, wea indati Amisyre po mapaya kakai rai.

3

Vatano ube akarive anugano Amisyre rai

¹ Ayao wamanave rajje no taiso: Vatan inta beke dave pare be akarive po anugano Amisyre maugav, weamo anakero beker po rajjare umaso ngko dave.* ² Are pirati be akarive po anugano Amisyre inta maugav, apa ana dave ratodi tenambe no so:^{*} Syare apa ana po raveye ngkov, indamu vemo vatane wo aura tatugadi nora. Apa wanya po raovane mamu intabo rave. Po taune apa ana daura, apa ana dave raeranande indamu vemo po ayao kakaije rave nora. Vatane wo aura titive weye apa ana daveye mamai dave. Arono vatano marane ude, po mansaugav usen no apa yavar. Arono pananyaube, apa ayao mamu nsarokir muno mbar. ³ Weramu

* 2:9 1 Petrus 3:3-4

* 3:1 Anugano Amisy wo vatane inta mapatimu indamu ube akarive wo anugano Amisyre maugav (anemo 2-7), muno wo vatano kaijinta mapatimu indamu wanapatambe anugano Amisyre mai (anemo 3-13). Akarijo wo anugano Amisyre maugav onawamo wo Ayao Amisyre raura kakavimbe irati vatano wanave Yesus aije mansai muno wo manyao. Yara vatano wanapatambe anugano Amisyre mai onawamo wo anugane ama doije raeranande muno wo wanya kavinije maeranande muno wo anakere kotaro kove rajjar. * 3:2 Titus 1:6-9

vemo maeno awije rai nora. Vemo po sivuinye rave vatane mai nora, yara anuga nsaumano mai tenambe. Vemo payaowi nora. Vemo anuga nto irati doije rai nora. ⁴ Syare vatane wato be akarive taune apa yavaruga mai ti mamaisy. Po apa arikainye manyao indamu ubeta apa ayaowe rai. ⁵ Weye are pirati pantukambe be akarive apa yavaruga mai, weamo vemo be akarive anugano Amisy rai jinya! ⁶ Syare opamo vatano panave Yesus ai nugoenta to indamu apa anave matu. Weye vatano apa anave kamurama nene pamo ranivara wapavave wapo aijaseo be akarive, indati ararin dave. Wea umba Amisy po mangke raugaje ai, maisyare muno Po mangke raugaje Anakakai Akoe ai we-maisy. ⁷ Syare vatano be akarive apa ana daveye ngko dave tenambe, ti vatano nanawirati wantatukambe Amisy aije wo aura titive. Yara ranivara apa ana dave ngkove jeven, weamo vatane ware wo aura tantunawi, muno indati Anakakai Akoe po atopan ti Amisy apa anakero po rajjare mbea marudi.

Vatano wanapatambe anugano Amisy mai

⁸ Vatano nanawirati wanapatambe anugano Amisy mai awa ana udave ratodi tavon no taiso: Syare awa ana udaveye mamai dave ti vatane wo maura titive. Vemo wangkarive nora, muno maeno awije rai nora. Muno vemo wo vatane mansaponae inda wo doije ratande mai nora. ⁹ Syare ananyao tugae wemi Amisy po rarorono wansai mammo wo rajjar matuve, manuga ngkakavimbe rautan. ¹⁰ Nyare nyo vatane inta maijaseo wanapatambe anugano Amisy mai, weamo syare nyo awa anaube raen wusyimbe rati. Umba ranivara ana ngkakainoanive inta raen no mai jeven, wea umba wapo maijaseo wanapatambe anugano Amisy mai kai.

¹¹ Maisyare wemai tavon, awa wanya onawamo awa anaube mamai dave tavon, ti vatane wo maura titive muno wanave mai anakotare rai tenambe. Vemo wanya umaso wo vatano kajjinta maura tatugadi nora. Yara syare wo awa ana uaura muno awa ana udaveye raeranande indamu vemo wo ayao kakaije rave nora.

¹² Syare vatano panapatambe anugano Amisy maije umawe apa wanya po raovane mammo intabo rave. Muno be akarive apa arikainye mai muno apa yavaruga mai tenambe ti mamaisy. ¹³ Arono vatane umaso awa wanapatambe anugano Amisy mai omamo ngko dave, weamo awa arakove wo maura titive. Muno

vatano wanapatambe umaso ubambunin wo awa anave Yesus Kristus aije raura vambunimbe.

Ananyao Amisy tugae rajjar matuve

¹⁴ Sya arikainyo Timotius, kavinta nakato ribeker syare syo napan no Epesus. Weramu syo ayaowe so ratoe syo ranutugore nai wusyimbe, ¹⁵ indamu ranivara ana inta mo rinansopi ti ide maneai, weamo nyo raen ti nyo vatane manyao indamu awa ana udave mamaisyo yavaruga Amisy waine rai. Weye anugane wamamo Amisy noa pitawabe Apa yavaruga nawirati wam. Muno anugane wamirati Amisy po apa ananyao tugae raugaje wansai indamu wamo rajjar matuve muno wamo raeranande kobe indamu vemo ayao angkari inta nande rai jinya.†

¹⁶ Amisy apa ananyao tugae mammo ngko dave, wemirati ngkokaibe no wusyinoe weramu soamo Po raroron to no taiso:

Yesus Kristus paje no mine so rai be vatanbe;

Anawayo Vambunine mo aroron mare Opamo mamai dave;

Naito Amisy wo aen to;

Apa Ayao Kove mammo ravov no munije raita tenambe;

Vatano wanui wanave Ai to;

Amisy po aijaseo no munijo ntiti rai jakato.

4

Kuruno angkari wo anugano Amisy mansaponae

¹ Anawayo Vambunine mo raura kakavimbe mare arono munije ama akari mararai, indati vatan inta nawirati wo ananyao tugae rapaya ti ntami, yara wo anawayo kakaije ranarin ti utavondi awa ananyao angkarije bo rai. ² Ananyao angkari umaso mammo kurune inta nanawirati wo raugaje anugano Amisy mansai. Kurune wato awa angkarije ntapekan. Mansanuga ngkaumur ti usamane awa ayao kakai rajje ramu.

³ Awa ananyao angkari maisyare so: ware vemo vatane ubaunam inya, muno ware anaisy inta mammo raisyisyi. Weramu syo raura wasai syare anaisyo namije mammo Amisy pi po ranari ti Po raugaje indamu wandaisy. Weti vatano wamanave muno wananta ayao tugae rai, wamo kove raura seo Amisy aijo wama anaisy rai umba wandaisy. ⁴ Tugae, anakotaro Amisy po ranari omamo ngko tenambe. Anaisy inta raisyisyi jeven. Maisyare omai ti, wamo kove raura seo Amisy ai, weamo anaisy kotaro rui vayave wamo rai kaija. ⁵ Anaisy

† 3:15 Ayao Yunani naiso mo raura mare anugano Amisy mo Amisy apa ananyao tugae rajjar matuve omamo raurata irati aijje rauseo nted indamu yavare ntuna rai matuve.

mamo ngko tenambe weye wamo kove raura seo Amisy e aijo rai muno Apa ayao mo inta raura raisisyije jewen.

Vatano panapatambe Yesus Kristus ai ti ngko dave

⁶ Timotius, ranivara nyo ayao umaso ranyao tenambe irati arakovo wanave Yesus Kristus aije mansai, wea umba nyanapatambe Yesus Kristus ai mamaisy ije. Nanuga ntubai mbambunin weye wino tawan no wama anave ama ayaowe rai muno anyayao ngkove rai, wemirati wintavondi raija nugenta to. ⁷ Vemo nyo ayao umano mbe tugaive jewene ratantona nora, weye mo kove inta raunande ramu. Yara syare nyo taune nanuga ravera mbambunin indamu wintavondi Amisy e apa bekere rai kobe. ⁸ Wamare wamo wansanasine raeranande indamu mbambunin, wemamo mo kovo mamaune raugavo wansai. Yara wamare wamo wansanuga ravera mbambunin indamu wantavondi Amisy e apa bekere rai tenambe, wemamo mo kovo manakoe raugavo wansai, weye Amisy e po kove raugaje wansai no mine vone so muno Po kove ratayao tavon ti mo wansanyut no munijo ntiti. ⁹ Ayao umaso tuga e, syare wamanave rai. ¹⁰ Maisyare omai ti, wamo anakero Amisy e rajjar panyoambe weye wansanaveano Amisy o noa pitawabe obo amen, Opi po vatan tenambe mapaya ayao kakaije rai, nde terave vatano wamanave Ai wansai.

Paulus po anyayao inta raugaje Timotius ai

¹¹ Timotius, syare anyayao umaso mamo nyo raugaje tenambe indamu vatane utavondi rai. ¹² Ranivara vatane inta wo naura tatugadi weye winyamo vatano ngkamurama nene, vemo winsamane nora! Yara wimbe unanuive irati vatano wanave Yesus aije mansai. Syare nya ana ndaura, nya ana ndave, nya muinye, nya anave, muno nanuga ndandinit, mbe unanuive mai indamu wo narijat tenambe.

¹³ Syare nyo anakere so rajjar tutir ava risyirati Paulus syakaore: wimbacave Ayao Amisy e rai no anugano Amisy e mansamun, nyo ama ine raura kakavimbe mai, muno nyo mansanyao. ¹⁴ Mbemo nanimari kovo vambunino namirati Anawayo Vambunine mo raugaje naije rai nora! Kovo vambunine wato nande nai arono nandijawe anawae inta wo Amisy e apa urairi dapatimu nai raura nai muno akarijo wo anugano Amisy e maugave wo maneme rajjaseo ntamijo nai. Maisyare omai ti, syare nyo kovo vambunine wato veano anakero Amisy e rajjar.

¹⁵ Syare nyo Amisy e apa anakere so rajjaro panyoambe indamu vatan tenambe wo raen wo raura ware nya ana ndave ti ngko dave miridi nseowa. ¹⁶ Syare nyo nya ana ndave muno nya anyayao we raeranande kobe indamu mamaisy o vatan apa bekere obo rai. Natawandi tutir, weye indati Amisy e po napaya irati ayao kakaije rai muno Po vatano wo nya anyayao raranive mapaya ayao kakaije rai tavon.

5

Anugano Amisy e mamo maisyare taune wama yavaruga ramaisy

¹ Timotius, syare vemo nyo anyayao vatan anui manyao soowabe nora, yara nya anyayao ma ndaura saumambe mansai maisyare muno taune winye nya injaya pe ripayao wemaisy. Muno nyo anyayao kamurame manyao maisyare onawamo nya arakove nawije. ² Muno wanya vatan anui wenawamo nangkoe nawije, weti nyo ayao mamaisy e bo mi ndaura nanto mai. Wanya kamuram onawamo nya aname nawije, weti vemo nanuga ntento mansai nora, yara syare nanuga ngkakavin bintabo.

Anyayao wanya kavinije mansaeranande

³ Naiso syo anyayao wanya kavinije raugaje nai. Wanya mbe kaviniwe to umba obo no terave, weamo syare wapo raeranande. ⁴ Weramu wanya kavini wemirati ama arikainye, awa ajavi nawa una ivae, weamo ridaura ra wo ranaun: taune wo wanya kavini so raeranande, maisyare arono ta ube arikainy tuvambe, awa vatan anui muno awa anene wo maeranande wemaisy. Weye kove mamo utavondi Amisy e apa bekere rai manasyimbe no taune awa yavaruga rai. Wemamo mo Amisy e aveti anayanambe. ⁵ Wanya kavini inta mi obo no terave kobe, ama ajavi muno ama arikainye jewen dai, weti kavini so ranaveano Amisy e obo amen. Namane rinit mbe sambayambe Amisy e ai indamu Po raeranande. ⁶ Weramu wanya kavini inta onawamo manasine ama mbekere obo mi wo ratantona. Wamerananta ukovo manakea bo rai weramu manuga ma mpamo to, weye nggwaravainyo Amisy e ai. ⁷ Syare nyo anyayao so raugaje irati wanya kavini muno awa yavaruga mansai tenambe indamu utavondi rai, inda vemo vatano kajjinta wo mansaura tatugadi nora. ⁸ Yara are pirati ponayo po apa vatan anui muno taune apa yavaruga maeranande, vatano napije po apa anave Amisy e aije rapaya ti ntami to. Apa ana dave wato ngkakai, mo vatano wantukambe Amisy e aije awa

ana udave ti ngkakai rakivan, weye vatano wantukambe Amisyeye aije wo taune awa yavaruga maeranande ivae.

⁹ Wanya kavini awa yavaruga inta raen akato jewen, syare nyo awa tame ratoe indamu anugano Amisyeye wo maeranande. Weramu wanya kavini awa tame ratoe tenambeye jewen, yara nanawirati awa ana no mansai ratodi maisyare so: Syare ama tume mo tumo tename mandei rakivan to muno wusyinoe ama anya mo aovanoe pamo intabo dave. ¹⁰ Syare ama ana ndave ngko dave, ti vatan tenambe wo raura titive. Weti ama ana ndave ngkove maisyare so: Mo arikainye maeranande ngko dave; mo vatane maugave usisa no ama yavar; manapatambe irati vatano wanave Yesus aije mai;* mbekobe irati vatano mansanimaumbe mai; muno mo anakere kotaro kove rave tutir.

¹¹ Weramu wanya kaviniyo kamurame nanawamo, vemo nyo awa tame ratoe indamu anugano Amisyeye wo maeranande nora. Weye kamuram ti ranivara awa bekero ubaunam akato ntiti rave mo awa bekero utavondi Kristus ai rakivan, indati ubaunam akato. ¹² Arono mbe kaviniwe-owe, mo raura patimuve mare manapatambe Kristus obo ai. Weramu ranivara mbaunam akato, weamo mo ama urairije umawe rakanyoandi, weti Amisyeye parijo wanya namije rai. ¹³ Ranivara wanya kaviniyo kamurame awa tame ratoe indamu anugano Amisyeye wo maeranande, indati wanya umaso wononaevayave. Wo taune awa anakere rajjare ramu, yara manayanambe usea waje awa arakove awa yavare rai, ti wo awa arakove awa anakere ransosobe. Weyao ampambe muno wo ayao mamaisyeye jewene ravov. ¹⁴ Maisyare omai ti, syare koveamo wanya kaviniyo kamurame ubaunam akato kai, wo arikainye inta maen muno wo awa yavaruga maeranande. Indamu vemo vatano manuga mamuno vatano wamanave wansai wo wansaura tatugadi jinya. ¹⁵ Weye wanya kaviniyo kamurame inta makirive Kristus ai to, yara utavondi Anakakai Akoe ai.

¹⁶ Ranivara wanya muno anya wanave Yesus Kristus aije awa arakovo yavaruga inta mbe kaviniwe to, weamo syare yavaruga taune wo raeranande kobe, yara vemo anugano Amisyeye wo raeranande nora. Indamu anugano Amisyeye wo wanya kaviniyo tugae, obo no terave, maeranande weye awa yavaruga inta no marijat akato jewen to.

Ananyao vatano ube akarive anugano Amisyeye rai

¹⁷ Akarijo nanawirati wo anugano Amisyeye maugav ti ngko dave, syare wapo romano raunande maije ravera nseo, nde terave akarijo wo Amisyeye apa ayaowe ravov muno wananyaube mansai. ¹⁸ Weye Ayao Amisyeye mo ratoe mare, “Winyare nyo sapije inta auga damu po anakero nawaisyeye rajjar, vemo nyo aoraijo po kasyambo no no nawaisyeye namije inta raisy inya. Yara po rai kai weye po anakere rajjaro panyoambe.”* Muno Ayao Amisyeye mo ratoe favon mare, “Vatano panapatambe nai pamo nyo doiye raunande ai indamu mamaisyeye apa anakere rai.”* Maisyare omai ti, syare anugano Amisyeye wo akarijo po mansaugav aeranande inda apa doiye mamaisyeye.

¹⁹ Ranivara vatane inta po raura pare akarijo po anugano Amisyeye maugave inta po ayao kakaije ravea, weamo vemo wapo ayao namije raraniv inya. Vatan intabo dave panaikebe ai, weamo mamaisyeye ramu. Yara vatane jirum dako mandei dako wo raura ware akarije wato po ayao kakaije inta rave to, wea umba wapo awa ayaowe raraniv. ²⁰ Umba wapo akarije wato apa ayao kakaije raura kakavimbe no vatano una no anugano Amisyeye mansamun tenambe indamu ujaniv ti vemo wo ayao kakaije inta rave favon inya.

²¹ Timotius, syare nyo raurairive no Amisyeye muno Yesus Kristus muno naito uno no munijo ntiti mansamun, nyare nyo ananyaowe so rarijat tenambe. Vemo nyo vatane inta mansamamaribe nora, yara vatan tenambe nawamo nya ana ndave ngkovo mai vintabo.

²² Vemo nyavave nyo vatane inta aijaseo be akarive anugano Amisyeye inta rai nora, weye ranivara vatane wato po ayao kakaije rave, wea indati vatane uparijo winye vatano napije pe risai kava. Yara syare nyo vatane wato apa ana dave muno apa ayaowe raen dati, wea umba nyo naneme rajjaseo ntamijo ai indamu be akarive. Muno nyo taune nanuga, nanasine raeranande indamu ngkakavin bintabo.

²³ Timotius, wanyati nJORAMA, weamo vemo nyo mana bo ramanam nora. Yara nyo angguri kavinta ramanam, wemirati mamaisyeye wanyati nJORAME rai wirati nsauman.†

²⁴ Vatane inta awa ayao kakaije mamowamo raen kakavimbe, ti wandaen awa mangke indati nande mai. Yara

* **5:10** Ayao Yunani naiso mo raura mare, “wanya kaviniye mo vatano wanave Yesus aije majoe rarandom.” Ama ine mamowamo manapatambe mai. ✧ **5:18** Ulangan 25:4 ✧ **5:18** Matius 10:10; Lukas 10:7 † **5:23** Anggurije mamowamo maisyare awijo mamowamo ramaisyeye ramu. Anggurije mbe obative Timotius ai weti po kavinta vayave ramanam, weramu po ramanam awa maeno rajje ramu (1 Timotius 3:3).

vatano kaijinta awa ayao kakaije soamo ngkokaibeve, weramu indati raroron kakavimbe no masyoto rijat. ²⁵ Maisyare omai tavon, vatane inta awa ana udave ngko dave mamo wamo raen kakavimbe. Yara inta awa mamo soamo ngkokaibe ti wamantatukambe rai, weramu masyoto makare indati raneka vintabo.

6

Ananyao raugaje vatano wanave nanawirati wanapatambe akari mai

¹ Syo ananyao so raugaje irati vatano wanave Amisyae ai nanawirati wanapatambe akari mai: Syare wadanide! Wabeaje wapa akari mai, indamu vemo vatane wo wama Amisyae aura tantunawi nora muno wo wama ananyao raura tatugadi nora. ² Muno ranivara weapamo inta nya akarije panave Kristus ai tavon, vemo nyo aura tantunawi nora, weye winye wepe wuribe arakobe no Kristus ai. Syare nyanapatambe ai kobe muno nyo ravera miridi nseo, weye nyo raen nya anakere mo kove raunanto vatano panave wato ai, muno opamo Amisyae muinyo ai tavon.

Ranivara vatane wananyaube kobe ramu yara wo doije bo rakani, weamo mamaisyae ramu

Inya, Timotius! Ananyao syo ratoe nyovara waowe so rai, syare nyo raugaje vatano wanave mai muno nyo mansanyao indamu utavondijo rai tenambe. ³ Weramu kurune inta wo ananyao angkari raugaje, omamo mamaisyao wama Amisyae Yesus Kristus apa ananyao kove raije jeben muno nsasye irati Amisyae apa ananyao tugae rai. ⁴ Are nawirati wo ananyao angkari raugaje onawamo vatano mararin dave muno vatano wantatukambe nawa. Manayanambe wayaowi ayao omane intabo jirum ndako ama ine rai muno anakotaro rui vayave rai. Weaveti vatane upari ti usasivuiny, wo awa arakove maura tantunawi, muno awa ana wo ratantona mamun irati vatano kaijinta mai. ⁵ Warare mansai vambinibe tutir weye awa ana wo ratantona ngkakai muno wo ayao tugae raene ramu. Wo rakarae ware, “Ranivara wamanave Amisyae ai, weamo wamo doije ratande wansai manui rave.” Ayao wato mamaisyae ramu!

⁶ Yara tugae mamo ranivara wamanave Amisyae ai ti wamare, “Ananugo rui mamaisyao rinai, namije nto,” wemirati mo kovo manakoe ratande wansai. ⁷ Arono wansano no mine vone so, wamo ananuge inta raugavo wansarijate ramu. Ti noa wamunen, wamo ananuge inta raugavo wansarijat akatoe ramu. ⁸ Weti ranivara

wama anaisyae muno wama ansune mamaisy, weamo wansanayanambe. ⁹ Are pirati beker pare apa ananuge nseowa manui, apa bekere wato mo taune aponae muno mo atopan. Apa bekere mamo ngkakainoanive vayave, weramu pantatukambe rai, ti mo augav manawadi po kakai raronto kobe. ¹⁰ Weye vatane manuga ntento doije rai mo mauga ti wo ayao kakai rui vayave rave. Muno vatane inta ubekero wo doije bo rakani ti wo awa anave Yesus Kristus aije rapaya ti ntami to.

Ananyao raugaje Timotius ai

¹¹ Weramu, sya arikainyo Timotius, winyamo Amisyae apaura nai, weti syare nggwaravainy irati ayao kakainoanive umaso rai tenambe, yara ntavondi ana mamaisy muno ana ngkove obo rai. Syare wimbeke dave indamu nya ana ndave mamai no Amisyae amune rai muno wintavondi Apa bekere rai, nyanave ntindimuve Ai muno natawandi kobe, nyo muinye rarorono vatane mai muno nyayao saumambe mai. ¹² Syare wimbambunin nyo Amisyae apa anakere ransui tutir ava winyaura irati kovo nuge nuganui namirati Amisyae po raurairive najoe rai. Weye Amisyae po nawain indamu nyaura kovo nuge nuganui rai arono wusyinoe nyo raura no vatano wanuije mansamun nyare, “Risiamo syanave Yesus Kristus ai.”

¹³ Syare nyo raurairive no Injayo Amisyae amun, wepi po vatan tenambe wansanawayoe raunande ti wangkov, muno nyo raurairive no Yesus Kristus amun, wepirati arono tet no Pontus Pilatus amune rai Po ayao tugae raura vambunimbe ai. Syare nyo raura patimuve indamu ¹⁴ nyo ananyaowe so rarijat tenambe, nanuga ngkakavimbe rautan, indamu vemo vatane inta po naura tantunawi jinya. Wimbeto ananyaowe so rai tutir ava masyoto wama Amisyae Yesus Kristus pakare rai. ¹⁵ Apa masyoto pakare raije mamo Amisyae pi po rapatimu.

Amisyae ararimbe

Amisyae obo wamo ararimbe,

Webo pirati be akarive mine so rai tenambe.

Opamo Akari Titi po akarijo titi makivan tenambe,

muno Akari No Vombe irati akari una no rui rui vayave mansai.

¹⁶ Webo pirati noa nuge nuganui, tuna no varo mbaduru dave, weti vatane wo asyaniv.

Vatan inta po aen to jeben bayave,

muno vatane wo aeno mamije rai kakai.

Maisyare omai ti wamo aijaseo vombe,

wamare Apa vambunine ntoa
pitawabe. Amin.

*Vatano awa ananuge manui rave, vemo
mararin nora*

¹⁷ Ribeker syare nyo vatano awa ananuge manui no mine vone so manyao indamu vemo mararin nora. Muno vemo wanave awa romane rai nora, weye omamo no tawane ramu. Yara syare wanave Amisye ai muno manaveano Webo amen. Weye Wepirati po anakotare raugaje tenambe ra mawes, indamu wansanayanambe rai.

¹⁸ Syare nyo vatano awa ananuge manuije wato manyao indamu wo ana ngkove rave. Awa ananuge manui weti syare awa ana udave ngko dave mamu manui tavon. Vemo waradaive awa ananuge rai nora, yara wo inta raunanto vatano kajijinta mai, muno wo awa doiye raunande manakoeve tavon. ¹⁹ Ranivara wo anakotare umaso rave, omamo maisyare wo kovo manakoe ratayao taune mansai no nugo makanande, weye Amisye po kove ratayao ti ntuna mo mansanyut no munijo ntiti. Indati awaura irati kovo nuge nuganuije rai, omirati kovo tugae mije.

Nyovara waowe ama maran

²⁰ Timotius, sya arikainyo winy, Amisye po apa ananyao tugae raugaje nai indamu nyo raeranande, weti nyo raeranande kobe indamu vemo ayao angkarije nsiso ananyao tugae umaso rai jinya. Arono rui nyo vatane maraniv wo ayao mino ama ine meweno rajje so raura, vemo wintavondi mai nora. Muno arono vatane awa ana udatantona ti ware omamo ntiti weramu mamaisye jewene ma, weamo nakirive mai vayave. ²¹ Ayao angkarije umaso mamu vatane inta wanave rai to, ti wo Amisye apa ananyao tugae rapaya ti ntami to.

Amisye apa kove no wasautan tenambe.

*Risy,
Paulus*

Nyovara Wao Jirum Paulus Po Ratoe Timotius Ai 2 TIMOTIUS

Paulus po kove ranutu Timotius ai

¹ Risyrirati Paulus, syo nyovara waowe so ratoe syo ranutugore Timotius nai, winyamo sya arikainyo inanuga no nai. Risiyamo Yesus Kristus po inatutir mamaisyo Amisy apa bekere rai indamu syo Apa urairije ravovo vatane mai: purairive pare Po kovo nuge nuganuije raunanto vatano wanave Yesus Kristus aije mansai. ² Syare kove muno muinye muno saumane no no Injayo Amisy muno wama Amisy Yesus Kristus no wasautan tenambe.

Vemo nsamane nyo Amisy Yesus aura kakavimbe nora

³ Timotius, risyo kove raura seo Amisy aijo nai. Risambayambe Ai inanuga ngkakavimbe rautan, maisyare muno sya aneno wusyine usambayambe Ai wemaisy. Namane rinit ribe sambayambe nai tutir. ⁴ Aro! Timotius, rinaemeno masyoto wusyinoe rai arono winanimaumbe ti nami ngkaruge ntende weye syo napaya ti wibuin no. Weti ribeker syakare syo naen akato indamu inanayanambe. ⁵ Syo raen winyamo nyanave tugaive, maisyare muno nya aneno Loisa muno nangkoyo Eunike yamaisy. Syo raen aya anaveo Yesus Kristus aije no winy nanuga rai tavona. ⁶ Wemi mbewar syare naemen irati kovo vambunino Amisy po raugaje naije rai, wemirati nande nai arono syo inaneme rajjaseo ntamijo naijoe. Weti nanuga ntenam nyo kovo vambunine wato raveano anakero Amisy rajjar. ⁷ Weramu vemo njani nora, weye Amisy apa Anawayo Vambunin po raugaje wansai mammo Mo wansanuga yanive raunande ramu, yara Mo wama vambunine muno muinye raunande, muno no wansai tutir ti wambambunino wamo wama ana wandave muno wandaura raeranande indamu vemo ayao kakaije ntipu rai nora.

⁸ Vemo winsamane nyo wama Amisy Yesus aura kakavimbe nanto vatano wantatukambe Aije mai nora. Muno vemo winsamane rinai weye rituna no tanoano makova rai wenora. Syanapatambe Yesus Kristus ai wemi mbewar inausiso makova. Syare nyanatatayaube indamu winsiuri tavon weye nyo Ayao Kove ravov. Indati Amisy po vambunine raugaje nai indamu natawandi rai.

⁹ Amisy po wansapaya irati ayao kakaije rai muno Po wansawain indamu wamamo

Apa kawasaeyo apaura wansai. Weramu wama ana wandave wemi Amisy daen ti pare apaura wansai omamo jewen, yara Po rave mamaisyo taune Apa bekere muno Apa kove rai. Weye arono munije so rana-rani rainy, Amisy po rapatimu indamu Yesus Kristus po apa kove raugaje wansai. ¹⁰ Soamo Apa kove raroron kakavimbe weye Yesus Kristus de to, Po wansapaya irati wama ayao kakaije rai. Yesus po wene ama vambunine rapinde to,* muno Po kovo nuge nuganui raugavo vatano nanawirati wanave Apa Ayao Kove rajje mansai.

¹¹ Risiyamo vatano Yesus Kristus po inapatimu, Po inatutir indamu syo Apa Ayao Kove ravov muno syo vatane mansanyao. ¹² Wemi mbewar soamo risiuri no tanoano makova rai. Weramu risamane ramu, weye syo raen tugae Napi syanave Ai opamo Amisy piye. Muno inanuga ntindimu Ai, syanave Wepi bambunin Po inaeranande tutir ava nto Apa masyoto pakare no mine vone so rai.

¹³ Timotius, syare ananyao tugae wemirati syo raugaje nai mbe unanuive indamu nya ananyao mo sya ramaisy. Muno syare nyo nya anave rajjar matuve muno nyo muinye rarorono vatane mai, weye wimbe intabove Yesus Kristus ai. ¹⁴ Amisy po apa ananyao tugae raugaje nai indamu nyo raeranande. Muno Anawayo Vambunin, omi ntuna no wansanuga rai, Mo vambunine raugaje nai, weti syare nyo ananyao umaso raeranande kobe indamu vemo ayao angkarije nande rai jinya.

¹⁵ Nyo raen Pigerusa pe Ermogenesa pe arakovo kaijo una no propinsi Asia makirive rinai tenambe to. ¹⁶⁻¹⁸ Weramu arakovo Onesiporusa pamo bekobe rinai. Weti ibe sambayambe indamu Amisy aemeno Onesiporus apa yavaruga mansai. Nyo raen arono wusyinoe Onesiporusa panapatambe manakoeve rinai no munijo Epesus. Muno arono Onesiporusa de no munijo Roma so rai, po inakani yava nande inai to. Po inae rimakova irati vatano mamune mansarijat no tanoano makova rai, weramu opamo samane rinaije ramu, yara po inapan ama susye manui, ti inanuga mbambunin akato. Weti ribe sambayambe indamu Amisy indati aemeno ai ti Po kove raugaje ai arono masyoto Po mangke rapatimugo vatano mine so mansai.

2

Nyo Amisy apa anakere rajjar matuve

¹ Timotius, sya arikainyo winy, syare wimbambunin irati kovo Amisy po raugaje nai rai, namirati Po raugaje vatano wambe intabove Yesus Kristus aije wansai

* 1:10 1 Korintus 15:26

tenambe. ² Sya ananyao syo raura no vatano wanui mansamun ti nyo ranaun to, omamo syare nyo raugaje akato vatano nyanave maije inta mai, indamu vatano nanawiso wo vatano kaijinta mansanyao akato tavon. ³ Syare natawandi siurije rai rinatavon, weye winyamo Yesus Kristus apa naito no no mine vone so pi winy. ⁴ Ananeneayo naite maisyare so: Vatane inta pare be naibe pemerinta ai, weamo po anakero naite obo raijar, yara anakero kaijinta jewena, indamu apa akarije anayanambe ai. Timotius, winyamo mbe naibe Yesus Kristus ai. ⁵ Muno ananeneae kaijinta no taiso: Winyamo naurata irati arikainyo wanugan wansanan are pi indati pansanan to nanto wusyimbe. Muno are pirati pansanan tavondi unanui rapatimu obo raija to nanto wusyimbe, weamo ama ine raunande ai. Yara inta po unanuije rapaya, weamo wo ana inta raunande aije ramu.* ⁶ Muno ananeneae kaijinta mo ramaisy: Winyamo naurata irati vatano po nawaisye ranari. Are pirati po apa nawaisye raijaro panyoambe, wea umba wepi manasyin dave po ama ine raisy. ⁷ Syare winyo sya ana idaura umawe ratantona kobe, indati Amisy po nakarikuga raniku ramu mbar inda winanto rai tenambe.

⁸ Nyo Yesus Kristus atantona! Opamo avaki no aneno Daud apa susye rai, kakai muno kovakato. Ayao umaso mamo Ayao Kovo syo ravovo vatan tenambe mai. ⁹ Syo Ayao Kove ravov wemi mbewar risiuri muno rimakova no tanoano makova so rai maisyare vatano mamune amaisy. Wo inaokokaisyo waijo besije rai, weramu ayao Amisy mamo wo raokokae kakai muno wo raorai kakai. ¹⁰ Weti inatawandi siuri rui vayave rai kai, weye ribeker indamu vatano nanawirati Amisy po mansatayaowe wo Apa ayaowe so ranaun ti wanave Yesus Kristus ai, weaveti awaura kovo nuge nuganui rai muno utavondi Apa kovo ntiti no pitawabe rai. ¹¹ Ayao wamanave raije no taiso:

Wangkakai no Yesus Kristusa nui,
indati wangkov akato no Wenui.

¹² Wansatawandi tutir,
indati wambe akarive atavon.

Yara wamo amamarave,
indati Po wansamamarave tavon.*

¹³ Weramu wama anave Aije mamaun,
indati aneme mpaya wansaije ramu,
weye Opamo beto Apa urairije rai tutir.

Amisy anayanambe weye nya anakere mamaisy

¹⁴ Ananyaowe somamo syare nyo raura nanto anugano Amisy wimbe akarive maije mansai tutir indamu mansaemen. Nyo manayao mangkebe weye onawamo manayanambe wayaowi ayao omame ama ine rai, inta pare apa mi no rai, inta pare apa mi no rai. Omamo mo kove inta raugave ramu, yara mo vatano wo raranive awa anave randamisy. Weti nyo manayao no Amisy amun no taiso: “Wapare wapayaowi tutir, indati Amisy po mangke raugaje wasai!” ¹⁵ Syare nyo Amisy apa anakere raijaro panyoambe muno nyo Apa ayao tugae ranayo sarokibe nanto anugane mai. Maisyare omaisyamo winsamane no Amisy amune raije ramu, yara Amisy anayanambe nai pare nya anakere mamo mamaisy.

¹⁶ Timotius, arono rui nyo vatane maraniv wo ayao mino ama ine meweno raije so raura, vemo wintavondi mai nora. Onawamo awa bekere ngkakainoanive miridi nseo weye utavondi Amisy apa bekere raije ramu. ¹⁷ Awa ananyao angkari mare maneka manakoe rave, raurata irati waneno aame rai, omamo mo anasine raugaji tenambe. Imeneusa pe Piretusa pe onayamo aya ananyao yo raugaje maisyare somaisy. ¹⁸ Yo Amisy apa ayao tugae rapaya ti ntami to, yara yo ananyao angkari raura yare, “Amisy po wansaveti wangkovakato to, weti arono munije ama akari indati po wansavera wangkovakatoe ramu.” Abo! Ayao angkarije mi som, mo vatane inta awa anave randamisy ti meweno mai kobe.

¹⁹ Weramu anugano Amisy mamo mbambunin, raurata irati oramo manakokoe wemi mangkiki kakai. Maisyare Ayao Amisy mo ratoe mare: “Amisy po apa kawasae apaura maije mansaan dirive.”* Muno ayao kaijinta mare: “Are pirati po raura pare opamo vatano Amisy apaura ai inta piye, syare po apa ana dave ngkakainoanive ransopi.”

²⁰ Syo raura ananeneaebe wasai: yavaro manakoe ama uga rai, ananugo ntuna rai ama kotare manui. Wamo ananugo emasije, perakije obo raene ramu, yara ananugo inyo muno kopa veano ranari ntami tavon. Wamo ananugo emasije muno perakije rave anakotaro titije rai, yara ananugo inyo muno kopa veano ranari rave anakotaro maje rai. ²¹ Vatano wamanave Yesus aije wansaurata irati ananugo emasije muno perakije umaso rai. Are pirati po apa ana dave ngkakai ransopi ti anuga ngkakavimbe, opamo aurata irati ananugo ama mangke nseo we rai. Po taune anuga ratayaube ra mamaisy,

* 2:5 1 Korintus 9:24-25

* 2:12 Matius 10:33; Lukas 12:9

* 2:19 Bilangan 16:5

indamu arono apa Akarije po anakero kove rui vayave inta raugaje ai, weamo po rajjar kobe.

²² Timotius, nyo nanasine raugav nggwaravainy irati bekero ngkakainoanive namirati arikainyo kamurame utavondi raije raora. Yara syare wintavondi ana mamaisye muno ana ngkove obo rai, nyanave ntindimuve Amisye ai, nyo muinye rarorono vatane mai, muno nanuga nsaumano vatane mai. Syare nyo ana umaso rajjaro nya arakove mansatavon, nanawirati manuga ngkakavimbe arono usambayambe Amisye ai. ²³ Arono vatano wantatukambe wayaowi ayao ama ine meweno raije rai, vemo wintavondi mai nora, weye nyo raen awa ayaowije mbewar sivuinye ntipu. ²⁴ Vatano panapatambe Amisye aije pamo maisyare so: po sivuinye rave vatane maije ramu, yara anuga ngkovo mai muno atawandijo awa ana wantukambe raije rai. Arono pananyaube, apa ayao mamu nsarokir muno mbar. ²⁵ Muno payao saumambe irati vatano nanawirati wonayo apa ananyao raije mansai, weye beker indamu Amisye po varore raugaje mai indamu usakinavo awa ayao kakaije rai ti ude unanta irati Amisye apa ayao tugae rai. ²⁶ Weaveti awa ana wo ratantona nsarokir akato, muno unajivo Anakakai Akoe apa avirije rai. Avirije wato Anakakai Akoe po ratugar ti nsawa indamu po vatane maugavo arove ti utavondi apa beker ngkakainoanive rai.

3

Munije ama akari mararai indati kuruno angkarije wuisy

¹ Timotius, syo raura kakavimbe nai: Arono munije ama akari mare mararai, anakotaro kakai manui rave indati nande no mine vone so. ² Arono naije indati vatane inta apa bekobe mamu po rave taune bo ai kobe, muno vatane manuga manakoe doi bo rai. Mansararin muno ukangkamambe taune mansai. Wo vatano kaijinta maura tatugadi muno ubeto awa vatan anuinye awa ananyaowe raije ramu. Wo kove raura seo Amisye aije ramu, muno usambayambe Aije ramu. ³ Arono naije vatane ubekobe awa arakove maije ramu, muno wonayo wo awa arakove maneme rajjari. Wo vatano kaijinta maura tantunawi. Wo taune awa ana udave, awa ana uduara raeranande ramu, ti awa ayao kakaije miridi nseo. Usivuin dave muno wonayo ana ngkove rai. ⁴ Arono naije vatane wo awa arakove mansamavun. Wavave wo anakotaro

wantukambe raije rave vayave. Mararin dave muno ubekero mansanasine ama marinsene bo rai, yara ubekero Amisye aije ramu. ⁵ Ube ponaikea ware utavondijo Amisye ai, weramu wonae Apa vambunino mo manuga ranigwano nggwanyine rai. Timotius, syare winsyisyaube vatane wato mansai!

⁶ Vatano nanawije inta uta usea yavare inta rai maninimbe, wo ayao angkari raura nanto wanya manuga mayondi mansai. Wanya umaso nawamo utairi jirati ayao kakaije rai muno awa beker ngkakainoanive mo manuga rantutu dave. Weti maweso unanta sawa vatano angkari umaso apa ana datore rai. ⁷ Wanya umaso manayanambe indamu manyao rijati tutir, weramu Amisye apa ananyao tugae mamu unanta raije ramu. ⁸ Awa kurune umawe onawamo umarovave Amisye ai, maisyare muno arono wusyinoe anawae angkari inta, aya tame mirati Yanes muno Yambres, imarovave Musa ai no munijo Mesir.* Kuruno angkari maisyare so awa ana wo ratantona ngkakainoanive muno awa anave ma tugae jeben. ⁹ Weramu po vatane manuga raugabe awa ananyaowe raija nugoenta ramu, weye indati awa wantatukambeye mamu vatan tenambe wo raen kakavimbe, maisyare wusyinoe vatane wo Yanesa pe Yamberesa pe aya yantatukambeye raen to.

Paulus apa ananyao indamu Timotius tavondi rai

¹⁰ Timotius, winyamo ntavondijo inaija nugoenta to, ti nyo sya ananyaowe muno sya ana idaveye raen to. Muno nyo sya beker muno sya anave raen tavon to, muno nyo raen rimuinyo vatan tenambe mai muno inatawandi mai arono awa ana udave mamai dainy, muno inatawandi anakotaro ngkakai nande rinaije rai. ¹¹ Nyo raen vatane wo inave tatugadi muno siurijo manakoe nande rinai, maisyare nande rinai no munijo Antiokia muno Ikonium muno Listra.* Sya siurijo inatawandi raije wato manakoe rave! Weramu Amisye po rinapaya rai tenambe to. ¹² Tugae, vatan tenambe nanawirati wanave Yesus Kristus ai ti ubeker utavondi Apa beker rai onawamo indati vatano kaijinta wo mave tatugadi. ¹³ Weramu vatano ukakainoanive muno vatano wangkarive indati awa ayao kakaije miridi nseo. Wo vatano kaijinta maponae, weramu indati kaijinta usakinav akare wo maponae tavon.

¹⁴ Weramu winyi Timotius, syare nyo ananyao tugae reamo raugaje naije rajjar

* 3:8 Yanes muno Yambres, anawae angkari jirume so, yanapatambe Akarijo Titi Firaon ai. * 3:11 Arakov 13:14-50 (Antiokia), 14:1-6 (Ikonium), muno 14:8-20 (Listra)

matuve tutir, mirirati nyanave rai to, weye nyo nya kurune reansaen ivae. ¹⁵ Nyo Ayao Amisye raen arono winy mamaunoea ndea naiso. Wemi mo nanyao ti nakarikuga mbar wirati nyanave Yesus Kristus ai ti Po napaya irati nya ayao kakaije rai. ¹⁶ Ana ratoe no Ayao Amisye mamo Amisye pi po raugaje tenambe. Muno Ayao Amisye ngkov irati wansai weye mo wansanyao irati ayao tugae rai, mo wama ayao kakaije raroron kakavimbe wansai, mo wansanyao indamu wansakinavo wama ayao kakaije rai, muno mo wansanyao indamu wama ana wandave mamai no Amisye amune rai. ¹⁷ Wirati Amisye apa kawasae wamanapatambe Ai wamamo wantairi jirati Ayao Amisye rai indamu wambambunin wamo anakero kove rui vayave rajjar.

4

¹ Arono munije ama akari, Yesus Kristus indati pakare be akarive mine vone so rai tenambe. Arono naije Po ayao mamaisye rapatimugo vatan tenambe mai awa ana udave rai —nanawirati utantunana nene muno nanawirati ugwenen to. Wemi mbewar syare winyi Timotius nyo raurairive no Amisye amun muno Yesus Kristus, nyare nyo anakere so rajjar tenambe no taiso: ² Nyo Amisye apa ayaowe ravov. Nyanatatayaube indamu nyo ravov tutir: arono vatane manayanambe wo rarani dako, arono wonae rako. Nyo vatane awa ayao kakaije raura kakavimbe nanto mai, nyo mansanyao indamu usakinavo rai, muno nyo ananyao raugaje mai indamu manuga mbambunin. Nyo manyao mavabe muno saumabe. ³ Weye masyoto makareye indati vatane wanui wonayo Amisye apa ananyao nsarokire rai, yara utavondi taune awa bekere rai. Weti wo kuruno kaijinta makani wo manugande, nanawirati awa ananyao mamo mamaisyo taune awa bekere bo rai, weaveti manayanambe wo ananyao wato raraniv. ⁴ Weti wo Amisye apa ayao tugae rapaya ti ntami, yara wanave ayao umano mbe tugaive jewene obo rai. ⁵ Weramu Timotius, syare nya ana ndatantona mamo nsarokir no anakotaro rui vayave rai. Syare natawandi siurije rai, nyo Ayao Kovo Yesus Kristus ravovo vatano wanuije mansai, muno nyo anakero Amisye po raugaje naije rajjar tutir ava mewen bintabo.

⁶ Risy Paulus, sya masyoto wene mo rinaugav nde mararai to. Kavinta sya mavuge nsororop, raurata irati anakotaro rameseo Amisye ai.* ⁷ Anakero Amisye po raugaje rinaije, syo rajjara mewen to. Syansanan vambunimbe to, muno

inatawandi yava inanto unanuije ama marane rai kobe. Syo sya anave rajjar matuve tutir. ⁸ Soamo Amisye po kovo manakoe ratayao ti ntuna mo rinanyut no munijo ntiti, weye sya ana idave mamai no Amun. Kovo namije mamo Amisye po raugaje rinai no arono Apa masyoto Po ayao mamaisye rapatimugo vatane mai awa ana udaveye rai. Amisye opamo apa dapatimuge mamai dave. Weti indati Po kove raugaje ribui inaije ramu, yara Po raugaje vatan tenambe mai, nanawirati ware ubekero wo Yesus Kristus aeno pakarei.

Nyovara waowe ama maran

⁹ Ribeker syare nyavavere no rinui. ¹⁰ Sya arakove wo inapaya ti ribui no. Weye Kreska poroto no munijo Galatia muno Titus poroto no munijo Dalamatia. Demas opamo bekero anakotaro mine vone so bo rai, weti po inapaya yara poroto kobe no munijo Tesalonika. ¹¹ Soamo Lukas obo pi no inatavon. Weti syare nyoronto nyo Markus akani umba nyo auga da de rinai, weye syare po inasopan sya anakere so rai.* ¹² Syo Tikikus atutir poroto no munijo Epesus rai to. ¹³ Syo sya ansuno mamokane raugaje ntami no arakovo Karpus arijat no munijo Troas. Weti arono nyare nde rinai, syare nyo sya ansune wato raugav. Sya bukuge ntami tavon, syare nyo raugavere tavon. Bukuge umaso inta mamo maere kea veano ranari, omirati ibekero rai rave.

¹⁴ Aleksander, wepi po ananugo tambaga ranari, apa ana po rave rinai ngkainoanive, weti indati Amisye po mangke raugaje ai mamaisyo apa ana po rave rarijati. ¹⁵ Timotius, syare winsyisyaube Aleksander wato ai, weye opamo marovave wama ananyaowe rai.

¹⁶ Arono manasyin ritet no akarijo Roma amune rai indamu syo vatane awa ana wo rangkivano rinaije rasakinav, naije sya arakove inta usayai inatavone ramu, yara wo inapaya ti ribui no. Ribe sambayambe mai, indamu vemo Amisye po mangke rasakinavo mai jinya. ¹⁷ Weramu Amisye tuna inautan muno Po vambunine ruanande rinai indamu syo Ayao Kove ravov tutir ti vatano Yahudije jewene wo ranaun tenambe. Amisye po rinaeranande ti Po inapaya wene rai arono vatane ware wo inaubaisy. ¹⁸ Muno Amisye indati po inapaya irati anakotaro mamun rui vayave nande rinaije rai, muno Po rinaeranande yava Po rinaugav risiso no munijo ntiti, omamo Apa munijo be akarive rai mije. Weti syo ararimbea nuge nuganui. Amin.

* 4:6 Filipi 2:17 * 4:11 Arakov 12:25, 13:13; Kolose 4:10, 14; Pilemon 1:24

Paulus po kove ranutugore apa arakove mai

¹⁹ Syo kove ranutugore Priskila me ama anya Akwila pe yai, muno Onesiporusa apa yavaruga mai tenambe.* ²⁰ Soa arakovo Erastus no tawan no munijo Korintus. Muno arakovo Tropimus pamo syo apaya ti no no munijo Miletus weye gwanen dave. ²¹ Embayo ovare nande rainy, ribeker syare winyavave ra nde no so. Wapa arakovo Eburusa pe Pudesa pe Linusa pe Klaudia me muno wapa arakove nao tenambe wo kove ranutugore nai.

²² Amisy Yesus tuna wasautan muno Apa kove no wasautan tenambe.

*Risy,
Paulus*

* 4:19 Arakov 18:2; 2 Timotius 1:16-18

Nyovara Wao Paulus Po Ratoe

Titus Ai TITUS

Paulus po kove ranutu to irati Titus ai

¹ Risyirati Paulus, syo nyovara waowe so ratoe syo ranutugore Titus winai. Risyamo syanapatambe Amisyé ai muno Yesus Kristus po inatutir indamu syo Apa ayaowe raura. Po inatutir indamu syo vatano Amisyé po mansatayaowe maugavo awa anave raija ntubai mbambunin, muno indamu unanta irati Amisyé apa ayao tugae rai muno utavondi Apa bekere rai. ² Syo mansanyao indamu mansanaveano Amisyé amen, wepi po kovo nuge nuganuije raunande wansai. Kovo nuge nuganuije somamo Amisyé po raurairive wansai arono munije so ranari rainy. Wamanave Apa urairije umaso rai weye Opamo pangkarive jeben. ³ Soamo Amisyé apa masyoto po rapatimu ndea mamaisy ti Po apa Ayao Kove raroron kakavimbe to. Muno Po anakere raugaje rinai indamu syo Ayao Kove umaso ravovo vatano wanuije mansai. Wama Amisyé, wepi po wansapaya ayao kakaije rai, Po inatutiro anakere so rai.

⁴ Titus, winyamo maisyare taune sya arikainye pi winy, weye winyamo nyanave Yesus Kristus ai maisyare muno risyanave Ai. Syare kove muno saumane no no In-jayo Amisyé muno Yesus Kristus, wepi po wansapaya ayao kakaije rai, no wansautan tenambe.

Anakero Paulus po raugaje Titus ai indamu po raijar no nupatimugo Kreta

⁵ Sya arakovo Titus, arono wusyinoe syo napaya ti wino no nupatimugo Kreta ratuije indamu anakero syo raija dainye mamono nyo raijar muno nyo ratayao akato ra mamaisy. Syo natutir indamu nyo vatane inta matayao no munije ranteter indamu ube akarive anugano Amisyé rai tetebe.

⁶ Arono nyo vatan inta aijaseo be akarive anugano Amisyé inta rai, syare naemen irati anyanyao so rai: syare akarije pamo apa ana po raveye ngkov indamu vemo vatane wo aura tatugadi nora. ⁶ Apa wanya po raovane mamono intabo rave. Apa arikainye nawamo wanave Yesus Kristus ai, muno utavondijo ananuinye awa anyanyao rai indamu vemo vatane wo maura inya. ⁷ Vatano be akarive anugano Amisyé rai apa anakero po raijar umaso mamono Amisyé pi po raugaje ai, weti syare apa ana po raveye ngkov, indamu vemo vatane wo aura tatugadi nora. Vemo

ararin nora, vemo pariyo vatano kaijinta mai nora, vemo maeno awije rai nora, vemo po sivuinye rave vatane mai nora, muno vemo po vatane mansaponae inda po doiye ratande taune ai nora. ⁸ Yara syare apa ana dave ngkov taiso: Arono vatano marane ude, po mansaugav usea no apa yavar. Anayanambe ana ngkove obo rai, apa ana dave mamai dave muno anuga ngkakavin. Po taune apa ana daura muno apa ana daveye raeranande indamu vemo po ayao kakaije rave nora. ⁹ Po Amisyé apa ayao tugae raijar matuve mamaisy irati ririmo raugaje aije rai to, indamu apa anyanyao po raugaje vatane mai mamaisy muno nsarokibe, mo manuga raijasea mbambunin, muno indamu po ayaowe rasakinavo vatano nanawirati wo anyanyao umaso raura tantunawije mansai.

¹⁰ Weye vatane wanui wonayo anyanyao umaso rai. Taune awa anyanyao ama ine meweno rai ti wo vatane mansaponae. Vatano angkarije umaso inta nawamo utavondi Yahudi awa koano sunat rai. ¹¹ Syare vemo nyo varore raugaje mansai jinya, yara nyo mansopi ra umanin weye awa anyanyaoe mamaisyé ramu. Wo yavaruga wanave Yesus Kristus aije inta manuga raugabe ti wananepabe awa anave rai. Muno wo mansaponae indamu wo doiye ratande taune mai. ¹² Arono wusyinoe anawae inta, opamo nori rati nupatimugo Kreta, po rauranare so: “Vatano Kreta wangkarive tutir, onawamo maisyare makeo sivuinye wemaisy, sasokabe muno wononae ntapekan.” ¹³ Ayao umaso mamono mamai dave! Maisyare omai ti, syare nyo vatane wato manyao soowabe indamu utavondi anyanyao tugae obo rai. ¹⁴ Vemo wo Yahudi awa ayao umano mbe tugaive jewene raraniv inya, muno vemo wo vatano wonayo Amisyé apa ayao tugae raije awa anyanyao raraniv inya.

¹⁵ Vatano are nawirati manuga ngkakavimbe, weamo ana inta raisyisyi mai jeben, yara anakotar tenambe mamono ngkakavimbe. Yara are nawirati manuga nggwambe, weamo anakotar tenambe mamono nggwambe mai. Wo kakai, kove raen kobe ramu, weye manuga muno awa ana wo ratantona nggwambe no Amisyé amune rai. ¹⁶ Vatane wato wo raura ware, “Reamo Amisyé aen,” weramu wangkarive, weye awa ana udaveye mamaisyé awa ana uaura umaso raije ramu. Mansanuga mamun muno ubeta Amisyé aije jeben. Ranivara ware wo ana ngkove inta rave, weamo umamaisyé ramu.

2

Ananyao raugaje vatano wanave Yesus aije mansai

¹ Weramu, sya arakovo Titus, syare nya ananyao nyo raura mamo mamaisy irati Amisyé apa ananyao nsarokire obo rai. ² Ribeker syare nyo anya ananuinye mansanyao indamu wo taune awa ana uduura, awa ana udave raeranande mavabe indamu vemo wo ayao kakaije inta rave nora. Syare awa anaube ngko dave ti vatane wo maura titive. Muno syare wanave Amisyé ai matuve, umuinyo awa arakove mansai, muno matawandi siurije rai.

³ Maisyare wemaisy, nyo wanya ananuinye mansanyao tavon indamu awa ana udave ngko dave ti mamaisy vatano wo Amisyé asyanive mansamaisy. Vemo wo vatano kaijinta maura tatugadi nora muno vemo maeno awije rai nora. Yara wo vatane mansanyao indamu wo ana ngkove rarijat.

⁴ Wea umba wanya ananuinye umaso wo wanya kamurame mansanyao akato indamu ubekobe irati awa anya mai muno awa arikainye mai. ⁵ Syare wanya kamurame wo taune awa ana uduura, awa ana udave raeranande indamu vemo wo ayao kakaije rave nora. Vemo anaerere ugavo mansai nora. Yara wo awa yavaruga maeranande kobe, mansanuga ngkov, muno utavondijo awa anya awa ananyaowe rai. Syare wo anakotare umaso rarijat tenambe indamu vemo vatane wo ayao Amisyé raura tantunawi nora.

⁶ Maisyare wemai tavon, nyo anya kamurame mansanyao tavon indamu taune awa ana uduura, awa ana udave raeranande indamu vemo wo ayao kakaije rave nora. ⁷ Titus, syare winyirati mbe unanuive anya kamurame mai indamu utavondi nya ana ndave ngkove rai tenambe. Arono nyo vatane mansanyaube, syare nyo manyao sarokibe, nanuga kakuive rautan. ⁸ Muno syare nya ananyao mamo mamai dave indamu vemo vatane inta wo naura tatugadi jinya. Indati nya marova usamane weye awa ayao wo naura tatugadi ama ine meweno rai.

⁹ Syare nyo ananyao raugaje vatano wanapatambe akari inta aije mansai, indamu ubeta awa akari apa ananyao rai tenambe indamu akari anayanambe mai. Yara vemo wo awa akari aura tatugadi nora. ¹⁰ Muno vemo wo awa akari apa ananuge inta ranaonoambe inya, yara wo apa anakotare raeranande mavabe wirati panave mai. Syare awa ana udave ngkov bintabo indamu vatano kaijinta wo raen ti manayanambe wama ananyaowe rai, wemi mo wama Amisyé po wansapaya ayao kakaije raije aura.

¹¹ Soamo Amisyé po apa kove raroron to: Po unanuije raneka indamu Po vatan tenambe mapaya ayao kakaije rai. ¹² Po wansanyao indamu wamo wama ana wandave ngkakainoanive ransopi muno wamo wama bekerano anakotaro mine so rai rapaya ra ntami. Amisyé beker pare wamo taune wama ana wandaura, wama ana wandave raeranande indamu vemo wamo ayao kakaije rave nora, yara wama ana wandave mamai dave, muno wantavondi Amisyé apa bekere rai tutir no mine so rai. ¹³ Weye arono wana no mine vone so, wansanaveano Amisyé amen, wamo Apa kovo makare akato umu ranyut arono wama Amisyé Titi Yesus Kristus, wepirati po wansapaya ayao kakaije rai, pare pakare no mine vone so. ¹⁴ Po anasine raunandea kakai indamu Po wansapaya irati anakotaro ngkakai rai tenambe. Muno Po wansanuga ratayao ti ngkakavimbe indamu wamamo Apa kawasae nawirati wam, ti wambeke dave wamo ana ngkove rarijat.

¹⁵ Titus, ananyao syo ratoe tenambe so-mamo syare nyo raugaje vatane mai indamu utavondi rai. Are pirati ponayo ayao so rai, weamo nyo apa ayao kakaije raura kakavimbe ai. Mbemo nsamane inya, weye Amisyé wepi po vambunine raugaje nai indamu nyo mansanyao, weti vemo vatane inta po naura tantunawi jinya!

3

Wamo ana ngkove rarijat

¹ Syare nyo raura nakato vatano wanave mai indamu maemen irati ayao so rai: Syare ubeta akarijo titi muno akarijo rui vayave una no mine so mansai muno utavondi awa ananyaowe rai tenambe. Muno wanatatayaube indamu wo anakotaro kove rui vayave rarijat. ² Vemo wo vatano kaijinta maura tantunawi nora. Vemo wayaowi nora, yara wayao saumambe. Vemo mansararin nora, yara mansanuga mpaaje irati vatane mansai tenambe.

³ Arono wusyinoe wamamo waman-tatukambe muno wansosobe muno wantavondi Amisyé apa ayao raije ramu. Arono naije wantavondi wansanasine ama bekere muno ama marinsene obo rai. Wansanuga ngkakaijo vatano kaijinta mai muno wamparijo mai. Wansanuga mamuno mai muno onawamo manuga mamuno wansai tavon.

⁴ Weramu Amisyé aemeno wansai, weti Po apa muinye raroron wansai. Opamo po wansapaya wama ayao kakaije rai. ⁵ Wama ana wandave ti ngkove mbewar ti Amisyé po wansapaya ayao kakaije rai omamo jewen, yara Po wansapaya

ayao kakaije rai weye aemeno wansai. Muno Apa Anawayo Vambunine mo wama ayao kakai rarandom no wansanuga rai, Mo wansanuga ranigwan ti nggwanyin akato muno Mo kovo wanyine raugaje wansai ti wangkovo wanyimbe. ⁶ Amisye po Anawayo Vambunine umaso raugaje wansai weye Yesus Kristus po wansapaya wama ayao kakaije rai to. ⁷ Wirati wansanaveano Kristus amen wepi indati Po kovo nuganuije raunande inda wamaura rai, weye Apa kove mo wansaveti wamamai no Amisye amune rai. ⁸ Sya ayao umaso no rai tugae. Syare nyo vatano wanave Amisye aije mansanyao indamu utavondi rai kobe. Syare ubekobe indamu wo ana ngkove rave tutir. Ananyaowe so ngkov irati vatan tenambe mansai.

⁹ Vatane inta manayanambe wayaowi anakotaro wantatukambe raije rai, muno wayaowi ayao aneno wusyine rai, muno wayaowi Ananyao Musa rai. Weramu Titus, vemo wintavondi mai nora, weye ayaowije umaso ama ine meweno rai, mo kove inta raugave ramu. ¹⁰ Are pirati payaowi ti po anugano Amisye raporabe jirum, weamo nyo raura ai inda po ran-sopi. Nyo raura ai susye intabo, jirum, weramu ranivara ponae po nya ayao raranivi, weamo nyo apaya vayave. ¹¹ Wandaen vatano napije pamo akirive Amisye apa ayao tugae rai to. Muno taune pamo po apa ayao kakai raen, weramu po rave tutir.

Nyovara waowe ama maran

¹² Risyo arakovo Artemas we dako, Tikikus we dako, inta atutir pore wasai, weti arono de nande to, umbawe syare nyavave nde nyo rinapan no munijo Nikopolis. Ribeker siso no munijo namije yava embayo ovare poen dati. ¹³ Syare nyo arakovo Senas, wepirati vatano akarikuga mbaro ananyao Roma rai, muno arakovo Apolos yaeranande aya ibekedaije rai indamu yo aya unanui anya rave tutir. ¹⁴ Vemo arakovo wanave Yesus aije awa ana wo rave ama ine meweno rai nora, yara syare wo ana ngkove rave tutir muno wo vatano awa ananuge meweno maije maeranande.

¹⁵ Sya arakovo utavondijo rinai no so wo kove ranutugore Titus nai. Syare nyo kove raura ririma arakovo wanave mansai.

Amisye apa kove no wasautan tenambe.

*Risy,
Paulus*

Nyovara Wao Paulus Po Ratoe Pilemon Ai PILEMON

Paulus po nyovara waowe so ratoe arono opamo tuna no tanoano makova rai. Po ratoe more irati apa arakove inta ai, apa tame mirati Pilemon. Wusyinoe Paulus poroto no Pilemon apa munije rai, po Ayao Kovo Yesus ravov no naije, umba Pilemon panave Yesus ai. Pilemon umaso apaveo arikainyo aro inta ai, apa tame mirati Onesimus, opamo panapatambe anakero yavaruga rai. Weramu Onesimus pamo pantatukambe Yesus ai muno ponae panapatambe no apa akari Pilemon apa yavaruga rajji. Weti puje ti nino Pilemon aora. Ananyao Roma ama ayao maje mare ranivara arikainyo aro puje ti nino apa akari aora, weamo akari umaso po mangke manakoe raugaje ai kai. Weti Onesimus jani dave, nin ti poroto gwaravaimbe, umba de nanto Paulus ai no tanoano makova rai. Naije Paulus po Ayao Kovo Yesus raura ai, umba Onesimus panave kobe. Weti anuga mbe wanyimbe akato, ti soamo beker pakare no Pilemon ai jakato, weramu janiva nene. Weti Paulus po nyovara waowe so ratoe indamu Onesimus po rauga no Pilemon ai wirati vemo pariyo apa arikainyo aro Onesimus ai jakato nora, yara po augave siso indamu panapatambe apa yavaruga rai jakato.

Paulusa po kove ranutugore apa arakove mansai

¹ Risyirati Paulus, syo nyovara waowe so ratoe more irati Pilemon winai. Winyamo sya arakovo inanuga no nai, winyirati nyo Amisy apa anakere rajjar maisyare rinamaisy. Arakovo Timotius po kove ranutu nai tavon. Soamo risyamo rimakova no tanoano makova rai weye syo ayao Yesus Kristus ravov. ² Syo kove ranutu tavon irati arakovo Apia rai muno arakovo Arkipus ai, opirati tavondi rinai rimo Amisy apa marova mansopi.* Muno syo kove ranutu irati arakovo wanave Yesus Kristus ai nanawirati wanugan usambayambe no Pilemon nya yavare rajje mansai tenambe. ³ Syare kove muno saumane no no wama Injajo Amisy muno wama Amisy Yesus Kristus no wasautan tenambe.

Paulus be sambayambe Pilemon ai

⁴ Arakovo Pilemon, syo kove raura seo Amisy aijo nai arono rui voyave ribe sambayambe, ⁵ weye ridaniv winyamo nyanave Amisy Yesus ai muno wimuiny irati Amisy

apa kawasae mansai tenambe. ⁶ Arakove, wambe arakobe weye wamanave Yesus Kristus ai. Wambe arakobe ti ribe sambayambe indamu wama ana wandaene miridi nseo indamu wamo Amisy apa kovo manakoe raen tenambe, wemirati wamaura rai weye wambe intabove no Kristusa nui. ⁷ Sya arakove, nya muinye mo inanuga so raveti ranayanambe muno mbambunin, weye syo raen wimbekobeo Yesus apa kawasae mansai ti onawamo manayanambe.

Paulus po Pilemon anyao indamu bekobe Onesimus ai

⁸ Sya arakove, syare syo nanajo indamu nyo anakotaro mamaisy inta rave. Ranivara anakotaro mamaisy namije syare syo nantitidi rai, weamo syo nantitidi kai weye Kristus apa vambunine no irati rinai. ⁹ Weramu syonae syo nantitidi rajji, yara syo nanajo bayave weye rimuinyo rinsai kava. Syare naemeno rinai weye risyirati Paulus ribe vatan anuive to, muno ituna no tanoano makova rai weye ritavondi Yesus Kristus ai. ¹⁰ Weti syo nanajo bayave, maisyare so: Syare naemeno sya arikainyo Onesimusa ai. Syo Onesimus anyao ti panave Kristus ai arono rimakova so, weti risyamo ribe ajaive ai no Kristusa nui. ¹¹ Wusyinoe Onesimus panapatambe nai mamaisy ramu.* Weramu soamo anuga nggwanyin ti apa ana dave mamaisy, ti ngkovo winai muno ngkovo rinai tavon.

¹² Soamo syo Onesimus atutir pakaore no winui jakato, weramu mangkeo rinai weye rimuinyo ai rave. ¹³ Syo raura kakavimbe: arikainye sopamo ibeke dave syo amavuga indamu panapatambe rinai. Syare po winanigwan po inaeranande risya makova so rai. Rinausiso makova weye syo Ayao Kovo Yesus Kristus ravov. ¹⁴ Weramu syonae syo Onesimus amavugi, ranivara nyo amayar ava. Weti ranivara nyare nyo Onesimus amayaro panapatambe rinai, weamo syare nyo rapatimu mamaisy taune winya bekere bo rai. Syonae syo nantitidi.

¹⁵ Syo ratantona Onesimus puje naora vavai somamo mamaisy Amisy apa bekere rai, indamu Onesimus pakanande nai to weamo no narijata nuge nuganui. ¹⁶ Wusyinoe nyo Onesimus antantona nyare opamo arikainyo aro pa. Weramu soamo be arove obo rai jeben, yara opamo wama arakovo panave Yesus ai inta piye tavon. Risyamo rimuinyo ai rave, weramu sya muinye mamaun, yara winya muinyo ai manakoe weye opamo nya arikainyo

* 1:2 Kolose 4:17 * 1:11 Tamo Onesimus ama ine mare "panapatambe ti mamaisy."

panapatambe naije pa muno opamo nya arakovo ripanave Amisy Yesus ai kava.

¹⁷Nyo rinaen nyare risyamo ribe arakobe nai no Yesus Kristus ai, weti syare nyo Onesimus augave siso nya yavare rai, maisyare muno wusyinoe nyo rinauga to wemaisy. ¹⁸Soamo inaneme raneka indamu Onesimusa po ana inta raveti kakai nai rako, po nya doiye inta rauga dako, weamo syo ranawan. ¹⁹Taune inaneme veano ayaowe so ratoe inda mbe urairive nai: *Risyirati Paulus, indati syo ravae akato nai vintabo.* Weramu syare vemo nanimari nora: syo Ayao Kove ravovo nai omi mbewar nyaura kovo nuge nuganui rai. ²⁰Weti, arakove, koveamo nyo kove inta raugakare rinai no taiso: nyo Onesimus augave siso akato. Syare wimbeto sya ana syo raura rai weye rimbe arakobe no Amisy Yesus Kristusa nui. Wea indati rinanayanambe rave. ²¹Syo nyovara waowe so ratoe weye syanave nai nyare wimbeto sya ayaowe rai. Muno syo naen nya ana nyo rave ama kove indati mo sya ana syo ranajoe so rakivan.

Nyovara waowe ama maran

²²Umba sya ayao intabo mi som akato: syare nyo tanoane inta ratayao rinanyut. Weye arakove weabe sambayambe rinai ti, inanave Amisye amen Wepi indati po inapaya irati tanoano makova so rai indamu syore syo wasapan tenambe.

²³Arakovo Epaprasa po kove ranutugore nai.* Wepirati pe ririmakova kava no tanoano makova so rai weye ririmanapatambe Yesus Kristus ai. ²⁴Muno Markusa pe Aristarkusa pe Demasa pe Lukasa pe wo kove raura nai tavon. Onawamo wo Amisye apa anakere rajaro rinatavon.

²⁵Amisy Yesus Kristus apa kove no wasautan tenambe.

*Risy,
Paulus*

* 1:23 Kolose 1:7-8, 4:12-13

Nyovara Wao Nanto Vatano Ibrani Mansai IBRANI

Yesus Kristus opamo Arikainyo Amisyepije

¹ Arono wusyinoe Amisyepo apa anawae matayao ti wo Apa ayao raura wama aneno Yahudi mansai to. Po apa ayao raura rijati tutiro anawae mai muno Po raronono maije ama kotare manui. ² Weramu arono munije ama akari mararaije so umba payao de wansai no Apa Kavoi. Apa Kavoso pi Amisyepo apatimu indamu Po naumo warae muno mine so ranari tenambe. Muno Opirati Amisyepo apatimu indamu apaura anakotar tenambe rai. ³ Apa Arikainyepo pirati Amisyepo varo kovo ntiti raen no Ai, muno Opamopo Amisyepo amaisy, weti Amisyepo ana no ai tenambe raen no Apa Kavoi tavon. Soamo Apa Kavoso po anakotaro mine tename so muno naumo warae raijanande tenambe, muno Po raeranande irati Apa ayao amavambunine rautan. Arono kakai to indamu Po vatane wama ayao kakai rapaya, naijepakaseo no munijo ntiti, tuna no Amisyepo Titi anem ngkove rai indamu be akarive atavon.

Arikainyo Amisyepo titi jirati naito Amisyepo mansakivan

⁴ Maisyare wemaisy, Amisyepo apa Kavoi ajaseo titive naito Amisyepo mansakivan tenambe, mamaisyepo Apa tamo Amisyepo raugaje Ai rai. Apa tamo namijepo ntiti naito Amisyepo awa tame rakivan bintabo. ⁵ Weyepo Amisyepo ayao namiso raura aje Apa naite inta ai jewen pare, “Masyoto unumeso Syo raura Najamo: Winyirati Sya Arikainyepi Winy muno Risyirati Nya Injaya pi Risy.”[✠] Ayao umaso mamop Amisyepo raura Apa Kavoi Yesu obo ai. Muno Amisyepo apa ayao kajijinta maisyare somai tavon: “Indati Risyepo Apa Aja pi Risy, muno Syo awaino Sya Arikainyepo.”[✠]

Arono Amisyepo rauranare wemaisy, Po apa naite inta ai jewen. ⁶ Muno arono Amisyepo apa Arikainyepo Anui atutir de no mine so, Po raura pare:

“Syaepo raura naite ude tenambe indamu ubeaje Sya Arikainyepo so ai.”

⁷ Naito Amisyepo wenawamo Amisyepo mansaura taiso:

“Syo raura naite matutir wusyepo maisyare ovare amaisy, muno maisyare tanamo mbadurure ramaisy.”[✠]

⁸ Weramu Arikainyepo Amisyepo pamo Amisyepo raura naito Ai no taiso:

“Winyepo Amisyepo pi Winy!

Winyepo mbe akarive rai ma indati ntoa nuge nuganui,

Winyepo Akarijop Titi nya ana ndave mamai bintabo.

⁹ Winyepo mbekero ana mamaisyepo rai, yara nanuga mamuno anakotaro kakai rai tenambe.

Wemip bewar ti Risyepo Nya Amisyepo napatimu*

indamu Syo najaseo titive Nya arakove makivan, weti nanuga ranayanambe.”[✠]

¹⁰ Muno Amisyepo raura nakato Apa Kavoi ai pare:

“Winyepo Amisyepo, arono manasyin dave Winyirati nyo mine so ranari muno Nyo naumo warae ranari tavon.

¹¹ Anakotare umaso indati rakanive vintabo ti raen akatop ramu.

Yara Winyepo no tawan tutir.

Mine so muno naumo warae noa mbe wusyimbe to,

maisyare ansuno noa mbe wusyimbe ramaisy.

¹² Ansuno mbe wusyimbe vatane wo ranigwano ansuno nggwanypine rai.

Maisyare wemaisy, Amisyepo nyo mine so muno naumo warae ranigwano wanyine rai.

Weramu Winyepo mbe ninuwanive jewen. Nya kove ama marane ntami intai jewen,

yara wino tawan tutira nuge nuganui.”[✠]

Ayao umaso mamop Amisyepo raura naito Apa Kavoi ai. ¹³ Muno Amisyepo ayao namiso raura Apa Kavoi ai tavon:

“Nyajepo ntuna no inanem ngkove rai java Syo Nya marova maveaje utantuna no najo

ate rai

indamu wimbe akarive mai.”[✠]

Ayao umaso mamop Amisyepo raura aje Apa naite inta ai jewen, yara Po raura naito Apa Arikainyepo obo ai. ¹⁴ Naito Amisyepo onawamo anawayo wanapatambe

Amisyepo ai tenambe nawa. Amisyepo matutir indamu wo Apa kawasae maeranande,

vatano nanawirati Amisyepo matayao indamu awaura kovo nuge nuganui rai.

✠ 1:5 Mazmur 2:7; Ibrani 5:5; Arakov 13:33 ✠ 1:5 2 Samuel 7:14 ✠ 1:7 Mazmur 104:4 * 1:9 Ayao Yunani naiso mare, “Risyepo Nya Amisyepo manine rave nayajam.” Arono wusyinoe vatano Yahudi wo vatane inta atayao indamu be akarive, weamo wo manine rauvaro akari rai indamu ajaseo Akarijop Titi rai. ✠ 1:9 Mazmur 45:6-7 ✠ 1:12 Mazmur 102:25-27 ✠ 1:13 Mazmur 110:1; Lukas 20:42-43; Arakov 2:34-35

2

Yesus po naito Amisy makivan weye Wepirati po kovo nuge nuganui raunande

¹ Maisyare omai ti, Yesus opamo titi, Po naito Amisy mansakivan tenambe, weti ribeke dave indamu Apa ananyao wamo rarani to mammo wamo rajar matuve, indamu vemo wamo wama anave rapaya ntami nora. ² Arono wusyinoe ananyao Amisy mammo Apa naite inta wo raugaje wama anene mansai. Ayao naite umaso mammo mbe tanamamoambe vatane mansai, weti are pirati beto rai jewen yara ponayo rai, opamo mangke raugaje ai mamaisyo apa ana po rave rarijati. ³ Weti mangke mo wama anene mansakep arono wonayo ayao naito Amisy wo raugaje rai. Maisyare omaisy, wamamo ranivara wamonayo ayao kove rai, wemi mo kovo nuge nuganui raunande, weamo wanajivo wama mangke raora kakai! Weye Amisy Yesus taune pirati manasyimbe po ayao kove umaso ravov, muno Apa arakovo utavondi ai nanawirati wo ranauno taune mansamarikoame rai, wo ayao kove umaso raura nakato wansai. ⁴ Muno awa ayao wo Yesus aura mammo Amisy po raroron kakavimbe omamo ayao tugae ma no taiso: Po vambunine raugaje mai indamu wo anapaporainye kotare manui raroron indamu vatane wanave awa ayao uduara rai. Muno Po Anawayo Vambunine ama kovo vambunine raugaje terave mansai, mamaisyo taune Apa bekere rai.

Yesus po unanui rausiso indamu vatane mapaya ayao kakai rai

⁵ Naito Amisy onanawamo indati ube akarive munijo wanyino makare rai jewen, munijo namirati wamayao dai wem. Ube akarive rai jewen weye Amisy po varore raugaje mansai ramu. ⁶ Yara Po vatane matayao indamu ube akarive. Maisyare Ayao Amisy ama mo ratoe inta mare:

“Wakoe! Vatane onawamo vatan bayave nawa,

muno awa tame meweno mai.

Weramu Amisy winy, naemeno mai muno Nyo maeranande!

⁷ Arono manasyimbe Nya naite titi wo vatane mansakivan.

Weramu umba Nyo vatane majaseo titive, Nyo tamo manakoe raugaje mai.

⁸ Muno Nyo vambunine raugaje mai indamu

ube akarive anakotare rai tenambe.”*

Ayao umaso murairive mare Amisy po vatano mine so majasea ube akarive anakotare rai tenambe; weti inta ntuna

akarive mansai ramu, yara wo raijanande tenambe. Weramu naisoamo wamo ana umaso raen dainya nene; vatane ube akarive anakotare rai tenambe rainy. ⁹ Weramu wamo Yesus aen ivae! Wepirati anakotare umawe nde nande Ai to: arono paje no mine so rai be vatanbe we, naito Amisy nawamo titi wo akivan mamaumbe weramu no ra nugoenta ramu. Umba soamo Amisy po Yesus aijaseo titive, Po tamo manakoe raugaje Ai weye Yesus kakaijo vatane mai. Amisy apa kove manakoeyo wansai wemi mbewar ti Yesus kakaijo vatan tenambe wansai.

¹⁰ Amisy po anakotare ranari vintabo muno apaura rai tenambe indamu Po apa kovo ntiti raroron. Apa bekere mammo Po vatane wanui majasea indamu Apa arikainye waino mai ti utavondi Apa kovo ntiti rai. Weti po Yesus apatimu indamu siuri muno kakai, wirati Yesus po unanuije rausiso indamu vatane usisa muni kove rai. Apa siurije mo aijaseo ti Opamo wama Akarijo mamai dave pije. Maisyare omaisy, Amisy po apatimu indamu siuri omamo mamaisy. ¹¹ Yesus po wama ayao kakai wansanuga rarondom indamu ndandinit. Wepe wame wama Injae pamo intabo, Wepirati Amisy. Weti Yesus samane wansai jewen, yara Po wansawainamo Apa arakov. ¹² Po raura nanto Amisy ai pare:

“Risyo naura kakavimbe Sya arakove mansai,

Risy kangkamambe Nai no anugane ama uga rai.”*

¹³ Muno Yesus po raura tavon pare:

“Risiamo syanave Amisy obo ai.”

Muno pare:

“Risyi so, muno arikainyo Amisy po maunande

indamu utavondi Rinai utantuna rinatavon.”*

¹⁴ Vatano Yesus po mawaino arikainye so wenanawamo vatan bayave nanawirati manasine nanto wene rai, weti Yesus be vatanbe indamu Po mansamaisy. Muno Po anasine raunanto indamu kakai indamu Po Anakakai Akoe, opi po wene raugav, apa vambunine raubaisy. ¹⁵ Yesus kakai indamu Po vatane mapaya wene ama vambunine rai. Weye arono wana no mine so rai, wamo wene rasyaniv tutir, muno wama yanive so mo wansaijar matuve. Weramu Yesus kakai to ti wamo wene rasyaniv akatoe ramu. ¹⁶ Soamo mbaro wansai mammo naito Amisy wenawirati Yesus po maeranande jewen, yara Po vatane wansaeranande, wamirati wansato siso aneno Abraham apa susye rai. ¹⁷ Wemi

* 2:8 Mazmur 8:4-6. Ayao Yunani mare, “Amisy po anakotar tenambe raveaje no ajo ate rai indamu be akarive rai vintabo.” * 2:12 Mazmur 22:22 * 2:13 Yesaya 8:17-18

mbewar ti Yesus be vatanbe: beker ava Po apa arakove wansamaisyo anakotare rai tenambe. Be vatanbe Po wansamaisy indamu Opamo wama Syeno Titi anuga memen ntuna irati wansai muno beto Amisy ai apa anakero po raugaje Ai rai. Indamu Po wama ayao kakai ama mangke ranawan ti mpaya wansai wirati Po wansaugav wamakare Amisy ai.¹⁸ Soamo Yesus po vatane wansaeranande arono wananta irati ana mo wansatopane rai, weye taune pamo siuri muno ana mo atopane ma Po raen to.

3

Yesus panakoeve Musa akivan

¹ Sya arakovo wapanave Yesus Kristus ai, weapirati Amisy apa kawasae po wasawain indamu wasisa munijo ntiti rai, syo raura wasai: Syare wapo Yesus atantona rati. Opamo Amisy po atutir de no mine so rai indamu Po apa ayao raura wansai, muno Opamo wama Syeno Titi piye. Yesus so pirati wamanave Ai piye. ² Opamo beto Amisy ai, Opi po atayao apa anakere rai, maisyare muno Musa beto Amisy ai ti po Amisy apa yavaruga maeranande, onawamo Amisy apa kawasae nanawije. ³ Weramu Yesus opamo titi Musa akivan. Wandaura so mamaisy, weye wandaen vatano po yavare ranari pamo panakoeve apa yavaro po ranarije rakivan. ⁴ Tugae, yavare nanentabo mamamo vatan inta po ranari, weramu Po anakotare ranari tenambe pamo Amisy taunep. ⁵ Amisy po anakere raugaje Musa ai indamu po Amisy apa yavaruga maeranande. Muno Musa pamo beto Ai mavabe, maisyare vatano panapatambe apa akari apa yavaruga rai inta amaisy. Musa apa po rave so mbe ranameve ana rui indati nande no masyoto makare rai. ⁶ Weramu Kristus beto Amisy ai maisyare Amisy taune apa Arikainy, napi be akarive yavaruga Amisy rai tenambe. Weti are nawirati usisa Amisy apa yavaruga so rai? Sya arakove, vatano wamirati wansanuga ntindimu wansanave Amisy amen wamamo Apa yavaruga nawirati wam.

Vemo wasanuga matu ti wasakirive Amisy ai nora

⁷ Weti syare wambeta Anawayo Vambunine ama ayao so rai mare:

“Wadani! Syare masyoto unumeso wapo Amisy anamote raraniv!

⁸ Vemo wasanuga matu nora,

maisyare wapa aneno wusyine mansamaisy, nanawirati wonae ubeta Amisy ai

muno manuga kantetoaro Ai arono wanya no nugo vabukane vono maninimbe.

⁹ Amisy pare, ‘Rinatawandi wapa anene mai to.

Tume tename jirum wo raen ibekobeo mai tutir,

weramu manuga matu ti ware wo inatopan.

¹⁰ Wemi mbewar riparijo mai, weye vatane so wonayo Rinai, muno wonae ubeta Sya ananyao rajji.

¹¹ Weti ripari mangkebe, ti Syo raura patimuve syare:

Vatane so indati awaura Sya kove rai jewen,*

namirati Syo ratayao indamu maneme mpaya awa anakere rai ti umainda una kovo saumane rautano wem.’ ✧

¹² Inya, sya arakove, syare wasyisyaube! Vemo weapamo inta nanuga ntairi ayao kakaije rai nora muno nyonae nyanave nora. Vemo inta nakirive Amisy wepi noa pitawabe ai nora. ¹³ Yara syare wapo wasanyao vambinibe indamu wapa anave Amisy ai ntindimu, indamu vemo weapamo inta nya ayao kakai mo naponae ti nanuga matu inya. Weti wapo wasanyao vambinibe masyote yanteter tutir arono masyote ta ntami so, weye ama varore indati mare nsopi kobe. ¹⁴ Ranivara wamo wama anave Amisy ai rajjar tutir ava wene mo wansaugav, muno wama anave namije mamamo ntindimu maisyare arono manasyin dave wamanave kobe wemaisy, weamo indati wantavondi wamaura Kristus apa kove rai. ¹⁵ Syare wasaemen irati Amisy apa ayao umawe rai:

“Wadani! Syare masyoto unumeso

wapo Amisy anamote raraniv!

Vemo wasanuga matu nora,

maisyare wapa aneno wusyine mansamaisy, nanawirati wonae ubeta Amisy ai.” ✧

¹⁶ Weti vatano wo Amisy anamote umaso raraniv weramu wonae ubeta Ai onawamo are nawije? Wenawamo vatano Musa po mansaugav ti wuje no munijo Mesir raora wenawije. ¹⁷ Wama anene umaso wonae ubeta Amisy ai, weti Amisy pariyo mansaija tume tename jirum. Awa ayao kakaije ntapekano mansai ti ukakai kobe no nugo vabukane vono maninimbe weye Amisy apa mangke maje mai. ¹⁸ Muno vatane umaso wenawamo

* **3:11** Ayao so, “Vatane so indati awaura Sya kove rai jewen,” ama tunato rajje mare Amisy po mansamayaro usisa munijo Kanaan rajje ramu. ✧ **3:11** Mazmur 95:7-11 ✧ **3:15** Mazmur 95:7-8

vatano Amisyé po mansaura arono Po raura patimuve pare, “Vatane so indati usisa Sya munijo syo ratayao mansai rai jeben, namirati maneme mpaya awa anakere rai ti umainda una vayave wem.” Usisa Amisyé apa munijo po ratayao rai jeben weye ubeta Aije ramu. ¹⁹ Maisyare omaisy, wandaen usisa rai ramu weye wonae wanave Amisyé aiji.

4

Amisyé po kove ratayao vatano wanave mansai indamu maneme mpaya awa anakere rai ti umainda una kovo saumane rautan

¹ Amisyé purairirive pare po kove so raunande wansai indamu wamaura rai: omamo anakere mpaya wansai yara wamainda wana kovo saumane rautan. Varore ntami wansaija nene indamu wamaura kove umaso rai, weti syare wambekobe rave indamu wan tenambe wamo raijar indamu vemo vatane inta aumandi nora. ² Amisyé po apa Ayao Kove raugaje wansai maisyare muno Po raugaje wama aneno wusyine umawe mansai to wemaisy. Weramu wama anene wo ayao umaso rananiva marudi, mo kove inta raude mai jeben weye wanave Amisyé ai jeben ti. ³ Vatano wamanave wamamo wamaura Amisyé apa kove umaso rai, namirati wansaneme mpaya wama anakere rai yara wamainda wana kovo saumane rautan. Yara vatano wanave jewene nawamo awaura raije ramu, mamaisyo Amisyé po raura so rai pare:

“Weti ripari mangkebe, ti Syo raura patimuve syare:

Vatane so indati awaura Sya kove rai jeben, namirati Syo ratayao indamu maneme mpaya awa anakere rai ti umainda una kovo saumane rautano wem.”[✧]

Amisyé apa kove umaso mamo Po ratayao arono Po mine so ranari kobeyoe. ⁴ Weye masyote kaujentabo Amisyé po mine so ranari, maisyare Ayao Amisyé ama mo ratoe inta mare:

“Umba arono masyoto kaururum nande to, Amisyé aneme mpaya Apa anakere rai tenambe, umba mainda no kovo saumane rautan.”[✧]

⁵ Wasaemen Amisyé apa ayao umawe rai pare:

“Vatane so indati awaura Sya kove rai jeben, namirati Syo ratayao indamu maneme mpaya awa anakere rai ti umainda una kovo saumane rautano wem.”[✧]

⁶ Wama anene wo Amisyé apa Ayao Kove raranivo manasyimbe, weramu awaura kovo anakere mpaya mai namije rai jeben weye wonae wanave Aiji. Weramu Amisyé purairive pare indati vatano kaijinta awaura rai. ⁷ Muno Po masyoto kaijinta rapatimu tavon, omamo masyoto unumeso. Anene umawe ukakai vintabo to, noa nugoenta rave umba Amisyé po ayao so raugaje Daud ai pare:

“Wadanide! Syare masyoto unumeso wapo Amisyé anamote raraniv!

Vemo wasanuga matu nora!”[✧]

⁸ Wama aneno wusyine Yosua po vatano Israel maugav usisa munijo Kanaan rai, weramu Kanaan omamo Amisyé apa kovo po ratayao Apa kawasae mai ma jewena nene. Weye wama aneno wusyine utan-tuna no Kanaan mansanan ava masyoto Daud ai, naije umba Amisyé po raura pare po masyoto kaijinta rapatimu indamu Apa kawasae awaura Apa kovo po ratayao mansai rai. Maisyare omaisy, wandaen Amisyé apa masyoto po rapatimuge so omamo masyoto Yosua wema jeben. ⁹ Weti wandaen varore inta ntamija nene indamu Amisyé apa kawasae awaura Apa kove rai, namirati awa anakere mpaya mai yara umainda una kovo saumane rautano wem. ¹⁰ Vatano are pirati apaura Amisyé apa kove umaso rai, opamo aneme mpaya apa anakere rai yara mainda no kovo saumane rautan, maisyare muno Amisyé amaisy arono Po apa anakero munije so ranarija mewen ti tuna vayave. ¹¹ Maisyare omai ti, sya arakove, syare wambeke dave indamu wamaura kovo anakere mpaya wansai rai, wemi Amisyé po ratayao indamu wantantuna atavon. Weramu vemo wamamo vatane inta beto Amisyé ai jeben ti aumandi nora. Weye are pirati panave Amisyé ai kobe jeben maisyare vatano Israel wusyinoe mansamaisy, indati apaura Amisyé apa kove umaso rai kakai.

¹² Ayao Amisyé po raura mamo ayao njayaisy mo kovo nuge nuganui raugav, muno Apa ayao mamo mbambunin dave. Omamo raurata irati tija nsiu rani rani rai ramaisy, omi mo vatane anasine raukir ti manawadi no kabume rai, pae rai, nsiso no ene rai. Maisyare omaisy, Ayao Amisyé nsiso kobe no vatane anuga rai ti mo apa ana datantona muno apa bekere raen tenambe. ¹³ Anakotaro Amisyé po ranari no mine so inta ngkokaibe Amisyé apa ana daene rai ramu. Yara anakotaro ngkokaibe raneka vintabo ti raen kakavimbe no Amisyé amun. Muno arono munije ama akari wamo wama ayao kakai ranawan wamo raura kakavimbe no Amun.

Yesus opirati wama Syeno Titi pije

¹⁴Weti sya arakove, vemo wamo wama anave Amisyé apa Kavó Yesus aije rapaya nora, yara wamo wama anave rajjar matuve. Weyé Yesus só pirati wama Syeno Titi pije, Opirati poroto siso no munijo ntiti to no Amisyé amune rai to. ¹⁵Wama Syeno Titi sopamo syeno pantatukambe pa jewen, yara Opamo syeno aemeno wansai weye Po wama mayondi raen. Weyé arono Yesus no no mine so, anakotaro rui vayave mo vatane wansatopane mamó nande Ai tavon to, weramu Apa sasyé wansai mamó Apa ayao kakai meweno Ai. ¹⁶Yesus só pirati wama Syeno Titi pije weti vemo wanjani nora, yara wande vambunimbe indamu wamararai Amisyé ai indamu wamo wama sambaya rave Ai. Weyé Amisyé aemeno wansai muno Opamo bekobe, weti indati Po apa muinye rarorono wansai muno Po wansaeranande wama ana nsosobe rai tenambe.

5

Syeno Titi Yesus muno Syeno Titi Yahudi

¹Syeno titi maisyare so: Vatane inta apatimu no vatano Yahudi awa yasyine rai indamu aijaseo syeno titi rai. Umba po anakero syene rajjaro kawasae mansai no Amisyé amun, maisyare so: arono vatane wo anakotare inta raugav, syeno titi po raunanto Amisyé ai, muno po maere rameseo Amisyé ai mansamarom indamu Amisyé po awa ayao kakaije rapaya. ²Syeno titi Yahudi aemeno apa arakove mansai weye taune anuga mayondi maisyare muno apa arakove awa ramaisy. Weti po mansanyao saumambe arono wantatukambe ti wo ayao kakai rave. ³Syeno titi taune anuga mayondi wemi mbewar Amisyé apa ayao majé indamu syene po anakotare ramero kawasae obo awa ayao kakai rai ramu, yara taune apa ayao kakai rai tavon.* ⁴Vatane inta taune po taune aijaseo syeno titi rai omamo mamaisyé ramu. Yara Amisyé obo pirati po vatane inta awaino anakero syeno titi rai umba mamaisy, maisyare muno Po Harun awaino syene rai no wusyinoe ramaisy.*

⁵Maisyare wemaisyamo Yesus Kristus tavon. Kristus opamo taune po taune aijaseo syeno titi rai ramu. Yara Amisyé wepirati po aijaseo, Po raura Ai pare:

“Masyoto unumeso Syo raura Najjamo:

Winyirati Sya Arikainye pi Winy

muno Risyirati Nya Injaya pi Risy.”*

⁶Muno Amisyé apa दौरa ti ratoe tavon no anemo kajjinta rai pare,

“Winyirati nawaino syene rajja ntoa nuge nuganu,

maisyare Melkisedek amaisy.”*

⁷Arono Yesus no no mine vone so rai, poyov muno Po Amisyé awain akoeve Apa sambaya rai,* weye Amisyé obo pi bambunin Po apaya kakaije rai. Muno Amisyé po apa sambaya umaso raraniv weye Yesus beto Ai anuga mpaaje rautan. ⁸Yesus opirati Arikainyo Amisyé pije, weramu Apa siurijo nande Ai mo anyao indamu beto Amisyé apa bekere rai tenambe. ⁹Muno Apa beto Amisyé aije omamo mamai dave, maisyare omai ti Wepirati po kovo nuge nuganuije raugavo vatano nanawirati ubeto Ai mansai tenambe. ¹⁰Amisyé po Yesus awaino Syeno Titi, maisyare Melkisedek wusyinoe amaisy.

Vemo wasakirive Amisyé ai nora, muno wapo wapa anave rapaya ntami nora

¹¹Sya arakove, ribeker syare syo anakotar manui inta raura wasai indamu anyanyo Yesus muno Melkisedek umaso mbaro wasai. Weramu syo raura kakavimbe wasai omamo nsosobe rave, weye wapa ana wadatantona mamó mavave da nanto rai ramu. ¹²Abo! Weapamo wapanave Amisyé ai nugoenta to, weti syo rakarae weabe kurumbe wapo Apa anyanyo raugaje mamó ama masyote mi so nto. Weramu tugae mamó syo wasaenamó wamaisyare arikainyo tuvanoé! Weti kove mamó vatane wo wasanyao Amisyé apa ayao rai jakato rati, indamu Apa anyanyo moto manasyine, jirume, mandeije wapo ranaun dijati. Weapamo wasaurata irati arikainyo tuvane inta ai, wepirati po anaisyó paparaisy rai dainy, yara po ukame obo raisya nene amaisy. ¹³Vatano po ukame raisye pamo arikainyo tuvane pa, ti pantatukambe pare kakai mi rui muno kove mi rui? ¹⁴Weramu anaisyó paparaisyé mamó vatano apa akoe matu to wepi po raisy. Vatane só aurata irati vatano awa anave matu to. Onawamo wo anyanyo tugae ratantona tutir, muno wo taune manuga raeranande indamu mbambunin. Weti wo kakai, kove raen.

6

¹Weti sya arakove, ibeker indamu wapa anave Kristus aije ntubai miridi nseo. Kristus apa anyanyo raugaje wasai manasyimbe mamó wapo raen to, weti wemo watantuna anyanyo ama ruke só bo raive tutir nora, yara soamo syare wapo anyanyo ama miridi nseo ranyao tutir indamu wapa anave ntindimu. Kristus apa anyanyo ama ruke mi so: anyanyo wansakinavo

* 5:3 Imamat 9:7 * 5:4 Keluaran 28:1 * 5:5 Mazmur 2:7; Ibrani 1:5; Arakow 13:33 * 5:6 Mazmur 110:4

* 5:7 Matius 26:36-46; Markus 14:32-42; Lukas 22:39-46

wama ana wandave ti ngkakai rai; muno anyayao wamanave Amisyé obo ai; ² muno anyayao vatane maugasya kuvuni mana rai; muno anyayao aneme rajjasea ntamijo vatane mai; muno anyayao vatane ukovakato no wene rai; muno anyayao Amisyé apa mangke no tawan. Anyayao tenambe umaso mamó wama anave ama ruke mije. ³ Ranivara Amisyé po wansamayar, indati wamo Apa anyayao ntiti raen.

⁴ Weramu vatano nanawirati makirive Kristus ai ti wo awa anave Aije rapaya ntami onawamo indati usakinav wakare Ai jakato kakai. Wakoe! Vatane wato nawamo Amisyé apa vare mbaró manuga rai to, muno Apa kovo po raugaje mamó wo raen to, muno Apa Anawayo Vambunine mamó Po raugasya mansai to. ⁵ Muno Amisyé apa ayao mamó wo raen to ware omamo ayao ngko dave mijem. Muno Apa vambunine mamó wo raen tavon to, namirati indati Po raroron manakoeve arono munije ama akari. ⁶ Wakoe! Ranivara vatane wato wo rapatimu ware wo awa anave rapaya ntami muno makirive Kristus ai, wea indati usakinav wakare Ai jakato kakai. Weye awa ana wo rave somamo maisyare wo Arikainyo Amisyé auseo sawa rijati muno wo ave arikaimbe no vatano wanui mansamun.

⁷ Syo ananeneae inta raura so: Arono maruge maje mo mine rauwa, umba anare rayanyun dai mamó indati mo mano kove raunande vatano apave nawaisyé rai ai. Mino namije amaúra Amisyé apa kove rai, weti rapararita vatano are nawirati manuga raneka Amisyé ai mansai. ⁸ Weramu ranivara anansinao muno ininaije obo ntubai mine inta rai, weamo ama kove mewen dai. Indati Amisyé po anaamatane inta rapatimugo mine umaso rai indamu taname mo ranen ti mangkur. Vatano nanawirati makirive Amisyé ai onawamo maurata irati mino anansinao namije rai, weti indati Amisyé po mangke raugaje mai.

⁹ Sya arakovo inanuga no wasai, syo raura taije maisy weramu risyanave wasai weapamo wasaurata irati mino anansinao umawe rajje jeben. Yara anakotaro mamaisy muno ngkove wemirati wapo rave, mamaisyó vatano Amisyé po mapaya awa ayao kakaije rajje wo rave ramaisy. ¹⁰ Amisyé opamo mamai dave. Weti animari jirati wapa anakero wapo rajjaro Ai rajje ramu. Muno aemen irati wapa muinyo wapo rarorono Ai rai arono wapo wapa arakovo wanave maeranande tenambe no wusyinoe ndea unumeso. ¹¹ Reambeke dave indamu weapamo nanentabo wapo

ana ngkove umaso rajjar tutira ntoa ama marane rai, indamu ana wasanave ramen omamo indati wapo rajjar. ¹² Weramu vemo wapononae nora, yara wasatawandi tutir! Watavondi vatano ube unanuive wasai mai, nanawirati wanave matuve muno matawandi tutir ava unanta Amisyé apa urairi daunande mansai rai.

Amisyé apa urairi mamó nrandupuisyé ramu

¹³ Arono wusyinoe Amisyé po urairije raokaisyó aneno Abraham ai. Po taune apa tame veano raokaisy weye Apa tame ntiti rave. Vatan inta titi seo rave po Amisyé akivane jeben bayave, weti Amisyé po taune apa tame obo veano Apa urairije raokaisy. ¹⁴ Apa urairijo po raugaje Abraham ai no taiso:

“Syo raurairive syare Syo kove raugaje nai jaje,
muno nya susyo nyo mampame indati wanui rave.”^{*}

¹⁵ Abraham atawandi po ranyut ava po ana Amisyé po raurairive ai rajja to.

¹⁶ Arono vatane ubeker wurairive patimuve, wo tamo ntiti veano raokaisy indamu vatano kaijinta wanave rai. Ranivara wo tamo ntiti veano raokaisy, weamo awa ana wo raura umaso mamó mbambunin dave, weti vatane wo ayao inta rasakinav akananto kakai. ¹⁷ Muno Amisyé po raurairive patimuve tavon weye beker indamu vatano nanawirati Apa urairije nande mai wo raen kakavimbe: Amisyé apa ana po raurairive mamó Po ranigwane ramu, yara teto Apa urairije rai tawan. Weti Po taune apa tame raura arono Po apa urairije raokaisy indamu Apa urairije mbambunin dave. ¹⁸ Amisyé apa urairije mamó mamaisyó rai kobe, muno Apa ana po raurairive patimuve mamó mamaisyó rai tavon. Anakotare jirume umaso mbe ninuwanive jeben, weye Amisyé pangkarive kakai. Apa urairije mo wansanuga rajjasea mbambunin. Weti wanta wanggaugambe Ai indamu ana wansanave ramene indati wandaijar. ¹⁹⁻²⁰ Wansanave ramen namije mamó mo wansanuga rantuna matuve Amisyé ai ti wantanamanin, maisyare oramo kamintu inta rapinto ntuna matuve no mayan ate. Weti wansanave ramene mamó matu muno mbambunin weye Yesus puisyeye wansai siso no Yavaro Amisyé munijo ntiti rai to, muno panawadi Po kaene nsawa unsanda Tanoano Ndandini Dave rajje rapaya ti siso rai to. Soamo be syembe wansai no Amisyé amune rajja ntoa nuge nuganui, maisyare Melkisedek no wusyinoe amaisy.

* 6:14 Kejadian 22:17

7

Syeno Melkisedek

¹⁻² Melkisedek opamo akarijo titi munijo Salem, muno opamo syeno panapatambe Amisyo Titi Rave ai. Tamo Melkisedek ama ine mare “akarijo titi mamaisy.” Muno apa tamo kajijinta mamamo Akarijo Titi Salem, ama ine mare “akarijo titi po saumane raugavo mine so rai.” Arono wusyinoe aneno Abraham to marova rai, po akarijo titi wanui mapinde marova rai. Umba pakare, naije Melkisedek de po Abraham aovambe muno po Amisy anajo indamu Po kove raugaje Abraham ai.² Weti Abraham po ananugo po raugavo apa marova mansaora no munijo marova rai raporor mbe abusyimbe umba po nake intabo raunanto Melkisedek ai. ³ Melkisedek sopamo apa ajae, apa akoe nayamo vatan inta po yaene ramu, muno apa anene awa tame ratoe ramu. Muno apa masyoto avaki muno apa masyoto kakai mamamo vatan inta wo raeno intai ramu. Weti Melkisedek opamo syeno no tawan tutir, maisyare muno Arikainyo Amisy amaisy.

⁴ Weti wandaen Melkisedek opamo vatano panakoe pa, apa tame ntiti rave, weye Abraham beaje ai. Abraham pamo vatano Israel taune awa ajaya piye damu beaje Melkisedek umaso ai muno po ananugo po raugavo apa marova mansaora ama nake intabo raunande ai. ⁵ Weramu Ananyao Musa ama ayao inta mo ratoe mare syeno Yahudi mapatimu no susyo Lewi obo rai. Muno mo ratoe tavon mare arono vatano Yahudi wo awa nawaisyare ama ine ranugande, weamo wo rapora abusyimbe ti wo nake intabo raunanto syeno Lewi mansai inda wisyisyo rai. Weti syeno Lewi wo nake intabo raugav no Yahudi mansai tenambe kai, weramu onawamo taune awa arakove nawa weye awa anene intabo, opirati Abraham. ⁶ Melkisedek pamo avaki no Lewi apa susye rai jeben, weramu tugaeyamo Abraham po ananuge ama nake intabo raunanto ai. Muno Melkisedek po Amisy apa kove raugaje Abraham ai, opi Amisy apa urairije ntuna ai. ⁷ Weti wandaen Melkisedek opamo titi Abraham akivan, weye wamo raenamato vatano po kove raugaje pamo vatano panakoe piye, yara vatano kove raugaje ai pamo vatano mamaun.

⁸ Weramu syeno mavaki no susyo Lewi rai onawamo titi tai maisye jeben. Wo romane nake intabo raugav, maisyare Melkisedek po raugav ramaisy, weramu syeno Lewi una tawane ramu, yara wene nande mai. Yara Melkisedek opamo Ayao

Amisy mo ratoe mare no tawan. ⁹ Arono Abraham po romane nake intabo raunande Melkisedek ai, weamo Lewi taune po raunande ai tavon to ije. ¹⁰ Weye arono Lewi pana ano rainy, opamo no no apa aneno Abraham anasine rai to. Weti arono Abraham nanto Melkisedek ai, weamo Lewi siso to.

Syeno Yesus po syeno Lewi mansamaisy ramu, yara po syeno Melkisedek amaisy

¹¹ Arono Amisy po Ananyao Musa raugaje, po Lewi apa susye maijaseo ube syembe wo vatano Israel maugav indamu ubeta Ananyao Musa ama ananyao rai tenambe. Weramu syeno Lewi awa anakere mo vatane maveti umamai no Amisy amune raije ramu. Wemi mbewar ti Amisy po syeno kajijinta atayao. Syeno napije atayao no Lewi muno Harun aya susye raije ramu, yara po syeno Melkisedek amaisy. ¹² Muno arono varoro syeno Lewi umaso ranigwan, weamo Ananyao Musa ranigwan tavon ti mbe tanamamoambe akatote ramu. ¹³⁻¹⁴ Ana mbeti idaura no somamo wama Amisy Yesus, wepirati po varoro syeno namije ranigwan, Opamo avaki no susyo Lewi raije jeben. Yara vatan tenambe wo raen Yesus avaki no susyo Yehuda rai, muno susyo Yehuda mamamo vatan inta aijaseo be syembe jeben bayave. Weye arono Musa po ananyao syene raugaje wama anene mansai, po inta raurave no susyo Yehuda raije ramu, yara po susyo Lewi obo ratayao anakere syene rai.

¹⁵ Weti arono syeno kajijinta tipu maisyare Melkisedek amaisy, wepirati wama Amisy Yesus, weamo mo raroron kakavimbe Ananyao Musa mamamo ranigwan to. ¹⁶ Yesus aijaseo syene rai mamaisy syeno mo syene rampame rai jeben. Yara Yesus aijaseo syene rai weye Opamo bambunin dave muno kova nuge nuganui. ¹⁷ Maisyare Ayao Amisy ama mo ratoe so ramaisy: Amisy pare, “Winyirati nawaino syene raija nto nuge nuganui, maisyare Melkisedek amaisy.”¹⁸

¹⁸⁻¹⁹ Ananyao Musa mamamo ranigwan to weye ama ananyao mbambunin kobe jeben, mo vatane maugavere Amisy aije ramu. Ama ananyao mbeba marudi weye mo vatane maveti umamai no Amisy amune raije ramu. Wemi mbewar Amisy po ananyao wusyine umaso rapaya, yara soamo Po unanuijo wanyine raroron indamu wande wamararai Ai. Weaveti wansanaveano unanuijo wanyine so ramen weye ama kove mo kovo ananyao wusyine rakivan.

²⁰ Arono syeno wanyine sop, wepirati Yesus, seo be syembe, Amisyé po raurairive Ai pare indati be syembe ntoa nuge nuganui. Weramu syeno kajijinta onawamo Amisyé po raurairive mai tai maisyé jewen.

²¹ Amisyé po raurairive patimuve Yesus ai arono seo be syembe pare, “Risyrati Amisy, Syo urairije so raokaisy: ‘Winyirati nawaino syene raija ntoa nuge nuganui.’

Syo urairije so ranigwane ramu, yara riteto rai tawan.”[✧]

²² Amisyé purairive Yesus ai tai maisy, weti Yesus opi bewar wamo raen tugae urairijo wanyine somamo ngko dave mo urairijo wusyine rakivan.

²³ Umba syo ayao kajijinta raura tavon taiso: Syeno varoro Lewi onawamo wanui arono wusyinoe mansanan awa unumeso, weramu wene nande mansai tenambe. Arono inta kakai, wea umba kajijinta po anigwan be syembe akato. ²⁴ Weramu Yesus pamo kova nuge nuganui, weti vatan inta po anigwan be syembe akato jewen, yara Po anakero syene raijar tutir. ²⁵ Yesus opamo kova nuge nuganui indamu payao terave nande Amisyé ai wansai. Maisyare omai ti, Yesus bambunin indamu vatan tenambe are nawirati ude Amisyé ai weye wanawe Yesus ai wenawamo Po mansapaya kakaije rai no naiso muno ntoa nuge nuganui.

²⁶ Yesus opamo Syeno Titi wepirati po wansaeranande ti mamaisy. Weye Opamo anuga ndandinit, ayao kakai meweno Ai. Amisyé po auguje no vatano wo ayao kakai rave awa yasyine raora, Po aijaseo indamu Apa tuna raije mammo ntiti rave no munijo ntiti rai. ²⁷ Yesus opamo po syeno titi kai rui vayave mansamaisyé ramu. Onawamo wo maere rameseo Amisyé ai masyote yanteter indamu ayao kakai rapaya, manasyimbe taune awa ayao kakai rai umba kawasae awa rai tavon. Weramu wama Syeno Titi Yesus po anakotare rameseo Amisyé ai masyote yantetere jewen, yara Po taune anasine raunande indamu kakai omamo intabo kobe, umba ama kove ntamija nuge nuganui. ²⁸ Arono wusyinoe Amisyé po Ananyao Musa raugaje, vatano nanawirati maijasea syeno titi rai onawamo vatan bayave nawa, awa ayao kakaije no mansai. Ananyao Musa ntamija nugoenta rave, umba Amisyé po urairijo wanyine raugaje akato, Po raurairive patimuve Apa Kavó ai indamu Po aijaseo syeno titi rai. Wama Syeno Titi Yesus sopamo anakotaro

ngkakainoanive meweno Ai, yara Opamo mamai dave noa nuge nuganui.

8

Yesus Kristus opamo wama Syeno Titi piye

¹ Mbe mobe ti syayao dai jakato mi som: Wama Syeno Titi tuna no Amisyó Titi anem ngkove rai no munijo ntiti indamu be akarive atavon. ² Po apa anakero syene raija no Yavaro Amisyé ama Tanoano Nandini Dave rai no no munijo ntiti. Omamo yavaro tugae wansambayambe rai, omirati vatane wo raijaro maneme rai jewen, yara Amisyé taune po ranari.

³ Anakero raugaje syeno titi ai no taiso: po vatane awa anakotaro wo raugavere raunanto Amisyé ai, muno po maere rameseo Amisyé ai mansamarom tavon. Wama Syeno Titi Yesus po ana inta raunande Amisyé ai tavon.* ⁴ Arono Yesus no no mine vone so rai, Opamo awaino syene jewen, weye syeno Lewi una to, onawamo wo maere rameseo Amisyé ai mamaisyó Ananyao Musa rai. ⁵ Syeno Lewi umaso awa anakero wo raijare mammo maisyare raname vayave ma, mbe rarorombe anakotaro no no munijo ntiti rai. Weye wasaemen arono Amisyé po Musa atutir po randumo sambaya ranari, po raura aje ai taiso: “Inya! Winyo ranari mamaisyó Syo rarorono nai no unate rai ramai dave.”[✧] ⁶ Weramu anakero raugaje Yesus ai mammo ama kove ntiti rave, weti mamaisyó anakero syeno Lewi awa rai jewen. Weye urairijo wanyino Yesus po raokaisy omirati ngko dave mije, mo urairijo wusyino Musa po raugave rakiwan. Weye urairijo wanyine mo kovo manakoe raugav, yara urairijo wusyine ama kove mamaun.

⁷ Ranivara urairijo manasyine mammo mamai dave to ratire, weamo urairijo wanyine[†] mammo nde akato ramu. Weramu urairijo manasyine mammo mamai kobe rainy. ⁸ Muno Amisyé po ayao kakai raen no Apa kawasae mansai, weti Po raura pare: “Wadanide! Arono ama masyoto nde

nande, indati Risyo urairijo wanyine raokaisyó Israel mansai muno susyo Yehuda mansai.

⁹ Urairijo namije mammo mo urairijo Syo raokaisyó awa anene mansai no wusyinoe ramaisyé jewen, arono Syo mansaugavuje munijo aro Mesir raora.

✧ 7:21 Mazmur 110:4 * 8:3 Yesus apa ana po raunande Amisyé ai mi som: Po taune anasine raunande indamu kakai (7:27). ✧ 8:5 Keluaran 25:40 † 8:7 Ayao Yunani no naiso mo rateo mare, “urairijo jirume.” Urairijo jirume mamaisyó urairijo wanyine rai, wemi Yesus po raugav. Yara urairijo manasyine mammo Ananyao Musa, wemi raugaje wusyimbe.

Onawamo usai Sya urairi idaugaje mansai rai jewen.

Wemi mbewar inakirive mai.

¹⁰ Weramu Risyamo syare syo urairijo wanyine raokaisyo vatano Israel mansai no masyoto rijat no taiso:

Indati Syo sya ananyao raugasya no awa ana wo ratantona rai muno Syo ratoe no manuga rai.

Indati Risyirati awa Amisy pi Risy, muno wenawamo Sya kawasae nanawije.

¹¹ Weti indati wo awa arakovo yavaruga muno awa arakovo kaijo rui vayave mansanyao akatoe ramu indamu wo rinaen.

Weye vatan tenambe indati wo rinaen: vatano mamaun muno vatano akokoe nao tenambe.

¹² Indati Risyamo syo awa ana wo raveti ngkakai rapaya mansai, muno inakari makato irati awa ayao kakai rai jakatoo ramu.^{*}

¹³ Soamo Amisy po urairijo wanyine raura, weye pare urairijo manasyine mbe wusyimbe to. Weti urairijo manasyine rapaya ra ntami.

9

Randumo sambaya muno koano sambayambe wusyin

¹ Amisy po urairijo manasyin po raugaje Apa kawasae mansai mamu mo koano sambayambe Ai raura kakavimbe muno mo mansanyao indamu randumo sambaya ranari. ² Weti wo randumo sambaya ranari, ama tanoane jirum. Tanoano usye rawainamo Tanoano Ndandini. Yawainye inta ntuna no tanoano namije rai, muno meja tavon, wemirati anaisyo roti raunanto Amisy ai ntuna ama vone rai.^{*}

³ Tanoano jirume mamu kaene ransawa ama unsanda rai. Tanoane so ama tame mi Tanoano Ndandini Dave. ⁴ Tanoano namije mamu tewa oramo emasije veano ranari ntuna rai, indamu syene wo kemenyano mbovove ramero rai. Muno Kasyamo Urairi Amisy ntuna no naije tavon, omamu emasije veano ratavan tenambe. Kasyame umaso ama uga mamu anakotare so randi rai: anomano emasije, wemirati anaisyo manna raugasya ntuna ama uga rai; muno Harun apa isyo ama isyume ntipu rai; muno orame vasye jirum, namirati Amisy po urairijo abusyirati ratoe rai ntuna rai.^{*}

⁵ Muno kasyame umaso ama vone mamu

ana akokoe jirum, yawainamo kerub, yatotovo naito Amisy mansanyi, Amisy po varo ngkovo ntiti ntipu aya yasyin. Muno aya pepake raneka sea no kasyame ama vone raora. Ama vone so ama tame mirati “ayao kakai rapaya.” Weramu soamo syo anakotare so raura tenambe jewen, yara idaura tumaimbe.

⁶ Weti randumo sambaya muno ama anakotaro no no ama uga rai mamu ratayao no tai maisy. Masyote yanteter syene wo awa anakere raijar no tanoano usye rai. ⁷ Weramu tanoano jirum, namirati rawaino Tanoano Ndandini Dave, omamo syeno titi obo pi siso rai. Muno apa siso rai mamu tume intabo, siso rai intabo vayave. Arono rui siso rai, po maere ama mavu raugav, indamu po raunanto Amisy ai taune apa ayao kakai rai muno kawasae awa ayao kakai rai, namirati wo rave weramu wantatukambe omamo ayao kakaije ma.^{*} ⁸ Maisyare wemaisy, Anawayo Vambunine mo raroron mare ranivara randumo sambaya wusyine umawe ta nteta nene muno urairijo wusyine mbe tanamamoambe vatane mansai nene, weamo vatane usisa no Tanoano Ndandini Dave rai kakai. ⁹ Umaso mbe ananeneabe wansai no masyoto unumeso, ama ine no taiso: maero rameseo Amisy ai muno anakotaro kaijo raunanto Ai mo vatane mansanuga ravera ngkakavimbe ramu. ¹⁰ Ananyao wusyine mo koano anaisy raugaje, muno koano mana, muno koano manakea rarandom indamu usambayambe; weti koane so no vatane manakea vone obo rai. Vatane utavondi ananyao wusyine umaso rai java Amisy po apa ananyao wanyine veano ranigwan.

¹¹ Yesus Kristus opamo de indamu be Syeno Titive po urairijo wanyine ama kove raugavo wansai. Soamo wama Syeno Titije so siso no yavaro sambaya munijo ntiti rai to, omi mamai dave muno ntiti jirati randumo sambaya wusyine umawe rakivan. Weye Apa yavaro sambaya mamu no no mine so rai jewen muno vatane wo ranari jewen. ¹² Muno Kristus opamo siso no Tanoano Ndandini Dave rai. Weramu Po kombine, sapijo tuvane awa mavu raugave ramu. Yara Po taune apa mavu raugav, Po raunande intabo kobe indamu Po wama ayao kakai rapaya ngkakavino wansai nuge nuganui. ¹³ Ananyao Musa mo raura mare vatano are nawirati awa ayao kakai nggwambe mansai no Amisy amun, weamo kombine, sapijo wo maotar awa mavu rakapaputinaje manakea rai, muno wo sapijo tuvane ramer ama kapume

^{*} 8:12 Yeremia 31:31-34 ^{*} 9:2 Keluaran 25:23-40; Imamat 24:1-9 ^{*} 9:4 Keluaran 16:33, 25:10, 30:1; Bilangan 17:8; Ulangan 10:3-5 ^{*} 9:7 Imamat 16 ^{*} 9:13 Imamat 16:3, 15-16; Bilangan 19:9

rataopondi manakea rai tavon indamu mo rarondoma ukakavimbe.*¹⁴ Yara Yesus Kristus apa mavu mamai dave, mo mavu umawe rakivan, weti mo ayao kakai wansanuga so rarondom ti ngkakavimbe vintabo indamu wamanapatambe Amisy noa pitawabe ai. Weye Kristus, wepirati apa ayao kakai meweno Ai, Po taune anasine raunande indamu kakai, Apa mavu nsororopo wansai, omamo raurata irati anakotaro rameseo Amisy ai. Anawayo Vambunin, wemirati no pitawabe, Omi mo vambunine raugaje Kristus ai indamu Po anasine raunande kakai.

¹⁵ Wemi mbewar ti Kristus po urairijo wanyine umawe raugav, indamu Opamo be marimbe Amisy ai muno vatane mansai. Wirati indamu vatano are nawirati Amisy po mawain, onawamo awaura Apa kovo ngko dave Po raurairive rai, wemirati noa nuge nuganui. Anakotare so nde nande weye Kristus kakai to, Apa kakaije mo vatane mansapaya irati awa ayao kakaijo wo rave arono urairi wusyine ta ntami we.

¹⁶⁻¹⁷ Vatano mine so wama koane inta maisyare so: Ranivara vatane inta apave ananuge inta rai umba beker pare po raugakaje apa arikainye mansai arono wene nande ai, weamo po apa bekere ratoe nyovara wao inta rai wusyimbe indamu arono apa masyoto wene nde toyamo vatane wo apa ananuge raosor mamaisyo apa bekere umawe rai. Weramu arono vatane umaso ta tunana nene, weamo apa ananuge raosoro apa arikainye mansai rainy.¹⁸ Weti koane umaso mo raroron: Vatane inta apa wene omirati mo apa urairijo po ratoe raveti mamaisy. Muno Amisy apa urairijo manasyin maisyare wemaisy tavon, weye wene inta mo raokaisy arono mavu nsororop. No taiso: ¹⁹ Manasyimbe Musa po Amisy apa ananyao raura kakavimbe vatano Israel mansai vintabo. Umba po sapijo tuvan inta aubaisy, muno kambino anya inta tavon. Musa po aya mavu raugav, po mana veano raroyar. Umba po maere ama ananemane ransukapo umbai inta rai daugasyo daunsundi mavu so rai, po rakapaputinaje bukugo mo ananyao Amisy ratoe ama vone rai, muno vatano Israel makari rai tenambe.²⁰ Umba Musa po raura aje Israel mansai pare, "Somamo mavugo mo Amisy apa urairije so raokaisy wasai pare indamu wabeta Apa ananyao rai tenambe."*²¹ Maisyare wemai tavon, Musa po mavu rampapato randumo sambaya rai muno ama anakotaro ratayao sambaya rai rai vintabo.²² Ananyao Musa mo mavuge raura mare kavintare

anakotar tenambe mamu mavuge mirati mo rarondoma ngkakavimbe. Weti ranivara mavuge inta raugaje jewen, weamo vatane awa ayao kakai mamu rapaya ramu.

Kristus po anasine raunandea kakai intabo kobe indamu Po vatane awa ayao kakai rapaya

²³ Randumo sambaya umawe muno ama anakotaro ntuna ama uga rai omamo raurata anakotaro kakui no no munijo ntiti rai. Anakotaro mine somamo maere awa mavu rajasea ngkaputinaje rai indamu ngkakavimbe. Weramu anakotaro kakui no no munijo ntiti ngkakavimbe omamo maere awa mavu mi mo rarondoma jewena, yara Kristus apa mavu, wemirati ntiti rave mamaisy.²⁴ Weye Tanoano Ndandini Dave vatane wo ranari umawe mamu Kristus siso rai jewen, weye wemamo mbe ranameve vayave irati yavaro sambaya tugae no no munijo ntiti rai. Yara Kristus siso munijo ntiti rai, soamo payao wansai no Injayo Amisy amune rai.

²⁵ Syeno titi Yahudi nawamo tume yanterer usisa no Tanoano Ndandini Dave rai indamu wo maere awa mavu raugav wo raunanto Amisy ai. Weramu wama Syeno Titi Kristus opamo po taune apa mavu raugav po raunanto. Muno daunanto, daunanto rijati jewen, yara intabo kobe.²⁶ Weramu ranivara Kristus po anasine raunanto tutir datire, weamo Apa siuri ti kakai omamo nande tutir kobe no arono Amisy po nuge so ranari kobeyoea nde nande no naiso. Wakoe! Omamo mamaisy ramu! Yara Kristus de no mine so intabo kobe arono munije ama akari mararaije so, wirati Po anasine raunandea kakai indamu Po vatane awa ayao kakaije rapaya.²⁷ Amisy po vatane wansapatimu wangkakai mamu intabo kobe. Mewen to, marane mamu Po wansanajo wama ana wandave rai indamu Po ayao mamaisy rapatimugo wansai.²⁸ Kristus kakai intabo kobe tavon, Po anasine raunandea kakai indamu Po vatano wanui awa ayao kakai ranawan. Indati pakare intabo akato no mine so rai, omamo indamu Po ayao kakai ranawan akato ma jewen, yara indamu Po kove raugavo vatano rui nawirati wo anyute mansai indamu usisa Apa muni kove rai.

10

Yahudi awa anakotaro wo rameseo Amisy ai mo ayao kakai rapaya kakai, yara Kristus apa mamaisy

¹ Ananyao Musa mbe ranameve anakotaro ngkovo makanande rai. Ananyao Musa maisyare raname ramaisy, yara

* 9:20 Keluaran 24:8; Markus 14:24

anakotaro kakui ngkov no irati Kristus ai. Mamaisyo Ananyao Musa raijamo, anakotare rameseo Amisye ai omamo vatane wo rave tume yanteter. Weramu mo vatano ude usambayambe umaso maveti umamaisyo Amisye amune raije ramu. ²Ranivara mo vatano usambayambe nanawije awa ayao kakai rarandom tugae ratire, weamo awa ayao kakai wo ranaun no manuga rai mamu mowen to. Muno ranivara anakotaro rameseo mo awa ayao kakai rarandom datire, weamo vatane wo anakotare rameseo tutibe tume yantetere ramu. ³Weramu wandaene mamu awa sambaya wo anakotare rameseo Amisye ai tume yanteter namije mo maveti makari makato irati awa ayao kakai wusyine rai. ⁴Weye sapije, kamine awa mavu mamu mo ayao kakai rapaya kakai.

⁵⁻⁷ Wemi mbewar arono Kristus de no mine so, Po raura nanto Ajayo Amisye ai taiso pare:

“Injae Amisy, Winy nanuga no irati maero raotar muno anakotaro vatane wo raunanto Nai raije ramu.

Vatane wo maere rameseo Nai muno wo ama mavu raunanto indamu ayao kakai rapaya,
omirati mo nanuga raveti ranayanambe kobe jeben.

Yara rinanasine somamo Nyo ratayao indamu Syo raunanto.

Weti Syo raura syare, ‘Injae Amisy, Risyi so! Ride indamu Syo Nya mbekere rave mamaisy,

maisiyare Nya bukuge mo rinaura no ama ayao mo ratoe rai.’ ⁸

⁸ Kristus apa ayao umaso ama ine no tai rui? Manasyimbe payao pare, “Injae Amisy, Winy nanuga no irati maero raotar muno anakotaro vatane wo raunanto Nai raije ramu. Muno maere rameseo muno ama mavu raunanto indamu ayao kakai rapaya, omirati mo nanuga raveti ranayanambe kobe jeben.” Weramu Ananyao Musa mo vatane manyao indamu wo koane unaso rarijat tenambe, weti Kristus apa ayao noare rui? ⁹ Umba Po raura nakato pare, “Injae Amisy, Risyi so. Ride indamu Syo Nya mbekere rave mamaisy.” Ayao umaso mare ananyao wusyine mamu rapaya ntami to. Muno ama koano anakotare rameseo muno ama koano mavu raunanto Amisye ai omamo rapaya tavon. Umba Po ranigwan akato pamo Kristus taunep. ¹⁰ Weti Kristus po Amisye apa bekere rarijat ti Po taune anasine raunandea kakai, Po raunande intabo kobe.

Apa ana po rave so mo wama ayao kakai rapaya wansai ti wangkakavimbe ntoa nuge nuganui.

¹¹ Arono ananyao wusyine raijoe, syeno Yahudi nawamo usai no tewa orame ama usye rai indamu wo anakotare raunanto Amisye aijo kawasae wansai. Masyote yanteter wo anakere umaso raijar akato tutir, weramu wo raijara marudi, weye anakotaro rui vayave wo raunanto Amisye ai mamu mo ayao kakai rapaya kakai. ¹² Weramu Kristus apa ana po raunanto Amisye ai mamu Po rave intabo kobe arono Po taune anasine raunandea kakai indamu Po ayao kakai rapaya. Muno Apa kakaije umaso mo kove raugavo vatane mansaija nuge nuganui. Arono Po apa anakere umaso raijara mowen to, umba seo no munijo ntiti rai, tuna no Ajayo Amisy anem ngkove rai indamu be akarive atavon. ¹³ Soamo Kristus tuna no naije Po ranyut ava Amisye po apa marova maveaje no Kristus ajo ate rai,* indamu Kristus be akarive mai. ¹⁴ Po anasine raunande ti kakai intabo omamo mo vatane maveti umamai dave no Amisye amune raija nuge nuganui, nanawirati awa ayao kakai manuga Po rarandom indamu ndandinit.

¹⁵ Muno Anawayo Vambunine mo raura kakavimbe wansai mare anakotare umaso mamu no rai tugae. Ama ayao no taiso:

¹⁶ “Amisye po raura pare:

‘Risiamo syare syo urairijo wanyine raokaisyo Sya kawasae wansai no masyoto rijat no taiso:

Indati Syo sya ananyao raugasya no manuga rai
muno Syo ratoe no awa ana wo ratantona rai.

¹⁷ Indati awa ayao kakai muno awa ana udave mamune mamu
inakari makato inta rai jakatote ramu.’ ¹⁸

¹⁸ Soamo Amisye po wama ayao kakai rapaya to, weti indati wamo anakotare rameseo Ai maisiyare wusyineo ramaisy akatote ramu.

Kristus po unanuije raneka indamu wansisa Amisye amune rai

¹⁹ Maisiyare omai ti, sya arakove, wambambunin ti wansisa no Tanoano Ndandini Dave rai indamu wananta no Amisye amun. Yesus kakai ti Apa mavu nsororopo wansai wemirati mbewar ti wanjanive jeben. ²⁰ Weye Po unanuijo wanyine inta rare wansai, omirati wamo raito wanjaisyo rai. Weti kaene ransawa tanoane umaso ama unsanda rai mo wansaorai jakatote ramu, yara wamo raron

ti wansisa kobe. Muno Kristus taune anasine raurata kaene ransawa umaso rai, weye Po anasine raunandea kakai indamu Po unanuije raneka wansai wansisa Amisy ai. ²¹ Weti wamaura irati Syeno Titi inta ai, Wepirati be akarive Amisy apa yavaruga mansai tenambe. Opamo Yesus Kristus, muno Amisy apa yavaruga nawirati Apa kawasae wam. ²² Weti wade wamararai Amisy ai wama sambaya rai, wansanuga tugaive rautan muno wama anave ntindimu. Weye wama ayao kakai wansanuga rai mamo Kristus apa mavu mo rarandom, muno wansanasine mamo mana ndandinite veano rayajam bintabo to.

²³ Arakove, wamo Kristus aura wamare wansanave amen, weti vemo wama-maundive Ai nora. Yara syare wama anave ntindimu, weye Amisy pamo teto Apa urairije rai tawan. ²⁴ Syare wamo wansanyo vambinibe indamu wamo muinye raroron muno wamo ana ngkove rave tutir. ²⁵ Abo! Arakove inta wanunugambe usambayambe akatoe ramu, yara wo rapaya to. Arakove, syare wamanunugambe wansambayambe Amisy ai omamo vemo wandapaya nora! Yara syare wamo wansanyo vambinibe indamu wansanuga mbambunin. Muno wamo rave tutir dave weye Kristus apa masyoto pakare raije mararai to.

Vemo wansakirive Kristus ai jinya muno wama anave Aije rapaya ntami jinya

²⁶ Sya arakove, vemo wapo wapa anave Kristus aije rapaya ntami jinya! Weye ranivara wamo Apa ayao tugae raen to, weramu wamonayo rai jakato yara wamo ayao kakai rave tutir, wea indati ana mo wama ayao kakai rapaya wansai omamo mewen. ²⁷ Muno ranivara wansakirive Amisy ai tai maisy, indati wanjani dave weye ana mo wansanyut no wama usye mamo nami so: mangkeo Amisy pare po rapatimu vatano mine so mansai, muno Apa tanamo mbadurur mo vatano umarovave Ai mansanen ti makanive. ²⁸ Arono wusyinoe, ranivara vatane inta po Ananyo Musa rawatambe ti beto rai jeben, umba vatane jirum dako mandei dako wo aeno rai ti wo raura kakavimbe no awa akarije amun, weamo mangke raugaje vatano napije ai. Apa ayao kakai umaso mamo rapaya ai jeben, yara mangke raugaje ai indamu kakai. ²⁹ Sya arakove, wadanide! Mangke wusyinoe maisyare wemaisy, weti wandaen vatano are nawirati wonayo Arikainyo Amisy ai indati awa mangke nande mai manakoe rave, mo mangke umawe rakivan bintabo!

Yesus apa mavu omirati mo Amisy apa urairijo wanyine raokaisy, muno nsororop indamu mo vatano nanawije awa ayao kakai rarandom. Weramu onawamo wo Yesus ave arikaimbe, muno wo Apa mavu raura tantunawi ware omamo ana tamoe ma. Wo Anawayo Vambunine raura tantunawi tavon, Wemirati mo Amisy apa kove raugaje wansai. Tugae, vatane wato indati mangke raugaje mai! ³⁰ Weye wamo raen Amisy wepirati po ayao so raura to pare: "Risya syo kakai rasakinavo vatano wo kakai rave mansai. Taune Sya varore mije, indati Syo awa mangke raugaje mai." Muno Po raura tavona pare, "Indati Syo sya kawasae manajo awa ana udave ti ngkov muno ngkakai rai." ³¹ Wakoe! Wan-jani dave vemo Amisy noa pitawabe Apa mangke maje wansai!

³² Syare wasaemen wapa wusyinoe rai arono ayao kove mbaro wasanuga rai. Arono naije wapanave Kristus ai to, umba siurijo manakoe nande wasai weramu wasatawandi panyoambe rai tutir. ³³ Intanamo vatane wo wasakaajian muno wo wasatawandi no vatano wanuije mansamun. Muno arono vatane wo wapa arakovo wanave mave tatugadi, watavondi wasiuri wapa arakove so matavon. ³⁴ Arono wo wapa arakovo wanave Kristus aije inta maisyore makova tanoano makova rai to, wasaemeno mai ti wapo maeranande. Arono wo wapa ananuge raugavo wasaora tenambe, weapamo waparije ramu yara wasanayanambe, weye wapo raen indati weapaura ananugo ngkovo ntiti rai, omamo ntamija nuge nunganui.

³⁵ Maisyare omai ti, vemo wapo wapa anave rapaya nora! Yara wasanuga ntindimu wapa anave rai, wea indati Amisy po ama ine raugaje wasai. ³⁶ Weti syare wasatawandi indamu wapo Amisy apa bekere rarijat, wirati indamu Apa ana po raurairive indati wapaura rai. ³⁷ Maisyare Ayao Amisy mo ratoe mare:

"Masyote mamo soa nggwaravainy akatoe ramu,
yara kavinta nakato Vatano wapo anyute de nande.

Opamo de maneai jeben.

³⁸ Muno vatano nanawirati umamai no Inamune rai
indati ukova nuge nunganui weye wanave.

Weramu are nawirati makirive Rinai,
indati inanayanambe mai jeben." ³⁹

³⁹ Sya arakove, wamamo vatano mansakirive Amisy ai ti ukakai nawirati

wama jewena. Yara wamamo watano wamanave kobe, weti Amisye po wansapaya kakaije rai indamu wangkova no tawan.

11

Aneno wusyine awa anave Amisye ai

¹ Arakove, anave mammo maisyare so: wansanuga ntindimu Amisye ai, wamare anakotaro wansanave ramene mammo indati nande wansaneme rai, muno ana raeno wansami rai ma jewen, wamo raen omamo no tugae. ² Wama aneno wusyine awa anave wemi mbewar Amisye anayanambe mai.

³ Muno wama anave wemi mbewar wamo munije tename so raen wamare Amisye pi po ranari anamote bo rai. Muno ana raeno wansamije rai jewene omirati Po raveano ana wamo raeno wansamije rai so ranari.

⁴ Aneno Habel apa anave mbewaramo po maere inta raotar po rameseo Amisye ai. Apa ana po raunanto Amisy ai mammo ngko dave, yara apa anuijo Kaina apa mamsisye ramu. Amisye anayanambe Habel apa ana po rameseo Aije rai muno Po apa anave raen, weti pare, "Habel mamai no Rinamune rai." Habel opamo kakai to, weramu ndea unumeso apa ana po rave ngkino wansai tutir, weye apa anave mbe ananuive wansai.*

⁵ Aneno Henok apa anave wemi mbewar wene nande ai ramu, yara Amisye de po augavo anasino kovo rautan tenambe to no munijo ntiti. Weti vatane wo akanija marudi, unanta ai jewen, weye Amisye po augaveto to. Ana nande ai som, Ayao Amisye mo ratoe mare arono Henok aijaseo rainyamo opamo watano Amisye anayanambe ai. ⁶ Weramu watano apa anave meweno ai opamo po Amisye anuga raveti ranayanambe ramu. Weye are pirati beker pare de mararai Amisye ai, opamo panave pare Amisye pamo no tugae, muno panave pare Amisye indati po kove raugaje watano are pirati po akani Ai.

⁷ Aneno Noak apa anave mbewar ti beto Amisye apa ayaowe rai. Weye Amisye po ana nande no masyoto rijate raura Noak ai wusyimbe to pare manayam akoe indati njamo mine vone so rai vintabo. Noak beto Amisye ai ti po nyomane inta ranari indamu wepe apa yavaruga nawe usea rai ti umanutu ramu arono mana nseparo munije rai. Noak panave kobe Amisye ai, weti apa anave mbewar Amisye po raura pare Noak opamo mamai no Amune rai, yara Po mangke raugaje watano mine vone so mansai.

⁸ Aneno Abraham apa anave mbewar ti beto Amisye ai arono Amisye po awain indamu to no munijo kaijinta rai, purairive pare, "Abraham, indati Syo munijo namije raunande nai indamu winyaura rai." Weti Abraham puje taune apa munije raora, poroto kobe, weramu apa to rai mammo pantatukambe rai.* ⁹ Muno Abraham apa anave mbewaramo arono nande no munijo Amisye po raurairiveowe, opamo tuna no naije maisyare watano marano de amaisy. Abraham tuna no randume inta rai, muno apa kavo Isak muno apa ajavi Yakob itantuna randume rai tavon. Onayamo Amisye po apa urairi umawe raugaje yai tavon indamu ayaura mino namije rai tavon.* ¹⁰ Abraham pamo atawandi tutir, weye apa ana po ranyute mammo mino namije ma jewena, yara beker tuna no munijo Amisye po ranari no munijo ntiti, wemirati ntuna matuve no tawan.

¹¹ Abraham apa anave mbewar apa arikainye inta aeno ai. Weye Abraham opamo be vatan anuive rave to muno apa anamu Sara omamo wanya nte bayave ma, weramu Amisye po vambunine raugaje yai indamu yo arikainye inta avaki. Weye Abraham panave mbambunin no anuga rai pare Amisye teto Apa urairi rai mamai kobe. ¹² Tugae, Abraham opamo be vatan anuive to, anasine mbambunin akato indamu po arikainye mansaen omamo mewen to. Weramu vatan intabo umaso pamo bakipambea apa susye ntepekan, awa wanui ratore kakai, maisyare tumo naumo warae ramaisy muno nayavo ntuna no mayane warave ramaisy.

¹³ Vatan tenambe umaso wanave kobe yava wene mo mauga to. Wo anakotaro uma Amisye po raurairiveowe rajiare ramu, weramu manayanambe weye werato wo urairije ama masyote raen nggwaravaimbe to. Wo raura kakavimbe ware, "Reamamo reana no mine vone so maisyare watano marano ude mansamaisy."* ¹⁴ Vatano wo raura taije maisy wo awa muni tawane rakani indamu una rai. ¹⁵ Weramu awa munijo wusyino wuje raora omamo makari makato rai ramu. Weye ranivara ubekero awa munijo wusyine umaso rai ratire, weamo maweso wakata rai. ¹⁶ Yara mansanuga nto irati munijo kaijinta rai, omamo no no munijo ntiti, ama kove mo munijo wusyine ama rakivan. Weti arono wo Amisye awaino awa Amisy, weamo Amisye samane maije ramu, weye tugae Po munije inta ratayao mai no munijo ntiti rai.

¹⁷⁻¹⁸ Abraham apa anave mbewar po

* **11:4** Kejadian 4:2-10 * **11:8** Kejadian 12:1-5 * **11:9** Kejadian 26:3, 35:12 * **11:13** Kejadian 23:4; 1 Tawarik 29:15

apa kavo Isak augav indamu po ameseo Amisyeye ai, indamu Amisyeye po Abraham apa anave raen omamo tugae rako? Amisyeye po raurairive Abraham ai to pare, "Indati nya kavo Isak napiso Syo atayao indamu winanto irati susyo idaurairive nai we rai."¹⁹ Amisyeye purairive tai maisy, weramu Abraham panatatayaube indamu po apa kavo intabo umaso aotar po ameseo Ai. ¹⁹ Weye Abraham po ratantona pare, "Ranivara Isak so kakai, wea indati Amisyeye bambunin po aijaseo kovakato." Abraham pare beramu po Isak aotar, umba Amisyeye po apaya kakaije rai, weti somaisyamo kovakato no wene rai.

²⁰ Umba aneno Isak apa anave mbewar po Amisyeye apa kovo makanande raurairive apa kavo Yakoba pe Esaua pe yai.²⁰

²¹ Aneno Yakob apa anave mbewar irati arono be vatan anuive to ti pararai kakai rai, po aneme rajaseo po kove raugaje Yusup apa arikainye jirume yai. Umba sambayambe beaje Amisyeye ai, teta nanto saroro apa isyo rai.²¹

²² Aneno Yusup apa anave mbewar arono pararai kakai rai, po vatano Israel awa wuje no Mesir raura wusymba. Muno po ayao inta raura tavon indamu arono indati wuje, wo apa pae raugav tavon.²²

²³ Anave mbewar arono Musa avakija jeben, apa vatan anui yo angkokaibe embae mandei, weye yo aen opamo arikainyo ko dave. Arono naije Akarijo Titi Firaon apa ayao maje indamu vatano Yahudi awa arikainyo anya mano aje maubaisy tenambe, weramu Musa apa vatan anui yo Firaon apa ayao so rasyanive ramu.

²⁴ Musa apa anave mbewar arono panakoe to, ponae Firaon apa ajavi waino aiji. ²⁵ Weti Musa tuna tutir no Firaon apa yavare rai jakatoe ramu weye ponae tavondi ayao kakai ama marinsene rajiji weye ama marinsene ntamija nugoenta ramu. Yara po raura patimuve indamu tavondi Amisyeye apa kawasae awa siurije rai. ²⁶ Musa po munijo Mesir ama romane ratantona ramu, pare ama ngkove mamomamaun. Yara po siurije ratantona pare ranivara vatane wo aura tantunawi weye anaveano Mesias amen, ama ngkove mamomanakoe. Weye apa ana po ranyute mamokovo Amisyeye indati po raugaje ai no masyoto rijat.

²⁷ Musa apa anave mbewar puje munijo Mesir raora ti to kobe, yara po akarijo Mesir apa pari rasyanive ramu. Muno atawandi weye po Amisyeye vatane wamo aeno wansamije rai jeben aen to. ²⁸ Muno Musa apa anave mbewar beto Amisyeye apa

ayao rai, weti po vatano Israel mansanyao indamu wo maero domba apa mavu veano awa yavare ama unsanda uje raiman indamu arono naito Amisyeye po wene raugav paje no munijo Mesir, vemo po Israel awa arikainyo ananuiny maubai nora. Maisyare omaisy, Musa po vatano Israel manyao indamu wo Ono Paska rave.²⁸

²⁹ Vatano Israel awa anave mbewar wo Mayano Nijam raotar maisyare wanya no mino ngkanene rai weye Amisyeye po mana umaso ratugar. Weramu arono vatano Mesir wo mawatan ava ware wo raotar tavon, naije kobe mayane mbuvar akare mo matatu vintabo ti umanutu.

³⁰ Muno vatano Israel awa anave mbewar, munijo Yeriko ama yan akoe mandamisy arono usarirae daija masyote kaururum. ³¹ Anave mbewar wanya anaerer Rahap ngkakai jeben arono ama munijo Yeriko umaso mandamisy muno vatano wonae ubeta Amisyeye ai ugwenen bintabo. Weye Rahap so manawe Amisyeye ai ti mo vatano Israel nanairati ije yo munije ranyanyuti yaugav inya no ama yavar, mo yaeranadu.

³² Wakoe! Ranivara syare syo wama anene awa anave Amisyeye aije ratodi tenambe, indati syayao nggwaravain dave! Maisyare Gideon, Barak, Simson, Yepta, Daud, Samuel muno anawae Amisyeye tenambe. ³³ Weti wama anene awa anave mbewar ti:

wo akarijo titi munijo marane mapinde; wo ana mamaisyeye rave no munijo ube akarive rajije rai; wo anakotaro Amisyeye po raurairive mai rajia to;

wo makeo singa ansopi ti po matao ramu.

³⁴ Wo tanamo mbadurure rapamo ti mo mansanene ramu;

unajiv ti awa marova wo maubaisyeye awa anaiyu rai ramu.

Manasine mayondi, weramu Amisyeye po vambunine raugaje mai.

Usisa marova rai, Amisyeye apa vambunine rautan, ti wo awa marova marane mapinde.

³⁵ Anave Amisyeye ai mbewar wanya inta nawamo awa arikainye ukovakato no wene ama uga rai. Vatano kajjinta onawamo wanawe ntindimuve Amisyeye ai arono vatane wo mansewabe. Wo awa siurije umaso rawatambe ramu, weye ubeker ukovakato namirati kovo munijo ntiti obo rai. ³⁶ Inta nawirati awa anave mbewar vatane wanaikebe mai muno wo manepati. Kajjinta onawamo maokaisyeye waijo besi rai, mausiso makova tanoano

* 11:17-18 Kejadian 21:12 * 11:20 Kejadian 27:27-29, 39-40 * 11:21 Kejadian 47:29-48:20 * 11:22 Kejadian 50:24-25, 13:19; Yosua 24:32 * 11:28 Keluaran 12:1-14

makova rai. ³⁷ Inta nawirati orame rave maepara ugwenen; inta nawirati gergaji rave maotara ugwenen;* inta nawamo maubaisyo omake rai. Inta wanya awa ansuno domba muno kambine ama kea rautan, awa ananuge meweno mai, muno vatane wo mansave tatugadi muno wo mansewabe. ³⁸ Unajiv no nugo vabukane vono maninimbe muno usea wasya no unate rai. Awa yavare meweno mai, yara usisa unaki no tinda muno atentemo rui mi unanta rai. Vatano ko dave umaso wo Amisye anuga raveti ranayanambe, weti wo vatano mine so mansakivan bintabo.

³⁹ Anene umawe wenanawamo Amisye anayanambe mai tenambe weye wanave no tawano Ai. Weramu arono onawamo una no mine vone so rai, wo anakotaro uma Amisye po raurairiveowe rajjare ramu. ⁴⁰ Wo rajjare ramu weye Amisye beker po kovo ngko dave inta ratayao wansai. Amisye apa bekere mi som: pare Apa ana po raurairive aneno wusyine mai indati nde nande arono wantavondi mai indamu wenawe wamaura rai kava. Wirati aneno wusyine maveti umamai dave wansatavon.

12

Wansatawandi wantavondi unanuijo Amisye po ratayao wansai rai

¹ Sya arakove, vatano wusyine umaso wanui rave wo wansakijani, awa anave mbambunin mbe unanuive wansai indamu wantavondi Amisye ai kobe tavon. Weti wade wamo ana mangke wansai rapaya ntami, muno wamo ayao kakai rawatambe, wemi mo wansamune ransosobe. Yara wansatawandi wantavondi unanuijo Amisye po ratayao wansai rai, maisyare vatano wansanan panyoambe mansamaisy. ² Muno syare wansami nterero Yesus obo ai, Wepi po unanuije rausiso wansai indamu wamanave, muno Wepi po wansaeranande wama anave rai no manasyin ava nto ama marano matu wansai rai. Yesus atawandi siuri rai no inyo kapite rai, muno Po rawatambe ramu. Kakai no inyo kapite rai omamo mbe samaneve,* weramu Yesus po samane umaso ratantona ramu weye kovo indati nande no marane obo mi Po ratantona. Soamo tuna no Injayo Amisy anem ngkove rai no munijo ntiti indamu be akarive atavon. ³ Wasaemen irati Yesus apa siurije rai, Opamo siuri arono vatano awa ayao

kakai ntapekano mai umarovave Ai wo ave tatugadi. Syare wasaemen Apa siurije rai indamu arono siurije nande wasai, vemo wamayondi nora muno wasanuga mamaun nora. ⁴ Weye weamarovave ayao kakai mo wasatopane rai, weramu wapa mavu ntende rai jewen, muno vatane inta wo wasaubaisye jewen. Weti syare weasatawandi tutir.

⁵ Muno vemo wasanimari jirati Amisye apa anyanyao so rai nora, wemirati Po raugaje wasai weye weapamo Apa arikainye nawirati weap. Apa anyanyao no taiso:

“Sya arikainy, syare wapo Sya anyanyao raraniv arono Syo wapa ayao kakai raura kakavimbe nande wasai.

Vemo wasanuga mamaun nora arono Syo wapa ayao kakai raroron kakavimbe wasai.

⁶ Weye vatano rimuinyo mansai nawamo Syo manepato Sya ayao rai.

Muno are nawirati Sya arikainye waino mai nawamo Syo manepat indamu ubeta Sya anyanyao rai.”⁶

⁷ Wamo raen ajae mine so wo awa arikainye manepat arono awa ana wo rave ngkakai, weti ajae inta pamo indati po apa kavu anyanyut bayave jewen. Weti arono Amisye po wansanepat, weamo wansatawandi rai. Weye ranivara wamamo Amisye apa arikainyo waino wansai, weamo Po wansanepat. ⁸ Muno Po vatan tenambe nanawirati Apa arikainye waino mai manyao muno Po manepat. Weti ranivara winyamo Amisye po nanepate jewen, omamo mare winyamo Apa arikainyo tugae pi winya jewena. ⁹ Wan tenambe wamaura ajae una no mine so mansai, onawamo wo wansanyao muno wo wansanepat, ti wambeaje mai. Wambeaje wama injayo mine so mansai tai maisy, weti kove wama wama Injayo no no munijo ntiti, wambeta Ai rave arono Po wansanyao, wirati wangkova nuge nuganui! ¹⁰ Wama injae mine so nawamo wo wansanyao muno wo wansanepat arono ta wambe arikaimbea nene mamaisy awa ana wo ratantona ngkove rai. Weramu Amisye po wansanyao muno Po wansanepat omamo mamai dave, Po rave indamu ngkovo wansai, wirati wamamo vatano wansanuga ndandinit mo taune anuga ramaisy. ¹¹ Arono rui wama Injayo Amisye po wansanepat, weamo wamoyov wama yorame rai. Weramu arono Po wansanepat, weamo ama marane

* **11:37** Yahudi awa ayao wusyine mare anawae Yesaya pamo gergaji rave aotar ti kakai. * **12:2** Arono nugo Roma rajjamo, ranivara vatane inta apa ayao kakai mamun mamun dave, maisyare panaonoambe rako, po vatane aubai dako, weamo pemerinta po mangke raugaje ai indamu kakai no inyo kapite rai. Ayao kakai meweno Kristus ai, weramu arono kakai no inyo kapite rai, omamo mbe samaneve weye vatano wanui wo aen sawa ti wo rakarae ware opamo vatano mamune pa. * **12:6** Amsal 3:11-12; Ayub 5:17

mamo mo kove so raugavo wansai: mo kovo saumane raunande wasanuga rai muno mo wansanyao ti wama ana wandave mamaisy.

Ananyao raugaje vatano wanave mansai

¹² Maisyare omai ti, sya arakove, vemo wapa anave mayondi nora muno wasanuga mayondi nora, yara wapo wasanyao vambinibe ra wabambunin. Wasaurata irati vatano pansanan panyoambe ti to siso amaisy, opamo po anemo mayondi muno apa vukano ntutare rajjasea mbambunin ti pansanan tutir. ¹³ Muno syare wapo Kristus arijat sarokibe, wirati indamu vatano wo wasarijade nanawirati awa anave mayondi indati maijasea ubambunin. ¹⁴ Syare wabeke dave indamu wasanuga nsaumano vatane mansai tenambe, muno wabeke dave indamu wasanuga ndandinit. Weye vatano manuga ndandinite jeben indati wo Amisy aene jeben. ¹⁵ Weti wabekobe rave indamu vemo inta nakirive Amisy apa kove rai nora. Muno vemo inta nya pari ntipu no wapa yasyine rai nora, weye vatano pari opamo maisyare moaro mamune ramaisy, weye po apa arakovo wanui awa anave ransosobe ti wo anakotaro ngkakainoanive rave. ¹⁶ Vemo weapamo inta nyo anaerere rave nora. Vemo inta nyonayo Amisy apa kove rai nora, maisyare Esau amai nora. Esau opamo arikainyo anui pije ti arono ajayo Isak pare kakai, indati apaura ajaya apa anakotare rai tenambe. Weramu ponayo apa kovo arikainyo anui umaso rai, yara po raunanto apa rijato Yakob ai, weye anuga ntende apa anaisy rai. ¹⁷ Umba masyoto rijat akato Esau po ajaya anajo indamu po apa kove raugaje ai. Po anajoa ami ngkaru ntende vone rai, weramu bea marudi. Weye ajaya ponae, ti varore inta no ai jakatoe ramu.*

Wamamo Amisy apaura wansai ti anakotare inta mo wansapinde kakai

¹⁸ Weapamo wapa wade mararai Amisy ai omamo mo aneno wusyine awa ude mararai Ai ramaisy ramu. Weye arono ude mararai Unato Sinai rai, wo raene mi so: tanamo mbadurur muno kijaowe, kumuro ntapekan muno ovaro panyoan dave nande.* ¹⁹ Tavuna inta ngkin muno anamot akoe inta ngkinde mansai. Arono vatano Israel wo Amisy anamote umaso raraniv, ujani ti wo raura ware, “Vemo Amisy payao aje reansai jakato nora!” ²⁰ Naije wo Amisy apa ananyao so raraniv taiso: “Anakotaro rui vayave mantukamo unate

so rai—vatane pa rako maere pa rako—orame rave aepar da kakai.”* Arono vatane wo ananyao mpanyoane umaso raraniv, awa vambunine meweno mansai kobe. ²¹ Israel awa ana wo ranyanyut arono naije mammo wo rasyaniv bintabo. Muno Musa tavon pare, “Risyamo ijani dave ti inanuga ntutar.”

²² Weramu, sya arakove, weapamo wade mararai Amisy ai no unate umawe rai jeben. Yara wade mararai Amisy ai no Unato Sion, namirati Yerusalem no no munijo ntiti. Wemamo Amisy, opi kova noa nuge nuganui, apa munije mije. Muno naito Amisy wanunugambe no naije, awa wanui nanto no ribuge manui rave, wo Amisy ararimbe manayanambe rautan. ²³ Weapamo wade tavondi anugano Amisy no no munijo ntiti rai. Anugane somamo Amisy apa arikainy ananuiny awa ma, nanawirati awa tame ratoe nsiso bukugo munijo ntiti rai to. Muno watavondi vatano ugwenen to arono wusyinoe mansai, nanawirati awa ana udave ngkov no mine so muno Amisy po maveti umamai dave no munijo ntiti. Muno wade wasayai no Amisy amune rai, Wepirati po ayao mamaisy rapatimugo vatan tenambe awa ana udave rai. ²⁴ Muno wade wasayai no Yesus amune rai tavon, Wepirati be marimbe de teto urairijo wanyine rai to. Muno Apa mavu nsororop arono kakai omamo mo kove raunande, mo aneno Habel apa mavu ntende rakivan. Weye Habel apa mavu nggwain indamu mo kakai rasakinavo vatano po aubaisy ai,* yara Yesus apa mavu mo ayao kakai rapaya.

²⁵ Sya arakove, wadanide! Vemo waponayo Napi payao nande wansai so Ai nora. Weye wama anene awa mangke nande mai arono wonae wo Musa aranivi, wepi po ayao Amisy raura no mine vone so rai. Yara Napi payao nande wansai so Pamo no rave no munijo ntiti pa! Weti ranivara wamo aranive jebenamo indati wamare wampaya Apa pari mangke rai obo ratire tao jeben! ²⁶ Arono Amisy payao nanto Musa ai no Unato Sinai rajjoe, anamote ngkin akoeve mo nuge rambayar. Weramu soamo Po raurairive pare po rave intabo akato indamu mine so rakanive jintabo. Pare:

“Indati Syo nuge rambayar intabo akato, muno naumo warae tavon.”*

²⁷ Amisy apa ayao umaso ama ine mare anakotaro ranari tenambe mammo Po rangkiki java rakanive vintabo, wirati indamu anakotaro mangkiki kakai obo mirati no tawan. ²⁸ Weti wade wamo

* 12:17 Kejadian 25:29-34, 27:30-40

* 12:18 Keluaran 19:16-19, 20:18-21; Ulangan 4:10-13, 5:22-27

* 12:20

Keluarannya 19:12-13

* 12:24 Kejadian 4:8-10

* 12:26 Hagai 2:6

kove raura seo Amisyeye ai weye wamamo Apa kawasaeyo we akarive wansai. Muno wana tawan weye anakotare inta mo wansangkiki ti mo wansapinde kakai. Wemi mbewar ti wamo Amisyeye ararimbe muno wambeaje Ai mamaisyoyo apa bekere rai. Muno wamo asyaniv, ²⁹ weye arono Amisyeye po mangke raugaje, Opamo maisyare taname ramaisy, mo ana inta ranen mangkur ti rakanive vintabo.

13

Ananyao raugaje indamu Amisyeye anayanambe wansai mi wandakani

¹ Risyare weapamo wamuinyo wasai vambinibe tutir weye wabe arakobe no Kristus ai. ² Muno arono vatano wapantatukambe mansai inta ude, syare wabekobe indamu wapo maugav usen no wapa yavar. Wasaemen arono wusyinoe vatan inta wo Amisyeye apa naite inta maugav usen no awa yavare rai, weramu wantatukambe are nawije!^{*} ³ Syare wasaemen irati wapa arakovo mausiso makova tanoano makova rai mansai. Muno wasaemen irati wapa arakovo nanawirati vatane wo mave tatugadi mansai. Wasaemeno wapa arakove umaso mansai maisyare watawondi wasiuri matawone wemaisy.

⁴ Syare vatan tenambe ubeaje irati awa vauname rai, weti anya nikijo apa anamu obo rarijat, muno wanya nikijo ama anap obo arijat. Weramu vatano are nawirati utawondi ananyao umaso rai jeben muno vatano rui vayave wo anaerere ugavo mansai onawamo Amisyeye po awa mangke ratayao manyut. ⁵ Vemo wasanuga nto doije rai nora, yara syare wasanayanambe vayave, wapare, “Ana rui mamaisyoyo rinai, namije nto.” Weye Amisyeye apa ana po raura to mi so, pare:

“Risyamo inakirive nai ramu;

Muno inaneme mpaya nai vayave ramu.”^{*}

⁶ Maisyare omai ti, wamamo wasanuga ntindimu wamare:

“Amisyeye wepirati po rinaeranande, weti risyamo ijanive ramu.

Anakotaro ngkakai vatano min bayave so wo rave inai,

omamo syo rasyanive ramu.”^{*}

⁷ Weapamo vemo wasanimari wapa akarijo wo wasanyao Amisyeye apa ayao rai mansai nora. Syare wapo awa ana udave ranyanyuti, weye onawamo utawondi Amisyeye ai tutir awa wene mo maugav. Weti awa anave namije mamo mbe unanuive wasai inda wapa anave mo awa ramaisy.

⁸ Yesus Kristus be ninuwanive jeben. Arono wusyinoe, unumeso, muno ntoa nuge nuganui, Opamo be ninuwanive jeben bayave.

⁹ Sya arakove, vemo ananyao kotaro nsasyeo wama anave rajje mo wasanuga raugabe ti wansosobe nora. Maisyare vatano Yahudi awa koano anaisyeye rai. Koane so ama kove meweno rai, weti vatane utawondi rajja marudi, mo manuga rajjasea mbambunine jeben. Yara Amisyeye apa kove obo mirati mo wasanuga rajjasea mbambunin.

¹⁰ Vatano wamanave Kristus aije wamamo wamaura kove inta rai, mo koano Yahudi ama kove rakivan. Muno syeno Yahudi nanawirati wo anakotare rameseo no tewa orame rai utawondi kovo wamaura rajje rai jeben. ¹¹ Syeno titi Yahudi po maere ama mavu raugav siso no Tanoano Ndandini Dave rai indamu mo vatane awa ayao kakaije rapaya mai. Yara po maere ranasine ramauta vayave, po raugav to no munije ama akiri indamu ramero marambe.^{*} ¹² Muno ana nande Yesus ai maisyare wemai tavon, weye Opamo kakai no munijo Yerusalem ama akiri indamu Apa mavu mo vatane awa ayao kakai rapaya mai, mo manuga raveti ngkakavimbe. ¹³ Sya arakove, wade wamo koano Yahudi rapaya vintabo indamu wantavondi Yesus ai no munije ama akiri. Muno wade wantavondi Ai apa siurije rai arono vatane wo aura tantunawi. ¹⁴ Weye soamo wama muni tawan no no mine so inta me ramu. Yara munijo makanande omirati wamo ranyuta, omamo no no munijo ntiti.

¹⁵ Maisyare omai ti, sya arakove, syare wangkangkamambe Amisyeye ai tutir, omamo wama anakotaro wamo raunanto Ai mije. Wamo kove raura seo Ai muno wamo Yesus Kristus apa kovo ntiti raura kakavimbe wansawa rai, weye Yesus Kristus be syembe wansai. ¹⁶ Weti wabekobe vatane mansai muno wapo wasaeranande vambinibe wemamo vemo wapo rapaya nora. Weye wapa ana wadave ngkove umaso raurata irati anakotaro wadaunanto Amisyeye ai, mo anuga raveti ranayanambe.

¹⁷ Syare wabeta wapa akiri apa ayao we rai muno wabeaje mai. Weye onawamo wapa akarijo wo wasaeranande indamu wano tawan no wapa anave rai. Wo awa anakere umaso rajjaro panyoambe weye wo raen arono masyoto rijat indati usai no Amisyeye amun indamu Po manajo awa anakere umaso rai: mamai dako jeben dako? Ranivara wabeta wapa akiri

^{*} 13:2 Kejadian 18:1-8, 19:1-3

^{*} 13:5 Ulangan 31:6, 8; Yosua 1:5

^{*} 13:6 Mazmur 118:6

^{*} 13:11 Imamat 16:27

mansai, indati wo anakere rajjaro man-ayanambe rautan. Yara jewen, wo anakere rajjaro manimaambe rautan, indati mo kove inta raugavo wasai ramu.

¹⁸ Reamamo reansanuga mo reama ana reandave raen, tugae inta ngkakainoanive ramu. Muno reambeke dave indamu anakotaro rui vayave reamo rave mamama dave. Weti sya arakove, syare wasambayambe reansai tutir. ¹⁹ Risyamo ibeke dave indamu wapo sambaya rave Amisy ai, wapo anajo indamu syavave syakare wasai.

Sambaya no nyovara waowe ama maran

²⁰ Syare Amisy tuna wansautan tenambe, Opi po kovo saumane raugaje wansai. Opamo po Amisy Yesu aijaseo kovakato no wene ama uga rai, muno Po Apa mavu veano urairijo wanyine raokaisyo wansaija ntoa nuge nuganui. Yesu Kristus sopamo wama Akarijo Titi po wansaeranande maisyare vatano po maero domba maeranande amaisy. ²¹ Risambayambe indamu Amisy po anakotaro kove rui vayave raugaje wasai indamu wapo Apa bekere rarijat. Yesu Kristus tuna wansanuga rai ti risambayambe syare Amisy po wansatayao indamu wamama vatano wamo anayanambe raugavo Ai. Kangkamambe Yesu Kristus aiya nuge nuganui! Amin.

Ayao maran

²² Syare wabekobe indamu wapo sya ananyaowe so raraniv mavabe, weye sya nyovara wao so nggwaravainye ramu. ²³ Syare wadaen wama arakovo Timotius pamo apaya irati tanoano makova rai to. Ranivara de nande to, indati syo augav pe ririmore rimo wasapan. ²⁴ Syare wapo sya kove raura wapa akari mansai tenambe muno kawasae Amisy mansai vintabo. Wama arakovo una no munijo Italia so wo kove raura wasai tavon. ²⁵ Amisy apa kove no wasautan tenambe.

Nyovara Wao Yakobus Po Ratoe YAKOBUS

Yakobus po kove raura

¹ Risyrati Yakobus, syanapatambe Injayo Amisy ai muno Amisy Yesus Kristus ai. Nyovara waowe so idatoo anugano Amisyo wano no mine so rui vayave wata wana rai, syo kove raura wasai.

Amisy po ana ratantona ntiti raugajeo are nawirati wo ranajo Ai

² Sya arakove weap! Arono rui rati siurijo kotare nande wasai, syare wasanayanambe vayave. ³ Weye wapo raen: ranivara wapanave Yesus Kristus ai tutir arono siurije nande wasai, wea indati wasanuga ntubai mbambunin indamu wasatawandijo siuri kotare rai. ⁴ Weti syare wasatawandi tutir ava wapo ama mane rajjar, naijeamo watairijo rai tenambe to, weti ana inta meweno wasai jewenara mamaisyo wasai vintabo.

⁵ Weapamo are nyirati nyantukambe animaisy mi nyo rave inda mamaisy rai, weamo syare nyo ranajo Amisy ai. Indati Po nakarikuga raneka inda mbar ti nyo ana mamaisy raen aje. Weye Amisy bekobe vatane wansai tutudi muno aneme ndaradamo Po ana wandanajoe mamo Po raunande wansai kobe. ⁶ Arono wamo Amisy anajo, syare wamanave no tawan kobe, vemo wansanuga mamaundive rai nora. Weye vatano anuga mamaune pamo amaisyare mayano ovare po ramawi ti mbe aneai, nntanamine kakai. ⁷⁻⁸ Vatano maisyare so apa ana po ratantona nsarokire ramu yara nanto nande. Pare po ana inta rave, weamo apa ana po ratantona mbe jirumbe, weye po ratantona no tawan no intabo rai jewen. Weti vemo po rakarae pare indati Amisy po ana inta raugaje aija, weramu indati jewen.

⁹ Arakovo are pirati apa ananuge meweno ai, syare ananibe! Weye Amisy po atayao inda Po aijaseo titive. ¹⁰ Yara syare vatano apa ananuge manui rave ananibe tavon arono Amisy po apaaje. Weye vatano apa ananuge manui indati kakai kobe, maisyare insumaije ama ugem raumandi ramaisy. ¹¹ Weye uma seo apa mamooane mo raono, uge mayon ti ntaruran muno ama ngkenave raumandi. Maisyare omai tavon vatano apa ananuge raene apararita rai: Masyote anteter poroto po apa anakere rajjar inda po doije ratande ai, weramu kavuratawe kakai kobe.*

Amisy po ana mo vatane matopane raunande ramu

¹² Kove ngkov irati vatano are pirati atawandi kobe tutir arono ana mo atopane nde ai. Weye Amisy po vatano napije aen pare apa atawandije mamaisy, wea indati Po ama ine raugaje ai, omirati kovo nuge nuganuijem. Tugae, omamo Amisy po raurairive pare Po raunande vatano are nawirati umuinyo Aije mansai tenambe. ¹³ Ranivara ana mo vatane matopane inta nande vatane inta ai, vemo po raura pare, “Syo ratantona Amisy pi po ana mo inatopane so raunande rinai,” wemai nora. Weye Amisy pamo anakotaro kakai mo atopane kakai muno taune Po vatane mansatopane meweno Ai.

¹⁴ Yara ana mo vatane atopane ntubai taune anuga rai maisyare so: manasyimbe bekero ngkakainoanive inta ntipu anuga rai, umba bekero ngkakainoanive umaso mi nsarirae ti mo atopan akato. ¹⁵ Arono bekero ngkakainoanive nseowa manakoe no anuga rai, mo ayao kakaije ravaki. Umba ayao kakai ntubai manakoe, indati mo weno nuge nuganuije raugavo vatano napije ai. ¹⁶ Weti sya arakovo inanuga no wasai, vemo ana pamponae inta mo wasanuga raugabe inya.

¹⁷ Anakotaro rui ngko dave muno mamai dave, omamo Injayo Amisy opi no no munijo ntiti Po raugaje tenambe. Muno Wepi po embae, tume, varo kajijinta no no naumo warae ranari tenambe. Anakotare umaso mamo namane inta mba dave, yara namane inta ngkaumur. Weramu Amisy pamo maisyare wemaisy ramu, weye Opamo be ninuwanive jewen muno Apa kove mamo ntami tawan tutir. ¹⁸ Po rapatimu pare wamamo taune Apa arikainye waino wansai weye wamanave Apa ayao tugae rai. Apa arikainye waino wansai indamu wamamo wantiti jirati anakotaro Po ranari rakivan bintabo.

Beto ayao Amisy rai, vemo raraniv bayave nora

¹⁹ Inya! Sya arakovo inanuga no wasai, wasaemen ananyaowe so rai: Syare vatan nanentabo pamo apa daraniv wemi manakoe, yara payao rasakinave mamo atawandi rai, muno pavave pari nora. ²⁰ Weye vatano pari pamo po ana mamai no Amisy amune rajje inta rave ramu. ²¹ Maisyare omai ti, wapa ana wadave ti nggwambe muno wapa ayao kakai ntapekane mamo wapo rapaya ra ntami. Umba syare wansanuga mpaaje, wabeto Amisy apa ayao namirati Po raugasyo wasanuga rajje rai, weye wemirati mbambunin mo wasapaya wapa ayao kakaije rai.

* 1:11 Yesaya 40:6-7

²² Amisyé apa ayao mamó wemó wadarániv bayave inya, yara syare wabeta rai tavon. Weye ranivara wabeta rai jéwen, weamo taune wapo wasaponae. ²³ Are pirati po ayao Amisyé raranibe vayave yara beto rai jéwen, opamo aurata irati vatano amune raasibe no kansina rai. ²⁴ Kavoe taune po amune raen dirive, poroto animari amune rai, amune maisyare rui? ²⁵ Syare wapo Amisyé apa ananyao ranyao mavabe weye omamo mamai dave muno mo vatane mapaya awa ayao kakai ama vambunine rai. Weti wemó vatane po raraniv bayave nora wema animari rai nora! Yara vatano po ananyao so ranyao tutir umba beto rai kobe, opamo Amisyé indati po kove raugaje ai apa anakero po rajjare rai tenambe.

²⁶ Are pirati po ratantona pare, “Risyamo vatano tavondi Amisyé ai mavabe,” weramu po taune apa ana po raura mamó po raeranande kobeye ramu, yara po ayao kakai raurave tavon, weamo mamaisyé ramu. Vatane wato pangkarive taune ai muno apa tavondi Amisyé aije mamó ama ine meweno rai. ²⁷ Yara wamare Amisyé po wansaen pare wamamo wamtavondi Ai tugaive muno mamai dave, weamo wamo ananyao jirume so rarijat: Wamo arikainyo vavat muno wanya kavini mansaeranande awa siurije rai. Muno wamo taune wansanuga raeranande indamu wemó mine so ama anambe mo wansaugav mo wangkakai nora.

2

Wambekobeo vatano awa ananuge manui muno meweno maije mai tenambe

¹ Sya arakove, wama Amisyé Yesus Kristus ai, opamo titi rave, weapamo wapanaive Ai weti wapare wabekobe irati vatano awa tame ntiti mai yara waponayo vatano mamaune mai, weamo mamaisyé ramu. ² Maisyare so: vatano apa ananuge manui inta po emasije inta rangkion muno po ansuno ngko dave rave umba de siso no wapa anugane rai, umba naije tavon vatano apa ananuge meweno aije inta de siso tavon, apa ansuno po rave mamai kobe jéwen. ³ Umba vatano apa ansune ngko dave wapo atantona rave, weti wapo auseo tuna no kursi ngko dave rai, yara vatano apa ananuge meweno aije pamo wapo attutir wapare, “Nto nte no ratuije, jéwenamo ntuna no aruri naije.” ⁴ Abo! Wabeani-maibe wapo inta namuinyo inta nai ratantona? Wapo vatane inta matayao wabe arakobe mai yara vatano kaijinta waponayo mai mamaisyó wapa ana wadatantona kakai rai.

⁵ Weti sya arakovo inanuga no wasai, syare wadanide! Vatano awa ananuge meweno mai no mine so nanawamo Amisyé po matayao indamu awa anave Aije manakoe rave. Muno Po matayao indamu mato siso Apa kawasaeyo be akarive mansai matavon, maisyare Po raurairive vatano nanawirati umuinyo Aije mansai. ⁶ Weramu weapamo wapo wapa arakovo awa ananuge meweno maije mansaura tantunawi. Yara vatano awa ananuge manui wenawirati wo wasave tatugadi muno wo kakai rangkivano wasai no akarijo mine so amun. ⁷ Muno wenawirati wo Amisyé Yesus Kristus aura tantunawi tavon, Opirati apaura wasai ti Po apa tamo ngko dave raunande indamu veano wasawain.

⁸ Ananyao ntiti mamó Ayao Amisyé mo ratoe taiso: “Muiny irati nya arakove mansai maisyare muno taune wimuinyo taune nai wemaisy.”^{*} Ranivara wabeta ananyao ntiti umaso rai, weamo wapa ana wapo rave mamó mamaisyé. ⁹ Weramu ranivara wabekobe irati vatano awa ananuge manui mansai yara waponayo vatano awa ananuge meweno maije mai, weamo wapo ayao kakaije rave weye wapo ananyao ntiti umawe rakanyoandi to ije. ¹⁰ Muno are pirati po Amisyé apa ananyao intabo rakanyoan, omamo mamaisyó po ananyao tenambe rakanyoandi ramaisyé. ¹¹ Amisyé po ananyao so raugaje wansai: “Vemo nyo anaerere rave inya.” Muno Po ananyao so raugaje tavon: “Vemo nyo vatane maubaisy inya.”^{*} Weti are pirati po anaerere rave ramu, yara po vatane inta aubaisy, weamo po Amisyé apa ananyao tenambe rakanyoandi to ije. Indati Amisyé po mangke raugaje ai.

¹² Syare vatan nanentabo wamo wama ana wamo raura muno wama ana wamo rave raeranande, weye wamo raen Amisyé indati po wansanajo rai tenambe indamu Po ayao mamaisyé rapatimugo wansai mamaisyó Apa ananyao wemi mo vatane mapaya ayao kakaije ama vambunine rai. ¹³ Are pirati aemeno apa arakove maije jéwen, indati arono munije ama akari Amisyé aemeno aije ramu, yara Po mangke raugaje ai. Yara are pirati aemeno apa arakove mai, indati mangke Amisyé mamó nande aije jéwen.

Wama ana wandaijare mo wama anave raroron kakavimbe

¹⁴ Inya, sya arakove weap! Ranivara vatane inta po raura pare, “Syaneve Amisyé ai rave,” weramu apa ana po rajjaro aneme rai meweno ai, weamo apa anave wato

raen tai rui? Wamo raene jewen bayave, weye apa anave so mamaisye ramu, weti indati mo apaya apa ayao kakai raije ramu. ¹⁵ Maisyare so: arakove inta no no wapa yasyin, anya rako wanya rako, awa an-sune meweno mai muno masyote yan-teter anaisye meweno mai tavon. ¹⁶ Umba vatano kaijinta no no wapa yasyin po an-sune, anaisye inta raunande vatane umaso aije ramu. Yara po raura awa bo rai nanto vatane umawe ai pare, “Arakove, Amisye tuna nautan! Syare nyo ansuno mamoa-ne inta rave, muno anaisye ma ndai da man dave!” Abo! Mamaisye ramu, weye po apa arakove aeranande apa siurije umaso raije ramu. ¹⁷ Maisyare omai tavon, vatano are pirati pare panave Amisye ai, weramu apa ana daijaro aneme rai ma mewen, opamo apa anave wato mammo ana tamoene ma.

¹⁸ Vemo vatane inta po raura pare: “Vatano utavondi Amisye aije awa kotare jirum: Vatane inta wanave, yara vatano kaijinta wo ana raijaro maneme rai rave.”

Weramu syo ayaowe rasakinav syare, “Vatano nyare nyanave winy, nya anave raen tai rui? Syo ana ndaijaro naneme rai inta raen no nai ramu, weti syo ratantona nyanave Amisye ai mammo inta no nai ramu. Weramu nyare nyo risya anave raena veti no taiso: Nyo sya ana ridaijaro inaneme rai raen dati, weye omirati mo sya anaveo Amisye aije raroron kakavimbe mijem.”

¹⁹ Wapanave wapare Amisye pamo intabo dave. Wapa anave wato ngko dave, weramu omamo mamai dainy. Weye anawayo kakaije awa wanave Amisye ai maisyare wemaisy tavon! Muno onawamo ujaniv ti ututar weye awa ana udave ngkakainoanive vintabo ti wo Amisye apa mangke rasyaniv.

²⁰ Weapantukambe ravea! Wapo raura wapare wapanave weti wapa ana wadaijaro wasaneme rai ma jewen kai. Mamaisye ramu! Weti soamo syare syo raura kakavimbe wasai: wapa anave wato ama ine meweno raija. ²¹ Syare wasaemen wama aneno Abraham apa ana daijare rai. Abraham pare po apa kavo Isak aijar, po aotar po ameseo Amisye ai, wetiva Amisye pare, “Abraham, winya anave mamai to no Rinamun.” ²² Weti wandaen Abraham apa anave mammo po rarorono apa ana daijare rai. Muno wandaen tavon apa ana daijare wato mo apa anave raveti mamai dave. ²³ Ana nande umaso mammo mamaisyo Panave kobe Amisye ai. Amisye po apa anave so raen, weti Po aveti mamai no Amune rai.”^{*} Maisyare omai ti, Abraham awainamo Amisye apa arakova pije.

²⁴ Soamo mbaro wansai: vatane apa ana daijare mammo Amisye po raen umba Po aveti mamai no Amune rai. Maisyare omai ti, anave obo mammo mamai dainy.

²⁵ Wapo wanya anaerer Rahap raen ntavon. Arono kawasae Israel usisa munijo Kanaan raijoe, Rahap umaso mo vatano yo nuge ranyanyuti yaugav inya no ama yavar muno mo yangkaokaibe umba nyajivo unanuijo kaijinta rai jakato. Umba Amisye po ama ana ndave umaso raen pare omamo mamai no Amune rai. ²⁶ Syo ananeneae inta raura wasai no taiso: Wansanasine so ama anawayoe mewen dai, weamo wansanasine so ngkakai ti ntami. Maisyare omai tavon, ranivara wamanave weramu wama ana wandaijare mewen dai, wea wama anave umaso mammo inta no wansai ramu.

3

Wansaunane ma ayao kakai ntipu rai

¹ Sya arakove weap, vatano wabekero wabe kurumi no anugano Amisye rai, vemo wanui nora. Weye wandaen kurune reamamo reama ana reandave mammo Amisye indati po reansanajo rai manakoeve vatano kaijinta awa rakivan no arono munije ama akari. ² Vatan tenambe wama anakotaro ngkakai manui. Weramu rani-vara vatane inta pamo ayao kakai muje awa raive jewen, opamo vatano mamai dave pije. Weti po taune awa raeranande, omamo po anasine raeranande tenambe to ije. ³ Syo ananeneae inta raura taiso: Wamo waije ransawa wama kuda awa rai indamu po wansaugav no unanuije rai ma-maisyo wama mbekere rai. Waije mammo anakotaro mamaun, weramu ama vambunine manakoe weye kuda anasin ntenambe mbeto rai. ⁴ Muno ananeneae kaijinta mo ramaisy: Nyomane mammo anakotaro manakoe muno ama remese mammo anakotaro mamaun. Weramu vatane po remese raijar, wea umba po nyomano akokoeve so raparae ti manya ntavondi apa bekere rai. Ovaro akoe po ramawisy, weramu vatane po remese raveano nyomane raparae ti manya nsarokibe. ⁵ Syare syo ananeneae jirum umaso raura kakavimbe. Wansaunane aurata irati waijo ransawa kuda ai muno aurata irati nyomane ama remese rai tavon. Weye wansaunane pamo anakotaro mamaun dave no wansanasine rai, weramu apa vambunine manakoe.

Muno ananeneae so mo ramaisy tavon: inyoe manui no yawa rai, tanamo mamaun nsawa raitoamo mo ranen ti rakanive. ⁶ Wansaunane aurata irati taname umaso rai. Anakakai Akoe opi po taname raindi

^{*} 2:23 Kejadian 15:6

wansaunane ai, weti wansaunane pamo ayao kakai manakoe no ai, muno po ayao kakai raugave sen ntairi jirati wansanasine so rai. Masyote anteter wano no mine so rai, wansaunane po ayao kakai raura tutir. Wansaunane pamo mamaun dave, weramu apa vambunino mo kakai raugave mamo manakoe.

⁷ Maere kotaro nsyisyaube —insani, tawae, muno jiane—vatane wo ranyaowa ngkokoba. ⁸ Weramu wansaunane pamo vatane inta po anyaowa kokobe kakai. Wansaunane pamo mamun dave, muno wamo aorai kakai. Tairi jirati mamuno mo vatano maugavo wene rai.

⁹ Wansaunane pamo wamo veano kove raura seo wama Injayo Amisyae ai, weramu wamo rave wamaamatambe wama vatane mansai tavon. Wamo rave tai maisyamo ngkove ramu! Wama vatane umaso nawamo Amisyae po manari taune aname rarijati. ¹⁰ Tugae wansawa ma intabo ma, weramu intanamo wansawa umaso mo kove raura, yara inta nakato weamo wansawa umaso manaamatambe wama arakove mai. Vemo wambe tai mai nora! ¹¹ Wasaemen: mana ndarere me mana nsakam me onayamo aya ami intabo ramu. Weti mana ndarere ama amije mamo no no yawa, muno mana nsakame ama amije mamo no no mayan. ¹² Maisyare somaisy, mayane ama mana nsakam, yara ama mana ndarere jewen. Sya arakove, syare syo ananeneae umaso raura kakavimbe: vemo wansawa mamo mo ayao kove muno ayao kakai raura kava inya, yara wamo ayao kove obo raurana obo ngkobe. Muno ananeneae kaijinta mo ramaisy taiso: inyo ara mamo indati mo inyo saitune ama mane rauguje ramu. Muno inyo anggurije ma indati mo inyo ara ama mane rauguje ramu.

Amisyae po ana ratantona ntiti raugasyo wansai

¹³ Are pirati pare Amisyae apa ana ratantona ntiti muno apa kove no ai, weamo syare po raroron kakavimbe maisyare so: Syare apa ana dave mamo ngko dave, muno tavondi Amisyae apa ana ratantona ntiti rai tutiro anuga mpaaje rautan. ¹⁴ Weramu are nyirati nanuga njoram nya arakova ai muno wimbeker nseo tame rai, weamo vemo nararin dave nyare, “Risyamo inakari mba dave,” wenora. Nya ana ndaura umaso mamo nyayarurijabe Amisyae apa ayao tugae rai. ¹⁵ Weye wapa parije muno wapa bekero seo tame rai omamo mamasiso Amisyae apa ana ratantona ntiti raije ramu, muno Wepi po raugaje wasai ramu. Yara mine so ama ma, ntavondi wasanuga

ama bekero vatane rai, muno Anakakai Akoe wepi po raugaje wasai. ¹⁶ Vatano nanawirati upari rave muno wo taune maijaseo titive, onawamo wo sivuinye raveti ntipu muno wo anakotaro kakai rui vayave rave.

¹⁷ Yara Amisyae apa ana ratantona ntiti Po raugaje vatane mai maisyare so: vatane so manuga ngkakavin muno manuga nsaumano vatane mansai. Wo vatane mantitidi jewen, yara ubekobe muno maemeno mai. Awa ana udave ngko tenambe, awa ayao sarokir muno wo vatane maponae ramu. ¹⁸ Ayao sauman raurata irati nyoamane kamije rai. Are pirati po kamije so ranyum, weamo indati po ama mane ranugan tavon. Maisyare omaisy, vatane wo ayao saumane bo raura, wea indati kovo saumane ntubai no wapa yasyine rai, ti mamasiso Amisyae amune rai.

4

Wasanuga ntento ana mine so rai, weamo ama ngkove mewen dai

¹ Animaisyae mi mo sivuinye muno ayaowi rausen no wapa yasyin? Ana mo raveti nsene mamo nami so: wabekero ananuge inta rai inda raveano wapa bekere rai. Wapa bekere umaso ntatupami no wasanuga rai tutir. ² Wasanuga ntento ana inta rai weramu raunande wasaije ramu weti wapare wapo vatane maubaisy. Wabekero anakotare rai mo wasantutu dave ti wapo rakani, weramu wananto rai ramu weti umba wapayaowi muno wasivuinye. Wapaura inta rai jewen, weye wapo Amisyae anajo ramu ti. ³ Wapo inta ranajo Ai, weramu Po raunande jewen weye wapa sambaya ama bekere ngko dainya muno wapo raveo taune wapa wasananibe bo rai ti.

⁴ Weapamo wasanuga ntento anakotaro mine so rai, weti wasaurata irati wanya mo ama anap apaya ti no yara nto nserer! Syare wapo raen: ranivara wabe arakobe mine so rai, omamo mare waponayo Amisyae ai. Syo raura intabo akato: are pirati be arakobe mine so rai opamo Amisyae apa marova pa. ⁵ Weti vemo wapo raura wapare Ayao Amisyae so ama ine meweno rai jinya, wemi mare, “Wasanuga mamo Amisyae po ranari to, weramu ama bekere manakoe rave.”

⁶ Amisyae pamo apa kove manakoeve wansai, mo wansanuga ama bekere wato ama vambunine rakivan. Wemi mbewar ti Ayao Amisyae mo raura mare:

“Amisyae kantetoaro vatano mararine mansai,

yara Po kove raugaje irati vatano manuga mpaaje mansai.”*

⁷ Maisyare omai ti, syare wabeaje Amisy ai muno wamarovave Anakakai Akoe ai, indamu Anakakai Akoe umaso nin kobe wasaora. ⁸ Wananta wapararai Amisy ai, indati Amisy de pararai wasai. Vatano wapa ayao kakai no wasai, syare wapo wapa ayao kakai wato ransopi. Vatano wasanuga mbe jirumbe, syare wapo wasanuga ratayao da ngkakavimbe. ⁹ Syare wapoyov muno wasanimaumbe weye wapa ayao kakaije ntapekan. Vemo wapugoeno wapa ayao kakaije rai jinya, yara wapoyov. Muno vemo wasananibe rai jinya, yara wasanimaumbe. ¹⁰ Wasanuga mpaaje no Amisy amune rai, indati Po wasaijasea titive.

Vemo wapo vatane maura tantunawi nora

¹¹ Sya arakove, vemo wapo wasaura tantunawi vambinibe inya. Are nyirati nyo nya arakove inta aura tantunawi rako, nyanaikebe ai nyare apa ana dave ngkove ramu rako, weamo nyo Amisy apa ananyao raura tantunawi to ije. Weye arono nyo nya arakove aura tantunawi, weamo wimbeto Amisy apa ananyao raije jewen, muno mbeare somaisy nyo Apa ananyao so raura tantunawi, nyo rapatimu nyare ama ine meweno rai. ¹² Amisy bo pi po apa ananyao raugaje wansai muno Wepi po wama ana wandave rapatimu rui mi ngkov muno rui mi ngkakai. Opamo apa vambunine no irati Ai indamu Po vatane maugav wakare kove rai muno Po weno kakai rapatimu. Weti vemo vatane inta nyo nya vatane inta apa mangke rapatimu nora. Winya varore ma jewena.

Wamare wamo anakere inta raijar, vemo wansanimari Amisy ai nora

¹³ Arakove, weapamo inta wapare, “Unumeso rako sansiman dako, indati reanta no munije inta rai muno wano no naije tume intai wamo anakere raijar inda doije ratande wansai.” Weramu arakove, syare wadanide! ¹⁴ Weapamo wapantatukambe animaisy mirati sansimane pa nande wasai. Weapamo wasaurata irati kijaowe rai, wamerananta wandaeno we saon ti nto tirakanive vayave. ¹⁵⁻¹⁶ Weramu wasararin, wakangkamambe wapa ana wapo rave rai. Omamo ngkove ramu. Yara syare wapo raura taiso: “Ranivara Amisy beker ti po kove raugaje reansai, wea indati wamo namije rave muno nami wato rave tavon.”

¹⁷ Ranivara nyo raen animaisy mirati nyo rave indamu mamaisy, weramu nyo rave jewen, omamo ayao kakaije mijem.

5

Vatano wapa ananuge manui, syare wasyisyaube!

¹ Vatano wapaura ananuge manui rai weap, syare wapo inaranide! Siurije indati mo wasakep, weti wapoyov muno wapanae! ² Wapa ananuge manui mamo mparakam muno wapa ansune ma katatindopane wo raisy. ³ Wapa emasije, perakije ngkararira wadaen to. Arono munije ama akari, ananugo ngkararir umaso mo wapa waparadaive raroron kakavimbe. Maisyare omai ti, indati ngkararire umaso mo wasanasine raisy maisyare taname mo wasanen. Weapo ananuge ranugandive vayave weramu munije so ama akari mare mararai.

⁴ Vatano wo wapa anakere raija no wapa nawaisye raije nawamo wapo awa doije rave mansavae ramu. Soamo wadanivije wo ranonae! Vatano wo wapa nawaisye ama ine ranunugambe ugwain ware, “Are nyo reansaerande yo...!” Muno awa ugwaine so nto Amisy amarikoame rai to, Opirati apa vambunine ntiti rave. ⁵ Wapa ananuge manui ama manavane ma soa wano raija muno wasananibe rai no mine so. Weapamo maisyare maero sapi amaisy, wepi po anaisy raisy ava anasine make-eve, wea umba vatane wo aubaisy indamu wo aisy. Maisyare wemai tavon, weapamo indati Amisy po wasaubaisy. ⁶ Wapo mangke raugaje vatane mansai muno weapo mansao, weramu onawamo awa ayao kakai meweno mansai muno wo soowate inta rasakinavo wasai ramu.

Wasatawandijo siurije rai

⁷ Maisyare omai ti, sya arakove, wasatawandi yava nto Amisy Yesus pakare rai! Syare wapo vatano po nawaisye raperame apa atawandije raen: opamo nowo apa mino mo ama ine rauguje ranyut, muno atawandi yava maru maje, apa anare ama kamino wanyine ntipu rai jakato. ⁸ Syare weasatawandi tavon muno wasanuga ntindimu weye Amisy Yesus pakare mararai to.

⁹ Sya arakove, vemo wapo ayao kakai rantutibe wasai vambinibe inya indamu vemo Amisy Yesus po mangke rapatimugo wasai jinya. Wadanide! Apa masyoto de raije mararai kobe to, arono Po mangke rapatimugo vatane mai! ¹⁰ Arakove, syare wasaemen Amisy apa anawae wusyine mansai, nanawirati wo ayao Amisy po raugaje mai ravov. Onanawamo usiuri rave weramu matawandi rai tenambe. Maisyare omaisy, anawae umaso ube unanuive wansai indamu wasatawandi siurije rai tavon. ¹¹ Vatano nanawirati matawandi siuri rai nawamo wamo

mansaen wamare kove ngkove irati mai. Ayupija atawandi rave ma wadanaun to, muno wadaen arono Ayupija apa siuri mewen, Amisye po kovo manakoe raugaje ai. Weye Amisye pamo bekobe rave muno aemeno vatane mansai rave.

¹² Sya arakove, ana mbe mobe mamo ananyao so: Vemo wapurairive patimuve nora, wapo naumo warae me mine so me aya tame veano wapa urairi raokaisy inya. Yara ana rui ndaura tugae weamo ndaura tugae, yara nyare jewen weamo jewen, indamu vemo Amisye po mangke raugaje nai nora.*

Ana rui nsosobe wandanajo Amisye ai

¹³ Ranivara vatane inta siuri, koveamo po Amisye anajo rai. Ranivara inta anayanambe, koveamo kinyo ansyerano rai, po Amisye ararimbe. ¹⁴ Vatane inta gwanen, koveamo po akarijo wo anugano Amisye maugave mawainde indamu usambayambe ai. Wo gwanene so raura seo Amisye ai muno wo manine veano anasine raarer, wo Amisye Yesus apa tame veano awa sambaya so raokaisy. ¹⁵ Usambayambe muno wanave kobe, weamo vatano gwanene wato indati sauman, weye Amisye po saumane raunanto ai. Muno ranivara ayao kakai inta no ai, weamo Amisye po rapaya ai. ¹⁶ Maisyare omai ti, syare wapo wapa ayao kakai raura kakavimbe wasai vambinibe muno wapo sambaya rave wasai vambinibe indamu wasanasine nsauman akato. Vatano anuga mamai no Amisye amune rai opamo po ana inta ranajo seo Amisye ai, weamo apa sambaya umaso mbambunin dave. ¹⁷ Anawae wusyin Elia opamo vatan bayave po wansamai. Po Amisye anajo rave indamu maruge maje inya. Weti maru maje mine so rai jewen kobe, yara none tami tume mandeij embae kawije intabo. ¹⁸ Umba Elia po Amisye anajo akato, weti maruge maje muno ana ntuna no mine vone so raije ama mano kove nande akato.

¹⁹ Sya arakove weap! Arono rui vatan inta no no wapa yasyin po Amisye apa ayao tugae rapaya ntami, umba vatano kaijinta no no wapa yasyin po arakove wato auga ti sakinav akare Amisye ai, omamo ngko dave mijem. ²⁰ Are nyirati nyo vatano apa ayao kakai no aije auga ti sakinavo apa unanuijo ngkakainoanive rai, winyamo nyo vatane wato apaya weno nuge nuanui rai. Muno apa ayao kakai manui mamo Amisye po rapaya ai tenambe.

*Risy,
Yakobus*

Nyovara Wao Manasyin Petrus Po Ratoe 1 PETRUS

Petrus po kove raura

¹ Risyrirati Petrus, risyamo Yesu Kristus po inatutir indamu syo apa ayaowe raura. Syo nyovara waowe so ratoe more kawasaeyo Amisyae po wasatayao wasai, wana no rui rui vayave no propinsi Pontus, Galatia, Kapadokia, Asia Mamaun, muno Bitinia. Weapamo watantuna no mine vone so maisyare vatano marane mansamaisy, weye wana no vatano wantatukambe Amisyae aije awa yasyin. ² Injayo Amisyae po wasatayao indamu weapamo Apa kawasae waino wasai, mamaisyo Apa bekere rai arono wusyinoe. Muno Apa Anawayo Vambunine mo wasaugavuje vatano wantatukambe Amisyae aije umawe awa yasyine raora indamu weapamo kawasaeyo wasanuga ndandinit. Amisyae beker indamu wabeta Yesu Kristus ai muno Apa mavu mo wapa ayao kakai rarondom no wasanuga rai inda ngkakavin.

Sya arakove, syare Amisyae apa kove muno Apa saumane ntairi wasai.

Wansanave Amisy amen wepi indati Po wasaugav wansisa Apa muni kove rai

³ Kangkamambe Amisyae ai, opirati wama Amisy Yesu Kristus apa Aja pije! Amisyae aemeno vatane wansai rave, weti Po kovo wanyine raugaje wansai indamu wangkovo wanyimbe weye Yesu Kristus kovakato no wene ama uga rai. Omi mbe-war wansanave Amisyae amen no tawan.

⁴ Wansanave Amen wepi indati Po apa kovo ngko dave raugaje wansai, wemirati Po ratayao vatan tenambe nanawirati Apa arikainye waino maije mai. Amisyae apa kove somamo ngkungkume kakai, mbauge kakai muno ama ngkenave raumandi kakai, muno ntuna mo wansanyut no munijo ntiti. ⁵ Weapirati Amisyae po kove so ratayao wasai, pare Po raroron kakavimbe arono munije ama akari. Muno Po wasaeranande apa vambunine rai yava masyoto namije nde nande, weye wapanave Ai. Umba arono naije wasisa Apa muni kove rai.

⁶ Maisyare omai ti, syare wasananibe! Weramu soamo wasanimaumbe masyote kavinta yai weye siurije kotare nande wasaija nene. ⁷ Siurije nde wasai omamo indamu wapa anave raen dai: wapanave

tugaive rako jewena rako? Wapa anave mamoo raurata irati emasije rai, wemirati wamo raugasya taname rai indamu wamo raen omamo emasi kakui rako jewena rako?*" Weramu wapa anave ama kove mo emasije ama rakivan, weye emasije no tawane ramu. Weti ranivara wapa anave mamoo ntindimu, indati Amisyae kangkamambe wasai, Po wasaura titive muno Po wasaijase vombe arono Yesu Kristus pakare no mine so. ⁸ Arono wusyinoe weapamo wapo Yesu Kristus aeno wasamije raije ramu, weramu wamuinyo Ai. Muno naisoamo wapo aeno wasamije rai tavone ramu, weramu wapanave Ai tugaive. Weti wasananibe rave, wapa wasananibe so ntiti rave ti vatane wo raura umamaisyae ramu. ⁹ Wasananibe weye wapo wapa anave ama ine rajar, omamo Amisyae po wasapaya wapa ayao kakaije rai muno wasisa Apa muni kove rai.

¹⁰ Amisyae apa kove umaso mamoo anawae Amisyae wo raurairive to arono wusyinoe ware, "Masyoto rijat indati Amisyae po apa kove raugaje indamu wasapaya kakaije rai." Weti anawae umaso wo ranyao mavabe indamu Amisyae apa urairi wato ama tunato raije rakani. ¹¹ Yesu Kristus apa Anawayo Vambunine no no anawae umaso manuga rai Mo ana indati nande rarorono mai wusyimbe, mare Kristus indati siuri umba kovo ntiti raunande Ai. Weti anawae umaso ubeker ware wo ama masyote rakani ware, "Anakotare so indati nandeaere rui? Muno nandui rati nande?" ¹² Weramu Amisyae po rarorono anawae umaso mai pare anawae taune onawamo anakotare umaso nande mansai jeben, yara weapirati anakotare so nande wasai. Tugae, ayao anawae wo raura we mamaisyo ayao vatane wo ravovo wasai rai, omirati Ayao Kovo Kristus. Vatane wo Ayao Kove umaso ravovo wasai mamaisyo Anawayo Vambunine ama vambunine rai, Namirati no no munijo ntiti ti Amisyae po ratutir nde. Wakoe! Amisyae taune Apa naite ubeke dave indamu unanta anakotare so rai.

Anakotaro rui wapo rave, syare wasanuga ndandinit maisyare muno Amisyae amaisy

¹³ Noare somai ti, wapanatatayaube ra wapa ana wapo ratantona nsarokir. Muno wasyisyaube inda vemo wapo ayao kakaije rave nora. Wasanuga ntenami wasanave Amisyae amen, wepi po kove raugaje wasai arono indati Yesu Kristus pakare mine so rai. ¹⁴ Wabeta Amisyae ai,

* **1:7** Vatane wo emasije rakani orame rai maisyare so: Wo orame raugasya raun no taname rai, arono mamooan dave umba wame mampayar yara emasije ntonam (maisyare anane ntonam arono ranamae). Maisyare wemaisy, wamo emasi kakui raen dirive.

weye weapamo Apa arikainye waino wasai. Muno vemo watawono taune wapa bekero ngkakai wusyine rai nora, wemirati wapo rave arono wapantatukambe Amisy aijoe. ¹⁵ Vemo wapo ayao kakai rave nora, yara anakotaro rui wapo rave, syare wasanuga ndandinit maisyare muno Amisy amaisy. Weye Opamo dandinit muno Wepi po wasawain indamu watawondi Ai. ¹⁶ Weye Ayao Amisy mo ratoe mare, “Syare weapamo wadandinit, weye Risyamo dandinit.”*

¹⁷ Weapo Amisy awain wapare “Injae” arono wabe sambayambe Ai. Weramu syare wasaemen: Amisy opirati po ayao mamaisy rapatimugo vatan tenambe awa ana udave rai, weti syare wapo asyaniv! Opamo po vatane mansamamaribe ramu, yara Po vatane awa mangke rapatimu mamaisy awa ana udave rarijati. Weti kove mamamo wabeta Ai tutir arono ta wana no mine vone so. ¹⁸⁻¹⁹ Syare wabeta Ai mavabe weye wapo raen animaisy mirati Po raunande indamu Po wasapaya irati wapa ana wapo rave wusyinoe rai. Arono wusyinoe watawondi wapa ayao kopa rai, wemirati wapa aneno wusyine wo raugaje indamu wapo rarijat. Weramu watawondi raija marudi, weye mo kove raunande wasai jeben. Amisy po taune apa Kavo aunande, weti Apa mavu wemi mo rave indamu Po wasapaya wapa ayao kakai rai. Weti Po perakije muno emasije veano rave jeben, omamo no tawane ramu. Yara Amisy apa ana po rave rave omamo ama mangke nseo rave, omirati Yesus Kristus taune apa mavu. Apa mavu nsorop arono kakai, raurata irati maero domba tuvane aotar ameseo Amisy ai, Wepirati po kakai inta no anasine rai jeben. ²⁰ Kristus sopamo arono mine so ranari rainyoe, Amisy po atayao wusyimbe to. Weramu munije ama akari mararaije so, de no mine so rai rati indamu aroron kakavimbe. Apa deye somamo indamu Po wasapaya wapa ayao kakaije rai. ²¹ Kristus wepi bewar ti wapana ve Amisy ai, Napirati po Kristus aijaseo kovakato no wene ama uga rai muno Po kovo ntiti raunande Ai. Weti wapana ve Amisy ai muno wasanaveano Amen tutir.

²² Sya arakove, syo raen wapo wasanuga ratayaowa ngkakavimbe to weye wabeta Amisy apa ayao tugae rai, muno wamuinyo wapa arakovo wanave Kristus aije mai tugaive. Weti vemo wasanuga rani muinyo yara rani maradaive nora, yara wasanuga ntenami wamuinyo wasai vambinibe. ²³ Amisy po kovo wanyine raugaje wasai to weye wapana ve Apa ayaowe rai,

omirati ayao njayaissy noa pitawabe mijem. Muno wapa kovo wanyine somamo no Amisy wepi noa nuge nuganui, yara no no vatano mine so nanawirati wene nde mai oma jewena. ²⁴ Maisyare Ayao Amisy mo raura mare:

“Vatane una no mine so nugoenta ramu,
raurata irati insumaije mavave mayon
ramaisy,
muno maisyare insumaije ama ugem
ntaruran ti ama ngkenave raumandi.

Maisyare wemai tavon, vatane taune awa kove raumandi,

²⁵ yara Amisy apa ayaowe noa nuge nuganui.”*

Amisy apa ayao namije omamo Ayao Kovo Yesus Kristus ravovo wasai to wem.

2

Yesus Kristus aurata irati oramo yavare rausea nteto raija matu

¹ Weti sya arakove, syare wapo anakotaro ngkakainoanive ramauta wasaora tenambe. Vemo wapayarurijabe nora muno wapa angkarije ntapekan nora. Vemo wasanuga mparijo vatano kaijinta mai nora muno wapo maura tantunawi nora. ² Yara syare wabekero Amisy apa kove rai, maisyare arikainyo tuvane beke dave po akoya ama ukame raisy wemaisy. Syare weapamo maisyare arikainyo tuvane umaso amaisy ti wabekero Ayao Amisy rai, omamo ndandinit, indamu watubai wabambunin muno wapa ayao kakai mpaya wasai ti wapo kove raijar. ³ Weye Amisy anuga ngkovo wasai omamo wapo ranaun dirive wasai to.

⁴ Wade Amisy Yesus Kristus ai, wepi kova no tawan. Opamo aurata irati oramo mantumane rai: vatane wo orame umaso ramauta, weramu Amisy po rator pare ama ngkove manakoe, weti Po ratayao po apa yavare ranari. ⁵ Wade Ai indamu weapamo Apa oramo po veano apa yavaro ndandinit ranari tavon.* Muno Po wasatayao indamu wabe syembe wapana patambe Ai, weti wapo wasanuga raunanto terave Ai, maisyare syene wo anakotare rameseo Amisy ai ramaisy.* Muno wapa ana wapo raunanto Amisy ai omamo Yesus Kristus po ratayao da mamai no Amisy amune rai. ⁶ Maisyare Ayao Amisy mo ratoe no wusyinoe rai, Amisy pare:

“Inya! Syo oramo ama ngkove ntiti inta ratayao to,

Syo raugaje ntuna no munijo Yerusalem rai.

Wemirati oramo mbambunin indamu veano yavare ranari.

* 1:16 Imamat 11:44-45, 19:2 * 1:25 Yesaya 40:6-8 *
2:19-22). * 2:5 Roma 12:1

2:5 Yavare so raurata irati Anugano Amisy mansai (Epesus

Orame so raurata irati Vatano syo atayayo indamu

are nawirati wanave Ai onawamo manimaumbe jeben, yara man-ayanambe Apa kove rai.”†

7 Weti vatano wapanave Kristus aije weapo raen Kristus pamo aurata oramo ngko dave umaso rai. Weramu vatano wanave jewene nanawamo, syare maemen Ayao Amisy ama aneme so rai mare:

“Orame somamo vatano wo yavare ranari wonayo rai, ti wo ramauta vayave.

Weramu omirati oramo manasyin dave Amisy po ratayayo indamu yavare rausea nteto rai mo rajar matuve.”*

8 Muno syare vatano wanave jewene maemen Ayao Amisy ama anemo kajinta rai no taiso:

“Orame somamo vatane awa kawi rantukamo rai ti utatayaje no min.”*

Vatane umaso utatayaje weye wonae ubeta Amisy apa ayaowe rajji. Utatayaje ma-maisy mangke Amisy po rapatimugo mai wusyimbe to rai.

9 Weramu weapamo Amisy po rapatimugo wasai no taiso: weapamo susyo Po wasatayao to muno weapamo wabe syembe Akarijo Titi ai. Muno weapamo kawasaeyo wadandinit muno weapamo vatano Amisy apaura terave wasai. Amisy po wasatayao indamu wapo Apa ana po rave manakoe ravov. Weye Opirati po wasawain wapuje no kaumure raora indamu wasisa Apa varo ngkove rai.*

10 “Wusyinoe weapamo Amisy apa kawasae waino wasai jeben, weramu soamo weapamo Apa kawasae waino wasai.

Wusyinoe Amisy aemeno wasai ramu, weramu soamo aemeno wasai rave.”*

11 Sya arakovo inanuga no wasai, wasaurata irati vatano marane mai arono watantuna no mine vone so, weye wapa munijo tugae nori rati munijo nti. Weti syo anyayao raugaje wasai indamu vemo watawondi wasanasine ama bekero ngkakai mine so rai jinya, wemirati mbe marovave taune wasai. 12 Wana no vatano wantatukambe Amisy aije awa yasyin. Onawamo wo wasaura tantunawi ware weapamo vatano wakakainoanive. Weti syare wapa ana wadaveye ngko tenambe indamu arono vatane wato wo raen, wea indati wo Amisy ararimbe arono Apa masyoto de mansai no mine so rai.

Wabeta pemerinta ai muno wabeaje vatan tenambe mansai

13 Wabeta vatan tenambe nanawirati ube akarive no mine so mansai, weye wemirati Amisy Yesus Kristus apa bekere mije. Weti wabeta akarijo titi ai, napi be akarive pemerinta rai. 14 Muno wabeta akarijo pemerinta mansai tutudi, weye onawamo akarijo titi pemerinta umaso po matutir indamu wo apa bekere rajjar, weti wo mangke raugaje vatano nanawirati awa ana udave mamune mansai, yara ukangkamambe vatano nanawirati awa ana wo rave ngkove mansai.* 15 Weye Amisy beker indamu wapa ana wapo rave ngkove mo vatano wantatukambe mauga ti awa wo wasaura tantunawi nsopi indamu umanin kobe. 16 Weramu vemo wapo ratantonanare somaisy inya: “Ranivara wambeker wamo anakotaro ngkakai rave, weamo wamo rave kai, weye vatan inta wo wansaorai kakai.” Wakoe! Ayao wato ngkove ramu! Weapamo vatano Amisy po wasajjar indamu wapanapatambe Ai, weti wabeta ana ngkove bo rai. 17 Wabeaje vatan tenambe mansai. Wamuinyo wapa arakovo wapanave Yesus Kristus ai kava wasai vambinibe. Wapo Amisy asyaniv. Wabeaje wama akarijo titi pemerinta ai.

Kristus apa siurije mbe unanuive wasai

18 Syo anyayao raugaje vatano weapirati wapanapatambe akari inta aije wasai no taiso: Syare wabeta wapa akari apa ayao rai tenambe. Syare wabeaje ai arono apa ayao nsaumano wasai muno arono apa ayao mpanyoano wasai tavon. 19 Ranivara wapo ana ngkakai inta rave ramu, weramu wapa akari po wasave tatugadi vayave, weamo syare wasatawandi rai weye wasaemendi Amisy apa bekere rai. Weaveti Amisy anayanambe wasai. 20 Weramu ranivara wapa akari po wasanepat weye wapo ana ngkakai rave, indati syare wapo wapa siurije umaso ranawan kai. Weramu ranivara wasiuri weye wapo ana ngkove rave, muno wasatawandi wapa siurije rai kobe, weamo Amisy anayanambe wasai. 21 Amisy po wasawain indamu wasiuri, weye Kristus siuri wasamarom weti be unanuive inda wapo arijat.

22 “Opamo po ayao kakai inta rave jeben, Muno ayao arurijate inta no Ai jeben tavon.”*

23 Arono vatane wo Kristus akaajian, Opamo sarirae akananto Po makaajian ramu. Arono siuri weye vatane wo

† 2:6 Yesaya 28:16; Roma 9:33. Yerusalem mamo vatano Yahudi awa munijo akoe mije, ama tame rawain tavonamo “Sion” weye ntami no Unato Sion rai. * 2:7 Mazmur 118:22; Matius 21:42; Markus 12:10; Lukas 20:17; Arakov 4:11

* 2:8 Yesaya 8:14; Roma 9:33 * 2:9 Yesaya 9:2; Epesus 5:8; Kolose 1:12-13; 1 Tesalonika 5:4-5; 1 Yohanes 2:8-11 * 2:10 Hosea 2:23 * 2:14 Roma 13:3-4 * 2:22 Yesaya 53:9

ansewabe, sakina damu Po anaamatane inta rapatimugo mansai ramu. Yara Po taune aunanto Amisye obo ai, Opi po mangke rapatimu mamai dave. ²⁴ Kristus taune po wama ayao kakai ranawan arono sawa no inyo kapite rai, indamu wamo ayao kakai ravea nsopi umba wantavondi ana ngkove obo rai tutir. Weye Kristus apa paro no anasine rai wemirati mo saumane raugavo wansai. ²⁵ Wusyinoe weapamo wasaurata irati maero domba po unanuije rapaya ti to pananepabe amaisy. Weramu naiso wasakinav wapakare Vatano po Domba Maeranande ai to, Napi po wasaeranande muno Po wasavijuri jirati kakaije rai.

3

Ananyao raugaje anya, wanya ubaun-name mai

¹ Syo raura tavon irati wanya wabau-name wasai: wabeto wapa anya mansai tutudi.* Wabeto mai indamu ranivara wapa anya inta wanave Ayao Kovo Kristus rai rainy, wea indati wo wapa ana wadave ngkove raen ti mo manuga raugabe indamu wanave kobe. Maisyare omaisy, wapa anya so wanave mamo wapo mansanyao wasawa rai ma jewen kai. ² Arono wo wasaen wapo Amisye asyaniv muno wapa ana wadave mamo ngko dave, indati mo manuga raugabe indamu wanave Ai. ³ Sya arakovo wanya weap, vemo wapo wasanakea ramandine obo ratantona nora.* Weye wapa ngko dave mamo raen no wasanakea vone rai jewen, maisyare wasakarivui nye rairi ti ngko dave ndako, wapo raonijo emasije rangkion ndako, wapo ansuno ngko dave rave rako omaisya. ⁴ Yara wapa ngko dave mamo ntipu no wasanuga rai umba nadesen. Weti syare wasanuga mamo mpaaje muno nsaumano vatane mai, weye wapa ngko dave namije no tawan, muno wemirati Amisye po rator pare ngkove mije. ⁵ Muno arono wusyinoe, wanya nanawirati utavondi Amisy ai muno mansanave Amen wenawamo maisyare wemai tavon. Onawamo awa ana ngko dave raen no awa ubeaje awa anya mansai. ⁶ Maisyare wamo raeno aneno Sara rai, wemi mbeto ama anya Abraham ai muno mo awain ama akari. Sya arakove weap, Sara mbe anuive wasai, weti ranivara wapa ana wapo rave ngkov muno wapo ayao panyoane inta rasyanive ramu, weamo weapamo Sara ama arikainye waino wasai.

⁷ Naiso syo raura tavon irati anya wabau-name wasai: Syare weananto wapa wanya manuga rai tenambe, weye wadaen wanya

mamo ranasine ama vambunine mamaisyo anya apa rai jewen. Muno wabekobe mai inda mamaisy, weye onawamo Amisye po apa kovo ngko dave raugaje mai tavon, maisyare muno Po raugaje wasai. Weramu ranivara wabekobe wapa wanya maije jewen, weamo mo wapa sambaya wapo raura seo Amisye aije ransopi.

Wapo ana ngkove rave tutir

⁸ Ananyao ranugan tenambe mi som: Arakove, syare wapa ana wapo ratantona intabo muno wasanuga intabo ti wasaumano wasai vambinibe. Wasaemeno wasai vambinibe maisyare arakovo anui, rijate inta maemeno mansai vambinibe no awa yavaruga rai ramaisy. Syare wasanuga ngkovo vatane mai muno wasanuga mpaaje mai tavon. ⁹ Arono vatane manuga mamuno wasai, vemo wapo mamune rasakinavo mai nora. Arono wo wasakaajian, vemo wapo akaajian rator akaje mai nora. Yara wapo kove rasakinavo mansai. Weye Amisye po wasawain indamu wapo kove raugaje mai, indati Po kove raugaje wasai tavon. ¹⁰ Ayao Amisye mo ratoe mi som:

“Are pirati beker pare anayanambe arono tuna no mine so,
muno pare apa masyoto no no mine so
ama kove raen no ai,
weamo syare po taune awa raeranande indamu

vemo po ana ngkakai inta raura nora,
muno po aarurijate inta rator nora.

¹¹ Syare akirive ana ngkakai rai,
yara po ana ngkove rave tutir.
Muno syare bekero panyoambe indamu
anuga nsaumano vatan tenambe mansai.

¹² Weye Amisye po vatano wo ana mamaisyare rave mansaeranande,
muno Po awa sambaya wo raura seo
Aije raraniv.

Weramu Amisye marovave vatano
nanawirati wo ana ngkakai rave mai.”*

Ranivara wasiuri weye wapo ana ngkove rave, weamo wasatawandi rai

¹³ Ranivara wabeke dave indamu wapo ana ngkove rave, indati vatan inta wo wasave tatugadi jewen. ¹⁴ Weramu ranivara siurije nande wasai weye wapo ana ngkove rave, indati Amisye po kove raugaje wasai. Weti vemo wajanivo vatano wo wasave tatugadi mai nora muno vemo wasanuga mamaun nora!*

¹⁵ Yara wabeaje Kristus ai muno wapo aura kakavimbe wapare Opirati wapa Amisye pige. Arono vatane wo wasanajo

* 3:1 Epesus 5:22; Kolose 3:18

* 3:3 1 Timotius 2:9

* 3:12 Mazmur 34:12-16

* 3:14 Yesaya 8:12-13

ware, “Wabeanimaibe wasanave Kristus amen?” syare wapanatatayaube indamu wapo ayaowe rasakinavo mai. ¹⁶ Muno syare wasanuga mpaaje muno wapayao saumambe arono wapo Kristus aura kakavimbe mai. Ranivara vatane wo wapa ana wadave ngkove raura tantunawi weye watawondi Kristus ai, vemo ayao kakainoanive inta ntipu wasai nora, yara syare wasanuga ndandinit tutir. Indati masyoto makareye vatane wato usamane wo wasaura tantunawi umaso rai.

¹⁷ Ranivara Amisyre beker pare wasiuri, kove mamu wasiuri weye wapa ana wadave ngkov, yara vemo wapa ana wadave ngkakai omi mbewar wasiuri wenora. ¹⁸ Kristus siuri tavon ti kakai to. Opamo kakai intabo kobe indamu Po wansapaya wama ayao kakaije rai. Opirati ayao kakai meweno Ai, weramu kakaijo watano wama ayao kakai ntapekane wansai, indamu Po wansaugav wanta Amisy ai. Vatane wo Kristus anasine raubaisy, weramu Anawayo Vambunine mo kovakato raunande Ai. ¹⁹ Muno Anawayo Vambunine no Kristus ai, weti poroto Po ayao Amisyre ravovo mansanawayo nanawirati utantuna makova mansai.* ²⁰ Onawamo ubeta Amisyre ai jeben arono aneno Noaka noowe. Amisyre apa bekere mamu indamu usakinavo awa ayao kakaije rai, weti atawandi Po manyut awa Noaka po apa nyomane ranarija mewen. Weramu watano usea nyomane umaso rai obo nawirati mapaya irati mangkeo manayam akoe ama kakai mo raugave rai; vatane umaso mansano kaumandei bayave. ²¹ Wemirati rapararita irati rijate soamo wansaugasya kuvuni mana rai, omamo mo wansapaya ayao kakai rai. Koano wansaugasya kuvuni mana rai omamo indamu mo wansanasino nggwambe rarondome oma jeben, yara wamo Amisyre anajo indamu po wama ayao kakai wansanuga rarandom inda ngkakavin. Amisyre po wansapaya wama ayao kakaije rai weye Kristus kovakato no wene ama uga rai. ²² Muno Kristus seo no munijo titi rai to, soamo tuna no Injayo Amisyre anem ngkove rai indamu be akarive atavon. Opamo be akarive naito Amisyre mansai, be akarive irati akarijo titi wo naumo warae rajjanande mansai, muno be akarive tavon irati vambunine kotaro rui una no naumo warae mansai tenambe.

4

Soamo watawondi ayao kakainoanive rai jakatoe ramu weye weapamo watano wagwanyin to

¹ Arono Kristus de mine so rai to, Opamo anasine nsiuri, weti syare wapa bekere mamaisyo Apa rai. Wapanatatayaube wasiuri weye watawondi Kristus ai, ti wapo ayao kakai rawatambe wasai. ² Weti sya arakove, arono ta wana no mine vone so rai, vemo watawondi vatane awa bekero ngkakainoanive rai nora, yara watawondi Amisyre apa bekere obo rai. ³ Nugenta rave wapa ana wapo rave mo watano watatukambe Amisy ai awa ramaisy. Weye arono wusyinoe wapo ayao anaerere rave muno watawondi wapa bekero ngkakai rai. Muno weamaeno awije rai, wapanagan wapo awije ramanam ti wapaumandi. Muno wabe sambayambe yare rai ti nggwambe wasai. ⁴ Wapa arakovo wusyine upaparo mansai weye soamo watawondi mai jakatoe ramu arono wo awa ana udave nggwambe rave. Weti wo wasaura tantunawi. ⁵ Weramu masyoto rijat watano nanawije indati usayai no Amisyre amun, wepirati panatatayaube indamu Po vatan tenambe mansanajo awa ana udave rai, watano nanawirati utantunana nene muno nanawirati ugwenen to, indamu Po ayao mamaisyre rapatimugo mai. ⁶ Wemi mbewar Ayao Kove mamu ravovo watano ugwenen to mansai tavon. Onawamo ukakai weye wene mamu Amisyre apa mangke po raugaje vatan tenambe mansai. Weramu Ayao Kove ravovo mai wusyimbe to indamu mansanawayoe ukova nuge nuganui, mamaisyo Amisyre apa bekere rai.

Kovo vambunino Amisyre po raugaje mamu wapo rajja kobe indamu ngkovo watano wanui mansai

⁷ Munije ama akari nandea mararai to. Weti wasyisyaube muno wapo wapa ana wadave, wadatantona raeranande indamu varore ntami wasai wapo sambaya rave Amisyre ai. ⁸ Ana mbe mobe mamu weamuinyo wasai vambinibe, wasanuga ntenami rautan. Weye ranivara weamuinyo wapa arakove mai, weamo awa ayao kakai manui wo rave irati wasai mamu wapo ratoro ramu, yara wasatawandi rai vayave. ⁹ Syare wapo wapa arakovo wanave maugave usen no wapa yavar, muno wapo raijaro wasanuga ranayanambe rautan, weramu vemo wapanatambe nora.

¹⁰ Amisyre po kovo vambunine raugaje wansai tutudi, muno Apa kovo po raugaje mbe kotabe. Weti syare vatane na-

* **3:19** Mansanawayoe so are nawije? Ayao so ama ntunato rajje mbare jeben, weti vatane inta wo ratantona ware mansanawayo umaso onawamo watano ukakai ti mansanawayo karimu arono Noaka aijoe, yara watano kaijinta wo ratantona ware onawamo naito Amisy nanawirati wo ayao kakai rave (Kejadian 6:1-4; 2 Petrus 2:4; Yudas 1:6). ✪ **4:8** Amsal 10:12

nentabo nyo nya kovo Amisyey po raugaje nai raija kobe rave indamu ngkov irati vatano wanui mansai. ¹¹ Ranivara Amisyey po kovo vambunine raugaje nai indamu nyayao papirabe, weamo winyirati nyo Amisyey apa ayao raura anugano Amisyey mansai. Ranivara nya kovo vambunine mamono nyo vatane maeranande, weamo nyo maeranande mamaisyoy Amisyey apa vambunino po raugaje nai rai. Indamu nde anakotaro rui vayave wapo raijar, wapo Amisyey aura titive irati Apa Kavoy Yesuy Kristus apa tame rai; Apa kovo ntiti muno Apa vambunine rararimba nuge nuganui! Amin.

Ranivara wapa anave Kristus aije mbe-war ti siurije nande wasai, weamo wasanave Amisyey obo amen

¹² Sya arakovo inanuga no wasai, soamo siurijoy manakoe nande wasai indamu moy wasatopan, weramu vemo wapaparo wasai nora. Weyey siurijey nande vatano wamanave Kristus aijey wansai tenambe indamu wama anave ama vambunine raen. ¹³ Yara syare wasananibe weyey varore raugajey wasai indamu watavondiy wasiury Kristus atavon. Indamuy arono Kristus pakare no mine vone soy Apa kovo ntiti rautan, indatiy wasanayanambe. ¹⁴ Ranivara watavondiy Kristus aiy mbewarom vatane woy wasaura tantunawiy, kove ngkov iratiy wasai. Weyey maisyare omaisyamoy tugay, Amisyey apa Anawayoy Vambunin, omi ntiti rave, no wasaija. ¹⁵ Weramuy vemo wapa anay wadave ngkakai wemiy mbewar ti wasiury rai jintay! Ranivara vatane intay siury weyey po vatane intay aubai dakoy, panaonoambe rako, apa anay dave mamun dakoy, po taname raon nantoy vatano kaijintay awa ayaowe rai rako, weamoy vatano napijey siury kai! ¹⁶ Weramuy ranivara wasiury weyey weapamoy vatano Kristen nawiratiy weap, weamoy vemo weasamaney nora. Yara syare wapo kove raura seoy Amisyey aiy weyey weapamoy Kristus apa tame veanoy wasawain.

¹⁷ Soamoy amay masyotey nandey to, Amisyey po vatane mansanajoy awa anay udave ngkakai, ngkove rai. Munoy kawasaeyoy Amisyey apauray mansai wenawiratiy Po manajoy manasyimbe. Wakoe! Ranivara Amisyey po usyey koy iratiy vatano wamanave wansai, umbay tugay rave vatano wanave Apa Ayao Kove raijey jewenay nawamoy indatiy awa mangkoy raugajey mangkobe may! ¹⁸ Maisyare Ayao Amisyey moy rauray mare:

“Vatano wanave munoy manugay ngkov on-awamoy
usiury ratiy umbay maugav usisay munijoy
ntitiy rai.

Yara vatano woy ayao kakai rave munoy vatano manugay mamunoy Amisyey aiy nawamoy indatiy unajivoy Amisyey apa mangkoy rauray kakai!”[✠]

¹⁹ Weti ranivara weasiury mamaisyoy Amisyey apa bekere rai, weamoy syare wasatawandi. Syare wapo tauney wasaunantoy Amisyey wepi po wasanarijey Aiy. Munoy wasanave Obo amen weyey Opamoy teto apa urairiy rai tawan. Weti syare wapo anay ngkove rave tutir.

5

Ananyao raugajey anugano Amisyey mansai munoy awa akari mansai

¹ Syare syoy ayao intay rauray akarijey wapo anugano Amisyey maugave wasai. Risyamoy akarijey intay pi riy tavon, munoy risyamoy syoy Kristus apa siury raenoy inamijey rai to. Munoy aronoy indatiy Kristus pakare akatoy ti Apay kovo ntiti raroronoy vatane mansamun, indatiy risyamoy ritavondiy Apay kovo ntiti watoy rai. ² Syoy ananyao raugajey arakovo wabay akarive wasai no taisoy: Amisyey po apay kawasay intay mansaunandey indamuy wapo maugav. Wemiratiy Apay anakero po raugajey wasai mijey, weti syare wapo maeranandey kobe, maisyare vatano po apay dombay maeranandey amaisyoy.[✠] Vemoy wapo anakere soy raijar maisyare vatane intay po wasantitidiy wemay nora, yara wapo raijaro wasanugay ranayanambe rautan, mamaisyoy Amisyey apa bekere rai. Munoy vemo wapo raijar weyey wabekero doijey obo rai nora, yara wapo raijar weyey wabekere dave indamuy wapo Amisyey apay kawasay maeranandey. ³ Vemoy wabay akarive tanamamoambe vatano nanawiratiy Amisyey po mansaunandey wasaijey may nora, yara ribekere indamuy wabay unanuivoy may indamuy woy wapa anay wadave rarijat. ⁴ Weti indatiy wapo wapa anakere umasoy amay iney raugav aronoy wapa Akarijey Titi pakare no mine soy. Umbay naijey Poy wapa anakere amay iney raunandey, wemiratiy amay ngkovo ntiti raumandiy kakai, yara noay nuge nuganui.*

⁵ Syoy rauray tavon iratiy arakovo kamuramewasai indamuy wabayejey iratiy akarijey woy anugano Amisyey maugave mansai. Munoy vatanay tenambe weapamoy, vemoy wasararin nora yara syare wasanugay mpaajey iratiy wapo arakove mansai tutudiy, weyey

✠ 4:18 Amsal 11:31 ✠ 5:2 Yohanes 21:15-17 * 5:4 Ayao Yunani naisoy moy rauray mare wamay anakere amay iney rauratay iratiy “sapeoy ngenav intay rai, omiratiy amay ngenavay raumandiy kakai yara noay pitawabe.”

“Amisye kantetoaro vatano mararine mansai,

yara Po kove raugaje irati vatano manuga mpaaje mansai.”^{*}

⁶ Maisyare omai ti, syare wasanuga mpaaje no Amisye amun, opirati bambunin dave, indamu arono Apa masyote mamaisy, indati Po wasaijasea titive. ⁷ Anakotaro wasanuga mamaun dai mamu wapo ruananto vintabo no Amisy ai indamu Po wasaeranande rai, weye Opamo aemeno wasai.

⁸ Wasyisyaube muno wapanatatayaube ra wamamai to! Weye Anakakai Akoe pamo wapa marova pije. Wepirati aurata irati make singa karirimbe inta ai, wepi toe de po apa maero po maisye makani. ⁹ Weti syare wapo Anakakai Akoe aorai, wana tawan no wapa anave rai. Weye wapo raenamo weabopirati siurije so nande wasaije ramu, yara wapa arakovo wanave Kristus ai utantuna no munije rui vayave no mine so usiuri tavon mamaisyo wapa rai. ¹⁰ Weramu wapa siuri so noa nugoenta ramu, yara kavinta nakato nsopi. Mewen to, umba Amisye po wapa ana no wasai ravera mamai tenambe: Po wasanuga raijasea mbambunin, Po vambunine raunande indamu wapa anave ntindimu, muno wana tawan no Ai matuve. Weye opamo Amisyo anuga ngko dave, Po wasawainde indamu watavondi Apa kovo ntiti no pitawabe rai, namirati Po raude wasai weye wabe intabove Kristus ai. ¹¹ Kangkamambe Amisy ai, wepirati apa vambunine ntamija nuge nuganui. Amin!

Kovo Petrus po raura marane rai

¹² Sya nyovara wao ntumainyo idatoo so mamu arakovo Silas[†] tavondi sya anakero syo ratoo rai. Silas so syo aen opamo wama arakovo tavondi Kristus ai tutir. Syo ratoo wasai indamu syo wasanuga raijasea mbambunin muno indamu syo Amisye apa muinye raura tugaive wasai. Weti vemo wasakirive Apa muinye so rai nora, yara wano tawan no rai. ¹³ Arakovo anugano Amisy una no munijo Babilon naiso[‡] wo kove ranutugore wasai. Onawamo Amisye apa kawasaeyo po mansatayao maisyare muno weasamaisy. Muno Markus po kove ranutugo wasai tavon, wepirati maisyare taune sya arikainyo inanuga no ai pije. ¹⁴ Wapo kove raura wasai vambinibe wasanuga muinye rautan, weye wabe arakobe no Yesus Kristus ai.

Syare Amisye apa saumane no wasautan tenambe, wepirati Kristus apa kawasae apaura wasai.

^{*} 5:5 Amsal 3:34; Yakobus 4:6 [†] 5:12 Silas awain tavonamo Silvanus. [‡] 5:13 Arono wusyinoe Petrus po apa nyovara waowe so ratoo, vatano Kristen wanui wo tamo Babilon veano munijo Roma rawain. Babilon rawain tavonamo Babel.

Nyovara Wao Jirum Petrus Po Ratoe 2 PETRUS

Petrus po kove raura

¹ Risirirati Simon Petrus, syanapatambe Yesus Kristus ai, muno risiyamo Kristus po inatutir indamu syo Apa Ayao Kove raura. Syo nyovara waowe so ratoe more vatan tenambe wapanave Yesus Kristus aije wasai.

Kristus opirati wama Amisy pije muno Opirati po wansapaya wama ayao kakaije rai. Opamo apa ana dave mamai dave, weti wapa anave Po raugaje wasai omamo ramuinyo reama anave raije ramu, yara mamai kava. ² Syare Amisy apa kove muno Apa saumane ntairi wasai, weye wapo Injayo Amisy aen muno wapo wama Amisy Yesus aen tavon.

Ananyao raugaje vatano Amisy po mawain po matayao mansai indamu utavondi Ai mavabe

³ Amisy apa vambunine mamu Po raugaje manakove wansai, indamu wambambunin wantavondi Apa bekere rai no mine so. Po apa vambunine raugaje wansai weye wamo aen to, Napi po wansawain mamaisyo taune Apa kovo ntiti muno anuga ngkove rarijati. ⁴ Maisyare wemaisy, Po apa urairijo ngko dave muno manakoe raugaje wansai. Po apa urairije umaso raugaje wansai indamu mo wansapaya irati mine so ama bekeru ngkakainoanive rai, wemi mo kakaije raugavo vatane mai. Muno Po apa urairije umaso raugaje wansai indamu wansanuga indati mo taune anuga ramaisy.

⁵ Maisyare wemaisy, sya arakove, wabeke dave indamu wapo kovo syo ratodije so raugasya ntuna wasanuga rai no taiso: Wapanave Kristus ai to, weti umba syare wapa ana wadave ngkov hintabo indamu mo wapa anave ramaisy. Umbawe syare wapo Amisy apa bekere raen tenambe. ⁶ Umbawe syare wapo taune wapa ana wadaura muno wapa ana wadave raeranande indamu vemo wapo ayao kakaije rave nora. Umbawe syare wasatawandi tutir muno watawondi Amisy apa bekere rai mavabe. ⁷ Umbawe syare wabekobe irati wapa arakove mansai, muno wamuiny irati vatan tenambe mansai. ⁸ Syare kovo ratodi tenambe umawe mamu ntairi wasanuga rai muno miridi nseo. Vemo wapa wapo wama Amisy Yesus Kristus aene omamo mbea marudi nora, yara ama ine raen no

wasai. ⁹ Weramu ranivara kovo ratodi umaso mamu meweno vatane inta ai, opamo maisyare amije ntuba ti apa ana po raene ngkaumudi. Weye vatano napije animari jirati apa ayao kakai wusyino Amisy po rapaya ai to rai.

¹⁰ Sya arakove, syare wabeke dave watawondi Amisy ai indamu wapo raen tugaive wepamo vatano Amisy po wasawain po wasatayao nawirati weap. Weti ranivara wapa ana wadave mamaisyo kovo ratodi umawe rai, wea indati wasakirive Amisy aije ramu. ¹¹ Muno indati Amisy po unsanda rausiso wasai indamu wasisa munijo wama Amisy Yesus Kristus be akarivea ntoa nuge nunganui rai. Opirati po wansapaya wama ayao kakaije rai.

¹² Weapamo wapo anakotare umawe raen to, muno watawondi ananyao tugae rai matuve to. Weramu syare syo raura nakato indamu wasaemen dai tutir. ¹³⁻¹⁴ Syo raen sya masyoto ikakai raije ndea mararai, maisyare wama Amisy Yesus Kristus po rarorono rinai to rai. Weti arono ritunana nene, syo anakotare umaso raura rijati akato indamu wasaemen dai, omamo mamaisy. ¹⁵ Weye ribeke dave syo unanuije rakani indamu arono indati rikakai to, weamo wasaemen irati sya ananyao syo raugaje wasai rai tutir.

Ayao anawae wusyine wo raurairive omamo mamai tugae

¹⁶ Ayao reamo raugaje wasai to omamo ayao umano mbe tugaive jewene ma jewena. Yara reamo raura tugaive arono reamo wasanyao reamare wama Amisy Yesus Kristus indati pakare akato no mine so, de irati Apa vambunine rautan. Reamo wasaponae ramu, weye reamirati reamo Apa vambunino kovo ntitiye raeno taune reansamije rai to. ¹⁷⁻¹⁸ Weye masyoto wusyinoe reano Yesus arijat no unate inta rai arono Injayo Amisy po Yesus apa kovo ntiti raroron muno Po aura titive. Naije reandaniv anamote no no Amisyo Titi ngkinde mo Yesus aura mare, "Sopamo Sya Arikainyo inanuga no Ai rave. Inanayanambe Ai."¹⁹ Reamirati reamo anamoto no no munijo ntiti umaso ranaun to.

¹⁹ Ana nande no unate umaso rai mbewar reamanave wamare ayao anawae wusyine omamo mamai tugae. Weti kove mamu wapo ayao anawae raraniv mavabe, weye awa ayao raurata irati yawainyo rakaindi ti mbaro namano kaumure rai. Ayao anawae mbar ava masyoto Yesus Kristus pakare ti taune Apa vare mbaro wasanuga rai, maisyare akane ntipu muno Tundinit seo no wanamuram ramaisy. ²⁰ Arakove, syare

✧ 1:17-18 Matius 17:5; Markus 9:7; Lukas 9:35

wadanide, wapo ayao so ranaun kobe: Anawae wusyine wo Ayao Amisyete ratoe mamaisyo taune awa bekere rajie ramu.*²¹ Weye anawae awa ayao uaura mamamu muje no taune mansai umba wo raura ramu. Yara Amisyete apa Anawayo Vambunine mo vatane umaso mausuru tenambe muno Mo vambunine raugaje mai ti umba wo Amisyete apa ayao raura.

2

Wasyisaube kuruno angkari mai!

¹ Sya arakove, wasaemen arono wusyinoe anawae angkari inta usayai no kawasae Israel awa yasyin. Weti wasyisaube! Weye maisyare wemai tavon nugo naiso kuruno angkari indati usisa no wapa yasyine rai. Wo ananyao nsasye raugav maninimbe indamu wo wasaponae wo wapa anave randamisy. Amisy Yesu kakai indamu Po kuruno angkari wato mapaya awa ayao kakaije rai, weramu onawamo wo Yesu amamarave. Maisyare omaisy, indati awa mangke nande mai papabe.² Vatane wanui indati utavondi kurune wato awa ana udave ngkakainoanive rai, weti vatano kajijinta wo raen wea umba wo Yesu apa ananyao tugae raura tantunawi.³ Muno kuruno angkari wato indati wo ayao taune wo ratantona rariri indamu wo wasaponaya wapo doije raunandeo mansai, weye usasokabe. Weramu awa mangke mammo Amisyete po ratayaowa ntuna ti mararai kobe to.

⁴ Are nawirati wo ayao kakaije rave, onawamo indati Amisyete po awa mangke raugaje mai jaje. Arono wusyinoe naito Amisyete wo ayao kakai rave, Amisyete po awa mangke rapaya mansaije ramu, yara Po mamaugasya ateme rai indamu utantuna makova no kaumure rai java masyoto indati Po awa mangke rapatimugo mai.*⁵ Arono wusyinoe vatano manuga mamuno Amisyete ai wanui rave. Awa mangke mammo Amisyete po rapaya mai jeben, yara Po manayam akoe ratutir njamo mine vone so rai vintabo, ti vatano mamune umaso ukakai tenambe. Weramu vatano ta utantuna mansano kaumandei, weti Noaka pe apa yavaruga obo nao.* Amisyete po mavijuri jirati kakaije umaso rai weye Noak payao aje vatane wato mai wusyimbe to pare, "Wapo wapa ana wadave ravera mamai no Amisyete amune rai!"

⁶ Muno Amisyete po mangke raugaje munijo Sodom muno Gomora yai, Po taname rapin dai mangkur ti rakanive.* Amisyete po randamisy taije indamu vatano nanawirati

manuga mamuno Ai ujaniv ware, "Indati animaisyete mi nande wansai?"⁷ Weramu Amisyete po Lot auguje taname umaso raura, weye opamo vatano kove pa. Arono Lot po vatano Sodom muno Gomora maen, anuga ranimaumbe mansai rave weye awa ana udave ngkakainoanive muno nggwambe.⁸ Opamo tuna no awa yasyine rai, namane rinit po awa ana udave ngkakainoanive ranyanyut, weti anuga njoram.

⁹ Anakotaro nande tenambe umaso mammo mo Amisyete apa vambunine raroron: Opamo bambunin po vatano utavondi Apa bekere rai mapaya irati awa ana mo matopane rai. Muno Opamo bambunin po vatano awa ayao kakaije ntapekano mansai maijar tutir awa Apa masyoto mangke rapatimu arono indati Po awa mangke raugaje mai jaje.¹⁰ Muno Amisyete po apa mangke raugaje manakoeve irati vatano nanawirati utavondi manasine ama bekero ngkakainoanive rai muno vatano nanawirati wonae Amisyete be akarive maije mansai tenambe.

Kuruno angkari umawe onawamo mambirive muno mararin dave. Wo akarijo naito Amisyete masyanive ramu muno wo maura tantunawi.¹¹ Weramu naito Amisyete taune onawamo wo awa akari maura tantunawi no Amisyete amune ramu. Naito awa vambunine mo kuruno angkari awa rakivan, weramu onawamo umambirive maisyare kurune wato mansamaisyete ramu.¹² Kuruno angkari wato wo anakotaro wantatukambe rajie raura tantunawi. Awa ana wo ratantona meweno mai ti maurata irati maero utantuna mandayano anate rarijate mansai. Una vayave ra vatane wo mansamayo muno wo mansaubaisyete. Maisyare wemai tavon kuruno angkari awa marane mammo Amisyete apa mangke maje mai.¹³ Indati usiuri mangkebe, mamaisyo siuri mangke wo raunanto vatano kajijinta mansai rarijati.

Kurune wato ubekero manasine ama marinsene obo rai muno usamane ramu, yara wo ana ngkakai rave no kakavin no masyote pa yasyine rai. Arono utavondi wapanunugambe wapisyi tenambe, awa angkarije ntapekan muno awa ana wo rave mbe samaneve.¹⁴ Manuga nntento wanya wanui mansai ti manuga ntairi awa bekero anaerere rai. Wo awa ayao kakaije ransopi jeben, yara wo rave tutir. Wo vatano nanawirati awa anave mayondi manuga raugabe indamu wo ayao kakai rave tavon. Manuga nsasokabe mammo maweso mansai. Maisyare omaisy, indati Amisyete apa

* 1:20 Aneme so ama ino kajijinta no taiso: Ayao Amisyete wemai anawae wusyine wo ratoe mammo vemo vatane inta po rarijato taune apa bekere rai nora. ✧ 2:4 Yudas 1:6 ✧ 2:5 Kejadian 6:1-7:24 ✧ 2:6 Kejadian 19:1-29

mangke maje irati mai. ¹⁵ Vatano nanawije wo unanuijo mamaisye rapaya ntami to, yara utavondi unanuijo ngkakainoanive obo rai. Weye utavondi unanuijo Beor apa kavo Bileam po rarijat no wusyinoe rai. Bileam umaso po anakotaro ngkakainoanive rave indamu po doije ratande ai.*
¹⁶ Opamo seo apa keledai ai indamu poroto po ana ngkakai inta rave. Weramu naije Amisye po keledai awa rayak, umba keledai umaso payao, anamote maisyare vatane anamot ramaisy, po raura nande Bileam ai pare, “Mbeanimaibe wimbeara so?!” Maisyare wemaisy, po anawae Bileam apa pantatukambe umaso ransopi.

¹⁷ Kuruno angkari wato awa ayao wo vatane mansanyao mamamo mo kove inta raunande ramu, weti onawamo mapararita mana ami mparikisye rai, muno mapararita kamayo mbe maruve jewene rai weye ovare po ramawisy weamonto ti rakanive. Maisyare omai ti, kuruno angkari onawamo Amisye panatatayabe indamu Po mamaugusyo kaumuro marane rai. ¹⁸ Kuruno nanawije mansararino awa ayao rai, weramu ama ine meweno rai. Wo vatane manuga raugabe, weye wo ayao manavan raura mai ware, “Wade wantavondi wansanasine ama bekere rai kai!” Wo vatano nanawirati wo mine so ama unanuijo ngkakainoanive rapaya kaijoe matopan akato indamu utavondi awa bekero ngkakai umawe rai jakato. ¹⁹ Muno wo raurairive ware, “Wapa bekero rui vayave watawondi rai kai! Soamo ana inta mo wasansopi jakatoo ramu.” Weramu arono kurune wato wo awa bekero rui vayave rarijat, weamo mo mansaijaro arove rai. Weye wandaen ranivara ayao kakai inta mo wansanuga raokaisyo ama vambunine rai, weamo ayao kakaije so mo wansaijaro arove.

²⁰ Arono vatane wo wama Amisy Yesus Kristus aen, Opi po wama ayao kakai rapaya, weamo mine so ama vambunino ngkakainoanive mpaya mai. Weramu ranivara mine so ama bekero ngkakainoanive mo maokaisyo akato, wea wama anakotaro kakai nande mai jakato ntapekan dave ti mo wusyine umawe rakivan. ²¹ Abo! Wusyinoe wo Amisye apa unanuijo mamaisye raen to. Weramu syo ratantona koveamo wo raene jewen datire ma, weye ranivara wo raen umba makirive rai ti wo rarijate ramu, muno wonayo Amisye apa ananyao tugae rai, weamo mamaisye ramu. ²² Awa ana wo rave umaso mamamo mo ayao vari jirume so ramai dave, mo raura taiso: “Make po apa nyinyo raisy akato,”* muno “Ranivara uge pasyo po mana rayajam no

apa kenanome rai pakasen, mpanyum dave pavave pasyo rai jakato.”

3

Amisy Yesus indati pakare akato no mine vone so

¹ Sya arakovo inanuga no wasai, sya nyovara wao jirume mi so syo ratoe more wasai. Sya nyovara wao manasyin muno jirum omamo syo ratoe indamu weapamo wapa ana wapo ratantona nsarokir muno wasaemen anakotaro so rai: ² Syare wasaemen irati Amisye apa anawae wusyine awa ayaowe rai muno wama Amisy Yesus Kristus apa ananyaowe rai, Wepirati po wansapaya wama ayao kakaije rai to. Apa ananyao mamamo Apa arakovo po matutire wo raura wasai to.

³ Syare wadanide, wapo ayao so ranaun kobe: Arono munije ama akari mararai, vatane inta ude wanaikabe vatano wanave mansai. Wenanawamo utavondi Amisye aije jewen, yara utavondi taune masanine ama bekero ngkakainoanive obo rai.*

⁴ Vatano nanawije wanaikabe wasai ware, “Yesu purairive pare indati pakare akato no mine vone so, weti soamo Napi rui?! Wama injaya nao wo anyut, weramu soa ugwenen to umba Yesus pakare rainy! Muno soamo mine so ntami tawan maisyare manasyin ranari kobeyoe! Weti Yesus apa pakare raije mamamo wamanave rai nora!” ⁵ Arono vatane wato wo raura taije, manimari ayao so rai: Arono manasyin dave Amisy payao ti Po naumo warae muno mine vone so yanari anamote rai. Po mana veano mine ranari, ti mine so ntipu seo no mana ama uga rai. ⁶ Muno nde mana rai tavon mine so randamisy, weye arono wusyinoe Amisye po mana ratutir njamo mine so rai vintabo ti manutu kobe. ⁷ Umba Amisy payao akato pare naume muno mino wandaene so no tawan ava masyoto indati Po taname rapin dai Po randamisy. Pare Po ramavu da ntami java Apa masyoto mangke rapatimu arono indati Po mangke raugaje vatano nanawirati manuga mamuno Aije mansai indamu ukakai.

⁸ Risya arakovo inanuga no wasai, syo raura kakavimbe: Amisy Yesus indati pakare maneai jewen. Weye syare wasaemen: Amisye po masyote muno tume rator maisyare vatane wansamaisye ramu. Yara Amisy pare masyote intabo apa gwaravainye maisyare tume seribu ramaisy, muno tume seribu ama nggwaravainye maisyare masyote intabo amaisy. ⁹ Vatane inta wo rakarae ware Amisy teto Apa urairije maneai rave, weye Yesus pakare

rainy. Weramu Amisyse pamo maneai jewen, yara atawandi wansai. Tugae, Opamo atawandi rave, weye beker indamu vemo vatane inta amaugo marambe ti kakai nora, yara vatan tenambe usakinavo awa ayao kakai rai vintabo.

¹⁰ Weramu Amisy Yesus apa masyoto pakare raije mammo maisyare vatano anaonoano, weye de papabe ti vatane wantatukambe rai.* Arono naije indati naumo warae ranauni ngkin dave umba raumandi kobe, muno anakotaro no no naumo warae mangkuro taname rai. Muno mine so muno ama anakotaro ntuna ama uga rai rakanive vintabo.

¹¹ Sya arakove, nuge so indati rakanive taije maisy, weti kove mammo wabeare rui? Kove mammo weapamo vatano wapa ana wadave mamai dave muno watawondi Amisyse apa bekere rai, ¹² weye weana Amisyse apa masyoto Po rapatimu inda Yesus pakare raije ranyut. Muno wabeke dave indamu Apa masyote so pavave de. Arono naije indati naume mangkuro taname rai ti rakanive, muno tanamo mamokane mo tume, embae, muno naume ama anakotaro no rai ranen ti nsoyandi ninimi ti raumandi. ¹³ Weramu naumo wanyine muno mino wanyine mammo wamo ranyut,* mamaisyo Amisyse po raurairive wansai to rai. Indati naumo wanyine muno mino wanyine somamo ana ngkove muno ana mamaisy obo mi ntuna rai.

¹⁴ Sya arakovo inanuga no wasai, wana anakotare so ranyut tenambe, weti syare wabeke dave indamu ayao kakai muno anakotaro nggwambe meweno wasai no Amisyse amun. Muno wabeke dave indamu wasanuga nsaumano Amisyse ai muno Amisyse anuga nsaumano wasai. ¹⁵ Syare wasaemen: wama Amisyse atawandi vatane mai indamu Po varore raugaje Po mapaya awa ayao kakaije rai. Muno wama arakovo Paulus po anakotare so ratoe wasai apa nyovara wao rai tavon, mamaisyo apa ana po ratantona ntiti Amisyse po raugaje aije rai. ¹⁶ Muno Paulus po anakotare so ratoe apa nyovara wao rai tenambe vintabo. Apa ana po ratoe rai ama ayao inta mammo mangkeo wansai wananta rai. Vatane inta wo Paulus apa ayao raura sasyeve, weye onawamo awa ana udatantona nsarokire jewen muno awa anave ntindimu jewen tavon. Muno vatano nanawije wo Ayao Amisy ama ayao kajjinta raura sasyeve tavon, weti indati Amisyse po mangke nuge nuganui raugaje mai.

¹⁷ Weramu sya arakovo inanuga no wasai, wapo anakotare umaso raen tenambe to, weti wasyisyaube! Vemo kuruno

angkari wo wasanuga raugabe indamu watawondi mai nora, weye onawamo awa ana udave mammo ngkakainoanive vintabo. Ranivara watawondi mai, weamo wapa anaveo ntindimu to omamo indati mayondi. ¹⁸ Yara watawondi wama Amisy Yesus Kristus obo ai, opirati po wansapaya wama ayao kakaije rai, indamu Apa kove ntubai ti manakoe no wasanuga rai, muno wapa wapo aene mammo miridi nseo. Kangkamambe Ai unumeso muno ntoa nuge nuganui! Amin.

*Risy,
Petrus*

Nyovara Wao Manasyin Yohanes Po Ratoe 1 YOHANES

Ayao mo kove raunande

¹ Syo nyovara waowe so ratoe ore wasai indamu syo Yesus Kristus aura kakavimbe wasai. Opamo awainamo “Ayao mo kove raunande,” weye Opirati po kovo nuge nuganuije raunande.* Arono munije so ama manasyinoe, Opamo no to. De no mine vone so rai, reami Apa arakovo po reansatutire reamamo reamo Apa ayaowe raraniv muno reamo aeno reansamije rai to. Reamo aeno reansamije rai muno reamo aijaro reansaneme rai to. ² Opamo aroron kakavimbe ti reamo aen to, omirati reamo raura wasaije so. Arono manasyinoe, nowo Injayo Amisyae autan muno kovo nuge nuganui no irati Ai. Opamo de Po anasine raroron kakavimbe reansai, weti reamo Apa kove wato ravovo wasai. ³ Ana reamo raeno reansamije rai muno reamo raraniv wemirati reamo ravov ore wasai tavon, indamu weape reame wambe intabove tenambe. Wambe intabove Injayo Amisyae ai muno Apa Kavoyesus Kristus ai. ⁴ Reamo ayaowe so ratoe indamu wansanuga ranayanambe rave.

Vare raurata kove rai, yara kaumure raurata ayao kakai rai

⁵ Ayao reamo raranivo Yesus ai ti reamo raura ore wasai mi so: Amisyae pamo var, weti kaumure no Aije jewen bayave. ⁶ Ranivara wamo raura wamare wambe intabove Yesus ai weramu wamanya kaumure bo rai, weamo ayao tugae omi wambeta rai so ma jewena, yara wamangkarive vayavea. ⁷ Ranivara wangkova wano no vare ama uga rai maisyare muno Injayo Amisyae opamo no vare ama uga rai, wea umba wambe intabove wansai vambinibe. Muno Apa Kavoyesus, wepi aunande ti kakai, Po wama ayao kakai kotare rapaya inda wansanuga ngkakavin.

⁸ Ranivara wamo raura wamare wamamo ayao kakaije meweno wansaija, wea umba taune wamangkarive taune wansai, umba ayao tugae meweno wansai. ⁹ Ranivara wamo wama ayao kakai raura kakavimbe Amisyae ai, weamo Amisyae po wama ayao kakai umaso rapaya irati wansai indamu wansanuga ngkakavin. Po wama ayao kakai rapaya weye Opamo no tawan no Apa urairi rai muno Apa ana dave mamai tenambe. ¹⁰ Ayao Amisyae mo raura mare vatan tenambe wamamo wamo ayao kakaije rave. Weti are pirati po raura

pare ayao kakaije meweno ai, beare we-maisyamo po Amisyae aijaseo aruriate rai to. Umba Amisyae apa ayao meweno vatano napije ai to.

2

Wamare wamo Amisyae aen, weamo wambeta Apa ayao rai

¹ Sya arikainyo inanuga no wasai, anakotare so syo ratoe more irati wasai indamu vemo wapo ayao kakai rave inya. Weramu ranivara wamo ayao kakai inta rave, Vatane inta be marimbe payao wansai no Injayo Amisyae amune rai. Opirati Yesus Kristus taunep, Opamo mamai dave. ² Wepi po anasine raunande kakai indamu Po wama ayao kakai ranawan ti mpaya wansai, wirati Po wansaugav wamakare Amisyae ai. Po waboma ayao kakai ranawane jewen, yara vatan tenambe mine so awa ayao kakai ma Po ranawan tenambe.

³ Ranivara wambeta irati Amisyae apa ananyao Po wansatuti dai rai, wea umba wandaen wamo Amisyae aen to ije. ⁴ Are pirati payao pare, “Risyo Amisyae aen ivae,” weramu beto Amisyae apa ananyaowe raije ramu, vatano napije aruriat akoe piye muno ayao tugae meweno ai. ⁵ Yara vatano beto Amisyae apa ayao rai, vatano napije muinyo Amisyae ai ma mamai to. Ranivara wamare wandaen wambe intabove Amisyae ai, weamo wamo raen no taiso: ⁶ Vatano rui pirati po raura pare opamo be intabove Amisyae ai, syare apa ana dave mo Yesus apa ramaisy.

Amisyae apa ananyao wanyine raugaje wansai

⁷ Sya arakovo inanuga no wasai, ayao ridatoe ore somamo syo wasatutiro ananyao wanyine inta rai jakato ma jewena. Yara wusyino idaura wasai yarawe wapanave Yesus Kristus ai kobeyoe ti no wasai to, wemirati idaura rijati akato. Ananyao wusyine wasatuti dai umaso mamamo Amisyae apa ayao wapo ranaun to mi vae. ⁸ Weramu ananyao raura so omamo nggwanin tavone ma. Ananyaowe somamo Kristus beto rai muno weapamo wabeta rai tavon. Weye kaumure, omi raurata irati ayao kakaije rai, merere nto raumandi. Yara vare, omi raurata irati ayao kove rai, omamo nsaneka tutir.

⁹ Are pirati po raura pare opamo no vare rai weramu anuga mamuno apa arakova ai, vatano napije pamo kaumure ta no tawan no ai mansanana unumeso. ¹⁰ Are pirati muinyo apa arakova ai, opamo no tawan kobe vare ama uga rai. Taune anuga

* 1:1 Yohanes 1:1

ngkakavin, weti po watano kaijinta mau-gavo ayao kakai raron oma jewena. ¹¹ Yara are pirati anuga mamuno apa arakova ai, opamo no no kaumure ama uga rai. Muno panya kaumure ama uga bo rai, weti peratoro mamaundi muno po apa unanui raito raene jeben. Maisyare omai ti, apa ana dave ma mamaisye ramu.

¹² Syo ayaowe so ratoe more irati arikainyo inanuga no wasai,
weye Kristus kakaijo wasai ti Amisye po wapa ayao kakai rapaya wasai.

¹³ Syo ayaowe so ratoe more irati ajae wasai,
weye weapo Amisye aen to,
wepirati arono munije so ama manasyinoe no to.

Syo ayaowe so ratoe more irati watano kamurame wasai,
weye wapo Anakakai Akoe apinde to.

¹⁴ Syo ayaowe so ratoe more arikainyo inanuga no wasai,
weye weapo Injayo Amisye aen to.

Syo ayaowe so ratoe ajae wasai,
weye weapo Amisye aen to,
wepirati arono munije so ama manasyinoe no to.

Syo ayaowe so ratoe more watano kamurame wasai,
weye weabambunin muno Ayao Amisye ntuna wasanuga rai muno wapo Anakakai Akoe apinde to.

¹⁵ Vemo wasanuga ntento mine so rai jinya muno ama anakotaro ntuna no ama uga rai, rai jinya. Weye wasanuga ntento ana mine so rai, weamo muinyo Injayo Amisye ai ma meweno wasanuga rai. ¹⁶ Mine so ama bekere maisyare so: wama bekero ngkakainoanive, wasanuga ntento ananugo wamo raeno wansamije raije rai, muno wansararino taune wama vambunine muno wama ananugo manui rai —anakotar tenambe umaso mamo Injayo Amisye apa ma jeben, yara mine so ama ma. ¹⁷ Mine so indati raumandi, muno ama anakotaro ntuna ama uga rai, wemirati wasanuga ntento rai, raumandi tavon. Yara watano utavondi Amisye apa bekere rai, ukova nuge nuganui.

Yesus Kristus apa Marova Akoe

¹⁸ Sya arikainyo inanuga no wasai, munije so ama akari mararai mangkepan to. Wapo ranaun Yesus Kristus apa Marova Akoe indati de wusyimbe. Tugae, soamo watano wanui inta wuje umarovave Kristus ai. Maisyare omai ti, munije so ama akari mangkepane mamo wandaendije. ¹⁹ Arono wusyinoe watano umarovave Kristus aije umaso utantuna wansatavon no anugano Amisye rai, weramu wuje wansaora weye

wanave tugaive jewena. Weramu rani-vara wanave tugaive weratire ma, soamo nanawe wana tenambea nene. Weramu wuje wansaora to, umba wandaendije wananawamo wanave tugaive jewena.

²⁰ Weramu weapamo Amisye po Anawayo Vambunine raugaje wasai muno wapo Amisye apa ayao tugae raen tenambe. ²¹ Weapamo wapantukambe ayao tugae rai ma jewena, yara wadaen to, muno wapo ayao tugae raenamo aruriate ma inta no rai ramu. Wemi mbewar syo ratoe ore wasai.

²² Watano rui pirati pangkarive? Watano po Yesus amamarave, opamo pangkarive pare Yesus opamo Mesias napi Amisye po atutir de be akarive wansai jeben. Watano napije be marovave Kristus ai, po Injayo Amisye amamarave muno Apa Kavo tavon. ²³ Weye are pirati po Arikainyo Amisy amamarave, weamo Injayo Amisye tuna autane jeben. Yara are pirati po raura pare, “Syanave Arikainyo Amisye ai,” opamo Injayo Amisye tuna autan.

²⁴ Ayao wemirati wapo raraniv arono manasyin wapanave Yesus aijoe, ayaowe wato mi syare wapo rajar matuve. Wapare wapo rajar matuve, weamo wabe intabove tawan irati Arikainyo Amisye ai muno Injayo Amisy ai. ²⁵ Somirati Apa ana po raurairive wansai: kovo noa nuge nuganui.

²⁶ Syo nyovara waowe so ratoe ore wasai weye syare wapo raen watane inta ware wo ananyao nososobe raugaje wasai indamu wo wasaponae. ²⁷ Amisye po Anawayo Vambunine raugaje wasai, weti watane wo wasanyao jeben kai, weye Anawayo Vambunine taune mo wasanyao anakotare rai tenambe. Anawayo Vambunin ama ananyao Mo raugaje wasai mamo aruriate ma jewena, yara tugae ma. Maisyare omai ti, syare wabeta Ama ananyaowe rai indamu wabe intabove tawan irati Kristus ai.

²⁸ Sya arikainyo inanuga no wasai, syare wano tawan no Kristus ai indamu arono pakare no mine vone so rajjamo, wanjanive ramu, muno arono de Po wansaen, wansamane no Amune rai nora. ²⁹ Yesus Kristus apa ana dave mamo mamai dave, omamo wandaen to. Weti umba syare wandaen tavon mamo are pirati apa ana dave mamai no Amisye amune rai opamo Apa arikainye waino ai pije.

3

Vatano wamanave Yesus Kristus ai, Amisye apa arikainye waino wansai

¹ Wakoe! Amisye apa muinye ma manakoe rave wansaija! Weti Po wansawainamo Apa arikainye nawirati wam. Tugae, soamo wamamo Apa arikainye

nanao wam![☆] Weramu vatano mine so wantatukambe wama Injayo Amisye ai, weti wonayo Apa arikainye wansai tavon. ² Sya arakovo inanuga no wasai, soamo wamamo Amisye apa arikainye waino wansai. Muno arono munijo makare umugamo indati wambeare rui, omamo wandaen dainya nene. Weramu wandaen arono Yesus Kristus pakare no mine so rai, indati wansanasine muno wansanuga mo Apa ramaisy, weye naije umba wamo aeno wansamije rai. Apa no mamo wamerananta wandaeno taune Ai terave. ³ Vatano rui nawirati manaveano Kristus amen tai maisy, wenawamo wo taune manasine muno mansanuga ratayao da ngkakavimbe indamu ayao kakaije meweno mansai, maisyare muno Kristus kakavimbe omaisy.

⁴ Are pirati po ayao kakai rave, wepamo po Amisye apa ananyaowe rakanyoandi. Weye ayao kakai mamo Amisye apa ananyao mi rakanyoandi ije. ⁵ Wandaen Kristus de no mine so indamu Po wama ayao kakaije raupaisy. Opamo ayao kakaije inta no Ai jewen bayave. ⁶ Maisyare omai ti, are pirati be intabove Kristus ai, weamo po ayao kakai rave akatoe ramu. Yara are pirati po ayao kakai rave tawan tutir, weamo po Kristus aene ramu.

⁷ Sya arikainyo inanuga no wasai, vemo vatane inta po wasaponae inya! Are pirati po ayao mamaisy obo rave, opamo mamaisy irati Amisye amune rai, maisyare Kristus opamo mamaisy. ⁸ Yara vatano are pirati po ayao kakai rave tawan kobe, napije pamo Anakakai Akoe apa arikainye waino ai. Weye Anakakai Akoe pirati po ayao kakai rave arono manasyin daveowe noa naiso. Arikainyo Amisye de indamu Po Anakakai Akoe apa anakere umaso rangkat inda rakanive. ⁹ Vatano are nawirati Amisye apa arikainye waino mansai, ayao kakai mamo wo rave akatoe ramu weye Amisye apa kovo wanyine no manuga rai to. Muno Amisye pirati awa Aja piye, weti ayao kakaije mamo wo rave akatoe ramu weye mamaisy ramu. ¹⁰ Ranivara wamare wandaen Amisye apa arikainye nanawi rui muno Anakakai Akoe apa arikainye nanawi rui, weamo awa ana udave raen no taiso: are pirati apa ana dave mamai no Amisye amune raije jewen muno muinyo apa arakova aije jewen, vatane wato awainamo Amisye apa arikainye pa jewena.

Wamuinyo wansai tutudi

¹¹ Arono manasyin dave wapo ayao so ranaun: wamuinyo wansai tutudi. ¹² Kaina pamo vemo wamo amai nora,

weye Anakakai Akoe apa arikainye piye, ti po taune apa rijata aubaisy.[☆] Weti ana mbewar ti po aubaisy somamo ana rui? Kaina pamo parijo apa rijata ai, weye po raen apa rijata apa ana dave mamo mamai no Amisye amune rai, yara taune apa ana dave mamo mamaisy ramu. ¹³ Weti sya arakove, weapamo ranivara vatano mine so mansanuga mamuno wasai, weamo vemo wapaparo wasai jinya. ¹⁴ Arono wamuinyo wama arakove mansai, wamo raen wamuje wene raora yara wansisa kove obo rai. Weramu are pirati muinyo apa arakove inta aije ramu, opamo ta no tawan no wene rai. ¹⁵ Are pirati anuga mamuno apa arakova ai, Amisye po vatane so aen pare opamo mamaisy vatano po apa arakove inta aubi to amaisy. Muno wandaenamo vatano po vatane maubaisy opamo kovo nuge nuganuije meweno ai.[☆]

¹⁶ Muinye mamo wananta rai no taiso: Yesus Kristus po anasine raunandea kakai indamu Po wansapaya wama ayao kakaije rai. Maisyare omai ti, mbe unanuive wansai indamu wamo muinye rarorono wama arakove mansai tenambe. Weti koveamo wamo taune wansanasine raunanto ra ngkakai tavon, wirati wamo wama arakove mansapaya irati weno nuge nuganuije rai. ¹⁷ Ranivara vatane inta apa ananuge raen manui, umbawe po apa arakove inta aen apa ananuge jajoembe ai yara ponae po aeranandei, weamo Amisye apa muinye no anuga raije ramu. ¹⁸ Sya arikainyo inanuga no wasai, muinye mamo syare wamo raura wansawa bo rai nora, yara wamuinyo tugaive indamu wama ana wandawe mo wama muinye raroron kakavimbe.

Wansanuga mamo ngkakavimbe, weamo wambambunin wansayai no Amisye amune rai

¹⁹ Wamuinyo vatano kajinta mai, weamo wandaen wantavondi Amisye apa ayao tugae rai to ije. Weti wansanuga mamo nsauman no Amisye amune rai. ²⁰ Weramu arono rui wansanuga njaniv weye wansanuga nanto wama ayao kakaije rai, weamo syare vemo wanjani nora. Weye Amisye po anakotare raen tenambe muno Apa muinyo wansai mamo manakoe rave, mo wama yanive umaso rakivan. Maisyare omai ti, vemo wanjaniv akato nora.

²¹ Sya arakovo inanuga no wasai, ranivara wansanuga mo wansanayao ayao kakai inta rai jewen, weamo wanjanive ramu, yara wambambunin wansayai no Amisye amune rai. ²² Ranivara wambeta Apa ananyao Po raugaje rai muno wama ana wandaveye mamo mo

☆ 3:12 Kejadian 4:3-8

☆ 3:15 Matius 5:21-22

aveti anayanambe, wea indati ana rui mirati wandanajo Ai, omamo Po raugaje wansai. ²³ Muno Apa ananyao Po raugaje inda wambeta rai mi som: wamanave Apa Kavoyesus Kristus ai, muno wamuinyo wansai vambinibe maisyare Kristus po wansanyaowe ramaisy. ²⁴ Are pirati beto Amisyepo apa ananyao Po raugaje rai, opamo be intabove Amisyepo ai muno Amisyepo tuna no anuga rai. Wandaen Amisyepo tuna no wansanuga rai maisyare so: Po apa Anawayo Vambunine raugaje wansai to.

4

Anawae tugae muno anawae angkari

¹ Sya arakovo inanuga no wasai, vemo wapanave vayave ayao rui anawae inta po raura wasai rai jinya. Yara syare wapo ranajo rati indamu wadaen kobe: apa ayao po raura mamoyo Amisyepo apa Anawayo Vambunine mo raugaje ai rako jewena e? Weyesoamo anawae angkari wanui utatipu ti wanya mine tename so rai. ² Wandaen vatane inta pamo Anawayo Amisyepo nde masyo anuga rai tugaive no taiso: Vatano rui pirati po Yesus Kristus aura pare de no mine so rai be vatanbe, vatano po raura so opirati Anawayo Amisyepo nde masyo irati ai. ³ Yara vatano po Yesus Kristus auranare so maisyepo jewen, vatano napijepo pamo Anawayo Amisyepo no ai pa jewena. Opamo be marovave Kristus ai weye Marova Akoe po anuga raugabe. Wapo ranaun Kristus apa Marova Akoe pare de no mine vone so rai. Syo raura kakavimbe wasai: soamo no no mine vone so rai to, po vatano wanui manuga raugabe.

⁴ Weramu sya arikainyo inanuga no wasai, weapamo Amisyepo apa kawasae nawirati weap. Muno weapo anawae angkarijepo umawe mapinde to, weye Anawayo Amisyepo no irati wasai mamoyo Ama vambunine manakoe, mo Anakakai Akoe no no mine vone so apa vambunine rakivan. ⁵ Anawae angkari onawamo mine so amaura mai. Weti awa ana wayao dai maisyare vatano mine so awa ana wo ratantona obo ramaisy, weti vatano mine so wo awa ayaowe raraniv. ⁶ Weramu wamamo Amisyepo apa arikainyepo waino wansai. Are pirati po Amisyepo aen, opamo po reama wandaura raraniv. Yara vatano siso Amisyepo apa kawasae matavone jewen, opamo po reama wandaura raranive ramu. Weti nai maisyepo umba wananta irati anawae tugae mai muno anawae angkari mai.

Amisyepo opi muinyo

⁷ Sya arakovo inanuga no wasai, syare wamuinyo wansai tutudi, weye muinyepo so mamoyo Amisyepo po raugaje wansai. Vatano

rui pi muinyepo opamo Amisyepo apa arikainyepo pijepo muno po Amisyepo aen. ⁸ Weramu vatano rui pi muinyepo ramu, opamo pantatukambe Amisyepo ai. Weyepo Amisyepo opi muinyo. ⁹ Amisyepo po apa muinyepo raroron kakavimbe wansai no taiso: Po apa Kavoyesustabodave Yesus Kristus atutir de no mine vone so rai indamu Po kovoye nuge nuganuipero raunande wansai. ¹⁰ Weti so mirati muinyo: Vatano wami wamuinyo wansai ai toa jewena, yara Amisyepo pi muinyo wansai muno Po apa Kavoyesustabodave atutir Po anasine raunande kakai indamu Po wama ayao kakai ranawan ti mpaya wansai, wirati Po wansaugav wamakare Amisyepo ai. ¹¹ Sya arakovo inanuga no wasai, Amisyepo po apa muinyepo raroron wansai taijepo maisyepo, weti koveamo wamuinyo wansai tutudi. ¹² Vatane wamamo inta po Amisyepo aenoye amijepo rai intai ma jewen tenambe. Weramu wamuinyo wansai tutudi, weamo Amisyepo tuna no wansanuga rai muno Apa muinyepo ntubai no wansanuga rai ti mamai dave.

¹³ Wandaen wambe intabove Amisyepo ai muno Amisyepo tuna no wansanuga rai no taiso: Po apa Anawayo Vambunine raugaje no wansai to. ¹⁴ Reamamoye reamoye Arikainyepo Amisyepo aenoye taunepo reansamijepo rai to, weti reamoye avovoye vatane mansai reamoye Injayoye Amisyepo po apa Arikainyepo so atutir ti de no mine so indamu Po vatane mapaya awa ayao kakaijepo rai. ¹⁵ Vatano are pirati po Yesus aura pare, “Yesus opamo Arikainyepo Amisyepo,” Amisyepo no tawan no vatano napijepo anuga rai. Muno vatano napijepo be intabove Amisyepo ai. ¹⁶ Weti Amisyepo apa muinyo Po raunande wansai mamoye wamoye raen muno wamanave rai.

Amisyepo opirati muinyo. Are pi muinyo Amisyepo ai muno apa arakove mai tavon, vatano napijepo be intabove Amisyepo ai muno Amisyepo tuna no anuga rai. ¹⁷ Maisyare omaisyepo, wama muinyepo miridi nseyo ti mamai dave. Indati wambambunin wansai no Amisyepo amun aronoye masyoto Po wansanajoye wama ana wandave rai, weye wama ana wandave no mine vone so mamaisyoye Kristus apa rai. ¹⁸ Amisyepo muinyo wansai ti wanjanive ramu. Weyepo Apa muinyo ntairi wansanuga rai, weamoye wama yanive raumandi vintabo. Weramu aronoye rui wamoye ratantona Amisyepo pare po mangkepoye raugaje wansai, weamoye wanjaniv, muno wanjaniv taiso mare wananta Apa muinyepo rai rainyepo.

¹⁹ Amisyepo muinyo wansai wusyimbe to, wirati wamuinyo tavone so. ²⁰ Ranivara vatane inta po taunepo aura pare: “Rimuinyo Amisyepo ai,” weramu anuga mamunoye apa arakova ai, weamoye vatano napijepo aruriat akoye pijepo. Weyepo apa arakova pamo po aenoye amijepo rai pijepo, damoye muinyo ai

ramu. Weti umba pare muinyo Amisyepo aene jawene Aije, opamo mamaisyepo ramu. ²¹ Ananyaowe somamo Amisyepo raunande: Are pirati muinyo Amisyepo ai, syare muinyo irati apa arakove mai tavon.

5

Wamanave Amisyepo apa Kavopo ai, indati wamo mine so ama vambunino ngkakain-oanaive rapinde

¹ Are pirati panave pare Yesus opirati Mesias,* vatano napije pamo Amisyepo arikainyepije. Muno are pirati muinyo irati Injayo Amisyepo ai, weamo muinyo irati Amisyepo apa arikainyepo mansai tavon. ² Wandaen wamuinyo irati Amisyepo apa arikainyepo mansai mamomaisyepo so: arono rui wamuinyo irati Amisyepo ai muno wantavondijopo Apa anyayo Po raugajepo wansajepo rai. ³ Arono wantataajepo irati Amisyepo apa anyayo Po wansatuti dai rai, wemaisyepo umba wamo muinyepo rarorono Amisyepo aije. Apa anyayo Po raugajepo mamomangkepo ramu. ⁴ Vatano rui nawirati Amisyepo apa arikainyepo waino mansai, wenanawamo wo mine vone so amavambunino mamun rapinde. Muno ana mo ransui ti mo rapinde mamowama anave Yesus ai. ⁵ Are nawirati ubambunin wo mine vone so amavambunino mamun rapinde? Vatano nanawirati wanave ware, “Yesus opamo Arikainyepo Amisyepo pije.” Obo nawirati umamaisyepo.

Ayao kovo mo Yesus auro kakavimbe

⁶ Yesus Kristus de no mine so, umba augasyo kuvuni mana rai muno Apa mavu nsororop arono kakai. Yesus de indamu augasyo kuvuni mana rai vayave ramu, yara de indamu Apa mavu nsororop ti kakai tavon. Weti mana muno mavu umasopo mo Yesus aroron kakavimbe Opamo Arikainyepo Amisyepo pije. Ayao umasopo mamomawayo Vambunine mo raura mare no rai tugae, muno Ama ana mo raura mamomayarurijabepo inta raijepo ramu. ⁷ Weti ayao raura kakavimbe somamo kotare mandeija, no taiso:

⁸ Anawayo Vambunine maava, mana mirati Yesus augasyo kuvunijopo rai maava, mavugoposororop arono Yesus kakai wem. Mandeijepo umasopoma awa ayao mbe intabove, wo Yesus Kristus auro kakavimbe ware, “Yesus opamo Arikainyepo Amisyepo pije.” ⁹ Arono vatane wo ayao inta raura kakavimbe wansai, weamo wamanave rai. Weramu Amisyepo apa ayao Po raura mamomambunin dave, mo vatane awa ayaowe

rakivan. Wepi po ayao umawe raura, Po apa Kavopo auro kakavimbe wansai. ¹⁰ Weti are pirati panave irati Arikainyepo Amisyepo ai, opamo po Amisyepo apa ayao umawe raen tugave no anuga rai to. Weramu vatano panave Amisyepo ai ramu, opamo po Amisyepo atantona pare payarurijabevea, weyepanave ayao Amisyepo po raugajepo Apa Kavopo Yesus Kristus ai raijepo ramu. ¹¹ Apa ayao mi so: Amisyepo po kovo nuge nuganuijepo raunande wansai, muno kove umasopoma ruke no no Apa Kavopo Yesus ai nui. ¹² Vatano wo Amisyepo apa Kavopo aen no manuga rai, onawamo awave kovo nuge nuganuijepo rai. Muno vatano wantatukampe Amisyepo apa Kavopo ai, onawamo awave kovo nuge nuganuijepo raijepo ramu.

Ranivara wamo ana inta ranajopo seo Amisyepo ai, Opamo po wansaraniv

¹³ Syo ayaowe so ratoe more irati vatano wapanave irati Arikainyepo Amisyepo ai, syo ratoe indamu wadaen weapamopo wapave kovo nuge nuganuijepo rai. ¹⁴ Wamamowambambuninowama anave rai weyepo wama ana wandanajopo seo Amisyepo ai mamaisyepo Apa bekere rai, weamo Po raraniv. ¹⁵ Wandaen Po wansaraniv arono wamo ana inta ranajopo seo Ai, weaveti wandaen Po wama ana wandanajopo raunande aje.

¹⁶ Wapowaparakove inta aen po ayao kakaijepo inta rave, weamo syare wabesambayampe ai. Wea indati Amisyepo po wapasambayamumasoporaraniv, umba Po kove raugakare waparakove umasopo ai. Weramu ayao kakaijepo inta mamomAmisyepo pare po rapayavatanopo rave aijepo ramu. Jewen dave.† Yara Amisyepo po mangkepowenonuge nuganui obo raugajepo vatane wato ai. Weti vatano are pirati apa ayao kakaijepo no tai wemaisyepo, vemo wapo Amisyepo anajopo ai nora. ¹⁷ Anakotarorui wandaveti ngkakai omamopo ayao kakaijepo ma. Weramu ayao kakaijepo mowenonuge nuganui raugav mamopo ayao kakai tenambe jewen.

¹⁸ Wamo raen vatano Amisyepo apa arikainyepo waino mansai onawamo ayao kakai mamowo rave tutire ramu, weyepo Arikainyepo Amisyepo po mansaeranandemuno Anakakai Akoe pamo bambunin po mansave tatugadijepo ramu. ¹⁹ Vatano mine vone so ana irati Anakakai Akoe anem uga rai tenambe muno wepi be akarive mai. Weramu wandaen wamamo Amisyepo apa arikainyepo waino wansai. ²⁰ Wandaen Arikainyepo Amisyepo de to muno Po wansakarikugaporaneka inda mbar ti wamo Amisyepo tugae aen. Wambe intabove Amisyepo tugae ai weyepo wambe intabove

* 5:1 Tamo Mesias mo tamo Kristus ramaisyepo, ama ayao mare, “Vatano Amisyepo po apatimu indamu be akari titive wansai.” † 5:16 Ayao kakai namijepo no taiso: vatane po Yesus Kristus amamarave muno be marovave Ai (2:22-23).

Apa Kavo Yesus Kristus ai. Opamo Amisyo tugae piye, muno Po kovo nuge nuganuije raunande wansai.

²¹ Weti sya arikainyo inanuga no wasai, syare wapanave Amisyo tugae obo ai, yara vemo wapo yare raugavo wasarijat inya.

*Risy,
Yohanes*

Nyovara Wao Jirum Yohanes Po Ratoe 2 YOHANES

Yohanes po kove raura

¹ Risirirati Yohanes, akarijo anugano Amisye inta rai. Syo ayaowe so ratoe syo ranutugore Ingko winyi Amisye po natayao winai muno more nya arikainye mansai tavon.* Rimuiny irati wasai rave. Muno ribui syirati rimuinyo wasai ramu, yara vatan tenambe wo ayao tugae raen umuinyo wasai tavon. ² Weye Amisye apa ayao tugae no tawan no wansanuga rai muno no wansautana nuge nuganui.

³ Syare kove muno muinye muno saumane no no Injayo Amisy muno apa Kavoye Yesu Kristus no wansautan tenambe. Wemamo wamaura rai arono wamo ayao tugae rajar muno wamuinyo wansai tutudi.

Ayao tugae muno muinye

⁴ Rinananibe rave weye syo ranaun Ingko nya arikainye inta nawirati utavondi jirati ayao tugae obo rai, maisyare Injayo Amisye po wansanyao wemaisy. ⁵ Soamo syo ananyao so raugaje wasai: ribeker syare wamuiny irati wansai tutudi. Omamo ananyao wanyimbe ma jewena, yara ananyao wamo raija kobe arono wusyiny wamanave Yesu ai kobeyoe. ⁶ Wamare wamuinyo tugaive, weamo wantavondi Amisye apa ananyao po raugaje wansai rai to ije. Muno Apa ananyao po raugaje wansai mare wamuinyo wansai tutudi, maisyare wapo ranaun arono wusyinoe.

⁷ Soamo vatano wo ayao angkarije raura wanui rave utatipu ti wanya mine tename so rai. Vatano nanawije wo Yesu Kristus apa de no mine so be vatanbe ramamarave. Vatano maisyare sonawamo vatano angkari nawije muno Yesu Kristus apa marova nawije. ⁸ Weti wasyisyaube, vemo vatane inta wo wasaponae inya! Muno vemo unanuijo reamo raraeyo wasai to ti wapo raito raumandijo wasai nora. Yara wabeke dave ramu Amisye po wapa ana wadajare ama ine raunande wasai vintabo.

⁹ Are pirati ponayo ananyao Kristus rai yara panya kaive rai, opamo Amisye tuna autane jeben. Yara are pirati no tawan no ananyao Kristus rai, opamo Injayo Amisye tuna autan muno Apa Kavoye tuna autan tavon. ¹⁰ Weti ranivara vatane inta de pare

po ananyao nsasyeo ananyao Yesu Kristus raugaje, vemo wapo vatano napije augave siso no wapa yavar nora muno vemo wapo kove raura ai nora. ¹¹ Weye are pirati po aeranande, opamo tavondi apa ana dave ngkakai po rave to ije.

Nyovara waowe ama maran

¹² Ananyao manui rave syare syo raura wasai, weramu syare ngko dave mamo vemo ratoe nyovara wao rai nora. Rinanave ramene mamo taune syore syo wasapan, syayao anawadive nande wasai, indamu wansanayanambe vintabo.

¹³ Nya arakova una no naiso nanawirati Amisye po matayao† wo kove ranutugo nai.

*Risy,
Yohanes*

* 1:1 Wanya umaso raurata irati anugano Amisye inta rai, muno ama arikainye maurata irati vatano utavondijo anugano Amisye umaso rai. Anugane so nsasyeo anugano Yohanes be akarive rajje rai. † 1:13 Ayao Yunani no naiso mare: "Nya arakovo wemirati Amisye po ratayao ama arikainye nao wo kove ranutugo nai." Raen no 1:1.

Nyovara Wao Mandej Yohanes Po Ratoe 3 YOHANES

Beto ayao tugae rai

¹ Risyirati Yohanes, risyamo ibe akarive anugano Amisyete inta rai. Syo ayaowe so ratoe syo ranutugore sya arakovo Gayus winai. Rimuinyo nai rave.

² Sya arakovo inanuga no nai, ribe sambayambe nai indamu nya anakotare ngko tenambe muno nanasine mbambunin, maisyare muno nanuga mambo mbambunin no Amisyete ai wemaisy.

³ Rinanayanambe rave weye wama arakovo wanave Yesus aije inta unande rinai to. Wo raura ware winyamo wimbeto Amisyete apa ayao tugae rai, muno ware wintavondi rai tutir. ⁴ Weti inananibe rave! Arono rui syo ranaun sya arikainyete* utavondi Amisyete apa ayao tugae rai, weamo inananyanambe manakoe rave.

Kangkamambe Gayus ai weye apa ana dave ngkov

⁵ Sya arakovo Gayus inanuga no nai, syo ranaun winyamo natawandi kobe indamu nyo kove raroron irati wama arakovo wo ayao Amisyete raura mansai. Arono arakove umaso ude nya munije rai, nyo mansaen dainy, weramu nyo mansaugave usisa to. ⁶ Arakove umaso wakare unande rinai to, wo nya muinyo nyo rarorono mansaije raura, weti anugano Amisyete una no naiso wo ranaun. Arono rui wama arakove ude nai jakato, syare nyo maeranande kobe indamu wo awa unanui anya rave tutir. Wea umba mamaisy, mo Amisyete anuga raveti ranayanambe. ⁷ Weye wo awa unanui anya rave indamu wo ayao Yesus Kristus ravov. Weramu wo awa ana ubekedaije inta ranajo vatano wantatukambe Amisyete aije mai ramu. ⁸ Weti kove mambo vatano wamanave Kristus aije wamo arakovo maisyare so maeranande. Wamo maeranande, wea wantavondi wamo Amisyete apa ayao tugae ravov to ije.

*Diotrepes apa ana po rave ngkove ramu,
yara Demetrius apa ngkov*

⁹ Risyo nyovara wao inta ratoe tumaimbe, syo ranutu anugano Amisyete rai, weramu Diotrepes ponae beto sya ayao rai. Opamo bekero seo tame rai indamu be akarive anugane rai. ¹⁰ Maisyare omai ti, arono indati risyore, syo Diotrepes apa ayao kakai po reansaura tantunawi raura kakavimbe

* **1:4** Arikainyete so nanawamo Yohanes taune apa arikainyete po mavaki nawa jewena, yara po mawaino apa arikainyete weye po manyao indamu wanave Yesus ai matuve.

weti wapo raen. Weramu webo raije ramu, yara ana ngkakai kaijinta po rave tavonare so: arono arakovo wo ayao Amisyete ravov inta ude, weamo ponae mansai tavon, po maugave usisa apa yavare raije ramu. Naije tavon vatano nanawirati ubeker ware wo arakove umaso maugavere, po maorai tavon muno po mawatambe wusyete anugano Amisyete raora.

¹¹ Sya arakovo inanuga no nai rave, vemo nyo ana dave ngkakai ranyete nora! Yara ana ngkove obo mi wintavon dai. Vatano apa ana dave ngkov opamo Amisyete apa arikainyete waino ai. Yara vatano apa ana dave ngkakai opamo pantatukambe Amisyete ai.

¹² Vatan tenambe ukangkamambe arakovo Demetrius ai. Muno Amisyete po raen pare Demetrius apa ana dave mamaisy irati ayao tugae rai. Taune risyete ikangkamambe Demetrius ai tavon, muno Gayus windaen sya ayao syo raura somamo tugae mamaisy.

Ayao kove ranutu

¹³ Anakotaro manui rave syare syo raura nai, weramu syare ngko dave mambo vemo ratoe nyovara wao rai nora. ¹⁴ Yara rinanave ramene mambo nggwaravainyete akatote ramu, yara syavave syore syo naen akato, indati rimayao anawadive rai.

¹⁵ Amisyete apa saumane no arakove nautan. Wama arakovo una no so wo kove ranutu nai muno syare nyo sya kove raura wama arakove mansai tutudi no wato.

*Risy,
Yohanes*

Nyovara Wao Yudas Po Ratoe YUDAS

Yudas po kove raura

¹ Risyirati Yudas, syanapatambe Yesus Kristus ai. Muno risyamo Yakobus apa ri-jata pi risy.^{*} Syo nyovara waowe so ratoe more weapirati Injayo Amisy po wasawain ti wasisa Apa kawasae mai to. Weapamo Amisy muinyo wasai rave muno Po wasaeranande tutir ava Yesus Kristus indati pakare akato. ² Syare Amisy apa aemembe wasai manakoeve, muno Apa saumane muno Apa muinye ntairi wasai.

Wasyisyaube kuruno angkari mai!

³⁻⁴ Sya arakovo inanuga no wasai, arono wusyinoe syare syo ratoe wasai, sya bekere mammo syo Amisy apa kove raura kakavimbe, wemirati Po raugaje wansai tenambe indamu Po wansapaya ayao kakaije rai. Weramu umba syo ranaun akato vatane inta ude usisa maninimbe no wapa yasyin, nanawirati wo wasanyao sasyeve. Anakotare so mo inantitidi indamu syo nyovara wao so ratoe, syare wasanuga mbambunin indamu wana tawan no Amisy apa anyanyo tugae obo rai, wemirati Po raugaje Apa kawasae wansai indamu wamanave rai muno wamo raeranande. Omamo mamai bintabo, weti syare weamarovave vatano wonae rajie mai.

Weti syare wasyisyaube vatan uma wato mai! Manuga mammo mamuno Amisy ai, muno wo anyanyo angkari raugaje ware, "Wantavondi wansanasine ama bekero rui vayave rai kai. Wamo ayao kakai rave kai, weye Amisy pare po rapaya wansai jaje weye Apa muinye manakoeve wansai." Ee! Awa anyanyo so mamaisy ramu! Wo wama Injayo Amisy apa muinye so raen kobe jewen! Muno wo wama Amisy Yesus Kristus amamarave muno wonae Wepi be akarive mansai rai. Onawamo awa mangke mammo arono wusyinoe Ayao Amisy mo rapatimu to.

⁵ Arakove, sya ana idaura somamo wapo raen tenambe to: wasaemen arono wusyinoe Amisy po vatano Israel mansapaya irati munijo aro Mesir rai, weramu umba vatane umaso inta wonae wanave Aiji, weti Po maunanto wene rai.^{*} ⁶ Muno syare wasaemen naito Amisy inta mai, nanawirati wusyinoe wonae wo awa anakero Amisy po raugaje majie rajjari, yara wusya akirive munijo

ntiti rai. Naito Amisy umaso nawamo Amisy po maijar, ti waijo mbambunin dave veano maokaisya nuge nuganui. Muno Po mausisa una tawan no mino kaumur kakai rai java masyoto indati Amisy po awa mangke rapatimugo mai. ⁷ Muno syare wasaemen tavon irati munijo Sodom muno Gomora muno munijo mararai nande no naije. Wusyinoe vatano utantuna munijo namije rai awa ana udave ngkakainoanive maisyare naito Amisy umawe mansamaisy. Vatano Sodom muno Gomora utavondi manasine ama bekero ngkakai obo rai muno anaerere ugavo mansarijat. Weti Amisy po mangke raugaje mai indamu usuri no tanamo mbadururo nuge nuganuije rai.^{*} Awa mangke somamo mo Amisy apa mangke raroron kakavimbe indamu wasaemen dai.

⁸ Muno kuruno angkari una no wapa yasyine wenawamo awa ana udave ngkakai maisyare wemai tavon. Utavondi manasine ama bekero ngkakainoanive obo rai, mamaisy awa nikimarije rai. Wonae Amisy be akarive majji, muno wo naito Amisy, nanawirati utantuna kovo ntiti rautan, maura tantunawi tenambe. ⁹ Veanimaibe irati kurune wato wo anakotaro ntiti raura tantunawi tai maisy? Yara nait Amisy akari Mikael taune pamo bambunin दौरा tantunawi tai maisy jewen. Arono wusyinoe Anakakai Akoe pe Mikaela pe yayaowi Musa anasino kopa rai, weye Mikael pare po Musa anasino kopa rauga da po rantuna. Weramu Mikael bambunin po Anakakai Akoe aura tantunawi jewen, yara po raura nanto ai vayave pare, "Ngko to! Amisy taune pirati indati po naura indamu manin!"

¹⁰ Weramu kuruno angkari una no wapa yasyin wo anakotaro unanta rajie jewene raura tantunawi tenambe. Onawamo maisyare maere mansamaisy weye awa ana wo ratantona meweno mai, ti utavondi manasine ama bekere obo rai. Wemirati indati mo maugavo kakai raronto. ¹¹ Indati mangke Amisy nande mai! Weye utavondi Kaina apa unanuije rai, oprirati vatano mamun wusyinoe.^{*} Muno awa ayao kakai maisyare Bileam apa ayao kakai wusyinoe ramaisy, weye ubekero doije rai ti udodorabe wo ayao kakai rave indamu wo doije ratande mansai. Muno wonae ubeta akarijo Amisy po matayao mansai, maisyare muno wusyinoe Kora^{*} ponae beto akarijo Musa muno Harun yai wemaisy. Weti indati Amisy apa mangke maje mai maisyare wusyinoe maje Kora ai ti kakai kobe.

^{*} 1:1 Matus 13:55; Markus 6:3 ^{*} 1:5 Keluaran 12:51; Bilangan 14:29-30 ^{*} 1:7 Kejadian 19:1-25 ^{*} 1:11 Kejadian 4:3-8; 1 Yohanes 3:12 ^{*} 1:11 Bilangan 16:1-35

¹² Arono anugane wapanunugambe indamu wapisiy tenambe, kuruno angkari wato utantuna wasatavon. Weramu awa ana udave mbe samaneve weye usasokabe anaisyae rai inta taune mansamarom. Weramu taune usamane ramu. Kurune wato awa ana udave ngkove meweno mai muno awa ayao wo vatane mansanyao mammo ama ine meweno rai, weti onawamo mamaisyare andoramo mbe maruve jewen, yara ovare po ramawisy ti nto ti rakanive. Muno mamaisyare inyo moto ama mane mewen dai arono anamuke nande. Muno maisyare inyo ama wantantainye rapapatin weti ngkanen anawadive kobe, kurune wato manuga ngkanen maisyare wemaisy. ¹³ Maisyare muno mayane mbe aneaike ti ama vuke, ama vuai mpanyoan ti mo imandore rambube no mayane tuga, maisyare wemai tavon kurune wato awa anakotaro ngkakainoanive no manuga mammo vatan tenambe wo raen kakavimbe. Muno maisyare tume inta manya nsarokibe jewen, yara merero amave ti nto no rui vayave, maisyare wemai tavon kurune wato wo vatane manyao nsarokibe jewen yara nsosobe rave. Maisyare omai ti, Amisyae panatatayaube indamu Po mamaugusyao kaumuro marane raija nuge nuganui.

¹⁴ Aneno Henok po vatano ukakainoanive awa mangke raurairive no wusyinoe. Henok opamo Adam apa ajavi inta pije, avaki susyo kaururume rai.* Weti Henok purairive wusyimbe to pare, "Wadanide! Wama Amisy indati de Apa naite ribuge manui rave mautan! ¹⁵ Indati Po mangke rapatimu vatan tenambe mansai. Po mangke raugaje vatano nanawirati manuga mamuno Amisyae aije mai, weye awa ana wo rave mammo mamun muno awa ayao wo Amisy aura mammo mamun tutir."

¹⁶ Kuruno angkari wato wanonae wo nuge rapanan, muno wo vatane maura tatugadi. Utavondi awa bekero manasine obo rai. Manuga rararin dave ti ukangkamambe taune mansai. Muno ukangkamambe vatano kaije mansai tugaive jewen, yara wo ayao manavan raura indamu vatano kai nanawije wo ananuge raunande mansai.

Wapo wapa anave Amisyae ai raeranande

¹⁷ Weramu, sya arakovo inanuga no wasai, syare wasaemen wama Amisy Yesus Kristus apa arakovo po matutire awa ayaowe rai, namirati mo ana nande masyoto rijate so raura wusyimbe.* ¹⁸ Wo raura wasai wusyimbe to ware, "Arono

munije ama akari mararai, naije vatano manuga mamuno Amisyae ai utatipu, indati wanaikebe vatano wanave aije mai. Utavondi Amisyae ai jewen, yara taune awa bekero mamune obo rai." ¹⁹ Vatane wato ude wo wapa anugane raveti mporadi wabe intabove akato jewen. Amisyae apa Anawayo Vambunine ntuna mansanuga rai jewen, yara bekero mine so wemirati ntuna manuga rai.

²⁰ Weramu, sya arakovo inanuga no wasai, syare wapo wasanyao vambinibe indamu wapa anave raijasea inda mbambunin, ntami matuve no Amisyae apa ananyao po raugaje rai. Muno syare Anawayo Vambunine mo wasaugav arono wasambayambe Amisyae ai. ²¹ Wapo wasaeranande indamu wano tawan no Amisyae apa muinye rai. Muno wapo wama Amisy Yesus Kristus anyut, Wepirati indati po kovo nuge nuganuije raugaje wasai mamaisyao Apa muinyo manakoe rai.

²² Muno vatano kajijinta wenanawamo, ranivara manuga mamaundive ti wanave kobe ramu, syare wasaemeno mai. ²³ Muno ranivara vatan inta wantatukamoe Amisyae ai ti wararai usisa tanamo mbadururo nuge nuganui rai, weamo wapo mauguje rai, wapo mansanyao indamu wanave Amisyae ai ti kakai so mpaya mansai. Muno ranivara vatan inta wo ayao kakaije rave tutir, weamo wasaemeno mai tavon, weramu wasyisyauibe indamu vemo awa ayao kakaije wato nande mo wasaugav tavon nora, maisyare awa ansune ama wame nande wasanakea rai wemaisy.

Kangkamambe Amisyae ai!

²⁴ Kangkamambe Amisyae ai! Weye Wepirati bambunin Po wasaeranande indamu wapo ayao kakai rave jewen, muno Po wapa ayao kakai rapaya wasai tenambe ti inta raen no wasai jewen arono Po wasaugavere wasayai no taune Apa amuno kovo ntiti rai, weapamo wana wasanyanambe rautan. ²⁵ Wepi po wansapaya kakaije rai weye wama Amisy Yesus Kristus po wama ayao kakai rapaya to. Wama Amisy opi intabo ararimbe: Apa kovo ntiti muno manakoe, Apa vambunine, muno Apa be akarive nuge so rai tenambe, no arono wusyinoe kobe mansanan awa unumeso muno nto nuge nuganui. Amin!

*Risy,
Yudas*

Amisye Po MUNIJE AMA AKARI RARORON Irati Yohanes Ai

Yesus Kristus apa ana po raroron irati Yohanes ai

¹ Ayaowe somamo Amisye po raugaje Yesus Kristus ai indamu Po anakotaro mavave nande kobe rarorono vatano wanapatambe Aije mansai. Yesus po apa naite inta atutir indamu poroto no vatano panapatambe Aije ai, apa tame mi Yohanes. Umba naite umaso po anakotare so raura kakavimbe Yohanes ai. ² Yohanes po anakotaro po raen anawadive amije raije raura tenambe. Ayaowe somamo Amisye apa ayao muno ayao Yesus Kristus po raura kakavimbe mi som. ³ Are pirati bacave ayao Amisye po raroron ti Yohanes po ratoe so rai no anugano Amisye mansamun, opamo kove ngkov irati ai. Muno are nawirati wo raraniv mavabe muno ubeta rai tenambe, onawamo kove ngkov irati mai tavon. Weye anakotaro ratoe so ama masyote mare nande mangkepan to.

Anugano Amisye kaururum, Yohanes po kove raura mansai

⁴ Risyrirati Yohanes syo nyovara waowe so ratoe syo ranutugore anugano Amisye wasano kaururum wana no propinsi Asia wasai. Syare kove muno saumane no no Amisye no wasautan. Wepirati soamo no muno wusyinoe no to muno nugo makare umu no tutir. Muno anawayo vambunine kaururum nanawirati una no Amisye apa kursijo titi ama usye rai wo kove muno saumane raugaje wasanuga rai. ⁵ Muno Amisy Yesus Kristus po kove muno saumane raugaje wasai tavon. Wepirati po ayao Amisy raura tugaive ti vatane wanave rai, Wepirati vatano manasyin dave kovakato no wene ama uga rai, muno Wepirati be akarive akarijo titi mine so mansai tenambe.

Kangkamambe Ai! Wepirati muinyo wansai muno Po anasine raunande kakai indamu Po wansapaya irati wama ayao kakaije rai. ⁶ Muno Po wansanugande indamu be akarive wansai tenambe, muno Po wansatayao indamu wambe syembe wamanapatambe Ajayo Amisye ai. Wamo Apa kovo ntitiye muno Apa vambunine rararimba nuge nuganui! Amin.

⁷ Waperato: Yesusa pi no kamure rautan ti de! Indati vatane werata wo

aen tenambe, muno vatano wo aubai* werata wo aen tavon. Indati vatane kotarontuna no mine so woyov tenambe, weye Yesus po awa mangke rapatimugo mai. Tugae, mamaisy! Amin.

⁸ Amisye po raura pare, “Rinawainamo Alfa muno Omega,† ama ine mare manasyin dave weamo Risy, mansanana maran akato indati rino tutir. Risy soamo rino kobe, muno wusyinoe rino to, muno nugo makare umu rino tutir. Risyamo Sya vambunine ntiti mo vambunino kaijo rui rai, van tenambe.”

Yohanes po Yesus aen no Apa titiye rai

⁹ Risyrirati Yohanes, wapa arakova pi risy weye syanave Yesus ai maisyare muno weapanave Ai tavon, muno Yesus be akarive wansai tenambe. Muno risyamo risiuri muno inatawandi weye itavondi Yesus ai maisyare muno weapano wasatawandijo siurije rai tavon weye watawandi Ai. Sya marova wo inaugaveta ino no nupatimugo Patmos weye uparijo rinai weye syo Amisye apa ayao ravov muno syo ayao Yesus po raura we ravovo vatano wanui mansai. ¹⁰ Arono masyoto vatano wanave Amisy Yesus ai wanugan ube sambayambe rai, naije Anawayo Amisye mo inausuru tenambe, muno idaniv no inakiri anamoto manakoe inta ngkin maisyare tavuna inta ama kine ramaisy. ¹¹ Ama ayao mo raura maisyare so: “Animaisy mirati nyo ranyanyut ti ndaen, syare nyo ratoe bukuge inta rai. Nyo ranutu Anugano Amisye kaururum mansai, nanawirati una no munije so: Epesus, Smirna, Pergamu, Tiatura, Sardis, Piladelpia muno Laodikia.”

¹² Weti risakinav syeravo inakiri akare, are pi payao de inai so? Syare syeratoamo syo yawainyo manino taname rauvarasyo rai kaururume raen, yawainye so emasije veano ranari tenambe. ¹³ Yawainye ama yasyin syo vatane inta aen maisyare Arikainyo Vatan amaisy. Po ansuno manawadi masyo no ajo inta rave muno ansuno emasi veano ranari mamo Po ransawa no Apa popane rai. ¹⁴ Akarivui nye mpope dave, maisyare maero domba ananemane ramaisy muno maisyare kapasije ramaisy. Ami mamo maisyare tanamo mbadurur ramaisy. ¹⁵ Ajoje mamo ngkena dave maisyare tembaga ramero taname rai. Anamote ngkin dave maisyare mana vuke inta nsopato pene rai ranauni nto wemaisy. ¹⁶ Anem ngkove mamo Po tume kaururum raijar. Muno omake inta muje no awa rai, ama rani nsiu, rani nsiu

* 1:7 Ayao Yunani mo raura mare, “vatano wo atukam.” Alfa muno ama urupijo maran dave ama tame mi Omega.

† 1:8 Ayao Yunani ama urupijo manasyin ama tame mirati

tavon. Amune mambo mbar maisyare uma apa varo masyote yasyine ramaisy.

¹⁷ Arono syo aen taije, sya vukane ranteteraje no Amune rai, risiyamo syamebe ramu, yara rinamaisyare vatano kakai. Weramu anem ngkove raiseo ntamijo inai Po raura pare, “Vemo njani nora! Risyrati manasyin dave, muno maran dave Risyi no akato.” ¹⁸ Risyamo ikova no tawan. Wusyinoe ikakai to weramu nyeraide Risyamo ikov, ikova nuge nuguanui! Ribambunin ti ibe akarive wene rai, weti vatano ugwenen to nanawamo, ribambunin Syo kovo nuge nuguanui raunande mai.

¹⁹ Maisyare omai ti, Syo natutir nyo ana rui mirati ndaen, syare nyo ratoe tenambe: anakotaro naiso muno anakotaro indati nande kobe. ²⁰ Nyo tubino tume yano kaururum no inanem ngkove so raen muno nyo yawainyo emasi veano ranari kaururume raen tavon, syare nyo ama ayao ngkokaibe raura kakavimbe no taiso: Tume kaururum raurata irati naito Amisy mansano kaururum wo anugano Amisy kaururum maeranande, muno yawainyo emasi veano ranari raurata irati anugano Amisy kaururume mansai.”

2

Amisy Yesus Kristus apa ayao maje irati Anugano Amisy no Epesus mansai

¹ Umba Amisy Yesus po raura rinai pare, “Syare nyo Sya ayaowe so ratoe ndanutu irati naito Amisy po Anugano Amisy una no munijo Epesus maeranande ai, maisyare so:

Risyrati syo tume kaururume rajaro inanem ngkove rai, syananave no yawainyo emasi kaururum nsayai dai ama yasyine rai. Sya ayao mi so:

² Syo anakere kotaro wapo rave raen, maisyare wadajjar panyoambe muno weasatawandi rai kobe. Syo wasaen waponayo vatano mamune mansai. Muno vatano wo taune maurana ware onawamo vatano Risyi matutir weramu jeben, wapo awa ayaowe muno awa ana udave ranyanyuti ti wadaen onawamo vatano aarurijate nawa. ³ Syo wasaen wasiuri weye wapanave Rinai, weramu wamayondi jeben, yara wasatawandi tutir.

⁴ Weramu ana inta no no wapa yasyin mamai dainy, omamo weamuinyo Inai jakato maisyare muno manasyinoe wea ramaisy akatoe ramu. ⁵ Syare wasaemen wapa muinyo manakoe umawe rai, weye Syo wasaen soamo miridi makaje to. Weti wasakinav irati wapa ayao

kakai rai! Muno syare wapa ana wadave ngkov akato, maisyare manasyino wapanave Inai kobe ramaisy. Weramu ranivara wabeta Sya ana syo raura so rai jeben, wea indati syakare wasai umba Sya yawainyo syo raiseo mbaro wasai omamo Syo rantauno wasai jakato. ⁶ Weramu wapa ana wadave inta mirati ngkov taiso: Vatano utavondi rati Nikolaus ai wenawamo waponayo awa ana udave rai, maisyare muno Risyamo syonayo rai tavona.

⁷ Syare wadanide, are pirati amarikoame rasakinavo Anawayo Vambunine ama ayao mo raura anugano Amisy mansaije rai, weamo po ranaun. Are pirati bambunin po ayao mamuno mine so rapinde, Syo nyoaman no no Amisy apa nawaisy no munijo ntiti raunande po raisy indamu kova nuge nuguanui.”

Amisy Yesus apa ayao maje irati Anugano Amisy no Smirna mansai

⁸ Umba Yesus po raura rinai pare, “Syare nyo Sya ayaowe so ratoe ndanutu irati naito Amisy po Anugano Amisy una no munijo Smirna maeranande ai, maisyare so:

Risyrati manasyin dave muno maran dave Risyi no akato. Ikakai to weramu ikovakato to. Sya ayao mi so:

⁹ Syo wapa siurije raen, muno Syo wasaen wapa ananugo mine so meweno wasai, weramu tugaeyamo Amisy po kovo manakoe ratayao ti ntuna mo wasanyut no munijo ntiti. Muno Syo ranaun vatane wo wasaura tantunawi. Ware onawamo vatano Yahudi, weramu jeben, yara onawamo vatano Anakakai Akoe be akarive mansai. ¹⁰ Kavinta rati umba siurije nande wasai, weramu vemo wajaniv inya. Syo raura wasai: weapamo inta indati Anakakai Akoe po wasaugav wasisa no tanoano makova rai indamu po raen: wapanave Rinai tugae rako jewena e? Indati po wasave tatugadi yava masyote abusyin. Weti syare wabeto Ribui inai rave yava nto irati wene mo wasaugave rai. Wasatawandi tutir, weamo ama ine idaunande wasai, omirati kovo nuge nuguanijem.

¹¹ Syare wadanide, are pirati amarikoame rasakinavo Anawayo Vambunin ama ayao mo raura anugano Amisy mansaije rai, weamo po ranaun. Are pirati bambunin po ayao mamun mine so rapinde, opamo indati siuri inta makanande ai jakatoe ramu arono weno jirume^a makanande.”

Amisy Yesus apa ayao maje irati Anugano Amisy no Pergamus mansai

¹² Umba Yesus po raura rinai pare, “Syare nyo Sya ayaowe so ratoe ndanutu irati naito Amisy po Anugano Amisy una no munijo Pergamus maeranande ai, maisyare so:

Risyirati syo omake inta raijar, omake so ama rani nsiu, rani nsiu tavon. Sya ayao mi so:

¹³ Wapa munijo wana rai mamu Syo raen to: Anakakai Akoe be akarive wapa munije rai. Weramu weapamo wapo wapa anave Inai raijar matuve tutir. Arono Antipas beto Rinai ti po Sya ayao raura, naije vatano una no wapa munijo Anakakai Akoe tuna rai wo aubai kobe. Weramu arono wo aubaisyoe, weapamo wapa anave omamo wapo ramamarave ramu, yara wapanave Rinai tutir.

¹⁴ Weramu ana inta mirati no no wapa yasyin mamai dainy, omamo wapa vatan inta utavondi anawae wusyin Bileam apa anyayao rai. Wusyinoe Bileam po Balak anyao taiso: ‘Nyo Israel manuga raugabe indamu wo anaisyo ramer nanto irati yare raije raisy muno wo ayao anaerere rave.’ Weti po vatano Israel maponae ti wo ayao kakaije rave.* ¹⁵ Naiso Nikolaus apa anyayao mo Bileam apa ramaisy muno wapa inta nao wo Nikolaus apa anyayao umaso rajia ti ubeto rai. ¹⁶ Maisyare omai ti, syare wasakinav irati wapa ayao kakai umaso rai! Weramu ranivara wasakinave jeben, wea indati syavave ide wasai kobe, umba Risyo omako muje irati inawa rai raugav, imarovave vatano nanawije mansai.

¹⁷ Syare wadanide, are pirati amarikoame rasakinavo Anawayo Vambunine ama ayao mo raura anugano Amisy mansaije rai, weamo po ranaun. Are pirati bambunin po ayao mamun mine so rapinde, Syo anaisyo manna ngkokaiibe inta* raunande ai, muno Syo oramo mpopor inta raugaje irati ai. Orame so Syo tamo wanyin inta ratoe rai. Tame somamo vatane inta po raene jeben, yara vatano raugaje amarom obo pirati po raen.”

Amisy Yesus apa ayao maje irati Anugano Amisy no Tiatira mansai

¹⁸ Umba Yesus po raura rinai pare, “Syare nyo Sya ayaowe so ratoe ndanutu irati naito Amisy po Anugano Amisy una no munijo Tiatira maeranande ai, maisyare so:

Risyirati Arikainyo Amisy, inami mamu maisyare tanamo mbadurur ramaisy muno inajo ngkena dave

maisyare tembaga ramaisy. Sya ayao mi so:

¹⁹ Wapa anakere kotaro wapo rave syo raen tenambe: weamuiny irati wasai vambinibe, wapanave Inai, wapanapatambe Rinai, muno wasatawandi siurije rai. Syo wasaen soamo wapa anakero wadajare manui rave wusyinoe rakivan.

²⁰ Weramu ana inta mirati no no wapa yasyin mamai dainy, omamo wapo varore inta raugaje wanya ama tame mirati Izebel rai, ti mo anugano Amisy manyao. Wanya umaso mo taune raura mare Amisy pi po ratutir, weti Sya vatano wanapatambe Rinai wanui rave inta nawirati mo maponae indamu wo ayao anaerere rave muno wo anaisyo ramero yare rai raisy. ²¹ Muno Syo varore raugaje wanya umaso rai indamu nsakinavo ayao kakai rai, weramu ama ayao kakai anaerere umaso mamu mo rapaya ramu, yara mo rave tutir.

²² Waperato: Indati Syo wanene raugaje rai indamu nsiuri, muno vatano wo anaerere rave ratavone nawamo Syo mamaugo siurijo manakoe inta raron tavon, ranivara maneme mpanya awa ana wo rave ratavone so rai yava. ²³ Vatano utavondi wanya umaso rai onawamo Syo maubaisy tavon indamu anugano Amisy na tenambe wo inaen: Risyirati syo vatane awa ana udatantona muno ana ntipu no manuga rai raen tenambe, weti indati Syo rasakinavo wasai mamaisyo wapa ana wadave rarijati.

²⁴⁻²⁵ Weramu more irati vatano kaijo wana no Tiatira, weapamo vatano watawondi anyayao angkari namije raije ramu, muno wapo Anakakai Akoe apa ayao ranyao ramu, wemirati vatane inta wo raura ware anyayao ntitiye ma, weramu jeben. Weti nde wasai Syo raura: Sya anyayao wemirati wapo raijaro wasai, syare wapo raijar ava syakare wasai. Syo anyayao kaijinta raugaje wasai jakato jeben kai.

²⁶⁻²⁷ Are nawirati ubambunin wo ayao mamun mine so rapinde muno wo Sya anakere raijar ava ntoa kakai vone rai, onawamo indati Syo vambunine raugaje mai indamu ube akarive vatano susyo ntuna no mine so mansai. Syo vambunine raugaje mai maisyare muno Sya Injaya po vambunine raunande Rinai, indamu ube akarive vatano susyo ntuna no mine so mai tenambe. Wo awa marova

* **2:14** Bilangan 24:25-25:3

* **2:17** Arono wusyinoe vatano Israel wuje munijo aro Mesir raora, Amisy po manna no naumo warae raveti temaje no mine vone so rai indamu vatano Israel wo raisy (Keluaran 16:14-15). Manna ngkokaiibe raurata irati anaisyo Yesus indati po raunande Apa kawasae wansai arono pakare inda be akarive mine so rai. * **2:26-27** Mazmur 2:9

mansanepato isyo besije rai muno wo mandamisy maisyare kavino kopa ramau ti ngkupi.*²⁸ Muno are nawi wo ayao mamun rapinde wenawamo indati Syo tumo Tundinit augaje mansai tavon.

²⁹ Syare wadanide, are pirati amarikoame rasakinavo Anawayo Vambunine ama ayao mo raura anugano Amisy mansaije rai, weamo po ranaun.”

3

Amisy Yesus apa ayao maje irati Anugano Amisy no Sardis mansai

¹ Umba Yesus po raura rinai pare, “Syare nyo Sya ayaowe so ratoe ndanutu irati naito Amisy po Anugano Amisy una no munijo Sardis maeranande ai, maisyare so:

Risyirati ibe akarive Amisy apa anawayo vambunine kaururum mansai muno Syo tume kaururum rajaro inaneme rai. Risyo ana wapo rave raen. Vatane ware weapamo ta wakova, weramu Syo wasaen wakakaija. Sya ayao mi so:

² Wabesea! Vemo wamaindi jakato nora! Wapo wapa anave rajisea mbambunin akato, weye Syo wasaen wapa anave soamo mamaun dave, kavintare raumandi kobe. Muno Syo wasaen wapa ana wadaveye mamai dainy no Sya Amisy amune rai. ³ Weti syare wasaemen anyayao tugae wapo ranaun muno wapanave rai to rai. Syare wabeta rai muno wasakinavo wapa ayao kakaije rai. Weye wapare wamaindi tutir, indati syakare Syo mangke raugaje wasai. Syakare mamu maisyare vatano anaonoanoe, weye Sya ide wemamo mbe papabe, ti nandui rati ide wasai omamo weapantatukambe rai.

⁴ Weramu Anugano Amisy wana no Sardis weap, vatane inta una no wapa yasyin wo taune mansanuga raeranande ti ngkakavimbe. Weti arono munije ama akari, indati wo ansuno mpopere rave umba Risyewenawe reamanya tenambe, weye Syo mansaen onawamo umamaisy. ⁵ Are pirati bambunin po ayao mamun mine so rapinde, weamo indati Syo ansuno mpopere raunanto po rave taije maisy. Muno Syo apa tame raupaisy Sya bukuge raije ramu, namirati mo vatano ukova nuge nuganui awa tame ratoe rai. Muno indati Syo aura Sya Injaya ai muno Apa naite mansai tavon syare, “Sopamo Sya arikainy tavondi Rinai pi so.”

⁶ Syare wadanide, are pirati amarikoame rasakinavo Anawayo

Vambunin ama ayao mo raura anugano Amisy mansaije rai, weamo po ranaun.”

Amisy Yesus apa ayao maje irati Anugano Amisy no Piladelpia mansai

⁷ Umba Yesus po raura rinai jakato pare, “Syare nyo Sya ayaowe so ratoe ndanutu irati naito Amisy po Anugano Amisy una no munijo Piladelpia maeranande ai, maisyare so:

Risyirati kakavimbe muno tugae. Risyirati Syo Daud apa kepo* po rave unsanda rakepe rajjar. Ranivara syare Syo rausiso, weamo vatane inta po rauguji kakai muno ranivara syare Syo rauguji, weamo vatane inta po rausiso kakai. Sya ayao mi so:

⁸ Syo wapa ana wadave raen tenambe. Waperade! Syo unsanda rausiso wasai muno vatane inta po rauguji akato kakai. Syo raen wamayondi, weramu weatavondi Sya ayaowe rai tutir muno weapo inamamarave ramu. ⁹ Wadanide! Vatano Anakakai Akoe be akarive mansai inta wo taune mawain ware onawamo vatano Yahudi, weramu jewen, weti onawamo wayarurijabe. Indati Syo vatano wayarurijabe umaso mantitidi ude anugano Amisy wasai, wo vukane ranteter no wasamune rai indamu wo raura wasai ware, “Tugae, Amisy Yesus muinyo wasai.” ¹⁰ Syo anyayao raugaje wasai to indamu wasatawandi tutir, muno Syo wasaen wabeta Sya anyayao umaso rai ti mamai to. Maisyare omai ti, arono indati siurijo manakoe nande mine so rai tenambe indamu mo vatano mine so matopan, syare Syo wasaoraijo rajjaje.

¹¹ Syavave ide. Ide ti Sya anyayao wemirati wapo rarijat, syare wapo rajjar matuve, indamu vemo vatane inta po wasaponae ti kovo ntuna mo wasanyut no munijo ntiti raumandijo wasai nora.

¹² Are pirati bambunin po ayao mamun mine so rapinde, opirati Syo atayao da aurata irati ajijo mo Yavaro Amisy no munijo ntiti ratugar matu ti nteta nuge nuganui. Maisyare omaisyamo vatane umaso indati puje rai jakatoe ramu, yara tuna no naijea nuge nuganui. Syo sya Amisy apa tame ratoe vatane so ai muno Sya Amisy apa munije ama tame ratoe ai tavon. Apa munije rawainamo Yerusalem Nggwanyin, namirati no no munijo ntiti indati maje no mine vone so rai. Muno indati Syo sya tamo wanyine ratoe anakea rai tavon.

¹³ Syare wadanide, are pirati amarikoame rasakinavo Anawayo

* 3:7 Ayaowe so ama tunato rajje no taiso: Yesus indati be akarive Apa kawasae mansai maisyare muno wusyinoe Daud be akarive munijo Israel mansai wemaisy.

Vambunin ama ayao mo raura anugano Amisy mansaije rai, weamo po ranaun.”

Amisy Yesus apa ayao maje irati Anugano Amisy no Laodikia mansai

¹⁴ Umba Yesus po raura rinai pare, “Syare nyo Sya ayaowe so ratoe ndanutu irati naito Amisy po Anugano Amisy una no munijo Laodikia maeranande ai, maisyare so:

Risyamo Sya tame mirati Tugae,[†] weye Sya ayao mamu tugae ti vatane wanave rai. Anakotaro Amisy po ranari ama Akarije pi Risy. Sya ayao mi so:

¹⁵ Weapamo wasaurata irati mana nanayaodi rai, mamoaane jeben muno nanayao dave jeben,[‡] weye wapa bekero Rinai mamu manakoe jeben, yara mamaun bayave. Ribeker syare wapo intabo rapatimu: nanayao ndako mamoaane ndako. Weramu waponae. ¹⁶ Maisyare omai ti, indati Syo wasanyanyipube weye syonayo wasai! Weye weapamo wasaurata irati mana nanayaodi vayave rai, mamoaane jeben muno nanayao jeben. ¹⁷ Wapo raura wapare, ‘Reama ananuge manui, weti anakotar reamaura rai mamu mamai to, inta meweno reansaije ramu.’ Weramu weapantatukambe rave! Inaemeno wasai weye wapa anave meweno wasai. Wasami ntuba muno weasorokanive weye ana wadave ti ngko dave meweno wasai. ¹⁸ Maisyare omai ti, Syo ananyao raugaje wasai indamu wapo emasijo no no Rinai ramavun, omamo emasijo kakui,[§] indamu weapamo watenami rai. Muno wapo Sya ansuno mpopere ramavun tavon indamu wapo wasanasine ratatuv, namirati nsarokanive muno mbe samaneve. Muno wapo nyovara ami kakai ramavuno Inai tavon indamu wadaugaje wasami ntuba rai indamu wapo nuge raen.

¹⁹ Vatano rui nawirati Rimuinyo mansai, weamo Syo awa ayao kakai raura kakavimbe nanto mai muno Syo manepat indamu ubeta Sya ananyao rai. Weti syare wapo Sya bekere rarijat muno wasakinavo wapa ayao kakai rai. ²⁰ Wadanide! Ritet no wapa unsanda uje rai, Syo wapa tame rawain. Ranivara vatane inta po inanamote ranaun ti puje po unsanda rausiso Inai, weamo risiso inanto ai, ririmisyisy kava. ²¹ Are nawirati bambunin wo ayao mamuno mine so rapinde, Syo mansamayaro ube

akarive inatavon, maisyare muno Risy ayao mamuno mine so rapinde, weti soamo ibe akarive Injayo Amisy atavon.

²² Syare wadanide, are pirati amarikoame rasakinavo Anawayo Vambunin ama ayao mo raura anugano Amisy mansaije rai, weamo po ranaun.”

4

Yohanes po Amisyae aen no munijo ntiti

¹ Naije akato risyo ana inta raen akato: Tugae rave, unsanda inta rapaya no munijo ntiti warae. Umba anamote inta ngkin akato, omamo anamoto idanaun to arono wusyinoe, ama kine maisyare tavuna Amisyae ramaisy, mo raura mare: “Winandesen no so, Syo ana inta rarorono nai, ana indati mare nande kobe rai.” ² Naije kobe Anawayo Vambunine mo inausuru tenambe, ti syo kursijo titi inta raen no munijo ntiti muno kursije umaso Vatane inta tuna rai. ³ Vatano tuna kursijo titi umaso rai opamo amune mba dave maisyare oramo mamani ntumbeowe ama mangke nseo rave. Umba kursijo titi umaso mamu eve ngkaipi dai, ngkenav maisyare oramo ama ntumbe njayaibe ramaisy. ⁴ Umba kursijo kajijinta ama manui ma tenamara eane mambisy nsaisiyo kursijo titi umaso rakiani, muno vatano ube akarive inta nawirati utantuna rai. Wo ansuno mpopere rave vintabo muno wo sapeo emasije rajjasea ntuna makari vone rai. ⁵ Nai kursijo titi umaso rai ivak akokoe ratatukande muno kati-tire ravabari mo nuge rambayar tenambe. Muno kursijo titi ama usye umaso rai yawainye kaururum, wemirati mbadurur kobe no naije. Wemamo Amisyae apa anawayo vambunino kaururumo wemije. ⁶ Naije tavon kursijo titi umaso ama usye mamu maisyare nawanano ndandini dave, maisyare kansina wemaisy.

Muno ana akokoe Amisyae po manari inta yano mambisy usayai no kursijo titi umawe rakijani. Onawamo mamije manui no makijani tenambe, weti no mamune rai muno no makiri rai tenambe tavon. ⁷ Ana akokoe Amisyae po manari umaso inta maisyare singa amaisy, jirume pamo maisyare sapijo anya amaisy, mandeije pamo amune mo vatane mansamaisy, umba mambisyae pamo maisyare insani mangkangkan badirir amaisy. ⁸ Ana mambisyae umawe nawamo nantabo awa pepake nande mansai. Inta apa

[†] 3:14 Yohanes po ayao Amin ratoe ayao Yunani rai. Ama ine mare “tugae.” [‡] 3:15 Mana mamoaane raurata irati vatano awa bekere manakoe ware utavondi Amisyae ai. Mana nanayao raurata irati vatano wonayo Amisyae ai. Mana nanayaodi raurata irati vatano utavondi gerejave, weramu manuga nggwaravainyo Amisyae ai (Markus 7:6-7). [§] 3:18 Emasijo kakui raurata irati kovo manakoe Amisyae po ratayao Apa kawasae mansamarome rai (1 Timotius 6:17-19).

pepake nanto no kawije intabo. Ranijo makasyo no uga mawo mansami no rai tenambe. Namane rinit ukiny tutir, wo Amisy ararimbe ware,
 “Amisy winy, Winyamo ngkakavin dave!

Ngkakavin dave pi Winy!

Nya vambunine ntiti mo vambunino kaijo rui rakivan tenambe!

Winyamo wusyinoe no to muno Winya soamo no kobe,
 muno Winya nugo makare umu no tutir!”

⁹ Ana mambisy umawe nanao wo ransyerano ngkangkamane rajaseo Amisy ai, wo aura titive, muno wo kove raura seo Ai, napi tuna no kursijo titi rai, Opi kova noa nuge nuganui. Arono ana mambisy umaso ware usambayambe tai maisy,¹⁰ weamo vatano ube akarive mansano tenamara eane mambisy umawe wo vukane ranteter, ubeaje irati Napi tuna no kursijo titi rajie Ai, opirati kova noa nuge nuganui. Naije wo awa sapeo rapapaya, wo raugaje ntuna no kursijo titi ama usye, wo raura ware:

¹¹ “Amisy, reama Amisy!

Winyirati nyo anakotare ranari tenambe,
 Nyo ranari mamaisyo Nya bekere obo rai.

Maisyare omai ti, Wibuin nyirati mamai dave,

weti reamo nararimbe, Nya kove ntiti rave,

muno reamo najaseo titive.

Winyirati wimbe akarive nuge so rai tenambe!”

5

Injajo Amisy po apa nyovara wao raakuvi raugaje Yesus ai

¹ Naije syerato syo nyovara wao raakuvi inta raen no Napi tuna no kursijo titi anem ngkove rai. Ayao ratoe nyovara wao raakuvi umaso ama uga muno ama akiri rai weti ntairi tenambe, muno wararandeme rave ama pame ranavit susye kaururum. ² Muno syo naito Amisy inta aen, opamo bambunin dave. Naije gwain akove pare, “Are pirati indati mamaisyo po ayao Amisy ratoe nyovara wao raakuvi so ama wararandeme rapapaya indamu po raniku?” ³ Weramu nai munijo ntiti muno mine vone so muno mine so ama ate waraya, vatane inta no no nugo ratodi so indamu puje po nyovara wao raakuvi so raniku muno po ama ayao raen, inta bambunin dai ramu. ⁴ Weti risyo ranyanyut, syoyova mansasiraki rave, weye vatane inta mamai da po ayao Amisy uma raakuvi we raniku jeben muno po ama uga raen tavone mamamo jeben tenambe. ⁵ Naije vatano ube akarive mansano tenam eane mambisy umawe nanawirati utantuna no

Amisy po kursijo titi ama usye rai inta po raura rinai pare, “Vemo nyoyov inya! Ndaen: Yesus Kristus wepi mamaisyo Po wararandemo mo ranavite kaururum rapapaya muno nyovara wao raakuvi raniku, weye Opirati po Anakakai Akoe apinde to weti Wepi po ransui. Opamo ‘Singa Susyo Yehuda’ waino Ai, weye opamo wama Akar-ijo Akoe pije. Muno Opamo Daud apa ajavi apa tame ntiti pije.”

⁶ Arono naije syo inta raen dijati akato, maero Domba Tuvane te no kursijo titi umawe ama yasyine rai. Muno ana akokoe Amisy po manari yano mambisy umawe wo akianiri muno vatano ube akarive mansano tenam eane mambisy we mansautan tenambe. Domba Tuvane umaso maisyare aotar aubai to. Apa korodoai ntatipu Ai omamo kaururum. Amije kaururum ntavon, wemamo Amisy apa anawayo vambunine kaururumo wemije, Po ratutir nde mine so rai tenambe to. ⁷ Naije kobe Domba Tuvane nande no Amisy napi tuna no kursijo titi rajie Ai. Nyovara wao raakuvi Amisy po rajiaro aneme ngkove rai mi Domba Tuvane pavakananto rai Po raugav. ⁸ Arono Domba Tuvane pavakananto rai Po raugav, ana akokoe Amisy po manari mambisy umawe nao muno vatano ube akarive mansano tenamara eane mambisy umawe nao wo awa vukane ranteter no Domba Tuvane amune rai. Umbawe wo kecapa rajia tetebe muno wo kapijo emasi veano kemenyane raveasyai ti ntairi rajjar tavon. Kemenyane umaso ramer ti ama kijaowe nseo, ranavane nsainy. Kemenyane ama kijaowe somamo Amisy apa kawasae awa sambayane ma. ⁹ Umba ukinyo ansyerano wanyine inta rai, wo Domba Tuvane ararimbe:

“Winyirati mamaisy Nyo ayao Amisy ratoe nyovara wao raakuvi raugav,

muno Winyirati mamaisy Nyo ama wararandemo mo ranavit rapapaya.

Weye Winyirati naubai to muno Nya mavugo nsororop indamu Nyo vatane mansamavuno Amisy amarom:

vatane kotaro ntuna no mine waraya —awa susye, awa ayaowe, awa kawasae, awa munije rui vayave.

¹⁰ Soamo Nyo vatane umaso manugan ti wimbe akarive mai tenambe,

muno Nyo matayao indamu ube syembe wanapatambe wama Amisy ai,

muno ube akarive no mine waraya rai.”

¹¹ Naije akato syo inta raen akato, idaniva naito Amisy inta wanui rave manamote ranaun. Naito Amisy umaso wanui nanto

no ribuge rajja nseo no juta rai, weti awa wanui nseo rave. Usea nara wo Amisyé apa kursijo titi rawariki. Wo ana akokoe mambisy umawe muno vatano ube akarive mansano tenamara eane mambisy umawe makiani tenambe.¹² Umba wanugan tenambe, ukinyo manamoto manakoe rai, awa ansyerane mi so:

“Domba Tuvano winy, Winyamo naubai to, weti Wibuin nyirati mamaisy!

Weti reamo nararimbe muno reamo naura titive weye

Winyamo wimbe akarive nuge so rai tenambe,

muno nyaura anakotare rai tenambe, nakarikuga mba dave, muno Winyamo mbambunin dave!

Weti reamo najaseo tive,

Nya kove ntiti rave!

Tugae, reangkangkamambe Nai!”

¹³ Idaniv akato mamo anakotaro ranari tenambe ti no no naumo warae ma, nde no mine vone so rai ma, masyo no mine ama ate ma, no no mayane ama uga rai muno ana ntuna rai, wanugan tenambe ukinyo ansyerane rai ware:

“Kangkamambe Amisy napi tuna no kursijo titi rajje Ai

muno Domba Tuvane ai tavon!

Amisyo winy, reamo nararimbe muno reamo najaseo tive,

reamo Nya kovo ntiti muno Nya vambunine rararimbea nuge nuganui!”

¹⁴ Umba ana akokoe mambisy umawe wo raura ware, “Tugae!” Muno vatano ube akarive mansano tenamara eane mambisy umawe ubeaje Amisyé ai, wo vukane ranteter no Amune rai.

6

Domba Tuvane po nyovara wao ama wararandemo mo ranavit rapapaya

¹ Naije syerato syo Domba Tuvane aen po nyovara wao ama wararandemo mo ranavite kaururum umaso ama manasyine rapaya. Naije idaniv ana akokoe mambisyé umawe inta payao anamote maisyare kati-tire wemaisy pare, “Winde!”² Umba syo raen: Tugae rave, kuda popere inta de ai! Vatane inta seo tuna ai, po apae rajjar muno Amisyé po sapeo inta raugasyo ai, maisyare akarijo titi amaisy. Bambunin ti pusyo indamu marovave apa marova mai pare po mapinde.

³ Muno Domba Tuvane po wararandemo mo ranavito jirume rapaya akato, umba idaniv ana akokoyo jirume gwain pare, “Winde!”⁴ Umba kuda nijam dave inta puje akato de ai muno vatane inta seo

tuna ai. Amisyé po omako manakoe raunande vatane umaso ai ti po raugav. Muno Amisyé po vambunine raugaje ai indamu po marova raugav ti ntami no mine so rai vintabo, weti vatane wo mansaubaisyé vambinibe.

⁵ Arono Domba Tuvane po wararandemo mo ranavito mandeije rapaya, umba idaniv ana akokoyo mandeije gwain pare, “Winde!” Umba syerato, tugae rave kuda karisya inta puje de ai! Muno vatane inta seo tuna ai, po katijo mo mangke raroron inta raugav po rajjaro aneme rai.

⁶ Muno idanito anamote inta ngkin no ana akokoe Amisyé po manari yano mambisyé umawe awa yasyin, mo raura nanto vatano seo kuda umaso ai mare, “Syare nyo maroro akoe augav, weti kasyambere muno anaisyó paparaisy mawes akatoe ramu, ti aya mangke nseo rave. Vatane wo doijo manui veano ravae indamu wo raisy. Weramu vemo anggurije muno manino saitun aya mangke nseo nora.”

⁷ Arono Domba Tuvane po wararandemo mo ranavito mambisyé rapaya, ana akokoyo mambisyé gwain pare, “Winde!”

⁸ Umba syerato: Tugae rave, kuda kugaave de ai! Muno vatano seo tuna ai opamo apa tame mirati Weno Akoe. Vatane inta tavondi ai dijabe, apa tame mi Hades.* Amisyé po vambunine raunande yai indamu yo vatano mine so maporabe mambisy, umba yo nake inta maotar yara mandeija una. Vatane inta nawamo yo omake veano maperami, muno inta nawamo marore po maubaisy, muno inta nawamo waneno mangke nande mansai ti ugwenen, muno inta nao akatoamo make sivuinye wo maubaisy.

⁹ Arono Domba Tuvane po nyovara wao ama wararandemo mo ranavito radani rapaya, syerato syo tewa orame inta raen, vatane awa rugara manui una no tewa umaso ama ruke rakijani. Wenawamo vatano mine so wo maubaisy weye wo Amisyé apa ayao ravov muno wo Yesus aura kakavimbe.¹⁰ Soamo vatano ugwenene umaso ugwaino manamoto manakoe rai ware, “Amisyó winy, Wimbe akarive anakotare rai tenambe, muno Winyirati ngkakavimbe rave muno tugae rave. Nandui rati indati Nyo vatano mine waraya awa mangke rapatimu? Nandui rati indati Nyo mangke rasakinav irati vatano wo reansaubaisyé so mansai?”

¹¹ Umba vatane umaso nawamo Amisyé po ansuno mpohero manawadi raunanto wo rave, muno Po raura akananto mai pare, “Maneai! Weye wapa arakove inta nawirati wanapatambe Inaija nene, weramu vatano

* 6:8 Hades mamo munijo vatano ugwenen una rai ama tame mijem.

mine waraya ware wo maubaisy rijabe akato, maisyare muno wo weasaubaisyoe ramaisy. Weti syare wapo ranyut ava wapa arakove awa wanuije nseo ra mamaisyo Sya bekere rai, indati Syo mangke raugaje vatano wo weasaowe muno wo mansaowe mansai tenambe.”

¹² Umba syo Domba Tuvane aen po nyovara wao ama wararandemo mo ranavito kawije intabo rapaya akato. Naije mungki akoe inta ravari, umba uma ami ngkaumudi kobe muno embae rami nijam maisyare mavu. ¹³ Muno tumo no no naumo warae utataopon no mine vone so maisyare inyo ara inta ama mano ta ngkamurama nene ntaruran weye ovaro panyoan dave po ramawisy wemaisy. ¹⁴ Weti naumo warae nsausuv maisyare kare wao nsaakuvi, muno papukame mansosop muno nupatimu mansoso tavon.

¹⁵ Umba akarijo titi mine so muno vatano akokoe muno nait akari akoe muno vatano awa ananuge manui muno vatano wo nuge rajjanande tenambe unanajibe, muno vatano mansajaro arove nao muno mansajaro arove jewene nao —vatan tenambe umaso unajiv bintabo. Unanajibe wuruta ukaokaibe tinda rai muno orame varodore raita no unate ama ruduke rai. ¹⁶ Umba ugwain ware, “Orame winy! Papukame winy! Ngkipu ra nyaje nyo reansataanto no min ate waraya! Indamu nyo reansangkokokaibe Amisy ai indamu vemo Po reansaen nora, Napi tuna apa kursijo titi rai. Muno vemo Domba Tuvane apa pari mangke maje reansai nora! ¹⁷ Weye Amisy apa mangke pare Po raugaje ama masyote nande to. Weti are pirati indati bambunina atawandi rai?!”

7

Vatano pake raugaje mande rai awa wanui nanto 144.000

¹ Umba syo naito Amisy mambisya mansaen akato, usayai irati muni so ama ami mambisye so rai. Wo ovar ami mambisye so mansajjar tenambe indamu vemo inta po nuge ramawisy inya —no yawa ndako, mayane ndako, inyo wawi oma jeben tenambe. ² Umba syo naito Amisy kajjinta aen akato puje no ranijo uma seowi. Opamo po ananugo veano pake rananoka raugav, namirati Amisy noa pitawabe Po raunande ai. Naije gwain to irati naito Amisy mambisye umawe mai, wenawirati Amisy po vambunine raugaje mai indamu wo yawa muno mayane randamisy. ³ Gwain akoeve pare, “Vemo wapo yawa muno mayane randami kobe inya, muno inyoe ntenambe, weye reamo pake rananoka vatano wanapatambe

wama Amisy ai awa mansande rai rainya nene.” ⁴ Umba naito Amisy po pake rananokai vatano wanui mande rai. Onawamo awa wanuije idanito syo ranaun: nanto no ribuge tename radani muno tename jirum eane mambisy (144.000). Sonawamo manugano susye kotare rai no Israel awa susyo abusynara eane jirume rai no taiso:

⁵ Susyo Yehuda 12.000

Susyo Ruben 12.000

Susyo Gad 12.000

⁶ Susyo Asyer 12.000

Susyo Naptali 12.000

Susyo Manasye 12.000

⁷ Susyo Simeon 12.000

Susyo Lewi 12.000

Susyo Isakar 12.000

⁸ Susyo Zebulon 12.000

Susyo Yusup 12.000

Susyo Benyamin 12.000

Vatano wanui rave wanugan no munijo ntiti, wo ansuno mpopere rave

⁹ Naije syerato akato. Tugae rave, syo vatano wanui rave inta mansaen, matore kakai. Onawamo vatane kotaro ntuna no mine waraya nanawije tenambe—awa munije, awa susye, awa kawasae, muno awa ayao kotar rui vayave. Vatane umaso ude tenambe, usayai no Amisy napirati tuna no Apa kursijo titi rajje Amun. Muno usayai no Domba Tuvane amun tavon. Wo ansuno mpopero manawadi rave tenambe muno wo kaipe wao rajjaro maneme rai. ¹⁰ Umba vatane umaso ugwaino manamoto manakoe rai ware, “Wamo wama Amisy ararimbe, Napi tuna no kursijo titi rai! Muno wamo Domba Tuvane ararimbe! Weye wama Amisy opirati po wansapaya irati kakaije rai!”

¹¹ Naito Amisy usayai tenambe irati Amisy apa kursijo titi rakijani. Wo vatano ube akarive mansano tenam eane mambisy umawe muno ana akokoe Amisy po manari yano mambisy umawe makiani tenambe. Umba naije wo vukane ranteter no Amisy amune rai umba ubeaje Ai. ¹² Wo raura ware,

“Tugae rave! Reama Amisy winy, re-
angkangkamambe Nai

muno reamo Nya kovo ntiti rararimbe!

Winyamo nakarikuga mba dave

muno wimbe akarive nuge so rai
tenambe

muno Winyamo mbambunin dave!

Weti reamo kove raura seo Nai muno
reamo najjaseo titive ntoa nuge nu-
ganui!

Amin!”

¹³ Naije vatano ube akarive umawe inta po rinanjore pare, “Vatano wo ansuno

mpopere rave wato onawamo, are nawije? Muno una no ruija umba udea?"

¹⁴ Umba syo raura akananto ai syare, "In-jae, winyamo nyo mansaen ivae."

Weti po raura akanande kobe rinai pare, "Vatane sonawamo nanawirati upaya irati siuri akoe nande mine waraya rai wenawije.* Awa ansuno manawadi mamo wo rapapi jirati Domba Tuvane apa mavuge rai weti mpope dave.† ¹⁵ Maisyare omai ti, usea usayai no Amisy apa kursijo titi ama usye rai tutir muno wanapatambe Ai siman muno namane yanteter no Yavaro Amisy ama uga rai. Muno Amisy napi tuna irati Apa kursijo titi rai pare tuna mautan ti darino mansaora. ¹⁶ Wenawamo marore po inta mansave akatoe ramu muno mawa ngkangkamandi ramu, muno uma mamooan indamu po mansanen akatoe ramu. ¹⁷ Weye Domba Tuvane, napi tuna no Amisy apa kursijo titi ama yasyine rai, Obo pirati po mansaeranande muno Po maugavo mana ami mo kovo nuge nuganuije raunande raron. Muno Amisy po mami ngkaru raupaisy tenambe ti rakanive."

8

Ana nande arono nyovara wao ama wararandemo mo ranavit kaururum rapaya

¹ Arono Domba Tuvane po nyovara wao ama wararandemo mo ranavito kaururum rapaya, umba munijo ntiti ntanamanin tenambe yava uma ami vasye intai.

² Umba risyo naito Amisy mansano kaururum nanawirati usayai no Amisy amune rajje mansaen, umba Amisy po tavuna kaururum rave nande mansai.

³ Umba naito Amisy kajijinta de poroto tet mararai no tewa oram nami no no Amisy apa kursijo titi ama usye rai. Umba po unggano emasije inta raugav, muno kemenyane manui rave raunande ti po raugasya no unggane umaso ama uga rai indamu po rameseo no tewa emasije ama vone rai. Muno Amisy apa kawasae awa sambaya nseo kemenyane umaso rautan tenambe. ⁴ Weti kemenyano naito Amisy po rajjar aneme rai ama kijaowe seo tawan no Amisy amun, muno Amisy apa kawasae awa sambaya rautan. ⁵ Umba naito po taname rauga no tewa orame rai, po raugasyo unggane rai ti po ramaugo mine so rai, weti katitire ravabari mo nuge rambayar, ivake ratatukande, muno mungkije nande.

Naito Amisy wo tavuna Amisy ramawisy

* 7:14 Yesus po siurijo manakoe so raura no Matius 24:21.

ngkakavimbe mansai.

* 9:1 Atemo Wene mamo anawayo kakaije umakova rai yava Amisy po mangke raugaje

mai.

⁶ Naito kaururum nanawirati wo tavuna Amisy rajjare wanatayaube indamu wo ramawisy. ⁷ Weti naito manasyin po apa tavuna ramawisy. Naije maru oram muno tanamo mavu mo rakukuive ntende mine so rai. Naije mine so raporabe mandeij, weti vasye intabo mangkuro ama inyoe muno insumai ntuna no ama uga rai rautan tenambe.

⁸ Naito Amisy jirume po apa tavuna ramawisy akato. Naije ana inta maisyare unato akoe inta ramaisy umba tanamo mbadurur dai, ramauta no nawanen. Umba nawanane raporabe mandeij, weti vasye inta mamo mavu vintabo. ⁹ Muno anakotaro Amisy po ranari weti ntuna nawanane ama uga rai mamo raosora mandeij, weti varore inta muenen bintabo. Muno nyomano manya no mayane rai mamo raosora mandeij, weti varore inta mirati mandamisy bintabo.

¹⁰ Umba naito mandeije po apa tavuna ramawisy akato. Naije tumo akoe no no naumo warae inta tende, tume umaso badurur maisyare yawainyo manakoe raindi. Tume umaso temaje no mine so, umba mana akokoe muno mana mamaun mamo raosora mandeij, weti varore inta mirati tume umaso po raron dave. ¹¹ Tume umaso apa tame mirati Tumo Pariman. Weti mana uma raosora mandeije we, varore inta mirati tume umaso po raron ti ama mana mpariman dave, weti vatane wanui ugweneno rai weye wo ramanam.

¹² Naito Amisy mambisy po apa tavuna ramawisy akato. Naije uma aporabe mandeibe, weti vasye inta mirati maisyare ana inta ratu rai ti ngkaumudi arono masyote yasyin. Maisyare omai tavon, embae muno tume maporabe mandeibe ti aya nake inta mirati ngkaumudi tavon. Maisyare omai ti, namane vasye inta ngkaumudi rave muno siman vasye inta ngkaumudi tavon.

¹³ Umba syeraseo, daniv akato, insani mangkangkano po ayao patimu raura inta badirir no naumo warae, gwain akoeve pare, "Wakakai! Wakakai! Wakakai! Vatan tenambe watantuna no mine vone so, wakakai! Weye naito Amisy mandeij nanawirati wo awa tavuna ramawi dainy soamo ware wo ramawisy akato!"

9

Tavuna radani ramawisy

¹ Naije naito Amisy radani po apa tavuna ramawisy akato. Umba syerato syo tume inta aen, napirati no no naume rai naije kobe tende no mine vone so. Umba

Amisye po kepo raveo unsanda Atemo Wen Akari Makova Rai* rakepe raunande tume umaso po rajjar. ²Weti tume umaso po unsanda Atemo Wene umawe rausiso kobe. Naije kijao mo Atemo Wene umawe raisen maisyare tanamo raono akoeve ama kijaowe ntatipu ramaisy. Weti uma muno naumo kakavine warae mamo kamaijugambe rai. ³Umba kijao umaso ama uga mamo kao insumai wuje rai, weti waje mine so rai muno vambunine raugaje mansai maisyare mingkikipi ramaisy ti ntuna no mine so rai. ⁴Muno Amisye po raura mansai indamu vemo wo insumai, inyoe, muno anakotaro ntubai no mine so raisy inya, yara vatano Amisye apa pake meweno mansai obo nawirati wo mansewabe. ⁵Muno onawamo matayao indamu wo vatane mao omamo jewena, yara wo mansewabe vayavea embae radani inda awa siurije manakoe. Awa siurije maisyare mingkikipi mo matao ramaisy. ⁶Arono naije vatane ubekero ugwenene rai weye awa siurije manakoe ti, weramu ugwenen kakai. Ubekero wene nande mansai rai, weramu wene nino mansaora.

⁷Kao insumai umawe maisyare kuda matayao indamu usisa marova rai inta mansamaisy. Makari vone ana inta maisyare sapeo emasije ramaisy, muno mansamune mamo mo vatane mansamune ramaisy. ⁸Makarivuinye maisyare wanya makarivuinye muno matomokane maisyare singa matomokane ramaisy. ⁹Awa popane maisyare wo ansuno besije inta rave rai. Muno awa pepake ranakine ngkapakapamo maisyare kuda wo kereta rakarimu indamu wavave usisa marova raije ramaisy. ¹⁰Matevane maisyare mingkikipi matevane ramaisy, weti ama mamune no rai. Muno matevane umaso ama vambunine raugaje rai indamu mo vatane manakea nJORAME raunande mansaija embae radani. ¹¹Awa akari po matutire pamo Anakakai Akoe apa naito teto unsanda Atemo Wene rai, apa tame raura ayao Yahudi rajjamo Abadon muno raura ayao Yunani rajjamo Apolion (ama ine mare “po randamisy”).

¹²Kakaijo manasyine syo raura ndento, umba kakai jiruma mi makare ti ridaura akato.

Tavuna kawije intabo ramawisy

¹³Umba naito Amisy kawije intabo po apa tavuna ramawisy akato. Naije idaniv anamote inta muje no tewa emasije ama korodoai mambisy rai, namirati no Amisye amune rai. ¹⁴Anamote umaso mayao nanto naito Amisyo kawije intabo uma po apa tavuna rajjaroe ai mare, “Nyoronto nyo naito mambisyo una tawan irati mana

akoe Eprat rai mapaya irati awa wajjo mo maokokaisye rai!” ¹⁵Naito mambisy umaso onawamo wanatatayaube to arono wusyinoe, wo Amisye apa uma amije, Apa masyot, Apa embae, muno Apa tume so ranyut. Weti naije kobe naito Amisy umawe to po mapaya indamu wuruta wo vatano mine so inta mansaubaisy: vatano mine so maporabe mandeij weti anugane inta mirati naito mambisy umaso wo maotar weti makanive. ¹⁶Muno naito mamun mine so wanui utavondi, usea irati kuda mansai tenambe. Onawamo awa wanui nanto no juta ratusije jirum, awa wanui so idanito syo ranaun.

¹⁷Weti kuda muno naito mine so usea mansai nanawirati Amisye po rarorono rinai umaso onawamo syo mansaen maisyare so: Naite umaso awa ansuno wo rave mamo ansuno besi kasubai maisyare tanamo mbadurur ramaisy muno ngkeki muno ngkuga. Kuda umaso makari maisyare singa makari ramaisy muno taname ama vadurure muje no mansawa rai, ama kijao, ama kapume ntavondi rai. ¹⁸Umba kuda wo siurijo mangke mandeije umaso—taname, kijaowe, muno kapumo ngkuga umaso—veano vatano mine so maubaisy. Vatano mine so maporabe mandeij, weti anugane maporabe so inta nawirati ugweneno rai. ¹⁹Kuda umaso nao awa vambunine no no mansawa rai muno matevane rai tavon. Kuda matevane umaso maisyare tawae makari ramaisy, weti mo vatane manepati mansewabe.

²⁰Vatano nako tuna onawamo maotare ramu, weramu usakinavo awa ana wo raveti ngkakai raije ramu. Yara onawamo una tawan ubeaje anawayo kakai mansai muno wo awa vukane ranteter no yare mansamun. Yare umaso mamo emasije, perakije, tembaga, orame muno inyoe veano manari, weti mamije, mamarikoame, majoe no mai jivae, weramu wo nuge ranyanyute kakai, wo ana raranive jewen, muno wananave kakai. ²¹Vatane umawe usakinav irati awa ana udave ti ngkakai raije ramu, maisyare wo vatane maubaisy, wo nyovara kakai raugav, anaerene ugavo mansai muno wanaonoambe.

10

Naito Amisy napirati po nyovara wao raakuvi tuvane rajjar

¹Umba syerato syo naito Amisy kaijinta aen, opamo bambunin dave. No no munijo ntiti umba paje, kamayo mo anasine rakakipimbe maisyare ansune ramaisy muno eve ntami akari vone rai. Vare muje amune rai maisyare uma amaisy. Ajoe mamo manakoe maisyare ajijo mo

yavare ratugar, muno maisyare tanamo mbadurur ramaisy. ² Aneme mamoo po nyovara wao raakuvi tuvan inta rajjar, po rajjare soamo raneka to. Ajo kove rapaato nteto mayane vone rai muno ajo kakai nteto yawa rai. ³ Gwaina anamote manakoeve maisyare singa inta gwanone omaisy. Anamote umaso nggwain, naije katitire kaururum we ravabari. ⁴ Katitiro kaururume umaso ravabarija jeven, syare syo ratoe, weramu idanito syo anamote inta ranaun no munijo ntiti mare, "Animaisy mirati katitir kaururume mo raura omamo vemo nyo ratoe inya! Yara nyo ama ine rangkokaibe!"

⁵ Umba naito syo aen te no mayan muno yawa rai po anem ngkove rajjaseo no naumo warae. ⁶ Umba naite umaso po raura aje pare, "Amisy po inatutir syo Apa ayao urairi raura. Wepirati noa nuge nuganui, Wepirati po naumo warae me mine so me mayane me ama anakotaro ntuna rai ranari vintabo. Weti syo Amisy apa tame veano Apa urairije raokaisy taiso: Rope raugaje nggwaravainy akatoo ramu, yara Amisy apa mangke soamo nde to! ⁷ Arono naito kaururume pare po apa tavuna ramawisy, naije umba Amisy apa bekero manakoe Po rangkokaibeowe mare nde mamai to ije. Weti mamaisyo Po raura nanto Apa anawae wanapatambe Ai no wusyinoe mansai."

⁸ Muno anamoto idanaun no munijo ntiti we mo raura de inai jakato mare, "Nyoronto! Nyo nyovara wao raakuvi tuvane, namirati ntuna no naito te no yawa pe mayane pe aneme rai raugav."

⁹ Naije syoroto kobe no naite umaso ai muno syo ranajo ai indamu po nyovara wao raakuvi tuvane umaso raurande. Umba naite umaso po raura nande inai pare, "Ndaugav muno ndaisy! Omamo indati ndaisy nawa rai ndanauna manavan maisyare anyauene ama pokoo manavano yara masyo wanyati raito yamo mpariman." ¹⁰ Naije syo nyovara wao raakuvi tuvan umawe raugav no naite umawe aneme rai muno syo raisy. Idanaun no inawa rai manavan, weramu masyo no sya wanyati rai, sya wanyati njoram. ¹¹ Umba po raura nande inai pare, "Winyamo indati ana Amisy po rarorono nai omamo nyo ratoe akato, anakotaro mare nande no mine so ama kawasae, ama munije, ama ayaowe, ama akarijo titi mansai tenambe."

11

Anawae jirumo Amisy po yatutir indamu yo Amisy aura kakavimbe

¹ Naije akato uvi omane inta aunande rinai, maisyare taune inta amaisy. Muno anamote inta mo raura rinai mare, "Mbe-seo ramu nyo Yavaro Amisy rataun muno ama tewa orame ntavon. Syare nyo vatano ube sambayambe no ama uga rai awa wanuije rator tavon. ² Yara Yavaro Amisy ama vasyoto no no akiri omamo vemo nyo rataun nora, weye omamo raunanta irati vatano wantukambe Rinaije mansai. Onawamo indati usea ube akarive irati Yerusalem, Amisy apa munije so, rajja embae tename jirum eane jirum. Muno wo vatano utantuna no naije mansave tatugadi. ³ Muno Risyo vambunine raugajeo Sya anawae yo inaura kakavimbe jiruma yai indamu yo ana indati nande raurairive muno ijantuna memembea masyote ratoramo ribuge intabo muno ratusiye jirum eane tename mandeij (1260)."

⁴ Anawae jirume umaso yaurata irati inyo saitune jirum muno yawainye jirumo nsayai no Amisy amun, opirati be akarive munije tename so rai. ⁵ Muno ranivara vatane inta ware wo yansewabe, naije taname muje no yawa rai mo mansanen, weti aya marova umaso mangkur bintabo. Maisyare omaisy, wene nande vatano ubeker wo anawae jirume yanasine ransewabe mai. ⁶ Anawae jirume umaso, vambunino naumo warae ayaura rai tavon. Weti arono yo Amisy apa ayao raurairive no mine so, yo maruge raorai maje, weamo tugae mamaisyo aya idaura so rai kobe. Muno vambunine no yai weti yo mana raveti mavu. Muno vambunine no yai indamu yo siurijo mangke kotaro rui vayave raugavo munije so rai mo ratatuv, arono rui vayave yo ramayar bayave.

⁷ Arono yo ayao Amisy raurawa mewen to, ana mamun tipu no Atemo Wene umawe ama uga rai, marovave anawae jirume umawe yai, weti po yapinde muno po yaubaisy. ⁸ Anawae yanasino ngkakai omamo ntamijo munijo Yerusalem ama unanuijo akoe rai. Omamo munijo wemirati Amisy Yesus auseo sawa inyo kapite rajjo wem. Munijo Yerusalem wato mo Sodom muno Mesir ramaisy.† ⁹ Umba vatano mine so ude wo anawae jirum yanasino ngkakai umaso raen. Vatane umaso nawamo ude awa susye rai, awa kawasae mai, awa ayao rai, muno awa munijo ranteter. Masyote mandeija vasye inta vatane umaso ude tenambe, wo yanasino ngkakai so raen. Weramu wo

* 11:3 Embae tename jirum eane jirum ama masyote mamoo 1260. † 11:8 Munijo Yerusalem mo Sodom ramaisy weye ama vatane ukakainoanive rave, muno mo Mesir ramaisy weye ama vatane wonayo Amisy ai.

yanasino kopa umaso raorai ware omamo vemo rantuna nora. ¹⁰ Anawae jirume umaso yo siurijo mangke raugavo vatan tenambe utantuna mine so rai mansai, weti arono wene nande yai to, vatano utantuna no mine vone so mananibe rave. Manayanambe aya wene rai, weti wo one rave wo ananuge rajaro eyaive mansai.

¹¹ Masyote mandeij vasye intai mewen to, umba Amisy po apa anawayo raugakasya yai jakato, naije ikovakato ti isea isyayai. Weti vatan tenambe wo yaene nawamo ujani dave. ¹² Naije anawae jirume umaso yo anamoto manakoe inta ranaun, ngkino munijo ntiti mayao de yai mare, "Inandesen indamu ide no naiso!" Naije umaso isyea ija no naumo warae, kamayo mo yatatuv, muno aya marova wo yanyanyuto iseyai.

¹³ Naije kobe mungki akoe inta ravari muno munijo namije raosor ava abusyin, weti ama nako raosore umaso inta mirati mandamisy muno vatano muenen dai nseo no ribuge kaururum. Muno vatano una munije wato rai ugwenen dainy onao ujani dave, naije wo Amisy wepi no munijo ntiti aura ware, "Wakoe! Amisy apa vambunine manakoe rave!"

¹⁴ Sya ayao siurijo jirume ndento to. Ndaen akato: siurijo mandeije mavave mo rarijade kobe.

Tavuna kaururume ramawisy

¹⁵ Umba naito Amisy kaururume po apa tavuna ramawisy. Naije idaniv anamoto manakoe no no munijo ntiti ware: "Naisoamo mine tename mbintabo, wama Amisy obo pirati be akarive rai tenambe, muno Apa Mesias tavondi, Wepi po vatane mapaya ayao kakaije rai. Indati be akarive ntoa nuge nuganiu."

¹⁶ Muno vatano ube akarive mansano tenamara eane mambisy nanawirati utantuna no awa kursijo titi no no Amisy amun wenanao wo vukane ranteter no Amun indamu ubeaje Ai. ¹⁷ Umba wo raura ware:

"Amisy, Winyi nya vambunine ntiti mo vambunino kaijo rui rakivan tenambe,
muno Winya soamo wino muno wusyinoe wino to.

Reamo kove raura ore Winai,
weye soamo Nyo nya vambunino manakoe rajar indamu wimbe akarive.

¹⁸ Vatano wantukambe Nai upari weye Nya pari mangke mamamo ama masyote mamai to.

Muno Nya masyote nande to arono nyare Nyo vatano ugwenen to maijasea ukovakato,

umba Nyo manajo awa ana udave rai, rui ngkov muno rui ngkakai.

Nyare Nyo kovo manakoe inta raugaje irati Nya anawae nanawirati wanapatambe Nai mansai,

muno Nya kawasae mansai,
nanawirati wo nasyaniv,
vatano mamaun muno vatano akokoe mansai tenambe.

Yara are nawirati wo vatane mave tatugadi muno wo maubaisy, indati taune Nyo maubaisy.

Anakotare umaso ama masyote ndea mai kobe to."

¹⁹ Umba naije Yavaro Amisy no no munijo ntiti rausiso, muno Amisy apa Kasyamo Urairije[†] raen kakavimbe no Yavaro Amisy umaso ama uga rai. Muno naije ivake ratatukande muno katitire ravabari mo nuge rambayar. Muno mungki nande muno maru oram maje maisyare maru pap.

12

Tawae akoe muno wanya no arikainye autan

¹ Naije anainame inta raroron nande no naumo warae: wanya inta mirati mo uma ave ansumbe muno embae no no rajo ate rai. Rakari vone mamamo ama sapeo muno tume abusynara eane jirum no rai. ² Wanya umaso ranakeave ama arikainye autan muno manonae ama yorame rai weye mare mo ama kavu avaki.

³ Naije anainamo kajinta raroron akato no naumo warae: syerato tawae akoe nijame inta raen, omamo ama rakari kaururum muno ama sapeo kaururum ntavon, muno ama korodoai abusyin.

⁴ Muno ratevane rave tumo no no naumo warae raporabe mandei, weti mo nake inta ramau no mine vone so rai. Muno tawae akoe umaso nseo nte no wanya uma mare mo arikainye avaki so ramun indamu mo arikainye umaso aun arono mo avaki. ⁵ Naije mo Arikainyo anya inta avaki, weramu tawae mo aune ramu, weye Arikainye umaso augavo dodorabe vayave irati wanya umawe raora.* Auga ti to no Amisy amun, Napi tuna no Apa kursijo titi rai. Arikainye so pirati indati be akarive vatano susyo ntuna no mine so mansai tenambe, muno Po manepato Apa isyo besije rai indamu ubeta Ai. ⁶ Wanya umaso mamamo nin weti nto no nugo vabukane vono maninimbe, nuge umaso Amisy po ratayao indamu nina nto no rai. Muno Po raeranande no we yava masyote nanto no

[†] 11:19 Kasyamo Urairi mamamo Amisy apa Ananyao Abusyin randi ama uga rai.

* 12:5 Arikainye so pirati Kristus, muno tawae opirati Anakakai Akoe, opamo be marovave Kristus ai.

ribuge intabo muno ratusije jirum eane tename mandeij (1260).

Tawae akoe marovave naito Amisye mansai

⁷ Naije marova akoe ntami no munijo ntiti. Nait Amisy akari apa tame mirati Mikael muno apa naito be akarive mai wanugan umarovave tawae umaso rai, muno tawae me ama naite wo marova rasakinav akananto mansai tavon. ⁸ Weramu tawae umaso me ama naite nawamo utataopon irati marova umaso rai, mbeare wemai ti varore raugaje mansai jakato ra utantuna no munijo ntiti ma jewen. ⁹ Muno tawae akoe namije ramau ti musyo. Wemirati tawaeyo wusyin, namirati rawainamo Anakakai Akoe, mo vatano mine so mansaponae. Ramaugaje no mine so ama naite mansautan tenambe.

Ansyerano ngkino munijo ntiti

¹⁰ Arono naije idanito syo anamote inta ranaun ngkino akoeve no munijo ntiti, mo raura mare:

“Soamo masyoto Amisye po apa vatane mapaya kakaije rai!

Soamo Apa masyoto po apa vambunine raroron

muno be akarive Apa kawasae mansai nande to!

Muno Apa Mesias po apa vambunine raroron indamu be akarive tavon,

Wepirati Amisye po apatimu indamu Po vatane mapaya kakaije rai.

Weye Anakakai Akoe, wepi po wama arakove mansaura tantunawi no wama Amisye amun simane rai namane rai tutir bayave, opamo Amisye po amau ti puje munijo ntiti raora to.

¹¹ Wama arakove wo Anakakai Akoe umaso apinde

weye Domba Tuvan apa mavu mo mapaya awa ayao kakaije rai muno wo ayao Amisy raura kakavimbe.

Muno ujanivo wene rai ramu, yara wanapatambe Amisye ai tutir ti vatane wo maubaisy.

¹² Maisyare omai ti, vatano wana no munijo ntiti weap, wasananibe tenambe!

Yara vatano mayan muno vatano yawa weap, kakaije nde wasai, weye Anakakai Akoe paje wasai to.

Opamo apa pari mangke dave weye po rae-namo anakero po kakai rajiare ma nggwaravainy akatoo ramu yara kav-inta ama marane ntami.”

Tawae akoe mo wanya rawatan

¹³ Muno arono tawae akoe mo taune raen mare omamo ramau no mine so rai to, naije mo wanya uma mo arikainyo anya avaki rawatan. ¹⁴ Wanya umaso mammo Amisye po insani mangkangan inta apa pepake mirati raugaje rai, indamu mbadirir nto no nugo vabukane vono maninimbe, indamu Amisye po raeranande nggwaravainyo tawae akoe ama no rajie rai yava tume mandeij muno embae kawije intabo.† ¹⁵ Uмба tawae akoe umaso mo mana rampunae rawa raide, njama maisyare mana akoe, mare indamu mo wanya unawe raugav. ¹⁶ Weramu mine vone so mo wanya umaso raeranande taiso: mo rawa rayak mo mana umaso raunto, namirati umawe tawae mo rampunae wem. ¹⁷ Naije tawae akoe umaso mpari wanya umawe rai. Weti nto ti marovave wanya umaso ama ajavi mo mampame mansai—nanawirati ubeta ayao Amisye rai muno wo Yesus apa ayao rajiar matuve mansai. ¹⁸ Muno tawae umaso ntet tawan kobe no nayave von kobe.

13

Ana mamuno tipu no mayan

¹ Naije syerato syo ana mamun inta tipu no mayan aen. Opamo apa korodoai abusyin muno akarije kaururum, muno apa korodoai ama vone mammo sapeo abusyin nsayai dai. Tame inta ratoo akarije ranteter rai, muno tame wato mo Amisye aura tantunawi. ² Ana mamun umaso anakea ngkarandomanive maisyare karawae amaisy, ajoe maisyare beruang muno awa maisyare singa awa ramaisy. Naije tawae akoe umawe mo vambunino manakoe raunande ana mamun umaso ai, mamaisyo taune ama vambunine rai. Muno mo apa tamo titi raunande ai indamu be akarive. ³ Ana mamun umaso apa akarije inta mammo puto manakoe no rai, wemamo paro kavintare mo wene raugavo ai ma, weramu nsauman akato to. Vatun tenambe mine so unantaive ana mamun umaso ai muno utavono ai. ⁴ Vatano wanui ubeaje tawae akoe umawe rai weye mo vambunine raunande ana mamun umaso ai. Muno ana mamun napije, vatane ubeaje ai tavon, wo raura ware, “Are pirati po ana mamun so amaisy? Are pirati indati marovave ana mamun maisyare somaisy ai? No mine so vatan inta mamaisy jewen tenambe.”

⁵ Ana mamun umaso po Amisye aura tantunawi yara po taune aijaseo tive. Muno Amisye po amayar bayave, weye Po amayaro be akarivea embae tename jirum eane

† 12:14 Tume mandeij muno embae kawije intabo ama masyote 1260 (Muni Akari 11:3, 12:6).

jirum rai. ⁶ Weti ana mamun umaso po Amisyera aura tantunawi jirati Apa tamo Amisyera rai muno Apa tuna raije rai. Muno po vatano una no munijo ntiti mansaura tantunawi tenambe. ⁷ Varore raugaje ai indamu marovave Amisyera apa kawasaeyo ukakavimbe mansai, weti po mapinde. Amisyera po ana mamun umaso amayar be akarive vatano mine so mai tenambe — awa susye, awa kawasa, awa ayao, muno awa munije rui vayave. ⁸ Vatano mine so wanui rave inta ubeaje ai. Weramu vatan inta nawirati ubeaje aije jeben, we-nawamo vatano nanawirati awa tame ratoe Bukugo Kovo Nuge Nuganui rai arono nuge so ranari rainyoe. Bukuge umaso omirati Domba Tuvan apaura rai, Napirati vatane wo aubai to.

⁹ Weti, syare wadanide, are pirati amarikoame rasakinavo sya ayao so rai, weamo po ranaun:

¹⁰ Are pirati Amisyera po apatimu indamu vatano mine so wo ausiso no tanoano makova rai, weamo indati wo ausiso no tanoano makova rai jaje. Are pirati Amisyera po apatimu indamu vatano mine so wo omake veano aubaisy, weamo indati wo aubaisy omake rai jaje. Maisyare omai ti, Amisyera apa kawasa weap, ana mbe mobe wasai rave mamo wasatawandi muno wapana Amisyera ai rave.

Ana mamun tipu sen no min

¹¹ Naije syerato akato syo ana mamun kaijinta aen, tipu sen no mine rai. Apa korodoai jirum maisyare domba tuvan inta amaisy, weramu payao maisyare tawae akoe inta mayao. ¹² Ana mamun tipu sen no mine rai so apa vambunine mamo ana mamun manasyine umawe pirati po raunande ai weti po apa anakere raijar no amun. Muno po vatan tenambe mine so mansantitidi indamu ubeaje ana mamun manasyine ai, napirati paro manakoe rave no akarije rai weramu nsamaan akato to. ¹³ Muno ana mamun tipu sen no mine rai po anapaporainyo manakoe raroron no vatano wanui mansamun. Po taname raura no naumo warae maje mine so rai muno vatane wo raen kakavimbe. ¹⁴ Weti apa anapaporainye mo vatano mine so mansaponae, wemirati po rave no ana mamun manasyin umawe amune rai. Umba po vatano mine so matutir indamu wo yare ranarajo ana mamun manasyine anyi, napirati vatane wo omake veano aperam weramu kakai ramu. ¹⁵ Muno vambunine raunanto ai indamu po anawayo raugasyo irati yaro uma wo anari ana mamun manasyin anyi we ai indamu yare umaso payao. Weti are pirati beaje yare umaso ai jeben, yare umaso po apa

mangke aubaisyera rapatimugo ai. ¹⁶ Muno ana mamun tipu sen no mine rai umawe wepi bewar tiva pake raunanto vatan tenambe mansai—vatano mamaun muno vatano akokoe; vatano awa ananuge manui muno vatano awa ananuge meweno majie nao; vatano aro muno vatano aro jewene nao. Vatan tenambe umaso nanawamo ana mamun umawe po mantitidi indamu pake raunanto mansai. Vatan inta nawamo pake raunanto no manem ngkove rai muno kaijinta nawamo pake raunanto mande rai. ¹⁷ Pako raunanto mai no taiso: vatano ana mamun manasyine umawe apa tame no mai nao dako, apa nomorije no mai nao dako, vatano nanawije nawirati mansamayaro wanamavumbe no pasar, yara pake meweno mai nawamo mansamayare ramu.

¹⁸ Sya arakovo wabacave sya ayaowe so rai, syo raura kakavimbe wasai: Ana mamun umawe apa nomorije ama ine mbare ramu. Vatano makarikuga mbar obo nawirati unanta ama ine rai. Weti are pirati akarikuga mbar syare po nomorije umaso ama ine ratantona kobe, weye ana mamun umawe apa nomorije so raurata irati vatane inta apa tame rai. Ama nomor mamo 666.

14

Domba Tuvan muno vatano utavondi Ai

¹ Muno syerato: Tugae rave, Domba Tuvan seo tet no Unato Sion. Vatano utavondi Ai awa wanui nanto no ribuge ratusije intabo eane tename jirum eane mambisy (144.000). Muno mande mamo Domba Tuvan apa tame ratoe rai muno Ajae Amisyera apa tame ratoe rai tavon. ² Muno syo anamote inta ranaun ngkino munijo ntiti maisyare mana vuke inta nsopato pene rai ranauni nto muno maisyare katitir ama kino manakoe ramaisy. Muno syo anamoto namije ranaun tavon maisyare vatane inta wo kecapo inta rambaon we-maisy. ³ Vatano ama awa wanuije ratora ribuge ratusije intabo eane tename jirum eane mambisy (144.000) onawamo ukinyo ansyerane rai ta no kursijo titi ama usye rai muno ana akokoe Amisyera po manari muno vatano utantuna ube akarive umawe mansamun. Wo ansyerano wanyine inta ukinyo rai, muno webo nawirati umaisyoy ukinyo rai, yara vatano kaijinta wo ranyao kakai, weye onawamo vatano Amisyera po mapatimu no vatano mine so awa yasyine rai, Po mapaya awa ayao kakaije rai to. ⁴ Wenawirati wo taune manasine raeranande indamu anaerere meweno mansai, weti ukakavimbe. Vatane so nanawirati Domba Tuvan pare to no rui vayave utavondi Ai tutir. Wenawirati

Amisye po mapatimu no vatano mine so awa yasyine rai, Po mapaya awa ayao kakaije rai, indamu onawamo maunanto terave Amisye ai muno Domba Tuvane ai, raurata irati inyoe ama mane makauje ti ama nyoamano manasyine raunande Amisye ai wemaisy. ⁵ Wenawamo wayarurijabe ramu muno awa ayao kakai meweno mai.

Naito Amisy mandeij wayao aje vatano mine so mansai

⁶ Umba syerato syo naito Amisy inta aen badirir no naumo warae. Amisye po atutir indamu po Apa Ayao Kovo no pitawabe ravov. Weti po raura nanto vatane kotaro ntuna no mine tename so mansai — vatan tenambe so mansaeno awa munije, awa susye, awa ayaowe, awa kawasae rui vayave. ⁷ Gwaino anamoto manakoe rai pare, “Wapo Amisye asyaniv! Muno wapo aura Opi titi rave! Weye Apa masyoto pare Po vatan tenambe awa ana udave raen ti Po awa mangke rapatimu soamo nande to. Wabeaje irati Ai, napirati po mine so muno naumo warae, mayane muno mana ami ranari tenambe.”

⁸ Muno naito Amisy kaijinta dijade, opa naito jirume piye, gwain pare, “Mandami to! Munijo Babel mandami kobe, weye wemirati munijo akoe mo vatano susyo mine so manuga raugabe indamu wo ama awijo panyoan ramanam indamu utavondijo ama anaerere rai.*”

⁹ Muno naito Amisy kaijinta po naito jirume umawe yarijade, opamo mandeije piye. Umba gwaino anamoto manakoe rai pare, “Ranivara vatane inta ubeaje ana mamun umawe pe apa yare me yai muno apa pako no mande rai ndako maneme rai ndako, ¹⁰ indati wo Amisye apa anggurijo raurata irati Apa pari mangke ramanam, wemirati rauvaro ama kapije rai, namo ama parimane ransopaje jeben yara ntiti rave. Indati manasine mangkuro tanamo mbadurure rai ti awa siurije manakoe, muno naito Amisy ukakavin nawe, Domba Tuvane pe, wo awa siurije raen tenambe. ¹¹ Umba taname kijao ntami tawan irati vatane umaso mansaija nuge nuganui, muno usiuri rai mangkebe siman, namane yanteter bayave, weye ubeaje irati ana mamun umawe pe apa yare me yai muno apa pake no mansai.”

¹² Maisyare omai ti, Amisye apa kawasae weap, wasatawandi rati wapa siurije rai! Weapirati wabeta ayao Amisye rai tutir, muno wana tawan watavondi Yesu ai.

* **14:8** Ayao so ananenea ma. Munijo Babel raurata irati vatan tenambe nanawirati wonayo Amisye ai. Ama anaerere raurata irati bekero mine so rai. Muno ama awije raurata irati ana mo vatane manuga raugabe ntento ana mine so rai weti utavondi ama bekero ngkakainoanive obo rai (Yeremia 51:7-8,13).

¹³ Naije idaniv anamote ngkino no munijo ntiti mo raurade inai mare, “Nyo ratoo taiso: Unumeso muno miridije nto, kove ngkov irati vatano ugwenen nanawirati wanave Amisy Yesu ai to we mansai.”

Umba Anawayo Vambunine mo raura mare, “Tugae, indati vatane umaso maneme mpaya awa anakere rai ti utantuna vavai rati manuga nsauman. Weye Amisye po awa ana udave ngkove raen tenambe to ti.”

Amisye po apa mangke raugaje mine so rai

¹⁴ Syerato syo kamayo popere inta raen akato. Vatane inta seo tuna rai, maisyare Arikainyo Vatan amaisy. Muno sapeo emas inta ntuna akari vone rai muno omako nsiu inta mirati Po rajaro aneme rai. ¹⁵ Naije naito Amisy kaijinta puje no Yavaro Amisye rai muno gwaino anamoto manakoe rai. Gwain to irati Arikainyo Vatan umawe ai, po atutir pare, “Nya omako uma ndaijare wato raunu de Nyo veano mine so ama mane raotar weye soamo ama mane matu to.” ¹⁶ Muno Arikainyo Vatan, napi tuna kamayo rai, Po apa omake veano mine so ama mane raotar ti Po ranugan. Mine so ama mane raurata irati vatano utantuna mine so rai mansai.

¹⁷ Muno naito Amisy kaijinta puje no Yavaro Amisy no no munijo ntiti rai, po omako atu nsawa inta rajja tavon. ¹⁸ Muno naito Amisy kaijinta puje tavon no tewa orame rai, opirati po tanamo mbadurur no tewa orame ama vone rajje raeranande. Naije gwain akoeve to irati naito po omako nsiu rajjare umawe ai pare, “Nyo nya omake wato randaride ndave inyo anggur ama mane raotar, weye ama mane mawit to.” ¹⁹ Weti naito Amisy umaso po apa omake randaride no mine vone so po inyo anggur ama mane raotar. Muno po ramaugusya no mampiriario manakoe inta rai indamu po rakuganara ama poke muje. Omamo raurata irati Amisye apa pari mangke Po raugaje vatano wonayo Aije mansai. ²⁰ Anggur ama mane umaso mamu rakugan no mampiriare wato rai no munije ama akiri. Mavu njamo rayuje, ama titi nseowa nanto no meterije jirume rai muno ama vuke mansanana ama waravainye ma kilometer ratusije mandeij.

15

Naito Amisy mansano kaururum wo siurijo mangke kaururum raugaj

¹ Muno syerato syo anainame inta raen no naumo warae, manakoe rave weti riparo inai. Anainame umaso mamonaite kaururum wo siurijo mangke kaururum raugav. Siuri mangke umaso wemirati Amisy apa pari mangke dija dave mije. Arono Amisy po mangke umaso raugaje mine so rai, weamo Apa pari marane mije.

² Muno syo ana inta raen akato maisyare nawanano ndandini dave, mo kansina ramaisy, muno taname mbadururo uga rai. Naije syo vatane inta mansaen usayai no nawanane so ama tuga. Wenawamo ubambunin wo ana mamuno puje no mayane umawe apinde kobe, weye ubeaje apa yare raije ramu. Muno apa tame ama nomorije mamona pake raunanto mansaije ramu. Vatane umaso nanao wo kecapai rajaro maneme rai, wemirati Amisy po raugaje mai. ³ Muno ukiny irati ansyerano Musa rai, wepirati panapatambe Amisy ai, muno ansyerano Domba Tuvan ntavon. Ama kine maisyare so:

“Amisy winy, Winyirati nya vambunine ntiti mo vambunino kaijo rui rakivan tenambe!

Nya ana ndave mbe anapaporaimbe muno manakoe!

Winyamo Akarijo Titi mbe akarive nuge so rai tenambe!

Muno Nya ana nyo rave mamona mamai tugae.

⁴ Indati vatan tenambe wo Amisy nasyaniv, muno wo najaseo titive, weye Wibuin nyirati ngkakavimbe.

Muno vatano susye kotare ude tenambe wo vukane ranteter ubeaje Nai,

weye Nya ana ndave ti ngko dave mamona Nyo raroron kakavimbe mansai to.”

⁵ Naije akato risyo Yavaro Amisy no no munijo ntiti raenamo ama Tanoano Ndanndini Dave ama unsanda mpaya to. ⁶ Umba naito Amisy mansano kaururum wo siurijo mangke kaururum raugave umawe wuje no Yavaro Amisy umaso rai. Awa ansune mpopor muno ngkena dave, muno awa ansuno emasi veano ranari mamona ransawa no awa popane rai. ⁷ Naije ana akokoe Amisy po manari mansano mambisy umawe inta po kaijo emasi veano ranari kaururume raunanto naito Amisy kaururume umaso mansai. Muno awa kapi wo rajia tetebe ntairi jirati Amisy apa pari mangke rai, Amisy no pitawabe.

⁸ Naije Yavaro Amisy omamo ntairi rati kijaowe rai, omamo mo Amisy apa vambunine muno Apa kovo ntitiye raroron. Weti vatan inta siso Yavaro Amisy ama uga rai jewen bayave, weye mamaisy ramu, weti ntoa Amisy apa siuri mangke kaururum

namirati naito kaururum wo raugav mamona ndetoa mewen dati.

16

Mangke kaururum Amisy po raugaje marane rai

¹ Naije idanito syo anamoto akoe inta ranaun no Yavaro Amisy rai, mayao to irati naito Amisy kaururume mansai mare, “Wata wapo parijo mangke Amisy namirati ntuna wapa kapije kaururume rai raugav, wapo rauvarasya no mine waraya!”

² Naije kobe naito Amisy manasyine po apa kapije rauvarasya no mine vone waraya. Weyava papugame nande kobe irati vatano nanawirati wanapatambe ana mamun umawe ai weye ubeaje apa yare rai muno apa pake no irati mansai. Papugame nande mai omamo ngkakainoanive muno njoram dave.

³ Muno naito Amisy jirume po apa kapijo pari mangke Amisy ntuna rai rauvarasyo no mayane vone rai. Naije kobe mayane mavu maisyare vatano wene nde ai to inta apa mavu ramaisy. Weti anakotaro ntuna no mayane ama uga rai muenen bintabo.

⁴ Naito Amisy mandeije po apa kapijo pari mangke Amisy ntuna rai rauvarasyo mana akokoe muno mana ama ami rai tutudi, weti mana mavu bintabo. ⁵ Naije idaniv naito Amisy po mana rajare po raura pare, “Amisy, Winyamo ngkakavimbe, Winya soamo no muno wusyinoe Winya no tavon to. Nya mangke nyo raugaje so mamaisy, ⁶ weye mamaisyo vatano ukakainoanive wato awa ana udave rai arono wo Nya kawasae maubai to muno wo Nya anawae mao tavon. Maisyare omai ti, arono wo mana rawavin, weamo Nyo mavu obo raunanto wo ramanam.”

⁷ Naije syo anamote inta ranaun ngkino tewa orame rai, mo raura mare, “Tugae, Amisy winy! Winyirati nya vambunine ntiti mo vambunino kaijo rui rakivan tenambe. Nya mangke nyo rapatimu omamo mamaisy muno no rai tugae.”

⁸ Naito Amisy mambisy po apa kapijo pari mangke Amisy ntuna rai rauvaraje no uma ai. Naije kobe varore raugaje uma ai indamu po vatane mansanen apa mamoaane rai. ⁹ Uma apa mamoaane miridi nseo ti mo vatane mansanen apa mamoaane mpanyoan dave rai, weti vatane wo Amisy aura tantunawi jirati Apa siuri mangke Po raugaje mansai so rai. Weramona wone usakinav irati awa ayao kakaije rajii muno wonae wo Amisy aura Opi titi rave.

* 16:10 Ana mamune sopamo ana mamun tipu no mayane piye, napi aroron wusyimbe (13:1).

¹⁰ Naito Amisyo radani po pari mangke ntuna kapijo po raijare rauvaraje ana mamune* apa kursijo titi tuna raije rai. Naije munijo ana mamune be akarive raije so ngkaumudi kobe muno vatano ana raije usiuri ravea maunane ratao. ¹¹ Umba wo Amisy no munijo ntiti aura tantunawi, weye yorame muno papugame ntuna mansai. Weramu usakinavo awa ayao kakai raije ramu.

¹² Naije naito Amisyo kawije intabo po pari mangke ntuna kapijo po raijare rauvarasyo akato irati mana akoe Eprat rai. Mana akoe so mparikisy indamu mbe unauive irati akarijo titi nanawirati una no ranijo murame mansai indamu wo raide. ¹³ Muno syerato syo anawayo kakai mandeija maen, wo kunaije ramaisy. Onawamo inta no no tawae akoe umawe rawa rai muno inta no ana mamun awa rai muno inta no anawae angkarije awa rai,† umba anawayo kakai mandeija wuje irati mawa rai tetebe. ¹⁴ Anawayo kakai wuje so onawamo Anakakai Akoe apa anawayo kakai wuje wo anaporainye raroron. Wuruta nanta irati akarijo titi mansai tenambe no mine so vintabo, wo manugan indamu umarovave Amisy ai arono apa Masyoto Akoe ndea mamaisy. Masyoto namije omamo masyoto Amisy, opi apa vambunine ntiti mo vambunino kaijo rui rakivan tenambe, Po vatane awa mangke rapatimugo mai.

¹⁵ Amisy Yesus po raura wansai pare, “Waperade! Risyakare maisyare vatano anaonoano, weye Sya ide wemamo de papabe, ti weapantatukambe rai. Kove ngkov irati vatano syisyaube muno panatatayaube ai, vatano napije pa apa ansune ratayao wusyimbe indamu vemo sarokanive ti samane no vatano wanui mansamune rai nora arono risyakare.”

¹⁶ Naije anawayo kakai umawe wo akarijo titi manugan no anoke inta rai. Anoke so raura ayao Yahudi raijamo Armagedon.

¹⁷ Muno naito Amisyo kaururum po pari mangke ntuna kapijo po raijare rauvar no naumo kakavine rai. Naije kobe anamoto manakoe inta ngkin no Yavaro Amisy mo raura mare, “Anakotare nande vintabo to!” ¹⁸ Naije ivake ratatukande muno katitire ravabari mo nuge rambayar muno mungki akoe ravari. Mungkije umaso manakoe rave, mo mungkijo kaijo nandevato rakivan bintabo. Arono vatane manari kobe weti utantuna mine so rai, mungkijo

maisyare so inta nandevato rainy. ¹⁹ Naije munijo akoe ama tame mi Babel mporar be mandeibe muno munijo mine so mandamisy no rui rui. Amisy animari munijo akoe Babel ama ayao kakaije raije ramu, yara Po apa pari mangke raugaje rai, maisyare anggurijo mpariman inta raudande inda mo ramanam. ²⁰ Muno nupatimu tenambe rakanive vintabo muno papukame inta raen akato ramu. ²¹ Maru oram maje no naumo warae ntende mine so rai mo vatane makep. Maru oram umaso manakoe rave, intabo mamamo ama kilo nseo no tename jirum eane abusyinu. Weti vatane wo Amisy aura tantunawi weye Apa mangke po raugaje somamo mangke ntiti.

17

Munijo Babel raurata irati wanya anaerere rai

¹ Naito Amisyo kaururum uma wo kapi kaururum raijaro wenao inta de rinai, muno po raura pare, “Winde, syo rarorono nai: Mangke indati raugaje wanya anaerere akoe rai. Anaerere akoe ama tame mi muni akoe Babel, omamo rausea nteto mararai mino mana manui raije rai. ² Wanya umaso mbewaramo akarijo titi mine so wo anaerere raugavo rai muno utavondi ama bekero ngkakainoanive rai tenambe. Muno vatano mine so umaen irati ama awijo panyoane rai, weti utavondi ama anaerere rai muno ama bekero ngkakainoanive obo rai.”*

³ Naije Anawayo Amisy mo inausuru tenambe muno naito Amisy umawe po inaugav weti ririnta no nugo vabukane vono maninimbe. Naije syo wanya mamun inta raen nseo ntuna irati ana mamun akiri vone rai. Ana mamune umaso pamo anakea nijam dave, muno tame ratoe anakea rai tenambe, wemirati mo Amisy aura tantunawi. Akari kaururum muno apa korodoai abusyinu.† ⁴ Wanya umaso ama ansune nijam muno sintair. Mo emasije muno raoni ntuntumbe maisyare oramo mamani ramaisy veano rayanyave. Muno raneme mamamo mo kapijo emasije inta raijar. Kapije umaso ntairi jirati ana ngkakainoanive rai muno ama ayao kakai anaerere rai. ⁵ Muno rande mamamo tame inta ratoe rai, omamo ama ine rangkokaibeve. Ama tame mi som:

BABEL MANAKOE

† 16:13 Anawae angkari pamo ana mamun jirume piye, napi tipu sen no mine rai (13:11). * 17:2 Ayao so ananeneae ma. Munijo akoe so raurata irati vatan tenambe nanawirati wonayo Amisy ai. Ama anaerere raurata irati bekero mine so obo rai. Muno ama awije raurata irati ana mo vatane manuga raugabe indamu ntento mine so rai weti utavondi ama bekero ngkakainoanive obo rai (Yeremia 51:7). † 17:3 Ana mamune sopamo ana mamun manasyine piye, napi tipu no mayan (13:1).

WANYA ANAERER RUI VAYAVE AWA AKOYA
MIJE

MUNO AYAO NGKAKAINOANIVE
AMA RUIKE NO RAI VINTABO

⁶ Munu syerato wanya umaso maen irati Amisyepa awa kawasae awa mavu rai, onanawamo wo ayao kovo Yesu raura kakavimbe ti vatane wo maubaisy.

Arono risyo wanya umaso raen taije, ripapar irati inai. ⁷ Naije naito Amisyepo raura nande inai pare, “Mbeanimaiibe mpapar irati nai? Syo wanya umaso ama ana ngkokaibe raura kakavimbe indamu winanto ama ine rai. Munu syo ana mamun apa ana ngkokaibe raura kakavimbe tavon, wepirati wanya umaso nseo ntuna ai munu opamo akari kaururum munu apa korodoai abusyin. ⁸ Ana mamun nyo aene wato pamo wusyinoe no to, weramu soamo kakai to. Indati masyote inta pare puje no Atemo Wen Akari Makova Rai jakato. Arono naije vatano utantuna mine so rai upaparo mansai, nanawirati awa tame ratoe jeben no Bukugo Kovo Nuge Nuganuije rai arono nuge so ranari kobeyoe. Upaparo mansai weye ana mamun umaso wepi kakai to, soamo tipu akato. Weramu masyote makanande indati Amisyepo andamisy kobe.

⁹ Vatano makarikuga mbar obo nawirati unanta sya ayao so rai: Ana mamun umaso akari kaururum omamo raurata irati unate kaururumo wanya umawe nseo ntuna ama vone rai wemije. Munu kaururume so omamo raurata irati akarijo titi kaururume mansai tavon. ¹⁰ Akarijo titi umaso wenanawamo radani ugwenen to. Intabo pita no munu inta pamo de rainy. Arono de, indati be akarive nggwaravainye ramu. ¹¹ Munu ana mamun, opi wusyinoe no to munu soamo kakai to, wepamo akarijo titi kaumandeije piye. Opamo ato siso kaururume umaso matavon. Arono de akato, indati Amisyepo andamisy.

¹² Ana mamun apa korodoai abusyin nyo raene wato omamo raurata irati akarijo titi abusyino wo awa munijo ube akarive raije raija dainye mansai. Weramu arono awa vambunine raunanto mansai, indati ube akarive irati ana mamun umawe atavon, weamo nugoenta ramu, yara uma ami intabo vayave. ¹³ Indati awa ayao intabo ware wo awa vambunine raunanto nsawa irati ana mamun umawe ai vintabo. ¹⁴ Indati umarovave irati Domba Tuvane ai. Weramu Domba Tuvan wepe, Apa vatano utavondi ai nawe, wo mapinde kobe tenambe. Domba Tuvane bambunin weye opamo Akari Titi po akarijo titi makivan tenambe, munu opamo Akari No Vombe irati akari una no rui rui vayave mansai. Vatano utavondi Domba Tuvane ai

wenawamo Wepi po mawain Po matayao, munu ubeta Ai tutir.”

¹⁵ Naije naito umawe po raura nande inai jakato pare, “Mana nyo raene wato, namirati wanya anaerere wato ntuna rai, omamo raurata irati vatane kotare ntuna no mine tename so raije mai—mansaeno awa susyo manakoe rai, awa vatano wanui rai, awa munije munu awa ayao kotare rai. ¹⁶ Munu korodoai abusyin nyo raenoe raurata irati akarijo titi abusyin. Akarijo titi so munu ana mamun umawe indati usakinav, wo wanya anaerere umaso ransewabe. Indati wo ama ananuge raugavo raora ti nsarokanive. Wo ama ranasine raisy munu wo taname rave ramer. ¹⁷ Weye Amisyepo manuga ranyao indamu wo Apa bekere rarijat. Po mawa ti awa ayao mbe intabove indamu wo awa vambunine raunanto nsawa irati ana mamun umawe ai vintabo awa mamaisy irati Amisyepa ana daura rai. ¹⁸ Wanya nyo raene wato mamu raurata irati munijo akoe wemirati mbe akarive irati akarijo titi mine so mansaije rai.”

18

Munijo Babel mandamisy

¹ Naije akato syo naito Amisy kaijinta aen akato no munijo ntiti umba paje. Apa vambunino manakoe no irati ai munu apa varo ntiti rautan, wemi mbaro mine so rai tenambe. ² Gwain akoeve pare, “Mandami to! Munijo akoe Babel mandami kobe! Wemirati vatane inta utantuna rai jakato jeben, yara anawayo kakai obo mirati mo rave yavabe ti no rai. Munu anawayo ngkaumure nsiso ama uga rai vintabo, munu insanijo anaonae kotaro rui vayave ntuna rai. ³ Weye vatano susyo mine so tenambe wo ama awijo panyoan ramanam, weti utavondi ama anaerere rai munu ama ayao kakai kotare rai tenambe. Munu akarijo titi mine so wo anaerere raugavo rai munu utavondi ama bekero ngkakinoinive rai tenambe. Vatano utantuna munijo Babel umawe rai awa bekero ananugo mine so rai mamu manakoe rave. Weti vatano wanamavumbe no mine so ude wo ananuge manui ramavun munu awa doijo wo raijaro rai nseowa ntiti rave.”

⁴ Naije syo anamoto kaijinta ranaun akato no munijo ntiti warae, mo raura mare:

“Inya, Sya kawasae! Wata wapusya munije wato raora!

Vemo watawondi ama ayao kakai rai nora, indamu vemo ama siuri mangke raugaje rai

mo wasaroya tenambe nora!

⁵ Munije wato ama ayao kakaije manui rave

weti ratutumbea ntitiya nto no
naumo warae.

Amisyé animari ama ayao kakaije umaso
raije ramu,

yara pare Po mangke raugaje rai.

⁶ Wapo kakai rasakinavo rai mamaisyó ama
ana

mo rave wasai rarijati.

Mo kakai rave intabo, wadasakinavo
rai jirum.

Ama awijo mo raunande wadamaname
mamoan,

weti wapo awijo ama panyoane ntiti
raugakananto rai.

⁷ Munije wato rararin dave muno marin-
sembe

ama bekero ranasine obo rai,

weti ama ayao kakai nseowa manakoe
rave to.

Maisyare omaisy, syare wapo mangke
muno siuri rasakinavo rai

yava manakoe tavon indamu mamaisy.

Weye taune mo taune raura mare,

'Risyrirati wanya ibe akarive!

Risyamo kavini mi risya jewena,

muno risyamo indati inani-
maumbe ana inta raije ramu.'

⁸ Ama anambe no tai maisy, weti indati
masyote intabo bayave yamo Amisyé
po siuri mangke raugaje rai vintabo:

Omamo wanene nande rai, rani-
maumbe muno marore raugaje rai.

Muno taname rave ramer weti
mangkura mewen dave.

Weye Amisyé pamo bambunin, indati Po
mangke raugaje rai."

⁹ Akarijo titi mine so, nanawirati
utavondijo munijo Babel ama anaerere rai
muno ama bekero ngkakainoanive obo rai,
indati woyov ara mami ngkaru ntende rai
aronó wo ranyanyuto mangkuro taname
rai muno wo ama kijaowe raen. ¹⁰ Umaso
nawamo ujaniv ti usayai waravaimbe weye
wo ama siuri rasyaniv. Ugwain ware:
"Wakoe! Munijo akoe Babel, kakaije nde
nai! Winyamo mbambunin dave, weramu
kakaije nde nai! Uma amije intabo bayave
yamo Amisyé po mangke raugaje nai
vintabo!"

¹¹ Muno vatano wanamavumbe no mine
so woyovo rai muno manimaumbe rai,
weye vatane inta una wakato indamu wo
awa ananuge ramavune jewen. ¹² Ananu
wo ramavune ratodi som: emas, perak,
oramo mamani, oramo ngkenav ntuna no
mayane rai. Muno ansuno ama mangke
nseo, ansuno mpoper, ansuno nsintair,
muno ansuno nijam. Muno inyoe kotaro
ranavano mbovov. Muno ananuge kotaro
rui vayave, inta mamó elepante apa ko-
rodoai raveano ranari, muno inta mamó
inyowo ramavunta ama mangke nseo rave

raveano ranari. Muno ananugo tembaga,
besije, muno oramo ntuntumbe raveano
ranari ratavon. ¹³ Wo anakotaro ranavan
mbovove ramavun tavon, maisyare inyo
ama kea manavan, bumbu, kemenyane,
murije, muno manino mbovov kaijinta ama
mangke nseo rave. Muno anaisyé tavon,
maisyare anggurije, manine, tepune muno
gandume. Muno sapije, domba, kuda,
muno kuda ama kereta ntavon. Wo vatano
wanapatambe mansamavun tavon; tugae,
wo vatane mansamavunta!

Weramu ananugo ama mangke nseo rave
tenambe umawe mamó wo ramavun aka-
toe ramu weye munijo Babel randami to.
¹⁴ Indati wo raura nanto munije umaso
rai ware, "Aro! Nya ananugo ngko dave
nanuga ntento rai mamó soamo rakanive.
Muno nya romane muno nya anakotaro
ntiti rave raumandi nai to. Indati nanto rai
jakato jewen kobe."

¹⁵ Indati vatano nanawirati awa doije
manui rave weye wanamavumbe ananu
namije rai no munije wato onawamo
ujaniv ti usayai waravaimbe, weye wo
munijo Babel ama siurije rasyaniv. Naije
woyov mami ngkaru ntende. ¹⁶ Naije
ugwain ware, "Wakoe! Munijo akoe Babel
mandami to! Wusyinoe vatano utantuna
no naije awa ansune udamavuna ama
mangke nseo, maisyare ansuno mpoper,
ansuno nsintair, muno ansuno nijam.
Mo emasije rave rayanyave, muno ana
ntuntumbe maisyare oramo mamani muno
oramo ngkenav ntuna no mayan tavon.
¹⁷ Weramu uma amije intabo bayave yamo
ama ananuge wato ngkakai ti rakanive
vintabo!"

Vatano wo nyomano akoe raugav no
mayan, muno arikainyo wanapatambe no
nyomane rai nanao indati usayai wara-
vaimbe. Muno vatano usea nyomane
rai, muno vatano wanamavumbe wo awa
ananuge raugav no nyomane umaso rai
wenanao usayai waravaimbe tavon. ¹⁸ Wo
munije umaso ranyanyut taname no ran-
nen, ama kijaowe nseo manakoeve. Arono
naije ugwain ware, "Munijo kaije raembea
inta mo munijo akoe so ramaisyé ramu!"
¹⁹ Manimaumbe rave, weti wo kapume
rataoponaje makari vone rai, woyov muno
mami ngkaruge ntende. Ugwain ware:
"Wakoe! Munijo manakoe mandami to!
Wusyinoe vatano awae nyomano akoe rai
ude tenambe indamu wanamavumbe no
munije so rai, ti wo doije ratande mansai
manui rave. Weramu uma amije intabo
bayave anakotaro ntuna no munije wato
ama uga rai ngkakai ti rakanive vintabo!"

²⁰ Inya, munijo ntiti warae, wasananibe
munijo akoe wato rai weye mandami to!
Amisyé apa kawasae weap, wasananibe!

Muno vatano Yesus po matutire weap, muno anawae Amisy weap, wasananibe rave! Weye Amisy po mangke raugaje munije wato rai weye mo wasave tatugadi.

²¹ Naije Amisy apa naito bambunin dave inta seo po oramo akoe inta raijaseo po ramau no mayan. Po raura pare, "Munijo akoe Babel raurata irati orame so rai! Indati munijo Babel randami bintabo ti rakanive. ²² Inya, munijo Babel, ndanide! Vatano wo kecapi rambaon muno airape ranepat weti ngkin, muno wo suline muno tavuna ramawisy, kotare so inta ranauno nai jakato jewen. Vatano maneme nsiridi wo ananuge ranari ti ngko dave onawamo mansaumandi nai tenambe. Muno mesino mo tepune raku-gan mamo mewen tenambe, indati vatane wo ranaun akatoe ramu. ²³ Yawainyo rapin indamu mbar omamo meweno nai. Vau-name ama one ratayao mamo inta raembeve akato jewen. Tugae, munijo Babel winy! Nya mangke taije maisy weye vatano wanamavumbe no nya yasyine rai mararin dave ware onawamo vatano akokoe no mine so, muno nyo vatano utantuna no mine vone so maponae tenambe. ²⁴ Muno winyamo nyo Amisy apa anawae muno Apa kawasae mao ti awa mavu nsopat. Tugae, vatano maubaisy tenambe no mine so nawamo, winya ana ndave mi mbewaramo awa mavu nsororop."

19

Kangkamambe Amisy ai

¹ Naije syo ana inta ranaun maisyare vatano wanui manamote manonon akoeve no munijo ntiti ugwain ware, "Kangkamambe Amisy ai! Wama Amisy opirati po wansapaya wama ayao kakai rai.

Opirati titi rave muno bambunin dave!

² Apa mangke po rapatimu omamo maisy muno no rai tugae.

Wepirati po mangke raunanto irati wanya anaerer akoe rai,

wemirati mo munije tename waraya raugabe indamu wo ayao kakaije rave.

Amisy po mangke raugaje rai to, weye wanya umaso mo Apa vatano wanapatambe Aije maubai to."

³ Muno jirum akato wo raura ware, "Kangkamambe Amisy ai!

Tanamo mo munijo akoe wato ranen omamo mpamo kakai yara nen tawan

weti ama kijao ntamija nuge nuganui!"

⁴ Vatano ube akarive mansano tenamara eane mambisy umawe nawe, ana akokoe

Amisy po manari yano mambisy umawe nawe, awa vukane ranteter ubeaje Amisy ai, wepirati tuna irati Apa kursijo titi rai. Muno wo raura ware,

"Tugae, kangkamambe Amisy ai!"

⁵ Naije idaniv anamote inta ngkin no kursijo titi umawe rai, mo raura mare,

"Inya, vatano wapanapatambe Amisy ai muno wapo asyaniv, syare wakangkamambe wama Amisy ai!

Vatano mamaun muno vatano akokoe weap,

syare wapo ararimbe!"

⁶ Naije idanaun akato maisyare vatano wanui manamote manonon, maisyare mana vuke inta nsopato pene rai ranauni nto muno maisyare katitire ama kino manakoe ramaisy, onawamo ugwain ware, "Kangkamambe Amisy ai!

Weye wama Amisy, opi apa vambunine ntiti

mo vambunino kaijo rui rakivan tenambe,

Opamo be akarive.

⁷ Wade ramu wansananibe muno wansanayanambe,

muno wamo Amisy aura titive!

Weye Domba Tuvan apa masyoto bauname mamaisy,

muno Apa wanya ma taune man-atatayaube

indamu nsiso ama vauname umaso rai.

⁸ Ansuno mpopper muno ngkena dave ratayao rai

mamo raunanto rai to."

(Ansuno mpopper namije mamo raurata irati Amisy apa kawasae awa ana udave mamai no Amisy amune raije rai.)

⁹ Umba naito Amisy napije po raura rinai pare, "Ndatoe taiso: 'Kove ngkov irati vatano mawainde tavono ono Domba Tuvan apa vauname umaso raije mai!' " Naije naito Amisy napije po raura iridi pare, "Amisy apa ayao tugae mi som."

¹⁰ Naije syo sya vukane ranteter no naito Amisy umaso amun, syare ibeaje ai. Weramu po raura nande inai pare, "Weinya! Vemo mbeaje inai nora, yara mbeaje irati Amisy obo ai! Risyamo syo namai tavon. Risy winye nya arakove nawe wamirati wambe arakobe wamanapatambe Amisy ai muno wamo Yesus apa ayao rajaro matuve." Weye Yesus apa ayao po Amisy aura omamo mamaisy ayao Amisy po raugaje Apa anawae mansai rai.

Yesus seo tuna kuda popere ai

¹¹ Naije munijo ntiti rausiso ti syo raen kakavimbe. Tugae rave, kuda popere inta

* 19:11 Yesus opamo vatano napije.

puje. Vatano seo tuna ai awainamo “Tugae” muno “No tawan no Amisye apa bekere rai.”* Wepamo po vatane awa mangke rapatimu ti mamai dave. Muno Opamo marovave Apa marova mai ti mamai dave tavon. ¹² Amije mamo maisyare tanamo mbadurur muno akari vone mamo sapeo manui rauseo ntami. Muno tame inta ratoe Ai, tame umaso vatane inta po raen tatugare ramu, yara taune Pi po raen. ¹³ Muno ansuno Po rave mamo rayansundi mavu inta rai to, muno Apa tame mamo “Ayao Amisy.” ¹⁴ Naito munijo ntiti utavondi Ai tenambe. Onawamo usea irati kuda popere mansai muno wo ansuno mpopere ngkakavin dave rave manasine rai. ¹⁵ Vatano napije awa mamo omake nsiu mo rayuje, muno wemirati Po raveano vatano susyo ntuna no mine so maotar indamu Po mapinde. Be akarive mansai muno Po manepato Apa isyo besije rai indamu ubeta Ai.† Muno Po apa marova mamaugusya no Amisye apa mampiriario manakoe rai indamu Po makugano rai. Maisyare omaisy, Amisye, opirati apa vambunine ntiti rave, Apa pari mangke raugaje mai. ¹⁶ Vatano napije Apa ansuno manawadi rai muno Apa ajo kamane rai, tame so ratoe rai:

AKARI TITI PO AKARIJO TITI MAKIVAN
TENAMBE,

AKARI NO VOMBE IRATI
AKARI UNA NO RUI RUI VAYAVE MANSAI

¹⁷ Naije risyo naito Amisye inta aen teto uma ami rai muno gwain akoeve nanto insani mai tenambe, nanawirati ubadirir no naumo warae pare, “Insanije, wade no so! Wapanugan indamu wapo Amisye apa ono manakoe raisy! ¹⁸ Wade indamu wapo vatano ugwenene awa ine raisy, vatano nanawirati utavondi Amisye aije ramu: akarijo titi muno nait akari muno naite nanawamo wapo awa ine raisy. Muno kuda muno vatano usea utantuna kuda mai awa ine rai tavon. Muno vatano aro muno vatano aro jewene nao tenambe, vatano mamaun muno vatano akokoe, weti vatan tenambe nanawirati wonayo Amisye ai, wapo awa ine raisy!”

¹⁹ Naije risyo ana mamun umawe aen.† Muno syo akarijo titi munije so muno awa naito matayao marova rai mansaen, onawamo wanugan tenambe irati ana mamun wato atavon. Wanatatayaube indamu umarovave irati Vatano seo tuna kuda popere aije Ai muno Apa naite mai. ²⁰ Umba Vatano seo kuda popere ai Po ana mamun napije aijar. Muno Po anawae angkari aijar tavon, wepirati po anapaporainye raroron ana mamun amune rai indamu po vatano

wanui maponae. Vatane wato nawirati ana mamun umaso apa pake no mai ti ubeaje irati apa yare rai. Ana mamune muno apa anawae angkari, jirume so yamaugo yaibe no tanamo akoe rai, wemirati mbadurur no tawan muno manakoe maisyare nawanane ramaisy. ²¹ Muno aya naito yo matayao nawamo maubaisy tenambe, maubaisy omako uma muje irati Vatano seo tuna kuda ai awa rai. Naije insani ude tenambe wo awa ine raisya uman dave.

20

Arono Yesus be akarivea tume ribuge intabo

¹ Naije syo naito Amisye inta aen pajje no munijo ntiti. Aneme mamo po kepo rave unsanda Atemo Wen Akari Makova Rai rakepe rajjar muno po waijo besije rave aneme, ajoe raokokae inta rajjar tavon. ² Naije po tawae akoe umawe rajjar — tawae wusyin ntami tawan, ama tame mirati Anakakai Akoe. Muno po raokokaeya ntamija tume ribuge intabo. ³ Po tawae umaso raokokae ti ramaugo Atemo Wene umawe rai. Umba po unsanda umaso raugaji matuve muno po rakepo matuve indamu tawae umaso mo vatane maponae akato inya, indamu no no ateme so ama uga rajja tume nanto ribuge intabo ai. Arono tume umaso mamai to, indati naite po rapaya masyote kavinta yai.

⁴ Umba syo kursijo titi manui raen, muno vatano utantuna rai syo mansaen. Vatane umaso nanawirati vambunine raunanto mansai indamu wo mangke rapatimu. Wenanawamo rugara vatano nanawirati makuinye raotar weye wo ayao kovo Yesus raura kakavimbe muno wo Amisye apa ayao ravov. Vatano nanawije ubeaje ana mamune ai ramu muno apa yare rai jewen tavon. Muno ana mamune apa pake no irati mande muno maneme rajje ramu. Wenawamo soamo ukovakato, ube akarive Yesus atavona tume ribuge intai. ⁵ Weti vatane ukovakato no wene rai ama manasyine mi so. (Weramu vatano wene nde mansai kajijinta onanawamo udijat. Indati ukovakato usen no wene rajje ramu ava tumo ribuge intabo mewen dati.) ⁶ Kove ngkov irati vatano ukovakato no wene rai ama manasyine so rai mansai! Weno jirume mamo mbambunin indamu mo mansaugav akatoe ramu. Wenawamo ube syembe wanapatambe Amisye ai muno Yesus Kristus ai, muno ube akarive Yesus atavona tume ribuge intai.

Amisye po mangke raugaje Anakakai Akoe ai

* 19:15 Mazmur 2:9 † 19:19 Ana mamune sopamo napirati tipu no mayan (13:1-10, 17:11-14).

⁷ Arono tumo ribuge intabo mewen kobe, Anakakai Akoe apaya irati tanoano makova umawe rai. ⁸ Indati pusyo poroto po vatano susyo ntuna no mine so maponae, nanawirati una no ovar ami mambisy, awa tame mirati Gog muno Magog.* Anakakai Akoe po apa vatane umaso manugan tenambe indamu umarovave Amisy ai. Naito mine so awa wanui mammo manakoe rave, weti matore kakai, maisyare nayavo ntuna no mayano warave. ⁹ Naije naito mine so mandayano nuge raita, weti uta no rui rui. Muno ude no munijo manakoe inta rai,* omirati munijo Amisy aemen dai mijem muno namirati Apa kawasae utantuna rai. Umba naito mine so wo munije so rawariki indamu umarovave Amisy apa kawasae mansai. Weramu naije taname no no naumo warae maje mo naite umaso mansanen mangkur ti makanive. ¹⁰ Muno Anakakai Akoe wepi po mansaponae umawe pamo Amisy po amaugo tanamo akoe rai. Tanam akoe so namirati ana mamune pe anawae angkari pe yamaugusya yaibe raijoe. Indati awa siurije manakoe siman muno naman ntoa nuge nuganui.

Mangke raugaje irati vatano ugwenene mansai

¹¹ Umba syerato syo kursijo poper muno manakoe inta raen muno syo Amisy aen tuna rai. Arono Amisy aroron, naije naumo warae muno mine so raumandi anawadive muno raen akatoe ramu. ¹² Muno risyo vatano ugwenen to mansaen: vatano akokoe muno vatano mamaun syo mansaen usayai no kursije umawe ama usye rai. Naije buku manui raneka. Buku manui umaso mo vatane awa ana udave ratoo rai tenambe. Muno buku intabo raneka tavon, omamo mo vatano ukova nuge nuganui awa tame ratoo rai. Naije Amisy po vatano ugwenene awa mangke rapatimugo mansai, mamaisy irati awa ana udave rarijati, wemirati ratoo no buku manui namije rai to. ¹³ Naije nawanane mo vatano ugwenen nanawirati utantuna no ama uga rai maijasen indamu usayai no Amisy amun. Muno Wen Akoe muno Hades† yo aya vatano ugwenen yo maijare maunande tavon. Umba vatano ugwenene umaso nanawamo Amisy po awa mangke rapatimu tutudi mamaisy awa ana udave rarijati. ¹⁴ Umba Wen Akoe muno Hades onayamo Amisy po yamaugo tanamo akoe rai. Tanamo akoe somamo weno jirume mijem. ¹⁵ Muno vatano are nawirati awa tame ratoo Bukugo

Kovo Nuge Nuganui raije jewene nawamo mansamaugo tanamo akoe so rai tavon.

21

Naumo wanyin muno munijo wanyin

¹ Umba syo naumo wanyine muno munijo wanyine raen, weye naumo mansyyn muno munijo mansyine raumandi to. Muno mayane mammo inta raen akatoe ramu. ² Naije syo munijo ngkakavimbe raen, omamo Yerusalemo wanyine mijem, wemi no no Amisy ai no munijo ntitu muno maje. Omamo rayanyave ti ngko dave, maisyare wanya rayanyave indamu nsiso ama ono vauname rai. ³ Naije syo anamoto akoe inta ranaun no kursijo titi umawe rai mare, “Waperata! Soamo Amisy apa tuna raije mammo raunu aje, weti nte no vatane awa yasyine rai! Indati Amisy no irati vatane matavon tawan tutir, muno onawamo indati Apa kawasae waino mansai. Amisy taune pi pe una tenambe muno Wepirati awa Amisy. ⁴ Muno Amisy apa kawasae mami ngkaru ntende mammo Po raupaisy ti mewen dave to. Wene mammo nande mai jakatoe ramu. Vatane mani-maumba muno woyov akatoe ramu muno siurije nande mai jakatoe ramu. Wey anakotaro mino wusyin omamo raumandi to.”

⁵ Amisy, wepi tuna no apa kursijo titi rai, Po raura pare, “Soamo Syo anakotare ranari wanyimbe vintabo!” Muno Po raura rinai tavon pare, “Nyo anakotare so ratoo weye Sya ayao syo raura somamo tugae ma inda vatane wanave rai.”

⁶ Muno po raura akato rinai pare, “Anakotare nande tenambe to. Rinawainamo Alfa muno Omega, ama ine mare mansyyn dave weamo Risy, mansanana maran akato indati rino tutir. Vatano rui vayave awa ngkangkamandi, weamo Syo mana rawavin no mana ami kove ti Syo raunanto po ramanam, mana wemirati mo kovo nuge nuganuije raunande ai, weramu po ravaibe ramu. ⁷ Are pirati bambunin po ayao mamun mine so rapinde, indati anakotaro ngko dave so apaura rai vintabo, muno Risyirati indati apa Amisy muno opamo Sya arikainy. ⁸ Yara vatano ujaniv ti wanave Rinai jewen muno vatano wonae wanavei, vatano ukakainoanive, muno vatano wo vatane maubaisy, vatano anarerere ugavo mansarijat, vatano wo nyovara kakai raugav, vatano ubeaje yare rai, muno vatano wayarurijabe tenambe — vatan tenambe umaso nawamo indati mansamaugo tanamo akoe rai, namirati

* 20:8 Ezekiel moto 38-39 * 20:9 Munijo namije mammo Yerusalem. † 20:13 Hades mammo munijo vatano ugwenen una rai ama tame mijem.

mbadurur no tawan. Wemirati weno jirume mijem.”

Yerusalem wanyine

⁹ Naije naito Amisy e inta nande rinai, opamo naito kaururume unawe inta piye, nanawirati wo kapije kaururum ntairi jirati Amisy e apa siuri mangke marane so rai raijar. Muno naite umaso po raura rinai pare, “Winde, risyo wanya mo Domba Tuvan avone rarorono nai.” ¹⁰ Naije Anawayo Amisy e mo inausuru muno naite umaso po inaugav ririnta no unato ntiti rave. Naije po munijo Yerusalem, munijo ngkakavimbe namije, raroron irati rinai, omamo no no Amisy e ai no munijo ntiti muno maje. ¹¹ Munije umaso ntairi jirati Amisy e apa varo ngkovo ntiti rai. Vare so maisyare oramo mamani ntuntumbe ngko dave, muno ngkena dave maisyare oramo yaspis, muno ndandinit maisyare kansina we ramaisy. ¹² Munije ama yano orame mamo manakoe muno ntiti, muno ama unsanda akokoe raisisa mamo abusyinara eane jirum. Unsanda ranteter mamo naito Amisy e usayai rai teter wo raman. Muno unsanda ama vone mamo susyo Israel abusyinara eane jirum awa tame ratoe tutudi. ¹³ Unsanda mandeija mirati no no ranijo muram, ranijo wanampui mandeij tavon, muno unsanda mandeij tavon no no ranijo wanansai, muno ranijo varet ama unsanda mandeij. ¹⁴ Yano oram munije umaso mamo orame abusyinara eane jirum wemirati veano ama ate rayanon. Muno Domba Tuvan apa arakovo po matutir mansano abusyinara eane jirum wenawirati awa tame ratoe irati orame umaso rai tebebe.

¹⁵ Naito Amisy e payao nande rinai umaso po tauno emasije inta raijar indamu po munijo namije rataun. Po ama unsanda rataun muno ama yano orame rataun tavon. ¹⁶ Munijo namije ama ntami ma maito maide, ama waravainye me ama vasye me onayamo ratauna mamai tenambe. Naije naite umawe po munije umaso rataun, ama waravainye, ama vasye, ama titije maito maide, weti rator tenambe ama kilometer omamo ribuge jirum muno ratusije mambisy (2.400). ¹⁷ Naije naite umaso po yano orame umawe rataun: ama titi ma meterije tename mandeij. Naite apa dataune umaso mamo mamaisyo vatane wandataune rai.

¹⁸ Yano orame mamo oramo mamani rawainamo yaspis veano ranari. Yara munije ama uga mamo emasijo kakui omirati veano ranari tenambe. Emasije umaso ndandini dave maisyare kansina ramaisy. ¹⁹ Oramo raveano yane umawe

ama ate ranari mamo orame kotare ntuntumbe, ama mangke nseo rave. Weti oramo manasyine mamo oramo yaspis, oramo jirume mamo oramo nilam, mandeije mamo oramo mpopere, mambisy mamo oramo ev. ²⁰ Oramo radani mamo oramo unam, oramo kawije intabo mamo oramo nijam, oramo kaururume mamo oramo ngkugaave, oramo kaumandei omamo beril, kaimambisy omamo oramo topas, oramo abusyne mamo njayaibe, oramo abusyinara eane intabo mamo oramo ngkeke, muno oramo abusyinara eane jirume mamo sintair. ²¹ Oramo raveano unsanda abusyinara eane jirume umawe ranari tutudi mamo oramo mpopere ngkenav. Weti unsanda nanentabo amaura orame intabo ai indamu veano anari. Muno munije so ama uga muno ama unanuijo akoe mamo emasijo kakui bo mi veano ranari, omamo ndandinit maisyare kansina ramaisy.

²² Syo Yavaro Amisy e raen no munijo namije ama uga rai jeben, weye Amisy, wepi apa vambunine ntiti mo vambunino kai rakivan tenambe, taune no tawan no naije muno Domba Tuvane no tavon. Weti vatane usambayambe no Yavaro Amisy e rai jakatoo ramu, yara wanawadi usambayambe Amisy e taune ai muno Domba Tuvane ai. ²³ Muno uma apa vare raen akatoo ramu muno embae ama vare raen akatoo ramu, yara Amisy e taune pi baro Apa ngkovo ntiti rave rautan no munijo namije ama uga rai muno Domba Tuvan taune pi baro rai tavon, maisyare yawainye ramaisy. ²⁴ Vatan tenambe indati wanya irati vare umaso ama uga rai. Muno akarijo titi mine so nao tavon wo awa romane raugave usisa no munije umaso ama uga rai. ²⁵ Munije umaso ama unsanda manyamo rausisa ti ntuna tutir, rauguji intai ramu, weye namane mamo inta raen akatoo ramu. ²⁶ Vatan tenambe wo awa romane muno awa ngkovo ntiti raugav bintabo usisa no Amisy e apa munije umaso rai indamu wo Amisy e ararimbe muno wo ajaseo titive. ²⁷ Weramu ananugo ngkakavin jewene mamo nsisoe ramu. Muno vatano are nawirati awa ana udave ngkakainoanive muno vatano rui wayarurijabe wenawamo ude usisa munije so raije ramu. Yara vatano awa tame ratoo rati Domba Tuvane apa Bukugo Kovo Nuge Nuganui rai, webo nawirati ude usisa munije so rai.

22

Mana ami mo kove raunande

¹ Naije naito Amisy e umawe po mana ami mo kovo nuge nuganuije raunande raroron

irati inai. Mana namije ndandinit maisyare kansina ramaisy. Njam no Amisyapa kursijo titi tuna raije rai, omirati Domba Tuvan apa kursijo titi tuna rai tavon. ² Muje manya no munije umaso ama unanuijo manakoe ama uga rai. Mana namije ama tuga rani rani inyo nsayai dai, inyo umaso ama mane mo kovo nuge nuganuije raunande.^{*} Tume inta pamo mambe abusynara eane jirum, weti embae inta pamo man, inta pakato man. Ama wao mammo mo saumane raugavo vatan tenambe mai weti ugwanen akatoe ramu. ³ Anaamatan Amisyapa ma inta no akato vatane mansai no munije so ama uga rai ramu.

Amisyapa kursijo titi tuna rai, omirati Domba Tuvan apave rai tavon, ntuna no munijo namije ama uga rai. Umba vatano wanapatambe Amisyapa ai ube sambayambe Ai. ⁴ Muno wo Amisyapa amune ranyanyut muno Apa tame ratoe irati mande rai. ⁵ Namane mammo inta makare akatoe ramu. Yawainye ma inta rakaindi akato jewen, uma apa vare ma raumandi yara Amisyapa taune pirati baro mansai. Muno Amisyapa kawasae indati ube akarive atavona nuge nuganu.

Indati Yesus pavave pakare

⁶ Naije naito Amisyapa napije po raura rinai pare, “Anakotaro ratodi tenambe somamo tugae ma inda vatane wanave rai. Amisyapa, wepi po Anawayo Vambunine raunande Apa anawae mansai, Opirati po apa naite inta atutir indamu po raroron irati vatano wanapatambe Aije mansai ana mavave indati nande kobe.”

⁷ Umba Yesus po raura pare, “Wadanide! Syavave ride! Kove ngkov irati vatano utavondi jirati ana raurairive ti ratoe no bukuge so rai mansai!”

⁸ Risyirati Yohanes, risyo anakotare so raen muno syo raraniv tenambe vintabo to, weti syo ratoe so. Arono syo raen muno syo raraniva mewen, naije syo vukane ranteter no naito Amisyapa umaso amun, napirati po anakotare so rarorono rinai, syare ibeaje ai. ⁹ Weramu po raura akanande rinai pare, “Vemo mbeaje rinai nora! Yara mbeaje irati Amisyapa obo ai! Risyamo syanapatambe Amisyapa ai vayave, maisyare muno taune winyamo nyanapatambe Ai, muno maisyare nya arakovo anawae Amisyapa wanapatambe Ai muno vatano ubeta ayao ratoe no bukuge so rai mansamai tavon!”

¹⁰ Naije po raura rinai pare, “Vemo nyo ayao raurairive ti ratoe no bukuge so inta rangkokaiibe nora, weye ama masyote mararai to. ¹¹ Weti arono munije ama akari, are pirati anuga mamune no ai

tutir, weamo apaya ra beare wemai kai. Muno are pirati gwama kakai no anuga raive tutir, weamo apaya ra no kobe taije. Yara are pirati anuga mamai no Amisyapa amune rai, weamo avara po ana mamaisyapa obo raija kobe tutir. Muno are pirati anuga ngkakavin, weamo avara po anuga raeranande indamu ngkakavimbe tutir.”

¹² Amisyapa Yesus po raura pare, “Wadanide! Syavave syakare kobe. Syo vatane awa ana udave ama ine raugav, ti ide Syo raunanto mai mamaisyapa awa ana udave rarijati. ¹³ Risyirati manasyin dave, muno maran dave Risyi no akato. Manasyin dave weamo Risyi, mansanana maran akato indati rino tutir. Weti inawainamo Alfa muno Omega.”

¹⁴ Kove ngkov irati vatano usakinavo awa ayao kakaije rai ti manuga ngkakavimbe mansai, maisyare vatane wo awa ansune rapapi ti mpopper wemaisyapa. Weye wenawirati Amisyapa bekeru mansai ti, Po varore raugaje mai indamu usisa Apa munijo namije rai muno wo inyo mo kovo nuge nuganuije raunande ama mane raisy. ¹⁵ Yara vatano ukakainoanive usisa kakai: vatano wo nyovara kakai raugav, vatano anaerere ugavo mansai, vatano wo vatane maubaisyapa, vatano ubeaje yare rai, muno vatano manayanambe wo arurijate rator muno wo vatane mansaponae—are nawirati wo ayao kakai kotare umaso rave wenawamo indati usisa munijo we ama uga rai jewen, yara una no ama akiri.

¹⁶ “Risyirati Yesus, Syo sya naite atutir pore Sya vatano wapanapatambe Rinai wasai indamu wapo anakotare so raura kakavimbe no anugano Amisyapa mansai. Risyirati inavaki no Daud apa susye rai, muno Risyirati inaurata irati Tundinit seo no wanamuram amaisyapa, wepirati ba dave.”

¹⁷ Anawayo Vambunin muno Wanya mo Domba Tuvane aovan yo raura yare, “Winde!” Vatano are nawirati wo ayaowe so ranaun, weamo wo raura tavon, “Winde!”

Are pirati awa ngkangkamandi, weamo syare de! Muno are pirati pare beker, weamo syare de indamu po mana raugav mawebe vayave, po ravaibe ramu, mana namirati mo kovo nuge nuganuije raunande.

Ayao ama maran

¹⁸ Risyi Yohanes, risyo ayao so ratoe nde irati are bayave po ayao raurairive ti ratoe no bukuge so rai ranaun. Syare wasaemen: Ranivara vatane inta po ayao kaijinta rajanande ratoe tavon no Ayao Amisyapa so rai, weamo indati Amisyapa po apa siuri mangke syo raura kakavimbe bukuge so

raijoe raugaje ai tenambe. ¹⁹ Muno rani-
vara vatane inta po anakotaro raurairive
no bukuge so rai inta ransop akaje weti ma-
maun, weamo indati Amisye po kovo ratoe
no bukuge so raugavo aora, weti tavondi
vatano usisa una no munijo ngkakavimbe
namije rai matavone ramu muno apaveo
nyoamano mo kovo nuge nuganiu rau-

nande raije jeben.

²⁰ Yesus, napirati po anakotare so raro-
rono wansai, pare, “Tugae, ride syavave!”

Muno risyo raura akanande Ai syare,
“Tugae, Amisy Yesus, winde!”

²¹ Amisy Yesus apa kove no Apa kawasae
wansautan tenambe. Amin!